

**QUIARINIO PUEYASO RUPAA
PA JIYANILJIA
JESUCRISTOJINIJI
PUEYANO RUPAAJINIA**

El Nuevo Testamento
de nuestro Señor Jesucristo
en el idioma
arabela



LA LIGA BIBLICA

LAS SAGRADAS ESCRITURAS PARA TODOS

Crete, IL 60417

EE.UU.

El Nuevo Testamento
de nuestro Señor Jesucristo
en el idioma
arabela

Primera edición, 1986
Segunda edición, 2008

Publicado por
© LA LIGA BIBLICA 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

NAAJIONEECA RIURIATAJARA

(CONTENIDO)

Mateo naajiotasano Jesucristojiniji (San Mateo)	Mt	5
Marco naajiotasano Jesucristojiniji (San Marcos)	Mr	41
Lucas naajiotasano Jesucristojiniji (San Lucas)	Lc	63
Juan naajiotasano Jesucristojiniji (San Juan)	Jn	100
Jesucristo jiyaramiquishano miishano (Hechos de los Apóstoles)	Mii	127
Pablo naajionee Roma tiacajinia quiniaa Pueyaso pueyacuara (Carta a los Romanos)	Ro	163
Coteenu Pablo naajionee Corinto tiacajinia quiniaa Pueyaso pueyacuara (1 Carta a los Corintios)	1 Co	180
Tanee Pablo naajionee Corinto tiacajinia quiniaa Pueyaso pueyacuara (2 Carta a los Corintios)	2 Co	198
Pablo naajionee Gálata jiyajinia quiniaa Pueyaso pueyacuara (Carta a los Gálatas)	Gá	209
Pablo naajionee Éfeso tiacajinia quiniaa Pueyaso pueyacuara (Carta a los Efesios)	Ef	216
Pablo naajionee Filipino tiacajinia quiniaa Pueyaso pueyacuara (Carta a los Filipenses)	Fil	222
Pablo naajionee Colosa tiacajinia quiniaa Pueyaso pueyacuara (Carta a los Colosenses)	Col	226
Coteenu Pablo naajionee Tesalónica tiacajinia quiniaa Pueyaso pueyacuara (1 Carta a los Tesalonicenses)	1 Ts	230
Tanee Pablo naajionee Tesalónica tiacajinia quiniaa Pueyaso pueyacuara (2 Carta a los Tesalonicenses)	2 Ts	234
Coteenu Pablo naajionee Timoteocuara (1 Carta a Timoteo)	1 Ti	236
Tanee Pablo naajionee Timoteocuara (2 Carta a Timoteo)	2 Ti	241
Pablo naajionee Titoocuara (Carta a Tito)	Tit	245
Pablo naajionee Filemoncuara (Carta a Filemón)	Fi	247
Hebreo pueyacuara naajionee (Carta a los Hebreos)	He	248
Santiago naajionee (Carta de Santiago)	Stg	262
Coteenu Pedro naajionee (1 Carta de San Pedro)	1 Pe	266
Tanee Pedro naajionee (2 Carta de San Pedro)	2 Pe	271
Coteenujuanaa Juan naajionee (1 Carta de San Juan)	1 Jn	274
Tanee Juan naajionee (2 Carta de San Juan)	2 Jn	278
Socua tanee Juan naajionee (3 Carta de San Juan)	3 Jn	279
Judas naajionee (Carta de San Judas)	Jud	280
Jesucristo niqutishano Juan (Apocalipsis)	Niq	282
Maatia pahuatasano jiyajeneta rupacajiniji (Glosario)		301

MATEO NAAJOTASANO JESUCRISTOJINIJI

Jesucristo supuetanaajini pahuatasano

(Lc 3.23-38)

1 ¹Jesucristoori supuetana Abraham jihuacuajinio supueno quiquiaari, supuetana David niqiuoacuajinionio. Nioori Jesucristo supuetanaa sesaca. Naa quiquiaaritiij:

²Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaa quejuhuaj. ³Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niqiuocua. Faresri Esrom que quiquiaari. Esromri Aram que quiquiaari. ⁴Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niqiuocua.

⁷Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹Uzíasri Jotam que quiquiaari. Jotamri Acaz que quiquiaari. Acazri Ezequías que quiquiaari. ¹⁰Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹Josíasri Jeconías que quiquiaari, tapueyocuaa quejuhuaj. Jiyacaritiij, Israel pueyapueeri quioosaaquiaari Babilonia jiyajiniara. ¹²Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶Jacoboori José que quiquiaari. Joseeri María nyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaajinia sequeya “Pueyaso jiyarosano Jiyaniijiarano”.

¹⁷Naacuajitiij, Abrahamjini, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritiij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaanquiaari.

Jesucristo rasacari pahuatasano

(Lc 2.1-7)

¹⁸Naa quiquiaariti Jesucristo rasacari: na nuclarano Maríari tari Joseeta camiriquiano quiquiaari. José numuetuqueyaquishacarijia María, Maríari tariucua manajaraca quiriqiaa. Pueyaso Sohuanucuaajaari na manajetequiaari. ¹⁹Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriqiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niqiaara. ²⁰Naa José niishiriojosacari na cartenura juucuatej, Pueyaso seruuri nocua muetaquiaari na maquenujini. José sequeereeri:

—Supuetana jiyaniijia David niqiuoacuajinio supueno Joseena, María quia camiri naajaa. Maja quia puerenu.

Pueyaso Sohuanucuaajaari na manajorucuaa. ²¹Maríari neyanu ranutaniya. Quiocua na sesojore “Jesu”. Sesa na pueya miiijosano tuujunutaniya nojori jiuujajiniijiri. Naaratej, na sesaari quiniutianiya “Jesu”.

²²Jesu rasaanuuri naa quiquiaaritiij, tariucuaaanu pueyara Pueyaso sequesano caminiujiunia pahuatasano tohuateenura. Pueyasoori naa na pahuataniquiaari jiyanohua tarijiatej:

²³“Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’”.

Nioori pueyano rupaajinia sequeya “Pueyaso pata quiyani”.

²⁴José niucuasacari, nojuajaari naa miiquiaaritiij taa Pueyaso seru sequequiaari nojuacuajani. María riqiaariiri na tiajiniara necocuara. ²⁵Nojoriiri maja na quiniu quiquiaari juhua seetanujanaa camitioono, María jaara raquiaari neyanujuatiija. Jaara na raquiaari, na sesojoreeri “Jesu”.

Niishijiaca tiuquiiijosacari conaajaacua

2 ¹Jesuuri rasaanquiaari Belén tiacajinia, Judea jiyajinia. Cuno quishacari, Herodesri* jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquiiioquiaari Jerusalén tiacajinia. Nojoriiri Jesu niqiniuria tiuquiiioquiaari jiya pajamaji. ²Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaanucuaani? Canaari niishiyani nojuajaari tari rasaanucuaa. Canaari na rijia niqiuoianu jiya pajamajini, canaa jiyajinia canaa quishacarijia. Canaari nocua nyareeni canaa shuqiritianura nojuaja, jiyaniijiarano na quiniuucua.

³Jiyaniijia Herodes tojishacari naa niishijiaca sequesantej, jiyanohua tacaquiaariiri. Puetunu Jerusalén tiacajinia quiniaajanaari tacaquiaarijiuhuj. ⁴Nocua, Herodesri Judiocuacaacuara secojonaa sequequiaari nocua nojori nijionura, Moisés Rootasanojini niishitiojonaanio. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiarantej?

⁵Nojoriiri na riucaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujiunia sequesano. Cuno tariucuaaanu naajiotasanocuaajaari naa sequeyatej:

⁶“Belén tiacajinia quiniaanaa, nia tiacaari maja najuhuana shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supenutaniya. Nojuajaari socua cutara Jiyaniijiajanaa quiniutianiya tamsaca jiyaniijiacajini Judea jiyajinijinio. Cunoori maninia jitianutaniya cua pueya, Israel pueya”.

⁷Naa pueya sequesano na tojiniu nuhuajitiij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niqishaacanua seetanujanaani?

⁸Nojori riucaanu nuhuaji, Herodesri na sapojonuta nojori sequeyatej:

—Nia quiaare Belén tiacajinia. Niocua jacaria nequesoreeta-see cuno mueyajini. Naa jaara na riuriatate, niocua cua numootecuhua. Janiyacua nocua quiaarejaniuhuj cua shuqiritianura nojuaja.

⁹Niishijiaca tojiniu nuhuaji naa jiyaniijia Herodes sequesantej, nojoriiri quiojyareecuhuj. Jiya pajamaji na niqutiushano rija niqutiuriiri nojori puetaano. Rijiaari pootia tiuushii tia caco, tee mueya quiriqiaacuajani. ¹⁰Nojori niqushacari rija, niishijiacaari jiyanhua timitiuiquiaari. ¹¹Tiaco tiuqutiaseeri. Conaja niqutiushii na nucua Maríataari. Conajaacuara mojuquetacoquiaariiri. Na shuquiritatureeri. Na nuhuaji, niishijiacaari na patootasano casaa riataquequiaari, nareya na niqutioscoriquiano conaja. Nojoriiri na niqutiuiquiaari oro*, shanhua jaanutaja catijasocoriquianojuhuaj, tamaatiuucua shanhua jaanutajanio. Na sesaari tahue rupaajinia “mirra*”. ¹²Na nuhuaji, Pueyasoori cuno niishijiaca sequequiaari na maquenujia, maja Herodescua nojori tacatenuhuara Herodes nojori pohuatanhuara conajajiniiji. Naacuajitij, niishijiacaari tamonu nucuahua tacatequiaarihua na jiyajinihuara.

Egipto jiyajiniara Jesu mashitiasaanujiniiji pohuatasano

¹³Niishijiaca jaara quiaquiaariuhua, Pueyaso seruuri Joseecua muetaquiaari na maquenujia. José sequereeri:

—iQuia sanere! iConaja quia mashitiare na nucua Egipto jiyajiniara! Quiniqui nia quishii, janiya cuara sequerohua quiajanijajaatijia. Herodesri Belén tiacajinia na pueya pajetenutaniya conaja, na motesocoriquiano.

¹⁴Joseeri sanequiaari. Cuno niucuaaja, conaja mashitiare na nucuaajaari Egipto jiyajiniara. ¹⁵Nojori tiuquishacari Egipto jiyajinia, ti quishiiquiaariiri, Herodes cuara cusooraajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinjia, Egipto jiyajiniiji na tacatenuhuara”.

Herodes puecootesacari muerasu

¹⁶Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanhua juaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quinia muerasunio. Naa miiquiaariiri Jesu na monura juucua. Herodesri na pueya sequequiaari cuara puecoosaaria puetunu shusha roosanojuanaa, mariyata canapute caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaaquiaari. Juhanojuajaari maja caapiqui marijia shocojonu quiquiaari rija niquishaanujiniiji. ¹⁷Naacuajitij, tariucuacaanu Pueyaso sequesano caminiujiunia Jeremías sequesanoori tohuateequiaari. Jeremías sequesanoori naa naajiotasaaquiaaritij:

¹⁸“Sapuenuri tojishiya Ramá tiacajinia. Jiyanhua taraatia.

Raquelri necohuacua sariyacojiya. Majaari na paniniu na cumaniijasaaanura. Necohuari tari puecoosaarucuaa”.

¹⁹Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujia, Egipto jiyajinia nojori quishacarijia. ²⁰Na sequereeri:

—Quia sanere. Mueya quia tacaretaarohua Israel jiyajinihuara na nucuaaja. Mueya monu panijiaari tari cusonuucuaa.

²¹Joseeri sanequiaari. Mueya tacaretaquiaariuhua Israel jiyajinihuara na nucuaajaari. ²²Israel jiyajinia na tiuquishacari, Joseeri numotesaaquiaari Herodes niyanu Arquelaoiri* jiyaniijia quiriqiaa jiyacari, na que niti Judea jiyajinia. Nocuaaja, Joseeri puerequiaari quiniqui na quiniuria. Jiyacarijuhuaj, Pueyasoori na niishitioquiaari na maquenujia, tamocora na quianura. Naaratej, Joseeri mueya nucua pacuquiaari Galilea jiyajiniara. ²³Galilea jiyajinia nojori tiuquijiosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujiunia sequesanoori tohuateequiaari nojori jaara naa naajiotaquiaaritij:

“Jiyaniquishaanutaniyari Nazaret tiacajiniijio pueyano”.

Tiuquinijiona Juan pohuatasacari cariquia jiyajinia

(Mr 1.1-8; Lc 3.1-9, 15-17; Jn 1.19-28)

3¹Na nuhuaji, tamonu pueyanoori cariquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niqiuara. ²Naa pohuataquiaaritij: —iNioojia nia tacatore sesa nia miiniujiniiji! Pueyasoori tari nia jiyanooni pania, na muerasu nia quiniuria seetanujuanaa. ³Jiyanhua tarijia, Pueyasoori na pueyano Isafas pohuataniquiaari miriqui na sequenu panishano pueyara. Isafasri naa na pohuataquiaaritij:

“Pueyano rupaari tojishaaree cariquia jiyajinia. Naa nacajoriquiaari: ‘Nia jeeanamitiri Jiyaniijia nuu, maja mojuquetunu na quiniuria’”.

Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitiojosacari nojori jeeucuanura nojori jiuujia Jesuucuaaji.

⁴Cuno Juan toqueeri camello cajacajiniiji shitasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariquia jiyajinia na riuriasano sequeru, samiyatunio. ⁵Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajiniijio, Judea jiyajiniijiojuhuaj, puetunu Jordán moo shocuaqueyajiijiojuanaano. ⁶Pueya jaara pohuataquiaari Juan niqiuara sesa nojori miijosano, Juanri nojori tiuquinijioquiaari Jordán moojinia, Pueyaso tojijara nojori quiniu panishacari.

⁷Na tiuquinijiosacari pueya, Juanri queraatia Fariseocua* niquiquiaari nocua nijiyano, Saduceocuaano*. (Nojoriiri Moisés Rootasanojiniiji niishitiojanaa quiquiaari.) Tiuquinijiona Juanri nojori sequequiaari:

—iNaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaaji nijaniyani? Nio pa quishacari, quera Pueyaso saniitiosacari jiyanhua na ruuretajaca pueya. ⁸Nia jaara seetanujuanaa nioojia tacatore sesa nia miiniujiniiji, isaaja maninia nia miiri, maja sesa! ⁹Majaari nia jiyaniiniu niaari Pueyaso muerasu, Abraham niqiuohuacujiniiji supueno nia quiniucua. Cua tojiri, Pueyaso jaara paniri, nojuajaari na naata Abraham niqiuohuara shipiniinu nio saijiniijiuhuaj. ¹⁰Nio miriqui sequesano nia tojirijiuhuaj pueyanaa. Naana jaara maninia jajau muetuyaquiri, na camaruuri na nuya na catijasocoriquiano. Naajuhuj, Pueyasoori quera saniitionutaniya nijaniya, na tojiyashijiaca nia quiniucua.

Tiuquinijiona Juanri pueya sequequiaari socua:

¹¹—Janiyari moojinia nia tiuquinijiyani, nioojia nia tacatosacari sesa nia miishanojiniiji. Cua nuhuaji, tamonuuri niriquiano cutara. Nojuajaari jiyanhua socua jiyaniijijanaa janiyajiniiji. Janiya maara jiyanhua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. iNojuajaari jiyaniijijanaa cutara! Nojuajaari Pueyaso Sohanu tiuquinijionutaniya nioojiajiniiji, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniiji.

¹²Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuaanuji na totinijiasocoriquiano. Naa miiquiaari paratu cuara paara na cocua, na sucuanio, na jajau na racatanura tiacijinaaco. Naajuhuj, cua nuhuaji niaari tariucua pueca, na tojtianaa na rijionura na quiquiojiniara, saniniujia na tojiyashijiaca na quejionura manijinia na saniitionura, tee mani maquesaaquiyacuajani.

Jesu tiuquinishacari moojinia

(Mr 1.9-11; Lc 3.21-22)

¹³Na nuhuaji, Jesuuri tiuquiquiaari Galilea jiyajiniiji Tiuquinijiona Juancua, Jordán moojinia. Tiuquinijiona Juan sequeeri:

—Cua tiuquinirijia.

¹⁴Juanri saaja na sequere:

—Maja Jiyaniijiana. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵Jesuuri saa sequereejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa. Naacujitij, Juanri na tiuquiniquiaari. ¹⁶Jesu jaara tiuquinishaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri. ¹⁷Jiyacaritij, jiyocuaaanuji Pueyaso rupaari tojishaaree naa sequeyano:

—Niiori cua Niyanuniyojua. ¡Na shuquiritiaa jiyanojuanijia!

Samaruhua jiyaniijia saniniujiushacari Jesu

(Mr 1.12-13; Lc 4.1-13)

4 ¹Na nuhuaji, Pueyaso Sohuanuuri Jesu jiyataquiaari cariquia jiyajiniara, Sesaaca saniniujiushocoriquiano cuniqui.

²Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³Sesaacaari jiyacari nocua niquiaari na saniniujiuniuria. Jesu sequeeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra*. Quiocua na sarohua.

⁴Jesuuri saaja na riucaaree:

—Maja. Pueyaso Rupaajiniacuaajaari naa naajiotasano quiyatej:

“Pueyanoori maja na naatanu saa miaquesanoocuaa. Seetanujuanaa saminio quia cutaraari na tojishacari puetunu Pueyaso Rupaajanaa”.

⁵Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuaaanuuri, Pueyaso Secojua tia cacojiria. ⁶Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuaajaari naa naajiotasano quia:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniucuaaji”.

⁷Jesuuri na riucaaree:

—¡Maja! Pueyaso Rupaajinia, naa naajiotasanoori quiyajuhuj:

“Maja quia saniniujiuniu quia Jiyaniijia Pueyaso”.

⁸Na nuhuaji, Sesaacaari Jesu tacaniquiaari socua jiyanojua jiyaconaja tuhananuucua. Cuniquiji na niquitiri puetunu jiya jiyaniijiacajanaari. Jiyanojua cumaacaraca quijiaca. Jiyanojua queraatia casamiriaca quijiacajuhuj. Jiyanojua maninia niquishano. ⁹Jesu sequereeri:

—Janiyacia quia jiyatere jiyaniijiajanaara nojori nitini, quiaa jaara cua cariquimijaji mojoquetare quia shuquiritianura janiya, quia jiyaniijia cua quiniuria.

¹⁰Jesuuri na sequereeri:

—¡Niiquiji quia quiaare Satanásnaa! Naa naajiotasano quiyacuaajaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

Jesu coteesacari poonijionu Galilea jiyajinia

(Mr 1.14-15; Lc 4.14-15)

¹²Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua.

¹³Jesuuri Nazaret tiacajiniji pacuquiaari Capernaum tiacajinia

na quiniuria, caminia shuriucua. Cuno jiya quiquiaari Zabulón* niquiohuacuajinio supueno pueya jiya, Neftalí* niquiohuacuajinio supueno pueya jiyanio. Zabulón, Neftalínio, nojoriiri supuetana Jacobo niquiohua quiquiaari. ¹⁴Jesu quishacari cuno jiyajinia, naa tohuatequiaariiri taa tariucuaaanu Pueyaso sequesano caminiujiunia Isaías pohuataquiaari cuno jiyajinjicuaajani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵“Zabulón pueya jiya, Neftalí pueya jiyanio, cunoori caminia shuriuquiumia neteja nucuama quia, mariyata Jordán moo tamajiria. Cunoori mariyata Galilea jiya, tee taucuaca quiyacuaajani. ¹⁶Cuno jiyajinia quiniaari ninishiqui quijiaca quiquiaari. Quiarijia saniniuuja, nojoriiri jiuujia Cuhuataana niquiriucuaa. Nojoriiri cusonu pueretajuaca quiquiaari tarijia. Quiarijia cutara nojoriiri cuhuatasaaree nojori puerayaquiniucuaaji”.

¹⁷Jiyacaritij, Jesuuri Pueyaso rupaa pohuatanu coteequiaari. Naa sequequiaariiri:

—Niiojia nia tacatore sesa nia miiniujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritianaa

(Mr 1.16-20; Lc 5.1-11)

¹⁸Jesuuri Galilea caminia shuriuquioco rucuanajoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroortariquiaa.

¹⁹Jesuuri nojori sequereeri:

—¡Miji! Cua tarajare. Cua pueyara nia quiri. Janiyacia nia jiyatere pueya quioojuara saniniunijia, juhua sapitiaaja quioona.

²⁰Nojoriiri na shiyaru tiujiaquiaari ritia. Jesuta quiojyareeri.

²¹Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequereeri Juannio, na pueyara nojori quiniuriajuhuaj. ²²Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya

(Lc 6.17-19)

²³Jesuuri puetunu Galilea jiyajiniajanaa rucuanajoquiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiiitanu paniya maninia na pueyani. Puetunu tamaatia cusonu jiiitacojuajanaa naatanijioquiaariiri. Puetunu nootunejaca pueyajanaa shaataquiaarijuhuaj. ²⁴Naa maninia na miishanoori poojotasaaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiiitajacajanaanio, cumatacuruhuaa cusosuhujahuaj, nootunejaciono. Nocua jiyatasaaquiaarijuhuaj samaruhuaraca quijiaca, canashiyaquiji cusojonujuaciono. Jesuuri nojori naatanijioquiaari puetunujuanaa. ²⁵Jiyanojua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijuhua Jerusalén tiacajinijinio, Judea jiyajinijiojuhuaj, mariyata Jordán moo taquijiria jiyajinijionio.

Jesu pohuatasacari Pueyaso rupaa tuhananujiniji

(Lc 6.20-23)

5 ¹Jesu niquishacari jiyanojua queraatia pueya nocua niyano, nojuajaari tuhananuucua tacaquiaari tiji na cajiniuria. Na saquiriojosano pueyari nocua catecanoquiaari. ²Jesuuri nojori niishitiojonu coteequiaari. Naa na pueya sequereeri:

³—Shuquiriaatia quijiaca cutaraari noo pojori, canapueete niishiyani noojia sesa quiya. Nojoriiri Pueyaso pueyara quiriqiano, pueyaracaanu na jiitianura nojori.

⁴Shuquiriaatia quijiaca cutaraari noo pojori canapueete taraatia quiyani sesa na miiniuucua. Pueyasoori nojori cumanijanutaniya.

⁵Shuquiriaatia quijiaca cutaraari noo pojori, canapueete maja tama nerajaaja niishiriojojuacani. Nojoriiri nio jiya camaruhua quiniutianiya, taa Pueyaso sequequiaaricuaajani.

⁶Shuquiriaatia quijiaca cutaraari noo pojori, canapueete maninia quiniuucua jiaatiaa jiyanoahuani, taa pa jiaatiaacuaa miaquenuucua. Pueyasoori maninia quijiacara nojori jiyatenutaniya.

⁷Shuquiriaatia quijiaca cutaraari noo pojori, canapueete naquiya miishanoocua taraajejani. Pueyasoori nojoriicua taraajenutaniyaajacuhaj.

⁸Shuquiriaatia quijiaca cutaraari noo pojori canapueete maninia jiuujiaracani. Nojoriiri Pueyaso niqiniutianiya cutara.

⁹Shuquiriaatia quijiaca cutaraari noo pojori, canapueete pueya jiyanoootootejani. Nojoricuajaari Pueyaso muerasu quiniutianiya.

¹⁰Shuquiriaatia quijiaca cutaraari noo pojori, canapueete naquiya miishanoni, Pueyaso panishano nojori miiniuucua. Pueyasoori nojori jiitianutaniya pueyaracaanu shuquiriaatia, na muerasu nojori quishacari.

¹¹Shuquiriaatia quijiaca niajaniya, tamasa jaara nia macaatiri cua tojtiaajaca nia quishacari, naajuhaj, nojori jaara miya naquiya niajaniya. Naajuhaj, niaari shuquiriaatia quijiaca, nojori jaara saquiriojotare niaacuara na sapojonuta, maninia nia tojiniuucua janiya. ¹²Niaa jaara naa miishaaretej, jiyanohua nia timiquiore. ¡Shuquiriaatia nia qiriijuhaj! Pueyasoori cunora jiyanohua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujuniaacuajaari naa naquiya miishaaquiaari-jiuhaj, nia supueyaquishaacarijiyojua.

**Pueyaso muerasuuri juhua shoni quiya mijiria,
juhua ninishiqui cuhuatanaajuhaj**
(Mr 9.50; Lc 14.34-35)

¹³Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiqiriiquia jatama, ¿maatucua taa tiqiriiquiara quiriohuani? Maja na naata. Shoni jaara naa qiritij, najuhua quiyari, shaaca. Jiyano shoni cuara jataaaria nuujinia, pueya rapijosocoriquiano.

¹⁴Naajuhaj, niaari juhua ninishiqui cuhuatana mijiria quiniaara. Tiaca jaara tuhananuucua quiri, majaari na naata na jamaani. ¹⁵Naajuhaj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niqiniuria maninia nocuaji. Majaari samaritiu niataa conatu cariquiaco. ¹⁶Naajuhaj, niajaniya cuara maninia miiria pueya niqiuara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutaniya.

Jesu niishitiojosanoori tariucuacaanu Moisés Rootasanojiniji

¹⁷Majaari nia jiyaniini janiyari niqiuarini Moisés Rootasano cua tarinitiniuria niajaniya, Pueyaso sequesano caminiujuniaa rootasano. Maja. Niqiuarini cutaranijia puetunu cunoro rootasanojuanaa cua tojiniuria, cua tohuateenurajuhaj. ¹⁸Pueyanaa, seetanujuanaa nia sequeyanijia. Nio jiya quishacaritij, jiya cajiniocuanio, majaari quenaaja niqiriyaatu naashanonyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajotesanojuanaa cuara tohuateerejaatijia. ¹⁹Naaratej, tamonu pueyano jaara jiyaniiri tamonu rootasano tariucuacaanu Pueyaso Rupaajiniji najuhua sequesano,

nojuajaari cocuaatia miya. Nojuaja jaara cunoro tariucuacaanu rootasano tojiyaquiri, cunoro pueyanoori socua rerequetesano quiniutianiya narta Pueyaso muerasujinijinio. Naajuhaj, nojuaja jaara pueya niishitiojore nojori tojiyaquiniuria cunoro rootasano, cunoro pueyanoori socua rerequetesano quiniutianiya puetunu narta Pueyaso muerasujinijianaa. Saniniujia, cante tariucuacaanu Pueyaso rootasano tojiqiaaani, na niishitiojoquiaa tamasaajariuhaj, cunoro pueyanoori socua tojishano pueyano quiniutianiya Pueyaso shuriucua jiyocuacaanu. ²⁰Nia numooteyanijia, niaa jaara quiyaquiri socua maninia quijiaca Fariseocuaajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

Jesu niishitiojosano maja pa juaaniuria
(Lc 12.57-59)

²¹Niaacuajaari tojiqiaari taa pa supuetanaa sequesaaquiaa-ricuajani: “Maja monu. Cante pueyano monani, nojuajaari nequesoreesaanutaniya”. ²²Janiyari saniniujia nia niishitiojiyani, cante narta pueyanota juaajani, cunoro nequesoreesaanutaniya. Naajuhaj, cante narta pueyano saarijojuani, cunoro nequesoreesaanutaniya jiyaniujanucua niqiuara. Naajuhaj, cante narta pueyano sesacareeni, cunoro quera jatashiya mani quiqiojinia, pueyaracaanu saniitiosocoriquiano.

²³Naacuajitij, nia niqutionu panishacari Pueyasora nia casaa, niaa jaara jiyacari niishiQUI, quiaari quiarta pueyano juaatiriucuaa quocuara, ritia quia tiujiare cuniqui quia niqutiosocoriquiano Pueyasora, catijiaa shuriucua. ²⁴Quiarta pueyanota quia jiyanoootioocuara coteenu. Na nuhuaji cutara quia naata niqutionu quia casaa Pueyasora.

²⁵Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatare ritia nojuaja, taa quia miiniutianiyan na jiyanooniuria quiajaniya. Ritia nia jecatoore nucuaco nia quiasacarijia, quiaa mariqui nequesoreena niqutiosaaereeri. Nequesoreena naasucuaari quia niqutionutaniya nujuatejojua camarnu saniniujia. Nojuajaari quia nujuatenutaniya nujuatejojua. ²⁶Seetanujuanaa nia sequeyanijia, majaari quia tohuatanu quiniutianiya, quiaa cuara niqutiojerejaatijia puetunu na sequesano cumanecajanaa quia cumanecajiniji.

**Jesu niishitiojosano, maja pa camishoo
maajiicua pa jiaatiaaquiniuria**

²⁷Niaacuajaari tari tojiqiaari nio tariucuacaanu rootasano: “Maja tamonu niqiuocua numuetucunu”. ²⁸Janiya cutaraari nia sequeyani, pueyano jaara na camishoo maaji niqiri nocua na jiaatianuta, cunoro juhua na numuetucuree tari noojiajinia.

²⁹Na nuhuaji, Jesuuri nio miriqui sequesano sequequiaari pueyara, jiyanohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatere. Quiajaniyara socua maninia cutaraari namijijiu quia quiniuria, maja quia jataaanaa mani quiqiojinia puetunu quia cuaqueyatajanaa. ³⁰Naajuhaj, quia miaquetajara quia numatu jaara quia miitiri sesa, quia jiyatere. Tucuacaanu quia jatere. Socua maninia cutaraari quia quia jiyatanura quia numatu, maja puetunu quia cuaqueyatajanaa quia jataaanaa manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua
(Mt 19.9; Mr 10.11-12; Lc 16.18)

³¹Jesuuri naa niishitiojoquiaarijiuhaj:

—Pa supuetanaari naa rootasaquiaarijiuhaj: “Pueyano jaara necocua cartere, maaji cuara niqutiosaa nia naajinee,

pueya niishiniuria neyacaqui na carteree”.³² Janiyari saniniuuja nia sequeyanijia, pueyano jaara necocua cartere, sesa miya Pueyaso niquiaraari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

Jesu niishitiojosano maja pa sapojonura

³³Niaari tarijia tojtiaquiaari taa pa supuetanaa rootasaaquiaarini. Naa rootasaaquiaariiri: “Majaari nia jatanu nia sequesano, niaa jaara sequere: ‘Seetanujanaari cua sequesano. Pueyasocuaajaari niishiya majaari cua sapojonu’”.³⁴ Janiya cutaraari nia sequeyani, nia sequesano jaara seetanujanaa sequesano quiri, saaja nia sequere “jaa”. Jaara seetanujanaa quiyacuari nia sequesano, saaja nia sequere “maja”. Majaari nia sequesano nia maatenu najuhuaa naatej: “¿Janiyate sapojonura? Cua rupaari juhua jiya cajiniocua. Maja na jatanu quiniutianiya”. Majaari nia sequenutej pueyanaa. ¿Majateeri nia niishini, jiya cajiniocuaari Pueyaso quiquio?³⁵ Naajuhuj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja nia sequenutej. Pa jiya, cunoori Pueyaso niaja na nioluaca. Naajuhuj, ¿casaara nia sequequiaani: “Cua sequesanoori juhua Jerusalén tiaca? Pueyaracaanu quiniutianiari”. Maja nia sequenutej. Jerusalén tiacaari pa Jiyaniijia Pueyaso tiaca.³⁶ Naajuhuj, ¿casaara nia sequequiaa nia najuhuanani: “Quia naataari cua sequesanoocua tiuuniu, cua naca quishacarijia”? Majaari nia sequenutej pueyanaa. Niaa jaara nia sequeretej, nia niishiri, majaari nia naata quenaaja niqumi nia muesujinijinio nia jiyatenu taariuria, muerumuecaranio.³⁷ Naaratej, pueyaracaanu saaja seetanujanaa nia sequere “jaa”, “maja”. Cante na sequesano maatejani, cunoori Sesaaca niishitiojosano nijaniya.

Jesu niishitiojosano maja pa naminiuria

(Lc 6.29-30)

³⁸Niaacuajaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuartasarijia juhuaj, pueya nequesoreenaa niquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaatasarijia juhuaj”.³⁹ Janiyari saniniuuja nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriolhua, quia jiyanoori. Majaari na naminiu.⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niqutiore nareja. Majaari jamueja quia quiniu.⁴¹ Tamonu camarnu jaara quia sequere na naacutanura na casami quia jatanura nu cajiniocua, majaari na tarijionu. Saniniuuja, shuquiriaatia quia naacutare na casami jatanura socua tucuaacaanu na sequesanojini.⁴² Tamonu pueyano jaara quia casami masenu paniya nera, quia niqutiore nareja. Naajuhuj, tamonu pueyano jaara quia casaa panu paniya nareja rupaquijia, quia niqutiore. Majaari na ruuretanu. Capora quia quiri.

Jesu niishitiojosano pa paraca pa paniniuria

(Lc 6.27-28, 32-36)

⁴³Niaacuajaari nio tariucuaacaanu sequesano tojtiaquiaarijuhuaj: “Quia shuriucua quinia quia paniri. Saniniuuja, majaari quia paraca quia niquiniu”.⁴⁴ Janiya cutaraari nia sequeyani, nia paraa nia paniri. Nia sesacaja pueya nia maniniuhuaqueetare pueya niquiara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia

miiniaacuara nia secojorejuhuaj.⁴⁵ Naa maninia nia miishacaritij, niaari seetanujanaa jiyocuaacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiquiaa maninia miijiaca pueyara, sesa miijiacarajuhuj, maninia nojori nataacuaca moritianura.⁴⁶ Naa jaara saaja nia panijia pueya panijia quiriquia, ¿Pueyasoteeri cunora nia shuquiritianutianiya, socua na casaajiniji na niqutionura nijaniya? Maja. Sesa miijia pueyani, noo pojori canapueete cumaneeca masejoquiaa na sapojonutani, nojoriiri maninia miiquiaa na panishano pueyajuhuj.⁴⁷ Naa jaara saaja nia panishano pueya saruhuaquiaa, ¿niaateeri cunora maninia miijiaca quia Pueyaso niquiara? Maja. Pueyaso niishiyashijia pueyari nia maninia miiquiaa na panishano pueyajuhuj.⁴⁸ Naaratej, maninia miijia nia quiri juhua jiyocuaacaanu Quijia nia Que Pueyaso. Nojuajaari seetanujanaa maninia miijia. Rimiajata miyashijia cutara.

Jesu niishitiojosano saaja maninia pa miiniuria Pueyaso niquiara

6¹Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniucua, nia Que Pueyasoori maja na niqutionu quiniutianiya nijaniya socua, maninia nia miiniucua.² Naaratej, niaa jaara casamijiniucua pueya niqutionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niqutionu panishacari na casaa, puetunu pueyajanaa shootianura nojori. Cuno pojoriiri nia miiquiaaqui Pueyaso secojojua tiacajinia, tiacaacocojuhuj, pueya maniniuhuaqueetanura nojori. Seetanujanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji nia maninia nojori miiniucua.³ Saniniuuja, niaa jaara nia casaajiniji casamijiniucua niqutionu paniri nareja, quia mueneca cuaara niishiyacuiiria quia niqutiosano quia miaquetajata.⁴ Naa miriqui sequeree nijaniyanijia quia niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niqutionutianiya na casamijiniji, na shuquiritiasacari nijaniya.

Jesu niishitiojosano naa pa secojonura Pueyaso

(Lc 11.2-4)

⁵Nia secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujuanuta pueya niquiara, saaja pueya shootianura nojori. Nojoriiri nia secojonuquiaa Pueyaso secojojua tiacajinatej, tiaca nuucujinijia juhuaj, tee queraatia pueya quiyacuajani. Seetanujanaa nia sequeyanijia, cuno pojoriiri tari maniniuhuaqueetasareecuaja. Jiyano pueyatej, majaari nojori masenu quiniutianiya socua Pueyasojiniji.⁶ Nijaniya saniniuuja, nia secojosacari Pueyaso, nia sohuacamara nia tiuquiri. Nia tiotiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niquishacari nia jiyasohuaja nia miishanotej, nojuaja cutaraari nia niqutionutianiya na casamijiniji, na shuquiritiasacari nijaniya.

⁷Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijia. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano.⁸ Majaari juhua nojori nia miiniu. Pa secojijiaquishaacarijiojua, pa Que Pueyasocuaajaari tari niishiya casaa pa paniani.⁹ Naaratej, naate nia secojore:

“Canaa Quenaa, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. ¹⁰Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyocuacaanu na miishaquiaacuani. ¹¹Canaa quia niquitiore canaa miaquesocoriquiano quiarijiani. ¹²Canaa quia jiyanoori sesa canaa miishanojiniji, taa canaa jiyanooquiaa tamasaacuaani, sesa nojori miishacari canaa. ¹³Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaacaacuaaji. Saaja quiajaniya cutaraari seetanujuanaa Jiyaniijiajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucuaja”.

¹⁴Naatej, niaa jaara jiyanoori tamasa, sesa na miishacari najaniya, nia Que Pueyasoori nia jiyanooniutianiyajuhua. ¹⁵Saniniuujia, niaa jaara tamasa jiyanoaquiri, nia Que Pueyasoori maja na jiyanooni quiniutianiya najaniyajuhua sesa nia miishanojiniji.

**Jesu niishitiojosano taate pa naata miaqueyaquiniuni
Pueyaso pa secojonura**

¹⁶Niaa jaara miaqueyaquiya Pueyaso nia secojonura, majaari macuhuaeconu pueya niquiara, taa sesa jiuujiaraca pueya miiquiaacuani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetarecuaja. Majaari Pueyasojiniji nojori masenu quiniutianiya socua. ¹⁷Niajaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucuaani. ¹⁸Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacuajitij, nojuajaari nia niquitionutianiya na casamijiniji na shuquiritanuucua najaniya.

**Pa casami pa racatare jiyocuacaanu Pueyaso shuriucua
(Lc 12.33-34)**

¹⁹Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutianiya. Tiyarashiniutianiyajariuhua. Nohuasenujuacaari nocua tiuquiniutianiya na nohuasenura. ²⁰Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhua, nohuasejuaari maja na naata nocua tiuquiniu tii, jiyocuacaanuji nia casami na nohuasenura. ²¹Niaa jaara nia casami racatare mijiria, niaari nocua niishiriojonutianiya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasocua niishiriojonutianiya. Majaari nia tacaaniu quiniutianiya mijiria casaacua tari.

**Pa cuaqueyajinia cuhuatanajiniji pohuatasano
(Lc 11.34-36)**

²²Pa namijiaari juhua poojia cuhuatana. Naacuajitij, paa jaara sesa casaacua jiaatiaashijia quirini, poojiaari juhua cuhuashiqui quia maninia. ²³Niaa jaara sesa casaacua jiaatiaajaca quiri saniniuujia, nioojiaari juhua ninishiqui quia. Nioojia jaara sesa casaacua jiaatiaajaca quiri, nioojiaari socua ninishiqui quia cariyajuaru pueyanojiniji.

**Pueyaso panijia pa quiri, maja cumaneeca panijia
(Lc 16.13)**

²⁴Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niquiniu

paniyaquiniutianiyacujua. Naacuajitij, niaari shuquiriaatia poonijionutianiya nia panishano camarnura. Niaari tamonu soojotanutianiyacujua. Naajuhua pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

**Pueyaso na muerasu cojuaja
(Lc 12.22-31)**

²⁵Naaratej, nia sequeyanijia, maja puera nia niishiriojonu casaa nia miaquenutianiyani, casaa nia ratunutianiyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niquitionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiririnij. ²⁶Jiyocuacaanu jaacuatujua nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niquitioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuaajiniji. ²⁷¿Nia naatate socua jiyaconajara maashiniu, jiyanohua nia tacaaniutia? Maja.

²⁸Naajuhua, ¿casaara nia tacaquiaarini nia niishiriojosacari casaa nia cushiniutianiyani? Naana shuucua nia niquiriquiaacua. Nojoriiri maja na niishiniu poonijionu. Majaari na niishiniu na maniniushitijara shitianujuhua. ²⁹Seetanujua nia sequeyanijia, pa supuetanaa jiyaniijia Salomónri jiyanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuaajiniji. ³⁰Naana shuuri saaja rupaquijia shanohua niquishano. Jaara sorere, namitiashiyari catijiasocoriquiano. Pueyasoori naana shu shipiniquiaari saaja rupaquijia shanohua niquishocoriquiano, na nuhuaji catijiasocoriquiano. Nojuaja jaara naa shanohua naana shuucua shipiniquiaari, ¿majateeri socua maninia na miiniu quiniutianiya niara? ¿Casaara nia tiyayaquiya nia Que Pueyasocuaarini? ³¹Naaratej pueyanaa, maja nia tacaaniu. Majaari nia sequenu: ¿casaa pa miaquenutianiyani?, ¿casaa pa ratunutianiyani?, ¿casaa pa cushiniutianiyani? ³²Pueyaso niishiyashijiaacari naa sequejacatej, puera nojori tacaashacari puetunu na panishano casaacujanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³Naaratej, coteenu nia niishiriojore Pueyaso tojijia nia quiniuria cutara. Pueyasocua nia niquitiore puetunu nia panishanojuanaa. ³⁴Naajuhua, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

**Majaari quarta pueyanoocua soqueto nia quiniu
(Lc 6.37-38, 41-42)**

7 ¹Maja niarta pueyano nia sequenu najuhuanaj, Pueyaso mariqui nia jiyanoaquirijiaariuhua. ²Taa nia sesacaquiaa tamasaacuaani, niaari naa sesacasanutianiyajuhua. Naatej, taa nia miiquiaa tamasaacuaani, Pueyasoori mariyata naa miiniutianiya najaniyajuhua. ³Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuca maca jiitiaa tama nia namijiajiniaajaca cutara? ⁴Maca nia jiitiasacari tama nia namijiajiniaajaca, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesano nio sequeya: nioojia seque nia jeeccare coteenu, na nuhuaji cutara niocua maninia nacasure niarta pueyano.

⁶Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej
(Lc 11.9-13; 6.31)

⁷Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacuajiri riataaanutaniya.

⁸Cante Pueyaso maseya na panishanoni, seetanujuanaa na masenutaniyari. Naajuhuj, cante pajejani, na panishano riuriatanutaniyari. Cante tohuateyaji piquijiani, nocuajiri riataaanutaniyajuhuj.

⁹Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹Nijaniyari sesa miiniu niishijia. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanoehua socua maninia niqutionu niishijia, na muerasu secosacari nojuaja.

¹²Pueyaracaanu maninia nia miiri tamasaca, taa nia paniquiaa pueya miiniuria nijaniyacujani. Niaa jaara maninia miiriquia nio cua sequesano, niaari tari tojitiaa maninia puetunu tariucuaaanu Moisés Rootasanojuanaa, tariucuaaanu Pueyaso sequesano caminiujuunaa rootasanonio.

Pueyasocua nuuri secanuniyojua
(Lc 13.24)

¹³Pueyasocua neteja nuu nia pajere, shiitaniyojua nuuri tuneja. Saniniujuja, puereetuca nuuri neteya mani quiquiojiniara. Puereetuca na tuneja. Puereetucaari neteya, carianujuhuj. Naaratej, queraatia pueyari juhuajaniya cuno nucuaco quiojiya saniitiosocoriquiano. ¹⁴Saniniujuja, shiitaniyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanoehua shiitaniyojuaari cuno nuu tuneja. Secaja pueyari na riurataa, cami na quiojonura.

Naanaari niishishano na jajaujiniji
(Lc 6.43-44)

¹⁵Tama nia cuaqueyajaaja nia cojuare sapojonuujuacaacuaji, noo pojoriicuaji canapuate najuhuaa sequejacujani: “Pueyaso Rupaa pohuatananijia”. Nojoriiri sapuenu juhua maninia pueya niqishano, nojori sapojonura nijaniya. Nojoriiri sapuenu juhua borregoniyojua niqishano, seetanujuanaa juhua puereeta sare nojori quishacari, sayoru. ¹⁶Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuj, cuno sesa jiuujaraca pueyari maja na naata maninia miiniu. ¹⁷Maninia naanaari, maninia jajau muetujua cutara. Saniniujuja, sesa naanaari, sesa jajau muetujuaaja. ¹⁸Maninia naanaari maja na naata sesa jajau muetunu. Naajuhuj, sesa naanaari maja na naata maninia jajau muetunu. ¹⁹Naana jaara sesa jajau muetujua quiri, nushiyari, manijinia catijasocoriquiano. ²⁰Naacuajitij, niocua cuno sapojonuujuaca pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya
(Lc 13.25-27)

²¹Cuno pojori canapuate cua sequejacani: “Cua Jiyaniijianaa, cua Jiyaniijianaa”, noojiaqueya nojorijinijinoori maja nojori

tiuquitianu quiniutianiya cua Que Pueyaso quiquiojinia. Saaja seetanujuanaa cua Que tojitiajaca cutaraari nocua tiuquitianutaniya. ²²Cua nequesoreesacari pueya nio jiya puequesacari, queraatia pueyari cua sequenutaniya: “Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niqiarani. Canaa sequesacari quia sesa, canaari samaruhua tohutanijioquiaari quia cumaacatani. Naajuhuj, canaari cusosuhua naatanijioquiaari quia sesa canaa jiyaniquishacari”. ²³Janiyari saniniujuja naa sequejaca riucuanutaniyari: “Maja cua niishiniu nijaniya. ¡Nia quiojorohua! Niaari saaja sesa miijiaca quiquiaari”.

Jesu tojitiajaca miishanoori pueyaracaanu rishiniutianiya cutara
(Mr 1.22; Lc 6.47-49)

²⁴Naacuajitij, cante cua sequesano tojjijiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵Na nuhuaji, maruuri jiyanoehua niqiaari. Moori pajaashiquiaari. Paratuuri jiyanoehua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquajinia tiaquiaari. ²⁷Maruuri jiyanoehua niqiaari. Moori pajaashiquiaari. Paratuuri jiyanoehua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanoehua taraatia quiquiaari na tia pojotasacari.

²⁸Jesu jaara niishitiojonu puecaquiaari, pueyari jiyanoehua jiuujiatequiaari seetanu cumaacatajanaa Jesu niishitiojocari juhua jiyaniijijianaa, maja juhua Moisés Rootasanojiniji niishitiojonaa. Cuno pojoriiri nareja tariucuaaanu rootasano caminiujuquiaari pueyaracaanu.

Jesu naatanishacari sesa cusonu jiitiaja
(Mr 1.40-45; Lc 5.12-16)

8 ¹Jesu jaara tuhuananujiniji rosequiaariuhua na cojiniaata, jiyanoehua queraatia pueyari na nuhuajiriquiaa. ²Tamonu pueyano cusosuuri jiyacari Jesuucua catecanoquiaari. Jiyanoehua sesa cusonu jiitiaquiaariiri. Tahue rupaajinia, cuno cusonu sesaari quiquiaari “lepra*”. Pueyano shuuri juhua miaquesano quijia na cuaqueyajinia cuno cusonu na jiitiasacari. Cusosuuri Jesu cariquimijia mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajani quia naata cua cusonu cushiriitiniu.

³Jesuuri nocua taraajequiaari. Nocua niaree na juaashiquiaari. Na sequereeri:

—Jaa, panianijia. Cuaara cushiriiria quia cusonu.

¡Jiyacaritij, ritia cushiriiquiri! Jeequerohuari. ⁴Na nuhuaji, Jesuuri naa na rootaquiaari:

—Cua tojiri. Maja tamasaca niqiaari quia pohuatanu cua miishano quiajaniya. Saaja Pueyaso secosonaa jiyaniijia quia cuaqueya quia niqitiri, na cartenura quiajaniya, pueya tajinia quia rucuanenonuhua juhuajaniya. Na nuhuaji, ritia quia niqitioere quia seru Pueyasocuaa catijasocoriquiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

Jesu naatanishacari Romano capitán seru
(Lc 7.1-10)

⁵Jesu jaara tiuquiquiaariuhua na pueyata Capernaum tiacajiniohwa, Romano soldadohwa jiyaniijiaari Jesuucua niqiaari na secosonura Jesu. ⁶Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyanoehua naquiya miya na noonutaari.

⁷Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

⁸Soldadohua jiyaniijiaari na riucuaaree:

—iMaja jiyaniijianaa! Janiyari maja pueyano maniniuni, cua tijinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajaniija, quiaari na shaatanutaniya saa quia rupaataja. ⁹Janiyari jiyaniijiaracajaniuhuj. Na tojiquiaaniija. Naajuhuj, cua soldadohuari cua tojtiaquiaajuhuj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaquiaacuaa, quia sequesano cutaraari tojishaanutaniya.

¹⁰Jesu jaara tojiquiaari naa cuno tahue sequesanteje, jiujiatequiaariiri. Na cojinia sequereeri:

—iSeetanujuanaa nia sequeyanijia, majaari quenaaja parta Israel pueyajiniijinio cua niqiniu quiquiaa Pueyasocua tiuuja cutara, juhua nio tahue! ¹¹Seetanujuanaa nia sequeyanijia, queraatia taucuaacari Pueyasocua tiuujiaca quiniutianiya juhua nio tahue. Nojoriiri tucuaanuji nijionutaniya pananu muetasamaji, pananu tiuquishocojiuhuj. Nojoriiri pa supuetanaata cajitiuniutianiya na miaquenuunura Pueyaso shuriucua. Tii quiniutianiya shuquiriaatiari pa supuetanaata: Abrahamta, Isaactajuhuj, Jacobotanio. ¹²Parta Israel pueya, canapueete Abraham jiniianuucujinio supuenoni, nojoriiri saniniujia tamocora quejoosanutaniya ninishiqui, nojori tojtiaquiniucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyari na noonuta. Nojoriiri juucua saquiriojosaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniianuucujinio nojori quishacari.

¹³Na nuhuaji, Jesuuri cuno soldadohua camarnu sequequiaari:

—Quia tijinia quia quiaarohuaqui. Cuaara quiriiaqui taa quia sequerecujani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua

(Mr 1.29-31; Lc 4.38-39)

¹⁴Jesuuri quiaaree Pedro tijinia. Tii Pedro reyarucua niqishiiri cusosu mataano na maquetujinia. Naseeca matariquiaari.

¹⁵Jesuuri na juaashiquia quiaasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya

(Mr 1.32-34; Lc 4.40-41)

¹⁶Shusha ninishacari cuno juucaja, cuno tiacajiniijinio pueyari queraatia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijiojoreejaariuhuj. ¹⁷Naa tohuateequiaariti supuetana Isaias naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujuanaa na jatanura”.

Tamasaca pueya quiniu panishacari Jesu pueyara juucua

(Lc 9.57-62)

¹⁸Jesu jaara jiyanoehua queraatia pueya niqiquiaari na shocua maano, na pueya sequereeri:

—Caminia taquijiria pa niuutiaree.

¹⁹Jiyacaritij, Moises Rootasanojiniji niishitiojona pueyanoori Jesu sequereeri:

—Niishitiojonanaa, janiyari quiata quianu paniani.

Janiyacua quia tarajareni puetunu tiqiyocujanaa quia rucuanijosacari.

²⁰Jesuuri na riucuaaree:

—Quiojuapue cutaraari na raa jiitiaa. Shuhuari na jesuhua jiitiaajuhuj. Saniniujia, pueyano cua quishacari mijiria, majaari cua maquejara cua jiitianu quenaaja, taa cuno casami jiitiaacuaa na maquetujarani.

²¹Tamonu Jesu pueyajiniijioori Jesu sequereeri:

—Cua jiyaniijianaa, cua tarinitiare, cua que niquirijiaara.

Janiya jaara na shaajareni, janiyacua quia tarajare cutarani.

²²Jesuuri na riucuaaree:

—Naajaa, cuata quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojtiaashijiacani, nojoriiri tariucua juhua macunucua quia Pueyasora.

Jesu suraajasacari paratu, mohuacanio

(Mr 4.35-41; Lc 8.22-25)

²³Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. ²⁴Paratuuri senota piyarojonu coteequiaari nojori niuutiasacari. Jiyanoehua piyaroriquiaari. Caminiaari jiyanoehua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵Na pueyari cunora na niucujasee. Jesu sequetureeri:

—iJiyaniijianaa, canaa quia naacutare! iPaa tari tiuquitiaareeni!

²⁶Nojori riucuaareeri:

—¿Casaara nia pueretiuyani? ¿Majateeri nia niishiniu Pueyasocua tiuuniu?

Jesuuri saneree. Paratu sequereeri, mohuacanio:

—iNiaaj, nia suraajere!

Paratu, mohuacaari ritia suraajequiaari. ²⁷Jesu pueyari jiuujatequee. Tama nojoriijaariija sequequiaari:

—iJuhuej! ¿Taamueca pueyanotucuaanojoni? iPaa paratuuri na tojiya, mohuacajuhuj!

Jesu tohuatanishacari samaruhua,

caapiqui pueyajiniji Gadara jiyajinia

(Mr 5.1-20; Lc 8.26-39)

²⁸Jesuuri na saquiriojosano pueyata tiuquijioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosaqiji. Nojoriiri samaruhuaraca quiquiaari. iJiyanoehua pueya pueresano! Cuno nucuaaco, majaari pueya rucuanenu quijia, cuno pojori na puerenuucua. ²⁹Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacariija niyaree canaa quia saniitionura Jesunaa?

³⁰Jiyacaritij, cushiyari cateca naataja miaquenuuriquiaa.

Jiyanoehua queraatia cushiyari quiquiaari. ³¹Samaruhuari cuno caapiqui pueya pocuatequiaari. Naa Jesu secojoreeri:

—iQuiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

³²Jesuuri cuno samaruhua sequereeri:

—iNia quiaare!

Samaruhuari cuno caapiqui pueyajiniji tohuareetaquiaari.

Cushiyacua tiuquitiaseeri. iCushiyari cocuatequee! Saaja caminiajinia totesee tacojiniijiri. Cushiyari tii shushiniushii.

³³Cushiya cojuanaari netecuatuquiaariuhua na shiriiquiniutia na tiacajiniara. Nojori tiuquijiosacariuhua, pueya niqiuara pohuatatuquiaari cushiyajiniijiri, samaruhuaraca pueyajiniijinio.

³⁴Naaratej puetunu pueyajanaari cuno tiacajiniji nijioquiaari Jesuucua. Nojori niqishacari Jesu, na sequetureeri nojori jiyajiniji na quianura tamaqui.

Jesu naatanishacari cumatacuruhuana cusosu

(Mr 2.1-12; Lc 5.17-26)

9 ¹Na nuhuaji, Jesuuri botejinia rosetaquiaari na saquiriojosano pueyata. Caminia taquijiria niuutiaquiaariuhuari tama na tiacajiniaraaja. ²Tii nojori tiuquijiosacari,

Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquuaari jiyanoohua nocuani, cusosu sequereeri:

—iQuia shuquiriri sanajanaa! Quiaacuajaari tari jiyanooshaaree sesa quia miishanojiniji.

³Noojiaqueya Moisés Rootasanojiniji niishitiojonaari Jesu sequesano tojtitariquiaa. Nojoriiri tama noojiajiniajaaja niishiriojonuuquiaari: “iNio pueyanoori tama na cuaqueyajaaja jiyateya juhua Pueyaso na quiniuria naa na sequesacari! iCunoori jiyanoohua sacuaraatia!” ⁴Jesuuri cunoo pueya niishiriojosano niishiquiaari. Nojori sequereeri:

—¿Casaara sesa nia niishiriojijani? ⁵Seetanujanaa, pueyano maja na naata jiyanooni pueya miishano sesa. Naajuhuaaj, majaari na naata tamajaaja pueya na naataniniu. ⁶Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cunoo pueya niquira:

—iQuia sanere! Quia matu quia pataarohua quia tijinia.

⁷Cusosuuri sanequiaari. Na tijinia quiaarohuari. ⁸Na niqitiushacari Jesu miishano, puetunu pueyanaari shiriqitiuquiaari. Nojoriiri Pueyaso maninihuaqueetaquiaari pueya na niqitionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria

(Mr 2.13-17; Lc 5.27-32)

⁹Jesu quiasacari cunoo tiacajiniji, tamonu pueyano niqiquiaari cajiyanoori cumaneeca masejojuajinia Romano* jiyaniijia. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰Na nuhuaji, janiyari Jesu masuquiaarini cua tijinia na miaquenura, na pueyajuhuaaj. Naacuajitij Jesuuri cua tijinia tiuquitiaquiaari miaquenura. Queraatia cuarta cumaneeca masejonaari canaa kojiriquiaajuhuaaj, queraatia noo pojoriijuhuaaj, Fariseocuaca jiyaniqitiushano sesoriquia pueyatatej. Puetunu canaajanaari Jesuta miaquenuuriquiaani. ¹¹Fariseocuaca jaara Jesu niqiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cunoo sacuaraatia cumaneeca masejonaatani, sesoriquia pueyatatio?

¹²Jesuuri naa nojori sequesano tojirii. Nojori sequereeri miriquiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuaaj, sesa miijiaa pueyari cua paniya nojori cua jiyanooniuria sesa nojori mijiosanojiniji. ¹³Niaa cuaara niishitiojosuhuaara socua, maninia nia niishiniuria casaa tariucuacaanu Pueyaso sequesano niishitiojijani naa na sequesacaritij:

“Niaacuajaari nia seya catijiaquiaa cucuara. Maninia juhuari nia taraajenura tamasaacuua. Cuno cutaraari cua shuquiritiasano”.

Naara niqiaarinijia nia sequesano sesa miijiaa cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacuua.

Pueya nequesotasano casaara Jesu pueya tarinitiaaquiquiaa quenaaja miaquenuni

(Mr 2.18-22; Lc 5.33-39)

¹⁴Tiuquinijiona Juan pueyari Jesuucua niqiaari naa na nequesotanura:

—¿Casaara quia pueya tarinitiaaquiquiaa quenaaja miaquenuni, nojori secojonura Pueyasoni? Canacuajaari miaquenu cartequiaani Pueyaso canaa secojonura taa Fariseocuaca miiquiaacuuaani.

¹⁵Jesuuri nojori riucaaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu qiniutianiya, janiya jaara nojori tajiniji rishaareni.

¹⁶Socua cua tojtiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaaere toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya. ¹⁷Naajuhuaaj, majaari pa naata uva caaca racatanu shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhuaana nia niitianura uva caaca. Naajuhuaaj, majaari na naata cua niishitiojosano cojitishaanu tariucuacaanu niishitiojosano. Cua niishitiojosano nia tojtiare cutara.

Caapiqui maajipohua naatanijiosacari

(Mr 5.21-43; Lc 8.40-56)

¹⁸Jesu pocuasacarijia, nocua niqiaariiri Pueyaso secojojua tia camarnu. Jesu cariquimijia mojoquetaquiaariiri. Na sequereeri:

—iQuiyatuuri shusha cusoquee! Naajaa, miji, cuata quia quiaare. Niishianijia quiaa jaara niare nocua quia juaashiquia, samiitianutanihuari.

¹⁹Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuaaj. ²⁰⁻²¹Canaa quiasacari, tamonu maaji cusosuuri Jesuucua catecanoquiaari jiyasohuaaja na paramaji. Cuno maajiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishiriojoriquiaajarijia: “Janiya jaara Jesu toque quiareni, cua nanacaari curetantaniya”. Cunora, maajiri Jesu toque casaca quiaasee jiyasohuaaja. ²²Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaanaa. Cucua quia tiuushacari, quia nanacaari tari curetaquee.

Jiyacaritij, cunoo maaji jiniacumaari ritia sacuantaquee.

²³Jesuta canaa tiuquishacari Pueyaso secojojua tia camarnu tijinia, canaari pueya niqishiini macura naajua joneneniuyano taraatia, sapiyoniuyanonio. ²⁴Jesuuri cunoo pojori sequereeri:

—iNiiquiji nia tohuareetare! Nio maaji samiriuri maja macu. Nareja maqueyano.

Pueyari Jesu sarojotaree saaja, naa na sequesacaritij.

²⁵Jesuuri cunoo pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaaseeri. iMaaji samiriuri sanemaa! ²⁶Naa Jesu miishanojiniji pohuatasaaquiaari puetunu cunoo jiyajiniajanaa.

Jesu jeeacasacari caapiqui cariojuaru namijiaa

²⁷Canaa jaara tohuareetaquiaari cunoo tijajiniji, caapiqui cariojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujanaa Pueyaso jiyarosano. Naaratej, Jesu sequeturiquiaari:

—iSupuetana David niqiuhuacuajinio supueno pueyanonaa, canaaca quia taraajere quenaaja!

²⁸Canaa tiuquishacarihua canaa quijia tijinia, cariojuaruuri Jesuuri catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeeacanura?

Jesu riucaatureeri:

—Jaa, jiyaniijanaa. iQuia naatacuuquinatejaj!

²⁹Jesuuri na juaashiquia niaree nojori namijiaacuua. Jesuuri cariojuaruuri sequereeri:

—Cucua nia tiuuniucua, cuaara quiiria taa nia sequereecua-jani,

³⁰Cuno pojori namijiaari maniniujaacara quiquiaariuhua. Jesuuri jiyanoehua nojori rootaree:

—iMajaari tamasaca niqiuara nia pohuatanu cua miishano!

³¹Na tohuareetasacari, cuno cariyojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³²Cariyojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj. ³³Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanoehua jiuujiatequiaari. Sequetureeri:

—iNaa miishanoori maja na niquishaanu quiquiaari Israel jiyajinia!

³⁴Fariseocuaacari saaja Jesu macaatiquiaari pueya niqiuara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacuajitij, na naata samaruhua tohuatanijionu.

Jesu taraajesacari pueyacia

³⁵Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojuua tiacajiniaqueya, pueya niishiniuria taa Pueyaso jiyanooni paniya nojorini. Naajuhuj, nojuajaari queraatia tamaatia cusonu naatanijioquiaari puetunujuanaa, nootunejaciono.

³⁶Jesu shootiasacari pueya, nojoriicua taraajequiaari jiyanoehuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaa quiquiaari juhua cojuasoo borregohua. Shaaqui na camaru. ³⁷Cunora, Jesuuri canaa na saquirojosano pueya sequequiaari:

—iNia niqiri! Jiyanoehua queraatia pueya. Cuno pojoriiri juhua puereetuca sucohua. Saniniuujia, secajaari na senoona. ³⁸Nocuaaji nia sequeyanijia, na Camaru nia secojore, nojuaja cuaara jiyaroora queraatia poonijionaa na senooriquiano nera.

Jesu saquirojosacari doce pueya na jiyaramiquishocoriquiano (Mr 3.13-19; Lc 6.12-16)

10 ¹Jesuuri canaa na doce saquirojosano pueya sequequiaari na rootasano canaa tojiniuria, canaa na jiyaramiquiaquishacarijia. Jesuuri canaa niqutioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujuanaa canaa shaatanurajuhuj.

²Nioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriqiaajaariuhua Santiago, tarajanu Juannio. Cuno pojoriiri Zebedeo niqiohuhua quiquiaari. ³Felipeeri quiriqiaajuhuj, Bartolomé, Tomásnio. Quiriqiaajaariuhua janiya Mateoni. Janiyari tarijia quiquiaarini cumaneeca masejojua Romano jiyaniijia. Quiriqiaajaariuhua socua tamonu Santiago. Cuno Santiagoori Alfeo niyanu quiquiaari. Quiriqiaajaariuhua Lebeo. Na sesa tarajanuuri quiquiaari Tadeo. ⁴Quiriqiaajaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriqiaajuhuj. Nojuajaari Jesu quiaateriquiano quiquiaari mosocoriquiano.

Jesu rootasano na pueya na jiyaramiquiaquishacarijia (Mr 6.7-13; Lc 9.1-6)

⁵Jesuuri nio na doce pueya jiyaramiquiaquiaari Pueyaso rupaa canaa pohuatanura. Coteenu, canaa rootaquiaariiri, canaa na jiyaramiquiaquishacarijia. Naa canaa sequequiaariiri:

—Majaari taucuaacua nia quiojonu. Naajuhuj, majaari nia tiuquiniu Samaria pueya tiacajinia. ⁶Saaja parta Israel* pueyacia nia quiaare cutara. Nojoriiri juhua borregohua tashuquioono quiya. ⁷Nojori niqiuara nia pohuatare puetunu tiacajiniajanaa. Nojori nia sequere: “Pueyasoori quiarijia nia jiitanu paniya, niaa jaara na rupaa tojitiaacara qiri”.

⁸Cusosuhua nia naatanijiore. Macunucua nia samiitianijiore. Canapute lepra cusonu jiitiaani, cuno cusonu nia shaajare pueya cuaqueyainiji. Samaruhua nia tohuatanijiore pueyainiji. Naaacuaajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹Majaari cumaneeca nia panu. ¹⁰Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Naa naacutasano pueya cuaara niqutioora saniniuujia nia panishano.

¹¹Nia rucuanajosacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuaara cuniquiji quiaarejaatijia. ¹²Niaa jaara tamonu tiajinia tiuquishiiquia, pueya nia sequere naatej: “Pueyaso cuaara nioojia cajitiiria”.

¹³Cuno tiajinia quiniaa jaara maninia pueya qiri, juhujaniya quiniutianiyari taa nia sequereecujani. Nojori jaara Pueyaso tojiyashijia qiri saniniuujia, nojori jiuujiaacari cajitiyaquishaanutaniya. ¹⁴Tamonu tia camaru jaara nia tiuquinitianu paniyaqiri na tiajinia, Pueyaso Rupaa ruoretajaca nojori quiniucua, nojori niqiuara nia nioluacaacua nia rapijiotare jiya jooqua. Naacuajitij, cuno pueyari niishiniutianiya Pueyasoori nojori jiyanoaquinutianiya, nojori maseyaquinuucua na rupaa pohuataanaa. Naa nia miirijuhuj cuno tiaca pueya niqiuara, cuno pojori jaara Pueyaso rupaa tojiniu paniyaqiri nia pohuatasacari.

¹⁵Seetanujanaa nia sequeyanijia, jiya puequesacari, cua nequesoresacari pueya, cuno pueyari jiyanoehua saniitosaanutaniya socua Sodoma tiaca pueyainiji, Gomorra tiaca pueyainijinio.

Pueyaso rupaa pohuataanaari naquiya miishaanutaniya

¹⁶Socua cua tojitiare. Janiyari nia jiyaroya Pueyaso tojitiashijia niqiuara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya nijaniya. Nocuaaji jiyanoehua niishijia nia qiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia qiri juhua noseja, pueyano porocua. ¹⁷Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitosaanura, nojori tojiniu paniyaquishacari cua rupaa. Niaari Pueyaso secojojuua tiacajinia piquishaanutaniya. ¹⁸Cua rupaa nia pohuatanuucua, niaari quioosaanutaniya tiaca jiyaniijianucuaacuara, nojori nequesoreenura nijaniya. Niaari jiyaca jiyaniijianucua niqitiosaanutaniyajuhuj. Naajaa, naacuajitij, niaari nojori niqiuara pohuatanutaniya janiyajiniji, taucuaa jiyaniijianucua niqiaranio. ¹⁹Niaa jaara jiyaniijianucua taccoji nujuatesaare nequesoresocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaaja maninia nia riucuanura. ²⁰Naacuajitij, nia riucuanuori maja tama nijaniyajinijiaaja quiniutianiya. Pueyaso Sohanu cutaraari nia pohuatenutaniya jiyaniijianucua niqiuara.

²¹Pueyari tama tarajanujaja niqitioanutaniya mosocoriquiano, tarajanu tiushacari cucua. Pueyanoori neyanu niqitioanutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyacuaaja nia motenura, na queya tiushacari cucua. ²²Puetunu pueyajaari nia niqiniu paniyaquinutianiya, cucua nia tiushacari. Naajaa, cante seetanujanaa cucua tiuujia quiya

pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria. ²³Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanojuaja nia tucataaquishacarijia pohuatanu Pueyaso rupaa puetunu Israel pueya tiacajiniajanana, janiyari jiyocuaaanuji tacatenutaniuhuanu.

²⁴Nio nia niishirijuhuj. Pueyanoori maja socua tojishano na niishitiojonajiniji. Naajuhuj, seruuri maja socua tojishano na camarnujiniji. ²⁵Pueyano jaara maninia tojiriquia na niishitiojona, maniniacuaajaari nojuaja jaara na nuhuaji juhua na niishitiojonara quirijuhuj. Maniniacuaajaari, seru jaara juhua na camarnura quirijuhuj. Naaratej, nia Jiyaniijia jaara jiyaniquishiyacuaa “Sesaacata”, ðtaariquitijia socua na muerasu sesacasaanutaniyatej?

Cante socua pa pueresaroni

(Lc 12.2-7)

²⁶Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuj. ²⁷Jiyasohuaja cua niishitiojosano nijaniyani, cuno nia pohuatare puetunu pueya niqiarajanaa. Cua sasacojosano nia numaa pajamani, cuno nia nacatare puetunu pueya niqiarajanaa. ²⁸Majaari nia puerenu pa puecojuaca. Nojoriiri maja na naata pa sohanu monu. Saaja nia puerere cutara nooj, cante cumaacaracacujani mani quiquiojinia nia sohanu na quejoonura, nia cuaqueyanio.

²⁹Pa naata saaja niquiriyatu cumaneeniyajuata caapiqui shiyojuanijoyua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniyaquishacari. ³⁰Naajuhuj, Pueyasoori puetunu nia naca cajasu niishiyajanaa. Puetunujanaari na serojosano quiya. ³¹Naacuajitij, maja nia puerenu. Niaari jiyanoohua socua Pueyaso panishano queraatia shuhujiniji.

Maja cumaati Jesucristojiniji pa caririqiniu

(Lc 12.8-9)

³²Niaa jaara tamasa pueya niqiuara sequere niaari cucua tiuujia cutara, janiyacua jiyocuaaanu quijia cua Que niqiuara sequerejanuhuj, niaari cua muerasu. ³³Cante saniniuujia cucuaji seetaja tamasa niqiarani, janiyari cua Que niqiuara na tamacanutaniyajaacuhuj.

Jesuucua tiuujia pueyari narta pueya juaashano

(Lc 12.51-53; 14.26-27)

³⁴Majaari nia jyaniniu janiya mijiria niqiaarini pueya quiniuria juhujaniya. Maja. Mijiria cua niniuucua, pueyari juayonuujutanutaniya. ³⁵Niquiaari cutaranijia pueya tiuuniuria cucua. Naacuajitij, pueya tiushacari cucua, cucua tiuyashijia pueyari nojori niqiniu paniyaquiniutianiya. Naacuajitij, pueyanoori na que paracaaniutianiya, cucua tiuujia na que quiniuucua. Maajiri na nucua paracaaniutianiyajuhuj, na nucua tiuuniuucua cucua. Pueyano niquicuaari na reyarucua paracaaniutianiyajuhuj, cucua tiuujia na reyarucua quiniuucua. ³⁶Naacuajitij, tama pueya panishano pueyajaajaari na paracara quiniutianiya, cucua nojori tiuuniuucua.

³⁷Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniurijuhuj. ³⁸Cante tama na cuaqueyajaaja panitiaaquijia na tojiniuria janiyani, cunoori maja maninia quiria. ³⁹Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu

taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojijia na quiniuucuanu, nojuaja cutaraari rishijia jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

Pueyasoori maninia miijiaa niqutionutaniya na jiiiasanojiniji

(Mr 9.41)

⁴⁰Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojijuhuj. Cuno, cante cua tojijiani, nojuajaari cua Jiyarona tojijijuhuj. ⁴¹Naajuhuj, cante Pueyaso rupaa pohuata tiuquinitiaja na tiaconi, Pueyaso rupaa pohuata na quiniuucuanu, Pueyasoori cuno pueyano niqutionutaniya maninia na casaajiniji. Nojuajaari niqutiosaanutaniya mariyata taa Pueyaso rupaa pohuata niqutiosaanutaniyacuaani, Pueyasojiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqutiosaanutaniya mariyata taa maninia miijia pueyano niqutiosaanutaniyacuaani. ⁴²Naajuhuj, cante quenaaja shiniituniacu mohuaca raateya tamonuni, cua mueyanijoyua na quiniuucua, Pueyasoori seetanujuanaa na jiiiasanojiniji na niqutionutaniya na raatenu sami.

Tiuquinijiona Juanri na pueya jiyaroquiaari Jesu nequesotanura

(Lc 7.18-35)

11 ¹Jesu jaara canaa na doce saquiriojosano pueya rootanu tucataquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

²Tiuquinijiona Juan quishacari nujatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

³—¿Quiaate seetanujuanaa Cristo, tariucuaaanu Pueyaso sequesano canaacua niriqianotej? ¿Canaate tamonu sashija soj?

⁴Jesuuri nojori riucuaare:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuaj. ⁵Naa nia pohuatasuhua: “Cariyojuarujiriiri tari niqutiarohua. Shipiiniquiniuujiacaari maninia rucoorohua. Shu miaqueja cusonu jiiitajacaari tari jeequerohua. Numueejunucuaari tari tojitarohua maninia. Macunucuaari samiitacorohua. Casamiijuniucua pueyari Pueyaso rupaa pohuataaaree, Pueyaso muerasura nojori quiniuria”. ⁶Shuquiriaatia quijia cutaraari noo pueyano, cante cucuaji taacanuyajiniani.

⁷Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji na pohuatanu coteequiaari pueya niqiaratej:

—¿Casaa niqiniuucua nia quiojocanu cariquia jiyajiniani? ¿Niaateeri paratu piyarojosano naajua niqiniuucua quiacanu? Maja. ¿Tiuquinijiona Juanteeri noojia niqijijoteja? Maja. ⁸Cua sequeture, ¿casaa niqiniuucua nia quiojocanuni? ¿Niaateeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniujanucua tijajinia quijia cutara, maja cariquia jiyajinia. ⁹¿Taateerinitioj? ¿Casaacua nia quiojocanurini? ¿Pueyaso sequenu panishano caminiujiniani niqiniuucuatee? Jaa. Seetanujuanaa nia sequeyanijia, Tiuquinijiona Juanri jyanohua socua cutara pueyano tamasa Pueyaso sequesano caminiujinijiaajiniji. ¹⁰Cuno Juanjinijicuaajaari tariucuaaanu Pueyaso Rupaajinia pohuataaquiaari. Naa naajiotasaquiaari miriquiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini.

Nojuajaari quia puetanutaniya, quia nuu jecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, cunoori socua cutara pueyano Tiuquinijiona Juanjiniji.

¹²Tiuquinijiona Juan jaara coteequiaari Pueyaso rupaa pohuatanu, pueyari jiyanoahua saniniujiuriquiaa Pueyaso muerasu nojori quiniuria. Pueyari naa saniniujiya quiarijiajuhuaj. Cante jiyanoahua saniniujiya Pueyaso muerasu na quiniuriani, naa quiniutianiyari. ¹³Supuetana Moisés, mariyata puetunu Pueyaso sequesano caminiujiuniaajanaari tariucuacaanu pohuataquiaari taa Pueyaso jitianutaniya pueyani. Naa poojotasaaquiaari Tiuquinijiona Juan jaara tiuquiquiaariiaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴Naa jaara nio cua pohuatasanoocua tiuuniu paniri, nia tojiri nio: Tiuquinijiona Juancuajaari tariucuacaanu pueyara Pueyaso sequesano caminiujiunia Elíascuaja. Elíascuajaari sequesaaquiaari niriqiano. ¹⁵Cante numaacani, cuaara tojiiria cua sequesano.

¹⁶Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapueete carijiniacuma tacuarishijionu paniya juucuanu. Nojoriiri narta naatujooriicua naca, nojori tacuarishijionu panishacari juucua. ¹⁷Naa nacaari: “Canaari juucua naajua jonenejiani. Majaari nia nianujunu paniniu. Canaa jaaquequejosacari taraatia saniniujia, majaari nia sapuenu”. ¹⁸Naajuhua pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. ¹⁹Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratujujuhuaj. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuaratijuhua”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruureta. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

Jesu piriyojosacari tojiyashijianucua pueya
(Lc 10.13-15)

²⁰Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiuyaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

²¹—iNiaari taraatia saniitiosaanutaniya, nioojia nia tacatoyaquiniucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajiniano, taa cua miiquiaari nia tiacajiniacuani, cuno taucua maara Pueyasoocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaani niishishaanura sesa nojori miishanojiniji. Naajuhua, nojori maara juaca quejoquiaari na nacaacua, noojia nojori tacatosacari Pueyasoocua, sesa nojori miiniucua. ²²Naaratej, janiyari nia numooteyani: jiya puequesacari, niaari socua jiyanoahua saniitiosaanutaniya Tiro tiacajinia quiniaa pueyajiniji, Sidón tiacajia pueyajinijio. ²³Capernaum tiacajinia quiniaanaa, ¿niaateeri jiyaniya niaari tamasa tiaca shocotanutaniya nia jiyanihacari niaari socua maninia cutara? iMaja! Niaari mani quiquiojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuani, Sodoma tiaca maara quiriqiaaj. ²⁴Nocuaji nia sequeya cutaranijia: jiya

puequesacari, niaari socua jiyanoahua saniitiosaanutaniya Sodoma tiaca pueyajiniji.

Jesuucua tiuuniaari samaateriquiano cutara
(Lc 10.21-22)

²⁵Jiyacaritij, Jesuuri na Que Pueyaso sequequiaari: —Quia shuquiritiaanijia cua Quenaa. Quiaari jiya camarnu, jiyocuacaanu camarnunio. iQuiaari maninia! Quiaari niishiyashijia pueya maninia casaa niishitirii, niishijia pueyacuaji quia jamosanoni. Niishijia pueyari saaja tama nojori niishishanoocuaaja tiuujia. ²⁶Naacuajitij cua Quenaa, quiaari maninia niishitirii niishiyashijia pueya, taa quia paniquiaaricuajani.

²⁷Cua tojitiare pueyanaa, cua Queeri cua niqutioquiaari puetunu casaajanaa cua jitiiasocoriquiano. Majaari seetanujuanaa tamasa niishiniu janiya. Saa cua Queja cutaraari cua niishiya. Naajuhua, majaari seetanujuanaa tamasa niishiniu cua Que. Saaja janiya, Nyanuni, na niishiya cutaranijia, naajuhua canapue cua niishitiniu paniya cua Quecuajani. ²⁸Cucua nia nijiore, puetunu nijaniyajanaa, canapueete tacaquiyani, canapueete puera niishiriojonuujuacani. Naa jaara cucua nimia, janiyari nia samaraatanutaniyani. ²⁹Cua niishitiojosano nia tojiri. Janiyajiniji nia niishiri taamuecatucua janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojiaari maja na tacaani quiniutianiya nia rupesacari janiya. ³⁰Nia tojishacari janiya, nioojiaari juhuajaniya quiniutianiya. Cua poonitijosacari nijaniya, majaari jiyajeneta na quiniu quiniutianiya niaara, cua cumaquishacari nijaniya.

Jesu pueya carojotasacari trigo samaatenu juuca
(Mr 2.23-28; Lc 6.1-5)

12 ¹Jiyacaritij, Jesuuri canaa na saquirojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuano. Canaari secaja trigo jajau carojotanu coteequiaarini. Canaari na miojonuuriquiaani. ²Fariseocuaca jaara canaa niqiquiaari naa miyanotej, Jesu sequetureeri:

—iQuia niquiri! iQuia pueya trigo shuniitiaa! iNa shuquiquiojonuuyari! iNaa nojori miishacaritij, poonijionuuyari! Cuno maja panishano samaatenu* juuca miiniuria. iPa supuetana Moisés cuajaari naa pa rootaquiaaritij!

³Jesuuri cuno pojori riucuaare:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano?

⁴Nojoriiri Pueyaso Secojojua tijinia tiuquitiaquiaari. Pueyasora niqutiojosano pan satureeri. Cuno panri saaja pueyacuara secोजना sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niqiuara. ⁵Naajuhua, ¿majateeri nia serojonu quiquiaari tariucuacaanu Moisés naajiosanojinia, taa pueyacuara secोजना pueyaracaanu poonijioquiaa Pueyaso Secojojua tijiniani? Nojoriiri naa poonijionuuquiaa samaatenu juucajuahua. Naa nojori poonijosacari Pueyaso Secojojua tijinia samaatenu juucatej, cunoori maja sesa. ⁶Moisés cuajaari pa rootaquiaari maja pa poonijionura samaatenu juuca. Naajaa, cuno rootasanoori seetanujuanaa maja na quiniu Pueyaso Niyanura, jaara Pueyaso Secojojua tijinia poonijionaara quiaquirijuhua. ⁷Maja naasucuaari nia niishiniu quiquiaari casaa nio tariucuacaanu naajiotasano niishitiojia nijaniya juucuanu. Naa sequeyari: “Janiya cutaraari socua nia panitiaani niarta pueyacu nia taraajenura, maja saaja nia niqutiojonura nia seya cucua catijiasocoriquiano”. Naa jaara nio naajiotasano niishijia quiriqia, nia maara sesa miyashijia pueyacuara tonujiaquiriquiaj. ⁸Cua tojitiare quiarijia. Janiyacuajaari Pueyaso Niyanuni. Naacuajitij, mijiria cua quishacari cua naata sequenu casaate samaatenu juuca miishiyanu.

Jesu jeeacasari pueyano juaashiquia cuseetucjuara joojequetano
(Mr 3.1-6; Lc 6.6-11)

⁹Na nuhuaji, canaari Jesuta quiojoquiaari quiniqijini. Canaari Pueyaso Secojuua tiajinia tiuquishiini. ¹⁰Pueyanoori tii quiriqiaa cuseetucjuara joojequetano na juaashiquia. Taa canaa Judiocuaca camarucua Jesuucua saquiriojotanu paniriquiaa juucuacuajani, jiyacaritij, na sapojonuta Jesu nequesotaturee naari.

—Maniateeri samaatenu juuca cusosu naataniniuria? Paacuajaruhua niishitiojosaquiaarini maja pa poonijionura samaatenu juuca.

¹¹Jesuuri cuno pojori riucaaree:

—Niaa jaara niquiriyatujua borregoniyujua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyujua? ¡Taaquiriirinij!
¹²¿Majateeri pueyano socua jiyanoohua panishano borregojinij? Taaquiriirinij. Naaratej, maja pa tarinitianu maninia pa miiniuria pueyaracaanu, samaatenu juucajuhuaj.

¹³Na nuhuaji, sesarucjuua sequereeri:

—Quia juaashiquia quia shiitiore. Na juaashiquia shiitioreeri. Ritia jeequequeeri juhua tanecaraja. ¹⁴Naa Fariseocuaca niquishacari Jesu miishanotej, tohuareetaqueeri. Tama nojorijiaarijia roojotooquiaari nojori motenura Jesu.

Jesujinij pohnatasano tariucuaaanu naajiotasanojinia

¹⁵Jesu jaara niishiquiaari Fariseocuaca miiniu panishano nojuaja, quiniqijii quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa naatanijioquiaari. ¹⁶Jesuuri na naatanijosano pueya rootaquiaari maja tamasa niquiara nojori pohnatanura cante nojuajani. ¹⁷Naacuajitij, tariucuaaanu Pueyaso sequesano caminiujunia Isafas pohnatasanoori tohuateequiaari. Nojuajaari juhucarijia naa pohnataquiaari Jesujinij Pueyaso sequesano miriquitij:

¹⁸“Niocujaaari cua seru, cua saquiriojosano. Na timitiaanijia.

Nojuajaari jiyanoohua cua panishano. Janiyari cua Sohuanu jiyaronutaniya nocuani. Nojuajaari tamasa pueyapue pohnatanutaniya janiyajinij, nojori quiniuria cua muerasura pueyaracaanu. ¹⁹Majaari pueyata juajia na quiniu quiniutianiya. Majaari na rupaa tojishano quiniutianiya tiacaacaco. ²⁰Majaari quenaaja shuniitiasano naajua na shutianu quiniutianiya puetunujanaa. Naajuhuj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa miijiaa jiyanooniutianiya, nojuaja jaara tiuquiriohuajaatijaj, puetunu sesa miiniujanaa na puecanura, Jiyaniijajanaa na quiniuhua pueyaracaanu. ²¹Puetunu tiquiyocujajinijio quijiaa pueyajanaari nocua tiuuniutianiya”.

Pueya sequesacari Jesu samaru cumaacaracana
(Mr 3.20-30; Lc 11.14-23; 12.10)

²²Tiquiaari Jesuucua jaatucusaquiaari. Cariyojuaru quiriqiaaajaariuhuj. Naa quiquiaariiri samaruraca na quiniucua. Jesuuri na jeearee. Naacuajitij, tiquiaari pocujara quiquiaari, niquijiarajuhuj. ²³Cunora, puetunu pueyajanaari nocuaji jiuujiatequiaari. Sequetureeri:

—iNio jiyoteeri pa supuetana David niquiohuacuajinijio supueno pueyano, tariucuaaanu sequesano pa jiyaniijiaa quiriqianotej!

²⁴Fariseocuaca jaara tojiqiaari naa pueya sequesacari Jesujinijitij, nojoriiri na juaaniutia sequequiaari saaja:

—iCuno pueyanoori samaruhua tohuatanijia Satanás cumaacata!

Satanásri samaruhua jiyaniijia. ²⁵Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqii. Naajaariuhuj, pueyano jaara juayonuujutare tapueyocucata tama na tiajiniaaja, majaari nojori naata jatiqii quiniu. ²⁶Jaara naa quiritij, samaruhua jaara tohuatanijosaa Sesaaca cumaacata, tama na cuaqueya paracayajaarjia. Naacuajitij, majaari na naata na cumaaca rishiniu. ²⁷Janiya jaara samaruhua tohuatanijia Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanáste? Majaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatanijosacari samaruhua Pueyaso cumaacata, niaari jiyanoohua jiyajeneya nia sequesacari janiya samaruhua tohuatanijia Sesaaca cumaacatani. ²⁸Seetanujanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijosacari samaruhuatej, niaacuajaari niishiya Pueyasoori tari poonijia juhua Jiyaniijia, mijiria nia tajinia.

²⁹¿Pueyanote na naata cumueeca pueyano tiajinia tiuquiniu na casami na jaariutianura? Maja na naata na jaariutianu, jaara coteenu na morojiaquiri. Jaara na morojore coteenu, na nuhuaji cutara na naata na casami panu. Naajuhuj, janiyari Pueyaso cumaacata jaariutiaa Sesaaca jiiitiasano pueyani.

³⁰Cante cua jiyano quiyaquiyani, cunoori cua paraca. Cante cua naacutaquiaa pueya rerecojonura Pueyasorani, nojoriiri saaja pueya cocuataa Pueyasocujia.

³¹Naarate nia sequeyanijia: puetunu pueya miishano sesajanaari na naata jiyanooshaanu. Sesacojuua pueyanoori na naata jiyanooshaanujuhuj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³²Cante Pueyaso Niyanu sesacajani, nojuajaari na naata jiyanooshaanujuhuj. Saniniuujia, cante Pueyaso Sohuanu sesacajani, nojuaja cutaraari jiyanooyakishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuaaanujuhuj.

Naanaari niishishano na jajaujinij
(Lc 6.43-45)

³³Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujinij paari niishiyani taamueca naanatenojoni. ³⁴Niaari juhua sacocua. ¿Niaatucua taa maninia pocujaca quirini, niaa jaara pueyaracaanu sesa miijiaa quiyajaa? Paari poojiajinij pa niishiriojosano pocuquiaani. ³⁵Naacuajitij, maninia jiuujiaraca pueyanoori saaja maninia casaa pocujaa. Sesa jiuujiaraca pueyano saniniuujia, sacuaratia casaa pocuajia. ³⁶Nia sequeya cutaranijia, Pueyaso saniitonu juuca, pueyari puetunu najuhuaana sesa na pocuasanojinijianaa nequesoreesanutaniya. ³⁷Cante maninia casaa pocujaa quiquiaarini, cunoori sequesaanutaniya “maninia pueyanota”. Naajuhuj, cante sesa casaa pocujaa quiquiaarini, nojoriiri saniitosaanutaniya saniniuujia. Naaratej, majaari nia niti nia taquiriocuatenu sacuaratia casaa nia pocuanura.

Fariseocuaca niquiniu panishacari Jesu miishano Pueyaso cumaacata
(Mr 8.12; Lc 11.29-32)

³⁸Noojiaqueya Moisés Rootasanojinij niishitiojonaari tii quiriqiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

³⁹Jesuuri nojori riucaaree:

—Niaari sesoriquia pueya, Pueyaso tojiyashijiaa. Majaari nia niquiaraca casaa cua miiniu quiniutianiya Pueyaso cumaacata.

Niaari saaja niquiriyatu cutara miishano niqiniutianiya taa supuetana Jonás miishaaquiaaricuani. Cuno Jonás Pueyaso sequesano caminiujiunia quiquiaari. ⁴⁰Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. ⁴¹Jonás pohuatasacari Pueyaso rupaa Nínive tiacajinia, cuno tariucuacaanu taucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatunutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijajanaa cutara Jonásjiniji. ⁴²Naajuhuj, tariucuacaanu jiyaniijia maajiiri niqiaari tucuacaanu pa supuetanaa jiyaniijia Salomón tojinuucua. Cunoori quiquiaari jiyanojua niishijia Salomón quiniuucua. Cuno maajiiri pananu shuucuaaji niqiaari Salomón na tojinuria, jiyanojua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua
(Lc 11.24-26)

⁴³Samaru jaara tohuatate pueyanojiniji, joojuashiquio rucanejiyari na samaatejara na pajesacari. ⁴⁴Jaara riuriataaquiri na samaatejara, naa niishirojiyari: “Tacateyaro-huaraqui tariucua cua quiqiojiniohua”. Jaara tacatemohua, cuno na pueyano riuriatasuhuari juhua camaruuju tia, netoosano, maninia jeenucasano. ⁴⁵Naaratej, samaruuri socua tamasa narta samaruhua pajeya. Socua siete narta samaruhua riuriataari socua jiyanojua sesa nojuajiniji. Puetunu nojorijianaa jaara tiuquitiare cuno pueyanoocua tii na quiniuria, cuno pueyanoori na nuhuaji socua jiyanojua sesa quiijara jiyacateja.

Naa quiniutianiyajaariuhua nio pa quishacari pueyara na tojtiaaquiniuucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricuajani.

Cante seetanujuanaa Jesu nucuani, tapueyocacajuhuj
(Mr 3.31-35; Lc 8.19-21)

⁴⁶Jesu pohuatasacarijia pueya niqiaara, na nucuari tiuquijioquiaari Jesu tapueyocacata Jesuucua. Carijiniacuma quitiuriquiaari. Jesuta pocoojonu paniriquiaa juucuaari.

⁴⁷Tamonu pueyanoori Jesu sequeere:

—iNiishitiojonanaa! Quia nucuacui quia tapueyocacata carijiniacuma quiya. Quiata pocoojonu paniyaquiniiaari.

⁴⁸Jesuuri saaja na numootena pueyano riucaaree:

—¿Cante cua nucuani? ¿Cante cua tapueyocacani?

⁴⁹Jiyacaritij, Jesuuri canaa na tojtianaa pueya shishirii. Tii quiniaa pueya sequeereeri:

—Nio cua tojtianaani, nojori cutaraari juhua cua nucu, juhua cua tapueyocacata cutara. ⁵⁰Naacuajitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuano.

Natoojojua pueyanojiniji pohuatasano
(Mr 4.1-9; Lc 8.4-8)

13 ¹Cuno juucaja, Jesuuri tohuataquiaari tijiniji. Caminia casaqueyaji cajishiiri. Canaari nata quiriqiaani.

²Jiyanojua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquiajia jateequiaari, tiji na tojtianura Jesu canaata. ³Jesuuri queraatia casaa pueya maanu

niishitiojoriqiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajia. ⁴Na jacutasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacoji na natau miojoquiaariiri. ⁵Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶Panau jaara tacaquiaari, cuno natauri ritia sorequiaari maja puera nujuacaraca na quishacari. ⁷Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. ⁸Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetquiaari cutaraari. Puetunu cuno jiyoneejinijianaani, noojiaqueyari muetquiaari cien jajau niquiriyatu jiyonaacua. Tamonu jiyoneeri muetquiaari sesenta jajau niquiriyatu jiyonaacuajuhuj. Socua tamonu jiyoneeri muetquiaari treinta jajau. ⁹Niaa jaara numaraca quiri, nia tojtiane cua pohuatasano.

Casaara Jesu niishitiojia miriquini
(Mr 4.10-12; Lc 8.9-10)

¹⁰Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijanaa, ¿casaara pueya quia niishitiojoriqiaa miriquini?

¹¹Jesuuri canaa riucaaree:

—Pueyasoori nia saquiriojoquiaari, nia niishishoo casaa Pueyanojiniji nia niishiniuria, taa Pueyaso poonijia pueya jiuujiajiniani, na muerasura nojori quiniuria shuquiriaatia. Tamasa nia saniniuujia, majaari nio jiyasohuaja Pueyanojiniji niishishano nojori niishishocoriquiano. ¹²Cante Pueyaso rupaa tojijia cutarani, nojuajaari socua niishitiojosaanutaniya, Pueyanojiniji jiyanojua na niishiniuria. Cante Pueyaso tojiyashijiani, shiitianiyojua Pueyanojiniji nojori niishishanoori puetunu jaariutiasaanutaniyanaa nojorijiniji. ¹³Cunora, janiyari miriqui pohuatariquiaa nojori niquiarani. Naacuajitij, nojoriiri najuhua niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojtiquiaa saajaari. Majaari quenaaja nojori niishiniu na tojishano. ¹⁴Naa nojori quiniuucuatej, tari tohuateereeri juhuacarijia supuetana Isafas sequesano nojorijiniji. Pueyara Pueyaso sequesano caminiujiunia na quiniuucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niqiniutianiya najuhuanaj. Majaari nia niishiniu quiniutianiya nia niquishano. ¹⁵Nojoriiri cumajiuujia quiya. Nojoriiri juhua numueeju, tojiyashijia. Nojoriiri juhua nimishitiu quiyajuhuj. Naa juhua nimishitiu quitiuyari nojori niqiyaquiniuucua. Nojoriiri naa juhua numueejunucujuhuj, nojori tojtiaaquiniuucua nojiata. Naa quitiuyari nojori niishiyaquiniuucua nojiata, cucua nojori tacatenuhuara cua jeecanura nojori jiuujia seque”.

¹⁶Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhuj. ¹⁷Seetanujuanaa nia sequeyanijia, queraatia tariucuacaanu pueyari quarijia nia niquishano niqiniuucua jiaatiaquiaari juucua. Naa nio niqiniuucua jiaatiaquiaari tariucuacaanu Pueyaso sequesano caminiujiunia, queraatia maninia pueyano. Majaari nojori niqiniu quiquiaari saaja. Nojoriiri nia tojishano tojinuucua jiaatiaquiaari juucujuhuj. Majaari nojori tojinu quiquiaari saaja.

Jesu niishitiojosacari miriqui na pohuatasano natoojojujiniji
(Mr 4.13-20; Lc 8.11-15)

¹⁸Nia pohuatareera nia niishiniuria cua pohuatasano natoojojujiniji. ¹⁹Canapete Pueyanojiniji cua pohuatasano

niishyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiri. ²⁰Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquuaa. ²¹Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojjijaca nojori quiniuucua, nojoriiri ritia Pueyaso tojiniu tarinitiaquiaa. ²²Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhuj, nojoriiri sapojosaaquiaa nojori jiyanshacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacuajitij, cuno pueyari juhua natau muetuhuo quiquiaa. ²³Saniniuujia, cante maninia tojjijia Pueyaso Rupaani, maninia na niishiyari. Cunoori juhua jiya maniniuujia jacutasano jajau. Naacuajitij, cuno pueyari juhua maninia natau, maninia muetuna cutara. Jiyanoehua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujujuhuj.

Jesu pohuatasano miriqui trigo tajinia moritaja sesa jiyasocujiniji

²⁴Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojitiaashijia pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia. ²⁵Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. ²⁶Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. ²⁷Cuhuariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquiriojosano jajau quiqianucua quia natasano cuhuariquiajiniani? ¿Teje cuno sesa jiyasocua moritariucua quia natau tajiniacuararini?” ²⁸Cuhuariquia camaruuri nojori riucaaree: “Pa paracaari cunohuj, naa pa miirucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹Na seya sequere saajaari: “Maja. Maja nia jayotanu jiyasocua, niaa miriqui trigo na cojiritiareeri. ³⁰Naajaa, nia tarinitiare cuaara maashiriia, mariyata cuaara noshiirijaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiuuiojonura jiyasocua catijiasocoriquiano. Na nuhuaji cutara, cuaara trigo jajau racatatuura nataco”.

Jesu pohuatasano miriqui mostaza jajajiniji
(Mr 4.30-32; Lc 13.18-19)

³¹Jesuuri socua miriqui pohuataquiaari pueya niquiara, na niishitiojonura taa Pueyaso poonijiyaa pueya jiuujiajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia. ³²Seetanujuanaa mostaza jajauri socua jiyanoehua shiitianiyojua puetunu tamonu jajajinijianaa. Naajaa, cuno mostaza jaara maashiri, socua puereetucara maashijiaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

Jesu pohuatasano miriqui pan poreetajajiniji
(Lc 13.20-21)

³³Jesuuri nio miriqui pohuatasano pohuatarohuacuhua pueya niquiara, taa Pueyaso Rupaa poonijiyaa mijiriani. Nojori sequereeri:

—Pueyaso rupaari jiyanoehua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

Casaara saaja miriqui sequesano pohuatasaaquiaa pueya niquiarani
(Mr 4.33-34)

³⁴Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaaritij. ³⁵Naacuajitij, maninia tohuateequiaariiri tariucuaaanu pueyara Pueyaso sequesano caminiuujia sequesano, jaara nio naajotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasano. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipinishaanujiniji’”.

Jesu niishitiojosacariuhua miriqui na pohuatasano sesa jiyasocujiniji

³⁶Na nuhuaji, Jesuuri pueya maanu sequere:

—Tariucua pueyanaa. Nia quiojorohua.

Na nuhuaji, nojuajaari na quijia tajinia tacaarohua.

Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocujiniji.

³⁷Jesuuri canaa sequere:

—Janiyacuaajaari cunoni, maninia jajau natojojuaani. ³⁸Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasano. Tamasacaari saniniuujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni.

³⁹Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senosacari quiniutianiya. Jiyocuacaanuji Pueyaso seyari juhua cuhuariquia senoonaa quiniutianiya. ⁴⁰Naatej, taa sesa jiyasocua namitiashiya catijiasocoriquianocuaani, naa quiniutianiyajaariuhua nio jiya puequesacari. ⁴¹Janiyari cua seya jiyaronutaniya jiyocuacaanujini. Nojoriiri sesa miijiaa quioonutaniya, mariyata canapuee tamasa miitiquiaa sesani. ⁴²Nojoriiri quejoosaanutaniya mani quiqiojinia. Nojoriiri tii sapuenutaniya pueyaracaanu. Naquiya na miishacari, na quiaa miquenutaniyari. ⁴³Na nuhuaji, Pueyaso tojittajacaari jiyanoehua shacantuucara quiniutianiya juhua pananu, na Que Pueyaso jiiitasacari nojori pueyaracaanu. Cante numaacarani, cuaara tojitiaara cua sequesano.

Jesu pohuatasano miriqui jiyanoehua panishano casaajiniji

⁴⁴Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanoehua panishano. Nojuajaari naa sequereeritij:

—Tamonu pueyanoori tamasa cuhuariquia tajiriquiaa juucua. Casaa riuriatamaari, jiyanoehua panishano casaa. Tiijia na jamorohuari tee na quiriquiaacuajani. Jiyanoehua na shuquiritasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiiitanura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanoehua na panishano casaari tama na casaara quiqiaarijaaja. Naajuhuj, socua jiyanoehua panishano cutaraari, Pueyaso pueyanora nia quiniuria. Cunoori jiyanoehua socua panishano puetunu pa panishano casaajinijianaa.

⁴⁵Socua nia tojiri nio pohuatasano. Casami niqutiojonaari pueyaracaanu rucanejoriquiaa shanoehua cohuajaaca tiujiau na pajenura. Cunoori noturu shipinijosano sai quiquiaari. ⁴⁶Tamonu

juuca, jiyanhua shanhua noturu saajia niqutishaaquiaariiri. Jiyanhua na panishano. Naaratej, puetunu na jitiisananojuanaa niqutiojoquiaariiri, cumaneeca na jitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanhua na panishanoni. Naajuhuj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pahuatasano miriqui shiyarujiniji

⁴⁷Pueyaso Rupaari juhua puereetuuca shiyaru na camaru jartasano caminiajinia. ⁴⁸Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajaari tii quiriqiaa. Pueyari jaaquiajinia cajitiquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniuujia jacutasaaquiaari. ⁴⁹Naa quiniutianiyajaariuhuj jiya puequesacari. Naacuajitij, Pueyaso seyari rosetanutaniya, sesa miijiaa na saquiriojonura maninia pueya tajiniji. ⁵⁰Na nuhuaji, sesa pueyari quejoosanutaniya mani quiquiojinia, taa sesa sapitiaaja jacutasaaquiaaricuaani. Nojoriiri tii sapuenutaniya. Na quiaa miaquenutaniyaariuhua naquiya na miiniutia.

Pueyaso Rupaari jiyanhua panishano: tariucuacaanu naajiotasano, quiari naataja naajiotasanonio

⁵¹Jesu pahuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pahuatasanojuanaa-cuaja?

Canaari Jesu riucaareeni:

—Taaquiriirinij Jiyaniijianaa.

⁵²Jesuuri canaa sequeere:

—Maniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijihuaj, nojuaja cutaraari Pueyaso Rupa niishijia seetanujuanaa. Nojuajaari juhua tia camaru, cante tariucuacaanu shanhua casamiriacaajani, quiarinio casamiriacaajuhuj, na tijajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³Jesu jaara puecaquiaari miriqui pahuatanu, tiji quiaquiaariuhuari. Canaari na nuhuajiriqiaani. ⁵⁴Canaari na maashijia tiacajinia tiuquiquiaariuhuaani. Canaa tiuquijiosacari, canaari Pueyaso sechojua tijajinia tiuquiquiaariini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajaarani? ¿Tejenotejaara na cumaacani, cusosuhua na naatanijionurani? ⁵⁵Na shipininiocuaajaari suruhuatujiniji casaa shipinijiona quijia. Na nucuacuaajaari María. Na tapueyocuaacari Santiago, José, Simón, Judasno.

⁵⁶Na rimiatuhuari mariyata niya pa tijajinia quiya. ¿Taa na niishiya pueraarini?

⁵⁷Naaratej, pueyari na ruuretaquiaari saaja. Naa na tiacajinijinio pueya tojtiaaquishacari nojuajatej, Jesuuri nojori sequequiaari:

—Puetunu tiquiyocua pueyajanaari maninia tojtiaquiaa cutara Pueyaso sequenu panishano caminiuujinia. Saaja narta pueya tama na jiyajinijiniojuariajia na tojtianu paniyaquiya, tama na tijajinijiniojuaja pueyano.

⁵⁸Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiyaaquiniucua nocua.

Herodes motesacari Tiuquinijiona Juan

(Mr 6.14-29; Lc 9.7-9)

14 ¹Cuno quishacari, Galilea jiya jiyaniijia Herodesri pahuatasaaquiaari Jesu miishanojiniji na cumaacata.

²Herodesri na seya sequequiaari Jesujiniji:

—iNojuacuajaari cua mosano Tiuquinijiona Juan! iSamitiarohuacuaaqui! Naacuajitij, jiyanhua cumaaca jitiiaari, jiyajeneta casaa na miiniuria Pueyaso cumaacata.

³Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniucua tarajanu Felipe niquiocuata. ⁴Tiuquinijiona Juanri naa Herodes sequequiaari quiasano na quiaquishacarijia:

—iQuiaari Pueyaso tojiyashijia! iMajaari maninia quia quiniuria Herodíasta! iNojuacuajaari quia tarajanu Felipe niquiocua!

⁵Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiuujinia quiquiaari. ⁶Tiuquinijiona Juan nujuasacarijia nujuatejojuajinia, Herodesri na rasaanu juucaajinia queranacuquiaari na masusano pueyata. Jiyacaritij, cuno maaji Herodías niyatuuuri nianujuquiaari Herodes masuusano pueya niqiuara. Jiyaniijia Herodesri jiyanhua na shuquiritiaquiaari. ⁷Naaratej, Herodesri necanuru* sequequiaari puetunu pueya niqiarajanaa:

—Sanaanaa, cua sequere casaa quia paniani. Janiyacua quia niqutiore quia panishanoni. iSeetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiya?

⁸Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutaniyani. Naaratej, niyacoori jiyaniijia Herodes sequesee:

—Cua quenunaa, cua niqutiore Tiuquinijiona Juan naca miacojuajinia.

⁹Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masusano pueya niqiuara. Naacuajitij, Herodesri na seya sequequiaari cuara niqutiosaarianoj. ¹⁰Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹Na nuhuaji, Juan nacaari patasaaquiaariuhua miacojuajinia. Niyacoo niqutiosaasuhuari. Niyacoori saniniuujia na nucuacua na pataquiaari.

¹²Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pahuatanuucua Tiuquinijiona Juanjiniji.

Jesu mianuutesacari cinco mil pueya

(Mr 6.30-44; Lc 9.10-17; Jn 6.1-14)

¹³Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiaquishacaria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquico. Cuno pueyari canaacuaji cutesee. ¹⁴Naacuajitij, Jesu rosesacari botejiniji, jiyanhua queraatia pueya niquishii saajaari. Nojoriicua taraajereeri. Cuno pueya patootasano cusosuhua naatanijioreeri. ¹⁵Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiaquishacaria. Paari nininiutianiyaari. Juhucarijia pueya quia sequere nojori cuara quiojohuara tiacajinia, na miaquesocoriquiano nojori masenura.

¹⁶Jesuuri canaa sequere saaja:

—¿Maatucua casaara quiojyaroahuani? Naa mariqui nojori mianuutere saniya.

¹⁷Canaari Jesu sequereeni:

—Maja canaa jitianu miaquesano. Niya quiya saajaari cinco pan, caapiqui sapitiaajania.

¹⁸Jesuuri canaa sequere:

—Miji nia patare.

¹⁹Jesuuri sequere pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niqutiojoreeri puetunu pueyajanaa canaa niqutiojosocoriquiano. ²⁰Puetunu pueyajanaa miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuaani, sapitiaaja raquiquiano. Doce canaasatuuri mishinijosaaquiaari na raacuata. ²¹Jiyanoehua queraatia pueyari miaquenuquiaari; cinco mil quiquiaari saa canuujua. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²²Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriqiaa tamajaaja. ²⁴Canaari saniniujia caminia jiuujiajinia tari jaaretariquiaacuaani. Mohuacaari saaja canaacuara cajiniucuariquiaa, paratu piyarojosacari canaacuara. ²⁵Juhuaquenu panishacari, Jesuuri canaa rupesee mohuaca caco na rucuanenuta. ²⁶iCanaa niquishacari casaa mohuaca caco rucuaneyano, canaari jiyanoehua shiriqutiurini! Canaari sariyocuatreeni.

—iYae! iSamaruhua!

²⁷Jesuuri ritia pocuaree. Canaa sequereeri:

—iNioojia nia cumaquiri! Janiyacuajinjia. Maja nia puerenu.

²⁸Canaa tojishacari Jesu, Pedroori Jesu sequere:

—iJaara seetanujanaa quiajanija quiri Jiyaniijianaa, cua sequere quiocua cua quianura mohuaca caco!

²⁹Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰Na niquishacari paratu jiyanoehua piyarojijano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—iJiyaniijianaa cua quiare!

³¹Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaaji quia taacanureeni?

³²iNojori jaara botejinia tacataquiaariuhua, paratuuri jiyacari pueyajee! ³³Canaa niquishacari naa Jesu miishano na cumaacatej, canaari Jesuucuaa mojuquetacoquiaarini. Canaari na sequereeni:

—iQuiaaqui seetanujanaa Pueyaso Niyanu!

Jesu naatanijosacari cusosuhua Genesaret jiyajinia

(Mr 6.53-56)

³⁴Canaa jaara caminia taquijiria niuutiaquiaarini, canaari Genesaret jiyajinia shiitiaseeni. ³⁵Genesaret pueya jaara niishiquiaari Jesu tiuquiri, nojoriiri puetunu na jiyajiniajanaa pueya numootequiaari, cuaara patootasaaria cusosuhua Jesuucua. Naacuajitij, Jesuucua patootasaaquiaariiri puetunu cusosuhujanaa. ³⁶Pueyari Jesu sequetuquiaari:

—Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

Casaate sesa miitijia pueyanoni

(Mr 7.1-23)

15 ¹Na nuhuaji, Jerusalén tiacajinijinio pueyari canaacua tiuquijioquiaari Jesuta pocojonura. Nojoriiri quiquiaari Fariseocua, Moisés Naajioneejiniji niishitiojonaa. Jesu sequetureeri:

²—Quia pueyari shuquitioojua miaquenuquiaa. ¿Casaara nojori tojtiaaquiuaa canaa niishitiojosano pa supuetanaajiniji? iNojori cuaara miiria taa pa supuetanaa miiquiaaricuaani!

³Jesuuri nojori nequesotaree saniniujia:

—¿Niajaniryariuhua? ¿Casaara nia tojtiaaquiuaa saniniujia Pueyaso Rupaani, nia supuetanaa jiiitishano miiniu nia miiniuriani? ⁴Pueyasocuaajaari sequequiaari: “Quia que tojijia quia quiri, quia nucua tojijiano. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhua: “Cuaara mosaaria cante na que sesacajani, na nucua sesacajano”. ⁵Niaari saniniujia sequequiaacujua, maniniacuajaari pueyano jaara na queya sequere: “Cua quena, cua nucuaana, janiyari Pueyasora niqutionutaniya cua casamini. Naacuajiti majaari cua naata nia naacunu cua jiiitasano casamiti”. ⁶Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaaja juhua nia supuetanaa nia miiniuratej, niaari Pueyaso Rupaa jiyateya najuhuanara. ⁷iSapuenu Pueyaso Rupaa tojtiaajacanaa! Supuetana Isafasquiiri maninia naajiotaquiaaricuaaja niajanijajiniji, na caminiujiushacari nio rupaa Pueyasojiniji:

⁸“Nio pueyari saa na rupaataja cua maniniuhuaqueetaquiaa.

Nojori jiuujiaari saniniujia tucuaaanu quia janiyajiniji. ⁹Nojoriiri najuhua nirejoquiaa na maniniuhuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

¹⁰Na nuhuaji, Jesuuri puetunu pueyajanaa sequere:

—Miji, niya cua tojtiaaseecuarajaj maninia nia niishiniuria.

¹¹Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹²Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—iJiyaniijianaa, ¿quiaate niishiya Fariseocuaari juaaquioree naa quia sequesacaritij?

¹³Jesuuri canaa riuacuaree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajinia. Nojoriiri juhua sesa jiyasocua jayotasaanutaniya. ¹⁴Seetanujanaa Pueyaso niishiyashijiaa nojori quishacari, nojoriiri juhua cariyojuaru quia. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totentaniya.

¹⁵Pedroori Jesu sequere:

—iJiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasanojiniji.

¹⁶Pedro riuacuareeri:

—¿Niaateeri na niishiyaquiyajuhua? ¹⁷¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhucuma tajimiaari. ¹⁸Saniniujia, pa rupaata pa pocuasano sesani, cunoori poojiajiniji tohuataa cutara. Naacuajitij, pueyanoori sesa quia Pueyaso niqiara, sesa casaa na pocuanuucua. ¹⁹Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. ²⁰Puetunu naa sesa pueya niishiriojosanojuanaa cutaraari pueyano sesojua. Saniniujia, pueyano jaara miaquere shuquitioojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaa jiyajiniarani. Cuno jiyajinia quiquiaariiri Tiro tiaca, Sidón tiacajuhua. ²²Canaa rucanejosacari tii, cuno jiyajinijinio taatuuri Jesuucua

niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—iJiyaniijiana, cucua quia taraajere! iPueyaso Jiyarosanona, cucua quia taraajere quenaaja! Quiyatu samaru jitiia. Jiyanoahua taraatia na miquiaari.

²³Jesuuri maja na riucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—iJiyaniijiana, na panishano quia miiri cuaara quiohuara! iTaajeta naca pa nuhuajini!

²⁴Jesuuri canaa riucuaaree:

—Janiyari saaja Israel pueyacia jiyarosaquiaarini. Nojoriiri juhua borregohua tashuquioon. Nojoriicua taraajeyanjia.

²⁵Cuno maajiiri Jesu sequesano tojirii. Naajaa, Jesu cariquimijaji mojuquetaseeri. Na sequereeri:

—iJiyaniijiana, cua naacutare!

²⁶Jesuuri na riucuaaree:

—Majaari maninia pa jaariutianura pa niquiohua miaquesano, sare niquiohua niqutiosocoriquiano saniniuuja.

²⁷Maajiiri saaja na sequereeri:

—Maniniacua quia sequesano Jiyaniijiana. Naajaa, sareyaniojuacuajaari miaquesano shiriyia miaquenuquiaa, na camaru totinijosano na miaquejajini.

²⁸Jesuuri maaji sequereeri:

—Maniniacua quia sequesano maajinia. Quiaaqui jiyanoahua cucua tiuya. Cuaara quiiriacu taa quia panyacuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

²⁹Canaari Jesuta cuniquiji quiaquiaariuhua. Canaari Galilea caminia shuriuquico tajimiani. Canaari tuhananuucua tacatamaani. Jesuuri tii cajishii. ³⁰Queraatia pueyari nocua nijioquiaari. Nojoriiri queraatia cusosuhua nojotaquiaari Jesu shuriucua, nojori tiacajini nojori patootasano. Cusosuhuari quiquiaari shipiiniquijuniana pueya, cariyojuarujunio, tiqianucuaajuhaaj, sesarunecatohuanio, socua queraatia tamaatia cusosuhuanio. Jesuuri nojori naatanijosquiaari puetunujuana. ³¹Pueyari jiuujiatequiaari nojori niquishacari tiqianucua pocoyano, shipiiniquijuniana rucaneyano maninia, cariyojuarujuri niquishacari maniniajuhuaj.

Naajuhuaaj, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maniniuhuaqueetaree. Sequeteeri:

—iJiyanoahua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³²Na nuhuaji, Jesuuri canaa na saquirojosano pueya sequereeri:

—Miji pueyana. Nio pueyacia taraajeyanjia. Nojoriiri tari jiuujianaraca juuca camueenujiya niya pata. Majaari nojori jitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojoniyarohua nucuacoori.

³³Canaari Jesu nequesotareeni:

—¿Canaatucua tee riuriatate queraatia miaquesano nio queraatia pueyarani? Niya, majaari pueya quiniu quenaaja.

³⁴Jesuuri canaa nequesotaree:

—¿Taa pan nia jitiiaani?

Canaari na riucuaareni:

—Canaa saaja siete pan jitiiaani, secaja sapitiaajaniyojuanio.

³⁵Jesuuri pueya sequereeri na cajitiuniuria. ³⁶Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niqutiojonura pueya. ³⁷iPuetunu pueyajanaari maninia miaquenuquiaari! Tooquioreeri.

iCanaari miaquesano cureenota mishinjioquiaari siete canaasatuni! ³⁸Queraatia pueyari na miaquenuquiaari. iSaaja canuuri serojosaaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

Fariseocuaca, Saduceocuaca niquniu panishacari

Jesu miishano Pueyaso cumaacata

(Mr 8.11-13; Lc 12.54-56)

16 ¹Fariseocuacaari Saduceocuacata Jesuucua nijioquiaari nojori saniniujiuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujanaa Pueyaso jiyarosano.

²Jesuuri nojori sequereeri saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. ³Naajuhuaaj, pananu jaara tariquicuaji jama, niqutioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiya niya nia niquishacari. iMosanucuaana! ¿Casaara saniniuuja nia niishiyaquiya casaa Pueyaso niishitiojiya juucua nijaniyani? Nojuacuajaari juucua na cumaacata na miishano miiquiaa nia niquiara najuhanaj.

⁴Jesuuri nojori niquiara sequereerujuhuaj:

—Nio sesoriquia pueya, Pueyaso tojtiaashijiacani, nojoriiri Pueyaso cumaacata cua miishano niquniu paniya juucua. Majaari nojori niqutishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niquniutianiya: janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitiojosanoocuaji

(Mr 8.14-21)

⁵Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni.

⁶Jiyacaritij, Jesuuri canaa sequereeri:

—Niishijia nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

⁷Cunora, canaari tama sequetooreejaanjia:

—¿Casaa na sequeyani? Pan pa paaquiniuucua naa pa sequeya jiyoteeri.

⁸Jesu niishishacari naa canaa sequesantej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? ⁹¿Majateeri juhuanajuaja nia niishiniu tari cua miishanojiniji? ¿Niaateeri tari niyajarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij? ¹⁰Niaa jiyoteeri niyajarucuaajuhaaj taa canaasatu mishajate curecanuni, cuatro mil canuu jaara miaquenuucanu siete panjinijitij. ¹¹¿Casaara nia jiyaniirini janiya miaquesanojiniji sequeriquiaani? Maja cua sequenu panjiniji. Nia sequeriquiaanjia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹²Naa na sequesacari, canaari jiyacari niishiquini majaari Jesu sequenu quiriquiaa pan poreetajajini. Canaari shusha niishiquini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

Pedro sequesacari Jesuuri seetanujanaa Pueyaso Jiyarosano

(Mr 8.27-30; Lc 9.18-21)

¹³Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴Canaari Jesu riucaareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elfás, tariucuacaanu pueyara Pueyaso sequesano caminiujiunia. Tamasacaari saniniuujia quia sequequiaacujua, quiaanaari supuetana Jeremías, pueyara Pueyaso sequesano caminiujiunijuhua, tamonu Pueyaso sequesano caminiujiunia soj.

¹⁵Jesuuri canaa nequesotarohua socua:

¿Niajanijariuhua? ¿Taa nia sequeyanijia? ¿Cante janiyani?

¹⁶Simón Pedroori na riucaaree:

—iQuiaacuajaari Pueyaso Jiyarosano! Quiaari Cristo, Pueyaso Niyanu.

¹⁷Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajanijia. ¹⁸Janiyari socua sequenu paniya quiajanijiani Pedronaa. Quia sesaari Pedro. Nioori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujanaa cucua quia tiushacari, quia niishishacari janiyari Pueyaso Niyanuni. Naajuhua, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani. Puetunu cua saquirojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacuajitij, nojoriirri juhua puereetuca saajiacua tiasano quiniutianiya. Puetunu cua muerasujanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora.

¹⁹Naajuhua Pedronaa, quiaari juhua cua quiquio tiotiu riatataja jiiitiana quiniutianiya. Naacuajitij, quiaari coteenu pohuatanutaniya pueya niquiara janiyajiniji, nojori tiuuniuria cucua, juhua Pueyasocua nojori tiuquiniuria na muerasura nojori quiniuria. Naajuhua, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuara naa quiriitej. Naajuhua, quiaa jaara casaa tenujere, maja naa pueya miiniuritej, Pueyasoori naa sequenutaniyajuhua.

²⁰Na nuhuaji, Jesuuri canaa na pueya rootaree maja canaa pohuatanura tamasaca niquiara nojuacuajaari Pueyaso Niyanu.

Jesu numootesacari na pueya, nojuajaari mosaanutaniya

(Mr 8.31-9.1; Lc 9.22-27)

²¹Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyano. Pueyacuara secojona jiyaniijianucuaari nojori rupenutaniya naa cua paracaashaanurajuhua, mariyata tariucuacaanu Moisés Naajioneejiniji niishitiojonaano. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhua.

²²Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyano. Jesu sequereeri:

—iMaja naa pocuanutej! iPueyaso cuara cojuara quiajanijia maja naa quia miishaanuratej!

²³Jesuuri saaja Pedro nijiniaqueque. Na sequereeri:

—iNiiquiji quia quiaare Satanásnaa! iQuia sanaajere! Sesaacaari naa quia pocuaree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaji cua tarinitiniu paniya juucua.

²⁴Na nuhuaji, Jesuuri canaa na pueya sequequiaari:

—Pueya jaara cua tojjijara quiniu paniya, nojori cuara carteira tama nojori panishanojuaja. Na nuhuaji cutara,

cuaara miiria cua panishano, tama na cuaqueya na panitianutajaaja cucua. ²⁵Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyano. Taraatia quiniutianiya. Saniniuujia, cante tama na cuaqueyajaaja panitiaa cucua mijiriani, cuno pueyanoori na nuhuaji pueyaracaanu shuquiraatia quiniutianiya cutara. ²⁶Naajuhua, pueyano jaara masere puetunu nio jiya casamijanaa, na casamiiri najuhua quiniutianiya nera, na camaru jaara jataasaere mani quiquiojinia na shaajesacari. Nojuajaari maja na naata Pueyaso jiyano. Tama na cuaqueyajaaja, naajaa, nojuaja jaara puetunu na casamijanaa niquitiore Pueyaso, Pueyaso samiitianiniuhua nojuaja.

²⁷Janiyacuaajaari jiyano. Shacantuuca quijia quiniutianiya, cua Que jiyatesacari janiya Jiyaniijiarajanaa. Na nuhuaji, janiyari mijiria niniutianihua jiyocuacaanu cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niquitiosaanutaniya maninia nojori miiniucua. Pueyaso tojtiaashijiaaari saniniuujia naquiya miishaanutaniya, sesa nojori miiniucua. ²⁸Seetanujanaa nia sequeyanijia, noojiaqueya niajanijinijinio niya cuata quiyani, majaari nia shaajenu quiniutianiya juhuanojuaja, niaa cuara niquirijaatijia Pueyaso cumaaca cucua tiuquiyano, cucua tiuujiaa jiiitariquiano.

Jesu jatasacari shacantuucara

(Mr 9.2-13; Lc 9.28-36)

17 ¹Seis juuca nuhuaji, Jesuuri nio pojori jiyataquiaari jiyaconaja tuhananuucua. Nojoriirri quiquiaari Pedro, Santiago, Santiago tarajanu Juannio. Jiyareta tama nojoriijaari quiaquiaari. ²Jesuuri tii tamaatiara jataquiaari nojori niquiara. Na jiquicoori jiyano. Shacantuucara jataquee, juhua pananu. Na toqueeri mariyata jiyano. Cohuajara jataquiaarijuhua, juhua cuhuatana. ³Jiyacaritij, nojoriirri caapiqui supuetanaa niquirii, Moisés, Elíasnio. Jesuta pocoojoriquiaari. ⁴Cunora, Pedroori Jesu sequereeri:

—iJiyaniijanaa, canaaqui namitia niya quiyani! Quiaa jaara paniri, canaa quicuaji suhuoronutaniyani, Moisésrajuhuaj, Elíasranio.

⁵Pedro pocuasacarijia, shacantuuca najacaari nojori mishiquiomaa. Najacajiniji, rupaari tojishaaquiaari naa sequeyano:

—iNioori cua Niyanuniyojua, cua shuquiritiasano! iSaaja nojuaja nia tojtiare!

⁶Naa nojori tojishacari Pueyaso pocuaanotej, nojoriirri jacamatiquiaari jiyano. ⁷Jesuuri nojoriicua nimiaa. Nojori quiaaseeri na juashiquiata. Nojori sequereeri:

—Nia saneecuaturuhua. Maja puereenu.

⁸Nojori jaara niquinijionuquiaari, majaari tari na niquitiuni quiquiaari cuno supuetanaa. Saaja Jesuuri quiriquiaa.

⁹Nojori rosetasacariuhua tuhananujiniji, Jesuuri naa nojori rotaquiaari:

—iMajaari nia pohuatanu pueya niquiara tuhananujiniji nia niquishano! Niocua na pohuatarohua cutara janiya jaara samiitiarohuani.

¹⁰Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojona sequequiaacuaarini, supuetana Elíasnaari quicuaji mijiria niniutianihua coteenu, pueya na jiyano. Totaenuhuara necohuata?

¹¹Jesuuri riucaaree:

—Elíasri seetanujanaa coteenu niriquiano quiquiaari, puetunu pueya jiuujiajanaa na jeenucuanura. ¹²Janiya cutaraari nia sequeyani, Elíasacuajaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricuaajani. Nojoriirri naa cua miiniutianiya naquiyajuhua.

¹³Naa Jesu pohuatasacari Elíasjinijitij, na pueyari niishiquii nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samijia
(Mr 9.14-29; Lc 9.37-43)

¹⁴Jesu jaara tuhuananujiniji tiuquijioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaa mojuquetaseeri na sequenura neyanuucuaa. ¹⁵Jesu sequereeri:

—iJiyaniijianaa, cua niyanuucua quia taraajere quenaaja! iNojuajaari pueyaracaanu cusojoquiaa! Na jittiasano cusonuuri na taquiriocatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, mojiniano. ¹⁶Janiyari quia pueyacua na tiuquitiasee na naataniniuria juucua. Nojoriiri maja na naata na naataniniu.

¹⁷Jesuuri cunora sequereeri:
—iNiaaqui Pueyasooocua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajaarini? Miji nia jaatucuma cuno mueya.

¹⁸Mueya tiuquishacari nocua, Jesuuri samaru juarii. iNa tohuatereeri! Jiyacaritij, caya samijiaari maninia quiquiuhua.

¹⁹Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriqiaani?

²⁰Jesuuri canaa riucaaree:
—Maja puera maninia nia tiuuniu juhuanojuaja Pueyasooocua. Seetanujuanaa nia sequeyanijia, nia tiuuniu Pueyasooocua jaara quiriqiaa shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

Jesu pacutesacari pohuatanu nojuajaari mosaanutaniya
(Mr 9.30-32; Lc 9.43-45)

²²Tamonu juuca Jesu rucoojosacari canaa na pueyata Galilea jiyajinia, Jesuuri canaa sequereeri:

—Janiyari sapojonuta niqutiosaanutaniya taucuaani. ²³Nojoriiri cua monutaniya. Jiuujianaraca juucajinia, janiyari samiitianutaniuhua.

Naa Jesu sequesacari canatej, canaari jiyanhua taraajequiaarini.

Cumaneeca niqutiosacari Pueyaso Secojojuatiaacuara

²⁴Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojojuatiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojojuatiaacuara, taa pa jiyaniijianucua sequequiaaricuaajani?

²⁵Pedroori na riucaaree:
—Na niqutioquiaanocuaaja.
Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuaajiniji soj?

²⁶Pedroori Jesu riucaaree:
—Taucuaa niqutiojoteshianocuaaja nojori jiya jittiana sequesano.
Jesuuri na sequereeri:
—Naacuaaquinatejaj. Naacuajitij, tama na pueyajaaritia maja na niqutionu. Pueyaso Secojojuatiaacuaraa cua Que tia.

Naaratej, maja cumaati Neyanu sequesaanu na niqutionura na cumaneeca. ²⁷Naajaa, pa niqutiore juhuari nojori sequesano, paa mariqui nojori juaatiriiri. Nocuaaji quia rioosee caminiajinia. Quiocua coteenu quia jatasano sapitiaaja rupaama niquire. Quiaari tii cumanee riuratanutaniya. Quiocua cuno cumanee niqutiosuhua nojori, quiria, quiarajuhuaaj.

Cante jiyaniijianaa cutarani
(Mr 9.33-37; Lc 9.46-48)

18 ¹Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijianaa, canaa quia sequereerotoj, puetunu quia pueyajinijiojuanaani, ¿cante jiyaniijianaa cutarani?

²Jesuuri naatujua piirii. Canaa tajinia na nuuatereeri.

³Na nuhuaji, Jesuuri canaa sequereeri:

—Nia niyajetare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujua, nojuajaari socua jiyaniijianaa quiniutianiya cutara narta Pueyaso muerasujinijio. ⁵Naajuhuaaj, cante naatujua maseja maninia na paniniucua janiyani, nojuajaari cua maseyajuhuaaj.

Paari cocuaatia miyani sesa pa miishacari
(Mr 9.42-48; Lc 17.1-2)

⁶Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriqiano pueyanora, nojuaja jaara juhuacarijia caminia queronijinia jartasaare puereetujua-jau saajia na riquiajiniji morotasano. ⁷iMijiria quiniaari jiyanhua cocuaatia miiquiaa sesa na miitishacari tamasa! Mijiria, pueyari pueyaracaanu sesa miitishaaquiaajuhuanajaj. iTaraatia quiniutianiya cutaraari noo pueyanora, cante sesa miitiri tamonuni!

⁸Nio miriqui cua niishitiojosano nia tojiri: nia juaashiquia, nia niohuaca jaara sesa miitiya nijaniya, nia rashiquiarenoj, tucuaaanu jatasocoriqiano. Naa nia miiri niaa mariqui mani quiquiojinia jatasaaereeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuaaanu. Niaari tii quiniutianiya shuquiriaatia pueyaracaanu. ⁹Naajuhuaaj, nia namijia jaara nia miitiri sesa, nia jiatere. Tucuaaanu nia jatarenoj. Jiyanhua socua maninia cutaraari niaara, jiyocuaaanu nia tiuquiniuria namijijiu, maja nia jatasaanura mani quiquiojinia, saniitiosocoriqiano puetunu nia namijiaatjanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanhua canaa miiniu panishano, cuno jaara sesa miijiaa jiyateriquia canaa.

Jesu pohuatasano miriqui borrego tashucuanojiniji
(Lc 15.3-7)

¹⁰Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniucuaaji tamonu muerasuniyojua, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura mueraso. Cuno na seyari pueyaracaanu cua Que Pueyaso jiquico shootiaquiaa. Naajuhuaaj, Pueyasocuaajaari na muerasuranocuaa niishiriojioquiaa. ¹¹Naaratej, janiyari mijiria niqiaarini tashucuaano pueya cua pajenura, nojori cua jaariutianura Sesaaca.

¹²¿Taa nia sequeyani pueyanaa? Tamonu pueyano jaara cien borregohua jitiare, niquiriyatujua jaara tashucua tapueyocuaajiniji, ¿majateeri na camaru na borregohua

cureeno tiujianu rupaquijia, tashucano na pajenura? Taaquiriirinj. ¹³Jaara na riuriatate, seetanujuanaa socua jiyanoehua cuno borrego tashucano shuquiritiaari tamasa na borregohuajinj. ¹⁴Naajuhua, jiyocuacaanu quijia nia Queeri maja na paniniu quenaaja niquiriyatujua nio muerasujinjinio tashucanura puetunurajanaa.

Taa pa jiyanoehua pa tarajanuni

(Lc 17.3)

¹⁵Quarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuaajaari. Niaari maninia rupuetoojuacara quiniutianihuacuahuaj. ¹⁶Nojuaja jaara tojiaquiri quiajaniya saniniuujia, nocua quia quiaare socua tamonu pueyano, caapiqui pueyata soj. Nojori niqiuara quia nacasure cuno sesa miinia. Naa jaara naa miiritij, naa quiniutianiyari taa tariucuaaanu Pueyaso Rupaajinia niishitiosaaquiaricuaajani: “Querajaa pueya jaara mariyata pohuatate na niqishano, na tojishanojuhuaj, cunoori maja sapojonu”. Naacuajitij, nojori saquiriojotasanoori seetanujuanaa quiniutianiya. ¹⁷Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niqiarajanaa quia pohuatate sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuara quiri juhua Pueyaso niishiyashijia niaara. Naacuajitij, majaari socua nia rupuenunoj.

¹⁸Seetanujuanaa nia sequeyanijia, cana nia jiyanoehuaquiri mijiriani, na tojiniu paniyaquishacari niajaniya, cunoori jiyanoehuaquishano quiniutianiya jiyocuacaanu cua Que Pueyasarajuhua. Naajuhua, cana nia jiyanoehuaquiri mijiria na tojishacari niajaniyani, cunoori jiyanoehua quiniutianiya jiyocuacaanu cua Que Pueyasarajuhua.

¹⁹Naajuhua, janiyari seetanujuanaa sequeya niajaniyani. Caapiqui niajaniyajinjinio jaara mariyata niishiriojore nia panishanoocua nia secojonura Pueyaso, cua Queeri nia tojiniutianiya. Nojuajaari jiyocuacaanuji naa maninia miiniutianiya niaara, taa nia secojosacari nia sequeerecuajanoj. ²⁰Querajaa niajaniyajinjinio jaara rerejore, cucua tiuujiaca nia quishacari, janiyari tii naata quiyajanihuaj. Naacuajitij, cua Queeri nia secojosano tojiniutianiya cutara.

²¹Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoehua? ¿Majateeri tariucuaaja, janiya jaara na jiyanoehua siete sesa na miishanojiniji janiyani?

²²Jesuuri Pedro riucaaree:

—Maja naatej Pedronaa. Maja quia tarinitianu na jiyanoehua. Pueyaracaanu sesa na miishacari quiajaniya, pueyaracaanu quia jiyanoehua quarta pueyano. Majaari quia serojonu sesa na miishano quiajaniya. Pueyaracaanu quia jiyanoehua saaja.

Jesu pohuatano jiyanoehua serujiniji

²³Naaratej, cua tojiri pueyanaa. Nia pohuatateera nia niishiniuria taa Pueyaso paniya jiyanoehuaquacu na muerasu nia quiniuriani. Tamonu jiya jiyaniijiaari nera poonijionaa pueya sequequiaari nojori cuara tari niqitiojora nojuaja na cumaneeca, nojori na niqitiojosanojiniji na casami.

²⁴Nojiaqueya nera poonijionaa pueya jaara tari nojori pasano casamijiniji niqitiojori quia cuara tama nojori cumaneecajinijiaaja, jiyacaritij, tamonuuri tiuquinishaarejuhuaj. Nojuajaari jiyanoehua queraatia casami masejoquiaari na jiyaniijiajiniji, queraatia millón* cumaneeca. ²⁵Nojuajaari maja na jiiitanu quiquiaari na cumaneeca, na jiyaniijia na niqitiohuara. Na jiyaniijiaari cunora na pueya sequeere: “Tamonu camarnu nia niqitio nio cua seru, necocuataja, cua cumaneecara, necohuajuhua, puetunu na casamijianaanio. Naacuajitij, na cuentaari* puequenutianiya”. ²⁶Cuno na seru tojishacari naa na

jiyaniijia sequesanotej, nocua jacamaquiaariiri. Na jiyaniijia sequeereeri: “iCua tarinitiare quenaaja cua jiyaniijianaa! iRupaquijiaara cua tarinitiarejaara! Janiyacuajaari quia cumaneeca niqitio nutianiya puetunujuanaani”. ²⁷Na jiyaniijiaari nocua taraajeree. iNa carterohua puetunujuanaari! Naa na jiyanoehua, nocua na taraajenucua.

²⁸Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanoehua serujiniji. Secaja cumaneecaari quiquiaari na cuenta. Naajaa, cuno jiyanoehua seruuri narta seru quiaare. Cumaatia na riquiajinia na miniriiri. Na sequeereeri: “iRitia cua niqitio cumaneeca, tarijia quia masesano janiyajiniji!” ²⁹Narta seruuri na riquiajinia mininia cariquimijia mojoquetaree. Na sequeereeri: “iCua tarinitiarecua-rajaa quenaaja! iJaniyacuaajaari quia cumaneeca quia niqitio nutianiyani!” ³⁰Majaari na sashiniu paniniu quiquiaari. Saaja na nujuatequiaari nujuatejojuajiniaari cuara na cumaneeca na niqitiojorejaatijia. ³¹Narta seya niqishacari naa cuno jiyanoehua seru miishanotej, nojoriiri jiyanoehua taraajequiaari. Nojoriiri jiyaniijia quiojoquiaari puetunu sesa narta seru miishanojuanaa nojori pohuatana. ³²Naaratej, jiyaniijiaari tamonu na seru jiyaroree cuno jiyanoehua seru riniucua. Na tiuquishacari, jiyaniijiaari na juarii. Na sequeereeri: “iQuiaqui jiyanoehua sesajuhuanaja! Quia sequesacari janiya, janiyari quia jiyanoehua cuara, maja quia naata niqitio nutianiya quishacari quia cumaneeca. ³³¿Majateeri quia naata quiri quia taraajenu quarta seruucua, taa cua taraajeree quio cuacuanaa?” ³⁴Jiyaniijiaari jiyanoehua juarii. Cunora, cuno sesa miijia seru jiyaroreeri nujuatejojuajinia na nujuatesaanura. Sequeerejaarihuaj cuara naquiya miishaaria tii, cuara puetunujuanaa na cumaneeca niqitiojorejaatijia, casami na pasanoiniji.

³⁵Nia Que Pueyasoari naa miiniutianiya niajaniyahua, niaa jaara seetanujuanaa jiyanoehuaquiri niarta Pueyaso muerasu.

Jesu niishitiosano maja pa niqiuocua pa cartenura

(Mr 10.1-12; Lc 16.18)

19 ¹Jesu jaara naa pohuatano puecaquiaaritij, canaa na pueyata quiaquiaari Galilea jiyajinijiiri. Canaari Judea jia shuriucua tiuquishii Jordán moo taquijiriani. ²Jiyanoehua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioore.

³Jiyacaritij, nojiaqueya Fariseocuaajinjinioori Jesuucua nijioquiaari sesa na pocuatenua Jesu juucua nocua nojori tonujunura. Naaratej, nojoriiri Jesu nequesotaree:

—¿Maninate pa cartenura pa niqiuocua, jaara pa juatiri?

⁴Jesuuri nojori riucaaree:

—¿Majate nia serojonu quiquiaacuaaja Pueyaso Rupaajinia?

Coteenujanaa Pueyaso shipinishacari pueyano, Pueyasoari shipiniquiaari caya, maajinio. ⁵Naaratej, nojori shipinianaari sequequiaari: “Caya cuara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojaari quiqui. Naacuajitij, majaari maninia Pueyaso rupuetootesano rupartanura.

⁷Nojoriiri Jesu sequeere:

—Jaara naa quiritij, ¿casaara supuetana Moisés rootaquiaari-cuaraarini caya cuara naajione niqitioora necocua, na cartenu panishacari?

⁸Jesuuri nojori riucaaree:

—Moisés cuajaari niishi quiaari niaari puera cumajiujaaca. Naaratej Moisésri nia tarinitiaquiaari nia niqiuocua nia cartenura. Coteenujanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹Cua tojitiare pueyanaa. Janiyari nia sequeya cutarani. Cante necocua

carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanoehua sesa miya Pueyaso niqiuara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niqiuocua numuetucujuani. Naajuhuj, cante cartesano maaji camiyani, naa sesa miyajaariuhuj.

¹⁰Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹Jesuuri canaa riucaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuaacuajani cumaaca niqutiosaaareeni na tojiniuria. ¹²Naajuhuj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuuja, jiatejosano nojori riyacajajau quishacari. Tamasacaari maja na caminiujuhuaj tama nojori paniaquishacarijaaja, saaja Pueyasora nojori poonijionu panishacari. Cante na naata naa miiniuni, cuara naa miiriatej.

Naatujooriicuaa Jesu secojosacari Pueyaso

(Mr 10.13-16; Lc 18.15-17)

¹³Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴Jesuuri saniniuuja canaa sequeree:

—iMaja nojori tenujunu! Nia tarinitiare naatujoori cuara cucua nijioora. Nia tojiri, canapuate seetanujanaa juhua nio naatujoorini, nojoriiri Pueyaso muerasu quiriqiano.

¹⁵Na nuhuaji, Jesuuri na juaashiquia niaquiaari naatujooriicua, nojoriicuaa na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanohua casamiriaca mashaja pocoojosacari Jesuta

(Mr 10.17-31; Lc 18.18-30)

¹⁶Tamonu mashajaari Jesuucua niqiuari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiya maninia cua quiniuria Pueyaso niqiuara, pueyaracaanu quijiaa cua quiniuriani?

¹⁷Jesuuri na riucaaree:

—¿Casaara quia sequeya janiya maninia pueyanotani? Saaja niquiriyatujaari maninia quijia cutara. Nojuacuajaari Pueyaso. Naajaa, quiaa jaara maninia quiniucua jiaataa Pueyaso pueyano quia quiniuria, quia tojiri tariucuaacuano Moisés Rootasano Pueyasojiniji.

¹⁸Jesu riucaaree:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niqiuocua quia numuetucunu. Maja quia nohuasenu. Maja quia saquiriojotanu tamonuucuaa quia sajononta. ¹⁹Quia que, quia nucua tojjia quia quiriqia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

²⁰Mashajaari Jesu sequeree:

—Janiyacuaajani puetunujuanaa nio tojjia quiquiaari cua naatujajinijini. ¿Casaa cua miiniutianiya socuani?

²¹Jesuuri na sequeree:

—Quiaa jaara seetanujanaa maninia quiniucua jiaataa Pueyaso niqiuara, quia quiaarohua quia tiajinia. Quia niqutiojore puetunu quia casamijianaa cumaneecara. Na nuhuaji, casamijiniucua quia niqutiojore nareja quia cumaneeca. Naacuajitij, quiaari queraatia casami jiiutianiya jiyocuaacuano. Na nuhuaji, quicua nimiohua cutara, cua tojjia quia quiniuria.

²²Na tojishacari naa Jesu sequesantej, mashajaari taraatia quiaarohua jiyanoehua casamiriaca na quiniucua.

²³Jiyacaritij, Jesuuri canaa sequeree:

—Seetanujanaa nia sequeyanijia, jiyanoehua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri. ²⁴Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. iSocua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵Canaa tojishacari naa Jesu sequesantej, canaari jiyanoehua jiuujatereeni. Canaari na nequesotareeni:

—¿Canteeri Pueyaso pueyanora jiyatesaanutianiya socuanitioj?

²⁶Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniuni. Nojuajaari cumaacaraca puetunu na panishanojuanaa na miiniuria.

²⁷Pedroori Jesu sequeree:

—¿Canaarijataj? Canaari puetunu canaa casamijianaa tiujiaquiaarini canaa rupenura quiajaniya. ¿Casaa canaa masenutianirinjia?

²⁸Jesuuri canaa riucaaree:

—Seetanujanaa nia sequeyanijia. Nio jiya maniniushitishacariuhua, janiyari cajiniutianiya jiyaniijia cajitijunia puetunu cua Quejinijia shanohua cua cumacatajanaa. Jiyacaritij cua pueyanaa, niaari mariyata cajitijiosaanutianiya doce jiyaniijia cajitijucujinia. Niaari pa supuetana Israel doce niqiuohuacujinio caneno pueya nequesoreenaa quiniutianiya. ²⁹Cua pueya tojiniuria janiya, noojiaqueya nojorijinijinooori na tia tiujanutianiya, tapueyocua, na rimiatuhua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojiniji socua jiyanoehua queraatia masenutianiya nojori tiujiasaninijini. Nojoriiri pueyaracaanu shuquiriaatia quijiaa quiniutianiyajuhuj, shaajeyashijia. ³⁰Saniniuuja, queraatia tojishano pueyari Pueyaso shocotasano quiniutianiya na tojtiaashijia nojori quiniucua. Naajuhuj, mijiria, queraatia pueyari juhua shocotasano pueya quia Pueyaso niishiyashijia pueyara. Cuno pojori jiyanihano najuhuaa quijiacani, nojoriiri Pueyaso shuquiritasano pueya quiniutianiya cutara.

Jesu pohuatasano cuhuariquiajinia poonitijiosano pueyajiniji

20 ¹Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijiosano pueyacuaani. Cuno cuhuariquia camaruuri quiaquiaari tariquicuajia pueya na pajenura na uva cuhuariquiajinia nojori poonijionura.

²Cuhuariquia camaruuri pueyata pocoojoquiaari taa cumaneeca na niqutionutianiya cuno juuca nojori poonitijiosanojinijini. Poonijionaa pueyari na sequeree: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajinia nojori poonijionura. ³Pananu tacasacari, cuhuariquia camaruuri tohuataquiaariuhua na tiajiniji.

Jiyacaritij, socua tamasaca pueya niqishiiri juhuajaniya quiyano tiaca jiuujajinia curotasano cajitijucujinia.

⁴Cuhuariquia camaruuri nojori sequeese: “Nia quiaarejuhuj, cua uva cuhuariquiajinia nia poonijionura. Janiyacua cumaneeca nia niqutiorohua nia poonijionu samini”.

⁵Naacuajitij, nojoriiri quiojoquiaari cuno cuhuariquiajinia poonijionurajuhuj. Na camaruuri socua tohuataquiaariuhua panacari. Socua tamasaca pueya niqishiiri juhuajaniya quiyano tiaca jiuujajinia curotasano cajitijucujinia. Nojori sequerejaariuhuj nera nojori poonijionura cuno juuca.

Pananu mueecosacari, socua pueya riurataquiaariiri. Nojori jiyaroree poonijionuucuaariuhuj. ⁶Tariucua pananu piriushacari, na camaruuri socua tohuataquiaariuhua. Socua

tamasaca pueya niquishiiri tiaca jiuujiajinia curotasano cajitiucuajinia najuhuana quiyano. Nojori sequereeri: “¿Casaara nia quiojiaquiyaree poonijionuucuaani? ¿Casaa nia miya niyani? Niaa mariqui poonijiore”. ⁷Nojoriiri na riucaaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruari nojori sequereeri: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niquitiorohuani”. ⁸Panaru tiuquishacari, cuhuariquia camaruari na casami cojuana sequereeri: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niquitiojore puetunu nojorijianaa taa cua sequereeri coteenujuanaa quiria poonijionaacuaani. Majaari rimiajata nojori niquitiojonu. Coteenu quia niquitiojore tariucua panaru piriushacari cua jiyaramiquishano. Naa quia niquitiojore puetunjuanaa. Quiocua naa tucutare niquitiojonu noo pojoriuhuaaj, canapute tariquicuajia coteereeri poonijionucuaajani”.

⁹Jiyacaritij, tariucua panaru piriushacari poonitijosano pueyari nihiomaa. Puetunu nojorijianaari cumaneeca niquitiosaree taa cuhuariquia camarua coteenujuanaa tariquicuajia poonijionaa pueya sequequiaaricuaajani. Majaari rimiajata nojori niquitiosaanu quiquiaari cumaneeca, nojori poonijionu sami. ¹⁰Na nuhuaji, coteenujuanaa poonijionaa pueyari sequesaaquaaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niquitiosaanutaniya rupaquijia poonitijosano pueyajiini. Nojoriiri saaja niquitiosaree taa cuhuariquia camarua sequereeri nojori cuno juucacuaajani. ¹¹Nojori masacari na cumaneeca, nojoriiri cuhuariquia camaruta juaaquioree. ¹²Na sequetereeri: “Cuno pueyari saaja rupaquijia poonijioree. Quiaari nojori niquitiojore taa quia niquitiojore canaacuaani. Canaari pananucari catereeri cutarani, pueyaracaanu canaa poonijosacari”. ¹³Cuhuariquia camaruari tamonu nojorijiniini sequereeri saaja: “Sanajanaa, maja sesa cua miiniu quiri quiajanaya. ¿Majateeri quia niishiniu, paa jaara tariquicuajia pocojoriquiaatej, janiyari juhuacarijia quia sequereeni janiyari naa cumaneeca quia niquitiojore puetunu? Quiaari cua riucaaree: ‘Maniacuaaja’. ¹⁴Naaratej, quia jiyatarohua quia cumaneeca quia tijinihua. Janiyacuaajani naa niquitiojore paniriquiaa tariucua panaru piriushacari cua poonitijosano pueyari, taa cua niquitiojore quiajanayacuaani. ¹⁵¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecaacua jiaatijara quiqui, capora cua quiniucua?”

¹⁶Na nuhuaji, Jesuuri naa sequequiaarijuhuaj, na pohuatasanojinijia na niishitiojonura:

—Naa quiniutianiyari taa cua sequeriquiaacuaajani: canapute nuhuajishanaani, nojoriiri coteetanaa quiniutianiya. Naajuhuaaj, cante coteetanaani, nojoriiri nuhuajishanaa quiniutianiya saniniuuja. Queraatia masusano pueyari quia. Saniniuuja, secajaari saquiriojosano quia nojorijiniini.

Jesu camishacarihua pohuatanu taa na mosaanutaniyani
(Mr 10.32-34; Lc 18.31-34)

¹⁷Tari Jesu quiasacari Jerusalén tiacajiniara, Jesuuri canaa na doce saquiriojosano pueya piiri tamocora nuu shuriuquicora, tamajaaja canaata na pocojonura. Canaa sequereeri:

¹⁸—Cua tojiri. Niacuaajaari niquiya paa tari Jerusalén tiacajiniara tacataani. Janiyari tii niquitiosaanutaniya pueyacuara secोजना jiyaniujanucuaani, Moisés Naajoneejini niishitiojanaano. Nojoriiri cucuara saquiriojotanutaniya nojori sapojonuta cua mosaanura. ¹⁹Nojoriiri cua niquitiojore taucua. Cuno pojoriiri cua rerequetenutaniya. Cua majacutunutaniyani. Na nuhuaji, niyacutesanojinia cua teetetunutaniyani tii cua cusonura. Jiuujanaraca juucajinia janiyari macujinijia samiitanutanihuani.

Santiago, Juan nucua sequesacari Jesu, maninia na miiniuria necohua
(Mr 10.35-45)

²⁰Jiyacaritij, Zebedeo niquiocuaari Jesuucua catecanoquiaari necohuata. Jesuucuaa mojuquetaseeri Jesu na sequenura nera na miiniuria na panishano. ²¹Jesuuri na sequereeri:

—¿Casaa quia paniyani?

Jesu riucaareeri:

—Quiaa jaara Jiyaniijiaa jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuara cajiiria quia miaquetajara, tamonu quia muenecara, quia naacuna nojori quiniuria, juhua jiyaniujanucuaajuhuaaj.

²²Jesuuri Santiago sequereeri, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucaaree:

—Taaquiriirini. Canaa naatacuaaquinatejaj.

²³Jesuuri nojori sequereeri:

—Seetanujanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiyani, cua muenecario, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiunuria, teyano pojoriicuaajia na jeenucuaquiaaricuaajani.

²⁴Canaa, narta saquiriojosano pueyari, canaari Juan juaariini, Santiagonio, canaa tojishacari nojori masesano juucua.

²⁵Jesuuri saniniuuja canaa sequereeri:

—Miji pueyanaa. Niya cua tojitiasee. Niacuaajaari niishiya, mijiria jiyaniujanucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na mitishacari puetunu na panishanojuanaa. ²⁶Niajanaya saniniuuja, majaari naa nia quiniu quiniutianiya. Naacuaajitij, cante tojishano pueyano quiniu pania nijaniyajiniini, cuno cuara quiria narta Pueyaso pueya cumaquinia. ²⁷Cante nia jiyaniijia quiniu paniyani, cuno cuara quiria juhua nia seru, maninia na miiniuria nijaniya, naatej, taa cua miiquiaa nijaniyacuaani. ²⁸Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutarajia pueya cua naacuna, tama janiyajaaja mosaanura pueya niti, queraatia pueyacuajia cua ritianura Sesaaca.

Jesu jeecasacari caapiqui cariyajuaru namijiaa
(Mr 10.46-52; Lc 18.35-43)

²⁹Jesuta canaa quiasacari Jericó tiacajinijia, jiyanohua queraatia pueyari Jesu nuhuajiriquiaa. ³⁰Jiyacaritij, caapiqui cariyajuaruuri nuu shuucuaajia cajitiriquiaa. Nojori niishishacari Jesuuri nojori tajiriquiaa, nojoriiri nacan coteequiaari:

—Jiyaniijianaa! ¡Canaacua quia taraajere! Quiaacuaajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹Pueyari nojori juarii nojori sanaajetanura juucua. Nojoriiri saaja jiyacatequee nacanura:

—Jiyaniijianaa, canaacua quia taraajere, Pueyaso Jiyarosano!

³²Jesuuri socua nujuasee. Nojori sequereeri:

—Miji! ¿Casaa nia pania cua miiniuria nijaniyarani?

³³Jesu riucaatureeri:

—Jiyaniijianaa, canaa namijiaa quia jeecare!

³⁴Jesuuri nojoriicua taraajere. Nojori namijiaa quiareeri. ¡Nojoriiri niquijiacara quiqui! Na nuhuaji, Jesuucua sacuaaree canaataari.

Jesu tiuquishacari Jerusalén tiacajinia
(Mr 11.1-11; Lc 19.28-40; Jn 12.12-19)

21 ¹Canaa quiojosacari, canaari socua tiuquijiose Betfagé tiacajiniani, Olivo nacuhua tuhananu shuriucua. Cuniqiji, majaari puera tucuaanu quiquiaari

Jerusalén tiacajiniara. Jiyacaritij, Jesuuri caapiqui canaa na pueyajiniinio sequequiaari:

²—Cuno tiacajinia nia quiaare, nooj pocuaji niquishiyatej. Niaari tii riuriantanutaniya niquiojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. ³Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutanihuacuaja”.

⁴Naa tohuateequiaariiri tariucuacaanu Pueyaso sequesano caminiujiunia sequesano, nojuaja jaara naa naajiotajiaari Jerusalén tiacajinia quiniaa pueyara:

⁵“Sión* tiacajinia quiniaa pueya nia sequere: ‘iNia niquiri! Nia Jiyaniijiaari burrojini niaacua niya. Maninia pueyanoori, juayashijia. Burro nijinia cajiyano, necojuacuano!’”.

⁶Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. ⁷Nocua jaatucutuquiaariuhua burroori, necojuataja. Na nuhuaji, Jesu cajijiaara, canaari canaa tucuaque toqueya niojoquiaari burro nijiniani, necoju nijiniano. Na nuhuaji, Jesuuri na nijinia cajirii. ⁸Jiyanohua queraatia pueyari tii quiriquiaa. Nojoriiri na tucuaque toqueya muejoquiaari nucuaco Jesuucuaaji. Tamasacaari jaamasucua piyotajiaari Jesuucuaaji niojotasocori-quiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹Jesu puetanaa, mariyata na nuhuaji nijionajuhua, nojoriiri naa coteeqiaari nacojonura: “iPueyanaa, nioori pocuaji Tacuna! iNojuacuajaari pa Jiyaniijia, pa supuetanaa jiyaniijia David niti! iCuaara quiiria shuquiriaatia pa Pueyaso jiyarosano! iJiyanohua maniniaari pa Pueyaso! iCuaara shuquiritasano quiiria!”

¹⁰Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

¹¹Jesuta tiuquijionaari nojori riuuaree:

—Nojuacuajaari Jesu, Pueyaso sequenu panishano caminiujiunia, Nazaret tiacajiniinio pueyano, Galilea jiyajiniinio.

Jesu jaacasacari seya niqutiojonaa Pueyaso Secojoju tiacariji
(Mr 11.15-19; Lc 19.45-48; Jn 2.13-22)

¹²Na nuhuaji, Jesuuri Pueyaso Secojoju tiacari matakajinia tiuquiquiaari. Tii pueya niquishiiri seya niqutiojiyano. Jesuuri puetunu nojorijianaa tohuatanijoree. Cumaneeca tacatojojuaca juhuacutucua caponeetareeri, tee pueya niqutiojoriquiaa taucuaa cumaneeca, Pueyaso Secojoju tiajinia niqutiojosocoriquiano cumaneecaracuajani. Mococoonu niqutiojonaa cajitucua caponeetareejaariuhua, tee mococoonu niqutiojosaariquiaacuajani Pueyasoocuaa catijiasocoriquiano. ¹³Jesuuri nojori sequere:

—Pueyaso sequesanojuajaari naa naajiotasaaquiaari tarija: “Cua quiquioori sesojosaanutaniya Pueyaso Secojoju tia”.

¹⁴Secojoju tiajinia na quishacarijia, cariojuarujuri pueya, mariyata shipiiniquijuniana pueyari nocua nijioquiaari. Jesuuri nojori naatanijoree. ¹⁵Pueyacuara secojonaa jiyaniijianucuaari Moisés Naajioneejini niishitiojonaata Jesu shootariquiaa cusosuhua naatanijiyano. Jiyacaritij, naatujooriiri Secojoju tiajinia na nacooriguaa Jesujini: “iPa supuetanaa jiyaniijia David niquiohuacuajinio supueno pueyano! iNojuajaari pa Jiyaniijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶Nojoriiri Jesu nequesotaree:

—¿Quiaate naatujoori tojiya casaa nojori sequeyani?

iNojoriiri jiyaniya quiaari Pueyaso Jiyarosano!

Jesuuri nojori riuuaree:

—iTaaquiririni! Na tojiyacujani. Maniniacuajaari nojori sequesano. ¿Majateeri nia serojonu quiquiaacuaja tariucuacaanu Pueyaso Rupaajinia na sequesantej:

“Quiaari naatujoori niishitirii conaajanio, seetanujanaa nojori maniniuhuaqueetanura quia Jiyarosano?”

¹⁷Naa nojori na sequenu nuhuajitij, Jesuuri nojori tiujiaquee. Jerusalén tiacajini quiaqueeri canaata Betania tiacajinia. Canaari tii maqueseeni.

Jesu sesacasacari higo naana, muetuhuo na quiniucua
(Mr 11.12-14, 20-26)

¹⁸Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. ¹⁹Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucua. Cunora, Jesuuri naana sequere:

—Majaari socua quia jajau sanishaanu quiniutianiya.

iNaanaari ritia sorequee! ²⁰Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹Jesuuri canaa riuuaree:

—Seetanujanaa nia sequeyanijia, niaa jaara Pueyasoocua tiuujiaa quiri niojia nia niquijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”. ²²Puetunujanaa nia masesano nia secojosacari Pueyaso, niaa jaara seetanujanaa nocua tiuuri, niaari nia masesano masenutaniya.

Judiocuaca jiyaniijianucua nequesoreesacari Jesu,
cante na jiyaronani
(Mr 11.27-33; Lc 20.1-8)

²³Jesuuri Pueyaso Secojoju tiajinia tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴Jesuuri nojori sequere saniniujia:

—Janiyari nia nequesotanutaniya saniniunijia. Niaa jaara cua riuuaree, janiyacua nia sequerohua saniniunijia cante cua jiyaroquiaari naa cua miiniuriani. ²⁵Naacuajitij, cua riuuature coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojorijiaarijia juayonuutano coteeqiaari jiyasohuaja. Tama sequetooreejaarijia:

—Paa jaara na riuuareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaarini?” ²⁶Saniniujia, paa jaara sequerene: “Nojuajaari nareja pueya jiyarosano quiquiaari”, ipuereeta quiniutianiyari pajaniyara! Paacuajaari niishiyani puetunu pueyajanaari sequequiaa Tiuquinijiona Juanna seetanujanaa Pueyaso sequesano caminiujiunia quiquiaari.

²⁷Naaratej canaa Judiocuaca jiyaniijianucuaari Jesu riuuaree:

—Maja canaa niishiniu canariquitijia na jiyaroquiaaritijia.

Jesuuri nojori sequere:

—Janiyajuhua, majaari cua sequenu quiniutianiya niajaniya cante cua Jiyaronani, naa cua miiniuriatej.

Jesu pohuatasano pueyano niquiohuajini

²⁸Jesuuri naa nojori sequerohuacuajia:

—iCua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijioosee uva cuhuariquiajinia quiarijia”.

²⁹Neyanuuri saaja na riuuaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰Na queeri naa na nuhuajishana sequerejuhuaj. Neyanuuri na

riucuaare: “Maniacuaja, cua quenea. Janiya quianutaniyani”. Na nuhuaji, majaari na quianu quiquiaari saaja. ³¹¿Taa nia sequeyani pueyanaa? ¿Teyano cuno caapiqui necohuajiniiniote na que tojjia quiquiaarini?

Nojoriiri Jesu riucuaare:

—Na jiyapueranucuaaja.

Naaratej, Jesuuri nojori sequeere:

—Seetanujanaa nia sequeyanijia. Cumaneeca masejona pa pueyajini Roma tiacajinia quijia jiyaniijiarani, mariyata paanaturinino, cuno nia soosano pueyari nia shocotananiya Pueyaso muerasura nojori quiniuria. ³²Cua tojitiare casaara naa cua sequeere niajaniani. Tiuquinijona Juanri niquiaari na niishitiojonura juucua niajaniani, maninia nia quiniuria Pueyaso niquiaari. Majaari nia tiuuniu quiqianu nocua. Niaari saaja na tojiyaquiquianu. Cumaneeca masejona nia soosano pueya cutaraari nocua tiuquianu, paanaturinino. Nojoriiri na tojtijajara quiqianu. Niaacuajaari na niquiquianu taa cuno sesa miijia pueya maninia pueyara jatacanuni. iNiajanijari-jataj, majaari nia tacatonu quiqianu nioojia sesa nia quiniujini! Niaari saaja Tiuquinijona Juancua tiuyashijia quiqianu.

Jesu niishitiojosano cuhuariquia cojuanaa sesa miijiacajiniji
(Mr 12.1-12; Lc 20.9-19)

³³Socua tamonu cua pahuatasano nia tojiri. Tamonu pueyanoori cuhuariquiajinia uva natooquiaari. Maninia matacoquiaari puetunu na shuriuquicojuanaari maja casaa tiuquitanura nocua. Saajia quejaquiaariiaariuhuj uva rapijiojuara, na caaca reratesaanura. Jiyaconajara tiaquiaariiaariuhuj, cojuana niquijiaari tiji nohuasejojuacuajia. Na nuhuaji, na camaruuri tamasa pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaracaanu camueenujunura. ³⁴Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacu. Nojori jiyaramiquiquiaariiri nojori masenura cuhuariquia cojuanaa carojotasanojiniji, taa nojori pocoojoquiaari taricujani. ³⁵Cuhuariquia cojuanaari cuhuariquia camarujuanaa jiyaramiquishano seya quioore. Niquiriyatu majacutereeri. Tamonu moturee cutaraari. Tamonu jacutere saitiaari. ³⁶Na nuhuaji, na camaruuri socua queraatia seya jiyaramiquiquiaariuhuj. Nojoriiri naquiya miishaaquiaari-jiuhuj.

³⁷Na nuhuaji, na camarujuanaari tama sequeerejaaja: “Jiyaroreera cua niyanu. Maja cutara nojori rerequetenu quiniutianiya cua niyanu”. ³⁸Cuhuariquia cojuanaa jaara niquiquiaari camarujuanaa niyanu nojoriicua niyano, nojoriiri tama sequetooreejaaja: “iCunocuaquiquia cuhuariquia camaru quiriqiano na que niti, na que jaara shaajequee! iPa morej! Naacuajitij, pocua nio cuhuariquia camaruhuara quiqini”. ³⁹Naaratej, camarujuanaa niyanu tiuquishacari, cuhuariquia cojuanaari na quiaare. Na jaatucutereeri cuhuariquiajiniji tamama. iCuniqui na motureeri!

⁴⁰Naa Jesu pahuatanu nuhuajitij, nojuajaari cuno canaa Judiocuaca camaruca nequesotaree:

—¿Taa nia sequeyani pueyanaa? Cuhuariquia camaru jaara tiuquirohua na cuhuariquiajinia, ¿taa na miiniutianiya cuno cuhuariquia cojuanaari?

⁴¹Jesu tojtianaari na riucuaare:

—iCuno cuhuariquia camaruuri nojori pueconutaniya, nojoriicua na taraajeyaquiniutia! Na nuhuaji, tamasa pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasanojiniji.

⁴²Jesuuri nojori sequeere:

—Jaa, naa miiniutianiya. ¿Majate nia serojonu quiquiaaricuaaja nio, tariucuaaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujajau naasucua. Cuno saajiacuaajaari socua panishano saajia quiquiaari. Jiyaniijajanaari naa na jiyatequiaari. Cuno saajata tiaree maninia cutaraari. Pueya niquishacari, jiuujiateco-reeri”.

Naa naajiotasano quiyacuajaari.

⁴³Camarucuaanaa, nocuaji nia numooteyanijia, Pueyasoori nia ruoretanutaniya maja tari nia quiniuria na muerasu jitianaa. Tamasa pueyari nia niti jiyatesanutaniya cutara, nojori jitianura maninia Pueyaso muerasurano. Nojoriiri maninia Pueyaso tojtianaa quiniutianiya cutara, Pueyaso muerasu canenura jiyanohua nera, juhua cuhuariquiajiniji senoosano queraatia. ⁴⁴Cuno saajiajiniji saniniuujia, pueyano jaara cuno saajiaacua tiyare, nojuajaari juhua rashiquiiniutianiya. Cuno saajia jaara tiyare pueyanocua, jacanaura na miiniutianiya.

⁴⁵Pueyacuara secojona jiyaniujanucua, mariyata Fariseocua tojtiasacari naa Jesu pahuatasano tequi, nojoriiri niishiqui Jesuuri nojoriiniiji pahuatariquiaa miriqui. ⁴⁶Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujanaa Pueyaso sequenu panishano caminiujunia quiquiaari. Naaratej, jiyaniujanucuaari jiyamitia puereriquiaa Jesu nojori quianura.

Jesu pahuatasano miriqui camishacari queranacunujiniji
(Lc 14.15-24)

22 ¹Na nuhuaji, Jesuuri socua niishitiojoquiaari miriqui pahuatanota. Naa pahuataquiaariti:

²—Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacuaani. Cuno jiyaniijiaari shuquiriaatia quini paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴Jiyaniijiaari socua tamasa na seya sequeere: “Cua masuusano pueya nia numootejocoo. Nia sequeere: ‘Jiyaniijia nia sashiya. Puetunujanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitij, jiyaniijiaari nojori jiyaramiquiriiri. ⁵Masuusano pueyari saaja tojtiaaquiriiri. Puetunujanaari tama na panishanojuaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitiojosaqui quiaareecujia. ⁶Tamasacaari saniniuujia jiyaniijia seya quiooree. Jiyanohua naquiya nojori miiriiri. Na nuhuaji, nojori puecootureeri. ⁷Jiyaniijia niishishacari, jiyanohua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhuj. ⁸Na nuhuaji, jiyaniijiaari na seya sequeere: “Puetunujanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruoretareeni. Namitia majaari nojori nijionu quimaa, saaja cua rerequetajaca nojori quiniucua. ⁹Quiaritia cutara, nia quiaare nuu tunequetajajinia, tee queraatia pueya tajiniuucuaataquiaacuajani. Nia masuure puetunu nia niquishano pueyajanaa”.

¹⁰Na seyari quiojoquiaari tiaca nucua. Nojoriiri puetunu na riuratasano pueyajanaa rerejotere, maninia pueya, sesa pueyano. Queranacunuusaquiri mishiquiaari masuusano pueyata. Camaru seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

¹¹Na nuhuaji, jiyaniijajanaari tiuquiquiaari masuusano pueya na quiniuria. Tamonu pueyano niquishiiri camishacari

cushiyosano toqueeju. ¹²Jiyaniijiaari na sequeree: “Pueyanonaa, ¿taa quia tiuquimiaa camishacari cushishano toqueejuni?” Pueyanoori sanaa na tojiriquiaa. Majaari na riuucuanu quirii. ¹³Cunora, jiyaniijiaari na seya sequeree: “iNia morojore na cashacucua, na numatucuanio! iNiocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

¹⁴Naajuhuaaj pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojosaanutaniya nojorijiniinio seetanujuanaa na muerasura nojori quiniuria.

Jiya jiyaniijia cuara niqutiojosaaria na sequesano cumaneeca
(Mr 12.13-17; Lc 20.20-26)

¹⁵Na nuhuaji, Fariseocuacaari quiojoquiaari Jesu shuriucujaji tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶Na nuhuaji, Fariseocuacaari na niishitiojosano pueya jiyaramiquiri Jesuucua, jiyaniijia Herodes panijiaa pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiaru quia pohuatanura quia niishishano. Majaari rimiajata quia niquiniu pueya. ¹⁷Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijiajanaa Césarra, taa cuno tahue César sequequiaaricujani. Quiajaniryariuhuaaj, ¿taa quia sequeya saniniunijia?

¹⁸Jesuuri ritia niishiqui, nojoriiri naa na nequesotariquiaa na sapojonuta. Nocuaji nojori sequesee:

—Sapuenu maninia quijiacanaa, ¿casaara nia saniniujia naa janiyani? ¹⁹Cua niqutiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqutirii cumanee. ²⁰Jesu niquishacari cuno cumanee, nojori nequesotareeri:

—¿Cana naaquitii nio nocuani? ¿Cana sesate nocua naajiotasanojanuhuaaj?

²¹Nojoriiri na riuucaree:

—Jiyaniijia César naaquicuaaja, na sesajuhuaaj.

Jesuuri nojori sequesee:

—Jaara naa quiriritij, César nia niqutiojore tama na casaajaaja. Nojuacuajaari na camaru. Saniniuujia, Pueyaso nia niqutiojore nerano tama na casaajaaja. Nojuaja cutaraari pa camaruu.

²²Nojori tojishacari naa Jesu sequesantej, jiuujiatecoreeri. Na tarinitiatuereeri. Quiojijaruahuari.

¿Macunucuate samiitiaconutaniuhua?
(Mr 12.18-27; Lc 20.27-40)

²³Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴—Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuara camiiria mashiquio, mueya na mueratenura tarajanu niti. ²⁵Tarijia, tamonu pueyanoori niya quiquiaari. Siete niqiohuaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuoju. Naaratej, na mashiquioori camitishaaquiaari neyaca tarajanuta.

²⁶Nojuajaari muetuhuoju shaajequiaariijuhuaaj. Naaratej, neyaca tarajanuuri mashiquio camiquiaariijuhuaaj. Nojuajaari mueyaju cusoquiaariijuhuaaj. Naa cusonuquiaariiri puetunu

cuno siete canuujuaanaa. ²⁷Na nuhuaji, mashiquioori cusoquiaariijuhuaaj. ²⁸Saniniuujia, macunucua jaara samiitiacorohua, ¿teyano cuno siete neyacaajiniiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁹Jesuuri nojori riuucaree:

—iNiaari jiyanohua jiyajeneya nia niishiyacuishacari Pueyaso Rupaajinia naajiotasano, Pueyaso cumaacanio! ³⁰Macunucua samiitiacosacariuhua, majaari canu camiyonu quiniutianiya maaji. Naajuhuaaj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaa quiniutianiya juhua jiyocuaaanu quijiaa Pueyaso seya, maja camiyosano. ³¹Socua cua tojitiare. Macunucuaari seetanujuanaa samiitiacoriquianohua. ¿Majateeri nia serojonu quiquiaacuaja taa Pueyaso sequequiaari niajanuyacuajani? Naa sequequiaariiri:

³²“Janiyari nia supuetana Abraham Jiyaniijiani, nia supuetana Isaac Jiyaniijiajuhuaj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapueete seetanujuanaa Pueyaso muerasuni, nojori cutaraari pueyaracaanu quijiaa.

³³Pueya tojishacari naa Jesu niishitiojosantej, nojoriiri jiyanohua jiuujiateere.

Puetunu Pueyaso rootasanojinijianaani,
teyanote socua na pueya tojishocoriquianoni
(Mr 12.28-34)

³⁴Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniujiniuria nojuaja, nojori nequesoreenuta. ³⁵Nojoriiri jaarajaaja Jesu pocuatenu paniriquiaa sesa juucua. Tamonu nojorijiniinioori Moisés Rootasanojiniji niishitiojona quiquiaari. Na saniniujiniuria, nojuajaari Jesu nequesotaree:

³⁶—Niishitiojonanaa, ¿Pueyaso rootasanojinijini, teyanote socua pa tojishocoriquianoni?

³⁷Jesuuri na riuucaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiatanaa, puetunu quia sohuanutajanaa, puetunu quia niishitijatajanaanio”.

³⁸Niocuajaari socua na pueya tojishocoriquiano Pueyaso rootasano. ³⁹Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰Puetunu Moisés rootasanojuanaa, mariyata puetunu tariucuaaanu Pueyaso sequesano caminiujiniiaa rootasanojuanaari nio caapiqui rootasanojinijicuaaja.

¿Cante Cristo supuetanani?
(Mr 12.35-37; Lc 20.41-44)

⁴¹Fariseocuaca quishacarijia cuniqui, Jesuuri nojori nequesotaree:

⁴²—¿Taa nia niishirojia Cristojiniini? ¿Cante na supuetanani?

Nojoriiri Jesu riuucaree:

—Pa jiyaniijiarano Cristoni, nojuajaari pa supuetana David niqiohuacuajinio supuenutaniya.

⁴³Jesuuri nojori sequerohuacuahuaj:

—Taaquiririnij. Jaara naa quiriritij, ¿niaateeri niishiyacuaja casara David sequequiaari “cua Jiyaniijata” Cristocuaarini, Pueyaso Sohuanu jaara na pocuatequiaari? Naa sequequiaariiri:

⁴⁴“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuara quia paraa shocojotare quioacuajijiatijia’”.

⁴⁵¿Cristotucua taa David niqiohuacuaji supuereni, David jaara Cristo jiyaniquiaa na jiyaniijata?

⁴⁶Nojoriiri Jesu niqutiaree sanaa. Nojoriiri maja na naata na riuuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

**Jesu juaashacari Fariseocuaca,
Moisés Rootasano niishitijonaanio**
(Mr 12.38-40; Lc 11.37-54; 20.45-47)

23 ¹Na nuhuaji, Jesuuri tii quiniaa pueya sequeree, canaa na saquiriojosano pueyano:

²—Moisés Rootasanojiniji niishitijonaana, mariyata Fariseocuacaari supuetana Moisés niti quiya, tariucuaaanu Pueyaso Rupaa nojori niishitijonura. ³Naaratej, nia tojitiare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitijosanojuaja. ⁴Nojoriiri tama nojori niishishanojuaja rootaquiaa, maja saaja tariucuaaanu Pueyaso niishitijosano pa supuetanaa. Nojori rootasano pueya miishocoriquianoni, cunoori juhua jiyanohua niiquia casaa pueya nitiasocoriquiano. Nojoriiri maja quenaaja na naacutanu quiquiaa na juaashiquia sacasaruta. ⁵Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua pueereetucara na quiquiora cusupuequiaa pueya shootiasocoriquiano. Naajuhuaaj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojtijajaca miiquiaaricuaani. Saniniuujia, nojoriiri puera tucuaajuara na tunujutaquiaa saaja pueya niquishocoriquiano, pueya shootianura nojori. ⁶Nojori jaara masusaare tamonu tiajinia queranacunura, nojoriiri secocquiaa socua panishano cajitijujia nojori cajitiumiuria tia camaru shuriucua. Naajuhuaaj, Pueyaso secocjuaa tiajinia pueya rerejosacari, nojoriiri cajitiumiuria paniquiaa camarucua cajitijujia pueya shootianura nojori. ⁷Nojori rucuanesacari tiajinia, nojoriiri paniquiaa pueya saruhatanura nojori. Panitijujiaaariuhua pueya jiyaniquiniuria nojori “niishitijonaata”.

⁸Nijaniya saniniuujia cua pueyanaa, majaari pueya shanacunu niaacua, nojori jiyaniquiniuria nijaniya “niishitijonaata”. Nijaniya cutaraari niquriyatujua Niishitijonara. Puetunu nijaniyajanaari niarta Pueyaso pueya tapueyocua. ⁹Naajuhuaaj, majaari tamonu pueyano mijiria nia jiyaniquiniuria “cua queta”. Niacuaajari niquriyatua Queraca. Nojuajaari jiyocuaaanu Quinia. ¹⁰Naajuhuaaj, majaari pueya nia shanacunu niaacua, nojori jiyaniquiniuria nijaniya “cua jiyaniijata”. Niaari niquriyatujua Jiyaniijaracuaaja. Nojuacuajaari Pueyaso jiyarosano nia Jiyaniijaranoni. ¹¹Cante jiyaniijajanaa cutara nijaniyajinijini, cuno cuara jiyateera tama na cuaqueyajaaja nia cumaquinia na quiniuria. ¹²Cante tama na cuaqueyajaaja jiyateja pueya shocotaja na quiniuriani, narta pueya jiyaramiijijia na quiniurijuhuaaj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijara jiyatesaanutaniya cutara.

¹³“Cua tojitiare, Moisés Rootasanojiniji niishitijonaanaa, nijaniya Fariseocuacajuhuaaj, niaari cocuaatia miiquiaa! iNiaari sapuenu juhua maninia quijiaa niquishano! Niaari pueya tarinitiaaquiuaa nojori rupuenura Pueyaso. Niaari maja nia tiuuniu Pueyasocua. Naajuhuaaj, majaari pueya nia tarinitianu nojori tiuuniuria Pueyasocua, na muerasura nojori quiniuria.

¹⁴iNiaari taraatia miishaanutaniya, Moisés Rootasanojiniji niishitijonaanaa, nijaniya Fariseocuacajuhuaaj! Niaari sapuenu juhua maninia miijiaa niquishano. Niaari mashiquiopue tiaca masequiaa secaja nia cumaneecata, nia

sapojonuta nojori. Naacuajitij, niaari nojori tiaca masequiaa tama nijaniyarajaaja. Naa nia miiniu nuhuajitij, niaari shitiarayocua secocjuaa najuhuana Pueyaso, pueya niqiuara, maninia pueya nia jiyaniishaanura. Naaratej, niaari socua jiyanohua saniitosaanutaniya tamasa pueyajiniji.

¹⁵iNiaari puereeta miishaanutaniya Moisés Rootasanojiniji niishitijonaanaa, nijaniyajuhuaaj Fariseocuacanaa! Niaari sapuenu juhua maninia miijiaa niquishano. Niaari tucuaaanu rucuanajoquiaa jiya caco, shoniacu caminia taquijiriano, tamonu nia niishitijonura najuhuana Pueyaso tojijara na quiniuria juucua, juhua tama nijaniyajaaja. Nia niishitijosano pueyano jaara nia tojijara quiri, nojuajaari socua jiyanohua saniitosocoriquiano quiya nijaniyajiniji, sesa nia rootasano tojijia na quiniucua.

¹⁶iNiaari taraatia miishaanutaniya mosanucuaanaa! Nijaniyari juhua cariojuaru, cante tamonu pueyano jaatucuya juucua, nuu nia niishiyacuashacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: “Taa oro Pueyaso Secocjuaa tiajinia pueyaracaanu quiyacuani, naajuhuaaj, cua sequesano quijaniyari seetanujanaa tohuatenutaniya quiara”. Saniniuujia, niaari sequequiaa, Pueyaso Secocjuaa tiajinia oro jaara sequeyacuashaare, majaari na sequesanoocua tiushaanu. Naacuajitij, niaari sequequiaa, pueyano sequesanoori nareja sequesano, nojuaja jaara sequere: “Taa Pueyaso Secocjuaa tia pueyaracaanu quiyacuani, naajuhuaaj, cua sequesano quijaniyari seetanujanaa tohuatenutaniya quiara”. Niaari sequequiaa cuno sequesanoocuaari maja tiushaanu. ¹⁷iMosanucuaanaa, niaari juhua cariojuaru! ¿Teyanote socua pueresanoni, cuno orotee, Pueyaso Secocjuaa tia soj? Cuno oroori naa pueresanora jiyatesaquiiaari saaja Pueyaso Secocjuaa tiajinia na quiniucua. ¹⁸Niaari rootaquiaajuhuaaj, pa sequesacari parta pueyano, casaa pa miiniutianiya nerani, pocua na tiuuniuria paa cuara sequeera naatej: “Seetanujanaa quia sequeyanijia. Naatej, taa casaa Pueyasocuaa catijijaja juhuacutuucua niasano jiyanohua maninia quiyacuua Pueyasorani, naajuhuaaj, cua sequesanoori saaja maninijuhuaaj. Majaari cua sapojonu”. Naacuajitij, niaari sequequiaa, paa jaara naa sequereni, paa cuara miiria pa sequesano. Saniniuujia, niaari sequequiaa: “Pa sequesanoori najuhuana sequesano, paa jaara saaja Pueyasocuaa catijijaja juhuacutu sequereni. Majaari nocua tiushaanu”. ¹⁹iCariojuarururinia! ¿Majateeri nia niishiniu? ¿Teyanote socua maniniani, Pueyasocuaa catijiasocoriquiano casaatee, Pueyasocuaa catijijaja juhuacutu soj? Catijiasocoriquiano casaari narejajuhuanajaj, jaara Pueyasocuaa catijijaja niasoo quiyacuiri. ²⁰Naaratej, cante Pueyasocuaa catijijaja sequeree seetanujanaa, nojuajaari maja saaja Pueyasocuaa catijijaja na sequenu quirii. Nojuaja cutaraari na caco niasano sequereehuaaj. ²¹Naajuhuaaj, cante Pueyaso Secocjuaa tia sequeree najuhanani, cunoori maja saaja Pueyaso Secocjuaa tia na sequenu quirii. Nojuajaari Pueyaso sequereecuaja, Pueyaso Secocjuaa tia na sequesacari. iPueyasocuaajari na Secocjuaa tiajinia quijia! ²²Naajuhuaaj, pueyano jaara sequere na sequesano seetanujanaa juhua jiya cajiniocua, nocua tiushaanura, cunoori maja saaja jiya cajiniocua na sequenu quirii. iPueyaso cajishaqui sequereeariuhuaaj, Pueyasocuaa sequereeariuhuaaj, jiyocuaaanu casaa na sequesacari!

²³iNiaari taraatia miishaanutaniya, Moisés Rootasanojiniji niishitijonaanaa, nijaniyajuhuaaj Fariseocuacanaa! Niaari sapuenu juhua maninia miijiaa niquishano. Niaari Pueyaso niqutiojoquiaa maninia puetunu nio nia nataujinijijanaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijanaa, Pueyasora nia niqutiosocoriquiano taa supuetana Moisés sequequiaaricuaajani. iNiaari saniniuujia socua pa tojishocoriquiano Moisés rootasano

tojitiaaquiuaa! iNaacujitij, majaari maninia pueyano nia quiniu taa Moisés rootaquiuaricujani! iMajaari nia taraajenu quiquiaa niarta pueyanoocua! iMajaari nia tiuuniu Pueyasooocua! Niaari maninia niqutiojoquiaa nia nataacuacajini. Taa nia niqutiojoquiaa nia nataacuacajinijicuaani, inaa nia tojitiarejuhua socua pa tojishocoriquiiano rootasano Moisés Naajiotasanojiniji! ²⁴Pueya nia niishitiojosacari Moisés Rootasanojiniji juucua, niaari juhua cariojuaru cante narta cariojuaru jaatucuya juucua. Niaari juhua tamonu pueyanohuhuj. Na ratuacari, nujujua taquiriri na mashacajini-jiiri. Socua na ratuacariuhua, isaaja cuartia miataaree juhujaniyari!

²⁵iNiaari cocuaatia miiquiaa, Moisés Rootasanojiniji niishitiojonaanaa, niajanijajuhuj Fariseocuaanaa! Niaari sapuenu juhua maninia miijiaca niquishano. Niaari juhua noo pueyajuhuj, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuujia jiyanojua curuutuua quiyaja. Nio miriqui cua sequesano nia niishiri. Nioojiaari naa quiyajuhuj. Niaari nohuasenujuaca, jamuejaciono. ²⁶iCariojuaru Fariseocuaanaa, nia ratujua jiniacuma nia jeequere coteenu, nia miacojua jiniacumano! Naacujitij, na cuaqueyari maninia jeequesano quiniutianiyajuhuj.

²⁷iNiaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuaanaa! Puetunu niajanijajanaari sapuenu juhua maninia miijiaca niquishano, juhua macunucua quiquo shanohua niquishano, cohuajata noshijosano. Saniniuujia na jiniacuma quiyari sacuaatia jaanujua pueya nucuhua mocuaca. ²⁸Niaari naajuhuj. Niaari sapuenu juhua maninia pueya niquishano. Saniniuujia nioojiaari jiyanojua sesa, jiyanojua sapojonu niishijia.

²⁹iNiaari taraatia miishaanutaniya, Moisés Rootasanojiniji niishitiojonaanaa, niajanijajuhuj Fariseocuaanaa! Niaari sapuenu juhua maninia miijiaca niquishano. Niaari macunucua niojotajara shanohua niquishano shipinijioquiaa, tariucuaaanu pueyara Pueyaso sequesano caminiujunaa nucuhuaaj. Naajuhuj, niaari tariucuaaanu Pueyaso tojitiacua puecoosano quiquo maniniushitijia. ³⁰Naa nia miishacarijij, niaari juhua sequequiaaruhua: “Paa jaara shipinijiosaaquiari pa supuetanaa quishacarijia tariucuaaanuni, paa maara nojori cojiaquiquiaari cutarani, nojori puecoosacari Pueyaso sequesano caminiujunaa”. ³¹Saniniuujia, naa nia sequesacarijij, niaari tama niaacuara toreejacujua. Naaquiiri cuno tariucuaaanu Pueyaso sequesano caminiujunaa puecoonaacujinino supuenocua. ³²Naa Pueyaso sequesano caminiujunaa puecoonaacujinino supueno nia quishacarijij, Pueyaso Jiyarosano nia morejuhuj, nia tucuatunura nia supuetanaa coteesano.

³³iSesa miijiaca pueyanaa, niaari noonacuraca, juhua sacocua! ¿Niaateeri jiyaniya niaari saniitioyakuishaanutaniya mani quiqiojinia nia supuetanaa? ³⁴iCua tojitiare! Janiyari Pueyaso rupaa caminiujunaa jiyaramiquiniutianiya niaacuani, Pueyaso Rupaa niishijiacajuhuj, Pueyaso rupaa niishitiojonaano. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijianaa, naquiya nia miiniuria nojori. ³⁵Niaacuajaari niishiya, coteenujanaa mosaaquiariiri Abel, maninia miijia pueyano. Naa puecoosaaquiariiri queraatia Pueyaso tojitiacua pueya. Na nuhuaji, socua jaatesaaquiari monuuri Zacarias, Berequias niyanu. Cuno maninia pueyanoori mosaaquiari Pueyaso Secojojua tiacajinia, Pueyasooocua catijiasaqui shuriucua. Monu porocua nia quiniucua taa nia supuetanaa quiqiaaricuaani, niaari saniniuujia nocua namishaanutaniyacujua puetunu tariucuaaanu Pueyaso tojitiacua puecoosanuucujanaa.

³⁶Seetanujanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosanuucujanaa.

Jesu nujuquesacari Jerusalén tiacajinia quinia pueyacua
(Lc 13.34-35)

³⁷iJerusalén tiacajinia quinia pueyanaa, jiyanojua taraajeya niaacuani! Niaari Pueyaso sequesano caminiujunaa pueya puecoojua. Niaari Pueyaso jiyaramiquishano pueya jacujua saitia nojori pohuatanuucua Pueyaso rupaa nia niqiuara juucua. Janiyari cucua nia nijionura panijia juucua nia taraatia nia miyaquishaanuucujia cua tacunura niaacuajia, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura niajanija. ³⁸Cua tojitiare. iNiaari nia quiqiojiniji sanaajasaanutaniya niqiuji! ³⁹Seetanujanaa nia sequeyanijia, majaari socua nia quiniu quiniutianiya janiya, niaa cuaara cua tiuquishacariuhua sequejaatijia: “Pueyaso cuaara shuquiriri na jiyaniijia quiriquiiano na jiyarosano.”

Jesu pohuatasacari, Pueyaso Secojojua tia niyartasaanutaniya
(Mr 13.1-2; Lc 21.5-6)

24 ¹Jesuuri Pueyaso Secojojua tiacajinia tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiariini. Canaari Jesu niqitiriqiaa Pueyaso Secojojua tiani, shanohua niquishano tia. ²Jesuuri saa canaa riucaareejaa:

—Jaa, na niqiyacuajani. Naa cumaati maninia na niqiyacuajua. iSeetanujanaa nia sequeyanijia, cuno tia niaa na niqiyani, cunoori niyartasaanutaniya puetunujuanaa! iMajaari quenaaja tamonu saaja manu quiniutianiya tamonu caco!

Taa pa niishiniutianiyani quera jiya puequesacari
(Mr 13.3-23; Lc 21.7-24; 17.22-24)

³Na nuhuaji, canaari Olivo cuhuariquia tuhananuucua quiojoquiariini. Jesu cajishacari tii, canaa na saquiriojosano pueyani, canaari nocua catecanoquiariini. Tama canaa quishacarijiaaja, canaari na nequesotareeni:

—Canaa quia sequere ¿taacari Pueyaso Secojojua tia niyartasaanutaniyani? Naajuhuj, ¿taa canaa niishiniutianiyari ni taacari quia tacatenutanihua mijiriani? Canaa quia sequerejuhuj, ¿taacari jiya puequenutaniyani?

⁴Jesuuri canaa riucaaree:

—Tama nia cuaqueyajaaja nia cojuare tamasaca mariqui nia sapojoreeri. ⁵Queraatia sapojonuucuaari supenutaniya. Nojoriiri tama na cuaqueyajaaja sequenutaniya: “Janiyacuaja Cristoni, Pueyaso Jiyarosano”. Naa nojori sequesacarijij, queraatia pueya sapojonutaniyani. ⁶Naajuhuj, niaari pueyapue miaquetojonujiniji tojinuuniutianiya, niya, tamonu jiyacajiniano. Niaari miaquetojonura miananajotoonujiniji tojinuuniutianiyajuhuj. Naa jaara naa tojinuuri, majaari puerenu. Naa quiniutianiyari mijiria. Naajaa, juhuanajuajaari maja jiya puequesacari quiniutianiya. ⁷Tamonu pueyari tamasaca pueyata miaquetojonutaniya. Tamonu jiyajiniji jiyaniijiaari tamonu jiyaniijiaa miaquetojonutaniyajuhuj. Jiyacarijij, jiyanojua miaajenuuri quiniutianiya queraatia jiyacajinia, cusonuujuhuj. Rijiaari queraatia jiyacajinia jiuquiujiutianutaniya. ⁸Naa naquiya miishacari mijiriatej, cunoori juhua manjaraca coteesacari noonu. Na nuhuaji, socua jiyacatenutaniyani naquiya miishacari, mijiria cua tiuquiyakuishacarijia.

⁹Jiyacarijij, niaari jiya camarucua niqutiojosaanutaniya cua muerasu nia quiniucua, naquiya nojori miitianura niajanija. Niaari puecoosanuutaniya. Puetunu jiyacajinijinio pueyanaa nia niqiniu paniyaquiniutianiya, cua muerasu nia quiniucua. ¹⁰Jiyacarijij, queraatia cucua tiuunaa pueyari cucua tiuuniu

tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niqiniu paniniu quiniutianiya tarijia narta Pueyaso muerasu.

¹¹Queraatia sapojonuujuaca Pueyaso rupaa pohuatanaari supenutaniya. Nojoriiri queraatia pueya sapojonutaniya.

¹²Jiyacaritij, sesa miiniuuri socua jiyanojua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³Saniniuujia, cucua tiuuja jaara rejeretare pueyaracaanu cun naquiya miishacari jiya cuaara puequerejaatijia, nojuaja cutaraari shacantuuca quiijara jatanishaanutaniya, pueyaracaanu na rishiniuria. ¹⁴Pueyaso rupaa jaara pohuataasaare janiyajiniji pueyapue niquiara puetunu jiyacajinijanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵Pueyaso sequesano caminiujunia Danielri* tariucuaaanu pohuataquiaari sacuraatia casaanaari supenutaniya, puereeta niqishano. Cunoori Pueyaso pueya shaajariquiano. (Cante nio serojiani, cuaara niishiiria casaa na sequeyani.) Niaa jaara cunna sacuraatia casaa niquiri Pueyaso Secojojua tijajinia nujuatesano, niocua mashiri. ¹⁶Jiyacaritij, canapute Judea jiyajinia quiyani, nojori cuaara mashiiria tuhuananuhua. ¹⁷Canapute na tia cacojiria quiyani, nojori cuaara tiuquiyaquiri na tijajiniaaco maja na tarishiniuria na casamiicua. ¹⁸Canapute cuhuariquiajia nia quiyani, cuaara tacateyaquihuara na tijajiniohua na toqueyacu. ¹⁹Jiyacaritij, jiyanojua taraatia quiniutianiari maajipohuara, canapute manajaatohua quiyani, mariyata canapute supuejaca muerasu jitiiaani. ²⁰Juhuacarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucano. ²¹Cuno quishacari, jiyanojua naquiya miiniuuri quiniutianiya seetanujanaa. Jiya coteenujiniji, jiyano naquiya miiniuuri maja na niqishaanu quiquiaari tari. Naajuhua, naa naquiya pueya miini nuhuajitij, majaari socua na caminiu quiniutianihua juhua nio naquiya miiniu. ²²Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacu na taraajesacari.

²³Jiyacaritij, majaari nia tojinu, tamonu jaara sequere niajaniya: “iCua tarajanunaa, Cristoqui tari tiuquiriohua! Niya quiyano”. Naajuhua, majaari nia tojinu tamonu jaara nia sequere: “Nooj, jati quiyatej”. ²⁴Queraatia sapojonuujuacaari supenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujua: “Janiyari Pueyaso sequenu panishano caminiujuniani”. Nojoriiri pueya sapojonutaniya jiyajeneta nojori miishanota. Naa nojori miishacari, mijiria quiniaa pueyari jiyaniutianiya nojoriqui seetanujanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaariuhua. ²⁵Pueyanaa, naa cua sequesacari niajaniatej, janiyacujaaari juhuacarijia nia numootereeni. ²⁶Naaratej, majaari nia quianu cua pajenuuca, pueya jaara sequere niajaniya: “Cristo jati cariquia jiyajinia quiya”. Naajuhua, majaari pueya nia tojinu nojori jaara sequere niajaniya: “Miji, Cristo sohuacamara cajiya. Nia niqishijia”. Majaari nia shanacunu naa nia sapojosaanuratej. ²⁷Mijiria cua tiuquishacariuhua, majaari jiyasohua cua tiuquini quiniutianihua. Naatej, taa pueya niqiquiaa miacana nunujiano pananu muetasamajicuaani, pananu tiuquishocorano, pueyari naa cua niqiniutianiya cua tiuquishacariuhua. ²⁸Tee casaa mocua quiyani, mohuari tii rerequejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

Taa na quiniutianiya Cristo tiuquishacariuhua
(Mr 13.24-37; Lc 21.25-33; 17.26-30, 34-36)

²⁹Jesuuri naa canaa pohuataquiaari socuatej:
—Ritia naquiya miishaanu nuhuajijia, pananuuri nishiquiria quiniutianiya. Racaari maja na cuhuatanu

quiniutianiya. Riyari totenutaniya. Jiya cajiniocua cumaaca jitiajacaari tetecatunutaniya. ³⁰Jiyacaritij, puereeta casaari jiya cajiniocua niqishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanojua nojori taraajenuta. Na nuhuaji, cua niqitiuniutianiya cohuaja najacajinia roseyano, jiyanojua cua cumaacata, jiyanojua shacantuuca. ³¹Janiyari jiyocuaaanuji cua seyata tiuquiniutianihua, cua jiyaramiquiniuria nojori puetunu cua saquiriojosano pueyacuajanaa. Nojori tojtiasacari trompeta jonenenu jiyanojua, nojoriiri cua saquiriojosano pueya rerejotenutaniya cucua, puetunu nio jiyajinjijianaa.

³²Nia pohuatareera higo naanajiniji, socua maninia nia niishiniuria taacari jiya puequenutaniya. Higo naana cashacucua jaara macumaaca quiri, na jaamasucuaari mueratiyua. Naa nia niqishacari, niaari niishiya tacarejenuqui quera quiniutianiya. ³³Naajuhua, niaa jaara puetunu cua sequesanojanaa niquiri tari tohuateyano, niocua niishiri janiyari quera tiuquihuani. Tari jiya puequesacari quera. ³⁴Seetanujanaa nia sequeyanijia, nio pa quishacari pueyari, majaari nojori shaajenu quiniutianiya juhuanajuaja, nojori cuaara puetunujanaa cua pohuatasano niquirijiaatijia. ³⁵Jiya, jiya cajiniocuanio, cunoori shaajenutaniya. Cua sequesano cutaraari tohuatenutaniyacujua. Cua rupaari pueyaracaanu seetanu rupajanaa quiniutianiya.

³⁶Maja cutaraari quenaaja tamonu pueyano niishini taacari jiya puequenutaniya, mariyata taacari cua niutiutianihua. Jiyocuaaanu quiniaa Pueyaso seyari maja na niishiniujuhua. Majaari quenaaja cua niishiniujuhua. Saaja cua Queeri tamajaaja na niishiya cutara.

³⁷Quera cua tiuquini panishacariuhua, mijiria pueyari juhujaniya quiniutianiya taa Noé quishacari mijiria tariucuaaanu pueya quiquiaaricuaani. ³⁸Jiyacaritij, nio jiya pajaashitiaaquishacarijia, supuetanaari juhujaniya miaquenuuja quiquiaari. Juhujaniya queranacunuuriquiaa-jariuhua. Juhujaniya necohua camiyoteriquiaariuhua Noé jaara tiuquitiaquiarijiaatijia na puereetuca buquejiniacuma. ³⁹Nojoriiri saaja juhujaniya quiriqiaa pajaa jaara nojori pajaashitiaquiarijiaatijia. Puetunu pueyajanaari canashiyaquiji netasaquiaari. Mariyata naa quiniutianiya cua tiuquishacariuhua. ⁴⁰Jiyacaritij, caapiqui pueya quishacari cuhuariquiajia, niquiriyatuuri rishaanutaniya, Pueyaso pueyano na quiniucua. Tamonuuri jateenutaniya saniitiosocoriano saniniuujia. ⁴¹Naajuhua, caapiqui maajipohua riiquiniushacari tunanajiacuma, niquiriyatuuri rishaanutaniya. Tamonuuri jateenutaniya. ⁴²Nocujia juhua sutejaca nia quiriqia. Majaari nia niishini taacari nia Jiyaniijia tiuquiniutianihua. ⁴³Nio nia niishiri. Tia camaru jaara niishiriqia taacari nohuasejojua niutiutianiya nocuani, nojuaja maara nocujia sutere maja nohuasejojua tiuquiniuria na casami nohuasenura. ⁴⁴Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pohuatasano maninia serujiniji, sesoriquia serujinijio
(Lc 12.41-48)

⁴⁵Socua cua pohuatasano nia tojtiate pueyanaa. Jiyanojua casamiriaca pueyanoori queraatia seyaraca quiquiaari. Cuno jiyaniijiaari tucuaaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinjijio jiyatequiaari juhua na tia camarura, narta seya na mianuutenu maninia, puetunu juucajanaa. Cuno seruuri niishijia quiquiaari, na camaru tojijiajuhuaj. ⁴⁶Cuno seruuri shuquiriaatia quiniutianiya na camaru jaara na riuratasuhua maninia poonijiano taa na camaru sequequiaari na nuhuajiriacuajani. ⁴⁷Naaratej, seetanujanaa nia sequeyanijia, na camaruuri na jiyatenutaniya puetunu na jitiisanोजनाa cojuanara. ⁴⁸Saniniuujia, cuno seru jaara sesa mijia quiri,

nojuajaari tama sequenutaniyajaacujua: “Cua jiyaniijiaari jiyanhua tarishiniutianiya”.⁴⁹ Jaara naa niishiriojore, nojuajaari narta seya piquiniu coteenutaniya. Mashaasequenujuaca cojiniutianiyajaariuhua queranacunuunura.⁵⁰ Naa juhuajaniya na quishacaritij, na jiyaniijiaari jiyacari na jiyajenetenutaniya.⁵¹ Naa sesa na quiniuucatej, na jiyaniijiaari jiyanhua na saniitionutaniya. Na nuhuaji, na jatanutaniyari na cojiritiasocoriquiano saniitionu sapuenu juhua maninia niquishano miijiaa pueyata. Nojoriiri tii nujuquetunutaniya. Na quiaa miaquenuunutaniyari, naquiya na miquiosacari.

Jesu pahuatasano diez niyacoorejorinjini

25¹Nia pahuatareera taa Pueyaso shuriucua tiuquitianu panijiaa quiniutianiya cua tiuquishacariuhuanu. Nojoriiri juhua diez niyacojori quiniutianiya, canapueete camiriquiano pueyano sashiriqiaacuajani. Cuno niyacoorejori quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari.² Cinco cuno niyacoorejorinjiniiri mosanucua quiquiaari. Tamasacaari saniniuujia niishijiaa quiquiaari cutara.³ Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari.⁴ Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano.⁵ Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee.⁶ Shiyaqueya, tamonu pueyanoori nacaquiaari: “iCamiriquiano pueyano cumaji tari! iNia naacusee!”⁷ Puetunu cuno niyacoorejorijianaari ritia saneecuatuquiaari. Quera pueetacoyano na samaritiu nishiriiniuriiri. Nocuaji niishijiaa niyacoorejoriiri socua na pootusano samari noshitirii.⁸ Jiyacaritij, mosanucua niyacoorejoriiri narta niyacojori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”.⁹ Cuno cinco niishijiaa niyacoorejoriiri nojori riucuaare: “Maja. Maja maninia canaa niqutionura niajanija, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”.¹⁰ Cuno mosanucua niyacojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuiriaca niyacojori cutaraari camiriquiano pueyanota tiuquitiaquiaari camishaqui tiaco queranacunura. Tia tiootiuri mishiqliosaaree.¹¹ Na nuhuaji, mosanucua niyacojoriiri tiuquijioquiaariuhua. Tia tohuateyaji jiiquioonuusuhuari. Sequereeri: “iJiyaniijianaa, jiyaniijianaa, canaacuaji quia riatareja tiootiu!”¹² Jiyaniijiaari saa sequereejaa: “Seetanujuanaa nia sequeyanijia, maja cua niishiniu niajanija”.

¹³Naa na pahuatanu nuhuajitij, Jesuuri canaa na saquiriojosaano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniutianiuhanu, casaa juucatej.

Miriqui Jesu pahuatasano cumaneeca poonitijonaajiniji

(Lc 19.11-27)

¹⁴Na nuhuaji, Jesuuri socua miriqui pahuataquiaari canaa na niishitiojonura taa Pueyaso muerasu miishaanutaniya jiya puequesacari. Jesuuri naa canaa pahuataquiaaritij:

—Tamonu jiyaniijiaari tucuaaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijiasocoriquiano.¹⁵ Naacuajitij, coteenu seru niqutiooree cinco mil cumaneecaari. Tamonuuri niqutioaaree dos mil. Tamonuuri niqutioaaree mil* cumaneeca. Na jiyaniijiaari naa nojori niqutiojoquiaari na niishishacari nojoriiri rimiajata niishijiaa quiquiaari, socua cuno cumaneeca nojori canijianura. Na nuhuaji, nojori jiyaniijiaari quiaquiaari.¹⁶ Cinco mil cumaneeca jiiatanaari ritia coteequiaari casami

masenura na niqutiojosocoriquiano socua cumaneecara, na reratenura na jiyaniijiaari. Naacuajitij, cuno seruuri socua cinco mil cumaneeca reratequiaari coteenu na jiiatanojiniji.

¹⁷Naajuhaaj, dos mil cumaneeca jiiatanaari socua dos mil cumaneeca reratequiaari na jiiatanojiniji.¹⁸ Mil cumaneeca masenaari saniniuujia maja na poonitijionu quiquiaari na jiyaniijia niqutioosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca.¹⁹ Seya jiyaniijiaari camueenujuquiaari jiyanhua. Socua tiuquiquiaariuhuari na cumaneeca na masejonuhua na seyajiniji.²⁰ Coteenu nocua tiuquiquiaariiri cante cinco mil cumaneeca niqutioosaaquiaaricujani. Nojuajaari na jiyaniijia sequeree: “Jiyaniijianaa, quiaari cua niqutioocanu cinco mil cumaneeca. Niya quiyari socua cinco mil cumaneeca quiaari, cua poonijiosanojiniji cua reratesano”.²¹ Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua.

Quiaacuajaqui maninia miiquianu secaja cua niqutioosano quiajanija. Janiyari quia jiyatenutaniya queraatia jiiatanaari. Miji quia tiuquimia. Niya cuata quia quishii shuquiriaatia”.²² Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niqutioosaaquiaaricujani. Na jiyaniijia sequereeri: “Jiyaniijianaa, quiaari cua niqutioocanu dos mil cumaneeca. Niya quiyari socua dos mil cumaneeca quiaari, cua reratesano cua poonijiosanojiniji”.²³ Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutioosano quiajanija. Janiyari quia jiyatenutaniya queraatia jiiatanaari. Miji quia tiuquimia. Shuquiriaatia niya quia quishii cuata”.²⁴ Na nuhuaji, tamonu seruuri tiuquishiijuhuaj cante mil cumaneeca niqutioosaaquiaaricujani. Na jiyaniijia sequereeri: “Jiyaniijianaa, janiyari niishiyani quiaacuajaari quarta pueyacuara taraajeyashijia. Quiaari tamasaca natoosanojiniji senojuja. Quiaari tamasaca poonijiosanojiniji mijajuhuaaj.²⁵ Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”.²⁶ Na jiyaniijiaari na juaari: “iQuiaaqui sesoriquia pueyano! iTaajeca seque! ¿Quiaateeri niishiquianu janiyari tamasaca natoosanojiniji senojujani, tamasaca poonijiosanojiniji mijajuhuaaj? ²⁷Quiaa jaara cua jiyaniquianu naa quijiatej, ¿casaara cua cumaneeca quia niqutioyaaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”.²⁸ Jiyacaritij, jiyaniijiaari tamasaca na seya sequeree: “Nio sesa cua serujiniji nia jaariuutiare cua mil cumaneeca. Nia niqutioore cutara cua maninia seru, cante diez mil jiiitaa tariucujani.²⁹ Naacuajitij, cante casaa jiiitacuani, nojuajaari socua niqutioosaanutaniya, queraatia jiiitaja na quiniuria. Saniniuujia, cante secaja jiiitaa najuhuanani, nojuajaari secaja na jiiitasano jaariutiasaanutaniya puetunujuanaa.³⁰ Nio najuhuaana quijia seru saniniuujia, nia jatara carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

Jiya puequesacari, puetunu pueyapuejanaari nequesoreesaanutaniya saniitiosocoriquiano

³¹Puetunu cua seyajanaari jiyocuaaanu quia cojiniutianiya janiya jaara tiuquirohuanu Pueyaso shacantuca cumaacata, Jiyaniijianaa cua quiniuria mijiria. Janiyari shanhua puereta jiyaniijia cajitijinia cajiniutianiyanu, pueya cua nequesoreesacari.³² Puetunu pueyapuejanaari cucua rerejotesaanutaniya puetunu nio jiyajinijiniojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuaca tajinijicuaani.³³ Janiyari maninia pueya

nujuatejonutaniya cua miaquetajarani. Saniniuujia, janiyari sesoriquia pueya nujatejonutaniya cua muenecarani. ³⁴Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. ³⁵Cunoori niajaneyara, maninia miijia nia quiniuucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanesacari, niaari nia tiaco cua tiuquiniija. ³⁶Toqueeju cua quishacari, niaari cua niqutioquiaari. Cusosu cua quishacari, niaari cua niqiniuucua quiaja. Nujatejojuajinia cua quishacari taraatia, niaari cucua quiojojuua cua cumanjianuucua”. ³⁷Na nuhuaji, maninia pueyari cua nequesotanutaniya: “Jiyaniijianaa, štaacari canaa niqiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niqiquiaari quiajaniya jiyamueyanoni? ¿Canaateeri quia raatequiaarini? ³⁸¿Taacari canaa niqiquiaari quiajaniya canaa jiyajinia rucuaneyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhua, taacari canaa niqiquiaari quiajaniya toqueejuni? ¿Canaateeri quia niqutioquiaari toqueni? Maja. ³⁹¿Taacari canaa niqiquiaari quiajaniya cusosuni, nujuatejojuajinianio? ¿Canaateeri quiocua quiojojuiaari canaa niqiniuria quiajaniyani? Maja”.

⁴⁰Janiyari cuno maninia pueya rucuanutaniyani: “Seetanujuanaa nia sequeyanijia. Naa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijuhuaj”.

⁴¹Na nuhuaji, janiyari cua muenecara nujuatiuyano sequenutaniyani: “iCua shuriucua niqiquiaari nia quiaare, sesoriquia pueyanaa! iNiaari cua Que sesacasano! Niaari mani quiquiojia quejoosaanutaniya. Cuno mani quiquioori maquesaashijia. Shipinishaquiiaari samaruhua jiyaniijiaacuaaji, na seya samaruhuacuajinio. ⁴²Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³Cua rucuanesacari nia jiyajinia, majaari nia tiajinia nia tiuquiniyu quijia janiya. Toqueeju cua quishacarijuhuaj, majaari toque nia niqutionu quijia janiya. Nujatejojuajinia cua quishacari, cusosu cua quishacarijuhuaj, majaari nia quianu quijia cua niqiniuucua quenaaja”.

⁴⁴Jiyacaritij, cuno pueyari cua nequesotanutaniya: “Jiyaniijianaa, štaacari canaa niqiquiaari quiajaniya miaajeyanoni, jiyamueyanujuhuaj? Majaari canaa niqiniyu quijia quiajaniya canaa jiyajinia rucuaneyanoni tiaaju, toqueeju quiyano, cusosu quiyano, nujuatejojuajinia quiyanojuhuaj. Cua jaara naa quiyano quia niqiquiaarini, canaa maara quiocua taraajequiaarini”. ⁴⁵Janiyari nojori rucuanutaniyani: “Seetanujuanaa nia sequeyanijia, nia taraajeyaquiniuucua tamonu cua muerasuniyojuacuua, niaari seetanujuanaa cucua taraajeyaquiquiaari”. ⁴⁶Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shuriucua quianutaniya, pueyaracaanu shuquiritiasano nojori quiniuria.

Judiocuaca camarucua roojotoosacari Jesu nojori quianura
(Mr 14.1-2; Lc 22.1-2; Jn 11.45-53)

26 ¹Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

²—Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niqutiosaanutaniyani, mosocoriquiano niyacutesanojinia teetesano.

³Jiyacaritij, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijianaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca

camarucuanio. ⁴Nojoriiri cuno tiajinia pocojoquiaari taa nojori sapojonutaniya Jesu na quiatusocoriquianoni, nojori mosocoriquiano. ⁵Nojoriiri tama sequetooquiaarijaaja: “Maja pa monu Pascua queranacusacari, paa mariqui pueya juaatiriiri”.

Tamonu maaji totasacari na shanohua jaanutaja Jesuucua
(Mr 14.3-9; Jn 12.1-8)

⁶Tamonu juuca, Jesuta canaa quishacari Betania tiacajinia, canaari Simón tiajinia miaquenuuquianaani. Cuno Simónri tarijia lepra cusonujiniji Jesu naatanishano quiquiaari. ⁷Miaquejajinia Jesu cajishacari, tamonu maajiiri nocua catecanoquiaari. Shiitianiyojuua shucuariquiaja pataconiyojua cacatariquiaari, cohuaja saajajiniji quejasano. Tii quiriquiaari shanohua jaanutaja. Cuno jaanutajaari jiyanohua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸Canaa jaara niqiquiaari naa cuno maaji miishanotej, canaari juaaquioreeni. Noojiaqueya canaajinijiniori naa sequeturee:

—¿Casaara cuno maaji niitiaree najuhua shanohua jaanutajani? ⁹iCuno jaanutaja maara queraatia cumaneecara niqutiosaa, casamijuniuucua niqutiosocoriquiano!

¹⁰Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? iNa miishano janiyani, cunoori jiyanohua maninia quiria! ¹¹Casamijuniuucuaari niaata quiriqiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. ¹²Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. ¹³Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuatasaanutaniyajuha puetunu jiyacajiniajanaa. Naa na miishano janiyani, majaari na niyajetasaanu quiniutianiya pueyaracaanu.

Judas tacartasacari Jesu, na quiatenura
(Mr 14.10-11; Lc 22.3-6)

¹⁴Jiyacaritij, Judasri pueyacuara secojonaa jiyaniijianucuaa-cua quiaquiaari. Nojuajaari niquiriyatu canaajinijinio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵Secojonaa jiyaniijianucua sequeeri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqutioquiaari Judas. ¹⁶Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

Jesu miaquesacari na nuhuajiria na pueyata
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷Puetunu marijarajanaa, canaa Judiocuacani, canaari poreetesoo pan* miaquenuuquiaari puetunu siete juucajanaani. Coteenu juucaari sesojosaquiaari Pascua* juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocua borregoni, pa miaquesocoriquiano quiarijia Pascuarani?

¹⁸Jesuuri canaa rucuaaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’”.

¹⁹Canaari naa miiquiaarini taa Jesu sequequiaari canaacuaajani. Canaari tii majeetequiaari borregoni, Pascua juuca miaquesocoriquiano.

²⁰Jaara niniquiaari, Jesuuri canaa na doce pueyata miaquejajinia cajitiuriquiaa. ²¹Canaa miaquenuusacari, Jesuuri canaa sequeree:

—Seetanujuanaa nia sequeyanijia, tamonu nijaniyajinijini-
noori cua tacartanutaniya, cua paraa na quietenura janiya,
nojori monura janiya.

²²Canaari jiyanoohua taraajequeeni naa Jesu sequesacaritij.
Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³Jesuuri canaa riucaaree:

—Cante cuata tureneetaa pa miacojuajinijini, nojuacuajaari
cua quietenutaniya mosocoriquiano. ²⁴Janiyacujaari
mosaanutaniyani taa janiyajinijini naajiotasaaquiaricujani
tariucuaaanu Pueyaso Rupaajinia. Saniniuujia, jiyanoohua
taraatia miishaanutaniyari cua quiateriquiano pueyano. Maara
socua maninia quiquiaari cuno pueyanora jaara
raaquishaaquiaari.

²⁵Na quiateriquiano Judasri socua Jesu nequesotareejuhuaj:

—¿Janiya jiyoteeri Niishitiojonanaa?

Judas riucaareeri:

—Taaquiriirinj. Quiajaniyacuaaquiniatejaj.

²⁶Canaa miaquesacari, Jesuuri pan ririi. Na Que Pueyaso
secojoree nocuaraari.

Na nuhuaji, na neecasereeri puetunu canaarajanaa, canaa
miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷Na nuhuaji, Jesuuri raatonuque pataree. Pueyaso na
secojonu nuhuaji nocuara, Jesuuri canaa na niqutioree. Canaa
sequereeri:

—Niojinijia nia rature puetunu nijaniyajanaa. ²⁸Nioori cua
nanaca, Pueyaso jiyanooniuria nijaniya. Cua nanacaari
queraatia pueyacuara shoonutaniya, nojori jiyanooshaanura
sesa nojori miishanojinijia. ²⁹Seetanujuanaa, majaari socua cua
ratunu quiniutianiya niaata mijiria nio uva caacajinijia. Janiyari
niaata na ratunutaniya cutarani janiya jaara tacatemohuani,
pueyaracaanu Jiyaniijijianaa cua quiniuria. Jiyacaritij,
jiyanoohua maninia quiniutianiya cuno quishacari. Paari
mariyata jiyanoohua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya

(Mr 14.26-31; Lc 22.31-34; Jn 13.36-38)

³⁰Canaa jaara jaaquequejoquiaari supuetana David
naajioneejinijini, na nuhuaji canaari quiojoquiaarinio Olivo
cuahariquia tuhananuucua. ³¹Jesuuri jiyacari canaa sequeree:

—Puetunu nijaniyajanaari cucua tiuuniu tarinitianutaniya
quiari niucujaja. Naa naajiotasano quiyacuajaari Pueyaso
sequesano tarijia: “Janiyari borrego cojuana monutaniyani. Na
borregohuari niaquejonutaniya tamajaaja”. ³²Naajaa, janiya
jaara samiitiarohua macujinijini, janiyari nia puetanutaniya
Galilea jiyajiniani.

³³Pedroori Jesu sequeree:

—Puetunu quia pueyajanaa jaara quiocua tiuuniu tarinitiare,
janiya cutaraari maja cua catenu quiniutianiya quiocujaji.

³⁴Jesuuri Pedro sequeree saaja:

—Seetanujuanaa nio niucujani, caacaraja niunijiyacuquishaca-
rijia, quiaari naa pacutejonutaniya seetanu cucujaji: “Maja cua
niishiniu cuno pueyano”.

³⁵Pedroori Jesu sequeree:

—iPueya cuara moora janiyaqui, naajaa, majaari cua
seetanu quiniutianiya quiocujaji!

Puetunu canaa Jesu pueyajanaari mariyata naa sequequiaari-
tij, taa Pedro sequeriquiaacuani.

Jesu secojosacari Getsemani cuhuariquiajania

(Mr 14.32-42; Lc 22.39-46)

³⁶Na nuhuaji, Jesuuri tamonu cuhuariquiajania
tiuquijioquiaari canaa na saquiriojosano pueyata. Cuno

cuahuariquia sesaari quiquiaari Getsemani. Jesuuri canaa
sequeree:

—Niyaja nia cajitiuri cua secojosacari cua Que jati socua nia
tacoji.

³⁷Jesuuri Pedro jiyataquiaari, caapiqui Zebedeo
niquiohuanio. Jesuuri juhuacatecara taraajequiaari. Jiyanoohua
tacaariquiaaariuhuj. ³⁸Jiyacaritij, Jesuuri nojori sequeree:

—iCoojia quera jiaqueya jiyanoohua cua taraajenuta! iQuera
cusoyanijia! Niyaja cua sashitiuri. Nia sutere nia tarajanura
janiya quenaaja.

³⁹Jesuuri nojori shuriucujaji canujiyaree tamajaaja socua
nojori tacoji. Jiyocuara jacamaseeri Pueyaso na secojonura.
Naa sequereeri:

—iCua Quenaa, jaara na naata quiri, maja quenaaja cua
cartenu naquiya cua miishaanura! Naajaa, janiya cuara
miishaariaqui taa quia paniyacuajani, maja juhua cua
panishano.

⁴⁰Na nuhuaji, Jesuuri na pueya niquishuhua. Nojoriiri saaja
maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja
rupaquijia? ⁴¹Nia sutere Pueyaso nia secojonura, niaa mariqui
sesa miiriiri niaa jaara saniniujiushaare. Seetanujuanaa,
poojiaari maninia miiniu panijia. Pa cuaqueyari saniniuujia
sasaca quiyacuaja. Naacuajitij, majaari pa naata maninia
miiniu Pueyaso cumaquiyaquishacari pajaniya.

⁴²Jesuuri socua tacatequiaariuhua tamajaaja Pueyaso
secojonuhua. Naa sequereeri:

—Cua Quenaa, janiya jaara naquiya miishaareni, janiya
cuara miishaariaqui taa quia paniyacuajani.

⁴³Jesuuri na pueyacuata tacateyarohuacuahuaj. Maquetiuyano
nojori riuriatasuhuariuhuj. Nojori namijiaari saaja
seecutariquiaa jiyanoohua nojori maquenu paniniutia.

⁴⁴Jesuuri nojori tarinitiaquiaari socua. Quiaquiaariuhuari na
Que secojonuhua. Secojonu pacutequiaariiri taa na
secojoriquiaa coteenucuajani. ⁴⁵Na nuhuaji, na pueyacuata
nimiohuariuhuj. Nojori sequesuhuari:

—Quiarjia cutara nia maquetiuyare. Nia paniyatere cutara
maquetunu. iJuaj! iNia tojiri! iJaniyari tari quiatesaanutaniya
sesa miijiaa pueyani! Nojoriiri cua miiniutianiya taa na
panitiyacuajani. ⁴⁶iNia saneeature! Pa quiaare. Cumaji tari
cua quiateriquiano.

Moronucua na paraa jaatucutasacari Jesu

(Mr 14.43-50; Lc 22.47-53; Jn 18.2-11)

⁴⁷Jesu pocuasacarijia, Judasri jiyacari tiuquishii. Nio
Judascujaari niquiriyatu canaajinijinio Jesu doce saquiriojosa-
no pueyajinijia quiquiaari. iQueraatia pueyari Judasta
nijioquiaari! Nojoriiri secojonaa jiyaniijianucua jiyaramiquisha-
no pueya quiquiaari, canaa Judiocuaca camarucua
jiyaramiquishano pueyajuhuj. Nojoriiri nijiniaquetucujaja
mueruu pooriquiaa, macacanio. ⁴⁸Judasri tari niishitioquiaari
Jesu quiateriquiano pueya taa nojori niishiniutianiyani
teyanote Jesuni. Nojuajaquiiri tari nojori sequequiaari: “Teyano
pueyano cua nujiya pa tiuquishacarinio, cunocujajaari nojuaja.
Niocua na quiasee ritia”. ⁴⁹Naacuajitij, Judas tiuquishacari
Jesuucua, na sequeereeri:

—Quiocua tiuquianijia Niishitiojonanaa.

Jiyacarijia na nujuureeri. ⁵⁰Jesuuri na sequeree:

—Cua rupenanaa, ¿casaacua quia niyareerini?

Jiyacaritij, Judasta nijionaa pueyari Jesu quietusee.

⁵¹Jiyacaritij, tamonu canaajinijinio pueyanoori ritia shitiaree
na nijiniaquetucujaja mueruu na shuucujaji. Nata jaatere
secojonaa jiyaniijia seru numocoori. ⁵²Jesuuri na sequeree:

—iNa co jiniacuma quia shiriohua quia mueruu! ¿Majate
quia niishiniu, cante mueruuta miaqueja pueyanoni, mueruuta
mosaanutaniyajaariuhuj? ⁵³¿Quiaate niishiyacuquiyajuhuj,
janiya jaara cua Que sequereni cucua na jiyaramiquiniuria na

seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajiniinio?

⁵⁴Naajuhuj, janiya jaara naa cua Que sequere na cojuatenura janiyani, ¿tariucuaaanu Pueyaso Rupaajinia janiyajini naajiotasanotucua taa tohuateereni?

⁵⁵Jiyacaritij, Jesuuri na paraa sequere:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niqijia puetunu juucajanaa Pueyaso Secojoua tiajinia cajiyano, pueya cua niishitiojosacari. ¿Casaara tii nia quiaaquiquianu janiyani? ⁵⁶Naajaa, naacuajitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaaquiaari janiyajiniicujani.

Jiyacaritij, canaa, na saquirojosano pueyani, canaari Jesu tiujiaquiaari niquiriyatuni. Puetunu canaajanaari mashiyocua-tureeni.

Judiocuaca camarucua nequesoreesacari Jesu
(Mr 14.53-65; Lc 22.54-55, 63-71; Jn 18.12-14, 19-24)

⁵⁷Jesu quianaari na jaatucuquiaari jiyaniijia Caifásua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucuaari rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸Pedroori Jesu nuhuajiquiaari tucuaaanuji secojonaa jiyaniijia tiajinia. Cuno puereetuua tia shocuaari mataca quiquiaari. Pedroori tii carijiniacuma tiuquiquiaarijuhuaj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

⁵⁹Pueyacuara secojonaa jiyaniijianucuaari puetunu canaa Judiocuaca camarucuaatjanaa pajeriquiaa pueya, nojori saquirojotanura na sapojonuta Jesuucuaara, na mosaanura. ⁶⁰Queraatia pueyari najuhuaana Jesuucuaara saquirojotaree juucua. Nojori sequesanoori rimajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquirojotaree Jesuucuaara. ⁶¹Nojoriiri naa sequere:

—Cuno pueyano naa sequereanutej: “Janiya jaara Pueyaso Secojoua tia niyartareni, janiyari na tianu tucuatantaniuhua jiuujianaraca juucajiniiani”.

⁶²Jesuuri sanaa nujuariquiaa saaja. Nocuaji, secojonaa jiyaniijiaari nujuaree. Jesu sequereeri:

—¿Majate quenaaja quia riuucuanuujua? ¿Quiaate pueya tojiriri quiocuara saquirojotano? ¿Seetanutejanaa nojori sequesano?

⁶³Jesuuri saaja sanaa na tojiriqiaa. Nocuaji secojonaa jiyaniijiaari Jesu sequere:

—iCua tojiri! Paa niya quiya Pueyaso niqiarani. iCua riuucuaari! iMajaari sapojonu! ¿Quiaate Cristo, Pueyaso Niyanu?

⁶⁴Jesuuri na riuucuaari:

—Jaa. Nojuacuajaniija taa quia sequereecujani. Cua tojitiare. Na nuhuaji, niari cua niqiniutianiya Pueyaso miaquetajara cajiyano. Niaari cua niqiniutianiyajuhuj jiyocuacaanuji tacateyanohua cohuajajinia.

⁶⁵Pueyacuara secojonaa jiyaniijia jaara tojiquiaari naa Jesu sequesanootej, tama na toque sutareejaarija na juaniutia. Nata quinia sequereeri:

—iJuhuej! iNia tojishuriucuaara na sequesano! iNojuajaari tama na cuaqueyajaaja jiyateya juhua Pueyaso na quiniuria! iJiyanohua sacuaaraatiari na sequesano Pueyaso niqiarani! ¿Paatucua casaara sashiri socua tamonu saquirojotanura nocuaaraari? Niaacuaja shusha tojitiaree tama na sequesanojuaja sacuaaraatia Pueyaso niqiarani. ⁶⁶¿Taa pa miiniutianiyanoj? ¿Taa nia sequereeni?

Nojoriiri pueyacuara secojonaa jiyaniijia riuucuaari:

—iCuaara mosaaria!

⁶⁷Jiyacaritij, tamasaari Jesu jiquioco riocojoree. Na jiquioco na masetejotureejaariuhuj. Tamasaca saniniujia, Jesu namijia na morotunu nuhuaji, na mocoritia na piqitiuriiri. ⁶⁸Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucuaari
(Mr 14.66-72; Lc 22.56-62; Jn 18.15-18, 25-27)

⁶⁹Pedroori jiyacari tii cajiriqiaaaja carijiniacuma. Jiyacaritij, secojonaa jiyaniijia seruuri Pedro niqishii. Nojuajaari niyacoo quiquiaari. Pedro sequereeri:

—iJaj, quiaacuaja cuno Jesuta rucanejojua, cuno Galilea jiyajiniinio pueyanotani!

⁷⁰Pedroori jiyacari seetaree puetunu pueya niqiarajanaa. Naa sapojoreeri:

—iMaja cua niishiniu casaa quia sequereeni!

⁷¹Pedroori tohuateyajiria canujiyaree. Jati, tamonu niyacoori na niquiriijuhuj. Cuno seruuri jiyacari tii quinia sequere:

—iNio pueyanoori cuno Jesuta quijajuhuj, cuno Jesu, Nazaret tiacajiniinio pueyanoni!

⁷²Pedroori Jesujini socua seetanu camiriohuacuahuaj: —iMaja cua niishiniu cuno pueyano! iPueyasocuaajari niishiya, seetanujanaa nia sequereeni!

⁷³Pasaja na tarishiniu nuhuaji, quiniqiu quiniaari Pedro sequetusee:

—iQuiaaqui seetanujanaa cuno Jesu pueyajiniinio! iQuiaari juhua nojori pocuaajuhuj!

⁷⁴Jiyacaritij, Pedroori socua jiyacateree sapojonura. Naa cuno pueya sequereeri:

—iPueyasocuaajari niishiya maja cua niishiniu cuno pueyano, niaa na sequereeni! iPueyasocuaajari cua sequesano tojiya! iMajaari cua sapojonu nijaniya!

Caacarajaari canashyaquiji niunijioquee. ⁷⁵Jiyacaritij, Pedroori naa cuno niucuaa Jesu sequesano niishiqii: “Pedronaa, caacaraja niunijiaquishacarijia, quiaari tari janiyajini seetanu pacutejonutaniya”. Pedroori tia shocua matacajini tohuataquiaari ritia. iJiyanohua nujuquequeeri na taraajenuta!

Judiocuaca camarucua niqitiosacari Jesu jiyaniijia Pilato
(Mr 15.1; Lc 23.1-2; Jn 18.28-32)

27 ¹Tariquicuaji, puetunu pueyacuara secojonaa jiyaniijianucuaajanaari rerejoree narta Judiocuaca camarucua. Nojoriiri roojotooree taa na miituniutianiya Jesu na motenurani. ²Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³Judasri jiyanohua macuhajequiaari na niqishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niqitionuhuaa cuno treinta cumaneeca. ⁴Judasri nojori sequeere:

—iJaniyaqui sesa miiriucaani, najuhuaana cua quiatenuucua maninia pueyano nijaniya!

Nojoriiri saa na riuucuaareeja:

—Naajaa. Maja canaa miishano. Cunocuaajari tama quia miishanojuaja.

⁵Judasri nojori cari cuno treinta cumaneeca jataree Pueyaso Secojoua tiajinia. Tiji quiacuhuari. Na riquajini morotaquiaari sohuaneyocuaari. Naa cusoquiaariiri. Sohuaneyocuaacuaari jaasutari. ⁶Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

⁷Puetunu nojorijianaa jaara niishirioquiaari taa na miituniutianiya cuno cumanecani, nojoriiri marau panioru pueyano cuhuariquia masequiaari cuno cumaneecata. Cuno

cuhariquiaari jiyatesaaquiaari rucoonaa jamojuara, nojori jaara cusoyare Jerusalén tiacajinia nojori quishacari. ⁸Pueyano monu samitia cuno cuhariquia masesaanuucua, cuno cuhariquiaari sesojosaaquiaari “Nanaca samitia masesano cuhariquia”. Naa quiyajaari na sesa. ⁹⁻¹⁰Naacujitij, Pueyaso sequenu panishano caminiujunia supuetana Jeremías sequesanoori maninia tohuateequiaari. Nojuajaari naa sequequiaaritij:

“Nojoriiri na treinta cumaneeca pataquiaari cuhariquia masenura marau paniyoru pueyanojiniji, taa cua jiyaniijia Pueyaso sequequiaari janiyacujani. Tariija, cuno treinta cumaneecata, maninia pueyanoori nata masesaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’”.

Pilato nequesoreesacari Jesu
(Mr 15.2-5; Lc 23.3-5; Jn 18.33-38)

¹¹Jesuuri jaatucusaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Jaa. Naacuaaquinatejaj, taa quia sequereecuajani.

¹²Secojonaa jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori. ¹³Naaratej, jiyaniijia Pilatoori Jesu sequeree:

—¿Majate quia tojinu nojori, quiocuara tonujiano queraatia?

¹⁴Majaari Jesu riucaanu quirii quenaaja. Pilatoori nocuaji jiuujiateree, casaara na riucaaaquia quenaajani.

Pilato sequesacari Jesuuri mosaanutaniya
(Mr 15.6-20; Lc 23.13-25; Jn 18.38-19.16)

¹⁵Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaquiaari pueyaracaanu. ¹⁶Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyaniishano. Puetunu pueyajanaari na niishijia sesa na miiniucua. ¹⁷Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuaanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosana.

¹⁸Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaquiriiaa, nojori tojitianura Jesu. Cunora, camarucuaari Jesu monu paniriquiaa.

¹⁹Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “iNarejatejataj, nareja! iJaniyari niucua maquiyojoree puereeta cuno pueyanoocujani!”

²⁰Jiyacaritij, secojonaa jiyaniijianucuaari, canaa Judiocuaca camarucua pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniujia. ²¹Naacujitij, jiyaniijia Pilato jaara pueya nequesotaquiaarihua teyano nojori paniya na cartenurani, nojoriiri na riucaaree:

—iBarrabás quia cartere!

²²Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosani?”

Puetunu pueyajanaari ritia na riucaaree:

—iCuaara teetesaria niyacutesanojinia!

²³Pilatoori nojori nequesotarohuacuahuaj:

—¿Casaarateni? ¿Sesa miiriitijaara?

Pueyari saaja socua jiyanoohua nacaree:

—iCuaara mosaaria niyacutesanojinia teetesano!

²⁴Pilato cartenu saniniujishacari Jesu juucua, pueyari saaja socua jiyanoohua nacooriaquiaa. iSocua jiyanoohua

juaaquiriiaari! Pilato niishishacari maja na naata quiniutianiya Jesu cartenu, taa na paniriquiaa juucuaajani, nojuajaari mohuaca maseree. Pueya niquiara shuqitiareeri. Na shuquitiasacari, Judiocuaca sequereeri:

—iMajaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. iCunoori tama nia miishanojuaja!

²⁵Puetunu pueyajanaari na riucaaree:

—Naajaa. iJaara mosaare, cuaara tiutiasaaria canaacua, canaa niqiuohuacuanio!

²⁶Na nuhuaji, Pilatoori Barrabás tohuateere nujuatejojuajiniji. Saniniujia Jesu majacutereeri. Na nuhuaji, na soldadohua na niqutioreeri niyacutesanojinia nojori teetesocoriquiano.

²⁷Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijajanaa cushishano. Naa na miitiuriiri na macaatinuria. ²⁹Nojoriiri juhuacontucua maaturee na nacaquerajuhua. Na nuhuaji, na cushitituriiri Jesuuri. Naajua niqutiosaarejaariuhua, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuaa mojuquetacoquiaari. Nojoriiri naa na macatirii: —iJejee, Judiocuaca jiyaniijiana!

³⁰Nojoriiri Jesu riocojoree. Na naajua na jaariutiareeri. Nataja, na naca piqutiuriiri. ³¹Naa nojori macaatinu nuhuaji Jesutej, nojoriiri cuno tucuaque toque jocuaaariuhua nocuaji. Tama na toquejaaja cushitishaaruahuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia
(Mr 15.21-32; Lc 23.26-43; Jn 19.17-27)

³²Nojori tohuareetasacari tiacajiniji puecoosaquiria nojori quijosacari, nojoriiri tamonu pueyano naacumaa. Nojuajaari Cirene jiyajinijio pueyano quiquiaari. Simón na sesa quijia. Soldadohuari cuno Simón pateree Jesu teetejara niyacutesano. ³³Nojoriiri tiuquijioosee sesa miijia puecoosaqui. Pueya puecoosaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. ³⁴Quiniqui, soldadohuari Jesu raateree vino juucua, casaa piyata cojitishano. Jesu jaara na saniquiaari, majaari na ratunu quirii.

³⁵Jesu jaara niyacutesanojinia teetesaaquiaari tari, soldadohuari saitia tacuarishijoree nojori niishiniuria cante Jesu toque poonutianiya nerani. Naacujitij, tama nojoriijaarijia Jesu toque seraatiaquiaari. Naa tohuateequiaari tariucuaanu Pueyaso sequesano caminiujunia sequesano, nojuaja jaara naa naajiotaquiaari:

“Pueyari saitia tacuarishijoree cua toque nojori seraatianura”.

³⁶Na nuhuaji, cuno soldadohuari cajitiquiaari Jesu na cojuanura.

³⁷Jesu nacaacuma, naajioneeri rupotasaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸Caapiqui nohuasenujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ³⁹Tamasaca pueya tajishacari nucuaco Jesu shuriuquico, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

—iJaj! iCumaacaraca quijia naatiijia! Quiaacuaajani sequeja quiaa jaara Pueyaso Secojoua tia niyartare, quia naata na tianu tucuatunhua jiuujianaraca juucajinia. ¿Naatee? iQuiaa jaara naa cumaacaraca quiritij, canaa niquiara quia roserecuarajaj, quiaa jaara Pueyaso Nyanu quiri seetanujanaa!

⁴¹Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca

camarucuanio. Nojoriiri Jesu macaatiriquiaajuhua. Tama sequetooriquiaajaariija:

⁴²—Saaja tamasaca naatanijiojuaquiiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniija quiri, cuaara roseera quiarijia pa niquiara niyacutesanojiniji, nocua pa tiuuniuria. ⁴³iPueyasooocua tiuujia naatijia! Jaara naa quiriritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

⁴⁴Cuno caapiqui nohuasenujuaca Jesu shuriucua teetejosano quiriquiaani, nojoriiri Jesu macaatiriquiaajuhua.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵iPanacari, mijiriaari ninishiquiria quiqui! Pananu mueecosacari cuhuatemohuari. ⁴⁶Jiyacaritij, Jesuuri jiyanoehua nacaquiaari naatej:

—iElf, Eliinaa! ðlama sabactani?

Nioori pueyano rupaaajinia sequeya: “iCua Pueyasonaa, cua Pueyasonaa!, ¿casaara quia carteree janiyani?” ⁴⁷Tamasaca na shuriucua nujuatunaari na tojtiriaria. Nojoriiri sequere:

—iNia tojiri! iSupuetana Elías jiiquioonuyano! Noo Elías, tariucuaaanu pueyara Pueyaso sequesano caminiujunia quiquiaaritij.

⁴⁸Tamonuuri ritia netequee namasu casa na riniuria. Naajuacua na morotanu nuhuaji, jereca vinojinia na shiriiri. Na nuhuaji, Jesuucua na shiitioereeri na raatenura.

⁴⁹Tamasacaari sequere:

—iPa shanacure! iElías jiyoteeri nocua niniutianiya na roshiniuria niyacutesanojiniji!

⁵⁰iJiyacaritij, Jesuuri jiyanoehua nacarohua! iNa nuhuaji na sohanu tohuataniriiri! iCusoqueeri! ⁵¹Pueyaso Secojoua tiajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. iJesu cusosacari, cuno toqueeri sutequee jiyocuaaanuji jiyocuaara puetunjuanaa! iRijiaari jiya jiuuquiutiaquiaari jiyanoehua! iSairi jiaquetacoquiaari noojiaacoji! ⁵²iMacunucua raacaari riatequequiaari! iQueraatia tariucuaaanu Pueyasooocua tiuuniaari samiiticoquee na raacajinia! ⁵³Jesu jaara samiitiaquiaariuhua, cuno samiitiaconohua pueyari tohuaretaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacua muetaquiaari tii, Pueyaso panishano tiacajiniani. ⁵⁴Soldadoehua capitánri na pueyata Jesu cojuariquiaa, Jesu cuaara cusoyejaatijia nojori niquiara. Nojori jaara jiya niquitiquiaari jiuuquiutiaano, socua puetunu nojori niquishanojuanaano, nojoriiri jiyanoehua puereturee. Sequetureeri:

—iNio pueyanoqui seetanujuanaa Pueyaso Niyanu quiquianu!

⁵⁵Queraatia maajipohuari tii quiriquiaajuhua. Nojoriiri tucuaaanuji shootiatiriquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriqiano.

⁵⁶Cuno maajipohua tajinia quiriquiaari María Magdalena, Santiago nucua Marfajuhua, José nucua Marfania, mariyata Zebedeo niquioehua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷Tamonu pueyanoori quiquiaari Arimatea tiacajinijinio. Jiyanoehua casamiriaca quijiaari. Na sesa quiquiaari José. Nojuajaari tarijia Jesu tojijiaa quiquiaari. Joseeri Jesu cusonu juucaja tiuquiquiaari cuno tenacari. ⁵⁸Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosaarianoj. ⁵⁹Joseeri Jesu quete paquiaari na jeenucuanura raaco na niasocoriquiano. Na jiunioceeri quenaaruque cohuajaque toquejinia. ⁶⁰Na nuhuaji na niaquiaari tama na raacojaarijia. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuca

saajia saquitiniquiaari raa tiotiuuria. Quiacuhuari. ⁶¹María Magdalenaari na sesaanucuaata cajitiriquiaa raa caneja taquijiria.

Soldadoehua cojuasacari Jesu raa

⁶²Pascuara jeenucuanu juuca nuhuaji, secojonaa jiyaniijianucuaari Pilatoocua quiojoquiaari Fariseocuaata. ⁶³Naa na sequetuseeri:

—Jiyaniijianaa, canaari cuno sapojoua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutianihua-ni”. ⁶⁴Nocuaaji na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosanoni”.

⁶⁵Pilatoori nojori sequere:

—Niya quiyacuaja cua soldadoehua. Nojori nia cojuatere maninia cuno raa, taa nia paniyacuajani.

⁶⁶Nojoriiri soldadoehua nujuatejoquiaari raa nojori cojuanura. Raa tiotiuuri rupanacusaquiaarijuhuaj jiyaniijia Pilato sesa naajiotajata.

Jesu samiitiasacariuhua

(Mr 16.1-8; Lc 24.1-12; Jn 20.1-10)

28 ¹Samaatenu juuca jaara shocoquiaari, coteenu juuca semaanajinijinio juhuaquesacari, shusha cuhuatesacari, María Magdalenaari raa niquiniucuaa quiariquiaa na sesaanucuaata. ²iCanashiyajiqi, rijiaari jiyanoehua jiuuquiutiaree! Cunoori quiquiaari Pueyaso seru rosenucua jiyocuaaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³iPueyaso seruuri niquishaaquiaari shacantuca juhua miacana! Na toqueeri jiyanoehua cohuajaque quiquiaari, juhua sohanatuu. ⁴Raa cojuatunaari jiyanoehua shiriqitiquiaari nojori niquishacari Pueyaso seru. Jiyanoehua tetecatureeri. Na puerenuta socua cusojonuureeri. ⁵Maajipohua jaara tiuquiquiaari raajinia, Pueyaso seruuri nojori sequere:

—Maja nia shiriqini. Janiyacuajaari niishiyani niaari Jesu pajeya, niyacutesanojinia mosanotej. ⁶Maja niya na quiniu. Tari samiitiarohuano, taa nojuaja sequequiaari niajanuyacuajani. Miji. Nia niquishushiiria na masaqui. Shaaqui. ⁷Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquiniutianiya”. Janiyacuajaari tari nia sequereeni. Naa nia pahuatasuhua na pueya.

⁸Maajipohuari masaacujutanuuriquioehua raajiniji na puerenuta, na shuquiriniutajuhua. Nojoriiri socua netecuatiarohuacuj, canaa na pahuatanuhua Pueyaso seru sequesano nojori. ⁹iJiyacaritij, Jesujuanaari canashiyajiqi nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiji mojuquetacoreeri. Jesu niohuaca quiatuereeri. Jesu shootiatuereeri na jiuujiatenuta. ¹⁰Jesuuri nojori sequere:

—Maja nia puerenu. Nia quiaarohua. Cua pueya nia sequesuhua nojori cuaara quiojoora Galilea jiyajinia. Nojoriiri seetanujuanaa cua tapueyocua. Nojoriiri jati cua niquititianiya.

Raa cojuanaa pahuatasano

¹¹Maajipohua quiojosacariuhua, noojiaqueya raa cojuanaajinijioori tiacajinia quiojoquiaariuhua pueyacua secojonaa jiyaniijianucua nojori pahuatanura nojori niquishano. ¹²Pueyacua secojonaa jiyaniijianucuaari canaa Judiocua camarucua rerejoree na rojotoonura taa na miititianiya-ni. Na nuhuaji, nojoriiri queraatia cumaneeca niquitiquiaari

raa cojuanaa, pueya niqiara nojori pohuatanura tamaatia nojori niquishanojiniji. ¹³Soldadohuari naa rootasaaquiaariti:

—Niocua naa sequere pueyatej: “Canaa maquesacari, Jesu pueyaquiiri niucua nohuasequee Jesu quete raajiniji”. Niocua naa sequerefej. ¹⁴Jiyaniijia Pilato jaara niishiri naa nia pohuatasacarij, majaari nia puerenu. Canaacuajaari na shiniajanutaniyani jaara juaari. Naacuajitij, majaari na juaaniu quiniutianiya nijaniya.

¹⁵Jiyacarij, soldadohuari cumaneece maseree. Nojoriiri naa pohuatanu coteequiaari taa nojori rootasaareecuajani. Nojori cuaracashishanoori ritia caminiujiushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

Jesu rootasacari na pueya na jiyaramiqiiaquishacarijia nojori
(*Mr 16.14-18; Lc 24.36-49; Jn 20.19-23*)

¹⁶Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhuananuucuan. Jesuuri

canaa sequequiaari cana quiojonura tiriara, tii cana coquetonura nata. ¹⁷Canaa niquishacari Jesu quiyano tii, canaari nocuara mojuquetacoquiaari cana shuquiritianura nojuajani. Tamasaca canaajiniinooori jiyaniiriquiaa maja naasucuaari Jesu. ¹⁸Jesuuri canaacua catecanoree. Canaa sequereeri:

—Janiyari puetunu cumaacajanaa niqutiosaaareni, Jiyaniijiajanaa cua quiniuria jiyocuacaanu, mijiriano. ¹⁹iNaaratej, nia quiojore! iPuetunu pueyapuejanaa nia pohuatare cua rupaa, cua tojitiajacara nojori quiniuria! Moojinia nia tiuquiniijore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰Nojori nia niishitiojore puetunu cua rootasanojuanaa nijaniya, nojori tojishocoriquiano. Nia niishiri nio: ijaniyacuaajaari niaata quiniutianiya pueyaracaanuni, jiyaa cuuara puequerejaatijia!

MARCO NAAJOTASANO JESUCRISTOJINIJI

**Cariiquia jiyajinia Tiuquinijiona Juan
poojotasacari Pueyaso rupaa**
(Mt 3.1-12; Lc 3.1-9,15-17; Jn 1.19-28)

1 ¹Pueyaso Niyanu Jesucristojiniiri naa coteetasaaquiaari pohuatanutej. ²Tariucuacaanu pueyara Pueyaso sequesano caminiujionia Isaiasri Pueyaso Niyanu niyacari naajotaquiaari. Naajotaquiaariiri taa Tiuquinijiona Juan poojotanutaniya pueya jeenucanura nojori jiuujiani, niriqiano Jesu tojjia nojori quiniuria. Isaiasri naa naajotaquiaari Pueyaso sequesano miriqui Neyanutej:

“Janiyari quiocuaiji jiyaronutaniya tamonuni, quiocuaiji quia nuu jeenucuariquiano. ³Na nacanuari tojjishaanutaniya cariiquia jiyajinia. Naa pueya sequeyari: ‘iNia jeenucuare Jiyaniija nuu! iNia nunore maninia, maja shuutiuniu!’”

⁴Quiari naataja, Tiuquinijiona Juanri seetanujanaa naa miiquiaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—iNioojia nia tacatore sesa nia miiniujiniji, moojinia cua tiuquinijionura niajanija! iPueyasocua sesa nia miishanojiniji nia jiyanoori puetunujanaa!

⁵Puetunu Judea jiyajiniinio pueyajanaari nocua nijioquiaari nojori tojtianura nojuaja, Jerusalén tiacajiniinio pueyano. Cuno pueya jaara sesa na miishano pohuataquiaari Juan niquiara, Pueyaso niqiarajuhuj, Juanri nojori tiuquinijioquiaari Jordán moojinia.

⁶Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari sequeru, samiyatunio, cariiquia jiyajinia na riuriatasano. ⁷Juanri pueya niquiara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijajanaa cutara janiyajiniji. ⁸Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohanu tiuquinijionutaniya nioojiajinia, na cumaaca nia jitianura, seetanujanaa maninia miijia nia quiniuria.

Jesu tiuquinishacari moojinia
(Mt 3.13-17; Lc 3.21-22)

⁹Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niquiquiaari riateyano. Pueyaso Sohanu niquiriiri nocua roseyano juhua mococoonu. Nocua tiuushiiri.

¹¹Jiyacaritij, jiyocuaaanu tojjishaquiaariiri Pueyaso pocuaano. Naa Jesu sequequiaariiri:

—iQuiaari Quiyanuniyojua, cua panishano! iJiyanojua quia timitiaanjia!

Samaruhua jiyaniija saniniujiushacari Jesu
(Mt 4.1-11; Lc 4.1-13)

¹²Na nuhuaji, Pueyaso Sohanuuri Jesu jiyatequiaari ritia cariiquia jiyajiniara. ¹³Jesuuri cuarenta juuca shocojotequiaari

tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojjiaara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

Jesu coteesacari poonijionu Galilea jiyajinia
(Mt 4.12-17; Lc 4.14-15)

¹⁴Jiyaniija Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niquiara poojotaquiaari tii, maninia pohuatasano Pueyasojiniji, taa Pueyaso jitianutaniya na muerasuni. ¹⁵Jesuuri naa sequequiaari pueyatej:

—Nia sequeyanijia, nio pa quishacari, quarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojtiajaca nia quiniuria.

Jesu saquiriojosacari pueya, na tarajariquiano
(Mt 4.18-22; Lc 5.1-11)

¹⁶Galilea caminia shuriuquioco Jesu rucuanesacari, nojuajaari Pedro niquiquiaari, tarajanu Andrésnio. Nojoriiri shiyaru jaquerootanaa quiquiaari. Jiyacaritij, nojoriiri shiyaru jaquerootariquiaa caminiajinia. ¹⁷Jesuuri nojori sequeese:

—iMiji, cua nuhuajitiuyare! Janiyari nia jiyatenutaniya pueya quiojuara saniniunijia, juhua sapitiaaja.

¹⁸Nojoriiri ritia na shiyaru tiujiaquiaari. Jesuta quiojiyareeri. ¹⁹Socua shiitaniyojua na tajoji Jesu canujusacari, Santiago niquishiiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. ²⁰Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojooquee.

Samaruraca pueyanojiniji pohuatasano
(Lc 4.31-37)

²¹Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. ²²Pueyari jiyanojua jiuujiatequiaari na rootasano nojori tojjishacari. Jesuuri juhua jiyaniijajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niquiara nojori pohuatasacari Pueyaso Rupaa. ²³Samaruraca pueyanoori Pueyaso secojojua tiajinia quiriquiaa tiujiuhuj. Nojuajaari nacaquiaari:

²⁴—iNazaret tiacajiniinio Jesunaa!, ¿quiaateeri tari canaacua nimiaa, canaa quia shaajanura? Janiyari quia niishiyani. iQuiaacuajaari Pueyaso Niyanu!

²⁵Jesuuri cuno samaru juaari. Na sequereeri:

—iQuia sanaajere! iQuia tohuatate nio pueyanojiniji!

²⁶Jiyacaritij, samaruuri jiyanojua taraatia miiri cuno pueyano. Jiyanojua na sariyotequiaariiri na tohuatasacari nojuajiniji. Juhua macu tiujiaquee pueyanoori. ²⁷Puetunu pueyajanaari shiriqititiquiaari. Tama nojoriijaari nequesoreetoquiaari:

—¿Casaatucuaa nioni? iNioruhua quiarinio niishitiojosano! iNio pueyanoqui cumaacaraca! iTaa samaruhua tojtiaa nojori na jiyarosacariiri!

²⁸Pueyari ritia caminiujuiquiaari Jesujini puetunu Galilea jiyajinijanaa.

Jesu naatanishacari Simón Pedro reyarucua

(Mt 8.14-15; Lc 4.38-39)

²⁹Jaara tohuareetaquiaariuhua Pueyaso secojojuu tiajiniji, Jesuuri Simón, Andrés tiajinia quiaquiaari Santiagota, Juantano. ³⁰Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa. ³¹Jesuuri nocua canujiyaree. Na juaashiquiajiniji cusosu sanaseeri. Na cusonuuri seetanujuanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua

(Mt 8.16-17; Lc 4.40-41)

³²Shusha ninishacari, Jesuucua patootasaaquiaariiri puetunu cusosuhujanaa, samaruharaca cusosu pueyano. ³³Puetunu cuno tiacajini pueyajanaari tia tohuateyaji rerequeequiaari tee Jesu quiriquiaacuajani. ³⁴Jesuuri queraatia puetunu tamaatia cusonujuanaa naatanijosquiaari na rupaa cumaacata. Queraatia samaruhua tohuatanijosquiaari tamasaca pueyajiniijaariuhua. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pohuatasacari Pueyaso rupaa Galilea jiyajinia

(Lc 4.42-44)

³⁵Jesuuri jiyano hua tariquicuaji sanequiaari, ninishiqui quishacarijia. Tiacajini quiaquiaari tamaquiaari, tii Pueyaso na secojonura tamajaaja. ³⁶Na nuhuaji, Simónri Jesu pajenuucua quiojoquiaari, nata quiniaata. ³⁷Jaara na riuriatatuquiaari, na sequetuseeri:

—iPuetunu pueyajanaa quia juuretaa!

³⁸Jesuuri saaja nojori sequere:

—Pa quiaare juhuari catecanaataja tiacajinia. Tii pa pohuatarehua Pueyaso rupaa pueya niqiuara. Janiyacuajaari cunora jiyasohuaja tohuataareeni.

³⁹Naacuajitij, Jesuuri puetunu Galilea jiyajinijanaa rucanejoquiaari. Pueyaso rupaa pohuataquiaariiri Pueyaso secojojuu tiacajiniaqueya puetunu Galilea jiya tiacajinijanaa. Nojuajaari samaruhua tohuatanijosquiaarijuhuaj.

Jesu naatanishacari lepraraca pueyano

(Mt 8.1-4; Lc 5.12-16)

⁴⁰Lepraraca* cusosu pueyanoori Jesuucua catecanoquiaari. Jesu cariquimiaji mojuquetaseeri. Na sequereeri:

—Quiaa jaara paniri, quia naata cua naataniniu cua cusonujiniiji.

⁴¹Jesuuri nocua taraajequiaari. Na juaashiquia niaree nocuuari. Na sequereeri:

—Taaquiriirini. Quia naataniniu paniyanijia. Quia cuaqueya cuara jeequehuara.

⁴²Jesu jaara naa na sequequiaariti, na lepraari ritia cushiriiquii. Na cuaqueyajiini shaaajequiaariiri na cusonu. Na cuaqueyari maniniara quiquiaariuhua. ⁴³Na jiyaroyaquishacarijia na naatanishano pueyano, Jesuuri jiyano hua na rootaquiaari. Na sequereeri:

⁴⁴—iCua tojiri, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niqitishii, na cartenuhuara quiajaniya, pueya tajinia quia rucanejonuhua juhuajaniya. Mariyata ritia quia niqitioere quia seru Pueyasocuaru catijasocoriquiano. Naa quia miiri taa Moisés niishitiojoquiaaricuajani, puetunu pueyajanaa niishiniuria quiaa tari naatarohua quia cusonujiniiji.

⁴⁵Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niqini pantiija.

Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocuaji Jesuuri pueya quiaquishaqui rucanejojuu. Naajaa, puetunu cuno jiyajini pueyajanaari saaja nocua nijioquiaari na niqiniuria.

Jesu naatanishacari cumatacuruhuana cusosu

(Mt 9.1-8; Lc 5.17-26)

2¹Na rucanejonu nuhuaji, Jesuuri Capernaum tiacajinia tiuquiquiaariuhua na saquiriojosano pueyata. Pueya jaara niishiquiaari Jesu tari na quijia tiacajinia tiuquirohua, ²queraatia pueyari nocua nijioquiaari cuno tiajinia. Nojoriiri tiaco mishiquiaari, tohuateyajiuhua. Jesuuri cuno pueya niqiuara pohuataquiaari Pueyaso rupaa. ³Jesu quishacari tii, nocua patasaaquiaariiri pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniucua. ⁴Cusosu pataanaari maja na naata tiaco tiuquitanu quiquiaari Jesuucua, puera pueya rerequeesacari tohuateyaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniiji, Jesuucua roshinitiasaareeri cusosu na matujinia. ⁵Jesuuri cusosu patanaa pueya niqiriiri seetanujuanaa nocua tiuyano. Naaratej, Jesuuri cusosu sequere:

—Quiyanunaa, sesa quia miishanojiniji quia jiyanoorii taricujaniija.

⁶Moisés Rootasanojiniji niishitiojonaari tii cajituriquiaa.

⁷Nojori tojishacari Jesu jiyano yano cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni sesa pa miishanojiniji. iNojuajaari tama na cuaqueyajaaja jiyateya juhua Pueyaso na quiniuria! iCunoori jiyano hua sacuaraatia! iSaaja Pueyaso cutaraari na naata pa jiyanooni!” ⁸Jesuuri tamajaaja ritia niishiquiaari noojajinia naa cuno pueya niishiriojonuusanoo. Jesuuri cunora nojori sequere:

—¿Casaara naa nia niishiriojiani? ⁹¿Casaate jiyajenetashiya sequenurani: “Sesa quia miishano tari jiyanooshaaree”? ¿Mariyata jiyajenetateeri sequenurajuahuaj: “Quia sanere. Quia matu quia pataarohua”? ¹⁰Seetanujuanaa nia sequeyanijia, janiyari quarijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiitiaa sesa miijiaa cua jiyanooniuriani.

Jiyacaritij, Jesuuri cumatacuruhuana cusosu sequere:

¹¹—Cua tojiri. iQuia sanere! Quia matu quia patare. Quia tiacajinia quia quiaarohua.

¹²Cusosuuri ritia sanequee. Pueya niqiuara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaariti, na shuquiritiasacari Pueyaso:

—iMajaari quenaaja pa niqini quiquiaari naa miishanotej!

Jesu sequesacari Leví na nuhuajiniuria

(Mt 9.9-13; Lc 5.27-32)

¹³Na nuhuaji, Jesuuri na saquiriojosano pueyata tacatequiaariuhua caminia casaqueyaji. Queraatia pueyari nocua nijioquiaari. Jesuuri cuniqui nojori niishitiojoquiaari Pueyaso rupaa. ¹⁴Na nuhuaji, Jesu quiojosacari na saquiriojosano pueyata cuniquiji, Jesuuri Leví niqimaa cajiyano Roma tiacajinia quijia jiyaniijia cumaneeca masejojuajinia. Nojuajaari Alfeo niyanu quiquiaari. Jesuuri na sequere:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵Cuno niucujia, Jesuuri Leví tiacajinia miaqueriquiaa. Leví tiacajinia miaquenuuriquiaaariuhua queraatia narta cumaneeca masejonaa. Queraatia tamasaca pueyari nojoritia miaquenuuriquiaajuhua, canapue Judiocuaca camarucua sequequiaari sesa pueyacuajani. Nojoriiri Jesuta miaquenuuriquiaa, Jesu

saquiriojosano pueyatano. Jiyano hua queraatia pueyari Jesu rupuenaa quiriquiaa. ¹⁶Moisés Naajioneejiniji niishitiojona, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaaniuhuj?

¹⁷Jesuuri cuno pueya sequesano tojirii. Nojori sequeere miriquiri:

—Jiyotuuaari maja na paniniu naarajona. Cante cusosuni, cuno cutaraari naarajona paniya. Majaari cua ninu quiquiaari maninia miijiacacua. Niquiaari cutaranijia nia sequesano sesa miijiacua cua jiyanooniuria sesa nojori miijosanojiniji.

Pueya nequesotasacari Jesu, casaara na pueya miaquenu carteyaquiya, nojori shuquiritiniuria Pueyaso
(Mt 9.14-17; Lc 5.33-39)

¹⁸Tamacari, Tiuquinijiona Juan tojitajaca, mariyata Fariseocuaca miaqueyaquishacari, tamasa pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miiquiaajuhuj. ¿Casaara naa quia pueya miyaquiyajaaniuhuj?

¹⁹Jesuuri nojori riucaaree miriqui:

—¿Masuusano pueyateeri miaajenutaniya nojori jaara queranacusaqui quia, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. ²⁰Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹Seetanujuanaa nia sequeya cutaranijia, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaree.

²²Naajuhuj, quiarinia uva* caacaari maja na naata racatasaanu shoque tariucuacojinia. Quiarinia uva caaca jaara jerema, shoque tariucuaco pojuaretaari. Naacuajitij, paari najuhuaa niitiaa uva caacani, shoquenio. Cunora, maninia cutaraari quiarinia uva caaca shuujionu shoque quiariquiojina, maja vino* niitiasaanura najuhuanaj, shoquenio.

Jesuuri naa pohuataquiaritij, pueya na niishitiojona quiarinio na niishitiojosanoori maja na naata cojitishaanu tariucuacaanu niishitiojosano.

Jesu pueya carojotasacari trigo samaatenu juuca
(Mt 12.1-8; Lc 6.1-5)

²³Jesuuri samaatenu juuca quiojoquiaari cuhuariquijiniaaco na saquiriojosano pueyata. Na pueyari jiyacari trigo carojotanu coteequiaari na miaajenuta. ²⁴Fariseocuaca jaara na niquiquiaari, Jesu sequetureeri:

—iQuia niquiri! ¿Casaara quia saquiriojosano pueya poonijiya samaatenu juucani? iPueyaso Rupaajinia, paari piriyoshiyacuajani maja samaatenu juuca pa poonijionura!

²⁵Jesuuri nojori sequeere:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jitiaaquishacari na coseyaca? ²⁶Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niqutiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na necasequiaariiaariuhua nata quiniaa pueyara.

²⁷Jesuuri nojori sequequiaarijuhuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipininiu quiquiaari pueya, samaatenu juucara. ²⁸Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

Jesu jeeacasacari pueyano juaashiquia cuseetucouara joojequetano
(Mt 12.9-14; Lc 6.6-11)

3 ¹Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriquiaari pueyano, cuseetucouara joojequetano juaashiquiaraca. ²Cuniqui quiniaa Fariseocuacaari shanacutariquiaa na niquiniuria taa Jesu miiniutianiyanoj. Nojoriiri tama sequetoreejaaja:

—¿Jesuteeri sesarucouara pueyano juaashiquia jeeanutaniya samaatenu juucani?

Nojoriiri Jesuucara saquiriojotanu paniriquiaa, nojuaja jaara samaatenu juuca poonijiore. ³Jesuuri jiyacari sesarucouara pueyano sequeere:

—Quia sanere. Niya quia nujuasee canaa tajinia pueya niqiuara.

⁴Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niqutiariquiaa saaja, Jesu sequesacari naatej.

⁵Jesuuri na shocuaqueya nujuatiuyano pueya niquiniijiore na juaaniutia. Nojoriicua taraajeriquiaaariuhuj, cumajiujaacua nojori quiniucua. Majaari nojori niishiniu paniniu quiquiaari taa Pueyaso paniya pueyacuara taraajeja pa quiniuriani. Jesuuri sesarucouara pueyano sequeere:

—iQuia juaashiquia quia shiitiore!

Na juaashiquia shiitioreeri. iJiyacaritij, na juaashiquiaari ritia jeequeje. ⁶Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijia pueyata pocoojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyaji

⁷Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijuhua Galilea jiyajiniji. ⁸Pueya niishishacari puetunu Jesu maninia miishanojinijianaa na cumaacata, queraatia pueyari nocua nijioquiaari na niquiniuria. Nojoriiri nocua nijioquiaari puetunu jiyacajinijiojuanaa: Judea jiyajinijinio pueya, Jerusalén tiacajinijinio pueyajuhaaj, Idumea jiyajinijinio pueyano. Nijioquiaariiaariuhua Jordán moo taquijirajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhuaj na niquiniuria Jesu.

⁹Nocujaji Jesuuri na saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacuaji, maja pueya tanuujunura janiya.

¹⁰Jesuuri jiyacari jiyano hua queraatia pueya naatanijioriquiaa. Nocujaji cusosuhuari Jesuucua riutioconeetariquiaa na quianura Jesu, nojori cusonujiniji nojori naataconuhua.

¹¹Samaruhuaraca pueya jaara Jesu niqutiuhuaari, nojoriiri nocuara mojuquetacoquiaari. Naa nacatuquiaariiri:

—iQuiaacuajaari Pueyaso Niyanu!

¹²Nocujaji Jesuuri nojori sequequiaari na juaaniutia, maja nojori sequenura pueya niqiuara cante nojuajani.

Jesu saquiriojosacari doce pueya na pueyajinijinio, na rupaa pohuatariquiano
(Mt 10.1-4; Lc 6.12-16)

¹³Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricujani. Nocua

nijioquiaariiri na jiyaniquishano pueya. ¹⁴Jesuuri doce pueya saquiriojoquiaari nata nojori quiniuria. Nojori jiyateereeri na jiyaramiquishocoriquiano, Pueyaso rupaa nojori pohuatanura. ¹⁵Nojori niqutioree na cumaacaari, cusosuhua nojori naatanijionura, samaruhua nojori tohuatejonurajuhua. ¹⁶Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niqiohwa quiquiaari. ¹⁸Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaa pueya maanujinijinio quiquiaari. ¹⁹Quiquiaari-jiariuhua Judas Iscariote, Jesu quiatequiaari mosocoriquianoni.

**Judiocuaa camarucua sapojosacari,
Jesu samaruhua cumaaca jiiitiaa**
(Mt 12.22-32; Lc 11.14-23; 12.10)

²⁰Na nuhuaji, Jesuuri na saquiriojosano pueyata tamonu tijinia tiuquitiaquiaari tamonu tiacajinia. Queraatia pueyari tiuquitiaquiaarijuhua cuno tijinia Jesuucua. Naacuajitij, majaari nojori naata miaquenu quiquiaari. ²¹Jesu tapueyocuaa jaara niishiquiaari naa nocuajitij, nojoriiri nocua nijioquiaari na riniucua juucua. Tama sequetooriquiaajiarjia:

—iJesuqui tari paatecara quiriijuhuanajaj!

²²Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuajaari cumaaca niqutiorucuaa cuno pueyano. Cunora, samaruhua tohuatanijia pueyajinijiri.

²³Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴Naajuhua, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari shocotasaaanutiya. ²⁵Naajaariuhua, pueyano jaara tapueyocuaata juayonuutare, majaari nojori naata jatiqui quiniu nojori tijinia. ²⁶Niaari saniniuujia cua sequeree, janiyana Satanás cumaacata tohuatanijioquiaa samaruhua. Satanás jaara naa miiritij, cuno maara tari quiri na shaajasaanurajanaa.

²⁷Naajuhua, pueyano maja na naata tiuquiniu cumueeca pueyano casamiriaca tijinia, na casami na jaariuutianura, jaara coteenu na camaru morojiaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyahuhua. ²⁹Saniniuujia, cante sesa rimiaaqueja Pueyaso Sohuanuucarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu sanitiosaanutiya.

³⁰Jesuuri naa nojori sequequiaaritia, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocuaajinijinio
(Mt 12.46-50; Lc 8.19-21)

³¹Jiyacaritia, Jesu nucuuari tiuquijioquiaari, Jesu tapueyocuaanio. Majaari tijiniaaco na tiuquitanu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriucua. ³²Jesu shocuaqueya cajitiuniaari Jesu sequeturee:

—Quia nucuana quia tapueyocuaata jati carijiniacuma nujuatiyu. Quia pajenuyaquinia.

³³Jesuuri saaja nojori sequeree:

—¿Cante cua nucuani, cua tapueyocuaajuhua?

³⁴Na nuhuaji, na shocuaqueya cajitiuniaa niqiniijoreeri. Sequereeri:

—Nio pueyari cua nucuana, cua tapueyocuaanio. ³⁵Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

Miriqui pohuatasano natoojoua pueyanojiniji
(Mt 13.1-9; Lc 8.4-8)

4 ¹Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua queraatia pueyari rerequeejoquiaari nojori tojitianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. ²Cuno pueya niishitiojoreeri queraatia miriqui pohuatasano. Na niishitiojosacari pueya, Jesuuri naa sequequiaaritia:

³—Nia tojitiare nio sequesano. Tamonu juuca, pueyano na cuhuariquiajinia natoojonuucua quiaquiaari. ⁴Na jacutasacari, nucuaco totequiaariiri tajaaca. Shuhuari na miojoree. Majaari na moritianu quiquiaari. ⁵Tajaacaari totequiaari sai tajiniaqueyajuhua. Majaari cuniqui puera jiya quiniu quiquiaari na maashiniuria. Naacuajitij, najuhuaana ritia moritiaquiaariiri. ⁶Panaru jaara jaquiaari, na catijiareeri. Maja puera nujuacaraca na quishacari, ritia sorequeeri. ⁷Tajaacaari totequiaarijuhua riyocuaa tajinia. Jiohuacacaari socua ritia maashiquiaari. Natauri tarinitiuucua quiquiaari saniniuujia. Naaratej, majaari na muetunu quiri. ⁸Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhua socua cien jajau tanajajiniji.

⁹Jesuuri nojori sequeree:

—Cante numaaracani, cuara cua sequesano tojitiara.

Casaarate miriqui pohuatasano
(Mt 13.10-17; Lc 8.9-10)

¹⁰Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasa pueyano. Cuno pojoricuajaari Jesu shuriucua quiriquiaa. Nojoriiri Jesu sequeree:

—¿Caa miriqui quia pohuatasano sequenu paniyani?

¹¹Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jitianutiya pueyaracaanu cutarani. Tamasacara saniniuujia, canapete Pueyaso ruuretajacani, nojoriiri miriqui pohuatahiyacujua. ¹²Naacuajitij, nojoriiri cua cumaacata cua miishano niqutiuquiaa pueyaracaanu najuhua. Majaari nojori niishiniu na niquishano. Naajuhua, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori miriqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoojonajiniji
(Mt 13.18-23; Lc 8.11-15)

¹³Jesuuri nojori sequequiaarijuhua:

—¿Majateeri nia niishiniu miriqui cua pohuatasano?

¿Niaatucua taa niishiriquia socua tamonu cua pohuatasano?

¹⁴Cua pohuatasano cuhuariquiajinia natoojonajiniji, nojuajaari juhua Pueyaso Rupaa pohuata. ¹⁵Noojiaqueya pueyari juhua nucuaco toteno jajau. Najuhuaana Pueyaso Rupaa tojiyari. Na tojiniu nuhuaji, Satanásri nimiaa. Nojuajaari puetunu Pueyaso Rupaaajanaa noojiajinia natasano jaariutiaquiaa. ¹⁶Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa

tojiri, jiyano hua na timitaari. ¹⁷Cunoori juhua secaya nujuacaraca moritiano jajau, sai tajinia na moritiano uucua. Majaari na rishiniu. Naajuhua, cuno pueya jaara saniniujiushaare taraatia, jaara naquiya miishaarejuhuaj Pueyaso Rupaa tojijiaa nojori quiniuucua, nojoriiri ritia Pueyasoocua tiuuni tarinitiaja. ¹⁸Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. ¹⁹Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamiicua jiaatiaquiaajaariuhua. Puetunu cunorajanaa, nojoriiri Pueyaso rupaa tojitiaquiaa na numaa shama. Naacuajitij, nojoriiri juhua muetuhua quiya. ²⁰Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajiniata natau, queraatia muetujua, maninia jiyajinia natasano. Cuno maninia natau jiniinjini, noojiaqueyari maja puera na muetunu. Tarajanuuri maninia muetuna. Naajuhua, tarajanuuri jiyano hua queraatia muetujua. Naajuhua, cante Pueyaso Rupaa tojijia cutarani, nojuajaari juhua maninia muetujua natau.

Pueyaso muerasuuri juhua samari
(Lc 8.16-18)

²¹Jesuuri nojori sequerejuhuaj:
—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritiu jaara noshitishaare, morijiuucua morotashiyari, tajiniaaco na cuhuatanura maninia. ²²Naajuhua, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura. Naajuhua, Pueyaso Rupaa jaara nioojiajini jamosaare, juhua muetunutanitari puetunu pueya niquishocoriquianojuanaa. ²³Niajaniya, canapete numaa jiiitiani, nia tojitiare cua pohuatasano.

²⁴Jesuuri naa nojori sequequiaarijuhuaj:
—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutanijahuaj. Naacuajitij, niaa jaara capora quiriquia tamasaata, Pueyasoori socua capora quiniutianiya niaarajuhua. ²⁵Cante na rupaa tojijiani, socua na niishitiojonutanitari. Saniniuujia, canapete na rupaa tojitiaaquiiani, secaya na niishishanoori puetunu jaariutiasaanutanijajanaa.

Miriqui pohuatasano natau moritianojiniji

²⁶Jesuuri nojori sequequiaarijuhuaj:
—Nia niishitiojonu saniriiria taa Pueyaso muerasu supuequiaani, Pueyaso jiiitiasano nojori quiniuria. Tamonu pueyanoori na cuhuariquiajiniata natakaiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetuucaari quiquiaari. Majaari na camaru niishiniu quiquiaari taa na moritiareeni. ²⁸Jiyari tamajaaja moritianiata natau. Coteenu moritiari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiaa na noshiniuria. ²⁹Na natau jaara noshimia, na senoonari na senoojua na racatasocoriquiano. Pueyaso muerasuuri naa miishaanutaniyahua.

Miriqui pohuatasano mostaza jajaujiniji
(Mt 13.31-32; Lc 13.18-19)

³⁰Jesuuri socua sequequiaari:
—¿Juhua casaa niquishanote Pueyaso cumacani? ¿Casaatate pa naata na saniniujiuni, taa Pueyaso Rupaa poonijia

pueya jiuujiajiniani? Quiaritia nia pohuatareeraj. ³¹Pueyaso Rupaari pueya jiuujiajini quiya juhua mostaza jajau. Mostaza jajauri jiyano hua socua shiitianiyojua puetunu tamasa jajaujinijijianaa, majaari puera maatia na niquishaanu. Pueyaso Rupaari naajuhua pueya jiuujiajini, nocua nojori tiuushacari. ³²Mostaza jajau jaara natasaare, maashiyari socua puereetuucaara tamasa nataujini. Na cashacucuaari maashiya puereetucucua. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajini naa cumaacaracajuahuaj, na jataniniuria na tojijia, maninia miiija na quiniuria.

Jesu niishitiojosacari pueya saa na miriqui pohuatasanoataja
(Mt 13.34-35)

³³Jesuuri naa queraatia miriqui pohuatasano niishitiojuaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. ³⁴Naacuajitij, nojuaja jaara casaa niishitiojonu paniquiaari pueya niquira, nojuajaari puetunujuanaa naa niishitiojuaari miriqui na pohuatasano. Tamajaaja nojori quishacari saniniuujia, Jesuuri na saquiriojosano pueya niishitiojuaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniucuanunio
(Mt 8.23-27; Lc 8.22-25)

³⁵Cuno juuca jaara niquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶Cuniquijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejiniata, tee nojuaja quiriquiaacuajani. Jesu quiasacari caminia taquijiria, tamasa boteeri nata jaatequetariquiaajuhua. ³⁷Maja puera na quenaacoyaquishacarijia, maruuri paratuta canashiyaquiji jiyano hua niquiaari nojoriicua nojori niutiasacari. Paratuuri jiyano hua cajiniucuatequiaari mohuaca nojori botejiniacumara. Nocuaji na boteeri tari quera tiuquitiariquiaa mohuacata. ³⁸Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatutacari nojuaja, Jesu sequetureeri:

—iNiishitiojonanaa!, ¿majateeri quia puereenujua paa tari tiuquitiareeni?

³⁹Jesuuri sanemaa. Paratu sequereeri, caminiano:

—iQuia suraajere! iTariucujaja!

Paratuuri tajimiohua. Caminiaari pootia maquee. ⁴⁰Jesuuri na saquiriojosano pueya sequereeri:

—¿Casaara nia puereya puerani? ¿Niaateeri Pueyasoocua tiuyashijiaa quiyajaaruahuaj?

⁴¹Nojoriiri jiyano hua shiriquitiuri. Tama nojoriiaaritia sequetooquiaari:

—¿Cantejaaranononi? iParatu, caminiaari na tojirii!

Gerasa jiyajiniinio samaruharaca pueyanojiniji pohuatasano
(Mt 8.28-34; Lc 8.26-39)

5 ¹Na nuhuaji, nojoriiri caminia taquijiria tiuquijioquiaari, Gerasa jiyajinia. ²Jesu tacasacari botejini, nocua niquiaariiri tamonu pueyano raacajini, macunucua nucuhua paaquiosaquiji. Cuno pueyanoori samaruraca quiquiaari. ³Raacajinia quijia quiquiaariiri. Majaari na naata moronu quishaquiaari quenaaja cumayocua shipinishano casaata. ⁴Pueyari juucua na morojoua, na cashacucua, na juaashiquiacano. Saaja na turojotajaja. Majaari quenaaja na nujuataja pueyano quini quijia. ⁵Pueyaracaanu tuhananuhua rucuanajoquiaariiri, raacajiniano. Na rucuanajosacari sariyacojuaari, juuca, niucuanio. Tama na cuaqueyajaaja piquijia saitiaari. ⁶Nojuaja jaara Jesu niquiquiaari tucuaanu, nocua netequiaariiri. Jesu cariquimijia mojuquetaseeri. ⁷Jesuucua nacareeri:

—¿Casaacua miji quia niyani, Jesunaa, jiyocuacaanu Quijia Pueyaso Niyanunaa? ¡Quia secojijianijia maja naquiya quia miiniuria janiya!

⁸Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

⁹Jesuuri na nequesotaree:

—¿Taa sesanaacatequia?

Na riucaareeri:

—Canaa jiyanoehua queraatiani, cunora cua sesa “Queraatia”.

¹⁰Cuno samaruuri jiyanoehua Jesu secojoriquiaa maja nojori na taanuunura cuno jiyajiniji. ¹¹Cushiyari jiyacari cateca naataja miaquenuuriquiaa tuhuananucari. Jiyanoehua queraatia cushiyari quiriquiaa. ¹²Samaruhuari Jesu secojoree naatej:

—iCanaa quia jiyarore canaa tiuquitianura cuno cushiyacua!

¹³Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitiaaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniucua. Taconiniji totesee caminijianiaari. Puetunujuanaari tii shushiniuquiaari.

¹⁴Cushiya cojuanaari jiyacari netecuaturohua na shiriqiniuitia. Na tiacajinia pueya poojotanusuhua nojori niquishanoori, cuhuariquiacajinia quiniaa pueyano. Nocuaaji pueyari nijioquiaari nojori niqiniuria casaate quiquiaarini. ¹⁵Cuno pueya jaara tiuquijioquiaari Jesu quishaqui, cuno tarijia samaruhuaraca quijia pueyano niqutiushiiri panaatia cajiyano, toqueraca. Naa nojori niquishacari nojuajatej, pueyari pueretiquiaari. ¹⁶Jesu miishano niqutiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. ¹⁷Cunora, cuno pueyari Jesu secotereee na quianuhua cuniquiji, nojori jiyajiniji.

¹⁸Jesu jaara tacaquiaariuhua na botejina, cuno tarijia samaruhuaraca quijia pueyanoori nata quianu paniquiaari juucua. ¹⁹Majaari Jesu paniniu quiquiaari. Na sequeree saajaari:

—Quia quiaarohua quia tijajinia quia pueyacua. Quia pohuatasuhua nojori taa Pueyaso miirii quiajaniani, quiocua na taraajenuucua.

²⁰Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari maninia nojuajani. Puetunu pueyajanaari jiuujiatequiaari nojori tojishacari nojuaja. Cuno diez tiaca sesa quiquiaari “Decápolis”.

**Jairo niyatujiniji pohuatasano,
Jesu toque quiana maajijinijijiuhuaj**
(Mt 9.18-26; Lc 8.40-56)

²¹Jesu jaara niuutiaquiaariuhua botejina caminia taquijiriohua, queraatia pueyari nocua tiuquijioquiaari na quishaqui. ²²Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojojua tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojuquetaseeri. ²³Naa Jesu secojoree jiyanoehuari:

—iQuiyatu quera soyola! iMiji, quia juaashiquia nocua quia niaquee na naatanuhua!

²⁴Jesuuri jiyacari nata quiaaree, na saquiriojosano pueyano. Puera jiyanoehua queraatia pueyari na nuhuajiriquiaa. Jesu tanuujuturiquiaari. ²⁵Cuno pueya tajinia quiriquiaaariuhua tamonu cusosu maaji. Doce marijaari tari na shoconujuquiaari pueyaracaanu na naatesacari. ²⁶Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuaana na cumaneeca puecaquiaariiri na naarajosaaanura juucua. ²⁷Cuno maaji jaara Jesujiniji tojiquiaari, na ninijini na nuhuajiquiaari jiyasohuari. Na tucuaque toque quiaasee pueya tajiniaari. ²⁸Cuno maajiiri tama sequequiaarijiaaja: “Janiya jaara quenaaja na toque quiareni, janiyari naatanutaniuhuaani”. ²⁹Naacuajitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaarijia: “iCua cusonu tari tajiyatema!” ³⁰Jesuuri jiyacari niishiqui

nojuaja na cumaacata cusosu naatanirii. Cunora, nojuajaari tacareecuaree na niqiniuria pueya. Pueya nequesotareeri:

—¿Cante cua toque quiareeni?

³¹Na saquiriojosano pueyari na sequeree:

—Quiaacuaajaari queraatia pueya niqiyia quia tanuujiyano. Quiaari najuhuaana nequesotaariquiohua saajuhujaj: “¿Cante cua quiareeni?”

³²Jesuuri saaja na shocuaqueya niqiniuriquiaa, na niqiniuria cante na toque quiareeni. ³³Maajiiri jiyacari tetecariquiaa na puerenuta. Jesu cariquimiaji mojuquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujuanaari. ³⁴Na nuhuaji, Jesuuri na sequeree:

—Sanaanaa, cucua quia tiuuniucua, quiaacuaaja tari quia cusonujiniji naatarohua. Juhujaniya quia quiaarohua. Quia cusonucuaaja tari tajiyatemohua quiocuaji.

³⁵Jesuuri cuno maajiicua pocuariquiaaja pueya tiuquijiosacari Jairo tijajiniji. Cuno pojoriiri maaji samiriu que sequetusee: —iQuia niyatu tari cusoque! Maja najuhuaana Niishitiojona rinii quia tijajinijia.

³⁶Jesuuri nojori sequesano tojirii. Naaratej, maaji samiriu que sequereeri:

—iMaja puerenu! iCucua quia tiuuri saaja!

³⁷Majaari Jesu paniniu quiquiaari tamasa quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. ³⁸Nojori jaara tiuquijioquiaari Jairo tijajinia, pueya niquishii nujuquetiuyanoori, sariyocuatuyanonio. ³⁹Jesu jaara tijajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰Pueyari saaja Jesu saroojotaquiaari nojuaja na rerequetenuta, naa nojori na sequenuucuatej. Jesuuri cunora nojori tohuatanijioree tijajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata quitiuriquiaani. ⁴¹Macu juaashiquiaajiniji quiaaseeri. Na sequereeri:

—Talita, cumi.

Nioori pueyano rupaaajinia sequeya: “iMaaji samiriuniaa, quia sequeyanijia, quia sanere!”

⁴²Jiyacaritij, maaji samiriuuri ritia sanequee. Juhucatecara rucuanereeri. Doce marijaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanoehua jiuujiatequiaari. ⁴³Jesuuri jiyanoehua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuaara mianuutesaaria.

Jesu quishacari Nazaret tiacajinia
(Mt 13.53-58; Lc 4.16-30)

6 ¹Jesuuri cuniquiji quiaquiaariuhua tama na jiyajiniohua-jaaja. Na saquiriojosano pueyari nata quiojoquiaarijiuhujaj. ²Jaara quiquiaari samaatenu juuca, Jesuuri tii niishitiojonu coteequiaari Pueyaso secojojua tijajinia. Queraatia pueyari na tojititariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacano, jiyajeneta miishano na miiniuriani? ³Nojuacuajaari suruhuatujiniji casaa shipinijiona tijajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocua: Santiago, José, Judas, Simónnio. Na rimiatuhuari niya quiyajuhujaj pa tiacajiniani.

Cunora, majaari nojori tojtianu paniniu quiquiaari Jesu. ⁴Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujunia tojinii paniquiaa cutara. Saaja tama na

tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhua, tama na tiajinia quiniaajaajanio.

⁵Naacuajitij, nocua nojori tiyaquiniuucua, majaari na naata na cumaacata na miiniu quiquiaari. Saaja secaja cusosuhua niojoquiaari na juaashiquiaari, nojori na naatanijionura.

⁶Jesuuri jiuujiatequiaari nojori tiyaquishacari nocua. Na nuhuaji, Jesuuri rucuanajoquiaari pueya na niishitiojonura, queraatia shiitianiyojua tiacajinia catecaja na tiaca shocua.

**Jesu jiyaramiquishacari na saquirojosano pueya
Pueyaso rupaa pohuatanura
(Mt 10.5-15; Lc 9.1-6)**

⁷Na nuhuaji, Jesuuri na saquirojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqitioree na cumaacari samaruhua nojori tohuatanijionura pueyajiniji. ⁸Nojori sequereeri maja nojori panura nojori panishano, saaja nojori miojotu cutara. Nojori sequereeariuhua, maja nojori panura caashoque, coseyaca, cumaneecano. ⁹Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰Nojori sequereeariuhua:

—Niaa jaara tiuquishiquia tamonu tiajinia, cuniquijia nia jiyoyetare, niaa jaara cuniquiji quiaarejaatijia. ¹¹Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacarijuhuaj, niocua cuniquiji quiaare. Niocua nia nioluacaacuaji jiya joocua piitiare nojori niquiara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniuucua.

¹²Na nuhuaji, Jesu jiyaramiquishano pueyari quiojoquiaari. Nojori Pueyaso rupaa pohuatanuquiaari pueya tacatonuhua nojori jiuujia Pueyasocua. ¹³Nojori queraatia samaruhua tohuatanijioquiaari. Naajuhua, nojori cusosuhua tarooquiaari naana jajau shiyocua, nojori naatanijiosacari queraatia pueya.

**Tiuquinijiona Juan mosacari
(Mt 14.1-12; Lc 9.7-9)**

¹⁴Jesu miishanojinijiri caminiujiushaquiaari puetunu cuno jiyajiniajanaa. Naacuajitij, Galilea jiya jiyaniijia Herodesri Jesujiniji pohuatasaaquiarjuhuaj. Herodesri cunora sequequiaari:

—iTiuquinijiona Juanqui samiitarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanhua cumaacaraca Jesu quiniuucua. ¹⁵Tamasaca pueyari Jesujiniji sequequiaari tamaatia saniniujia, nojori jiyajenesacarijuhuaj. Naa sequetiquiaari:

—iNojuacuajaari tariucuaaanu pueyara Pueyaso sequesano caminiujiumia Elfas!

Tamasaca pueyari saniniujia naa sequequiaari, nojori jiyajenesacarijuhuaj:

—Nojuacuajaari quiarjia nio pa quishacari Pueyaso sequesano caminiujiumia pajaniyara, juhua tariucuaaanu pueyara Pueyaso sequesano caminiujiumiajuhuaj.

¹⁶Herodes jaara pueya sequesano tojiquiaari, nojuajaari saa sequequiaari:

—Nojuacuaja Tiuquinijiona Juan, cana cua nacataniquianucujani. Samiitarohuacuaaquiri.

¹⁷Tiuquinijiona Juan moyaquishacarijia, nojuajaari Herodías rupajinia nujuatesaaquiaari. Cuno maaji Herodíasni, nojuajaari Herodes* tarajanu Felipe niqiuocua quiquiaari coteenu. Herodesri tarajanu Felipe niqiuocua jariutiaquiaari necocuara. ¹⁸Nocuaji, Tiuquinijiona Juanri Herodes nacasujua. Naa na sequejaari:

—iPueyasora, majaari maninia quia jiitianura quia tarajanu niqiuocua!

¹⁹Cunora, cuno maaji Herodíasri maja na niqiniu paniniu quijia Tiuquinijiona Juan. Na monu panijiaari. Majaari na naata quiquiaari saaja. ²⁰Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojijia pueyano, maja sesa miijia. Naaratej, Herodesri maninia na cojuateja nujuatejojuajinia. Majaari na shanacuan quiquiaari sesa na miishaanura. Herodesri Tiuquinijiona Juan pohuatasano tojiniu maniniucua. Nojuajaari saaja noojia niqijijoteja quiquiaari. Majaari na niishiniu quijia taa na miiniutianiyani. ²¹Saniniujia, cuno maaji Herodíasri pueyaracaanu niishiriojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajinijinio jiyaniijianucua masuquiaari, tama na soldadohua jiyaniijianucuaajaajanio. ²²Jiyacaritij, Herodíasri niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyadoo nianujunu shuquiritiaquiaari jiyanhua. Nata miaquena pueyari jiyanhua na shuquiritiaquiaarijuhuaj. Naaratej, jiyaniijia Herodesri niyadoo sequereeri:

—Cua masere quia panishano. Janiyacua quia niqitioreni. ²³Herodesri socua puetunu pueya niquiarajanaa na sequerohuacuhua:

—iSeetanujuanaa quia sequeyanijia, maja cua sapojonu! Janiyari quia niqitionutaniya quia masesanoni. Quiaa jaara cua masere cua jiitiasano cajiniocua, naajaa, janiyari quia niqitionutaniyani.

²⁴Niyacoori tohuataquee na nucua Herodías na nequesotanura. Na sequeeri:

—Cua nucuaa, ¿casaa cua masenutaniya cua quenuni? Na nucuaari na sequereeri:

—iQuia masere Tiuquinijiona Juan naca!

²⁵Cuno niyacoori ritia tiuquiquihua jiyaniijia Herodes quishaqui. Na sequereeri:

—iQuiarijia cua niqitiore Tiuquinijiona Juan naca miacojuajinia!

²⁶Naa jiyaniijia Herodes tojishacarijia, jiyanhua taraajequeri. Naajaa, seetanujuanaa na sequenuucua na masusano pueya niquiara, majaari tari na naata ruuretanu quiquiaari cuno niyadoo masesano. ²⁷Naaratej, jiyaniijiaari ritia jiyaree na soldado, Juan naca na niqitionura cuno niyadoo. ²⁸Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyadoo na niqitiosuhua. Nojuajaari na nucua na niqitiose saniniujia.

²⁹Tiuquinijiona Juan pueya jaara na niishiquiaari, na maanu patuquiaari, na jamotusocoriquiano.

**Jesu mianuutesacari cinco mil pueya
(Mt 14.13-21; Lc 9.10-17; Jn 6.1-14)**

³⁰Jesu jiyaramiquishano pueyari tiuquijioquiaariuhua Jesuucua nojori rucuanefonu nuhuaji Pueyaso rupaa nojori pohuatanura. Nojori Jesu pohuataquiaari puetunu nojori miitiushanojuanaa, nojori niishitiojosanojinijinio. ³¹Na nuhuaji, Jesuuri nojori sequereeri:

—Miji, pueya quiaquishaqui pa quiaare tamaqui, tii pa samaatenura rupaquijia quenaaja.

Jiyanhua queraatia pueyari pueyaracaanu nojoriicua nijioriquiaa. Tamasacaari quiojoriquiohuacuaa. Tamasacaari saniniujia shusha tiuquijioriquiaacujua. Naaratej, majaari jeya nojori quiniu quiquiaari na miaquenura quenaaja.

³²Jiyacaritij, Jesuuri saaja na jiyaramiquishano pueyata quiaquiaari botejinia, pueya quiaquishaqui. ³³Queraatia pueyari saaja nojori niqitiuri quiaano. Cuno pojori Jesu niishitiquiaari. Naaratej, puetunu caminia shuriquico

tiacajinijijianaa pueyari netecuatuquiaari. Nojoriiri Jesuucuaaji cutesee. ³⁴Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua* quiriqiaa.

Naaratej, Jesuuri nojori niishitiojonu coteeree queraatia casaa Pueyasojiniji. ³⁵Jaara quiquiaari tari tenacari, na saquiriojosaano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. ³⁶Pueya quia sequere, nojori cuara quiojora cateca naataja tiacajinia, na miaquesocoriquiano nojori masenura tii.

³⁷Jesuuri nojori riucaaree saaja:

—Niaa mariqui nojori miaquetereja saniya.

Nojoriiri na sequere:

—¿Quiaateeri paniya queraatia pan masenucua canaa quianura puetunu cuno pojoriirajanaa? iPaa mianuutenura nojori, panishiyari dosciento cumaneeca! Majaari pa jiitianu.

³⁸Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

³⁹Jesuuri jiyacari na pueya sequere nojori cajitijionura pueya jiyasocujinia, na mianuutesocoriquiano. ⁴⁰Pueyari cajitiri cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹Jesuuri cuno pan pataree, sapitiaajanio. Na nuhuaji, jiyocuacaanu maureeri Pueyaso na seccionura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreerejaariuhua puetunu pueyarajanaa. ⁴²Puetunu pueyajanaari maninia miaquenuquiaari. Maninia tooquioreerejaariuhua. ⁴³Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio. ⁴⁴Cinco mil pueyari cuno panjiniji miaquenuunaa quiquiaari.

Mohuaca caco Jesu rucuanenujiniji pohuatasano

(Mt 14.22-27; Jn 6.16-21)

⁴⁵Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajinihua. ⁴⁶Pueya jaara tari quiojoquiaariuhua, Jesuuri tuhananuucua tacaquiaari tii na seccionura na Que Pueyaso. ⁴⁷Jaara niniquiaari, boteeri tari caminia jiuujiajinia jaaretariquiaa. Jesuuri juhuanajuaja na jateesaqui quiriqiaajaa. ⁴⁸Jesuuri nojori niquiquiaari najuhuaana juarioconuyano. Majaari nojori naata jaaretanu quiriqiaa, puera paratu piyarojosacari nojoricuara. Quera juhuaquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. ⁴⁹Nojori jaara na niqutiuhuaari mohuaca caco canujiyano, nojoriiri na jyanituhuaari samaru. Nocuaaji sariyocatureeri. ⁵⁰Puetunu nojorijianaari na niqutiuri. Shiriquitiuriiri. Jesuuri ritia pocuaree. Nojori sequereeri:

—¿Casaara nia puereyani? iNioojia nia cumaquiri! iMaja pueretunu! Janiyacuajinjia.

⁵¹Botejinia tacasee nojoriicuaari. Paratuuri jiyacari pueyajequee. Nojoriiri na shootariquiaa tacuriitia, jyanohua na jiuujiatenuta. ⁵²Nojoriiri juhuanajuaja maja na niishini quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaaari juhua ninishiqui quiquiaarjia.

Jesu naatanijiosacari cusosuhua Genesaret jiyajinia

(Mt 14.34-36)

⁵³Jesuuri na pueyata caminia niutiaquiaari. Tiuquijioseeri Genesaret jiyajinia. Nojoriiri tii morotasee na bote. ⁵⁴Nojori

jaara tohuareetaquiaari botejiniji, cuniquijinio pueyari ritia Jesu niishiquiaari. ⁵⁵Pueyari jiyacari netecuatuquiaari, Jesujiniji nojori pohuatanura puetunu cuno jiyajinijanaa. Cusosuhuari juhuaacatecara patootasaaquiaari na matucujinia tee Jesu quiriqiaa na rucuanajosacari nojori jiyajiniacuajani. ⁵⁶Tiquiyocua Jesu rucuanajosacari, cusosuhuari nocuaji nojotasaquiaari nucuaco, tuhuaqui tiacajinia, queraatia shiitianiyojua tiacajinijuhua, cuhuariquiacajiniano. Pueyari Jesu secorejoree cusosuhua na quietenura quenaaja na toque casaca. Canapuete na toque quiaquiaarini, puetunu nojorijianaari na cusonujiniji naatacoquiaariuhua.

Casaate sesoriquiara pa jiyateja Pueyasarani

(Mt 15.1-20)

7 ¹Jesuucua catecanoquiaariiri Fariseocuaca, Moisés Rootasanojiniji niishitiojonaano, canapuete Jerusalén tiacajiniji nijioquiaaricuajani. ²Cuno pojori quishacari tii, nojoriiri noojiaqueya Jesu pueyajinijinio niquiquiaari shuquitiojua miaqueyano. Nojoriiri jyanijia, nojori rucuanajosacari sesa miijia pueya tajinia, sesa nojori quini na naata nojoriicua pacunu. Nojoriiri cunora shuquitianu jiitiquiaari, nojori jyanishacari nojori jiuujia naasucua curuushiniutianiya, shuquitiojua nojori miaquesacari. Naaratej, cuno pueyari Jesu pueya pocuanu coteequiaari. ³Cuno Fariseocuaca, puetunu narta Judiocuacajanaano, nojoriiri maja na cartenu quijia tariucuacaanu nojori supuetanaa niishitiojosaano. Naaratej, majaari nojori miaquenu quijia shuquitio. ⁴Naacuajitij, nojori jaara miaquesano niqitiojosajiqi tacatequiohua, majaari nojori miaquenu shuquitiojua. Socua queraatia quiyari cuno pojori niishishano. Naacuajitij, nojoriiri jyaniquiaa, sesa nojori quiyaguiniuucuaaji Pueyaso niqiuara, nojori cuara na ratujua jeequejora, pataco, coshi, na maquetucuanio. ⁵Naaratej, Fariseocuaca, Moisés Rootasanojiniji niishitiojonaano, nojoriiri Jesu nequesotaquiaari:

—¿Casaara quia pueya tojtiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶Jesuuri cuno pojori riucaaree:

—iNiaari sapuenu juhua maninia pueya niquishano!

iNiaacuajaari seetanujanaa sesa miijia! Pueyaso sequesano caminiujunia Isafasri maninia sequequiaari nijaniyajinjicuaaja, naa na naajiotasacari Pueyaso sequesano:

“Nio pueyari saaja na rupaata shuquitiaa janiya. Nojori jiuujiaari saniniujia tucuacaanu quiya janiyajinjia.

⁷Nojori miishano quiriani, cunoori najuhuanaj. Naa nojori miishanoni, majaari na shuquitini janiya.

Nojori niishitiojosanoni, cunoori tama pueya

niishitiojosanojuaaja, maja cua sequesano”.

⁸Niaari cua pueya pocuariquiaa. ¿Niajanियariuhua? ¿Casaara Pueyaso sequesano nia tojiyaquiquiaanjia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

⁹Jesuuri socua naa sequequiaari cuno pojoritij:

—Tama nia miiniujitishanoocua nia miiniurijajaaja, iniaari Pueyaso sequesano shocortaa saaja! ¹⁰Moisés cuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuara mosaaria”. ¹¹Niaari sequeya saniniujia, maniniacuaja, pueyano jaara na que, na nucua sequere: “Maja cua naata naacutanu nijaniya cua casamitia. Janiya tari Pueyasora jiyateree puetunu cua jiiitasanojuaanaani”. ¹²Niaari sequequiaajuhua, pueyano jaara naa sequeretej, maniniacuaja maja na naacutanura na que, na nucuanio. ¹³Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanojuaaja nia supuetanaajiniji caminiujishano. Niaari socua queraatia casaa miiquiaa juhua cunohuaaj.

¹⁴Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu nijaniyajanaa, maninia nia niishiniuria. ¹⁵Casaa pa miaqueyani, Pueyasora naajaa. Cunoori maja na naata pueyano jiyatenu sesa miijara. Poojiajinia pa niishiriojosano cutaraari sesara pa jiyateya Pueyasora. ¹⁶Cante numaaracani, nojuaja cuaara tojitiara cua sequesano.

¹⁷Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. ¹⁸Jesuuri nojori sequere:

—¿Niaateeri cua sequesano niishiyaquiyajuhua? ¿Majateeri nia niishini? Puetunu pa jiniacuma tiuquijajanaani, cunoori maja na jiyatenu sesa miijara pajaniya. ¹⁹Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiyaari pa marecuhuacuma.

Nio sequesana, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. ²⁰Jesuuri sequereehuhua:

—Pueyano niishiriojosano sesa noojiajiniani, cuno cutaraari sesara na jiyatequiaa. ²¹Pueyano jiuujiajiniji supueya cutaraari sesa niishiriojosano, sesa na miiniuria. Naacuajitij, pueyanoori na camishoo maajipohua numuetucujua, seya numuetucujahuaj. Tamonu pueyano casami nohuasejoquiaari. Pueya moquiaajaariuhua. ²²Narta pueyano niuquocua numuetucuaquiaari. Tamonu pueyano casamiica jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miini jiiitishanota. Narta pueyano miananajoquiaari. Tamonuucara tonujuquiaari. Naajuhua, saaja tama na cuaqueyajaaja shuquiritiaja quiquiaari. Juhuaajaniya sesa miiquiaajaariuhua, moseeca na quiniucua. ²³Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijara pueya jiyateja Pueyaso niquiara.

Taatu tiuushacari Jesuucua

(Mt 15.21-28)

²⁴Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniiji, tee na quiyani. Naajaa, majaari na naata jamaani quiriquiaa. ²⁵Tamonu maajiri ritia Jesujiniiji niishiquiaari. Neyatuuri samaruraca quiriquiaa. Naaratej, maajiri Jesuucua niquiara. Na cariquimiaji mojuquetaseeri. ²⁶Cuno maajiri Sirofenicia jiyajinijinio taatu quijia. Jesu secoseeri samaru na tohuataniniuria neyatujiniiji. ²⁷Jesuuri maaji sequere miriqui:

—Quia tarinitiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸Maajiri Jesu riuuaree:

—Jaa, Jiyaniijanaa. Naajaa, sareyacuaajaari miaqueja cariquiacoji tatucuaaja, muerasu totinijosano miaquesano shiriya.

²⁹Jesuuri na sequere:

—iQuiaacuaja maninia cua riuuaree! Quia tacateyarohua. Samarucuaajaari tari tohuataree quia niyatujiniiji.

³⁰Maaji tiuquishacariuhua na tiajiniohua, neyatu riuratasuhuari na maquetujinia mataano. Samaruuri tari tohuatano quiriquiaa nocuaji.

Jesu jeeacasacari numueeju, tiquia pueyano

³¹Jesuuri tacatequiaariuhua Tiro tiaca shocua jiyajiniiji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. ³²Tii na quishacari, nocua jaatucusaquiaariiri numueeju, tiquia pueyano. Na jaatucuaari Jesu secojotuquiaari na juaashiquia na nianura nocua, na jeeacanura cuno pueyano. ³³Jesuuri

pueyano numueeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquiajiniajaaja riocoreeri. Na riacau cojuata pocuaashijia niti quiareeri. ³⁴Jiyacaritij, jiyocuaaanu maureeri. Noojia niareeri. Na nuhuaji, cusosu numaa sequereeri:

—iEfata!

Nioori pueyano rupaajinia sequeya: “iQuia riatere!”

³⁵Jiyacaritij, numueeju numaari riataqueque. Na nitiiri

jeequequeehuhua. Ritia pocuaquee maniniaari. ³⁶Jesuuri cuno pojori rootaree maja nojori pohuatanura na jeeacasano pueyanojiniji tamasa niquiara. Nojoriiri saaja tiquiyocua pohuatanuquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura.

³⁷Pueyari jiyanohua jiuujiatequiaari Jesu miishano na niqitiushacari. Tama nojorijiaarijia sequetooquiaari:

—iPuetunujuanaa miya maniniaari! Numueejunucua jiyateya tojitiyacaraari. Tiquianucua pohuateyajaariuhua.

Jesu mianuutesacari cuatro mil pueya

(Mt 15.32-39)

8 ¹Jiyacaritij, jiyanohua queraatia pueyari rerejoquiaari Jesu na tojitanura. Majaari nojori jiiitanu quiquiaari casaa quenaaja na miaquetusocoriquiano. Jesuuri na saquiriojosano pueya piiri. Nojori sequereeri:

²—Nio pueyacu taraajeyanijia. Nojori tari jiuujianaraca juuca quiya niya cuata. Majaari quenaaja nojori jiiitiatunu miaquesano. ³Janiya jaara nojori jiyaramiquiriohua na tiajinia miaqueyojuani, nucuaco cusojoniuyarohuacua. Noojiaqueya nojorijinijinioori niyara nijiorucuaa tucuaaanuji.

⁴Na saquiriojosano pueyari na riuuaree:

—¿Paatucua taa miaquetere nojori niyani, pueya quiaquishaquini?

⁵Jesuuri nojori nequesotaree:

—¿Taa pan nia jiiitiani?

Nojoriiri na sequere:

—Nareja siete.

⁶Jesuuri na pueya sequere, nojori cuaara sequeera puetunu pueyanaa nojori cajitiumiuria. Na nuhuaji, Jesuuri cuno siete pan pataree. Pueyaso secoree nocuaari. Na nuhuaji, na saquiriojosano pueyara na neecasereeri. Nojoriiri saniniujuia pueya na serotaree puetunujuanaa. ⁷Secaja sapitiaaja jiiitaturiquiaajaariuhua. Jesuuri socua nocuaa secorohuacuuhua. Na nuhuaji, na pueya sequereeri nojori niqitiojonura pueya. ⁸Puetunu pueyanaari maninia miaquenuuree. Tooquierejaariuhua. Miaquesano curenota mishinijosaaquiaariiri siete canaasatu. ⁹Na miaquena pueyari quiquiaari cuatro mil pueya. Na nuhuaji, Jesuuri nojori sequere nojori quiojonuhua. ¹⁰Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

Fariseocuaa niquiniu panishacari Jesu

miishano Pueyaso cumaacata

(Mt 16.1-4; Lc 12.54-56)

¹¹Fariseocuaari Jesuucua tiuquijioosee. Nata juayonuutaseeri.

Nojori saniniujuniuria Jesu, nojoriiri na sequere juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujanaa Pueyaso Jiyarosano. ¹²Jesuuri noojia niaree na taraajenuta. Sequereeri:

—¿Casaara nio pueya niquiniu paniya Pueyaso cumaacata miishanoni? Seetanujanaa nia sequeyanijia, majaari cua niqitini quiniutianiya nijaniya cua cumaacata cua miishano.

¹³Jiyacaritij, cuno pojori tiujiaqueeri. Na pueyata botejinia tacataarohuari. Caminia taquijiria niutiareeri.

Jesu numootesacari na pueya Fariseocuaa niishitiojosanoocuaaji

(Mt 16.5-12)

¹⁴Jesu pueyari na coseyaca niyajatatuquiaari. Nareja niquiriyatujua panniyojua jiiitaturiquiaa botejiniaari.

¹⁵Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijihuaj.

¹⁶Majaari na pueya niishiniu quiriquiaa naa Jesu sequesacari-tij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniucua pa sasocoriquiano.

¹⁷Jesuuri na saquiriojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanajuaja nia niishiniu tamonu juuca cua miishanojiniji? ¿Niaateeri cumajiuujiaacato, maja nia niishiniuria? ¹⁸¿Majateeri cua miishano nia niquiniu quiquiaacuaja nia namijiata? ¿Majateeri nia tojiniu quiquiaa nia numaatajuhuaj? ¿Niaateeri ritia niyaretarucuaa cua miishano? ¹⁹Janiya jaara cinco pan neecasecanu cinco mil pueyatej, ¿taa canaasatu nia mishinijiocanu miaquesano curenotani?

Nojoriiri na riucaaree:

—Doce.

²⁰—Naajuhuaj, janiya jaara siete pan neecaserucuaa cuatro mil pueyatej, ¿taa canaasatu nia mishinijiorucuaani?

Nojoriiri na riucaaree:

—Siete.

²¹Naaratej, Jesuuri nojori sequereere:

—¿Majateeri juhuanajuaja nia niishiniu naa cua miishanojinijitij? Jiyacariti nojoriiri Jesu sequesano niishiquii.

Jesu jeeacasacari cariojuaru pueyano, Betsaida tiacajinia

²²Na nuhuaji, Jesuuri Betsaida tiacajinia tiuquijioquiaari na pueyata. Tii na quishacari, Jesuucua jaatucusaquiaariiri cariojuaru pueyano. Pueyari Jesu secojotiquiaari cuno cariojuaru namijia na quianura quenaaja. ²³Jesuuri cariojuaru quiaree na juaashiquiajiniji. Tiaca jiyaquiria na jaatucuyareeri. Cariojuaru namijia piquiojoree na riacautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

²⁴Cariojuaruuri niquiniu sanirii. Jesu sequereeri:

—iJaa! iPueya niquiyaniija, juhua nacuhua rucoyano!

²⁵Jesuuri socua pacuterohua na juaashiquia nianu cariojuaru namijiaacua. Cariojuaruuri niquiniu saniriohuacu-huaj. Jiyacaritij, tojetaarucujanaa maninia niquijiaa quiquiri. ²⁶Jesuuri na tiajinia na jiyarorohua. Cariojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajaniya.

Pedro sequesacari, Jesu seetanujuanaa Pueyaso Jiyarosano

(Mt 16.13-20; Lc 9.18-21)

²⁷Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸Nojoriiri na riucaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacuaja quiaanaari supuetana Elías. Naajuhuaj, tamasaacari quia sequequiaa, quiaa naasucuaanaari tariucuaanu pueyara Pueyaso sequesano caminiujunia, samiitianohuatuhua.

²⁹Na nuhuaji, Jesuuri nojori nequesotaree:

—¿Niajanijarijataj, taa nia sequeyani, cante janiyani?

Pedroori na sequereere:

—Quiajanijacuaja Cristo, Pueyaso Jiyarosano.

³⁰Jesuuri nojori rootaree maja nojori pohuatanura tamasa-ca niquiaru nojuajiniji Pedro niishishano.

Jesu numootesacari na pueya, nojuaja mosaanutaniya

(Mt 16.21-28; Lc 9.22-27)

³¹Jiyacaritij, Jesuuri na pueya niishitiojonu coteequiaari tama nojuajinijiaaja, taa Pueyaso Niyanu miishaanutaniya jiyanhua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojitiaaquiniutia-niya, pueyacuara Pueyaso secojonaa jiyaniijianucujahuaj. Naajuhuaj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhua.

³²Jesuuri naa seetanujuanaa nojori sequequiaari. Na pohuatanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqui na nacasuree maja naa na pocanuratej. ³³Jesuuri na nijiniara tacatequee saaja. Na saquiriojosano pueya na niquiniutia, Pedro sequereeri:

—iCua shuriucuaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

³⁴Naa na sequenu nuhuajitij, Jesuuri na saquiriojosano pueya piirii, puetunu cuniqui quiniaa pueyajanaano. Nojori sequereeri:

—Pueyano jaara cua tojijiaa quiniu paniri, nojuaja cuara niiria cucua, seetanujuanaa nojiata na panishacari janiya. Nojuaja cuara niyajetaara tama na cuaqueya na cojuanurajaa-ja. Cuara cucua panitiaara tama na cuaqueyajaaja.

³⁵Saniniuujia, cante tama na cuaqueyajaaja shuquiritini panijiani, na nuhuaji, nojuajaari jiyanhua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajinijihuaj, cuno pueyano cutaraari pueyaracaanu quiniutianiya shuquiriaatia. ³⁶¿Niaarate maninia, pueyano jaara puetunu nio jiya casamijianaa jiitiare, na nuhuaji na sohanu jaara jataaare mani quiquiojinia pueyaracaanura? ³⁷¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata.

³⁸Cante cua rupaa pohuatanu caririquiya sesa miijiaa pueya niquiaru nio jiyajiniani, janiyari nojori caririquiniutianiyajacu-huaj. Naajuhuaj, cante caririquiya mijiria quiniaa niquiaru sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuaj. Janiyari jiyacari cua Que cumaacata jiyocuaanuji tacatenutaniuhua, maninia miijiaa cua Que seyatajuhuaj.

9 ¹Jesuuri nojori sequequiaarijihuaj:

—Seetanujuanaa nia sequeyanijia pueyanaa. Noojiaqueya niya quiniaajinijinio quiarijiani, majaari nojori cusonuunu quiniutianiya juhuanajuaja, nojori cuara niquirijiaatijia Pueyaso cumaaca tiuquiyano cucua, na muerasu jiitiriqiano-ni.

Jesu jatasacari shacantuucara

(Mt 17.1-13; Lc 9.28-36)

²Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaariiri Pedro, Santiago, Juannio. Jesu quishacari tuhuananujiniji, na cuaqueyari tamaatiuucuaa jataquiaari nojori niquiaru. ³Na toqueeri shacantuquera jataquiaari, socua jiyanhua cohuajara sohanatuujiniji. Nio jiyajinia toqueya jeequejonaari maja na naata jiyanhua cohuajquera toque na jiyatenu, taa Jesu toque jataquiaaricuaani. ⁴Jiyacaritij, nojoriiri supuetana Elías niquitiuquiaari, supuetana Moisésjuhuaj, Jesuta pocoojijano tii. ⁵Jiyacaritij, Pedroori Jesu sequereere:

—Niishitiojonanaa, icanaa namitia niya quiyani! iCanaacua niaacuaji shuorojoreni: quia, Moisésra, Elíasranio!

⁶Jesu pueyari shiriqitiuriquiaa. Nocuaji Pedroori naa juhuajaniya pocuariquiaa. Majaari na niishiniu quiriquiaa casaa na pocuariquiaani. ⁷Jiyacaritij, jiyocuaanuji cohuaja najacaari nojoriicua rosequiaari. Cohuajaaari nojori mishiquioma. Cohuaja najacajiniji, Pueyasoori tojishaaree pocuaano. Naa sequequiaaritij:

—iNiocuaa cua Niyanuniyojua, cua shuquiritiasano! iSaaja nojuaja nia tojiri!

⁸Jiyacaritij, nojori jaara ritia niqunijionuuquiaari na shocuaqueya, majaari quenaaja tamonu na niqutiuniu quiquiaari socua. Saaja Jesuuri tamajaaja quiriquiaa.

⁹Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhuaa tamasa niqiuara nojori niquishano. Jesuuri nojori sequequiaari cuara noojiajinia racatatuura, nojuaja jaara samiitiarohuajaatijia.

¹⁰Cunora, tama nojorijiaaritia maninia racataquiaari noojiajinia nojori niqutiushano. Maja cutaraari nojori niishitiuniu quiquiaari, casaara naa Jesu sequeere nojorini “cua samiitasacariuhua”. ¹¹Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojanaa sequequiaa-cuaraarini, Elíasna coteenu tiuquiniutianuhua Pueyaso Jiyarosocoriquianoocuaqi?

¹²Jesuuri nojori riucaaree:

—Seetanujuaaacuquinatejaj, Elíasri coteenu tiuquiriquiaa-no quiquiaari, puetunu cucuaji jeenucuariquianojuanaa. ¿Niaate niishiya casaara tariucuaaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhua?”.

¹³Janiyari seetanujuaana nia sequeyani, Elíascuajaari tari niqiuari. Pueyari naquiya na miiquiaari taa nojori paniquiaari-cuajani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuaana tari naa miishaaquiariiri.

Jesu tohuatesacari samaru, caya samijiajiniji

(Mt 17.14-21; Lc 9.37-43)

¹⁴Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii quituriquiaajaariuhua Moisés Rootasanojiniji niishitiojanaa. Nojoriiri Jesu pueyata juayonuutariquiaa.

¹⁵Pueya jaara Jesu niqutiuhuaari, puetunu pueyajanaari nocuaji jiuujiatequiaari. Nojoriiri nocua netecuatuquiaari na saruhuatanura. ¹⁶Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷Tamonu cuno pueyajinijinioori Jesu riucaaree:

—iNiishitiojananaa, quiocua nitiaaree quiyanunijia! iSamaru jiiitaano! iSamaruuri na jiyatequiaari tiqiuara! ¹⁸Tiqiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiaa miaquequiaajaariuhua. Na nuhuaji, pootia maquiaari juhua macu. Quiyanuuri cunora sasacara quiyaree. iSocua piriuquiniutianiyari! Janiyacuajaari tari sequeere quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiquiaa.

¹⁹Jiyacaritij, Jesuuri naa sequeere:

—iNiaaqui Pueyasocua tiyashijiacaja! ¿Janiyatucua pueyaracaanu nia jiiitariquiiani? ¿Janiyateeri pueyaracaanu nia rejeretanunijiaaniuhua? iMiji nia jaatucure cuno caya samijia!

²⁰Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niqiuara. Tii taquiriocuariquiaari. Na rupaamajiiri cushaariquiaa. ²¹Jesuuri caya samijia que nequesotaree:

—¿Taaari na coteecanu naa na quiniuria juhuacatecarani?

Na queeri Jesu riucaaree:

—Na naatujajiniji naa quijiajuhuanajaj. ²²Na cusojuanura juucua, cuno samaruuri sequeyarucua na pojotequiaa manijinia, moojinijuhua. Naaratej, ijaara quia naata quiri, canaacua quia taraajere quenaaja! iCanaa quia naacure!

²³Jesuuri na sequeere:

—¿Casaara naa quia sequeere janiyani, “jaara quia naata quiri”? Cante Pueyasocua tiyua noojiata seetanujuaana, nera miishiyari puetunu na panishanojuanaa.

²⁴Jiyacaritij, caya samijia queeri nacaree:

—iJaa, quiocua tiyanijia! iCua naacure socua cua tiuuniuria quiocua!

²⁵Jesu niquishacari queraatia pueya nocua rerequeejiano, ritia samaru sequeereeri:

—iTojiyashijia, tiquia samarunaa, janiya quia sequeyani, quia tohuatate nio caya samijiajiniji! iPuetunu quia tohuatatejanaa! iMajaari socua quia tacatenuhua, nocua quia tiuquiniuhua!

²⁶Samaruuri sariyocuaquee. Caya samijia taquiriocuaterohuariuhua. Na tohuatesacari caya samijiajiniji, juhua macu na tiujiaqueeri. Nocuaji, queraatia na niqutianaa pueyari sequequiaari: —iJuaj! iTari cusoquee cutaratej!

²⁷Jesuuri na juaashiquiajiniji na quiaree. Na sanareeri. Caya samijiaari juhuajaniya nujuaquiaariuhua.

²⁸Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiquiaari?

²⁹Jesuuri nojori riucaaree:

—Jiyano samaruuri na naata tohuatanishaanu cutara saaja jiyanhua Pueyaso nia seconota nia miaqueyaquiniutia.

Jesu pohuatanu pacutesacariuhua nojuaja mosaanutaniya

(Mt 17.22-23; Lc 9.43-45)

³⁰Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. ³¹Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequeereeri:

—Janiyari pueya niqutiosaanutaniyani, nojori miiniuria janiya taa nojori paniyacuajani. Nojoriiri cua monutaniya. Jiuujanaraca juucajinia, janiyari samiitianutianuhua.

³²Majaari quenaaja na pueya niishiniu quiquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jiyaniijiajanaa cutarani?

(Mt 18.1-5; Lc 9.46-48)

³³Nojoriiri Capernaum tiacajinia tiuquijiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucumajini?

³⁴Nojoriiri saaja sanaajetaquee. Na juayonuutanujiniji niishituriquiaacuajaari. Nucumaji, nojoriiri riutioconetariquiaa teyano nojorijinijiniote socua tojishano pueyanoni.

³⁵Jesuuri jiyacari cajirii nojori na rootanura. Na doce pueya piiriiri. Nojori sequeereeri:

—Cante socua tojishano pueyanora quiniu paniyani, nojuaja cuara quiiria juhua serura, narta pueya na naacunura puetunujuaana.

³⁶Na nuhuaji, Jesuuri mueya nujuatequiaari nojori tajinia. Cuno mueya paree nojori niqiuaraari. Na pueya sequeereeri:

³⁷—Cante jiyano mueya maseja na paniniutia janiyani, nojuajaari cua maseyajaacuhua. Cante cua maseyani, majaari saaja na masenu janiya. Jiyocuaaanu Quijia cua Jiyarona maseyajaariuhua.

Tamonu pueyano tohuatanijosacari samaruha Jesu cumaacata

(Mt 10.42; Lc 9.49-50)

³⁸Tamacari, Juanri Jesu sequeere:

—iNiishitiojananaa, canaari tamonu pueyano niqiriini quia sesa jiyaniquiyano samaruha na tohuatanijionura pueyajiniji! Nojuajaari maja pajaniyajinijinio. Nocuaji, icanaari na tenujureeni maja socua naa na miiniuriatej!

³⁹Jesuuri nojori sequeere:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata

sesa pocuanu janiyajiniji. ⁴⁰Nia niishiri, cante maja pa paracani, nojuajaari pa jiyano. ⁴¹Nia rucuanesocari, cante nia raateya mohuacaniyosua na paniniutia janiyani, cua pueya nia quiniuucujuhua, Pueyasoori saniniuujia maninia casaa na niqutionutaniya na jitiisanoniniji.

Puereeta quiniutianiyari sesa miijacara

(Mt 18.6-9; Lc 17.1-2)

⁴²Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujau saajia jaara morotasaare na riqiujiniji, caminia queronijinia jartasocoriquiano. ⁴³⁻⁴⁴Nio miriqui cua niishitiososano nia tojiri: tama nia juaashiquiaaja jaara nia jiyatere sesa miijia, nia juaashiquia nia rashiquiare juhuari niaa mariqui mani quiquiojinia jataaareeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jataaanura caapiquiquiojuata? Jiyano socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶Naajuhua, nia nioluca jaara nia jiyatere sesa miijia, nia rashiquiareno majaa nia jataaanura mani quiquiojinia. ¿Niaateeri paniya tii nia jataaanura caapiquiniocuata, pueyaracaanu tii nia saniitiosaanura? Jiyano socua maniniaari niquiniocuata Pueyasooocua nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸Naajuhua, nia namijia jaara sesa miitiriqia niajaninya, nia jiatereenoj. Naa nia tarinitiare sesa nia miiniu, maja nia jataaanura caapiqui namijia pueyaracaanu mani noshishaqui. Sesa miijiaaari cuno mani quiquiojinia quejoosanutaniya, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshiya. Majaari na maquesanu. Jiyano socua maniniaari nia tiuquiniuria Pueyasooocua niquiriyatujua namijia pueyaracaanu shuquiriaatia nia shootianura nojuaja.

Naa Jesu niishitiosocari miriquitij, nojuajaari pueya niishitiosocari nojori tarinitianura jiyano nia miiniu panishano, cuno jaara sesa miijia jiyateriquia nojori.

⁴⁹Jesuuri socua niishitiosocari:

—Puetunu Pueyaso muerasujuaari saniniujushaanutaniya juhua manitia, taa shu caquishiyacuani na moqueyaquiniuucujia. ⁵⁰Naajuhua, shoniiri jiyano maninia, shu moqueyaquiniuucujia. Saniniuujia, shoni jaara shaacara quiri, ¿maatucua taa tiquiriquiara quirohua saajaniuhua? Maja na naata. Naajuhua, Pueyaso cumaaca nia jitiare nioojiajinia, niaa mariqui najuhua quijia quiri juhua Pueyaso niishiyashijia pueya. Naajuhua, jyanoojia nia quiri, jatiqui nia quiniuria shuquiriaatia.

Jesu niishitiososano maja pueya cartenura necocua

(Mt 19.1-12; Lc 16.18)

10 Na nuhuaji, Jesuuri Capernaum tiacajiniji quiaquiaari na saquiriososano pueyana. Judea jiyajinia quiojijareeri, Jordán moo taqijirijuhua, pananu metasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiosocari coteere socua, taa na niishitiosocari tarijiacuajani. ²Jiyacaritij, noojiaqueya Fariseocuaari Jesuucua nijioquiaari na saniniujuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

³Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajaniani?

⁴Cuno pueyari Jesu riucaaree:

—Moisés pa sequequiaaricua, pueyanoori na naata necocua cartenu. Neyaca cuara coteenu na niqutioora na cartetaja naajione, necocua na cartenura. Moisés cuajaari nia sequequiaaritij.

⁵Jesuuri cuno pojori sequere:

—Moisés nia sequequiaari niajaniatej, pueyaracaanu cumajiuujia nia quiniuucua, nia niquiuuca taaajeyashijia nia quiniuucujuhua. ⁶Saniniuujia, Moisés nia naajiotaqiaari pueyajiniji:

“Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

⁷Naaratej, pueyanoori na queya tiujanutaniya necocuara na caminiuria. ⁸Nojori jaara camitioore, nojoriiri juhua niquiriyatujua pueyanora quiqui. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹Cunora, pueyano cuara necocua carteyaquiira, Pueyaso rupuetootesano nojori quiniuucua.

¹⁰Majaari Jesu saquiriososano pueya niishitioini quiquiaari nia Jesu sequesano. Na nuhuaji, tijania nojori quishacariuhua, na saquiriososano pueyari Jesu nequesotaqiaari casaa na sequeno paniriqiaa naani. ¹¹Jesuuri nojori sequere:

—Cante necocua carteya tamonu maajitia na caminiuriani, cuno pueyanoori jiyano socua miya coteenu necocua. Pueyasora, nia na miishacaritij, nojuajaari juhua narta pueyano niquiuuca quijia. ¹²Naajuhua, maaji jaara cartere neyaca tamonuta na caminiuria, cuno maajiri sesa miya Pueyaso niqiarajuhua.

Jesu niasacari na juaashiquia naatujooriicua

(Mt 19.13-15; Lc 18.15-17)

¹³Na nuhuaji, Jesuucua jaatucunu saajiaariiri naatujoori, Jesu nianura na juaashiquia nojori nacaacua. Na saquiriososano pueyari naatujoori jaatucuna tenujuriqiaa saaja. ¹⁴Jesu jaara na niquiquiaari, juaquiiri. Nojori sequereeri:

—iNia tarinitiare naatujoori cuara niiria cucua! iMaja na tenujuna! Canapuee Pueyaso muerasura quiniu paniani, nojori cuara juhua nio naatujoori jataara. ¹⁵Seetanujuaana nia sequeyanijia, Pueyasooocua nia tiuru seetanujuaana, taa naatujoori tiyu cucuacuani na taacanuyaqiniutia. Saaja naacuajiti niaari Pueyaso pueyara jiyatesaanutaniya cutara, pueyaracaanu Pueyaso jitiisano nia quiniuria.

¹⁶Jesuuri jiyacari cuno naatujooriniyosua poore. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

Jiyano socua casamiriaca mashaja pocojosacari Jesuta

(Mt 19.16-30; Lc 18.18-30)

¹⁷Quera Jesu quianu panishacari quiniquiji, nocua netequiaariiri tamonu pueyano. Jesu cariquimijaji mojuquetaseeri. Na nequesotareeri:

—Maninia niishitiosocari, ¿taa cua miiniutianiyari, seetanujuaana Pueyaso pueyanora cua quiniuriani?

¹⁸Jesuuri na sequere:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuaana maninia. ¹⁹Quiaacuajaari Pueyaso niishitiososano niishiya. Moisés cuajaari nia naajiotaqiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonujuna sapojonuta. Maja cuaracashijionu. Quia queya tojjia quia quiriqia”.

²⁰Pueyanoori Jesu riucaaree:

—Niishitiosocari, janiyacuajaari puetunu cuno rootasanojuaana tojjia pueyaracaanu cua naatujaajiniji.

²¹Jesuuri na paniniutia na niquiri. Na sequereeri:

—Juhuanuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niqutiojocoo. Na nuhuaji, casamijianaa nareja quia niqutioore quia masano cumaneeca quia casami sami. Naacuajitij, quiaari quia casami jitiutanutaniya jiyocuaaanu

Pueyaso shuriucua. Na nuhuaji cutara, quiocua nimiohua cua nuhuajiriquiano.

²²Cuno pueyano jaara tojiquiaari naa Jesu sequesantej, jiyanohua taraajequeeri. Na taraajenuta quiacuhua na tiajiniaari. Nojuajaari jiyanohua casamiriaca pueyano quiquiaari. ²³Na nuhuaji, Jesuuri na shocuaqueya niquinijioree. Na saquiriojosano pueya sequereeri:

—iJiyanohua jiyajeneta cutaraari casamiriaca pueyano quiniuria Pueyaso pueyanora!

²⁴Na saquiriojosano pueyari shiriquitiquiaari naa na sequesacarij. Na nuhuaji, Jesuuri nojori sequenu pacutequiaari:

—Sanajoorinia, seetanjuanaa nia sequeyanijia. Jiyanohua jiyajenetaari casamiriaca pueyano quiniuria Pueyaso pueyanora. ²⁵Taa camello maja na naata cusupuetaja cuhuoco tamajiria tajiniucuaani, naajuhua, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶Na saquiriojosano pueya jaara na tojtiaquiaari, nojoriiri socua jiyanohua jiuujatere. Naaratej, tama nojorijiaarij nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

²⁷Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniuria. Pueyaso cutaraari na naata na jiyatenu na muerasura. Pueyasora, maja jiyajeneta casa quiniuria.

²⁸Pedroori Jesu sequereeri:

—Jiyaniijianaa, canaari puetunu cana jiyatesaanutaniya tiujiaquiaarini quia pueya cana quiniuria.

²⁹⁻³⁰Jesuuri nojori riucaaree:

—Seetanjuanaa nia sequeyanijia, shuquiriaatia quijia quiniutianiya cutaraari noo pueyano cante na jiyatesano tiujiaja cua tojjia na quiniucuaani, jiyajinijia pohuatana na quiniucuaajuhua. Cante na tia tiujiajani, tapueyocua, na rimiatuhua, na queya, necohua, na cuhuariquiano, nojuajaari maninia miishaanutaniya quiarjia mijiria na quishacarijia. Nojuajaari socua jiyanohua queraatia niquitiosaanutanihua na tiujiasanojinijia. Niquitiosaanutaniyari tiaca, tapueyocua, na rimiatuhua, na nucua, necohua, cuhuariquiano. Naajuhua, naquiya miishano quiniutianiya cua tojjia na quiniucua. Naajaa, na nuhuaji, pueyaracaanu Pueyasota shuquiriaatia quiniutianiya quiarinio jiyajinia. ³¹Saniniuuja, queraatia tojishano pueyari najuhua quijia quiniutianiya Pueyasora, nojori tojiaquiniucua nojuaja. Saniniuuja, Pueyaso ruuretajacara, queraatia Pueyaso pueyari quiarjia juhua najuhua quijia niquishano quiquiaa. Naajaa, nojoriiri na nuhuaji seetanjuanaa juhua jiyaniijianucua quiniutianiya Pueyasora, na tojtiajaca nojori quiniucua.

Jesu pacutesacarihua pohuatenu nojuaja mosaanutaniya
(Mt 20.17-19; Lc 18.31-34)

³²Jerusalén tiacajiniara nuquamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajituriquiaa nojori puerenutajuhua. Nu cajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniya, nojori tiuquishacari Jerusalén tiacajinia.

³³Nojori sequereeri:

—Niaacuaajaari niishiya, paa tari Jerusalén tiacajinia quiaani, tee cuniqui Pueyaso Niyanu niquitiosaanutaniya pueyacura secोजना jiyaniijianucuaani, Moisés Rootasanojinijia niishitiojonaanio. Cuno nojoriiri cucuara tonjunutaniya jiyaniijianucua na sapojonuta, cua mosaanura. Janiyari taucua niquitiosaanutaniya. Janiyari jiyanohua naquiya miishaanutaniya. ³⁴Nojoriiri cua rerequetenutaniya. Cua

riocojotunutaniyari. Cua piquitiumutianiyajaarihuaj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanjuanaa samiitianutanihuani.

Santiago, tarajanu Juanta, nojori sequesacari
Jesu, maninia nojori na miiniuria
(Mt 20.20-28)

³⁵Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquiohua quiquiaari. Jesu sequetuseeri:

—Niishitiojonanaa, canaara quia miiri cana masenu panishano quiajaniya.

³⁶Jesuuri nojori nequesotaree:

—¿Casa nia paniya cua miiniuria niaarani?

³⁷Nojoriiri Jesu riucaaree:

—Pueyaso jaara quia jiyatere pueya jiyaniijia, quiocua cana cajitijiore quia shuriucua, tamonu quia miaquetajara, tamonu quia muenecara, quia naacuna cana quiniuria.

³⁸Jesuuri nojori sequereeri:

—Majaari nia niishini nia masesano. ¿Nia naatateeri rejeretanu naquiya miiniuria taa cua miishaanutaniyacuaani? Naquiya cua miiniuria jiyanohua noonu quiniutianiya juhua pueyano jaara mani noshiyanojinia tiuquinishaare.

³⁹Nojoriiri na riucaaree:

—Taaquiriirinij, cana naatacuaquinateja naquiya miiniuria rejeretanu juhua quiajaniya.

Jesuuri nojori sequereeri:

—Seetanjuanaa, niaari na nuhuaji cua ratusano raturiquianojuhua. Niaari juhua manijinia tiuquinishaariquia-nojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanohua naquiya na miishaanutaniya, na cusosacari pueyacura. Jesuuri naa nojori sequereeri socuatej:

⁴⁰—Maja cutara na naata niquitiojoni niajaniya nia masesano, cua cajitiniuria niajaniya cua miaquetajara, cua muenecarano. Cunoori noo nojori niquitiosaanutaniya cutara, canra tari na jeenucuaaquiiaaricuaajani.

⁴¹Narta saquiriojosano pueya jaara tojiquiaari nojori masesano Jesu juucua, nojoriiri juaaquiocuaari. ⁴²Jesuuri nojori piirii. Nojori sequereeri:

—Niaacuaajaari niishiya, mijiria jia jiyaniijianucuaari na pueya jiyatesano juhua na seya, tama nojori panishano na miiniuriajaaja nojoritia. Naajuhua, pueya jiyaniijianucuaari na jiyatesano pueyacua paaretaquiaa na cumaaca, tojishano pueya nojori quiniuria. ⁴³Niajaniya saniniuuja, majaari naa nia quiniuria quiniutianiya. Cante tojishano pueyanora quiniuria paniya niajaniyajinijionia, cuno cuara jiyateera tama na cuaqueyajaaja juhua narta Pueyaso pueya serura na quiniuria. ⁴⁴Cante nia jiyaniijia quiniuria paniya, nojuaja cuara quiri narta Pueyaso muerasumaquinia. ⁴⁵Janiyajuhua, majaari mijiria cua niiniuria quiquiaari pueya cua poonijiotenura quiri, tama cua cuaqueya cua shuquiritiniuriajaaja. Janiya cutaraari niquiaarini pueya cua naacutanura, tama janiyajajaaja mosaanura pueya niti, queraatia pueyacuaaji cua ritianura Sesaaca.

Jesu jeeacasacari Bartimeo namijia
(Mt 20.29-34; Lc 18.35-43)

⁴⁶Nojoriiri jiyacari tiuquijioquiaari Jericó tiacajinia. Jesuuri cuno tiacajinijia quiariquiaa na saquiriojosano pueyata.

Queraatia pueyari nata quiariquiaajuhua. Jiyacarij, tamonu cariyajuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneece mashiniquijiona quiquiaari, cariyajuaru na quiniucua. Nojuajaari maja na naata poonijionu quijia tamajaaja.

⁴⁷Nojuaja jaara tojiquiaari cuno tajiyano pueyano quiquiaari Jesu, Nazaret tiacajinijinio, nojuajaari naa nacanu coteere:

—iJesunaa, Pueyaso Jiyarosanonaa, cucua quenaaja quia taraajereja!

⁴⁸Queraatia pueyari na tenujuriquiaa na sanaajanura juucua. Saaja socua nacaree jiyanoahuari:

—iPueyaso Jiyarosanonaa, cucua quia taraajere!

⁴⁹Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyojuaruuri na sequesaaere:

—iQuia sanere! iQuia shuquiriri! iQuia sequeyacuaja! iNocua quia canujiyare!

⁵⁰Naa na tojshacaritij, cariyojuaruuri na tucuaque toque jataquee. Ritia jaaqueeri Jesuucua na catecanonura. ⁵¹Jesuuri na nequesotaree:

—¿Casaa quia paniya cua miiniuria quiajaniani?

Cariyojuaruuri na riucaaree:

—iNiishitiojonanaa, niqijjara quiniu paniuhuanijia! iCua namijia quia jeecearohua quiria!

⁵²Jesuuri na sequere:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariyojuaruuri tari na naata niqiniuria quiriquiaa. Nucuaaco Jesu nuhuajiyareeri.

Jesu tiuquishacari Jerusalén tiacajinia

(Mt 21.1-11; Lc 19.28-40; Jn 12.12-19)

11 ¹Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijiose Olivo cuhuariquia tuhananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaree tiji. ²Nojori sequereeri:

—Cuno tiacajinia nia quiaare, pa tachoji niqishiyani. Naa jaara tiuquishii tii, niaari burro riuritanutaniya morotasano, pueyano cajishoojua na nijinia. Naa jaara niqishiiinij, niocua na samaacartasee. Niocua na jaatucumohua miji. ³Pueya jaara naa nequesotaree nijaniya: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqitionutanihuacuaja”.

⁴Nojoriiri quiojoquiaari. Burro riuriataseeri morotasano nuujinia, tamonu tia tohuateya shuriucua. Nojoriiri na samaacartasee.

⁵Tamasaca tii quiniaari nojori sequere:

—¿Casaa nia miyani? ¿Casaara nia samaacartaa cuno burroni?

⁶Nojoriiri na riucaquiaari taa Jesu rootaquiaari nojoricuajani. Naaratej, cuno pueyari nojoriia na tarinitiaquiaari. ⁷Na nuhuaji, Jesuucua jaatucumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. ⁸Queraatia pueyari na toqueya muejoquiaari nucuaaco, Jesuucuaaji nojori maniniushitiniuria nuu. Tamasacaari jaamasucua piyotacuaari cuhuariquiaajiniij, Jesuucuaaji nojori niojotasocoriquiano na nucuaacujuhua. ⁹Jesu puetanaa, mariyata na nuhuaji nijonaari jiyanoahuacua nacojonu cotequiaari nojori shuquiriniutia. Naa sequeturiquiaari:

—iPa shuquiritiare pa Jiyaniijia Pueyaso! iJiyanoahuacua maniniacuaja pa Jiyaniijia, cuno, Pueyaso cumaacata tiuquiyani! ¹⁰iPueyaso cuaara na jiyateera maninia Jiyaniijia na quiniuria pajaniyara! iNojuajaari pa supuetanaa jiyaniijia David niti pa jitianutaniya maninia cutara! iJiyocuaaanu Quijia pa Pueyasocuaajaari pa shuquiritiasano!

¹¹Jesuuri naa tiuquiquiaari Jerusalén tiacajiniatej. Pueyaso Secojojuu tiacajinia tiuquishiiri. Na niqiniurionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

Jesu sesacasacari jajauju higo naana

(Mt 21.18-19)

¹²Tariqui, nojori quiojosacari Betania tiacajiniij, Jesuuri miaajeriquiaa. ¹³Tucuaaanu niqiri higo naanaari queraatia

jaamasucuaraca. Nocua canujiyareeri na niqiniuria seetanujanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. ¹⁴Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

Jesu jaacasacari seya niqitiojonaa Pueyaso Secojojuu tiacajinia

(Mt 21.12-17; Lc 19.45-48; Jn 2.13-22)

¹⁵Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojojuu tiacajinia. Tiji pueya tohuatanijionu coteereeri, cuno pojori, canapuee Pueyasocuaara puecosocoriquiano seya niqitiojoriquiaa cumaneecaracuajani. Na masejonaa tohuatanijiorejaariuhua. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaa cumaneecacuajani, Pueyaso Secojojuu tiacajinia niqitiosocoriquiano cumaneecaracuajani. Naajuhua, Jesuuri mococoonu niqitiojonaa cajitiucua caponeetaree. ¹⁶Naajuhua, majaari na shanacunu quiquiaari pueya niyacunura najuhua Pueyaso Secojojuu tia, na nitootasano casamitia. ¹⁷Na nuhuaji, pueya niqiaara niishitiojonu coteereeri. Naa sequereeri:

—Tariucuaaanu Pueyaso Rupaajinia naa naajiotasanoacuajaa-ri quia:

“Cua tia sesaari quiniutianiya, Pueyaso Secojojuu tia.

Puetunu jiyacajiniijiojuanaa pueya secojonuujuaa quiniutianiyari”.

Niaari saniniujia na jiyatequiaari nohuasenuujuaca quiquiora.

¹⁸Pueyacuara secojonaa jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri roojotooquiaari taa na motunutaniya Jesuni. Saniniujia, puetunu pueyajanaari jiujiateriquiaa Jesu niishitiojosano nojori tojishacari. Cunora, Judiocuaa jiyaniijianucuaari Jesu puereturiquiaa, puetunu pueyajanaa tojishacari na niishitiojosano. ¹⁹Jaara niniquiaari, Jesuuri Jerusalén tiacajiniij quiacuhua na saquiriojosano pueyata.

Higo naana sorenojiniji pohuatasano

(Mt 21.20-22)

²⁰Tariquicuaji, nojori shocosacari higo naana, na niqitituiquiaari tariucua soreno, puetunu na nujacatjanaa.

²¹Pedroori jiyacari Jesu sequesano niishiquii. Jesu sequereeri:

—Niishitiojonanaa, iquia niqiri! iQuia sesacasano higo naanaqui tari soree!

²²Jesuuri nojori riucaaree:

—Pueyasocua nia tiuuri. ²³Seetanujanaa nia sequeyanijia, nia jaara Pueyasocua tiuuriquia nia taacanuyaquiniutia, nia naata nio tuhananu sequenu: “Shiquia niqijij. Quia jaataare shoniniacu caminiacijia”. Naa jaara naa sequere seetanujanaa Pueyasocua nia tiuuniutia, niaari nia sequesano niqiniutianiya. Naacuajitij, Pueyasocuaaji nia taacanuyaquishacari, nia sequesanoacuajaaari tohuatenutaniya taa nia sequereecuajani. ²⁴Janiyari cunora nia sequeyani, puetunujanaa nia masesano nia secojosacari Pueyasoni, nia niishiri niaa na jitiiaa tari. Na nuhuaji, niaari seetanujanaa na masenutaniya. ²⁵Naa secojosacari, niaa jaara niishiquii niaa sesa quia tamonu pueyanota, sesa na miiniucua nijaniya, nojuaja nia jiyanoori. Naacuajitij, jiyocuaaanu Quijia nia Queeri nia jiyanooniutianiya sesa nia miishanojinijiuhuaj. ²⁶Naa jaara jiyanooyashijia quiriquia, jiyocuaaanu Quinia nia Queeri nia jiyanooyaquiniutianiya, sesa nia miishanojinijiuhuaj.

Pueya nequesotasacari Jesu, cante na jiyaronani

(Mt 21.23-27; Lc 20.1-8)

²⁷Na nuhuaji, nojoriiri quiaquiaarihuua Jerusalén tiacajinihua. Jesu rucanejosacari Pueyaso Secojojuu tiacajinia,

nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitiojonaajuhua, narta Judiocuaca camarucuanio.

²⁸Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojoua tia jiyaniijia quia quiniuriani?

²⁹Jesuuri nojori riucaaree:

—Janiya nia nequesotanutaniya saniniunijia. Niaa jaara cua nequesotasano riucaare coteenucuaa, janiyari nia sequenutaniyajuhaaj cante cua jiyaroquiaari naa cua miiniuriani. ³⁰Cua riucaaturetoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucaature.

³¹Jiyacaritij, cuno pueyari jiyasohuaja tama juayonuutanu coteequiaarijaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucaarucua: “¿Casaara nocua nia tiyauquiquianucuaarini?”

³²¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuaajaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii. ³³Naacuajitij, maja na naata na riucaatunu quishacari, Jesu sequetureeri:

—Maja canaa niishiniu.

Jesuuri nojori sequereeri:

—Janiyajuhua, maja cua sequenu quiniutianiya nijaniya, cante cua jiyaroquiaari naa cua miiniuriani.

Miriqui pahuatasano sesa miijicaa poonijionaaajiniji

(Mt 21.33-46; Lc 20.9-19)

12 ¹Jiyacaritij, Jesuuri miriqui pahuatanu coteequiaari cuno pojori niquiara. Cuno camarucua sequereeri:

—Tamonu pueyanoori cuhuariquijania uva natoocuaari. Na nuhuaji, na shuriquico matacoreeri. Naajuhua, saajia quejaquiaariiri uva rapijiojuara, na caaca reratesaanura. Jiyaconajara tiareejaariuhua, tiji na cuhuariquia na cojuajara nohuasejojuacuajia.

²Na nuhuaji, tamasa poonijionaa pueya na niquitioreeri nojori cojuasocoriquiano nera. Naacuajitij, uva carojotasacari, nojoriiri nojuaja niquitionutaniya tijijiuhaaj, na camarujanaa na quiniucua. Na nuhuaji, nojuajaari tucuaaanu quiaquiaari, tii marijia na shocotejonura. ³Jaara tari quiquiaari uva carojotasacari, sanya cuhuariquia camarujanaari na seru jiyaroquiaari cuhuariquia cojuanaa pueyacu. Na jiyaroquiaariiri cuhuariquia cojuanaa niquitionura nojori carojotasanojiniji, taa na camarujanaa pocoojoquiaaricuaaja nojortia tarijiani. ⁴Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnucuaari. ⁵Na camarucuaari jiyaroquiaari tamonu na seru. Cuno seruuri jacusaaree saitia. Na nacaari surtasaree saajiaata jasanu. Na sesacatureejaariuhua. ⁶Na camarucuaari socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijiniuniojuanaani, tamasaari piquishaaquiaari. Tamasaari puecoosaaquiaari cutara.

⁷Cuhuariquia camarucuaari saaja niquiriyatujua niyanuniyojua jiiitiaquiaari, jiyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijaaja: “Cuno pueya jaara niquiri cua niyanu, nojoriiri na tojinutianiya cutara”. ⁸Cuno cuhuariquijania poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotoocuaari:

—iNioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. iPa morej! iPocua nio cuhuariquia camaruhua quiqui tamajaajani!

⁹Cunora, na quiatureeri. Na motureeri. Na motunu nuhuaji, nojoriiri macu jataree cuhuariquijania tamama.

¹⁰Jiyacaritij, Jesuuri cuno pojori nequesotaree:

—¿Taa cuhuariquia camarucua miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasa pueya niquitionutaniya cuno cuhuariquiaari, nera nojori cojuanura.

¹¹¿Majateeri tariucuaaanu Pueyaso Rupaajinia nia serojonu quiquianucuaaja nio? Naa sequeyari:

“Tajonaa pueyari tamaatiujajau saajia jataree nojori tiasacari saajiniya. Na nuhuaji, cuno jatasano saajiaari socua cutara saajia jiyatesaahua tamasa saajiniya.

¹²Cunoori pa Jiyaniijia miishano. Pajaniyara, na miishanoori jiyanohua maninia. Nocua jiuujatesano”.

¹³Jiyacaritij, cuno Judiocuaca camarucuaari niishiricuaaja miriqui Jesu pahuatasanoori tama nojorijiniijiaaja quiquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacuajitij, nojoriiri nareja quiojoquiaariuhua. Naa Jesu pahuatasacari miriqui cuno saajiaajinijitij, nojuajaari tama na cuaqueyajinijiaaja pahuatariquiaa.

Jiya jiyaniijia cuara pueyaracaanu niquitiosaaria

na sequesano cumaneeca

(Mt 22.15-22; Lc 20.20-26)

¹⁴Na nuhuaji, Jesuucua jiyaramiquishaaquiaariiri noojiaqueya Fariseocuacajinijinio, Herodes panijia pueyajinijiojuhua. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocua. ¹⁵Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niquini pueyajuhua. Majaari pueya naata sapojonu quiajaniya. Quiaari seetanujuanaa pueya jiuujia niquijia. Quiaa cutaraari seetanujuanaa Pueyasojiniji niishitiojua, taate pa naata maninia quini Pueyaso niquiarani. Naaratej, canaa quia sequere, ¿maniate pa niquitiojonura pa cumaneecajiniji jiyaniijia Césarra, taa cuno tahue sequequiaari pajaniyacuaajani? ¿Taa quia sequeyani, niquitiojoshiatee, maja soj?

¹⁶Jesuuri ritia niishiqui, naa nojori nequesotasacari nojuajatej, cuno pojoriiri na saniniujiuriquiaa sesa na pahuatana najuhanaj. Naaratej, Jesuuri nojori sequereeri: —¿Casaara nia saniniujiya janiyani? Miji nia riri cumanee cua niquishocoriquiano.

¹⁷Nera rishaareeri cumanee. Jaara na niquiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhua?

Nojoriiri na riucaaree:

—Jiyaniijia César naaquicuaaja, na sesajuhua.

¹⁸Jesuuri jiyacari nojori sequereeri:

—Jaara tama César casaaja quiri, tama na casaaja nia niquitiore na camarucua. Saniniujia, Pueyaso nia niquitiore nerano tama na casaaja.

Jesu jaara naa nojori riucaquiaaritij, nojoriiri jiyanohua jiuujiatequiaari.

¿Macunucuate samiitiaconutaniuhua?

(Mt 22.23-33; Lc 20.27-40)

¹⁹Fariseocuaca nuhuaji, noojiaqueya Saduceocuacajinijioori Jesuucua nijioquiaari. Saduceocuacaari jiyaniya macunucua maja na samiitiaconu quiniutianuhua. Naaratej, nojoriiri Jesu nequesotasee nojori niishinuria taa na sequenutaniya macunucuaajinijini. Na sequetuseeri:

²⁰—Niishitiojonanaa, supuetana Moiséscaajaari pa rootaa na naajionejia, pueyano jaara cusoyare mueyaju, tarajanu

cuaara camiiria mashiquio, mueya na mueratenura tarajanu niti. ²⁰Tarijia, tamonu pueyanoori niya quiquiaari. Siete niquiohuaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuojuua. ²¹Naaratej, na nuhuajishanaari tarajanu mashiquio camiquiaari. Nojuajaari muetuhuojuua cusoquiaarijiuhuj. Naajuhuj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajujuhuj. ²²Cuno siete canuuri naa camiyoquiaari cuno maaji. Puetunu nojorijianaari cusonuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijiuhuj. ²³Naacuajitij, macunucua jaara samiitiacorohua, čteyano cuno siete neyacaajiniiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁴Jesuuri nojori riucaaree:

—Niaari jyanohua jiyajeneya Pueyaso Rupaajinia naajiotasano nia niishiyacuquishacari, Pueyaso cumaacanio. ²⁵Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quijiaa Pueyaso seya, maja camiyosano. ²⁶Niaa macunucua samiitianiionujini nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moiséscauja nequeru casaja noshiyanojiniini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijajuhuj, quia supuetana Jacobo Jiyaniijiano”.

²⁷Naacuajitij, paari niishiyani Pueyaso pueya shaajeconoori saminiucua quia Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jyanohua jiyajeneya nia niishiyacuquiuucua Pueyaso Rupaa.

**Puetunu Pueyaso Rootasanojinijianaani,
teyanote socua pa tojishocoriqianoni**
(Mt 22.34-40)

²⁸Tamonu pueyanoori Jesu tojiriqiaa Saduceocuaca rihuaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojininiote socua pa tojishocoriqianoni?

²⁹Jesuuri na riucaaree:

—Pueyaso sequesano socua na pueya tojishocoriqianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijajanaa. Majaari tamonu quiniu socua.

³⁰Nia Jiyaniijia Pueyaso nia paniri puetunu nioojiatjanaa, puetunu nia sohanutajanaa, puetunujuanaa nia niishitijata, puetunu nia cumaacatajanaanio”. Nio rootasanoori socua pa tojishocoriqiano puetunu Pueyaso rootasanojinijianaa.

³¹Socua tarajanu na rootasano pa tojishocoriqianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriqianoni nio caapiqui na rootasanojiniji.

³²Jiyacaritij, cuno Moisés Rootasanojiniji niishitiojonaari na sequeere:

—Quiaacuaja maninia sequeere, niishitiojanaa. Seetanujuanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja. ³³Seetanujuanaa jyanohua maninia cutaraari Pueyaso pa paniniuria puetunu poojiatjanaa, puetunujuanaa pa niishitijata, puetunu pa sohanutajanaa, puetunujuanaa pa

cumaacatanio. Naajuhuj, jyanohua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaa quirini, cunoori jyanohua socua maninia Pueyasora, puetunu seya catijiasanojinijianaa nocuara, mariyata puetunu pueya niqutiojosano na casamijiniijianaa nera.

³⁴Jesu jaara tojiquiaari naa cuno pueyano riucaasano maninatej, na sequeereeri:

—Quiaaqui quera Pueyaso pueyanora quia.

Na nuhuaji, majaari socua pueya nequesoreetanu paniniu quiriquiaa Jesu.

¿Canaacuajinio supuenote Cristoni?
(Mt 22.41-46; Lc 20.41-44)

³⁵Jesuuri Pueyaso Secojoua tiajinia niishitiojoriquiaa pueya. Jiyacaritij, nojuajaari na tojitiaanaa pueya nequesotaree:

—¿Casaari Moisés Rootasanojiniji niishitiojanaa sequequiaacuaraari: “Cristonaari supuetana David niquiohuacuajinio supuenutaniya”? ³⁶Pueyaso Sohuanu pohuatasacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeere: ‘Quia cajirijiaara cua miaquetajara, janiya cuaara quia paraa shocojotare quicuajijiaatijia, Jiyaniijajanaa quia quiniuria pueyaracaanu cutara’”.

³⁷Supuetana David jyanijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jyaniquiya “cua Jiyaniijata”.

Queraatia pueyari shanohua tojitiariquiaa Jesu pohuatasano.

Jesu sequesano Moisés Rootasano niishitiojanaajini
(Mt 23.1-36; Lc 11.37-54; 20.45-47)

³⁸Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojanaacuaji. Cuno pojoriiri puera tucuaque toque cushiyonu maniniucuaa nojori rucuanejotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucujinia. ³⁹Nojori jaara masuusaare tamonu tiajinia queranacunura, nojoriiri ritia secoquiaa socua panishano cajitiujinia nojori cajituniuria tia camaru shuriucua. Naajuhuj, Pueyaso secojojua tiacajiniaqueya pueya rerejosacari, nojoriiri camarucua cajitiucujinia cajituniu paniquiaa, pueya shootianura nojori. ⁴⁰Nojoriiri mashiquiopue tiaca masequiaa secuja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojojuaa shitarayocua pueya niqiara, maninia pueya nojori jyanishaanura. Naaratej, Pueyaso saniitosacari maninia miyashijiaa pueya, nojoriiri socua jyanohua naquiya miishaanutaniya tamasaajiniiji.

**Casamijiu mashiquio niqutiosacari na
cumanee juurane Pueyasora**
(Lc 21.1-4)

⁴¹Tamacari, Jesuuri cajiriquiaa Pueyaso Secojoua tiajinia cumaneeca niqutiojojua tajoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niqutiojijano. Queraatia casamiriaca pueyari queraatia cumaneeca niqutiojoriquiaa. ⁴²Jiyacari tiuquishijiaariuhua casamijiu mashiquio. Caapiqui cumaneeniyojua niasee cumaneeca niojuajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejini* shipinishano quiquiaariiri. ⁴³Jesuuri jiyacari na saquiriojosano pueya piirii. Nojori sequeereeri:

—Seetanujuanaa nia sequeyanijia, nio casamijiu mashiquio cutaraari socua queraatia niqutiooree puetunu tamasaajiniijianaa. ⁴⁴Puetunu pueyajanaari na cumaneeca cureenoiniji

niquitiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niquitioeree cutara.

Jesu sequesacari Pueyaso Secojojuu tia niyartasaanutaniya
(Mt 24.1-2; Lc 21.5-6)

13 ¹Jesu tohareetasacari Pueyaso Secojojuu tiajiniji, tamonu na saquiriojosano pueyajinijiniori na sequere:

—Niishitiojonanaa, quia niquiri Pueyaso Secojojuu tia, puereetujuaaca saitia tiasano. ¡Jiyanoahua shanohua tia!

²Jesuuri na riucaaree:

—¿Quiaateeri cuno shanohua tia niquiya, saijiniji tiasano jiyaconajani? Cuniqiu, majaari saajia cureenu quiniutianiya tamonu caco maano quenaaja. Puetunu niyartasaanujuanaa quiniutianiyari.

Taa pa niishiniutianiyani jiya puequesacari quera
(Mt 24.3-28; Lc 21.7-24; 17.22-24)

³Na nuhuaji, nojoriiri quiojoquiaari olivo cuhuariquia tuhananuucua. Cuniqiuji, maja puera tucuaaanu quiquiaari Pueyaso Secojojuu tia. Na taquijirijaja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetquiaari jiyasohuaja:

⁴—Canaa quia sequere taacari Pueyaso Secojojuu tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

⁵Jesuuri nojori riucaaree:

—Tama nia cuaqueyajaaja nia cojuare tamasaca sapojiyaquiniuucuaaji nijaniya. ⁶Nia numooteyacuajanijia, queraatia sapojonuujuaacari nijionutaniya nojori sequenura nijaniya: “Janiya Cristoni”. Naa sapojotunutaniya queraatia pueyari.

⁷Niaa jaara tojinuuri miaquetojonujiniji niya, tucuaaanu-juhuaj, majaari najuhuaa nia shiriqitiuniu. Seetanujuanaa nia quiniutianiyari. Naajaa, jiyacari, majaari jiya puequesacari quiniutianiya juhuanujuaja. ⁸Tamonu rupaa pocuajacaari miaquetojonutaniya tamaatiuucua rupaa pocuajacata. Pueyari tamonu jiyajiniji miaquetojonutaniya tamonu jiyajinijinio pueyata. Naajuhuj, rijiaari jiuuquiujiutianutaniya queraatia tiqiyocua tiacajinia. Jiyanoahua miaajesacariiri quiniutianiya jiyacari. Naajaa, puetunu nojuanaari saaja shusha naquiya miiniu coteesacari quiniutianiya.

⁹Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niquitiosaanutaniya saniitosocoriquiano. Naajuhuj, niaari Pueyaso Secojojuu tiacajinijanaa majacusaanutaniya. Niaari jiyatasaanutaniyajuhaa tiaca jiyaniijiaacua, jiya jiyaniijianucuaacuanio, nojori nequesoreenura nijaniya, janiyajiniji pohuatanaa nia quiniuucua. Naacujitij, niocua janiyajiniji pohuatane nojori niqiarajuhuj. ¹⁰Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajinijanaa. ¹¹Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niqiuara jiyacari Pueyaso Sohuanu niishitiojosano nijaniya. Nia pocuasanoori maja nijaniyajiniji quiniutianiya, nia pocuasacari nojori niqiuara. Cuncuajaari Pueyaso Sohuanu niishitishano quiniutianiya, na pocuatesacari nijaniya. ¹²Jiyacarijuhuaj, pueyanoori sesa miiniutianiya tama tarajanujuaja, cua tojjia tarajanu quiniuucua. Tama tarajanujuajarjia na niquitiojonutaniya mosocoriquiano. Jiyacarijij, pueyari tama necohuajaaja miiniutianiya sesa, cucua tiuujiaca necohua quiniuucua. Naajuhuj, necohuari tama na queya tacartanutaniya monujuaaja, na queya tojinuucua Pueyaso rupaa. ¹³Puetunu nio jiyajinijinio pueyajanaari maja na niqiniu paniniu quiniutianiya nijaniya, cua tojtijajaca nia quishacari. Naajaa, cante seetanujuanaa

pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quiijara jatanishaanutaniya, pueyaracaanu cuata na quiniuria shuquiriaatia.

¹⁴Niaa jaara cuno jiyanoahua sacuraatia casaa niquiri Pueyaso Secojojuu tiajinia nujuatesano, taa supuetana Daniel* sequeya na naajioneejiniacuajani, niocua ritia mashiri. (Cante nio serojiyani, nojuaja cuaara niishiiria casaa na sequeyani.) Judea jiyajinia quiniaa cuaara mashiiria ritia tuhananuuhucua, cuno sacuraatia casaa jaara nujuatesaare Pueyaso Secojojuu tiajinia.

¹⁵Canapue te jiyacari quiya na tia cacojiriani, nojori cuaara tiuquitiaquiiria tiajiniaaco na casaa na riniuria juucua.

¹⁶Canapue te jiyacari quiya na cuhuariquijianiani, nojori cuaara tacateyaquihuara na toqueya na poonuhuaa. ¹⁷Jiyacarijij, jiyanoahua taraatia quiniutianiyari maajipohuara, nojori jaara manajaatohua quiya, jaara jiyacari jiitiare supuejaca conaajajuhuj. ¹⁸Nia secojosacari, Pueyaso nia maseriquia juhuacarijia, nia mashiyocuatucacari cuaara quiyaquiiria shiniquia quishacari. ¹⁹Cuno quishacari, jiyanoahua naquiya miiniu quiniutianiya. Tariucuaaanu, majaari naa naquiya miiniu quiquiaari Pueyaso shipininiu nuhuaji nio jiya.

Naajuhuj, cuno naquiya miiniu nuhuaji, majaari jiyano naquiya miiniu quiniutianiuhua socua, juhua nio. ²⁰Pueyaso jaara ritia tajitijiquiri cuno naquiya miiquiosacari, pueya maara mijiria cureyaquirij. Pueyasocuaajaari ritia tajitiniutianiya cuno naquiya miiniu, na saquiriojosano pueyacu na taraajenuucua.

²¹Jiyacarijij, tamasaca jaara nia sequere: “Nia niquiri, Cristo tari niya quiya”, jaara sequerejuhuaj: “Nooj, jati niqiyatej”, majaari na tojtianunoj. ²²Jiyacarijij, queraatia sapojonuujuaacari supenutaniya. Nojoriiri sequenutaniya: “Janiyacuaaja Cristoni”. Tamasacaari sequenutaniyajuhuaj: “Janiya Pueyaso sequenu panishano caminiujiniani”. Nojoriiri pueya niqishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacarijij, queraatia pueya cutaraari sapojosaanutaniya. ²³Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

Pueyaso Niyanu tacatenujiniji pohuatasano
(Mt 24.29-35,42,44; Lc 21.25-36)

²⁴Naa naquiya pueya miiniu nuhuajitij, pananuuri ninishiquiria quiniutianiya. Naajuhuj, racaari maja na cuhuatanu quiniutianiya mijiria. ²⁵Riyari totenutaniya. Jiyocuaaanu cumaacaraca quiijacaari tetecatunutaniyajuhuaj. ²⁶Jiyacari, janiya Pueyaso Niyanuuri niqishaanutaniya jiyocuaaanuji roseyano cohuajajiniani, jiyanoahua shacantuuca cua cumaacata. ²⁷Jiyacarijij, janiyari cua seya jiyaramiquiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio jiyajinijiojuanaa rerejotesaanutaniya, socua jiyanoahua tucuaaanu jiya cajiniocua puequeetujinijinio.

²⁸Quiarjia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niquiritij, niaari niishiquiaa tacareejonuqui quiniutianiya. ²⁹Quiarjia saniniuujia, naatej taa nia niishiquiaa higo naanacuaani, niocua naa niishirijihuuj janiya quera tiuquihuani, niaa jaara puetunu cua pohuatasanojuanaa niquiri tohuateyano. ³⁰Seetanujuanaa nia sequeyanijia, puetunu cua pohuatasanojuanaari niqishaanutaniya nio pa quishacari quiniaa pueya cusonuyaquishacarijia. ³¹Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³²Maja cutaraari nia niishiniu taacari cua tiuquiniutianiuhuani, casaa juucatej. Majaari jiyocuaaanu quiijaca Pueyaso seya niishinijuhuj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³Cunora, janiyari nia sequeya cutarani, maja juhua maquenuujjuaca nia quiniu. Pueyaracaanu nia niquitiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuani. ³⁴Cunoori quiniutianiya juhua tamonu pueyano quianu panishacari tamonu jiyajiniara tucuaaanu. Na quianura, nojuajaari na seya seerataaree maninia nojori cojuanura na tia. Tamasaca niquitioyaree na poonijosanoori, nojori poonijosocoriquiano. Tamonu sequereeri, tohuatayaji na cojuanura pueyaracaanu, nojuaja cuaara tiuquihuarajaatija. ³⁵Naaratej, nia sutere. Maja maquenuujunu. Majaari nia niishiniucujaja taacari tia camaru tiuquiniutianihuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianihuani? Johuaj, maja pa niishiniu. ³⁶Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacarihua niaacua. ³⁷Cua sequesano niajaniyani, cunoori puetunu pueyarajanaa: “iNia sutereja! iMaja maquenu!”

Judiocuaca camarucua roojotoosacari nojori quianura Jesu
(Mt 26.1-5; Lc 22.1-2; Jn 11.45-53)

14 ¹Jiyacari, juhuanajuaja querajaa juuca quiriquiaaajari Pascua* juucara queranacunura. Pascua juucajuhua, poreetajaaju shipinishano pan* miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutianiya Jesu jiyasohuajani, na motusocoriquiano. ²Nojoriiri naa sequetooriquiaa: —Maja queranacusacari naa pa miiniutij, paa mariqui puetunu pueyajanaa juaatiriiri.

Tamonu maaji totasacari na shanohua jaanutaja Jesuucua
(Mt 26.6-13; Jn 12.1-8)

³Jesuuri Betania tiacajinia quiriquiaa Simón tijajinia na saquiriojosano pueyataja. Cuno Simónri tarijia lepra cusotaja quiriquiaari. Jesu cajishacari tii miaquejajinia, tamonu maajiiri tiuquiquiaari. Shiitianiyojua shucuariquijaja pataconiyojua cacatariquiaari, shanohua cohuaja saajiajiniji quejasano. Mishaja quiriquiaari shanohua jaanutajata, nardo jaamasucujajiniiji shipinishano. Jiyanhua queraatia cumaneecata masesano quiquiaariiri. Jiyacaritij, cuno maajiiri na shucuariquijaja pataconiyojua cocuataree, na totanura Jesu nacaacua. ⁴Tamasaca tii quiniaa pueyari juaari naa cuno shanohua jaanutaja niitiasaanucua. Tama nojorijiaarijia sequetooriquiaa: —¿Casaara cuno shanohua jaanutaja niitiasaaree najuhuanani? ⁵iCuno jaanutaja maara niquitiosaacanu queraatia cumaneecara, casamijuniucua niquitiosocoriquiano! Nojoriiri juhuacatecara cuno maaji juaari.

⁶Jesuuri nojori sequere saaja: —iNia tarinitiare! ¿Casaara nia rimiaaqueya nio maajicuarani? Naa na miishano janiyani, cunoori jiyanhua maninia quiria. ⁷Casamijuniucua pueyacuajaari pueyaracaanu quiriquiano niaata. Naa naatacuajaari maninia miiniu nojori nia panishacari. Janiya saniniujjia, maja cutaraari cua quiniu quiniutianiya pueyaracaanu niaata. ⁸Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. ⁹Seetanujanaa nia sequeyanijia, puetunu jiyacajinijanaa tee Pueyaso rupaa pahuatasaanutaniyani, nio maaji miishanoori pueyaracaanu pahuatasaanutaniyajuhaaj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura
(Mt 26.14-16; Lc 22.3-6)

¹⁰Jiyacaritij, Judas Iscarioteeri quiaquiaari pueyacuara secojonaa jiyaniijianucuaata roojotoonura taa nojori na

quiatenutianiya Jesuni. Nojuajaari Jesu saquiriojosano pueyajiniijio quiquiaarijuhuaj. ¹¹Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanhua shuquiririi. Nojoriiri Judas sequere:

—Canaa quia niquitunutianiya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutianiya Jesuni.

Jesu miaquesacari na nuhuajiria na pueyata
(Mt 26.17-29; Lc 22.7-23; Jn 13.21-30; I Co 11.23-26)

¹²Puetunu marijiajanaa, Judiocuacaari Jerusalén tiacajinia rerejoquiaari poretesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaariiri Pascuara riuriotaca borregohua, Pueyaso niquiara miaquenuusocoriquiano. Naaratej, Pascua juuca qishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹³Jiyacaritij, Jesuuri caapiqui na saquiriojosano pueyajiniijio sequere:

—Nia quiaare Jerusalén tiacajinia. Niaari tii riuritanutianiya tamonu pueyano, na mohuaca pataano na patacojina. Naa jaara na riuriatasee, niocua na nuhuajimia. ¹⁴Jaara tiuquishii tijajinia, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutianiya cua saquiriojosano pueyata quiarijia Pascua niucuan?’”

¹⁵Jiyacaritij, nojuajaari nia niquitiniutianiya puereetuca sohuaca, jiyocuacaanu nataco, tariucua maninia jeenucuaano. Niocua cuniqui borrego majeetese, niucua pa miaquesocoriquiano.

¹⁶Na saquiriojosano pueyari quiojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu sequere nojoricuajani. Nojoriiri tii majeetese borrego, Pascuara miaquesocoriquiano.

¹⁷Jaara niniquiaari, Jesuuri tiuquijioseer na saquiriojosano doce pueyata. ¹⁸Nojori miaquenuusacari, Jesuuri nojori sequere:

—Seetanujanaa nia sequeyanijia, tamonu niajanijajiniijio niya cuata miaqueyani, nojuajaari cua tacartanutianiya na quiatenura janiya, naquiya cua miishaanura.

¹⁹Jesu sequesacari naatej, nojoriiri jiyanhua taraajequee. Jiyacaritij, tama nojorijiaarijia na nequesoreetanu coteere:

—¿Janiya jiyoteeri quia quiatenutaniyani Jiyaniijianaa? Puetunu nojorijianaari naa na nequesotaree.

²⁰Jesuuri nojori riucaare:

—Niquiriyatujua doce niajanijajiniijiniocujaja, nojuacuajaari nio, shusha pan shiya miacojuajiniiani, nojuajaari cua quiatenutianiya. ²¹Janiyacuajaari maninia tohuateenutianiya puetunujuanaani, taa tariucuaaanu Pueyaso Rupajinia janiyajiniiji naajiotasaaquiaaricuajani. Saniniujjia, jiyanhua taraatia quiniutianiari cuno pueyanora, cantucujaja cua quiatenutianiya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

²²Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niquitiojoreeri. Na niquitiojosacari, naa miriqui sequequiaariiri: —Jajaa. Naa miaquere. Nioori cua cuaqueya.

²³Na nuhuaji, Jesuuri ratujua pataree. Na Que Pueyaso secojoreeri nojori ratusocoriquianoocua. Na secojonu nuhuaji, na saquiriojosano pueya niquitioereeri nojori ratunura tiji. Puetunu nojorijianaari ratujajiniiji raturee. ²⁴Nojori sequere miriquiiri:

—Nioori cua nanaca. Cua nanacaari queraatia pueyacuara shoonutianiya. Naacuajitij, Pueyasoori seetanujanaa jiyanoonutianiya pueya, saaja nojori tiunuuucua cucua, taa

Pueyaso sequequiaaricujani. ²⁵Seetanujanaa nia sequeyanijia, maja socua cua ratunu quiniutianihua uva* caacajiniji, janiya cuaara tacatemohuaaatiija pueyaracaanu Jiyaniijijanaa cua quiniuria. Jiyacaritij, janiyari shusha niata na ratunutanihua-ni.

Jesu sequesacari Pedro, nojuaja nocuaji seetanutaniya
(Mt 26.30-35; Lc 22.31-34; Jn 13.36-38)

²⁶Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. ²⁷Na quiojosacari, Jesuuri nojori sequeree:

—Nio niucujani, puetunu nijaniyajanaari cucua tiuuniu tarinitianutaniya. Naa naajiotasano quiyacuajaari nijaniyajiniji tariucuaaanu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

²⁸Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

²⁹Pedroori jiyacari Jesu sequeree:

—Niya cuata quiniaa naasucua quiocuaji carajenutaniya. iJaniya cutara maja cua catenu quiniutaniya quiocuaji!

³⁰Jesuuri saaja na sequeree:

—Pedronaa, janiya seetanujanaa quia sequeyani, nio niucujani, quiaari janiyajiniji naa seetanutaniya pueya niqiuara: “iMaja cua niishiniu Jesu!” Quiaari naa pacutejonutaniya sequenutej, caacaraja caminiujiyacuashacarijia niunijionu.

³¹Pedroori saaja na pataariquiaa naa Jesu sequesacari nojuajatej. Socua sequerohuari:

—iJaniya cuaara mosaaria quiataqui, naajaa, majaari cua seetanu quiniutaniya quiocuaji!

Narta saquiriojosano pueyari naa sequetureejuhujaj.

Taraatia Jesu secojosacari Getsemani cuhuariquiaajinia
(Mt 26.36-46; Lc 22.39-46)

³²Nojoriiri jiyacari tiuquijioquiaari tamonu cuhuariquiaajinia. Cuno cuhuariquiaa sesa quiquiaari Getsemani. Jesuuri na saquiriojosano pueya sequeree:

—Niyaja nia cajituri, cua secojosacari cua Que socua nia tajoji.

³³Nojuajaari saaja nocua rupojijaree jiuujianaraca na pueya: Pedro, Santiago, Juannio. Jesuuri juhuacatecara shiriiquiriquiaa. Tacaariquiaajaariuhujaj. ³⁴Nojori sequereeri:

—iCoojiajinia taraajeya jiyanoahuanijia, quera cusoyanijia! Niyaja nia jiyojetare. iNiocua niqitiareja! iMajaari maquenu!

³⁵Jesuuri socua shiitianiyojua quiaaree nojori tajoji. Na secojonura Pueyaso, mojuquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua.

³⁶Na secojosacari, nojuajaari naa sequequiaaritij:

—Cua Quena, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuaara quiyacuiiria juhua cua panishano. Saaja cuaara quiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

³⁷Na secojonu nuhuaji, na saquiriojosano pueyacuara tacateyarohuari. Nojori riuriatasuhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸Nia sutere. Maja maquenu. Pueyaso nia secojore niaa mariqui sesa miitishaareeri. Seetanujanaa, poojiaari maninia miiniu panijia. Pa cuaqueyari saniniujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

³⁹Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. ⁴⁰Na nuhuaji, socua tacatequiaariuhua na

saquiriojosano pueyacuara. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenujunuta. Jiyacaritij, nojoriiri maja na niishiniu quiriquiaa taa na riucuatunutanianoj. ⁴¹Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? iTariucujaja! iQuiarijia cutara janiyari sesa miijaca pueya quiateaanutaniyani, nojori miiniuria janiya taa nojori panitiuyacuajani! ⁴²Nia saneecuature. Pa quiaare. Cua quiateriquiano tari cumaji.

Na paraa quiasacari Jesu
(Mt 26.47-56; Lc 22.47-53; Jn 18.2-11)

⁴³Jesuuri pocuariquiaajaa Judas tiuquishacari nojoriicua.

Cuno Judasri, Jesu saquiriojosano doce pueyajinijino quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucua mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojona jiyaniijianucua jiyaramiquishanojuhuaj, Judiocuaca camarucua jiyaramiquishanonio. ⁴⁴Judas, Jesu quiateriquianoni, nojuajaari juhucarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacari, cunocujajaari nojuaja. Niocua na quiaase. iNiaari maninia morojosano jaatucutaarohuaquinioj!

⁴⁵Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—iNiishitiojonanaa!
Jiyacari na nujuureeri. ⁴⁶Judasta nijionaa pueyari jiyacari Jesu quiaase. Morojosanoori jaatucutashiyarohua.

⁴⁷Cuniqui Jesuta quiniaa pueyajinijinioni, niquiriyatu nojorijinijinoori na shuucujaja shitiaquiaari nijiniaquetucua mueruu. Nata jaateree pueyacuara secojonaa jiyaniijia seru numocoori. ⁴⁸Jesuuri nocua nijionaa pueya sequeree:

—¿Casaara cucua nia nijioree nijiniaquetucua muerutani, macacatanio, morojosano nia riniuria janiya juhua nohuasejojuani? ⁴⁹Janiyacuajaari puetunu juucujanaa nia tajinia quiquiaani, Pueyaso Secojoja tijajinia cua niishitiojosacari pueya niqiuara. Majaari tii cua quishacari nia quianu quiquianu janiya. Naajaa, naa nia miiriqui, tariucuaaanu janiyajiniji Pueyaso Rupaajinia naajiotasano tohuateenura.

⁵⁰Jiyacaritij, puetunu Jesu saquiriojosano pueyajanaari na shuriucujaja mashiyocuatucuaari. Tamajaaja Jesu tiujiatuqueeri. ⁵¹Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetue lino toquerata cuhuajaatiariquiaa. Jesu quiatunaa niquishacari nojuaja, na quiatuureejaariuhujaj. ⁵²Nojuajaari saaja na toque tiujiaquee nojori juaashiquiaajinia. Juhuasuuiri ritia netequee. Mashimiaari. Janiyacuajaari cunocua pueyano quiquiaarini, nio naajionajuhujaj.

Judiocuaca camarucua nequesoresacari Jesu
(Mt 26.57-68; Lc 22.54-55,63-71; Jn 18.12-14,19-24)

⁵³Jesu quiatunaaari Jesu jaatucuaquiaari pueyacuara secojonaa jiyaniijia tijajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucujuhujaj, Moisés Rootasanojiniji niishitiojonaanio. ⁵⁴Pedroori Jesu nuhuajiquiaari tucuaaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijijanaa seya tajinia cajishiiri. Mani jitiuriquiaa nojoritia cuniquiiri.

⁵⁵Pueyacuara secojonaa jiyaniijianucua, puetunu Judiocuaca camarucujanaari niishiriojonuuriquiaa nojori saquiriojotanura Jesuucua. Jesuucua tonujuriquianoori pajesaaquiaari juucua, na motenura. Saaja shaquiquiaariiri sesa casaa,

nocuara tonujusocoriquiano. ⁵⁶Queraatia pueyari nocuara tonujuriquiaa juucua, nojori sapojonuta. Nojori saquiriojotasa-noori saaja rimiajata quiriquiaa puetunjuanaa. ⁵⁷Na nuhuaji, tamasaari sanetaquiaari nocuara nojori tonujunura na sapojonutajuhua. Nojoriiri na sequetuquiaariti:

⁵⁸—Canaa na tojiquianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucatanutanihuani. Cunoori maja pueyata tiasano na quiniu quiniutianiya”.

⁵⁹Nojori saquiriojotasanoori saaja rimiajata quiquiaari jiyaniijianucua niquiara.

⁶⁰Jiyacaritij, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuuja? ¡Quia tojiri, pueyaruhua quiocuara tonujiya!

⁶¹Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaarihuua:

—¿Quiaate Cristo, jiyocuacaanuji Pueyaso Jiyarosano?

⁶²Jesuuri na riucuaaree:

—Jaa, nojuacuajaniija. Niaari cua niqiniutianiya jiyocuacaanu cumaaca Jiitiana miaquetajara cajiyano. Na nuhuaji, niaari cua niqiniutianiya tacatehuano cohuajajinia jiyocuacaanuji.

⁶³Pueyacuara secojonaa jiyaniijia jaara tojiquiaari naa Jesu sequesanotej, tama na toquejaaja sutaree na juaniutiaari. Sequereeri:

—¿Casaara pa sashiya tamasa saquiriojotanura saa nocuarajaanihuua? ⁶⁴Niaacuaja shusha tojirii Pueyasocuara na sequesano sacuaraatia. ¿Niajanijarijataj, taa nia niishiriojiyani?

Puetunu pueyajanaari sequequiaari:

—¡Cuaara mosaaria!

⁶⁵Jiyacaritij, tamasaari Jesu riocojonu coteequiaari. Na jiquioco morotureejaarihuua maja na niqiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquihuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiuriijuhua.

Pedro seetasacari Jesujiniji

(Mt 26.69-75; Lc 22.56-62; Jn 18.15-18,25-29)

⁶⁶Pedroori jiyaniijia tia carijiniacuma quiriquiaa. Jiyacaritij, tamonu niyacoori rucanejoriquiaa carijiniacuma. Nojuajaari pueyacuara secojonaa jiyaniijia seru quiquiaari. ⁶⁷Pedro niqishii cajiyanoori, mani jitiuyano. Tacuriitia na shootiariquiaari. Na nuhuaji na sequereeri:

—Jaj, quiaacuajaruhua Jesuta rucanejojuajuhua, cuno Nazaret tiacajinijinio pueyanotani.

⁶⁸Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujyaree. Mataca tohuatayaji nujuaseeri. Caacarajaari jiyacari niunijioree. ⁶⁹Cuno niyacoo jaara Pedro niqiquiaarihuua socua, juhuacatecara nata quiniaa sequereeri:

—¡Nio pueyanoori cuno Jesu pueyajinijiniojuhuaj!

⁷⁰Pedroori socua na seetaquiaari. Pasaja na tarishishacari, cuniqui nata quiniaari Pedro sequereer socua:

—Seetanujuanaa, quiaari cuno pueyajinijinio. Quiaacuajaari Galilea jiyajinijinio pueyano. Canaa tojishacari quiajaniya, quia pocuanuuri juhua nojori pocuanujua.

⁷¹Pedroori socua jiyanoohua sapojonu coteequiaari. Naa sequereeri:

—¡Pueyaso cuaara saniitioora janiyaqui, janiya jaara sapojiyani! ¡Seetanujuanaa, maja cua niishiniu cuno pueyano, canajiniji nia nequesoreetaacuajani!

⁷²Jiyacaritij, caacarajaari niunijionu pacuterohuacuahuaj. Pedroori jiyacari niishiqui naa Jesu sequesano nojuajatej: “Juhuanouaja caacaraja niunijionu pacutejiaquishacarijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiqui naa Jesu sequesano nojuajatej, jiyanoohua nujuquequeeri.

Jesuucuaara pueya saquiriojotasacari Pilato

(Mt 27.1-2,11-14; Lc 23.1-5; Jn 18.28-38)

15 ¹Tariquicuaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasanojiniji niishitiojonaatajuhuaj, Sanedrín* maanutanio. Nojoriiri moronucua Jesu jaatucutaquiaari Pilatoocua*. Cuno Pilatoocuaari Judea jiya jiyaniijia quiquiaari. ²Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

³Pueyacuara secojonaa jiyaniijianucuaari Jesuucuaara tonujuriquiaa queraatia sesa casaa. ⁴Pilatoori Jesu nequesotaro-huacuahuaj:

—¿Majateeri quenaaja quia riucuanuuja? Quia tojiri taa cuno pojori saquiriojotaa quiocuarani.

⁵Jesuuri maja na riucuanu quiriquiaa quenaaja. Cunora, Pilatoori jiyanoohua jiuujiatequiaari.

Na paraa sequesacari Jesu cuaara mosaaria

(Mt 27.15-31; Lc 23.13-25; Jn 18.38-19.16)

⁶Puetunu marijarajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracua-jani. ⁷Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juaashacari, Romano taucuaa jiyaniijia jiitianuucua Judiocuaca. ⁸Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijarajanaani.

⁹Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniuujia Jesuucuaara. ¹¹Pilato nequesotasacari nojori, pueyacuara secojonaa jiyaniijianucuaari jiyacari pueya shiniujuquiaari nojori sequenura Pilato, nojuaja cuaara carteera Barrabás. ¹²Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³Nojoriiri naa nacaree jiyanoohua:

—¡Cuaara mosaaria niyacutesanojinia teetesano!

¹⁴Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanoohua nacaree:

—¡Niyacutesanojinia quia teetere!

¹⁵Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niqitioereeri, niyacutesanojinia na teetesaanura.

¹⁶Jiyacaritij, soldadohuari Jesu jaatucuaquiaari jiyaniijia Pilato tijajiniaaco. Nojoriiri puetunu narta soldadohuajanaa rerejoteree Jesu shocua. ¹⁷Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaarihuua na nacaquera. ¹⁸Na nuhuaji, nojoriiri na rupaa paaretanu coteequiaari Jesu na macaatinuria:

—iJejee, Judiocuaca camarnuna nooj!

¹⁹Nojoriiri na naca piquirii naajuata. Na riocojotureejaariuhua. Nocuara mojoquetacoreeri juhua jiyaniijajanaa cariquimiaji, nojori sapojonuta na macaatinuiri nojuaja. ²⁰Naa na rerequetesaanu nuhuajitij, toque naatuqueeri nocuaji jocusaaquiaari. Tama na toquejaaja cushitishaaruari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetesaanura.

Jesu teetesacari niyacutesanojinia
(Mt 27.32-44; Lc 23.26-43; Jn 19.17-27)

²¹Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

²²Jesuuri shiitaniyojua tuhananuucua jiyatasaaquiaari. Cuno tuhananu sesa quiquiaari Gólgota. Nioori pueyano rupaajinia sequeya, “Pueyano nacaco”. ²³Soldadohuari Jesu raatequiaari vino juucua, mirrata* cojitishano. Saaja na ratuyaquiriiri. ²⁴Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacujitij, nojoriiri Jesu toqueya seraatiaquiaari tama nojorirajaaja.

²⁵Jiyacaritij, niyacutesanojinia na teetesacari, shusha pananu tacasacariiri quiquiaari. ²⁶Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni.

Naa naajiosano quiquiaariiri cuno rupotasanojinia: “Nioori Judiocuaca jiyaniijia”. ²⁷Jiyacaritij, caapiqui nohuasenuujuacaari Jesu shuriucua teetesosaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. ²⁸Naa tohuatequiaariiri taa tariucuaaanu Pueyaso Rupaajinia na naajiotasaaquiaaricujani. Naa sequeyari:

“Na sesaari sesa miijaca pueya sesacata cojiritiasaaquiaari naajiotasaaquahuaj”.

²⁹Pueya tajishacari nuucaco Jesu shuriuquioco, nojoriiri na macaatiquiaari. Na maanuquenuta naa na sequetuquiaariiri:

—iJaj! ¿Majateeri quiajaniya cumaacaracajuaja? ¿Quiaateeri jyaniriquiaa, quiaa jaara Pueyaso Secojoju tía niyartare, quia naata na tianu tucatanuhua jiuujianaraca juucajinia? ³⁰Quiaa jaara naa cumaacaraca qiritij, niyacutesanojiniji quia rosecuarajaj.

³¹Pueyacuara secojonaa jiyaniijanucua, Moisés Rootasanojiniji niishitiojonaari na macaatiquiaarijuhuaj. Tama nojorijiaarijia naa sequetooquiaari:

—¿Maatucua saa tamasaca naatanijioriquiaajaari? Tama nojuaja cutaraari maja na naata niyacutesanojiniji rosenu.

³²Jaara seetanujanaa quiri Pueyaso Jiyarosano, pa jiyaniijia na quiniuria, cuara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetesosano quiquiaani, nojoriiri na sesacariquiaajuhua.

Jesu cusosacari
(Mt 27.45-56; Lc 23.44-49; Jn 19.28-30)

³³Panacari, jiyari ninishiquiria quiquiaari puetunujanaa. Tarishiquiaariiri. Shusha tenacariishacari cuhuatemohuari.

³⁴Jiyacaritij, Jesuuri jyanohua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia cartere janiyani?”

³⁵Na shuriucua nujuatunaa tojtiasacari naa Jesu paaretasacari na rupaatej, nojoriiri sequeturee:

—iNia tojiri, supuetana Elías jiiquioonuyano, nocua na niniuria!

³⁶Tamonu pueyanoori ritia netequiaari namasu casaa na shiniuria jereca vinojinia. Na nuhuaji, na morotaree

naajuacuacari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—iPa shanacure! iSupuetana Elías jiyoteeri nocua niniutianiya na roshiniuria niyacutesanojiniji!

³⁷Jiyacaritij, Jesuuri jyanohua na rupaa paaretarohuacuahuaj. Cusoqueeri. ³⁸Jiyacaritij, Pueyaso Secojoju tiajiniaacuma, shiquiiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasoocua nojori tiuquishacari juucua, jiyanooshoojua nojori quishacari. ³⁹Cuno Romano soldadohua jiyaniijaari Jesu tajoji nujuariquiaa. Na niquishacari taa Jesu nacaquiaarini, naajuahuaj, taa Jesu cusoquiaari na rupaa na paaretanutani, jiyacariti nojuajaari naa sequeeree:

—iNio pueyanoqui seetanujanaa Pueyaso niyanu!

⁴⁰Maajipohuari tii quiriquiaajuhua. Tucuaanuji Jesu shootiaturiquiaari. María Magdalenaari nojoritia quiriquiaajuhua, socua narta maajipohuanio. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio Santiagoni, nojuajaari socua naatujua na sesaanucua Santiagojiniji. ⁴¹Puetunu nio maajipohuajanaari Jesu nuhuajinia quiquiaari. Nojoriiri nera pueraquenuuna quiquiaari, Galilea jiyajinia na quishacari. Socua queraatia maajipohuari tii quiriquiaajuhua, canapete Jerusalén tiacajiniara nijioquiaari Jesutacujani.

Jesu quete niasacari raaco
(Mt 27.57-61; Lc 23.50-56; Jn 19.38-42)

⁴²Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijonura. Saniniujujia, tariqui quiquiaariiri samaatenu juuca. Cunora, pueyari juhuacarijia jeenucuaquiaari puetunujanaa. ⁴³Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Samedrín* pueyara. Joseeri mijiria Pueyaso Jiyarosocoriquiano niqiniuuucua jiaataja quiquiaarijuhuaj, canaa Jiyaniijajanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴Pilatoori jyanohua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeeree Jesu quete na panura. ⁴⁶Joseeri jiyacari shanohua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuniooreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jyanohua puereetuca quejasano saajia. ⁴⁷María Magdalena, José nucua Maríano, nojoriiri na niqitiariquiaa tee na niasaareeni.

Jesu samiitiasacarihuua
(Mt 28.1-10; Lc 24.1-12; Jn 20.1-10)

16 ¹Samaatenu juuca jaara shocoquiaari, María Magdalena, Santiago nucua Maríajuhua, Salomeenio, nojoriiri shanohua jaanutaja masequiaari macuucua na tuujutasocoriquiano. ²Jyanohua tariquicuaji Domingo* juuca, shusha pananu muetasacari, nojoriiri raajinia quiojoquiaari. ³Nucuaaco na quiojosacari, tama nojorijiaarijia sequetooriquiaa: —¿Canteeri pocuaji shuquitiniutianiya tamocora raa tiotituni?

⁴Nojori jaara niqiquiaari raa, saajia niqitituriiri tariucua tamocora shuquitishano. Puereetuca saajiaari quiquiaari raa tiotituni. ⁵Nojoriiri raaco tiuquitiamaa. Mashaja niqititushiiri tii cajiyo nojori miaquetajara, cohuaja tucuaque toque

cajitiaano. Nojoriiri jiyanoehua shiriqituuquiaari na niqutiushacari nojuaja. Cuno mashajaari Pueyaso seru quiriquiaa. ⁶Maajipohua sequereeri:

—iMaja nia shiriqiniui! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesanojinia teetsaarucuaani. iNojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. ⁷Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niqiniutianiya, taa na sequecanu niajanuyacuajani”.

⁸Maajipohuari netecuatuuquiaariuhua raajiniji. Nojoriiri tetecaturiquiaa na shiriqiniutia. Majaari quenaaja tamasaca pueya na sequetunu quiquiaari na puerenuta.

Jesu muetasacari María Magdalenaacua

(Jn 20.11-18)

⁹Jesu samiitanu nuhuaji, cuno Domingo juucaja, shusha semaana* coteenu juucani, Jesuuri coteenujuanaa muetaquiaari María Magdalenaacua. Jesucuaajari tarijia siete samaruhua tohuatanijioquiaari cuno Maríaajiniji. ¹⁰María Magdalena niqiniui nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹María Magdalenaari nojori sequesee:

—Pueyanaa, iJesu tari samiitiarohua! iJaniya na niqiriini! Nojoriiri María sequesano cuaracashitirii saaja.

Jesu muetasacari caapiqui na saquiriojosano pueyacua

(Lc 24.13-35)

¹²Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niqishano quiriquiaa nojoriria. ¹³Nojori niishishacari nojuacuaja Jesu quiquiaari, nojoriiri ritia riujiuuquiaariuhua tamasaca nojorijinijinio nojori numootenuhuara. Naajuhuj, Jesu saquiriojosano pueyari nojori pohuatasano cuaracashitirii-jiuhuj.

Jesu rootasacari na jiyaramiquishocoriquiano pueya

(Mt 28.16-20; Lc 24.36-49; Jn 20.19-23)

¹⁴Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori quiniuucuaaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: “Canaa Jesu niqiriini, samiitiarohuacuaaqui”. ¹⁵Na nuhuaji, Jesuuri nojori sequeree:

—Nia quiaare puetunu jiyacajinijanaa, janiyajiniji Pueyaso rupaa nia pohuatanura, puetunu nia pohuatasanoocua tiuujiaa pueyapuejanaa jiyanooshaanura. ¹⁶Cante moojinia tiuquinishiya Pueyaso rupaacua na tiuuniuucuaani, Pueyasoori na jiyatenutaniya na pueyanora. Saniniuujia, cante Pueyaso rupaacua tiuyaquiiani, nojuajaari saniitosano quiniutianiya. ¹⁷Cucua tiuujiaacari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacuajitij, cucua tiuuniaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutianiyajuhuj. ¹⁸Naajuhuj, niaa jaara soconu sajitishaare, niaa jaara casaa raatesaarejuhuaj nia cusujuasaanura juucua, majaari nia cusonu quiniutianiya. Naajuhuj, cusosuhucua nia niasacari nia juaashiquia, cusosuhuari naataconutaniuhua.

Jesu tacasacariuhua jiyocuacaanu na Queecua

(Lc 24.50-53)

¹⁹Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojuajaari Pueyaso miaquetajara cajiquiaariuhua. ²⁰Na nuhuaji, na saquiriojosano pueyari quiojoquiaari Pueyaso rupaa nojori pohuatanura puetunu jiyacajinijanaa. Jiyaniijia Jesuuri pueyaracaanu nojori cumaquiriquiaa. Pueya niqitiriijaariuhua na cumaacata na pueya miiijosano, pueya niishiniuria maatia, Jesu jiyaramiquishano pueya pohuatasanoori seetanu rupaajanaa.

LUCAS NAAJOTASANO JESUCRISTOJINIJI

Niya pohanashiyari casaara Lucas naajiotaquiaari nioni

1 ¹Queraatia pueyari suraatia naajionu saniniujuquiaari puetunu canaa tajinia miishanojuanaa. ²Nojoriiri naajioquiaari taa Jesu jiyaramiquishano pueya pohanataquiaari Jesujiniiji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohanatanaara jiyatesaaquiaari. ³Janiyari niishiriojoriquiaani, maniaruhua quiocuaa cua naajionurajuhua cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniiji. ⁴Naacuajitij, quiocuaa naajiyaniija na coteenujiniiji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohanatasacari Tiuquinijiona Juan rasaanutaniya

⁵Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquihuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niquihuacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari.

⁶Zacaríasri necocua Isabelta maninia miijiaa quiquiaari Pueyaso niqiuara. Nojoriiri puetunu Pueyaso rootasanojuanaa tojtiajaca quiquiaari, taa Pueyasojiniji caminiujuninaa naajionuutaquiaaricujani. Nojoriicuaa maja na naata sesa casaa tonujusaanu quiquiaari, saaja maninia miijiaa nojori quishacari. ⁷Nojoriiri maja na muetunu quijia, niyajaru Isabel quiniucua. Naajuhua, nojoriiri maja tari na naata muetunu quiquiaari, saaquiapue nojori quishacari.

⁸Tamacari, Zacaríasri narta pueyacuara secojonaata poonijoriquiaa Pueyaso Secojoua tiajinia Pueyaso niqiuara Jerusalén tiacajinia. Jiyacari saniniujia nojori poonijosacariiri quiquiaari. ⁹Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jitiquiaari saaja naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiya, shanohua jaanutaja na catijianura tii. Cuno juuca saniniujia, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijianura. ¹⁰Na catijiasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹Jiyacaritij, Pueyaso seruuri Zacaríascuara muetaquiaari. Nujuariquiaari shanohua jaanutaja catijiasaqui miaquetajara. ¹²Zacaríasri shiriquirii na niquishacari Pueyaso seru. Jiyanhua na puerereeri. ¹³Pueyaso seruuri na sequeree:

—Maja puerenu Zacaríasnaa. Pueyasocujani quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. ¹⁴Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na pasacari. ¹⁵Quia niyanuuri cutara pueyano quiniutianiya Pueyaso niqiuara. Nojuajaari vino* ratuyashijia quiniutianiya, najatunacunio. Pueyaso Sohanuraca pueyano quiniutianiyaari na raaacarijijojua. ¹⁶Nojuajaari queraatia Israel pueya tacatonutanihua nojori Jiyaniija Pueyasocua. ¹⁷Nio Juanri

pa Jiyaniija puetana quiniutianiya. Nojuajaari pueyara Pueyaso sequesano caminiujunina supuetana Elías sohanu jitianutaniya, na cumaacanio. Naacuajitij, pueya jiuujia taraajonutaniyaari, nojori jiyanooniuria necohua. Naajuhua, nojuajaari tojtiaashijia pueya rootanutaniya maninia, Pueyaso tojtiajaca nojori quiniuria. Naacuajitij, pueya jiuujiaaari jeenucuasano quiniutianiya pa Jiyaniijaacuaji.

¹⁸Zacaríasri Pueyaso seru nequesotaree:

—¿Taa cua niishiniutianiyaari quia sequesano seetanujuanaa tohuatenutaniya quiria? Janiyari tari saaquianoni. Cua niquiocuaari motajuhua.

¹⁹Pueyaso seruuri na riucaaree:

—Janiyacujani Gabrielni*, Pueyaso taccoji nujuana, na sequesano cua miiniuria. Nojuajaari cua jiyaree cua pohanatana quiajaniya nio maninia casaa Pueyasojiniji. ²⁰Quiarijia saniniujia, cua sequesanoocua quia tiyacuquiniucua, quiaari tiquia quiniutianiya. Majaari quia pocuanu quiniutianiya cuaara raaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso panyacuajani.

²¹Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohua. Nojoriiri shiriquituri pueyaracaanu Zacarías tarishishacari Pueyaso Shuriucua Quiquiojinia. ²²Zacaríasri socua tohuatamohua. Majaari na naata pocuanu quiriquiaa. Nareja shishinioriquiaari. Naacuajitij, pueyari niishirii Pueyasoqui casaa niqitirii Zacarías, Pueyaso Shuriucua Quiquiojinia na quishacari.

²³Zacarías jaara puecaquiaari puetunu na poonijionu juucajanaa taa na sequesaaquiaaricujani, na tiajinia quiaarohuari. ²⁴Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuaara na shocojoquiaarijiaatijia cinco raca. Nojuajaari tama sequequiaarijiaaja: ²⁵“Quiarijiani, cua Jiyaniijaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶Seis raca jaara shocojoquiaari Isabel manajesacariacuaa, Pueyasoari na seru Gabriel jiyaree Nazaret tiacajinia, Galilea jiyajinia. ²⁷Tamonu niyacocua na jiyareeri, cante tari sequesaaquiaaricujani José jiyaniishano pueyanota na caminiuria. Na camiriquianoori supuetana jiyaniija David niquihuacuajinio supueno pueyano quiquiaari. Niyacoo sesa quiquiaari María. ²⁸Pueyaso seruuri nocua tiuquimiaa. Na sequereeri:

—Janiyari quiocua jiyarosareeni, Pueyaso shuquiritianu niyacoonaa. Jiyaniija Pueyasoari quiata quia, socua shuquiriaatia quia quiniuria tamasa maajipohuajiniiji.

²⁹Maríari jiyanhua tacaquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequere janiyani?” ³⁰Na nuhuaji, Pueyaso seruuri na sequeree:

—Mariana, maja puerenu. Pueyasoari quia shuquiritianutianiya. Quiaacuajani na timitianu. ³¹Quiarijiani, quiaari manajenutaniya. Quiaari cayaniyocua ranutaniya. Quiocua na sesojore “Jesu”. ³²Nojuajaari cutara pueyano quiniutianiya.

Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. ³³Israel pueya jiyaniijia quiniutianiyari. Pueyaracaanu jiitianutaniya na pueyari. Majaari na shaajenu quiniutianiya Jiyaniijia na quishacari.

³⁴Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵Pueyaso seruuri na sequere:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojjia quiniutianiya.

³⁶Naajuhua, quia supuetanajiniinio motaja Isabelri neyanu ranutaniyajuhaaj. Cuno maajiiri sequesaaquiaari “niyjaru maajitia”. Naajaa, seis racaari tari na shocojiya na manajesacari. ³⁷Pueyasora, majaari jiyajeneta casaa quini. Nojuajaari cumaacaraca na miiniuria puetunu na panishanojuanaa.

³⁸Maríari sequere:

—Maniacuajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecuajani. Na nuhuaji, Pueyaso seruuri quiacuhua.

María quiasacari Isabel niqiniuucua

³⁹Maríari jiyacari quiaquiaari na secoonuta Judea jiyajinia, Zacarías tiajiniaara tamonu tiacajinia. Cuno jiyari tuhuananuharaca. ⁴⁰Zacarías tiajinia María tiuquishacari, Isabel sequereeri. ⁴¹Isabel tojishacari María sequesano nojuaja, iconaajaari na jiniacuma nujuanequee! Pueyaso Sohuanuuri Isabelcua tiuquiqui na cumaaca na jiitianura. ⁴²Naacuajitij, Isabelri jiyacari na rupaa paaretee. Naa María sequereeri: —iPueyasocujaari socua maninia miiriucuaa quiajaniya tamasaca maajipohuajini! iManinia miiniutianiya quia niyanuajariuhua! ⁴³¿Janiyateeri pueya tojishano maajini, cua Jiyaniijia nucua tiuquiniuria cua tiajinia, na niqiniuria janiya? iMaja! Naajaa, ijyanohua timianijia! ⁴⁴Shusha cua tojishacari quiajaniya cua sequeyano, cua mueyari cua jiniacuma nujuanequee na shuquiriniutia. ⁴⁵Shuquiriaatia quia quiri, quia tiuuniucua Pueyaso sequesanoocua quiajaniya.

⁴⁶Maríari sequere:

—iCoojia jyanohua shuquiritiaa cua Jiyaniijia Pueyaso!

⁴⁷iCua sohuanuuri cua Jiyanoonia Pueyaso timitiaani!

⁴⁸Juhua najuhuaa quijianijia. Naajaa, Pueyasoori cua jyanoorii. Cua saquiriojorucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritasano María”.

⁴⁹iPueyasoori jyanohua maninia miirii janiya!

Nojuajaari puetunu cumaacaracajanaa. Nojuajaari tojetaarucujanaa maninia quijia. ⁵⁰Nojuajaari pueyaracaanu jyanooquiaa na tojtianaa, canapute na rerequeteyaquijiacacuajani. ⁵¹iNojuajaari jyanohua maninia miiquiaa na cumaacata! Nojuajaari niishijia pueya shocotequiaari, canapute tama na cuaqueyajaaja jiyatequiaari juhua niishijiacaracuajani. ⁵²Nojuajaari cutara jiyaniijianucua jatatee, cuno pojori jyanishano niishiyashijia pueya jiyatesaanura jyanijia nojori niti saniniuujia. ⁵³Miaajeejunucua tootjioreeri maninia sumatuuta. Puera casamiriaca pueya taanuquiaariiri, casaaju nojori quiojonura. ⁵⁴Na pueya Israel naacureeri. Majaari na niyjetanu quiaari nojoriicua na taraajenu. ⁵⁵Naa miiquiaariiri taa na sequequiaari pa supuetanaa Abraham sequenciaari: “Seetanujuanaa quiocua taraajenutaniyania, quiocujinio superiquiano pueyacuano”.

⁵⁶Na nuhuaji, Maríari queraatia tarishiquiaari Isabel tiajinia. Jiuujianaraca raca nuhuaji, Maríari tacatequiaariuhua na tiajiniohua.

Tiuquinijiona Juan rasacari

⁵⁷Na nuhuaji, Isabel rasacari quiquiaari. Jiyapueratereeri.

⁵⁸Na shuriucua quiniaa, mariyata na jiyasoocujinio supueno pueyajuhua, nojoriiri jyanohua shuquiriquiaari nojori tojishacari taa Pueyaso jyanohua taraajequiaari Isabelcua, na shuquiritiniuria neyanuta. Nojoriiri Isabelta shuquiriquiaarijuhuaj. ⁵⁹Nojoriiri Zacarías tiajinia rerejoquiaari conaaja jiitiasacari ocho juuca, na cararaatuuquia co miatesaanura, taa Moisés rootaquiaaricujani. Nojoriiri na sesojonu paniriquiaa juucua Zacarías, na que sesaanucua na quiniuria. ⁶⁰Na nucaari saaja sequere:

—iMaja! Sesojosaanutaniyano “Juan”.

⁶¹Pueyari saaja sequere:

—¿Casaarateni? iMajaari quenaaja tamonu quia pueyajiniinio cuno sesaraca na quini quiquiaari! ¿Casaara naa quia sesojonu paniyarini?

⁶²Cunora, pueyari na que Zacarías shishinioree na nequesotanura taa na sesojonu paniriquiaa neyanuni.

⁶³Zacaríasri naajioju casaa maseree na naajionura tii neyanu sesarano. Naajioreeri: “Na sesa, Juan”. iPueyari jiuujiatee!

⁶⁴Jiyacaritij, Zacarías nitiiri sasaquitiacuhua. Juhucatecara pocuarohuari. Pueyaso miishano pohuataree pueya niqiarari, na shuquiritasacari Pueyaso. ⁶⁵Cunora, na tia shuriucua quiniaa pueyari jiuujiatee. Puetunu niojuanaari caminiujuushaquiaari puetunujuanaa cuno Judea tuhuananuhua quijia pueyara. ⁶⁶Puetunu nio tojtianaa pueyajanaari niishirojonuuquiaari. Tama nojoriijiaarjia nequesoretoquiaari:

—¿Casaquitijia cuno mueya quiniutianiya na nuhuajitijia?

Pueyari niishiquiaari Pueyasoori seetanujuanaa cuno mueyata quiriqiaa, na cumaquiniuria.

Zacarías sequesano na shuquiritasacari Pueyaso

⁶⁷Na que Zacarías jiuujiaari jyanohua mishaja quiriqiaa Pueyaso Sohuanuta. Pueyaso Sohuanuuri na pohuataree. Naaratej, Zacaríasri naa sequequiaari:

⁶⁸—iJyanohua maninia pa Jiyaniijia Pueyaso, pa supuetana Israel Jiyaniijia! iCuaara jyanohua shuquiritasaria mijiria na niuucua na pueyacu, pocuaji na tacunura!

⁶⁹Pocua jyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niqiohuacuajinio rasanutaniya, taa Pueyaso sequenciaari tariucuaacuajani. ⁷⁰⁻⁷¹Tariucuaacuano na sequenu panishano caminiujuniacuajaari naa pohuataquiaari pa supuetanaa niquiaratej, taa pa paraa na ritianutaniya pocujini, pa niqiniu paniaquijia pueyano.

⁷²Nojuajaari sequenciaarijuhuaj, majaari na niyjetanu quiniutianiya na sequesano pa supuetanaa, pocua na taraajenu. ⁷³⁻⁷⁴Pueyasoori pa supuetana Abraham sequenciaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijonura shitimia. ⁷⁵Nojuajaari Abraham sequenciaarijuhuaj maninia quijia pa jataniniutianiya-quiniaari, saaja nera pa quiniuria pueyaracaanu.

⁷⁶Quiajaniya saniniuujia, quiyanuniyojuanaa, quiaari sesojosaanutaniya Jiyocuacaanu Quinia sequenu panishano caminiujunia. iQuiaari pa Jiyaniijiaranojuanaa puetanutaniya, juhua na nuu jeenuariquiano!

⁷⁷Quiocua Pueyaso saquiriojosano pueya niishitijore, nojoriiri na naata jyanoooshano quini sesa nojori miishanojinijia Pueyaso pueya nojori quiniuria. ⁷⁸iPa Pueyasoori jyanohua jyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua.

⁷⁹Maninia pa cuhuatanutaniyari, maninia pa rucanejonura Pueyaso niqiaari, panaatia poojiacata.

Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

⁸⁰Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasocua tiuuja na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiujuniu coteequiaariiatijia narta Israel pueya niquiara.

Jesu rasacari
(Mt 1.18-25)

2 ¹Tiuquinijona Juan rasaanu nuhuaji, jiyaca jiyaniijijanaa César* Augustoori Roma tiacajiniji sequequiaari puetunu na jiiitasano pueyapuejanaa cuaara serojosaaria puetunu nojori jiyacajinijanaa. ²Pueya jaara coteenujuanaa serojosaaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. ³Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴Joseeri jiyacari Nazaret tiacajinia quiriqiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. ⁵Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijuhua Belén tiacajinia, nojori sesaca naajiotasaanura tii. José niqiuocuaranoori tariucua manajaraca quiriqiaa. ⁶Belén tiacajinia nojori quishacari, jiyacari tari quiquiaari María ranu juuca. ⁷Tii jiyapueratereeri. Conaaja jiuuicoquiaari toqueraacuacajiniaari. Na nucuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria rucoona tiuquijia tijajinia.

Pueyaso seya muetasacari borrego cojuanaa pueyacia

⁸Belén tiaca shuriucua cuno niucuaaja, borregohua cojuanaari suteriquiaa cuhuariquiajajinia, na seya nojori cojuasacari.

⁹Canashiyajijia Pueyaso seruuri nojoriicua muetaquiaari. Jiyaniijia Pueyaso shacantuua cumaacaari nojori cuhuataquiaari. ¡Nojoriiri jiyanhua shiriqitiuri! ¹⁰Pueyaso seruuri nojori sequere:

—iMaja nia puerenu! Niaacua nimiaanjia, jiyanhua maninia casaa cua pohuatanura nijajaniya. Cunora, puetunu pueyajanaari shuquiriniutianiya. ¹¹iNiaacuaji Tacunaari tari rasaaree supuetana David tiacajinia! Nojuajaari Pueyaso Jiyaroso, pa Jiyaniijia Cristotuhaj. ¹²Niaa jaara nocua quiaare, niaari conaaja riuriatanutaniya toqueraacuacajinia jiuuicosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano nijajaniya.

¹³Jiyacariitij, narta Pueyaso seyari na cojishii. Jiyanhua queraatia quiriqiaari. Nojoriiri naa maninihuaqueetariquiaa Pueyaso:

¹⁴—iJiyanhua maninia pa Pueyaso, jiyocuacaanu Quijia! iNojuajaari jiyanhua pa shuqiritiasano, na jiyaronuucua jiyacua quiniaa Jiyanoonia! Naacuajitij, cana Pueyaso shuqiritiaani, nojoriiri jiyanoootionutaniya narta pueyata.

¹⁵Pueyaso seya jaara tacataquiaariuhua jiyocuacaanu na quiquiojinihua, borregohua cojuanaari tama sequetooquiaarijajaja:

—iBelén tiacajinia pa quiaarequij! iPa niquishii cuno, casaajiniji pa Jiyaniijia numooteree pajaniyacujajani!

¹⁶Nojoriiri ritia quiojoquiaari. Conaaja riuriatuseeri, María, Joséni. Conajaari juyaca miaquejajinia niasano mariquiaa.

¹⁷Nojori niquishacari conaaja, nojoriiri ritia tii quiniaa pueya caminiujuri conaajajiniji Pueyaso seru pohuatasano nojori.

¹⁸Puetunu pueyajanaa, cante nojori pohuatasano tojiriqiaani, nojoriiri jiuuujatere. ¹⁹Majaari María niyjetanu quiquiaari puetunu nojori pohuatasanojuanaa. Noojajinia na niishiriojori-

quiaa pueyaracaanuuri. ²⁰Borregohua cojuanaari quiojoquiaariuhua. Nojoriiri Pueyaso maninihuaqueetariquiaa nojori tojishanojiniji, nojori niquishanojinijinio. Puetunujaanaari naa quiquiaari taa cuno niucua Pueyaso seru pohuataree nojoricuajani.

Conaaja Jesu pasacari Pueyaso Secojoua tijajinia, Pueyasora jiyatesocoriqiano

²¹María conaaja jaara ocho juuca jiiitiaquiaari, na cararaatiuuquia coori miatesaaquiaari, taa Moisés rootaquiaari-cujajani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Maríacuajani, na manajeyaquishacarijia.

²²Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niqiuara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³Na queyari naa miqiaaritij, tariucuaanu Pueyaso Rupaajinia naajiotasano tojtijajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora jiyatesaaria”. ²⁴Naaratej nojoriiri quiaaree na seru mosaanura nojoriicua Pueyaso Secojoua tijajinia, juhua jeequesano nojori quiniuria Pueyaso niqiuara, taa pueya rootasaaquiaari Moisés naajiotasanojinijicujajani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiaquiri, cuaara puecoosaaria caapiqui shinijia”.

²⁵Jiyacariitij, tamonu pueyanoori Jerusalén tiacajinia quijia quiriqiaa. Na sesa quiquiaari Simeón. Nojuajaari maninia mijia quiquiaari Pueyaso niqiuara. Pueyaracaanu Pueyaso shuqiritijia quiquiaariiri. Nojuajaari pueyaracaanu sashijia Pueyaso cuaara jiyaroora Israel pueyacuaji Tacuriquiano. Nojuajaari Pueyaso Sohuanu jiiitaja. ²⁶Pueyaso Sohuanuuri na niishitiquiaari majaari na shaajenu quiniutianiya nojuaja cuaara niqiri Cristojajitijia, Pueyaso jiyarosaariqiano. ²⁷Pueyaso Sohuanuuri na jiyatequiaari namitia cuno juuca Pueyaso Secojoua tijajinia. Naacuajitij, Jesu jaara pasaaquiaari Secojoua tijajinia, nera na miishaanura puetunu tariucuaanu rootasanojuanaa, Simeónri jiyacari tii na niqiriiri. ²⁸Simeónri Jesu paree. Na cacanuureeri. Naa Pueyaso sequere jiyanhua na shuquiriniutiaari:

²⁹—iCua Jiyaniijianaa, tariucujaja! ¡Quiarijia cutara cua naata cusonu juhuajaniya, shuquiriaatia cua quishacari! Quiaacuajajari tari cua niqitirii tarijia quia sequesano janiya, quia seru cua quiniucua. ³⁰Tari niqiriiri quia Jiyarosanocujajinjia, canaacuaji Tacuriquianoni.

³¹Nojuajaari quia niqitiosano puetunu jiyacajinia quiniaa pueyapueecuarajanaa. ³²Nojuajaari puetunu taucuaca jiuujijajanaa cuhuatanutaniya, maninia nojori niishiniuria quiajaniya. Naajuhaj, quia pueya Israelni, nojoriiri tamasa pueya shuqiritiasano quiniutianiya na seera.

³³Jesu que, na nucujuhuj, nojoriiri jiuuujatere na Simeón sequesacari conaajajiniji. ³⁴Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiiitaa maninia nijajaniya.

Jesu nucua María sequereeariuhuj:

—iCua tojiri! iNio conaajaari cutara pueyano quiniutianiya!

Queraatia Israel pueyari juhua tiuriiniutianiya nojori ruuretasacari nojuaja. Saniniujia, queraatia Israel pueyari cumaatia nujuatjuaca quiniutianiya, nocua nojori tiuushacari. Na cumaacata na miiniucua, pueyari na naata Pueyaso niishini maninia. Naajaa, queraatia pueyari na ruuretanutaniya saaja. ³⁵Naacuajitij, tama pueya niishiriojosano noojiacajinjiaarijia niishishaanutaniya. Quiara saniniujia, jiyanhua taraatiaari quiniutianiya. Quiojiaari juhua

mueruuta tohuariquitiishaanutaniya quia mueyacua quia miishacari.

³⁶Cuniquijia, Pueyaso Secojoua tiajiniani, tamonu motajaari tii quiriquiaajuhuj. Cuno motajaari Pueyaso sequesano caminiujunua quiriquiaari. Na sesa quiriquiaari Ana, Fanuel niyatu. Nojuajaari supuetana Israel niyanu Aser niqiuohuacuajinio supueno maaji quiriquiaari. Jiyanohua motaja quiriquiaari. Shusha niyadoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷Neyaca cusunu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiriquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiriquiaari Pueyaso na secosacari pueyaracaanu. ³⁸Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiari: “iPaacarasho!” Na nuhuaji, nojuajaari juhuacatecara Jesujiniji pohuateree Pueyaso Jiyarosocoriquiano sashijiaca pueya niquiara. Nojori sequereeri:

—iNiocuajaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajiniuhua

³⁹Jesu queyari puetunu Moisés naajioneejinia Pueyaso rootasanojuanaa tucataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniuhuaaja, Nazaret tiacajinia. ⁴⁰Naatujua Jesuuri maashiquiaari. Socua cumuecara quiquiaariiri, maninia niishijiaranio. Pueyasoori jiyanoehua na naacujua.

Mashajaniyojua Jesu quishacari Pueyaso Secojoua tiajinia

⁴¹Puetunu marijiajananaa, Jesu queyari quiojoquiaari Nazaret tiacajiniji, Jerusalén tiacajiniara, Pascua* juucajinia nojori queranacunura. ⁴²Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jitiiquiaaricujajani puetunu marijiajananaa. ⁴³Queranacunuunu jaara puequequiaari, Jesu queyari quiojoriquihua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴Nojoriiri jiyaniquiaari Jesu naasucua narta quiojanaa tajinia quiariquiohuajuhuj. Naacuajitij, nojoriiri juhuajaniya rucuaneree puetunu cuno juucajanaa. Cuno niucujaja, nojoriiri Jesu pajequiaari nojori pueya tajinia, nojori niishishano pueya tajiniano. ⁴⁵Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tiajinia, Moisés Rootasanojini niishitiojanaa pueya tajinia cajiyo. Nojori tojiriquiaari. Nojori nequesoreetariquiaariuhuj. ⁴⁷Puetunu pueyajanaa, canapue te tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. ⁴⁸Na queya jaara na niquiquiaari, nojoriiri shiriiquitiuquiaari. Na nucuaari na sequeree:

—Quiyanunaa, ¿casaara naa quia miirri canaani? iJaniyari quia queta quia pajeriquiaani jiyanoehua canaa tacaaniutia quioqua!

⁴⁹Jesuuri na riucaaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojoua tiajinia quiniucua jiaatiaani?

⁵⁰Majaari nojori niishiniu quiquiaari Jesu sequesano.

⁵¹Jesuuri na queyata quiaarohua nojori tiajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵²Jesuuri socua maashiquiaari, socua niishijia quiquiaariuhuj. Pueyaso shuquiritiasano quiquiaariiri. Puetunu pueyajaari na shuquiritiaquiaarijuhuaj.

Tiuquinijiona Juan pohuatasacari Pueyaso rupaa cariquia jiyajinia (Mt 3.1-12; Mr 1.1-8; Jn 1.19-28)

3¹Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince marijiaari tari shocojoquiaari César* Tiberio, jiyaniijajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri* saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajiniano. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucua César Tiberio jiyatesano quiquiaari cuno jiyacajinia. ²Jiyacaritij, Anásri Caifásta Judiocuacaacara secojanaa jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³Naaratej, Juanri puetunu Jordán moo shuriquioo jiyacajanaa tajiquiaari na poojotasacari Pueyaso rupaa pueya niquiara. Nojuajaari naa pohuataquiaaritij:

—iNioojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jiyanooniuria nijaniya sesa nia miishanojiniji!

⁴Naacuajitij, supuetana Isaías naajiotasanoori tohuateequiaari. Pueyaso sequenu panishano caminiujunua na quiniucua, nojuajaari naa miriqui naajiotaquiaari superiquiano Juanjiniji:

“Pueyano rupaari tojishiya cariquia jiyajinia nacaano.

Sequeyari: ‘iJiyaniijia nuura nia jeenucua! iPuetunu manijajanaa nia nuunure, maja shuutiuni na quiniuria!

⁵iPuetunu tacocujanaa cuaara mishiquiojosaaria maninia jamatunu na nuu quiniuria! iPuetunu tuhananuhujanaa cuaara jiuurioosaaria jacanana na nuu quiniuria! iShuyorocotunu nuu cuaara pocuareesaaria! iPuetunu surocoshiquiajanaa cuaara mishiquiojosaaria jacanana na nuu quiniuria!

⁶Naacuajitij, puetunu jiyacajinia pueyajaari Pueyaso Jiyarosano niishiniutianiya, Pueyaso jiyanoonitriquiano pueyani”.

Naa miriqui Isaías naajiotasanoori, cunoori pueya numooteriquiaa juhuacaritia nojori jeenucuanura noojiaa, Jiyaniijia Jesu tojitiajaca nojori quiniuria.

⁷Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaquiaari:

—iNiaacuajaari juhua sacocua! ¿Cante nia numooteree nia mashiniuria jiyanoehua Pueyaso saniitionu panishacari nijaniyani? ⁸iManinia miijia nia quiri, canaa niishiniuria niaari seetanujanaa nioojiaa tacatoree sesa nia miiniujiniji! iMajaari najuhua nia nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua”! iNia niishiri, Pueyaso jaara paniri, nojuajaari na naata nio saijiniji shipininiu Abraham niqiuohuarajuhuj! ⁹iPueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano. Naajuhuj, nijaniyari juhua sesa muetuna naana, maninia miyashijia nia quishacari. iNiaari quera saniitoshiyacuaja!

¹⁰Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹Juanri nojori riucaaree:

—Cante querajaqueya toqueracani, nojuaja cuaara niqutioora taque cante toqueejuni. Naajuhuj, cante miaquesanoracani, nojuaja cuaara niqutioora miaquesanoojunucua.

¹²Roma tiacajinia quijia jiyaniijajanaa Césarra cumaneeca masejonaari Tiuquinijiona Juancua nijioquiaarijuhuaj.

Nojoriiri tiuquinijosano quiniu paniri quiaajuhua. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

¹³Juanri nojori riucaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

¹⁴Naajuhua, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucaaree:

—Niaacuajaari puecotajaraca. Naajaa, majaari pueya casami nia jaariutianu, nojori nia miananajonuta, nojoriicuaa nia tonujusacarijuhua nia sapojonuta. Juhua janiya nia quiri saaja nia jiyaniijia niqutiosano cumaneecata.

¹⁵Pueyari jyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniuucua jiaatiata. Naaratej, nojoriiri jyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej. ¹⁶Nocuai, Tiuquinijiona Juanri puetunu pueyajanaa sequere:

—Janiya nareja nia tiuquinijia moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. iNojuajaari Pueyaso Sohuanu tiuquinijionutaniya nioojiajinia, na cumaaca nia jitianura, seetanujanaa maninia miiijia nia quiniuria! iNojuajaari juhua manitia nia saniniujuniutianiyajuhua, maninia jiuujaraca nia quiniuria! iNojuajaari socua jyanohua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷Niaari niishiyacuaa taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tiajiniaaco. Naajuhua, cuno pueyanoori tari niya quiya na pueya na saquiriojonura na tojiyashijia pueya tajiniji, na rijiosocoriquiano nata nojori quiniuria. iSesa pueyari juhua trigo sucua catijiasaanutaniya saniniuujia! iNojoriiri jatasaanutaniya manijinia! iCuno maniiri maja na maquesanu quiniutianiya!

¹⁸Tiuquinijiona Juanri naa pohuataquiaari Pueyaso rupaa pueya niqiuara. Maninia rupaari, na tojtiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. ¹⁹Jiyaniijia Herodesri jiyacari tarajanu Felipe niqiuocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinii quiquiaari saaja. Jiyaniijia Herodesri socua queraatia sesa casaa miiijia quiquiaari. ²⁰Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniari.

Jesu tiuquinishacari moojinia

(Mt 3.13-17; Mr 1.9-11)

²¹Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhua. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. ²²Pueyaso Sohuanuuri Jesuucua roseyaree juhua mococoonu niquishano. Jiyocuacaanuji, Pueyaso rupaari tojishaaree sequeyano: —iQuiaacuajaari cua panishano quiyannuiojua! iJyanohua quia shuqiritianijia!

Jesu supuetanaa sesaca

(Mt 1.1-17)

²³Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jyaniquiaari José naasucua seetanujanaa na que quiquiaari. Joseeri Elí niyanu quiquiaari. ²⁴Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri

Jana niyanu quiquiaari. Janaari José niyanu quiquiaari.

²⁵Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³²Natánri David niyanu quiquiaari. Davidri Isaf niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. ³⁷Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

Samaruhua jiyaniijia saniniujiushacari Jesu

(Mt 4.1-11; Mr 1.12-13)

4 ¹Jesu quiasacariuhua Jordán moojiniji, Pueyaso Sohuanuuri noojiajinia quiri quiaa puetunu na cumaacajanaa na jitianura. Pueyaso Sohuanuuri na jiyatequiaari pueya jiyaqui cariquia jiyajinara. ²Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri.

³Jiyacaritij, Sesaacaari na sequere:

—Quiaa jaara seetanujanaa Pueyaso Niyanu quiri, nio saaja quia jataniri neecaruura na quiniuria.

⁴Jesuuri saaja na riucaaree:

—Pueyaso Rupaaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujanaa saminio quiyari na tojishacari puetunu Pueyaso Rupaaajanaa”.

⁵Na nuhuaji, Sesaacaari Jesu jiyataaree jyanohua jiyaconaja tuhuannuucua. Sesaacaari ritia niqutirii Jesu puetunu mijiria jiyacajanaa. ⁶Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutiosaaquiaarini. Naacuajitij, janiyari cumaaca

niquitioquiaani cana cua niquitionu paniyacuajani, jiyaniijara na quiniuria. ⁷Puetunujuanaari quiara quiniutianiya, quiaa jaara cucuara mojuquetare quia shuquiritianura janiya.

⁸Jesuuri saaja na sequeree:

—Pueyaso Rupaajiniacuajaari naa naajiotasano quiya:

“iQuia Jiyaniijia Pueyaso quia shuquiritiare! iSaaja nojuaja quia tojiri!”

⁹Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri. ¹⁰Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. ¹¹Nojoriiri quia quianutaniya, saajiaacua quia jiriataaquiniuucaji”.

¹²Jesuuri na riucaaree saaja:

—Naa naajiotasano quiyajaarihua Pueyaso Rupaajinia:

“Maja quia Jiyaniijia Pueyaso quia saniniujuuniu”.

¹³Sesaacaari naa Jesu saniniujuuniu puecaquiaari puetunujuaana. Majaari quenaaja na naata quiriqiaa sesa na miitiniuria. Naaratej, rupaquijia na tarinitiaquiaari tamacaririari.

Jesu coteesacari na poonijosano miiniu Galilea jiyajinia

(Mt 4.12-17; Mr 1.14-15)

¹⁴Na nuhuaji, Jesuuri tacatequiaarihua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujuutioquiaari.

¹⁵Jesuuri Pueyaso secojojua tiajinaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia

(Mt 13.53-58; Mr 6.1-6)

¹⁶Jiyacarijij, Jesuuri quiaquiaari Nazaret tiacajinia, tee na canashitishaaquiaaricuajani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucuajani. Nojuajaari nujuaquiaari Pueyaso Rupaa serojonura pueya niquiara. ¹⁷Pueyari na niquitioree tariucuacaanu Pueyaso sequesano caminiujuunia Isafas naajionee jiuniososano, pueya niquiara na serojosocoriqiano. Jesuuri na saacartaree. Serojonu coteereeri tee nio naajiotasano quiyacuajani:

¹⁸“Pueyaso Sohuanuuri coojiajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamijiuniucua pueya niquiara. Cua jiyaroreejaarihua Sesaaca quioosano pueya cua pohuatanura maninia rupaa Pueyasojinijia. Naacuajitij, nojoriiri cartesano quiriohua Sesaaca sapojosojinijia. Cua jiyaroreejaarihua cariyujuarujuri pueya namijiaa cua jecanura, maninia niquijiaari nojori quiniuhua. Cua jiyaroreejaarihua taraatia miitiasusano pueya cua jiyatenura shuquiriaatia quijiacara. ¹⁹Cua jiyaroreejaarihua cua pohuatanura pueya niquiara, quiarijiaari Jiyaniijia Pueyaso jiyanooshacari pueya”.

²⁰Na serojonu nuhuaji, Jesuuri naajionee jiuniorohua. Na niquitiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa. ²¹Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateere nia niquiara.

²²Puetunu pueyajanaari jiuujiatere shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojoriijaarijia nequesoreetooriquiaa:

—¿Majate nio pueyano José niyanucuaja, niya pa tiacajinia maashiniotej?

²³Jesuuri nojori sequeree:

—Naa jiyoteeri cua sequenu paniya nio tariucuacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniajaajani, taa nia tojiquianucuaja cua miishanojinijia Capernaum tiacajiniacuajani.

²⁴Jesuuri socua sequeree:

—Seetanujuanaa nia sequeyanijia, puetunu Pueyaso sequenu panishano caminiujuuniaajanaari tojishoo quijia, tama nojori tiacajiniajaaja. ²⁵Supuetana Elías quishacari, queraatia mashiquiopueeri quiquiaari Israel jiyajinia. Jiyanohua miaajesacari quiquiaariiri maru niyaquishacari pueyaracaanu. Jiuujianaraca marijiaari shocajoquiaari socua seis racanio, maru niyaquishacari. ²⁶Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasooocua tiuujia, cuno taatu miaquesanoori maja na pueetanu quiquiaari nojoriria. ²⁷Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaquiaari cutara, Siria jiyajinijinio pueyanoni.

²⁸Pueyaso secojojua tiajinia quiniaa pueya tojishacari naa Jesu pohuatasanootej, puetunu nojorijianaari jiyanohua juaaquioree. ²⁹Nojoriiri saneecuatuquee. Jesu caponeeturee nojori tiacajiniijiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricuajani. Nojoriiri na capotunu paniriquiaa juuca tacojijaji naa na monura. ³⁰Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

Samaruraca pueyanojiniji pohuatasano

(Mr 1.21-28)

³¹Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa.

³²Nojoriiri jiuujiatere na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujuunia.

³³Pueyaso secojojua tiajinia, samaruraca pueyanoori jiyacari tii quiriqiaa. Na niquishacari Jesu, naa jiyanohua nacareeri:

³⁴—iNazaret tiacajinijinio Jesunaa! ¿Taa quia miiniu paniya canaani? iCanaa quia niquiri nareja! ¿Quiaate tari niyaree canaa saniitionuucua? iQuia niishiyacuajaniijia, cante quiajaniyani! iQuiaacuajaari sesa miyashijia Pueyaso Niyanu!

³⁵Jesuuri samaru sequeree:

—iQuia sanaajere! iQuia tohuatate nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quiri pueyano. ³⁶Puetunu pueyajanaari shiriiquitiuri. Tama Jesujiniji sequetooreejaarijia:

—iNia tojiri! ¿Taamueca rupaatucuaanojoni? iNio pueyanoori samaruhua jiyaronu niishiya juhua jiyaniijia! iNa rupaari jiyanohua cumaacaraca! iCunora samaruhua tohuataniriiri!

³⁷Puetunu cuno jiyajiniajanaa, Jesu miishanojinijiri caminiujuushaquiaari pueya niquiara.

Jesu naatanishacari Simón Pedro reyarucua

(Mt 8.14-15; Mr 1.29-31)

³⁸Jesuuri Pueyaso secojojua tiajiniji tohuareetaquiaari na pueyata. Quoiojijareeri. Simón tiajinia tiuquitiushiiri. Simón

reyarucuaari jiyacari jiyanoehua naseeca matariquiaa. Pueyari Jesu sequeree na naataniniuria. ³⁹Jesuuri cusosu caco nujuasee. Jesuuri na naseeca cusonu jiyaroree. iNa naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua
(Mt 8.16-17; Mr 1.32-34)

⁴⁰Panenu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuaacujanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. ⁴¹Naajuhua, queraatia samaruhuari tohuareetaquiaari cusosuhuaajiniji. Samaruhuari naa nacaquiaari Jesuucua:

—iQuiaacuaja Pueyaso Niyanu!
Jesuuri nojori juaarii. Majaari na shanacunu quirii nojori pocuanura, nojori mariqui pueya niqiuara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa
Pueyaso secojonuujua tiajiniaqueya
(Mr 1.35-39)

⁴²Tariquicuaji, Jesuuri tiacajiniji quiaquiaari tamaquicua tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³Jesuuri nojori sequeree saaja:

—Janiyari jiyarosaaquiaarini pueyapue niqiuara cua pohuatanura quiarinio Pueyaso Rupaa. Quiarijiani, Pueyasoori pueya jiyanooni paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajinijaniuhua. Janiyacuajaari cunora jiyarosaaquiaarini.

⁴⁴Naacuajitij, Jesuuri puetunu Judiocuaca jiyajinijanaa rucanejoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

Sapitiaajara jaquerootanaa shiriqitiushacari
(Mt 4.18-22; Mr 1.16-20)

5 ¹Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoehua pueyari nocua catecanoquiaari catecaji na tojtianura nojuaja. Nojoriiri Jesu tanuujuriquiaa puera. ²Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³Jesuuri Simón botejinia tacaquiaari. Simón sequereeri cuara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵Simónri na riucaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. iSaa shaa quiriquiaanojua! Naajaa, quiaacuaja na sequeya, socua canaa jaquerootarohuacuarajij.

⁶Nojori jaara socua na shiyaruhua jartaquiaariuhua, ijyanoehua queraatia sapitiaaja ritiatuereeri! Shiyaruhuari sureequetanu coteequiaari. ⁷Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. iQuera tiuquitiariquiaari queraatia sapitiaajata! ⁸Simón Pedro niquishacari naa Jesu miishano nojoriratej, Jesuucuaa mojuquetareeri. Jesu sequereeri:

—iJiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

⁹Simónri shiriquirii, jiyanoehua queraatia sapitiaaja nojori quiasacari. Nata quiniaa pueyari shiriqitiuriijiuhuaj. ¹⁰Cuno pojoritia quiriquiaajaariuhua Zebedeo niquioehua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

Jesu naatanishacari lepraraca cusosu
(Mt 8.1-4; Mr 1.40-45)

¹²Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³Jesuuri na quiaaree. Na sequereeri:

—Taaquiriirinij. Quia naataniniu paniyanijia. Quia cuaqueya cuaraa jeequehuara.

Naa na sequesacaritij, na lepraari shaajequee na cuaqueyajiniji. ¹⁴Jesuuri na rootaree maja na pohuatanura na miishano tamasa niquiara. Na sequereeri:

—Saaja pueyacuara secojonaa jiyaniijia quia niqitishii quia cuaqueya, na cartenuhuara quiajaniya, pueya tajinia quia rucanejonuhua juhujaniya. Naajuhua, quia seru quia niqitiose pueyasoocuaa catijasocoriquiano. Naa quia miiri taa Moisés rootaquiaaricujani, puetunu pueyajanaa niishiniuria quiaa tari jeequerohua quia cusonujiniji.

¹⁵Maninia Jesu miishanojinijiri jiyanoehua socua tamaquicua caminiujushaaquiaari pueya niqiuara. Naaratej, jiyanoehua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji. ¹⁶Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu
(Mt 9.1-8; Mr 2.1-12)

¹⁷Tamonu juuca, Jesuuri pueya niqiuara niishitiojoriquiaa. Na tojtianaa tajinia cajituriquiaajaariuhua Fariseocuaca, Moisés Rootasanojiniji niishitiojonaano. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijinio. Jesuuri jiyanoehua Pueyaso cumaaca jiitariquiaa cusosuhua na naatanijionura. ¹⁸Jiyacaritij, socua pueyari tiuquijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. ¹⁹Puera queraatia pueya rerejosacari tohuatayaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneece majeetejosano. Nojoriiri tia nijinia papataquiaari. Na nuhuaji, nojoriiri cusosu roshiniaree cuhuocojiniji na matujinia, Jesu nujuasaqui pueya tajinia. ²⁰Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanojiniji.

²¹Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni? iNojuajaari tama na cuaqueyajaaja jiyateya juhua Pueyaso na quiniuria! iPueyanoori maja na naata tamonu pueyano jiyanooni sesa na miishanojiniji! iSaaja Pueyaso cutaraari na naata pa jiyanooni!”

²²Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? ²³Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetejaariuhua sequenura: “Quia sanere. Quia rucuanere”? ²⁴Cunora, janiyari quiaririja nia niishitiniutianiyan, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacuaajitij, Jesuuri cumatacuruhuana pueyano sequere:

—Cua tojiri. ¡Quia sanere! ¡Quia matu quia pataarohua quia tiajinia!

²⁵Jiyacaritij, pueyanoori sanequee nojori niquiara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maniniuhuaqueetanuta. ²⁶Puetunu pueyajanaari shiriquitiirii. Nojoriiri Pueyaso maniniuhuaqueetariquiaa cuno maninia casaa nojori niqiniucua. Nojoriiri na puerenuta naa sequetuquiaarijuhuaj:

—iPaari quiaririja jiyanoohua maninia miishano niquiriini!
iNocujaji jiuujiatesano!

Jesu sequesacari Leví, na pueyano na quiniuria

(Mt 9.9-13; Mr 2.13-17)

²⁷Nio nuhuaji, Jesuuri tohuataquiaari. Tamonu pueyano niquiriiri jiyaniijajanaa Césarra cumaneeca masejosaqui cajiyanu. Na sesa quiquiaari Leví. Jesuuri na sequere:

—iCua nuhuajiri, cua pueyano quia quiniuria!

²⁸Jiyacaritij, Leviiri ritia sanequiaari. Puetunu na jiiitiasanojuanaa tiujiaqueeri. Jesuta quiaqueeri.

²⁹Na nuhuaji, Leviiri jiyanoohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriqiaaajacuahuaj. Nojoritia miaquejajinia cajitiuriquiaari, socua tamasaca pueyano. ³⁰Moisés Rootasanojiniji niishitijonaa, mariyata narta Fariseocuacaari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajano? Nojoriiri pa paraa sequera cumaneeca masejona.

³¹Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. ³²Naajuhuj, majaari mijiria cua niniu quiquiaari maninia miiija pueyacu. Niqiaari cutaranijia sesa miiijaca cua tacatonuhua Pueyasoocua, maninia miiija nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura

(Mt 9.14-17; Mr 2.18-22)

³³Pueyari Jesu sequere:

—Tiuquinijona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuj. Quia pueya saniniujia, saaja miaquequiaari, ratuquiaari. ¿Casaarateni?

³⁴Jesuuri nojori riucuaaree:

—Pueyano camishacari maaji, majaari masusano pueya miaajenu, camiriquiano pueyano jaara nojoritia qiyajaa.

³⁵Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutianiya. Jiyacariti nojori cutaraari miaqueyaquiniutianiya.

³⁶Jesuuri socua nojori niquiara pohuataquiaari nio miriqui sequesano:

—Majaari pueyano miatenu quijia na toque quiariquijini, na toque mocua cuhuoco na cushipirijiotajara. Saniniujia, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujajinia na posequesacari. Cua rupaari naajuhuj, juhua quiarinio toque. ³⁷Naajuhuj, majaari

na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuaana niitiashiya. Shoqueeri najuhuaana sesoshiyajuhuj. ³⁸Naaratej, maninia cutaraari quiariniacu uva caaca shuujionu shoque quiariquiojinia, maja vino niitiasaanuucujaji, na quiquio shoquenio. Naajuhuj, nia niishitiojosanoori juhua tariucuaco shoque. ³⁹Naajuhuj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuj, majaari cua niishitiojosano nia paniniu, quiarinio na quiniucua.

Jesu pueya carojotasacari trigo samaatenu juuca

(Mt 12.1-8; Mr 2.23-28)

6¹Tamonu samaatenu juuca, Jesuuri trigo* cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuuciojoriquiaa na corequetanura. Na nuhuaji, na jajau miojonuuriquiaari. ²Fariseocuacaari na niqitiariquiaa. Nojoriiri Jesu pueya juaari:

—¿Casaara nia tojtiaaquiya Moisés Rootasano, taa na sequequiaaricujani maja pa poonijionura samaatenu* juuca?

³Jesuuri nojori riucuaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijuhuaj? ⁴Nojuajaari Pueyaso Secojoua tiajinia tiuquiquiaari. Pueyasora niojosano pan* pooquiaari. Na sareeri. Mariyata nata quiniaa niqutiojoreeri nojori sanurajuhuj. Cuno panri sequesaaquiaari saaja pueyacuara secojonaa sasocoriqiano. Naajaa, Davidri na saquiaari. Majaari Pueyaso juaaniu quiquiaari naa David miiniucua.

⁵Jesuuri socua cuno Fariseocuaca sequequiaari:

—Janiyacuaajaari Pueyaso Jiyarosano. Jiyaniijara jiyatesaaquiarinijia cua sequenura casaate samaatenu juuca miishiyani, Pueyaso pa shuquiriniuria.

Jesu jeeacasacari pueyano juaashiquia, cuseetucojuara joojequetano

(Mt 12.9-14; Mr 3.1-6)

⁶Tamonu samaatenu juuca, Jesuuri Pueyaso Secojoua tiajinia tiuquiquiaari. Tii niishitiojoriquiaari. Quiniqui quiriqiaari pueyano, cuseetucojuara joojequetano na juaashiquia miaquetajara. ⁷Moisés Rootasanojiniji niishitijonaa, mariyata Fariseocuacaari Jesu shanacutariquiaa. Nocuara tonujunu paniriqiaari Jesu jaara cuseetucojuara joojequetano juaashiquiaraca pueyano jeeacare samaatenu juuca. ⁸Jesuuri tari niishiriquiaa taa nojori niishiriojoriquiaani. Jesuuri cuno rimiajatucouja pueyano sequere:

—iQuia sanere! iNiya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. ⁹Jesuuri nocuara tonujunu panijiacua pueya sequere:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojiniji? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

¹⁰Jesuuri puetunu na shocuaqueya quiniaajanaa niqiniijoree. Na nuhuaji cusosu sequereeri:

—iQuia juaashiquia quia shiitiore!

Pueyanoori na juaashiquia shiitiore. iNa juaashiquiaari ritia jeequee! ¹¹Cuno pueyari jiyanoohua juaaquioree naa Jesu miishacaritij. Nojoriiri naa pocojoquiaari tamajaaja: “¿Taa pa miiniutianiya socua cuno Jesuuri?”

Jesu saquiriojosacari doce pueya na jiyaramiquishocoriqiano

(Mt 10.1-4; Mr 3.13-19)

¹²Jiyacaritij, Jesuuri tamonu tuhananuucua quiaquiaari, Pueyaso na secojonura. Puetunu niucujanaa secojoriquiaa

Pueyasoori. ¹³Jaara juhuaquequiaari, Jesuuri na tojtijajaca pueya sequequiaari nocua nojori nijionura. Puetunu nojorijinijuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocori-quiano pueya”. ¹⁴⁻¹⁵Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhuj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶Santiago niyanu Judasri saquiriojosaaquiaarijuhuj, Judas Iscarioteno. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya
(Mt 4.23-25)

¹⁷Na nuhuaji, Jesuuri tuhuananujiniji rosetaquiaariuhua na saquiriojosano pueyata, jamatujiniara. Cuno jamatujinia, queraatia na nuhuajinia pueyari tari nocuaji quiriquiaa. Mariyata jiyanoehua queraatia pueyari tii quiriquiaa puetunu Judea jiyajinijinio, Jerusalén tiacajinijiniojuhuj, shoniniacu caminia shuriuquiumia quiijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijiosaanurajuhuj. Jesuuri nojori naatanijioree. ¹⁸Naajuhuj, taraatia samaruhua miishano pueyari naatanijiosaaquiaarijuhuj. ¹⁹Puetunu cusosuhujanaari Jesu quianu paniriquiaa, naatanijiosano nojori quiniuria. Jesu cumaacaari jiyanoehua poonijioriquiaa. Naaratej, puetunu pueyajanaari naatanijiosaariquiaa, saaja nojori quiasacari nojuaja.

Jesu pahuatasano shuquiriaatia quiijajiniji, taraatia quiijajinijinio
(Mt 5.1-12)

²⁰Na nuhuaji, Jesuuri na pueya niquirii na pocuanura. Naa sequeereeri:

—Niaari Pueyaso shuquiritasano, niaa jaara niishiriquia nioojia saaja sesa miiijia. Niaa jaara niishiri nioojia naa quiyatej, niaari Pueyaso jiiitasano pueya quiniutianiya.

²¹Niaari Pueyaso shuquiritasano, niaa jaara maninia miiijia quiniucua jiaatia, taa miaajeyano pueyano miaquesanoocua jiaatiaacaani. Niaa jaara naa quiniucua jiaatia, Pueyasocua-jaari nia jataniniutianiya maninia quiijara nia quiniuria.

²²Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutianiya nia shuquiriniutia, niaa jaara jiyanooshaarohua.

²³Niaa jaara naa miishaaretej, jiyanoehua nia timiri. Naa jaacuatate nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiiitiaa jiyocuaaanu, na niqutiosocoriquiano nijaniya. Naa paraa supuetanaari naa taraatia miiquiaari tariucuaaanu Pueyaso sequenu panishano caminiujiunaa pueyajuhuj.

²⁴Niaari saniniujia taraatia quiijia quiniutianiya, jamuejaca casamiriaca pueyanaa. Niaacuaajaari tari shuquiriaatia quiquianu, puetunu nia panishanojuanaa nia jiiitasacari.

²⁵Taraatia quiijacaari nijaniya, cante sequejani: “Janiyacua-ja maninia pueyanoni. ¿Janiyatucua casaara paniri Pueyaso jiyanooniuria janiyani?” Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

²⁶Taraatia quiijacaari nijaniya, puetunu pueyajanaa jaara maninia pahuataquiaa nijaniyajiniji, maninia nia cojinuucua

cuno pueya, Pueyaso tojiyashijica pueyani. Cuno pojori supuetanaacuaajaari naa shuquiritiaquiaari cuno sapojonuujaaca, canapuate maja seetanujuanaa Pueyaso sequesano caminiujiunaa quiquiaaricuaiani.

Pa paraa panijia pa quirij
(Mt 5.38-48; 7.12)

²⁷Nijaniya, cante niya cua tojtiaacuaiani, cua tojtitiuri. iNia paraa nia paniri! Maninia nia miiri nia niqiniu paniyashijia pueya. ²⁸Saaja maninia nia riucua nia juayano pueyano. Sesa nia miiijia pueyacuara nia secojore Pueyaso. ²⁹Pueyano jaara quia maseca piri, quia jiyanoori nojuaja. Jaara taquijiria pirijihuj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqutiorejuhuj. ³⁰Pueyano jaara quia sequere quia casamijiniji quia niqutionura nojuaja, quia niqutiore nareja. Pueyano jaara quia casaa jaariutiare, majaari na sequenu: “Cua niqutiorohua”. ³¹Maninia nia miiri tamasa, taa nia paniquiaa tamasa miiniuria nijaniyacuaani.

³²Niaa jaara saaja nia panijia paniriquia, majaari nia jiyaniyu Pueyasoori nia shuquiritia nia miishacari. Sesa miiijia pueyari naa paniquiaa nojori panijiacajuhuj. ³³Maja puera maninia miiijia nijaniya, niaa jaara maninia miiquiaa saaja noo pojori, canapuate maninia miiquiaa nijaniyacuaani. Sesa miiijia pueyari naa maninia miiniu niishiquiaajuhuj, noo pojori canapuate maninia miiquiaa nojoricuaani. ³⁴Maja puera maninia miiijia nijaniya, niaa jaara nia masena niqutioquiaa na panishano, nia niishishacari nojuaja ritia niqutionutaniuhua nijaniyajiniji na masesano casaa. Sesa miiijia pueyari na casaa rupaquijia nia niqutioquiaa narta sesa miiijia pueyajuhuj, na niishishacari nojori ritia niqutionutaniuhua nojori masesano casaa rupaquijia. ³⁵Nia paniri nia paraa. Maninia nia miiri nojori. Naa casami nia niqutiore nareja, pueya jaara na pania rupaquijia. Majaari nia taraajenu cuno pueyano jaara nia niqutioyquiriohua nia casaa. Naa nia miishacari, niaari seetanujuanaa Jiyocuaaanu Quijia muerasu. Pueyasoori socua jiyanoehua queraatia nia niqutionutaniya tamasa nia niqutiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutiojoquiaa sesa miiijia pueya, mariyata canapuate na sequeyashijiacani “paacarasho”. ³⁶Naaratej, jiyanoootio nia quiri, taa nia Que Pueyasocuaani, jiyanoojia.

Maja sesa nia niishiriojonu niarta pueyanoocua
(Mt 7.1-5)

³⁷Maja nia rimiaaquenu tamasaacuara, Pueyaso mariqui saniniujia nia jiyanoyaquiriiri. Niaa jaara tamasaacuara tonujiyashijia quiri, naajuhuj, Pueyasoori maja na saneenu quiniutianiya sesa nia miishanojuhuj. Naa jaara jiyanoootio quiri, Pueyasoori nia jiyanooniutianiyaacuhuj. ³⁸Niaa jaara tamasa niqutioquiaa na panishano, Pueyasoori naa nia niqutionutaniya nia panishanojuhuj, maninia shanacusanu, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajinia nia niqutioquiaa pueyacuani.

³⁹Jesuuri socua niishitiojoquiaari pueya, nio miriqui sequesanta:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutianiya raama. ⁴⁰Pueyanoori maja socua niishijia na niishitiojonajiniji. Jaara puetunu maninia niishitiojosarejanaa, saaja jiyacariti niishijia quiniutianiyaariuhuj, juhua na niishitiojonaja.

⁴¹¿Casaara nia niqiyu rucucua maano quia tarajanu namijajiniani, niaa jaara puereetucua maca jiiitia tama nia namijajinijaaja? ⁴²Niaa jaara puereetucua maca shanacuya

tama nia namijiajiniajaaja, ñnaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiajaaja nia pare coteenu cuno maca. Na nuhuaji cutara nia naata maninia niquniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanoocura.

Naanaari niishishano na jajaujiniji
(Mt 7.17-20; 12.34-35)

⁴³Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. ⁴⁴Puetunu naanajanaari maninia niishishano na muetusanojiniji. Majaari pa naata satuna carojonu shuuniainiji. Naajuhua, majaari pa naata tuhuaracona carojotanu saarianajiniji. ⁴⁵Naajuhua, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaratia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiyajinijino
(Mt 7.24-27)

⁴⁶¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojtiaaquiquiaa? ⁴⁷⁻⁴⁸Cua tojiri. Cante cua rupenara quirii cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanoehua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuuca quishacari cumueeca jiyajinia. ⁴⁹Saniniuujia, cante najuhuaa cua niishitiojosano tojiaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanoehua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

Jesu naatanishacari Romano capitán seru
(Mt 8.5-13)

7¹Jesu jaara pueya niishitiojonu puecaquiaari, na pueyata quiaare Capernaum tiacajiniaari. ²Romano* soldadohua capitánri quiniqui quijia quiquiaari. Jiyanoehua na panishano seruuri cusosu matariquiaa. Quera cusoriquiaari. ³Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuara niirria nocua na seru na naataniniuria. ⁴Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanoehua, nojoritia na quianura. Nojoriiri Jesu sequeere:

—Cuno Romano capitánri canaa jiyaroreeni, inojuajaari jiyanoehua maninia pueyano! ¡Quenaaja quia miiri na panishano! ⁵Nojuajaari parta Judiocuaca panijia. ¡Nojuacuajaaari Pueyaso secojua tiatequiaari canaara tama na cumaneecatajaaja!

⁶Naacuajitij, Jesuuri nojoritia quiaquiaari capitán tijajiniara. Tari Jesu quishacari cateca na tiaacuara, capitánri na rupenaa pueya jiyaroquiaari Jesuucua, nojori caminiujuniuria na sequesano Jesura. Naaratej, nojoriiri naa Jesu caminiujushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tijajinia. ⁷Nocujaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru

naatanura. Janiyari niishiyani, quiaa jaara naa sequere, cua seruuri naatanutaniuhua. ⁸Janiyani niishiyajaaniuhua, cuno cusonuuri quia tojiniutianiya taa cua tojiquiaa cua jiyaniijianucuaaani. Janiyari cua jiyaramiquishano soldadohua jitiiaajuhua. Janiya jaara tamonu sequerene, ‘Quia quiaare’, nojuajaari quiaqueequiaa. Janiya jaara tamonu sequerene, ‘Miji’, ritia nimiaquiaari. Janiya jaara cua seru sequerene casaa na miiniuria, ritia na miyari. Niishiyaniija jiyano cumaacaracajuhua.”

⁹Jesu tojishacari cuno pojori caminiujushano capitán sequesano, Jesuuri jiuujiateree. Jesuuri na nuhuajiniaa pueya niqunijioree. Nojori sequeereeri:

—Seetanujanaa nia sequeyanijia, puetunu parta Israel pueyajinijinojuanaani, imajaari quenaaja cua niquniu quiquianu Pueyasocua tiuujia pueyano juhua nio tahue!

¹⁰Capitán jiyaramiquishano pueya tiuquijiosacariuhua capitán tijajiniohua, nojoriiri Capitán seru niquishuhua tariucua naatanohua.

Jesu samiitianishacariuhua mashiquio niyanu

¹¹Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhua, socua queraatia tamasaca pueyano. ¹²Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucua macu nuhuaji sacuariquiaa, jamajiniara nojori quiojosacari. ¹³Jesu niquishacari mashiquio, nocua taraajereeri. Na sequeereeri:

—Maja nujuquenu.

¹⁴Jesuuri macuucua catecanoree. Macu quiquio quiatereeri. Na patanaari pootia na nujuataquee. Jesuuri macu sequeere:

—Mashajanaa, janiya quia sequeyani: “¡Quia sanere!”

¹⁵¡Macuuri cajiquii! Juhuacatecara pocuareeri. Jesuuri na nucuaacua na jaatucuree. ¹⁶Puetunu pueyajanaa jaara naa Jesu miishano niquiquiaari, jiyanoehua pueretereeri. Nojoriiri Pueyaso shuquiritiaree jiyanoehua. Na puerenuta sequetereeri:

—iPueyaso sequenu panishano caminiujuniqui niya supueree pa tajinia! ¡Jiyanoehua cumaacaraca!

Nojoriiri naa sequetereejuhua:

—iPueyasoori shusha quiarijia na saquiriojosano Israel pueya niishiriohuacuahuaj, na cumaquiniuria pajaniya!

¹⁷Jesujiniji pueya pohuatasanoori caminiujushaaquiaari puetunu Judiocuaca jiyajinijanaa, mariyata puetunu na shocuaqueya jiyacajinijanaani.

Tiuquinijiona Juan jiyaramiquishano pueya nequesoreesacari Jesu
(Mt 11.2-19)

¹⁸Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹—Jesuucua nia quiaare. Niocua na sequesee: “¿Quiaate seetanujanaa Pueyaso Jiyarosano, tariucuacaanu sequesano niriquianotej, tamonute sashishiyajaara soj?”

²⁰Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriquianotej, canaate tamonu sashiyajaara soj?”

²¹Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niqiuara; cusosuhua, pueyaracaanu nootunejaca, samaruharaca pueyano. Mariyata queraatia cariojuarujuri jiyaterohua niquijiacaraari. ²²Na nuhuaji, Jesuuri naa Tiuquinijiona Juan pueya sequeere:

—Nia quiaarohua. Tiuquinijiona Juan nia pohuatasuhua taa nia niqiriicujani, nia tojishanonio. Nia sequesuhanoj: “Cariojuarujuriiri niquijiacara quiriohua. Shipiiniquijunuaa-

ri maninia rucoorohua. Lepra cusotajacaari cushiritishaarohua juhua juhuanaraja nojori quiniuhua. Numueejunucuaari tojjiiacara quiriohua. Macunucuaari samiitianijiosaarohua. Casamiijuiniucua pueyari Pueyaso rupaa pohuatasaree, Pueyaso pueyara nojori jiyatesaanura. ²³Shuquiriaatia quijia cutaraari nooj, cante cucua tiuuniu tarinitiaaquiyani”.

²⁴Tiuquinijiona Juan jiyarosano pueya jaara quiojoquiaarihua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquniucua nia quiojocanu cariiquia jiyajiniani? ¿Niaate noojia niqijijoteja niquniucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵¿Casaa niquniucua nia quiojocanunitioj? ¿Niaate maniniuqui toque cushijia niquniucua quiojocanu? Niaacuajaari niishiya, shanohua toqueya cushiyonuujacaari saaja jiyaniijianucua tiajinia quiyano niquishano. Nojoriiri tama na panishanojuaaja miijiaa. ²⁶¿Taateerinitioj? ¿Casaa niquniucua nia quiojocanuuri? ¿Pueyaso sequenu panishano caminiujuniata quiquianu? Taaquiriirini. Nia niquishano pueyanoori seetanujanaa socua tojjishano pueyano puetunu Pueyaso sequenu panishano caminiujuniainijijianaa. ²⁷Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajiniiri naa naajiotasaaquiaritij:

“Cua sequenu panishano caminiujuriquiano jiyaroyanijia, na puetanura quiajaniya, nuu jeencuariquiano quioquaji”.

²⁸Seetanujanaa nia sequeyanijia, puetunu Pueyaso sequenu panishano caminiujuniainijijianojuaanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

²⁹Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojinijiiiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacan.

³⁰Saniniuujia, Fariseocua, mariyata Moisés Rootasanojiniji niishitiojanaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiquianu, nojori seetanucua nojoriiri sesa miijiacajuhua. Nojoriiri Pueyaso miini panishano nojoriiri soocanu saaja. Naacuajitij, majaari nojori jiyanooshaanu quiquianu.

³¹Jesuuri socua sequere:

—¿Quiarjia nio pa quishacari pueyarijataj? ³²Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucuaa curotasanojinia. Nojoriiri narta naatujooriicua naca: “Canaari juucua naajua jonenejyani. Majaari nia nianujunu paniniu. Canaari taraatia jaaquequejosano jaaquequejyani. Majaari nia sapuenu paniniuujuhua”.

³³Naajuhua pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niqiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. ³⁴Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhua. Cunora niaari cua sequequia: “Cunoori sacuraatia miaquejoru, ratunu porocuanio, sesa miijiaa rupueja sacuraatia, mariyata pa soosano cumaneeca masejonaa rupenano”. Naa nia sequesacariitij, niaari cua tojitiaaquiyajacuhua. ³⁵Naajaa, pueya jaara canaa pohuatasano tojjiiaca quiri, jiyacari cutara nia naata niishiniu canaa niishitiojosanoori seetanujanaa Pueyasojiniji, cua tojjiiaca jatasacari maninia quijiacara.

Jesu miaquesacari Fariseo Simón tiajinia

³⁶Tamonu Fariseo pueyanoori Jesu masuquaaari na tiajinia na miaquenura. Jesuuri na tiajinia quiaaree. Miaquenuujua

shuriquiumia roshishiiri. ³⁷Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiarjiiuhua. Shiitaniyojua seesariquiaja pataconiojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. ³⁸Maajiiri Jesu cashacuucuma mojoquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujanaa Pueyaso sequenu panishano caminiujuniata quiri, mariqui niishiri cante na coyani, taamueca maajitijianojoni”. ⁴⁰Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu panianijia.

Fariseo pueyanoori Jesu riucaaree:

—Cua sequere, Niishitiojanaa.

⁴¹Jesuuri na sequere:

—Caapiqui pueyanoori cumaneeca masequiaari rupaquijiaa tamonu cumaneeca niqutiojonajiniji. Niquriyatua pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua cincuenta juuca poonijiosanojiniji masesano. ⁴²Na nuhuaji, nojori sequesano juuca jaara tari quiquiaari na camaru nojori niqutionuhua na cumaneeca, majaari nojori jiiitanu quiquiaari cumaneeca. Naaratej, cumaneeca niqutiojonaari nojori sequere: “Naajaa, maja socua nia niishiriojonu nia niqutionuhua tarjia cua niqitiosano cumaneeca niajanija”. Cumaneeca niqutiojonaari naa cuno caapiqui pueya jiyanooquaaari. Simónnaa, cua sequereetoj, ¿tetyano cuno caapiqui pueyanojinijiniote socua cuno cumaneeca niqutiojona panijiaa quiniutianiyani?

⁴³Simónri Jesu riucaaree:

—Cunocujani, cante socua queraatia cumaneeca niqutiosaaquiaaricujani.

Jesuuri na sequere:

—Taaquiriirini.

⁴⁴Jiyacariitij, Jesuuri cuno maajiicua tacatere. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niqutionu quiri mohuaca janiya, cua niohuaca cua jeequetajara. Nio maaji cutaraari na niohuaca jeequere na namijiaacata. Na sacuanijiarohua na muecacataari. ⁴⁵Majaari quenaaja quia nujuunu quiri janiya, quia saruhuatasacari janiya. Nio maaji cutaraari na niohuaca nujuunequejoriquiaa pueyaracaanu, niya cua cajishacari.

⁴⁶Naajuhua, majaari quia totanu quiri muesu nunacu na nacaacua. Nio maaji cutaraari na niohuacaacua totaree shanohua jaanutaja. ⁴⁷Naaratej cua tojiri. Nio maajiiri jiyanoohua sesa miijia quiri quiaa. Naaratej, jiyanoohua cua paniyari puetunu sesa na miishanojinijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareeni, naajuhua, nojuajaari secaja panijia na jiyanoonia.

⁴⁸Na nuhuaji, Jesuuri cuno maaji sequere:

—Quiaacuajaari tari jiyanooshaaree sesa quia miishanojiniji.

⁴⁹Narta masuusano pueya nata cajitiyanoori juhuacatecara tama sequetooreejaaja:

—¿Cantucuaa nio pueyanoni, sesa miijia jiyanooriqianoni?

⁵⁰Jesuuri maaji sequere saaja:

—Cucua quia tiuushacari, quiaacuajaari tari jiyanooshaaree. Juhua janiya quia quiaarohua.

Jesura pueraquena maajipohuajiniji pohuatasano

8 ¹Na nuhuaji, Jesuuri rucanejoquiaari queraatia tiacajinia, shiitaniyojua tiacajiniajuhua. Nojuajaari tii Pueyaso rupaa pohuatariquiaa, taa Pueyaso jiiitanu panija na

muerasuni. Na doce saquiriojosano pueyari na cojiri quiaaajuacuhaj. ²Noojiaqueya maajipohuari na tarajari quiaaajuahuaj. Cuno maajipohuari tamaatia cusonujiniji Jesu naatanijosano quiquiaari. Tii quiri quiaaajaariuhua noo maajipohua, Jesu nojorijiniji tohuatanijioquiaari samaruhaatej. Nojorijinijinoori quiquiaari María Magdalena. Jesuuri cuno Marajiniji tohuatanijioquiaari siete samaruha. ³Quiri quiaaajaariuhua Juana, Cuza ni quicuani. Cuzaari jiyaniija Herodes jiiitiasano casami cojuana quiquiaari. Susaanaari nojorijinijinoori quiquiaarijuhuaj. Socua queraatia maajipohuari quiri quiaa. Puetunu cuno maajipohuajanaari Jesu naacutaquiaari tama nojori jiiitiasano casaatajaaja. Nojoriiri nera pueraquenuuna quiquiaarijuhuaj, ti quiyocua nojori rucuanesacari Jesuta.

Jesu pahuatasano natoojona pueyanonijini
(Mt 13.1-9; Mr 4.1-9)

⁴Queraatia cuno jiya tiacajinijinio pueyari nijioquiaari nojori ni quiniuria Jesu. Jaara nocua rerequeejuquiaari queraatia pueya, Jesuuri nojori niishitiojuquiaari miriqui, nio pahuatasanota. Nojori sequereeri:

⁵—Tamonu pueyanoori na cuhuari quiajinia quia quiaari natoojonuucua. Na jacutasacari, secajaari tote quiaari nucuaco. Tii rapijiosaaquiariri. Shuhuari na miojuquiaari. ⁶Tajaacaari toteree sai tajinia. Cuno jajau jaara moritia quiaari, ritia sorereeri puera joojuashiqui na quishacari. ⁷Tajaacaari toteree riyocuaa tajinia. Riyocuaaari socua ritia maashiquiaari. Na natananoori tarinitiuuara quiri. ⁸Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiri cien jajau quiquiaari ni quiri yatu jiyonajiniji.

Nio pahuatasano na puecasacari, Jesuuri na rupaa paaretaree. Naa sequereeri:

—iNiaa jaara numaaraca quiri, nia tojitiare cua pahuatasano!

Casaarate miriqui pahuatasanoni
(Mt 13.10-17; Mr 4.10-12)

⁹Na nuhuaji, Jesu pueyari na nequesotaree casaa na miriqui pahuatasano niishitiojonu paniani. ¹⁰Jesuuri nojori riucaaree:

—Niaari saquiriojosaaquiaari nia niishiniuria taa Pueyaso poonijiya pueya jiuujajiniani, na muerasura nojori quiniuria. Cunoori tariucuaaanu pueya niishishoo. Janiyari tamasa pueya ni quiaari pahuata quiaa miriqui cutarani. Naacuajitij, nojoriiri cua pahuatasano niishiaquiquiaa na tojitiacacari. Naajuhuj, cua cumaacata cua miishano cariyoshitioquiaari, nojori ni quiaari cua miishacari.

Jesu niishitiojosacari na pueya, miriqui na pahuatasano natoojonajiniji
(Mt 13.18-23; Mr 4.13-20)

¹¹Nia niishitiojoreera miriqui cua pahuatasano natoojonajiniji. Pueyano natoojosano jajauri juhua Pueyaso rupaa.

¹²Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiri, maja nocua na tiuuniuria, nojuaja mariquijiyanooshaareeri. ¹³Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasocua tiuquiaa shuquiriaataari. Naa miijacaari juhua puera shiitaniyojua nujuacaraca. Naacuajitij, nojori jaara saniniujuushaare, nojoriiri ritia Pueyasocua rupate quiaa. ¹⁴Riyocuaa tajinia toteno jajauri juhua noo pueya, canapuate maninia tojiri Pueyaso rupaa. Na nuhuaji, nojoriiri puera tacaquaa mijiria casaacua, casamiriaca nojori quiniuria, tama na cuaqueyajaaja nojori shuqiritiniurijuhuj. Naaratej, nojoriiri juhua muetuhuo natau quia, tarinitiuuara riyocuaa tariyoshitishano. ¹⁵Maninia jiyajinia toteno jajauri saniniujia juhua noo pueya, canapuate maninia tojitiarecuaa Pueyaso rupaa. Na

racataa maninia noojiajiniaari. Pueyaracaanu na tojiti quiaari. Majaari na pishiniu Pueyasocua. Naacuajitij, nojoriiri juhua queraatia muetujua natau.

Pueyaso muerasuuri juhua samaritiu cuhuataja
(Mr 4.21-25)

¹⁶Majaari pueya noshitini quiquiaa samaritiu, na jamotasocoriquiano conatu cari quiaa, maquetu cari quiaa conio. Samaritiu jaara noshitishare, morijiuucua morotashiyari na cuhuatanura, pueya tiuquitasacari tajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuara maatia pahuatasaa puetunu pueya ni quiaarajanaa. ¹⁷Puetunu jamojosano casaajanaari riuriatasaanutaniya. Puetunu jiyasohuaja nia miijosanojuanaari niishishaanutaniyajuahuaj. Cahuatasaanutaniyari maninia ni quishocoriquiano. ¹⁸Cunora, cua sequesano tojitiacacua nia quiri maninia. Cante maninia jiiitaa cua rupaani, nojuajaari socua na niishijara jiyatesaanutaniya. Saniniujia, cante cua rupaa tojiyashijiani, secaja najuhuaana na niishishanoori jaariutiasaanutaniya, puetunu shaaquiriajanaa.

Jesu tapueyocuaa tiuquijiosacari Jesuucua nojori nucuata
(Mt 12.46-50; Mr 3.31-35)

¹⁹Jiyacaritij, Jesu nucuata Jesu tapueyocucata tiuquijioquiaari Jesu quishaqui. Majaari nojori naata tiuquitanu quiri quiaa Jesuucua. Jiyanohua queraatia pueyari nocuaa ritia quiaa saaja tia tohuateyaji. ²⁰Tamonuuri Jesu numooteree:

—Quia nucuata quia tarajanuhua jati carijiniacua quia. Quia ni quitiuni pania quia.

²¹Jesuuri tii quinaa ni quiaa sequereeri saaja:

—Canapuate seetanujanaa Pueyaso Rupaa tojitiacacari, nojoriiri cua nucuata cutara, cua tarajanuhuanio.

Jesu pueyajetesacari paratu, mohuacanio
(Mt 8.23-27; Mr 4.35-41)

²²Tamonu juuca, Jesuuri botejinia tacata quiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiari quiaa. ²³Nojori niuutiasacari, Jesuuri maqueriquiaa. Canashiaquijia paratuuri juhucatecara piyarojonu coteere jiyanohua. Mohuaca queyaqueteriquiaa bote jiniacumaraari. Boteeri quera tiuquitiari quiaa tari.

²⁴Jiyacaritij, na pueyari Jesu niucujasee ritia. Na sequetuseeri:

—iNiishitiojonanaa! iNiishitiojonanaa! iPaa tari tiuquitiiani!

Jesuuri sanemaa. Paratu sequereeri, mohuacanio:

—iTariucuaaja! iNia suraajere!

Paratu, mohuacaari ritia suraajee. Paratu piyarojonuuri tajimiaa, caminia queyocuaanonio. ²⁵Jesuuri na pueya sequerohua:

—Niaacuaa juuca Pueyasocua tiuujia. ¿Casaa nia tojetareerini?

Nojoriiri Jesuucuaa jiuujiatecoree. Shiriquitiari quiaari Jesu miishano nojori ni quishacari. Tama nojoriiaari nia nequesoreetori quiaa:

—¿Cantucuaanonio? iParatu, mohuacaari na tojiri na sequesacari!

Gerasa jiyajinijinio samaruhaaraca pueyanonijini pahuatasano
(Mt 8.28-34; Mr 5.1-20)

²⁶Na nuhuaji, nojoriiri shiitaseequiaari Gerasa jiyajinia, Galilea jiya taquijiria. ²⁷Jesu jaara rosequiaari botejiniji, jiyacaritij, samaruhaaraca pueyanoori nocua ni quiaari, cuno jiya tiacajinijinio pueyano. Cuno pueyanoori pueyaracaanu samaruhaaraca quiquiaari. Majaari toque na cushini quijia. Naajuhuj, majaari tajinia na quini quijia. Saaja raacajinia quijiaari, macunucua nucuua paaquiosaqui. ²⁸Na ni quishacari Jesu, na cari quimijia mojuquetaseeri. Jesuucua nacareeri:

—¿Casaara quia niyaree mihi canaa quia cushitionurani Jesunaa? ¡Quia niishiyaniija! ¡Quiaacuajaari Jiyaniijijanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

²⁹Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuaara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruuri na pueyanoori saaja na turojotaquiaari. Samaruuri na mashiquijia tiquiyocua, pueya quiaquishaqui na quiniuria.

³⁰Jiyacaritij, Jesuuri na nequesotaree:

—¿Taateja quia sesani?

Samaruuri na riucaaree:

—Cua sesa “Queraatia”.

Naa Jesu sequequiaariiri jiyanoohua queraatia samaruhua na jitiiasacari. ³¹Samaruhuari jiyanoohua secojoree Jesu, maja nojori na jiyaronura puequetuujy raama saniitosocoriquiano. ³²Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruuari cunora Jesu secojoree nojori na tiuquitaniniuria cushiyajinia. Jesuuri nojori tarinitiaree. ³³Cunora, samaruuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuaterree. Tacojiniji totesee caminiajinaari. Tii shushiniuriiri.

³⁴Cushiya cojuanaa jaara niquiquiaari naa miishanotej, nojoriiri netecuatuquiaari na shiriqiniutia, Jesu miishano nojori pohuatanura tiacajinia, cuhuariquiacajinijuhuj, tee pueya quiriqiaacuajani. ³⁵Puetunu pueyajanaari Jesuucua nijioquiaari na tiacajiniji, pueya pohuatanuusanoiniji nojori niquiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriqiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. ³⁶Jiyacaritij, Jesu miishano niquituniaari shusha nijiono pueya pohuataree taa samaruhuaraca pueyano naatanishaarohuani. ³⁷Cunora, puetunu Gerasa jiyajinijinio pueyajanaari jiyanoohua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua.

³⁸Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹—Quia tiajinia quia quiaarohua. Quia pueya niquiara quia pohuatasuhua taa Pueyaso miiri maninia quiajaniani.

Pueyanoori quiaarohua. Puetunu na tiacajinijanaa pohuatasuhuari taa Jesu miiriucua maninia nojuajani.

Jesu naatanishacari Jairo niyatu, Jesu toque quiana maajinio
(Mt 9.18-26; Mr 5.21-43)

⁴⁰Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijanaari na sashiriquiaa. ⁴¹Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniija quiquiaari cuno tiacajinia. Jesu cariquimiaji mojuquetaseeri na secojonura na tiajinia Jesu quianura. ⁴²Neyatuniyojuaari quera cusoriquiaa jiyacari. Majaari socua niquiohuaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanoohua queraatia pueyari nata quiojoriquiaajuhuj. Pueyari jiyanoohua na tanuujuriquiaa, nata nojori quiojosacari nucaaco.

⁴³Tamonu maaji cusosuuri cuno pueya tajinia quiriqiaaju-huj. Doce marijiaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na naata na naataniniu quiquiaari. ⁴⁴Maaji

cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quiri quiajaniani.

Pedroori Jesu sequeree:

—Niishitiojonanaa, ¿majateeri quia niquiniucua? Queraatia pueyacuajaari quia tanuujia.

⁴⁶Jesuuri saaja sequeree:

—Maja. Cusosu cua quiareeni. Niishiyaniija cua cumaacaari tari na naatanirii.

⁴⁷Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojuquetaseeri. Puetunu pueya niquiarajanaa pohuataree casaara Jesu na quiareeni. Pohuatareejaariuhuj taa na naataquee ritiani, Jesu na quiasacari. ⁴⁸Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhujaniya quia quiaarohua.

⁴⁹Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhua riniu paniniu Niishitiojona quia tiajiniara.

⁵⁰Jesu tojishacari cuno pueyano sequesano, Jairo sequereeri: —Maja puerenu. Cucua quia tiuuri saaja. Quia niyatucua ja naatanutaniuhua.

⁵¹Jesu tiuquishacari Jairo tiajinia, nojuajaari maja na shanacunu quiri quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵²Puetunu tii quiniaa pueyajanaari maaji samiriucua nujuqueturiquiaa. Sapiyonuuriquiaaariuhuj. Jesuuri nojori sequeree:

—Maja najuhua nia nujuquenu. Maaji samiriu maja macu, nareja maqueyano.

⁵³Naa Jesu sequesacarijij, pueyari na saroojotaree saaja. Nojoricuajaari niishiriquiaa maaji samiriucua seetanujanaa macu quiriqiaa. ⁵⁴Jiyacaritij, Jesuuri macuucua tiuquiqui. Na juaashiquiajiniji na quiaaseeri. Jiyanoohua na sequereeri:

—Maaji samiriuniaa, iquia sanere!

⁵⁵Na sohanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequere na mianuutenura. ⁵⁶Na queyari jiyanoohua jiuujatere. Jesuuri nojori sequere, maja nojori pohuatanura tamasa niquiara na miishano.

Jesu jiyaramiquishacari na doce pueya Pueyaso rupaa nojori pohuatanura
(Mt 10.5-15; Mr 6.7-13)

9¹Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitiorree cumaacaari, puetunu tamaatia sesa samaruhujanaa nojori tohuatejonura, cusosuhua nojori naatanijionurajuhuj. ²Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanoonu paniya nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. ³Jesuuri nojori sequeree:

—Maja nia panu nia rucuanajotajara nia panishano. Majaari nia mijotat nia panu, nia caashoque, nia coseyaca, nia cumaneecanu. Saa nia cushishano toquetaja nia quiaare cutara. Maja socua toque nia panu nia cushishocoriquiano. ⁴Niaa jaara tamonu tiajinia tiuquishiiquia, niocua cuniqui jiyojetaseequiaa, niaa jaara cuno tiacajiniji quiaarejaatijia. ⁵Niaa jaara tamonu tiacajinia tojinu paniyaquishaare, cuno tiacajiniji nia quiaare. Nia nuhujiria, cuno pueya niquiara niocua nia nioluacajiniji cuno tiaca jaquia nuutare. Naacuajitij, cuno pueyari

niishiniutianiya, Pueyasoori nojori jiyanoaquiniutianiya, nojori tojtianu paniyaquiniucua Pueyaso rupaa pohuatanaa.

⁶Na nuhuaji, Jesu pueyari quiojoquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

Jiyaniijia Herodes niishiniu panishacari cante Jesuni
(Mt 14.1-12; Mr 6.14-29)

⁷Jiyaniijia Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuaajaari jiyaniijia Herodes nacatanishano Tiuquinijiona Juan samiitianohua”. ⁸Tamasaca pueyari Jesujiniji sequeriquiaa-juhuaj: “Supuetana Elíascuaja tari tiuquiriohua”. Nojuacuajaari tariucuacaanu Pueyaso sequenu panishano caminiujiunia quijia. Saniniuuja, tamasa pueyari sequeriquiaajuhuj: “Jesucuaajaari tamonu tariucuacaanu Pueyaso sequenu panishano caminiujiunia samiitianohua”. ⁹Herodesri saniniuuja sequeree: —Janiyacuaajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niqiniu paniriquiaa juucua.

Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)

¹⁰Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹Pueya niishishacari tee Jesu quiriqiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

¹²Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuara cuniqui pajenuura na miaquenuusocoriquiano, na maquetujuarajuhuj. Nojori panishanoori shaaqui niya pa quishaquini.

¹³Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniojua jiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴Cuniqui nojoritia quiriqiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuuria cincuenta jatiqii, socua cincuenta tamaqui. Mianuutesocoriquiano puetunu pueyajanaa, cuara naa cajitiuriatej.

¹⁵Nojoriiri Jesu sequesano miirii. Puetunu pueyajanaari cajitiurii.

¹⁶Na nuhuaji, Jesuuri cuno cinco pan pataree, caapiqui sapitiaajanio. Jiyocuaaanu maureeri na Que Pueyaso na secojonura miaquesanocua. Na nuhuaji na necasereeri. Na pueya na niqitioreeri puetunu pueyajanaa nojori serotasocoriquiano. ¹⁷Puetunu pueyajanaari na miaquenuuree. Maninia tooqitioreeri. Na nuhuaji, doce canaasatuuri mishinjiosaaquiaari pan raacuata, sapitiaaja raquiquiatiano.

Pedro sequesacari Jesuuri seetanujanaa Cristo
(Mt 16.13-19; Mr 8.27-29)

¹⁸Tamacari, Jesuuri Pueyaso secojoriqiaa tamajaaja. Na saquiriojosano pueyari nata quiriqiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhuj, quiaana Elías, tariucuacaanu Pueyaso sequenu panishano caminiujiunia. Tamasacaari saniniuuja quia sequequiaa, quiaa naasucuaana tamonu tariucuacaanu Pueyaso sequenu panishano caminiujiunia samiitianohua.

²⁰Jesuuri saniniuuja nojori nequesotaree:

—¿Niajanियariuhuj? ¿Taa nia sequeyani, cante janiyani? Pedroori na sequeree:

—Quiajaniyacuaajaari Cristo, Pueyaso Jiyarosano.

²¹Jesuuri jiyanohua nojori rootaree maja nojori pohuatanura tamasa niquiara cante nojuajani.

Jesu numootesacari na pueya, nojuaja mosaanutaniya
(Mt 16.20-28; Mr 8.30-9.1)

²²Jesuuri naa nojori sequerohuacuhuj:

—Janiyari jiyanohua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojtianu paniyaquishacari janiya. Naajuhuj, pa pueyacuaara secojonaa jiyaniijianucuaari cua niqiniu paniyaquiniutianiya, Moisés Rootasanojiniji niishitiojanaano. Nojoriiri cua monutaniya. Naajaa, jiuujianaraca juucajinia, janiyari samiitianutaniuhuanu.

²³Na nuhuaji, Jesuuri puetunu pueyajanaa sequeree:

—Cante cua nuhuajiniu janiyani, cua pueyano na quiniuria, nojuaja cuara niyajetaara tama na miiniu panishanojuaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujanaa. ²⁴Saniniuuja, cante tama na cuaqueyajaaja shuquiritiniuria niishiriojquiaani, nojuajaari jiyanohua taraatia quiniutianiya na nuhuaji. Saniniuuja, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵Pueyano jaara puetunu nio jiya casamijianaa jiitiana quiri, cuno maara najuhuaana quiri, nojuaja jaara na shaajesacari jataaare mani quiquiojinia Pueyasooju. ²⁶Cante cua seera caririquiya mijiria quinia pueya niqiuara sequenurani, janiyari nojori jiyaniijiani, naajuhuj janiyari nojori seera caririquiniutianiyanu cua tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuua cumaacatani, na seya cumaacatajuhuaj. Naajuhuj, cante cua rupaa pohuatanu caririquiya sesa miijia pueya niqiarani, janiyari nojori seera caririquiniutianiyajuhuj. ²⁷Seetanujanaa nia sequeyanijia, noojiaqueya nijaniyajiniinooori maja nia cusonuunu quiniutianiya juhuanojuaja, niaa cuara niqiriijiaatijia Pueyaso cumaaca tiuquiyano cucua, na muerasu jiitariquianoni.

Jesu jatasacari shacantuucara
(Mt 17.1-8; Mr 9.2-8)

²⁸Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. ²⁹Jesu secojosacari Pueyaso, na jiquicoori tamaatiara jataquiaari. Na toqueeri jiyanohua cohuajara jataquiaarijuhuaj, shacantuquera.

³⁰Jiyacaritij, caapiqui pueyari nocua muetaquiaari. Jesuta pocojoriqiaari. Nojoriiri quiriqiaa supuetana Moisés, supuetana Elíasnio. ³¹Nojori nujuatusaquiiri shacantuua quiriqiaa puetunu nojori shocujanaa. Nojoriiri pocojoriqiaa taa Jesu mosaanutaniya Jerusalén tiacajiniani.

³²Jiyacaritij, Pedroori jiyanohua maquenuujuriqiaa, nata quiniaajuhuj. Naajaa, majaari nojori maquenu quiriqiaa. Naacuajitij, nojoriiri Jesu shacantuua niquiquiaari. Cuno caapiqui supuetanaa niqitiurijiaariuhuj, Jesuta pocojijiano.

³³Cuno caapiqui pueya quiojonu panishacariuhua Jesu shuriucuaaji, Pedroori Jesu sequeree najuhuanaj:

—iNiishitiojonanaa, canaa namitia niya quiyani! iCanaa suhuororeera jiuujianaraca suhuorotucua; quiaara, Moisésra, Elíasranio!

Pedroori naa najuhuana pocuariquiaa. Majaari na niishiniu quiquiaari casaa na sequeriquiaani. ³⁴Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. ³⁵Na nuhuaji, nojoriiri Pueyaso tojiri pocuaano cuno cohuaja najacajiniji. Naa sequereeri:

—iNioori cua Niyanu, cua saquiriojosano nia Jiyaniijia na quiniuria! iNojuaja nia tojitiare!

³⁶Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nuuariquiaari. Nojoriiri sanaa na niqitariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaatijiaj.

Caya samijiajiniji Jesu tohuatesacari samaru
(Mt 17.14-21; Mr 9.14-29)

³⁷Tariqui, nojori jaara rosetaquiaariuhua tuhananujiniji, queraatia pueyari Jesuucua nijoquiaari. ³⁸Cuno pueya tajiniji, tamonu pueyanoori naa nacaquiaari:

—Niishitiojonanaa, cucua quia taraajere quenaaja! iCua niyanuniyojua quia niquiri! iJiyanijuanaari quiyanuniyojua! ³⁹iSamaruuri na miiquiaa taraatia! iNa sariyotequiaari! iNa taquiriocuatequiaaariuhuaaj! iNa rupaamajiiri cushaaquiaa! iNa cuaqueya miiquiaa moqitiuriuriaari! Majaari ritia na cartenu paniniu quiquiaa. ⁴⁰Janiyari juucua quia pueya sequereeni, cuno samaru nojori tohuatenura. Majaari nojori naata quiquiaa na tohuatenura.

⁴¹Jesuuri sequereeri:

—Pueyaso tojitiaashijiacanaa, niaaqui Pueyasooocua tiuyashijiacajuhuanajaj. ¿Janiyateeri pueyaracaanu rejeretanutaniya nijaniyani? Miji quia niyanu quia jaatucure.

⁴²Caya samijia catecanosacari Jesuucua, samaruuri na pojotequee. Na taquiriocuatereri. Jesuuri samaru sequeree na tohuatanura. Caya samijia naataniriiri. Na niqitirohua na queeri. ⁴³Puetunu pueyajanaari jiyanohua jiuujiatere nojori niquishacari Jesu miishano Pueyaso cumaacata.

Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)

Pueya jiuujiatesacarijia puetunu Jesu miishanoinijijianaa, Jesuuri na pueya sequereeri:

⁴⁴—Maninia nia tojiri casaa cua sequenutaniya nijaniyani. Majaari na niyajetanu. Janiyari niqutiosaanutaniyani pueya miiniuria janiya taa nojori paniyacuajani.

⁴⁵Majaari na pueya niishiniu quiquiaa Jesu sequesano. Juhua miriqui sequesanoori quiquiaa nojoriira. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaa-juhuaj, casaa nojori na pohuatasano sequenu paniriquiaani.

Cante jiyaniijijanaa cutarani
(Mt 18.1-5; Mr 9.33-37)

⁴⁶Jesu pueyari juhuacatecara juayonuutariquiaa teyano nojorijinijiniote jiyaniijijanaa quiniutianiyani. ⁴⁷Jesuuri nojori niishiriojosano niishiri. Naaratej, Jesuuri naatujua nujuatereeri na shuriucua. ⁴⁸Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniucua, nojuajaari cua rupueyajuhuaaj. Cante cua rupueyani, cua Jiyarona rupueyajariuhuaaj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujua, nojuajaari jiyaniijijanaa quiniutianiya puetunu narta Pueyaso muerasujiniijiojuanaa.

Cante maja pa paracani, nojuajaari pa jiyano
(Mr 9.38-40)

⁴⁹Juanri Jesu sequereeri:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniucua pajaniyajinijinio.

⁵⁰Jesuuri na riucuaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiyani, nojuajaari pa jiyano?

Jesu nacasusacari Santiago, Juannio

⁵¹Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. ⁵²Jerusalén tiacaacuara nuu cajiniocua Samaria* jiyajinia Jesu quishacari na pueyata, noojiaqueya na pueyajinijinio pueratereeri tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. ⁵³Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quiri Jesu maquenura nojori tiacajinia. ⁵⁴Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuacaanu Pueyaso sequenu panishano caminiujunia Elías miiquiaaricuaani?

⁵⁵Jesuuri nojoriicua tacatereeri. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

⁵⁶Na nuhuaji, nojoriiri tamonu shiitianiyojua tiacajinia quiojyaree tii maquenura.

Tamasaca pueya quiniu panishacari Jesu pueyara juucua
(Mt 8.19-22)

⁵⁷Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu panianijia. Janiyacua quia tarajareni puetunu tiqiyocua quia rucuanijosacarijianaa.

⁵⁸Jesuuri na riucuaaree:

—Quiojuapueeri na raaca jiitiaa cutara. Shuhuari na jesuhua jiitiaajuhuaaj. ¿Saniniuujia Pueyaso Niyanuurijataj? Majaari cua jitianu tama cua maquejarajaaja.

⁵⁹Jesuuri tamonu pueyano sequereeri:

—Cua nuhuajiniara quia quiri.

Nojuajaari saa sequereeri:

—Cuaara Jiyaniijianaa. Cua que cuaara cua niqiuara shaajeerajaara. Janiya jaara na jamoreni, janiyacua na nuhuaji quiata rucuanjore cutarani.

⁶⁰Jesuuri na riucuaaree:

—Naajaa, quia tarinitiare. Cua tojitiaashijiacari juhua macunucua. Naaratej, cuno macunucua cuaara jamoora tama narta macujuaaja. Quia rucuanjore cutara Pueyaso rupaa quia pohuatanura.

⁶¹Na nuhuaji, tamonu pueyanoori Jesu sequereeri:

—Jiyaniijianaa, janiya cutara quiata quiyanu paniyani. Coteenu cua tijania quiquooraj, cua pueya cua niqiniuria cua nuhuajiria.

⁶²Jesuuri miriqui na riucuaaree:

—Pueyano jaara na juyaca poonitijia, jiya jiacataja na jayotanura na cuhuariquia na jeenucuanura, maja cumaati na nijiniara na niqiniu. Na camaru jaara na nijiniara niquiri, sesa naaniutianiyari shuyorocotiuyocua. Naajuhuaaj, cua pueyano jaara na quiqiojinia tacatenu panijiohua quiri, nojuajaari maja maninia Pueyasora poonijiona.

Jesu jiyaramiquishacari setenta y dos na pueyajinijinio, Pueyaso rupaa nojori pohuatanura

10 ¹Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajinijianaa Pueyaso rupaa nojori pohuatanura.

Jesuuri nojori nuhuaji tii quianu paniriqiaajuhua. Puetunu nojorijianaa jiyaramiquiriiri caapiqui, caapiqui. ²Nojori nuhuajiria, Jesuuri nojori rootaree nio miriqui sequesano: —Queraatia Pueyaso muerasuranoori quiya, juhua senoosocoriquiano. Saniniuuja, secaja na senoonaari quiya. Cunora, cuhuariquia camaru nia secojore, socua senoona na jiyaramiquiniuria puetunujuanaa na senoosaanura. ³Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. ⁴Nia quiojosacari, majaari nia caashoque nia patanu, nia cumaneeca quiquiojuhuaj, nia sapatunio. Majaari nucuaco nia tarishiniu pueya nia saruhatasacari. ⁵Tamonu tiajinia nia tiuquishacari, coteenu nia saruhatate na camaru nio sequesano: “Juhujaniya nia quiri, nio tiajinia quiniaanaa”. ⁶Cuno tiajinia quiniaa pueya jaara jyanoojiaca quiri, naa nia sequesacari, Pueyasoori nojori miiniutianiya maninia. Nojori jaara juaajiaca quiri saniniuuja, Pueyasoori nojori shuquiritiyaquiniutianiya. ⁷Tee nia masesaareni, cuno tiajinia nia jiyojere. Nia miaquere, nia rature nojori niquitosano nijaniya. Nia pohuatanuucua Pueyaso rupaa nojori niquiara, nijaniya cuaara niquitosaaaria nia panishano. Majaari tamasa tiajinia nia pacunujunu tii nia miaquenura. ⁸Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. ⁹Cususuhua nia naatanijiore cuno tiacajinia. Pueya niquiara nia sequere: “Pueyasoori quiarjia nia jiyatenu paniya na muerasu nia quiniuria”. ¹⁰Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niquiara: ¹¹“Nia tiacajiniinio jaaquiani, canaari canaa niohuacaacuaji na majiriutuiani. Cunoori nia niishiniuria, Pueyaso jaara nia saniitore, majaari canaacia na tiuutiasaanu quiniutianiya. Pueyasocujaari nia jyanooniu paniriqiaa juucua, na muerasu nia quiniuria”. ¹²Seetanujanaa nia sequeyanijia pueyanaa, Pueyaso saniitonu juuca jaara quiri, cuno tiacajinia quiniaari socua jyanohua saniitosaanutaniya Sodoma tiacajinia quiniaa pueyajiniji.

Jesu piriyojosacari Pueyaso tojtiaashijiaca pueya
(Mt 11.20-24)

¹³“Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. iNiaari jyanohua saniitosaanutaniya! iNiaari socua Pueyaso tojiyashijiaca quiya cuno tariucuaaanu Tiro tiacajinia quiniaa pueyajiniji, Sidón tiacajinia quiniaa pueyajiniji! Cuno pueya jaara Pueyaso cumaacata miishano niquiquiari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajiniinio pueya maara cocuaque toqueya cushiyonuquiaari, nojori taraajesacari sesa nojori miiniucua. Naajuhua, nojori maara juaca niojoquiaari nojori nacaacia quera nojori macaashacari, sesa miijia nojori quiniucua. ¹⁴Niaa cutaraari cua cumaacata cua miijiosano niquijia. Naajaa, majaari nioojia nia tacatonu quiquianu Pueyasocua. Naaratej, Pueyaso saniitonu juucujinia, iniaari socua jyanohua saniitosaanutaniya Tiro tiaca pueyajiniji, Sidón tiaca pueyajiniji! ¹⁵Niajanijiatatj, Capernaum tiacajinia quiniaa pueyanaa, ¿niaateeri jiyaniya niaari jiyocuaaanu quiniaara jiyatesaanutaniya? iMaja! iNiaari puequeetuju raama quejoosaanutaniya saniya! ¹⁶Cua pueyanaa, cante nia tojtiajacani, nojoriiri cua tojtiajacajuhua. Naajuhua, cante nia ruuretaa cua rupaa nia pohuatasacari, nojoriiri cua ruuretaajuhua. Cante cua ruuretaani, nojoriiri cua Jiyarona ruuretaajuhua.

Jesu jiyaramiquishano setenta y dos pueya
tiuquijiosacariuhua nocua

¹⁷Jesu jiyaramiquishano setenta y dos pueyari Jesuucua tiuquijioquiaariuhua. Nojoriiri jyanohua shuquiriaatia quiriqiaa. Jesu sequetureeri:

—iJiyaniijianaa, samaruuari canaa tojtiaacuanuni canaa tohuatanijiosacari nojori, canaa jyaniquishacari quia sesa!

¹⁸Jesuuri nojori sequere:

—Taaquiririni. Janiyari Sesaaca niquiquianuni juhua niaco tiyano jiyocuaaanu. ¹⁹Janiyacujaari cua cumaaca nia niquitioacuanuni, juhujaniya nia rucuanenura sacocua caco, turucuanini cacionio. Cua cumaacata, niaari puetunu Sesaaca cumaacajanaa shocotanutaniya, juhujaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nijaniya. ²⁰Naajaa, majaari saaja shuquiriaatia nia quiniu samaruhua tojtianuucua nijaniya. Shuquiriaatia nia quiri cutara nia sesaca naajiotasano quishacari jiyocuaaanu, Pueyaso muerasu sesaca naajiotasaqui.

Jesu shuquirishacari
(Mt 11.25-27; 13.16-17)

²¹Jiyacaritj, Pueyaso Sohuanuuri Jesu shuquiriritii jyanohua. Cunora, Jesuuri na Que Pueyaso sequere:

—iQuia shuquiritiaanijia cua Quena! iQuiaacuajaari Jiyaniijianaa quiya jiyocuaaanu, mijiriano! iQuiaari maninia miiri! Cua pueyari juhua naatujoori, maja puera niishijia. Naajaa, quiaari quiarjia nojori niishitii quia niishishano, quia jamosano mijiria niishijiaacuaji. Jaa, cua Quena, quiaacuajaari naa nojori panitaja.

²²Cua Queeri tari cua niquitioquiaari puetunu na jiyatanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhua, majaari tamonu niishiniu cutara cante cua Queni. Saaja janiya cutaraari na niishiyani. Naajuhua, noo pueyari na niishiya, canapue cua niishitini paniya cua Quecujani.

²³Na nuhuaji, Jesuuri na pueyacuatacaterree. Saaja nojori sequereeri:

—Shuquiriaatia quijia cutaraari nijaniya, nia niquiniucua puetunu nia niquishanojuanaa nia rupenuucua janiya. ²⁴Seetanujanaa nia sequeyanijia, queraatia tariucuaaanu Pueyaso sequesano caminiujunaa pueya, mariyata jiyaca jiyaniijianucuanio, nojoriiri nia niquishano niquiniucua jiaatiaquiaari juucua. Majaari na niquitini quiquiari. Nojoriiri cuata nia quishacari nia tojtishano tojtianuucua jiaatiaquiaari juucujuhua. Majaari na tojtini quiquiari.

Samaria jiyajiniinio maninia miijajiniji pohuatasano

²⁵Na nuhuaji, Moisés Rootasanojiniji niishitiojona pueyanoori Jesuucua niquiari nata na pocoojonura. Jesu na pocuatenera sesa juucua, naa na nequesotareeri:

—Niishitiojanaa, ¿taa cua miiniutianiya pueyaracaanu rishijia cua quiniuriani?

²⁶Jesuuri na riucaare:

—¿Taate Moisés Rootasanojinia naajiotasani? ¿Taa quia niishitioquiaani, quiaa jaara na serojoquia?

²⁷Moisés Rootasanojiniji niishitiojanaari Jesu riucaare:

—Naa sequeyano:

“Quia Jiyaniijia Pueyaso quia paniri puetunu quioojiatanaa, puetunu quia sohanutajanaa, puetunu quia cumaacatajanaa, puetunu quia niishitiatatjanaa. Naajuhua, quarta pueyano quia paniri taa quia paniyacuaa tama quia cuaqueyajaani”.

²⁸Jesuuri na sequere:

—Quiaacuajaari maninia riucaare. Naa quia miishacaritj, quiaari pueyaracaanu rishijia quiniutianiya.

²⁹Moisés Rootasanojiniji niishitiojanaari tama nocuaji tacunu paniriqiaaja, maninia quijia na quiniuria Pueyaso niquiara. Naaratej, naa nequesotarahua Jesuuri:

—¿Canteeri cuarta pueyanoni?

³⁰Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jitiiasanojuanaa na jaariuutiatureeri, na cushishano toquenio. Na piquitiuriiri. Quera macu na tiujiatuqueeri. ³¹Na nuhuaji, pueyacuara secोजनाari cuno nuacuaco quiariquiaaajuahuaj. Na niquishacari piquishano narta Judio pueyano mataano nuu shuriuquiocora, na shocortamaa saajaari. ³²Na nuhuaji, Levita* pueyanoori cuno nuacuaco quiariquiaaajuahuaj. Na niquishacari narta Judio piquishano pueyano, nojuajaari saaja na shocortamaajuahuaj. ³³Na nuhuaji, Samaria jiyajinijinio tahueri cuno nuacuaco quiariquiaaajuahuaj. Na niquishacari parta Judio pueyano mataano, Samaria jiyajinijinio tahueri nocua taraajeree. ³⁴Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na niataree tama na seru nijiniajaarijia. Ritia na jiyataaree rucoojuuca tiuquijiojua tiajiniaaraari. Cuniqiu na cojuataareeri. ³⁵Tariqui, cuno tahue quianu panishacarihua, nojuajaari caapiqui cumaneeca pueraree. Ruconaa tia camaru na niqutioreeri. Na sequereeri: “Cucua quia jiyanoori. Nio pueyano quia cojuatare quiaria. Quiaa jaara socua quia cumaneeca nocua puecare, janiyacua saniniujujia quia niqutiioruhanijia cua tacatesacarihua”.

³⁶Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinijinioni, ¿teyano cuno pojorijinijiniote narta pueyanocua taraajeja cutarani?

³⁷Moisés Rootasanojiniji niishitiojona pueyanoori Jesu riuacuaree:

—Cuno Samaria jiyajinijinio tahuecuajani, nocua taraajejuiaarini.

Jesuuri na sequereeri:

—Taaquiririnij. Quia quiaarohua. Naa pueyacuara taraajeja quia quirijihuaj, taa cuno tahue taraajejuiaaricuaani.

Jesu quishacari Marta, María tiajinia

³⁸Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuquiaari. Naaratej, na tiajinia na tiuquinitiareeri. Cuno maaji sesa quiquiaari Marta. ³⁹Martaari tarajanu jitiataja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. ⁴⁰Marta cutaraari poonijioriquiaa queraatia na miishocoriquiano na jitiiasacari. Cunora, Martaari Jesuucua catecanoree. Na sequereeri:

—Jiyaniijanaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijosanotajanaa. ¡Quia sequere na naacutanura janiya!

⁴¹Jesuuri saaja na sequereeri:

—Martanaa, quioojia quia cajitiri sanaunaa. Quiaari puera quia miishano tacaatiaa. ⁴²Saaja niquiriyatu casaa cutaraari jiyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

Jesu niishitiojosacari na pueya nojori secjonura Pueyaso
(Mt 6.9-15; 7.7-11)

11 ¹Tamacari, Jesuuri Pueyaso secjoriquiaa tamaqui. Na puecasacari secjonu, tamonu na pueyajinijinoori na sequereeri:

—Jiyaniijanaa, canaa quia niishitiojore canaa secjonura Pueyaso, taa Tiuquinijiona Juan niishitiojoquiaari na pueyacuani.

²Jesuuri nojori sequereeri:

—Pueyaso nia secjosacari, naa nia sequereeri:

“Jiyocuacaanu quiijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuani.

³Canaa quia niqutiioriquia canaa miaquesocoriquiano canaa panishano puetunu juucujanaa. ⁴Canaa quia jiyanoori sesa canaa miishanojiniji, taa canaa jiyanooquiaacuuaa sesa canaa miiniaani. Naajuhuj, canaa quia cojuare, maja sesa canaa miitishaanura”.

⁵Jesuuri naa sequereehuaj, socua nojori na niishitiojonura:

—Niaa jaara nia rupuenacuua quiaare shiyaqueya, casaa nia masenura nojuajiniji, ¿nojuajatucua taa quia sequerenei?, quiaa jaara na sequereeri: “Cua rupuenanaa, cua niqutiore jiuujianaraca pan. ⁶Tamonu cua cojiniaari shusha tiuquiriohua tucuaaanuji, miaajeyari. Shaaquiiri cua sumatuu cua miaketesocoriquiano nojuaja”. ⁷¿Quiaatucua taa miirini quia rupuenaa jaara na tiajiniaacumaji quia riuacuare?: “Maja cua taajetenu. Cua tia tiotiu tioree tarinijia. Tari cua mueya mataa maquetujiniani. Maja cua naata sanenu cua niqutionura quia panishano”. ⁸Jaara naa sequereetej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura nijaniya puetunu nia panishanojuanaa. Majaari na sanenu quiniutianiya saaja nia rupuenaa na quiniuucua. Sanenutaniyari pueyaracaanu taajeta nia piquishacari na tia tiotiu. ⁹Naajuhuj, maja nia tarinitianu Pueyaso nia secjonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiotiu nia piquiriquia. Niaara riataaanutaniyari. ¹⁰Naaratej, cante Pueyaso secjoriquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riataaanutaniyari.

¹¹¿Niaatucua nia niyanu niqutiore saajia, neecaru na masacari nijaniya? Maja. ¿Niaatucua soconu niqutiore nia niyanu, sapitiaaja na masacari nijaniya? Maja. ¹²¿Niaatucua turucuaniniu niqutiore nia niyanu, caacaraja riuriuquiu na masacari nijaniya? Maja. ¹³Puetunu nijaniyajanaa sesa miiniu niishijia. Naajaa, niaari maninia casaa niqutionu niishiya nia niquiohua. ¿Taatucua socua jiyocuacaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapuee na masequiaacuajani.

Pueya sequesacari Jesu, samaru cumaacaracana
(Mt 12.22-30; Mr 3.20-27)

¹⁴Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jitiiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. ¹⁵Tamasaca pueyari saa sequequiaarijia:

—Cuno pueyanoori samaruhua tohuatanijia samaruhua jiyaniijia Satanás cumaacata.

¹⁶Tamasaca pueyari Jesu saniniujiniuni paniriquiaa. Naaratej, nojoriiri na sequeturee na cumaacata na miiniuria casaa, na niqutiinuria nojori, nojori niishiniuria nojuajaari seetanujuanaa Pueyasojinijinio. ¹⁷Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya nia miqetoojiya tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritiano nojori quishacari. Naajuhuj, niquiriyatu tiajinia quiniaa jaara tama nojorijaaja juayonuujataquiaa, nojoriiri maja na naata jatiqui quiniu. ¹⁸Naajuhuj, niaari cua sequeriquiaa, janiyana

samaruhua tohuatanijiya Satanás cumaacatani. Jaara naa quiriritij, ¿Satanástucua taa pueyaracaanu quiri jiyaniijiani, nojuaja jaara tama na samaruhuaaja tohuatanijiya tama na cumaacatajaaja? ¹⁹Naajuhuaaj, janiya jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyariuhuaaj, cana cumaacata nojori tohuatanijioquiaa samaruhuaani? ¿Taa nia sequeyani? ¿Satanás cumaacataate? Majaruhua. Naacuajitij, tama nijaniyajaaja nia niishiri, niaari jiyajeneya. ²⁰Naa Pueyaso cumaacata cua tohuatanijiosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

²¹Niojina nia niishiriojorejuhuaaj: cumueeca pueyano jaara na tia cojuua queraatia na miaquejotaja casaata, majaari tamonu naata na jiiitasano casami jaariuutianu. ²²Saniniuujia, socua cumueeca pueyano jaara nocua tiuquiri, na miaquejotaja casa jaariuutiaari, cuno, nocua na tiuushano juucuan. Na nuhuaaj, na jaariuutiasano casami paari, na pueya na serotasocoriquiano. Naajuhuaaj, janiyari Satanás jiiitasano jaariuutiajani.

²³Cante cua jiyano quiyaquiyani, nojuajaari cua paraca. Cante cua naacutaquiya pueya rerecojonura Pueyasorani, nojoriiri saaja pueya cocuataa Pueyasooaju. Naaratej, jacaria nia niishiriojore casa nia niishiriojia janiyajinijini.

Samaruhuari riujuujia na quiquiojiniohua

(Mt 12.43-45)

²⁴Samaru jaara tohuatate pueyanojiniji, joojuashiquio rucanejyari na samaatejara na pajenura. Jaara na riuriataaquiri, niishiriojyari: “Cua quiquiojinia riujuuyarohua-raqui teje cua tohuatacanucuaajani”. ²⁵Samaru tiuquishacariuhua cuno pueyanooqua, na riuriatasuhuari shaaco, juhua maninia netoonujusano tia, maninia jeenucuasanojuhuaaj. ²⁶Naaratej, cuno samaruuri socua sesa miijiaa nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitasuhua. Naacuajitij, cuno pueyanoori socua sesara jiyacateja, tarijia na quiniujiniji.

Seetanujuanaa shuquiriaatia quiniu cutara

²⁷Jesu pueyasacari nio, tamonu maajiiri jiyacari pueya tajiniji naa nacaree:

—iShuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸Jesuuri saaja na riucaaree:

—Socua shuquiriaatia quijia saniya sajara cante Pueyaso rupaa tojjijani, cante Pueyaso panishano miiquiajaaniuhuaaj.

Sesa pueyari saaja Pueyaso cumaacata miishano niqiniu panijiaa

(Mt 12.38-42; Mr 8.12)

²⁹Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuatate nojori niquiaari:

—Nio pa quishacari pueyari sesa miijiaa. Nojoriiri cua sequequiaa, jiyajeneta casa cua miiniuria Pueyaso cumaacata, nojori niishiniuria janiyari Pueyaso Jiyarosani. Seetanujuanaa majaari socua cua niqitini quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás* miishaaquiaaricuaani. ³⁰Jonás miishaanuuri nocuaji jiuujiate sano quiquiaari cutara. Naacuajitij, Nínive tiacajinia quiniaa pueyari niishi quiaari Jonásri Pueyaso jiyarosano quiquiaari. Janiyari naa miishaanutaniyaaniuhuaaj, nio pa quishacari pueya niishiniuria janiyari Pueyaso Jiyarosani. ³¹Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucujaji

jiyajinia jiyaniijia quiquiaari. Nojuajaari jiyanohua tucuaaanu ni quiaari narta jiyaniijia Salomón tojinuucua, jiyanohua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretunu socua Niishijajanaa cutara Salomónjiniji. Cuno Niishijiaari nia nia tajinia quiyacuaja. Janiyacuajaari nojuajani. ³²Naajuhuaaj, cuno tariucuaaanu Nínive tiacajinia quiniaa pueyari saneecuatunutaniya Pueyaso nequesoresacari nio pa quishacari pueya. Nojoriiri nio pa quishacari pueyacuara tonujunutanijajuhuaaj, nojori tacatoyaquiniucua nojori jiuujia sesa nojori miishanojiniji, Pueyaso rupaa nojori tojiyaquiniucua. Nínive pueya cutaraari nojia tacatoquiaari sesa nojori miishanojiniji, Pueyaso sequenu panishano caminiujunia Jonás jaara Pueyaso rupaa pohuataquiaari nojori niquiaari. Pueyaso sequenu panishano caminiujunia quiarijia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano

(Mt 5.15; 6.22-23)

³³Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuaaanu na morotanu, tiaco tiuquitianaa cuhuatariquiano.

³⁴Pa namijiaari juhua pa cuaqueya cuhuatanajuhuaaj. Naacuajitij, paa jaara Pueyaso casaacua jiaatiaja quirini, paari cuhuashiqui quia puetunujuanaani. Saniniuujia, pa namijia jaara sesa casa niqiniucua jiaatiaja quiri, paari niishiqui quia puetunujuanaani. ³⁵Tama nia cuaqueyajaaja nia cojuare, niaa mariqui niojia cuhuatana maquishajareeri. ³⁶Niaa jaara puetunujuanaa juhua cuhuashiqui quia, sesa casaacua jiaatiaashijia nia quishacari, niocua maninia niqijia quiri puetunujuanaa, juhua samaritiu cuhuatasacari nijaniya. Naacuajitij, niocua niishijia quiri, maninia miijia nia quiniuria.

Jesu nacasusacari Fariseocuaa, Moisés Rootasanojiniji niishitiojonaanio

(Mt 23.1-36; Mr 12.38-40; Lc 20.45-47)

³⁷Jesu puecasacari pocuanu, tamonu Fariseo pueyanoori na masuuquiaari na tajinia na miaquenura. Jesuuri na tajinia quiaquiaari. Na tiuquishacari, miaquejajinia cajishijianaari. ³⁸Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuaari jiyaniijia, nojori rucojosacari tamasa pueya tajinia, tamasa sesa miishanoori na naata nojoriicua pacunu. Nocuaji nojoriiri shuquitianu niishijia, tajinia nojori tiuquishacariuhua. ³⁹Naa cuno Fariseo pueyano niishiriojosacarij, Jesuuri saa na sequerejaa:

—Nijaniya Fariseocuaanaa, niaari juhua noo pueya, canapete saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacua na jeequenu. Niaari naajuhuaaj. Niaari sapuenu maninia pueya niquishano. Saniniuujia niojiaacari jiyanohua sesa quia, casami nia masejonuucua nia nohuasejonuta, puetunu sesa nia miiniutijanaajuhuaaj. ⁴⁰Mosanucuaanaa, ¿niaateeri niishiyaquiya, pa cuaqueya Shipinianaari poojia shipiniquiaari-jiuhuaaj? Naaratej, niojia nia jeequere cutara, maja saaja nia cuaqueya. ⁴¹Niaa jaara puetunu niojiajinia nia jiiitasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

⁴²iNiaari taraatia miishaariquiano, Fariseocuaanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijiojuanaa, Pueyasora nia niqitiosocoriquiano. Cuno jaamasucuaari culantro, menta, socua tamonu jaamasucuaniojuano. Niaari naa maninia miiquiaa taa Moisés niishitiojoquiaaricuaajani. Naajaa, Moisésri niishitiojoquiaarijuhua maninia pa miiniuria parta pueya, Pueyaso pa paniniurajuhuaaj. Majaari cuno na sequesano nia

miiniu quiquiaa. Puetunu na sequesanojuanaa tojijiaa nia quiri. Majaari saaja jaamasucua niquitiojojuaca nia quiniu.

⁴³iNiaari taraatia miishaariquiano, Fariseocuaanaa! Niaari jiyaniijianucua shuriucua cajiniucua jiaatiaquiaa, Pueyaso secojojuu tiajinia nia quishacari, juhua cutara pueya nia quiniuria pueya niquiara. Naajuhuj, niaari pueya paniquiaa nojori saruhuanura niajanija juhua jiyaniijianucua, nia rucuanajosacari tiacajinia.

⁴⁴iNiaari taraatia miishaariquiano! Niaacuajaari juhua niquishoo jamaca. Pueyari juhujaniya na caco rucooquiaa na niishiyaquishacari. Naajuhuj, pueyari juhujaniya nia rupuequiaa, nojori niishiyaquishacari nioojiaari jiyanojua sesa, juhua pueyano mocua jamajinia.

⁴⁵Jiyacartij, tamonu Moisés Rootasanojiniji niishitiojonaari Jesu sequere:

—iNiishitiojonanaa, naa quia sequesacari Fariseocuatej, quiaari canaa sequeyajuhuj!

⁴⁶Jesuuri na riucaare:

—Taaquiririni. iNiaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanojua niquia casaa nitiasocoriquiano. Majaari nia tojitiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejeretanu nia niishitiojosano.

⁴⁷iNiaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujunuaa nucuhuacuaji, teyano nia supuetanaa puecooquiaaricuajani. ⁴⁸Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

⁴⁹Naacuajitij, Pueyasoori na niishiniutia sequequiaari:

“Janiyari cua sequenu panishano caminiujunuaa jiyaramiquiniutianiya Israel pueyacua, cua rupaa niishitiojonaano. Israel pueyari noojiaqueya puecoonutianiya. Tamasacaari naquiya miishaanutaniya-juhuj”.

⁵⁰Cunora, Pueyasoori nio pa quishacari pueya naminiutianiya puetunu na sequenu panishano caminiujunuaa nanacaacuajanaa, canapueete nio jiya coteejajiniji puecoosaaquiaricuajani. ⁵¹Coteenujuanaa mosaaquiariri Abel. Na nuhuaji, queraatia Pueyaso sequesano caminiujunuaari puecoosaaquiaari. Na nuhuaji, Zacariasi socua jaatesaaquiaari monujuhuj. Nia supuetanaari na moquiaari Pueyaso Secojojuu tiajinia, Pueyaso Shuriucua Quiquo tacoji, Pueyasooacara catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuucuajanaa.

⁵²iNiaari taraatia miishaariquiano, Moisés Rootasanojiniji niishitiojonaanaa! Niaari najuhua Pueyaso Rupaa jiiitiaa. Majaari nia tojiniu paniniu, Pueyaso jiyanooshano pueya nia quiniuria. Saniniuuja, tamasa jaara Pueyaso Rupaa niishini paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³Jesu jaara nio sequequiaari, Moisés Rootasanojiniji niishitiojonaa, mariyata Fariseocuaari jiyanojua juaaquioree. Jiyanojua nojori juaaquiiosacari, nojori Jesu nequesoreenu coteere queraatia. Nojori Jesu pocuatenu paniriquiaa sesa juucua. ⁵⁴Nojori nocuara tonujunu paniriquiaa juucua, jaara sesa quiri na sequesano.

Jesu niishitiojosano, maja sapuenu maninia pueyano niquishano pa quiniuria

12 ¹Jiyacartij, jiyanojua jiyanojua queraatia pueyari Jesuucua rerejoree. Tama nojori jiaarijia rapijiootioquiaa puera nojori rerequejosacari. Jiyacartij, Jesuuri saa na pueyaja sequenu coteere. Naa nojori sequereeri:

—Tama nia cuaqueyajaaja nia cojuare Fariseocua pan poreetajaacuaji. Nojori niishitiojosanoorihuhua pan poreetaja. Majaari na jataniniu pueya, sesa nojori miiniujiniji. Nojori sapuenu maninia miijia pueya niquishano tamasa niquiara. Saniniuuja, nojori jiuujiaari saa sesaja pueyaracaanu. ²Nia niishiri, puetunu jiyasohuja miishanojuanaari niishishaanuta-niya. Puetunu jamosano casaajanaari niquishaanutaniyajuhuj. ³Puetunu nia sequesanojuanaa ninishiquini, cuhuashiqui caminiujushaanutaniyari. Naajuhuj, nia sasacojosano tama nia sohuacamarajaajani, cunoori jiyocuaaanu tia ninijini nacatasaanutaniya puetunu pueya tojishocoriquianojuanaa.

Cante puereshiya cutarani
(Mt 10.26-31)

⁴Cua rupuenanaa, majaari nia puerenu canapueete nareja pa cuaqueya mojuani. Nojori maja na naata socua sesa na miiniu pajaniya, paa jaara tariucua macu quiyani. ⁵Seetanujuaanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura niajanija mani quiqiojiniani, na cusojuanu nuhuaji niajanija. Saaja nojuaja nia puerere cutara.

⁶Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyjetanu cuno shuhua jaara puecoosaare. Nojuajaari na niishiya cutara. ⁷Naajuhuj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanojua Pueyaso panishano cutara queraatia na cojuasano shuhujiniji.

Tamasaca niquiara pa sequere paari Jesucristo pueyani
(Mt 10.32-33; 12.32; 10.19-20)

⁸Cua tojitiare. Cante tamasa niquiara sequejani: “Janiya Jesucristo pueyanoni”, naajuhuj, janiyari cua Que Pueyaso seya niquiara sequenutaniyani: “Nojuaja cua pueyano”. ⁹Cante saniniuuja tamasa pueya niquiara seetaa janiyajinijini, cua pueyano na quishacari, janiyari cua Que Pueyaso seya niquiara na tamacanutaniyajuhuj.

¹⁰Cante cua sesacareeni, nojuaja na naata jiyanooshaanu. Saniniuuja, maja cutaraari na naata jiyanooshaanu cante Pueyaso Sohuanu sesacareeni.

¹¹Cua muerasu nia quiniucua, niaari Pueyaso secojojuu tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiarano. Nojori nequesoreesacari niajanija, majaari nia niishiriojonu taa nia rucuanutaniyanoj, casaa nia sequenutaniyajaanihuaj. ¹²Nia rucuanu panishacari, Pueyaso Sohuanuuri jiyacari nia niishitiojonutaniya taa nojori nia rucuanutaniyani.

Puereetaari casamiriaca pa quishacari

¹³Tamonu pueyanoorihuhua tajiniji naa Jesu sequequiaari: —Niishitiojonanaa, cua tarajanu quia sequere na niquitionura janiya canaa shipininio jiiitasanojiniji, taa canaa shipininio sequequiaari canaacuajani, saminio na quishacarijia.

¹⁴Jesuuri saaja na riucaare:

—Pueyanonaa, ¿janiyateeri pueya nequesoreenara jiyatesaaquiarini, cua serotanura niajanija nia shipininio casamini?

¹⁵Jesuuri naa nojori sequequiaarijuhuj:

—Jiyanojua nia cojuare tama nia cuaqueyajaaja, maja casamiica jiaatijaca nia quiniuria. Pa naata shuquiriaatia quini casamiiju. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

¹⁶Na nuhuaji, Jesuuri pueya niishitioree nio miriqui pohuatasanta. Naa sequereeri:

—Tamonu pueyanoorihuhua quiquiaari, jiyanojua casamiriaca. Na cuhuariquijajinia na natoosanoorihuhua muetuquiaari. Naacuajitij, queraatia miaquesocoriquiano jiiitiaquiariri na

cuhuariquiajiniji na carojotasano. ¹⁷Tama sequerejaarjia: “¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸iJaj, niishiQuiinijia! Coteenu cua tiajosano cua casamiicuaiji niyaroorohuaraij. Janiyari socua puereetucocuara tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiojuanaani, puetunu cua jiitiasano casamijianaano. ¹⁹Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarjia cutara juhuajaniya quia quiri. Quiaari queraatia casamiriacacuaja, queraatia marijara. Quiaari queraatia quia miaquesocoriquiano jiitiaacuaja. Quiarjia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’.” ²⁰Cuno niucuaaja, Pueyasoori na sequequiaari: “Moseecanaa, quiaari quiarjia macu juhuaquenutaniya. ¿Canteeri puetunu quia jamuesano casamijianaa jiitianutaniya quia nuhuajini? ¿Canra na quiniutianiyarini?” ²¹Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamijiuniucua Pueyasora.

Pueyasoori na muerasu cojuaja maninia
(Mt 6.25-34)

²²Na nuhuaji, Jesuuri na saquirojosano pueya sequequiaari: —Naaratej nia sequeyanijia pueyanaa, majaari nia tacaani casaa nia miaquenutaniyani, casaa nia cushiniutianiyani. ²³Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaariuhuj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. ²⁴Riquiacujua nia niquiriquia. Majaari nojori natojonu. Majaari nojori carojotanu na racatasocoriquiano, na nuhuaji na mijosocoriquiano. Naajuhuj, majaari nojori jiitianu na mijosano na racataja. Majaari tiaca nojori jiitianu na carojotasano nojori racatajarajuhuj. Naajaa, Pueyasoori nojori mijotequiaa. Naa cutaraari socua jiyanhua Pueyaso panishano cuno riquiacuhujiniji. ²⁵Naajuhuj, nia nequesotaanijia, nia jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanhua nia tacaaniutia? Maja nia naata. ²⁶Naaratej, nia tacaani jaara najuhuaa quiya socua shiitianiyojua nia rishiniuria, ¿niaatucua casaara tacaari tamonu casaacuani? ²⁷Natau shuucuaa nia niquishurij, taa nojori corequetaani. Majaari nojori poonijionu. Majaari na cusupenuunujuhuj. Supuetana jiyaniijia Salomónri jiyanhua shanhua toqueyaraa quiquiaari. Cuno jiyanhua shanhua niquishano na cushishano toqueni, naajaa, majaari na shocotanu cuno natau shuucuaa. ²⁸Pueyasoori cuno natau shuucuaa shipiniquiaari rupaquijia naa shanhua niquishocoriquianotej. Jaara sorere, tariqui catijishiya saniniuurijia pan majeetetajara. Pueyaso jaara naa maniniushitiyacuaa shuucuatej, ¿majateeri na naata cushitini niajanijuhuj, jatarinitijia Pueyasocua tiuujiaanaa? ²⁹Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰Pueyaso niishiyashijia pueyari pueyaracaanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. ³¹Naaratej, nia niishiriojore Pueyaso panishano nia miiniuria. Nojuajaari saniniuurijia nia niqutionutaniya puetunu nia panishanojuanaa.

Nia casami nia racatare Pueyaso shuriucua
(Mt 6.19-21)

³²Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, inia niqutionutaniya puetunu na jiitiasanojuanaa-

ri! ³³Nia casami nia niqutionjore cumaneecara. Na nuhuaji, cuno cumaneeca nia niqutionjore nareja casamijiuniucua pueya. Naa nia miishacarij, niaari jiyocuaaanu racataa nia jiitiasano. Tee Pueyaso racataa nareja nera nia niqutionocua-jani, cuniqui, nia cumaneeca quiquioori maja na piquiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquiniu na nohuasenua. Naajuhuj, surequeyari maja na naata miaquenu nia casami tii. ³⁴Nia casami jaara nia racatasano quia jiyocuaaanu Pueyaso shuriucuatej, niaari saaja Pueyasocua niishiriojonutaniya, tee nia casami racatasano quiyacuani.

Jeenucuasano nia quiri nia Jiyaniijiaacuaji

³⁵Juhuaata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. ³⁶Naa jeenucuasano nia quiriijuhuj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷Shuquiriaatia quijiaa cutaraari cuno seya, canapute na jiyaniijiaacuaji suteyajaani, na jiyaniijia cuara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. ³⁸Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaa quiniutianiyari cuno seya, nojori jaara suteyajaaja tia tohuateya riatariquiano nojori jiyaniijiaacuaji. ³⁹Nio nia niishirijuhuj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenua. ⁴⁰Naajuhuj, jeenucuasano nia quiri pueyanaa, juhua cuno sutejaca seyaja. Naa jaara jiyaniya juhuanajuaja maja cua tiuquiniu quiniutianihua, janiyari jiyacari nia jiyajenetenutaniyani.

Jesu pohuatasano maninia serujiniji, sesa serujinijio
(Mt 24.45-51)

⁴¹Jiyacaritij, Pedroori Jesu nequesotaree: —Jiyaniijianaa, ¿quiaate nio pohuataree saa canaaraja, puetunu pueyarajanaa soj? ⁴²Jiyaniijiaari na riucaree: —Tamonu seru jaara maninia seru quiri, nocua tiuushano, niishijajuhuj, na jiyaniijiaari cuno na seru jiyatenutaniya narta seya jiitariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijajanaa mianuutequiaa nojoricuaani. ⁴³Cuno seruuri shuquiriaatia quiniutianiya na jiyaniijia jaara na riuriasuhua naa maninia miyanojua, taa na sequesaaquiaari na miiniuriacuajani. ⁴⁴Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jiitiasano casamijianaa cojuana na quiniuria. ⁴⁵Saniniuurijia, cuno seru jaara sesa miiniuria niishiriojore, na jiyaniishacari na jiyaniijiaari jiyanhua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyajaariuhuj. ⁴⁶Na jiyaniishacari na jiyaniijia juhuanajuaja maja na tiuquiniu quiniutianihua, jiyacaritij, cuno juucuja, na jiyaniijiaari tiuquiniutianihua canashiyajuiji. Naa cuno seru miiniucuaa sesatej, na jiyaniijiaari jiyanhua na saniitionutaniya. Na jatanutaniyari Pueyaso tojiyashijia pueyata na saniitosocoriquiano.

⁴⁷Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuacuajiri na

jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jiyanhua majacusaanutaniya cutara. ⁴⁸Saniniuuja, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuj, cante queraatia niqutiosaareeni, cuno serujiniijiri queraatia masenu panishaanutaniya. Naajuhuj, cante jiyatesaaree queraatia jiitiana na quiniuriani, na jiyaniijiaari nocua tiuuniutianiya socua jiyanhua maninia miijia na quiniuria.

Jesuucua tiuujiacaari narta pueya panishoo

(Mt 10.34-36)

⁴⁹Mijiria niqiaarinijia, juhua mani cua noshitiniuria pueya tajinia. iSeetanujuanaa na noshitiri quia tarinij! Cua rupaari juhua mani quiniutianiya. ⁵⁰Coteenu, janiyari jiyanhua saniniujiushaanutaniya juhua manitiani. Nocuaji coojiaari tacaya janiya jaara naa miishaarejaatijia. Seetanujuanaa na jiyateriquia tariuucua tucuateenonij. ⁵¹¿Niaateeri jiyaniya janiyari niqiaarini mijiria quiniaa quiniuria juhujaniya? iMaja! Seetanujuanaa nia sequeyanijia, janiyari niqiaarini pueya cua raquiriojotanura. ⁵²Naaratej, pueyari quiarijia juayonuutanu coteenutaniya. Pueyano jaara necocuata jiitiare jiuujianaraca niqiohua na tiajinia, jiuujianaraca nojoriinjiniio jaara cucua tiuuri, cuno caapiqui cucua tiuyashijacaari saniniuuja nojori juaajiaa quiniutianiya. Naa noojiaqueya pueyajiniinio tiuuniuucua cucuatej, queraatia pueyari naa tama tacaresetanutaniyajaacujua. Naacuajitij, tamonu tiajinia, querajaa pueyari caapiquiriyatu cucua tiuujiaca juaajiaa quiniutianiya. ⁵³Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiuushacari cucua. Naajuhuj, maajipohuari necojori paracaajia quiniutianiya necojori tiuushacari cucua. Naajuhuj, necojoriiri na nucua paracaajia quiniutianiya na nucua tiuushacari cucua. Naajuhuj, maajipohuari necohua niqiochuhua paracaajia quiniutianiya, necohua niqiochuhua quiniuucua cucua tiuujiaca. Naajuhuj, pueya niqiochuhuari na quinia paracaajia quiniutianiyajuhuj, cucua tiuujiaca na quinia quiniuucua.

Pueya cuaara niishiiria quiarijia Pueyaso miishanojiniji, casaa na niishitiniu paniyani

(Mt 16.1-4; Mr 8.11-13)

⁵⁴Jesuuri naa sequequiaari pueyajuhuj:

—Niaa jaara niqutioocua niqiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵Naajuhuj, paratu jaara piyarojoquiaa pananu shuucuaaji, niaari sequequiaa: “Tacareejonuqui quiniutianiya”. Naa quiquiaari. ⁵⁶Pueyanaa, ¿niaateeri seetanujuanaa niishijia? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuuja, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaa nijaniya.

Niaacuara tonujunata nia jeecatoore

(Mt 5.25-26)

⁵⁷Niaacuajaari niishiya, sesa miijiaaari saniitiosaanutaniya. Naaratej, tama nijaniyajaaja nia niishiriojore, casaate maninia nia miiniuriani. ⁵⁸Tamonu pueyano jaara quocuara tonujure quia sesonuucua na casaa, quia saniri juhuata nata pocoojonu maninia, na jaatucuscari quiajaniya nequesoreena pueyanooocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jeecatoyaquiri nata, nojuajaari quocuara saquiriojotanutaniya nequesoreena pueyano. Jaara quocuara saquiriojotare nequesoreena pueyano, nequesoreenaari saniniuuja quia niqutitionutaniya na

pueya, quia nujuatesaanura nujuatejojuajinia. ⁵⁹Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niqutiojoraatijia niaacuara tonujuna pueyano.

Nioojia nia tacatore sesa nia quiniujiniji

13 ¹Jiyacari, tamasa pueyari Jesuucua tiuquijioquiaari. Cuno pueyari naa Jesu pohuataquiaari:

—iJiyaniijia Pilatoori* Galilea jiyajiniinio pueya puecoorucuaa! iNa nuhuaji, nojori nanaca cojitiriiri Pueyasooocua nojori puecoosano seya nanacata!

²Jesuuri nojori sequere:

—¿Niaateeri jiyaniya cuno Galilea pueyari naa miishaarucuaa socua jiyanhua sesa miijiaa nojori quiniuucua narta Galilea pueyajiniji? ³Seetanujuanaa nia sequeya cutaranijia, nojoriiri maja socua sesa miijiaa quiquianu nijaniyajiniji. Nijaniyajuhuj, niaa jaara tama nioojiaaja tacatoyaquiri sesa nia miiniujiniji, niaari taraatia puecoosaari-cunonujuhuj. ⁴¿Cuno dieciocho pueyariuhuj, canapete cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaa quiquianu narta Jerusalén tiacajinia quiniaa pueyajiniji? ⁵Seetanujuanaa nia sequeyanijia, nojoriiri maja socua sesa miijiaa quiquianu nijaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

Miriqui Jesu niishitiojosano muetuhuo naanajiniji

⁶Jesuuri na nuhuaji pueya niishitiojoquiaari nio miriqui pohuatasanta:

—Tamonu pueyanoori higo naana jiitiaquiaari na uva cuhuariquajinia. Tamacari, na camaruuri nocua quiaquiaari na niqiniuria. Na jajau mianu paniri quiaa juucuaari. Shaanoori quiri quiaa. ⁷Cunora, na cuhuari quia cojuana sequereeri: “Quia niquiri nio naana. Janiyari pueyaracaanu najuhua niqiaani na jajau pajenura. Pueyaracaanu muetuyaquiri. Tari na shocorucuaari jiuujianaraca marijia. iQuia nure! Tamonu cuaara na nujuasaqui natasaaria, na muetunura cutara”.

⁸Cuhuari quia cojuanaari na riucaare: “Jiyaniijanaa, quia tariniitijeraara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutianiya. ⁹Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaa nia quiniuria.

Jesu jeeacasari porocuatucua samaatenu juuca

¹⁰Tamonu samaatenu juuca, Jesuuri tamonu tiacajinia niishitiojori quiaa Pueyaso secojojua tiajinia. ¹¹Tamonu maaji cusosuuri tii quiri quiaa juhuj. Dieciocho marijiaari na shoconujuquiaari porocuatua na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹²Jesu jaara na niqiquiaari, na sequereeri:

—iMaajiniaa miji! iQuia nijiniacuaa tari jeequerohua!

¹³Jesuuri na juaashiquia niaree maajicua. Jiyacaritij, maajiiri maninia jeequeque. Nojuajaari Pueyaso maninuhuaqueetanu coteeree naa na miishaanuucuatej. ¹⁴Pueyaso secojojua tiajinia jiyaniijiaari juaarii naa Jesu miiniuucua samaatenu juuca. Naaratej, tii quiniaa pueya sequere Jesu niqiaaraari:

—iSeis juucacuaari quia puetunu semaanajinijanaa pa poonijionura! iNiocua cuno juuca nijioriquia nia naatanijiosaanura, maja samaatenu* juuca!

¹⁵Jiyaniijia Jesuuri sequere:

—iSapueni juhua maninia miijiaa niquishano pueyanaa, puetunu nijaniyajanaari nia juunu, nia burro samaacartaquiaa samaatenu juuca, nia jaatucosocoriquiano mohuaca na raatenura! ¹⁶¿Nio maajiirihuj? Nojuaja cutaraari supuetana

Abraham ni quihuacuajinio supueno. ¿Majateeri maninijuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocuatú na quishacari.

¹⁷Naa Jesu sequesacarijij, puetunu na paraajanaari caririqutiurii. Saniniujia, puetunu pueyajanaari shuquiriaatia quiriqiaa nojori ni quishacari queraatia maninia Jesu miishano na cumaacata.

Miriqui Jesu pohuatasano mostaza jajaujiniji

(Mt 13.31-32; Mr 4.30-32)

¹⁸Jesuuri sequequiaari:

—¿Taate cua naata niishitiojonu nijaniyani, nia niishiniuria taa Pueyaso poonijia pueya jiuujajinia na rupaatani? ¹⁹Na rupaari juhua mostaza jajauniyojua, pueyano natasano na cuhuariquajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhua, Pueyaso rupaari caneya pueya jiuujacajinia puetunu nio jiyajinijanaa maninia miijiaa nojori quiniuria.

Miriqui Jesu pohuatasano pan poreetajajini

(Mt 13.33)

²⁰Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijia mijiria na rupaatani? ²¹Pueyaso rupaari juhua pan poreetaja maaji cojitishano trigo cashojuata, shanacusanu jiuujanaraca shiitaniyojua tohuatashijinia. Pan poreetajajini puetunu cuno cashojua miniquootasanojuanaa poreeteja. Pueyaso rupaari naa poonijiojuajuhua.

Juhua shiitaniyojua tohuateyari quiya Pueyasocua pa quianura

(Mt 7.13-14; 21-23)

²²Jesuuri Jerusalén tiacajiniara quiariquiaa na pueyata.

Nucuaaco na quiasacari, pueya niishitiojoriquiaa tiacajiniara, shiitaniyojua tiacajiniano. ²³Jiyacaritij, tamonu pueyanoori na nequesotaree:

—Jiyaniijanaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucaaree miriqui:

²⁴—Jiyanhua nia saniniujiuri shiitaniyojua tohuateyaco nia tiuquiniuria, Pueyaso nia rupuenura. Juhucarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. ²⁵Cua tojitiare. Tia camaru jaara sanere, tohuateya tionutaniyari. Nijaniya, cante na tia carijiniacuma quiyajaani, niari tohuateya piquiniuniutianiya najuhuanaj. Naa jaara naa nacare: “iJiyaniijanaa, canaacuaji quia riatate tohuateya!”, nojuajaari nia riucaanutaniya: “Maja cua niishiniu tejenote nijaniyani”. ²⁶Jiyacaritij, niari juhuacatecara sequenutaniya: “¿Majateeri canaa quia niishiniu? Canaacuajaari quiata miaquenujuani. Canaari quiata ratujua mariyatani. Quiaacuajaari canaa tiaca nuucacajinia niishitiojua”. ²⁷Tia camaruuri nia riucaanutaniya: “Janiyacuaajaari tari nia sequereeni, maja cua niishiniu tejenote nijaniyani. Nia quiojorohua niiquiji, puetunu nijaniyajanaa sesa miijiacanaa”. ²⁸Naa na taanusacari nijaniyatej, niari nujuquetunutaniya. Naa nia quiaa miaquenutaniya jiyanhua nia taraajenuta, nia ni quishacari Abraham, Isaac, Jacobo, puetunu pueyara Pueyaso sequesano caminiujunaa Pueyaso shuriucua quianocuaa. ²⁹Queraatia tamasa pueyapueeri nijionutaniya puetunu jiyacajiniujunaa Pueyaso shuriucua cajitiuniuria, nojori miaquenuunura nata. Nijionutaniyari pananu muetasamaji, pananu tiuquishacajinio, pananu shuucujaji jiyacajinijinio, pananu muetasamaji miaquetajara jiyacajinijiojuhuaj. ³⁰Quiarijiani, queraatia pueyari juhua tojishoo quiya narta pueyara. Cuno quishacari saniniujia, nojori cutaraari seetanujanaa tojishano pueya quiniutianiya

Pueyasora, Pueyaso tojitiyajaca nojori quiniucua mijiria. Naajuhua, quarijiani, queraatia pueyari juhua tojishano pueya quiya narta pueyara. Saniniujia, jiya puequesacari, nojoriiri najuhuaa quijiaa quiniutianiya Pueyasora, nojori tojitiacquiniucua nojuaja.

Jesu taraajesacari Jerusalén tiacajinia quiniaa pueyacua

(Mt 23.37-39)

³¹Jiyacari nojiaqueya Fariseocuaari Jesuucua tiuquijioquiaari. Nojoriiri Jesu numooteree:

—iNiiquiji quia mashiri! iJiyaniijia Herodes quia monu paniya!

³²Jesuuri nojori sequeree saaja:

—Cuno pueyanoori niishijia juhua jaami. Naa nia caminiujishuhua cua sequesano cuno jaamiria: “Janiyari samaruhua tohuatanijiani. Janiyari cusosuhua naatanijiyajaa-niuhua. Janiyari naa miya quarijiani, tariquijuhua. Janiyari tama tariqui tucatanutaniya puetunu cua miiniu panishanojuanaani”. Naa nia sequesuhua cuno pueyano. ³³Cuaara rupaquijia cua sashiiria. Janiya quarijia rucanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujunaa puecoosaaquiaricuaani. Majaari tamaqui cua monu quishaanutaniya.

³⁴Jerusalén tiacajinia quiniaa pueyanaa, niaacuajaari Pueyaso sequesano caminiujunaa puecoojuaca. Naaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatijani, taa caacaraja necohua rijioquiaacuaa na nesu cariquiaconi. Naaari saaja paniyaquiquiaa cua cojuanura nijaniya. ³⁵iCunora, cua tojitiare! Naa quiquoori tojetaarucujanaa shaquiquiniutianiya. Naajuhua, majaari socua nia ni quiniutianiya janiya, niaa jaara nia timitiasacari janiya sequereajitija: “iCuaara shuquiriaatia quiriia pa Jiyaniijia, Pueyasojiniji tiuquihuano!”

Jesu naatanishacari cusosu poreeno pueyano

14 ¹Tamonu samaatenu juuca, Jesuuri tamonu Fariseocuaa jiyaniijia tiacajinia quiaquiaari miaquenura, socua tamasa Fariseocuaatano. Nojoriiri Jesu shootiatuquiaa nojori niishiniuria casaa na miiniutianiya samaatenu juucani. ²Jiyacaritij, tamonu pueyanoori Jesu tajoji nujuariquaa, poreno cusotaano. ³Jesuuri Moisés Rootasanojiniji niishitiojonaa nequesotaree, Fariseocuaconi:

—¿Taa nia seroquiaa Moisés Rootasanojiniani? ¿Maniate cusosu pa naataniniu samaatenu juuca?

⁴Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniriiri. Na jiyarorohua na tiacajiniara.

⁵Na nuhuaji, Jesuuri cuno Fariseocuaa sequeree:

—Naa burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhua nia seru?

⁶Majaari nojori riucaanu quiri quenaaja.

Taa pa miyani queranacunura masuusano pa quishacari, taamueca pueyate masuushiyajaniuhua

⁷Jesuuri shootiatuquiaa taa masuusano pueya socua panishano cajitucujinia nojori cajituniuria riutioconeetariquiaani. Jesuuri cunora nojori ni quiaa pohuataree nio pohuatasano. Naa sequereeri:

⁸—Quiaa jaara masuusaariquia camishacari queranacunura, maja cumaati quia cajini socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijini. ⁹Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajaniya: “Shiiquia. Quia sanere nio pueyanoocujaji”. Naacuajitij, quiaari cajitishaanutaniya quia cariri quiniutia pueya paniyaquisha-

no cajitiujinia, miaqueja puequetujinia. ¹⁰Nocuaijia nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajanija, nojuajaari quia sequenutaniya: “Cua rupuenanaa, iniya quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajanijaqui nia masuuna panishano pueyano. ¹¹Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuuja, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹²Jesuuri na masuuna pueyano sequereejuhua:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhua, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuuja. Naacuajitij, quiaari tari namishaarohua-cunora, majaari socua quia masenu quiniutianiya Pueyasojiniji. ¹³Naaratej, quiaa jaara queranacunu paniya, quia masuure casamiijiunucua pueya, sesaruneca pueya, sesacujanucua pueya, cariyoujarujurinio. ¹⁴Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajanija saniniuuja. Naaratej, Pueyaso cutaraari maninia miiniutianiya quiajanija saniniuuja, na samiitijiosacariuhua maninia miijia pueya.

Miriqui Jesu pohuatasano na queranacunujiniji
(Mt 22.1-10)

¹⁵Jesuta cajiyano pueyano tojishacari naa Jesu pohuatasano-tej, Jesu sequereeri:

—iShuquiriaatia quijia cutaraari cuno, cante Pueyaso shuriucua miaquenutaniya jiyocuaanuni!

¹⁶Jesuuri na sequereeri:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. ¹⁷Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucusaaree niaacuaji. Nia miaquesee”.

¹⁸Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequereeri: “Janiyari shusha masere tamonu cuhuariquiani. Janiyari nocua quiaa na niqiniuucuan. Cua jiyanoori quenaaja. Maja cua naata quianu quiata queranacunuu-cua”. ¹⁹Tamonu masuusano pueyanoori sequereeri: “Janiyari diez poonijiojuaca juyaca masereeni. Na saniniuucua quiaanjia. Quiocua cua jiyanoori cua quiaaquishacari queranacunujinia”.

²⁰Tamonu masuusano pueyanoori sequereejuhua: “Shusha camiriinjia. Cunora, maja cua naata quianu”. ²¹Seruuri tamajaaja tacateyarohua na camaru tiajiniohua. Na jiyaniijia pohuatasuhua na masuusano pueya sequesanoori. Na jiyaniijiaari juaaqui. Na seru sequereeri: “Ritia quia quiaare tamasa pueya masuunucua tiaca nucuaacaco. Miji quia rijiooco casamiijiunucua pueya, sesaruneca pueya, sesacujua pueya, cariyoujarujuri pueyano”. ²²Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequereeri janiyacujani. Juhuanajuaja maja tia mishiniu”. ²³Na jiyaniijiaari na sequereeri: “Socua pueya quia pajecoo tiaca nucuaacaco, tamasa tiacajiniara nucuaaconio. iSocua pueya quia nenecojocoo nojori niniuria, cua tia mishiniuria! ²⁴Seetanujuanaa nia sequeyanijia, coteenu cua masuusano pueyajinijinioni, majaari quenaaja niquiriyatu nojorijinijinio saniniu quiniutianiya cua sumatusano”.

Saaja tama na cuaqueya panitajajaarijia
na naata Cristo nuhuajiniu
(Mt 10.37-38)

²⁵Jiyanhua queraatia pueyari Jesuta quiojoriquiaa. Jesuuri nojoriicua tacateeri. Nojori sequereeri:

²⁶—Cante cucua niya cua pueyano na quiniuriani, nojuaja cuaara niishiiria nio. iMaja nia naata cua pueyano nia quiniu nia paniyaquishacari janiya socua nia quejiniji, nia nucujinijinio! Nia niqiuocua, nia niqiuohua, nia tapueyocuaca, nia rimiatuhuajuhuaj, nia panishacari nojori socua janiyajiniji, imajaari nia naata cua pueyara nia quiniu! Naajuhua, imajaari quenaaja nia naata tama nia cuaqueyajaaja panijia nia quiniu socua janiyajiniji! ²⁷Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸Niaa jaara jiyaconaja tia tianu paniri, imajate coteenu nia cajiniu nia niishiriojonura taa cumaneecate panishaanutaniyani, na tucuatunura puetunujuanaa? Naajuhua, niaari niishiriojiya, queraatia quiyacuajate nia cumaneeca. ²⁹Niaa jaara coteenu naa miyaquiri, niaari najuhuaa morijiuucua nujuatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niqiniiaajanaari juhuacatecara nia macaatinutianiya. ³⁰Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatunura quiarijia”. ³¹Naajuhua, jiyaniijia jaara quianu paniri narta jiyaniijia miaquetonura, imajate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³²Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetonu quiniutianiya. Saniniuuja, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootoonura. ³³Naajuhua, niaa jaara carteyaquiri puetunu nia jiiatasanojuanaa, majaari nia naata cua pueyanora nia quiniu.

Miriqui Jesu pohuatasano shonijiniji
(Mt 5.13; Mr 9.50)

³⁴Shoni jaara tiquiriicia quia, maniniaari, pa panishano. Jaara shaacara quiqui, itaate na naata tiquiriiciara na quiniuhua? Maja na naata. ³⁵Najuhuaa quiyari. Majaari quenaaja maninia na quiniu cuhuariquiajinia jatasocoriquiano maninia na moritianiuria nataacuaca. Majaari quenaaja maniniajuhuaj, na paatishaanura na moquijianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojtiaara miriqui cua pohuatasano. Cuaara na niishiirijuhua. Seetanujuanaa cua tojtiajaca pueyani, nojoriiri juhua shoni mijiria.

Jesu pohuatasano miriqui tashucano borregojiniji
(Mt 18.10-14)

15 ¹Roma tiacajinia quijia jiyaniijia cumaneeca masejona, mariyata sesa miijia pueyari Jesuucua nijioriquiaa na pohuatasano nojori tojtianura. ²Cuno pojoriiri Fariseocuaca soosano pueya quiriqiaa, Moisés Rootasanojiniji niishitiojona soosano pueyano. Cunora, Fariseocuacaari, mariyata Moisés Rootasanojiniji niishitiojonaari tama rimiaqueturiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijia pueya shanacuquiaa nocua nojori nijionura. iJuhuajanija nojoritia miaquequiaajaariuhua!

³Naaratej, Jesuuri nojori niqiuara pohuataree nio miriqui pohuatasano:

⁴—Niaa jaara cien borregohua jiiitariquia, nojorijinijinio niquiriyatuniojua jaara tashucua, itaa nia miiquiaani? iNiaatucua nia noventa y nueve borregohua cureno tiujiaaquiri rupaquijia cuhuariquiajinia, tashucano borrego nia pajenura, niaa cuaara na riuriatarohuaaatijia? Taaquiririnij. Niaacuajaari naa miiquiaaquij. ⁵Niaa jaara na riuriatasee, niaari nia shuquiriniutia na paquihua nia numueecuaji. ⁶Niaa jaara na tiuquitarohua nia tiajiniohua, niaari nia rupuenaa, mariyata nia shuriucua quiniaa

rerejotenutaniya nia sequenura nojori: “iCuata nia shuquiriri quiarjia! iTari riuratarohua cua borregonioyua tashucuanonijia!”⁷ Seetanujuanaa nia sequeyanijia, naajaarihuaj, jiyocuaaanu quinaari jiyanoehua shuquirituquiaa niquiriyatu sesa mijia jaara noojia tacatore sesa na miiniujiniji. Cuno pueyanoori socua jiyanoehua shuquiritasano tamasaca noventa y nueve pueyajiniji, canapuetucuaa tari maninia pueyacuani.

Jesu pahuatasano miriqui juurequetesano cumaneejiniji

⁸Naajuhuj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuratareajaatijia. ⁹Na riuratasacari na juurequetesano cumanee, maajiiri na rupueana, mariyata na shuriucua quiniaa maajipohua rerejotenutaniya na sequenura nojori: “iMiji nia nimia! iCuata nia shuquiriri! iTari riuratarohua cua juurequetesano cumaneejia!”¹⁰ Seetanujuanaa nia sequeyanijia, jiyocuaaanu Pueyaso seyari naa shuquiriquiaaju-huaj sesa mijia jaara noojia tacatore sesa na miiniujiniji.

Jesu pahuatasano taa tamonu pueyano jiyanooquiaari neyanuni

¹¹Na nuhuaji, Jesuuri nio pahuatareejuhuaj: —Tamonu pueyanoori caapiqui niyanuraca quiquiaari. ¹²Socua naatujuaari na que sequeree: “Cua quena, quiarjia cua niqutiore quia jiiitasanojiniji, quiria quiriqiano quiaa jaara shaajeyare”. Naacuajitij, na queeri puetunu na jiiitasanojuanaa niqutiojoree necohua. ¹³Socua naatujuaari rupaquijia camueenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuuja tamasaca na niqutiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. ¹⁴Nojuaja jaara puetunu na cumaneeca puecaquiaarijanaa, cuno jiyajiniaari jiyanoehua miaajesacari quiquiaari. Mashajaari juhuacatecara miaajequiaari. ¹⁵Cunora quiaaree tamonu tahuercua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niqutionu quijia quenaaja na miaquesocoriquiano. ¹⁷Na nuhuaji, tama sequereearijia: “Cua queeri queraatia na tiajiniaaco seyara. Nojoriiri maninia miaquenuquiaa taquiya. Nojori sumatuuri cureequiaajuhuj. ¿Janiyarijiatatj? iJaniyari niya quera cusoya cua miaajenutani! ¹⁸iCua queecua tacateyarohuaraqiu! Janiyacua na sequesuhuanu: ‘Cua quena, janiyari Pueyaso miiquianu sesani. Janiyari sesa miiquianu quiajanijuhuj. ¹⁹Majaari socua cua sequenu quia niyanuta. Janiyari puera sesa mijiani. Cua jiyatere juhuari juhua quia seru cua quiniuria, quiara cua poonijionura”. ²⁰Naa na niishiriojonu nuhuajitij, mashajaari quiaquiaariuhua na queecua. ²¹Tucuaaanu na quishacarijia na que tiajiniji, na queeri na niquiriri. Nocua taraajereeri. Nocua neteyareeri na naacunura. Na cacaseeri. Na nujuuneequereeariuhuj. ²²Neyanuuri na que sequeree: “Cua quena, janiyari sesa miiquianu Pueyasoni, quiajanianio. Majaari cua sequenu quia niyanuta”. ²³Na queeri saaja na tiaco seya sequeree: “iRitia! iSocua maniniuqui toque miji nia riquioo! iNiocua quiyanu cushitirinoj! iJaaniisho nia cushitiri! iSapatu nia cushitirijuhuj! ²⁴Pa riutianishano juunu niqiojua nia quiaoco mosocoriquiano. Quiarjia pa queranacure. Pocua miaquenuuri, quiyanu na shuquiritasacari. ²⁵Quiarjia samiiarohuari. Nojuajaari shaajequiaari. iTari pocua muetarohuari!” Naacuajitij, nojoriiri juhuacatecara queranacuaquiaari.

²⁵Jiyacaritij, jiyapueranuuri cuhuariquiajinia quiriqiaa. Na tacatesacariuhua tiajiniohuara, jaara tari cateca quiriqiaa,

saaja pueya tojirii jaaquequenuyanoori, nianujuniuyanonio. ²⁶Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷Seruuri na riucuaaree: “Quia nuhuajishanacuaa tari tiuquiriohuano. Quia queeri shuquiriaatia quia maninia na tiuquishacariuhua, maja cusosu. Naaratej, canaa sequereeri querasapiquia juunu niqiojua canaa monura”. ²⁸Jiyacaritij, jiyapueranuuri jiyanoehua juuaquii. Majaari tiajinia na tiuquiniu paniniu quiriqiaa. Nocua na queeri nocua tohuatamaa carijiniacuma, na nenecojonura tiajinia na tiuquiniuria. ²⁹Na que sequeree saajaari: “Quiaacuaajaari niishiya, janiyari pueyaracaanu poonijioquiaa quiarani. Majaari quenaaja cua tarijonu quiquiaa quiajaninya. Naa maninia tojijia cua quishacari quiajaniyatej, imajaari quia niqutionu quiquiaari janiya quenaaja niquiriyatu cabranioyua, cua queranacunura cua rupueanaata! ³⁰Quiarjia saniniuuja, quia niyanu seque tiuquishacariuhua, iquiaari querasapiquia juunu niqiojua more nera! iNojuajaari quia cumaneeca puecacan paanatujiuria!” ³¹Na queeri na sequeree: “Sanajanaa, quiaari pueyaracaanu cuata quia. Puetunu cua jiiitasanojuanaari quia casa. ³²Naajaa, quiarjiani, maninia pa queranacure. Shuquiriaatia pa quiri. Quia tarajanuuri juhua macu quiriqiaa tari. Quiarjia samiiarohua pajaniyaraari. Nojuajaari juhua tashucuaanu pocua. Quiarjia pocua muetarohuari”.

Miriqui Jesu pahuatasano pueyanojiniji, cante na jiyaniijia cumaneeca riutiocojuani

16 ¹Jesuuri na pueya pahuataquiaari nio miriqui pahuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitiaja na casami cojuariquiano, na cumaneecanio. Tamasaca pueyari cuno camaru pahuataree na seruna na cumaneeca riuticoriquiaa jiyasohuaja, tama nerajaaja. ²Cunora, jiyaniijiaari cuno na seru sequeree: “¿Taa quia miiquiaa janiyani? iQuiaana sesa miiquiaa! Quiarjia cua niqutiore quia naajiotasano puetunu quia miishanojinijijanaa. Majaari socua quia quiniu quiniutianiya cua casami cojuana”. ³Cunora, cumaneeca cojuanaari niishiriojooque. Tama sequereearijia: “¿Taa cua miiniutianiyarini cua jiyaniijia jaara cua jatere cua poonijiosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanoehua cararaatiaari quiria, pueyajiniji nareja cua mashiniquijionura cua panishano. ⁴iJaj! Tari niishiquiniijia taa cua miiniutianiyani tamasaca taraajenura cucua, nojori masunura janiya nojori tiajinia cua quiniuria, janiya jaara nio poonijiosanojiniji jataaareni”. ⁵Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casa cua jiyaniijia niqutiojocanu quiajaniani?” ⁶Pueyanoori na riucuaaree: “Cua niqutiojanu cien patacocua mishaja shiyocuanu”. Cumaneeca cojuanaari na sequeree: “Ritia quia cajiri. Niya quia quia masano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸Na jiyaniijia jaara niishiquiaari sesa na seru miishano, na sequereeri: “iQuiaaqui jiyanoehua niishijia tama quia cuaqueyajaaja quia cojanura!”

⁷Seetanujuanaa pueyanaa, Pueyaso niishiyashijia pueyari socua jiyanoehua niishijia cuhuashiqui quijia pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuuja nojori.

⁹Naarate nia nacasuyanijia, naa capora nia quiriuhuj, maninia nia miiniuria pueya. Maja nia casami nia jamuenu.

Cunocuaajaari nareja Pueyaso niqutiosano niajanija. Naacuajitij, capora nia quishacari mijiria jaara pueyema, nia Jiyaniijaari nia tiuqunitianutaniya pueyaracaanu quishaqui jiyocuaaanu, jiyanoahua na shuquiritiasacari niajanija.

¹⁰Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutaniya. Saniniuujia, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaarihuaj. ¹¹Naajuhuj, niaa jaara maninia jiiitaaquiquiaa mijiria casami, Pueyasoori niaacua tiyaquiniutianiya seetanujuanaa maninia jiyocuaaanuji casami nia jiiitanura. ¹²Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiosano na riuriotacani? Maja cutaraari nia niqutiosano quiniutianiya.

¹³Poonitijosano pueyanoori maja na naata caapiqui jiyaniijaari poonijionu. Jaara caapiqui jiyaniijaaraca quiri, tamonu samiritiaari, na panishacari tamonu. Naajuhuj, niquriyatu jiyaniija tojjija quiniutianiya maniniaari, na soosacari tamonu. Naajuhuj pueyanaa, majaari nia naata Pueyasooocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacuajitij, Pueyasoori maja na naata nia poonitijionu nera.

¹⁴Fariseocuaari jiyanoahua cumaneeca panijiaa quijia. Naaratej, nojori tojjishacari Jesu sequesano, nojoriiri saaja na rerequeteree. ¹⁵Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocuaajaari nioojia niishiya. Niaari pueya jiyajenetequiaa nojori jiyaniishacari niaari Pueyaso panishano cutara, queraatia casami nia jiiitiasacari. Saniniuujia, casaa pueya jiyatequiaa socua jiyanoahua na panishanorani, Pueyasoori cuno soya cutara.

**Moisés Rootasanoori coteenu quiquiaari,
quiarijia quiya cutaraari quiarinio Pueyaso Rupaa**

¹⁶Moisés Rootasano, mariyata puetunu tariucuaaanu Pueyaso sequenu panishano caminiujunianaa pohuatasanojuanaari pueya tojtiasocoriquiano quiquiaari, Tiuquinijiona Juan pohuatasanojuhuaj. Quiarijia saniniuujia, maninia rupaa Pueyasojiniijiri pohuatasaaquiaa, taa Pueyaso jiyanooni panyia pueyani, na muerasu nojori quiniuria. Quiarijiani, puetunu pueyajaanaari jiyanoahua saniniuujia Pueyaso muerasu nojori quiniuria.

¹⁷Nio jiyari shaajeriquiano, jiya cajiniocuanio. Saniniuujia, tariucuaaanu pueyara Pueyaso sequesano caminiujunianaa pohuatasano cutaraari maja na shaajenu quiniutianiya quenaaja.

**Jesu niishitijosano, pueyano carteyaquiniuria necocua
(Mt 19.1-12; Mr 10.1-12)**

¹⁸Pueyano jaara necocua cartere tamonu maajitia na caminiuria, cuno pueyanoori jiyanoahua sesa miya Pueyaso niqiuara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinijinio

¹⁹Casamiriaca pueyanoori quiquiaari. Jiyanoahua maniniuqui toqueya cushiyojojaari, juhua jiyaniijianucua toqueya. Jiyanoahua na shuquiriniutia, puetunu juucajanaa queranacujuaari. ²⁰Jiyacaritij, casamijiu pueyanoori quijijuhuj. Jiyanoahua sapueyaraca. Nojuajaari cuno casamiriaca pueyano tia tohuatayaji nojotasano puetunu juucajanaa. Na sesaari quijia Lázaroo. ²¹Nojuajaari casamiriaca miaquejajiniiji

totinijosano raacua miaquenu panijia juucua. Saaja sareyari na sapueya rimianacunuujua. ²²Na nuhuaji, cuno casamijiu pueyanoori cusoquiaari. Pueyaso seyari na riqiiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaaquiaariiri. ²³Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuaaanu niqurii Lázaroori, shuquiriaatia quiyano supuetana Abrahamta. ²⁴Casamiriaca pueyanoori nacaree: “iCua supuetana Abrahamnaa, cucua quia taraajere quenaaja! iLázaroo quia jiyarore cucua! iCuaara na juaashiquia nacatu shiiria mohuacajinia! iCua niti shiniajaquee quenaajacua! iJaniyari puera jiyanoahua naquiya miya nio manijiniani!” ²⁵Abrahamri saaja na riucaaree: “Sanajanaa, quia niishiri taa jiyanoahua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanoahua taraatia quiquiaari pueyaracaanu, jiyocua na quishacari. Lázaroori quiarijia niya cumaniijashiya. Quiaari saniniuujia naquiya miishiyacujua. ²⁶Naajuhuj, jiyanoahua tucuaa taaori pa tajinia quiya. Cunora, cante niquriji niuuniu panyia cuniqijiria quiocuani, majaari na naata. Naajuhuj, cante quia quiquiojiniji niuuniu panyia niqurijiriani, majaari na naatajuhuaj”. ²⁷Casamiriaca pueyanoori supuetana Abraham sequerohuacuhuj: “Naa naasucuj cua supuetana Abrahamnaa. Naajaa, quia secojyanijia, Lázaroo quia jiyarorohua cua que tijajinia. ²⁸Tii quiyajaari cua tapueyocua. Cinco tarajanuhuaracanijia. Lázaroo cuara nojori numooteera, maja nojori quejoosaanurajuhua nio saniitiosaquiquiojinia”. ²⁹Abrahamri na riucaaree: “Nojoricuaajaari Moisés Rootasano jiiitaa, puetunu Pueyaso sequesano caminiujunianaa naajiotasanojuanaano. Quia tapueyocua cuaara tojtiaara cuno”. ³⁰Casamiriaca pueyanoori riucaaree: “Naa naasucuatuhuj, cua supuetana Abrahamnaa. Naajaa, tamonu pueyano macunucujinijinio jaara muetarohua nojoriicua, nojoriiri noojia tacatonutaniya sesa nojori miiniujiniji”. ³¹Abrahamri saaja na riucaaree: “Nojori jaara Moisés Rootasano tojtianu panyiaquiquiaa, Pueyaso sequesano caminiujunianaa naajionuutasanonio, majaari nojori tojtianu quiniutianiyajuhuj, macu pueyano jaara samiitarohua”.

**Puereetaari quiniutianiya sesa miijiacara
(Mt 18.6-7, 21-22; Mr 9.42)**

17 ¹Na nuhuaji, Jesuuri na pueya sequequiaari: —Mijiria, pueyari pueyaracaanu sesa miitishaaquiaa. Jiyanoahua taraatia quijiaari cuno, cante sesa miitiri tamonuni. ²Jiyano pueyanoratej, maara socua maninia quiri nera, puereetuca saajia jaara na riqiiajiniji morotasaare, shoniniacua caminia jiuujajinia jartasocoriquiano. Jaara naa miishaaretej, maara maninia quiri, maja sesa miijara na jiyatenura niquriyatu nio muerasuniyojajinijinio. ³Cunora, tama nia cuaqueyajaaja nia cojuare maja quenaaja sesa nia miitiniuria pueya. ⁴Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajanija, quia jiyanoorinijio. ⁵Nojuaja jaara sequeyarucua sesa miya quiajanija niquriyatu juuca, naajaa, quia jiyanooriquia, nojuaja jaara quia sequere: “Sesa miiri quiajanijianijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooni.

Pueyasooocua tiuujia pueyanoori jiyanoahua cumaacaraca

⁵Jesu saquirijosano pueyari Jesu sequequiaari:

—Jiyaniijianaa, socua jiyanoahua canaa quia tiutiri Pueyasooocua, socua cumaaca canaa jiiitanura.

⁶Jiyaniija Jesuuri nojori riucaaree:

—Pueyasooocua nia tiuuniu jaara quiri quenaaja juhua mostaza jajauniyojua, jiyanoahua shiitaniyojua, niaa jaara nio

satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

Pueyasora poonijionatucua taa miijia quiriquianij

⁷Niaa jaara seruraca quiriquia, nojuaja jaara tiajinia tiuquiriohua quia cuhuariquijainiji tee na namitiri quiaacuaajani, quia seya cojuanjini soj, ¿niaatucua na sequere: “Miji, quia miaquesuhua?” ⁸Majaruhua. Niaari saaja na sequenutaniya: “iQuiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuuja miaquerohua. Quiocua raturohuajuhua”. ⁹Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? iMaja! ¹⁰Naajuhua, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitajajiniijiaaja cua miini quiquiaa cua Jiyaniijara. Janiyari saaja pueyaracaanu paniquiaa cucua na tequejonura juhua naatujuaacuani”.

Jesu naatanijosacari diez pueya, lepraraca cusosuhua

¹¹Jesuuri Jerusalén tiacajiniara na pueyata quiri quiaacu-huaj. Jiyacari, Galilea jiya, Samaria jiya tajiniaaco quiri quiaaari. ¹²Quera na tiuquishacari shiitianiyoja tiacajinia, diez pueya lepraraca* cusosuhua na naacuquaaari. Nojoriiri tucuaaanujijia Jesuucua nijuatusee. ¹³Nojoriiri Jesuucua nacaree:

—iNiishitiojona Jesunaa, canaacua quia taraajere!

¹⁴Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricuaajani.

Nojori canujuuucatusacarijia, nojori cusunuuri shaajeequee.

¹⁵Tamonu nojorijiniijio niquishacari na cuaqueya tari cushiriquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso.

¹⁶Jesu cariquimijia mojoquetaseeri. Jiyocua naniriiri. Jesu sequereeri: “iPaacarasho Jesunaa!” Cuno pueyanoori Samaria* jiyajiniijio tahue quiquiaari. ¹⁷Jesuuri na pueya niquiara naa sequere:

—¿Majateeri diez cusosuhua naatanijosaanu quiri?

¿Teeteeri narta naataconohua nueve pueyani? ¹⁸¿Saaja nio tahueteeri tacaterohua Pueyaso na maniniuhuaqueetanura?

¹⁹Na nuhuaji, Jesuuri cuno tahue sequere:

—Quia sanere. Quia quiaarohua. Quiaacuaja naatarohua cucua quia tiuuniuucua.

Taa na quiniutianiya, Jiyaniijia Cristo tiuquishacarihua (Mt 24.23-28, 36-41)

²⁰Fariseocuaari Jesu nequesotaquiaari taacari Pueyaso Jiyarosocoriquiano niniutianiya jiyaniijara na quiniuria mijiriani. Jesuuri nojori riucaaree saaja:

—Pueyaso Jiyarosano jiiitiasacari na muerasu, majaari namijata niquishano. ²¹Majaari na naata sequesaanu: “Niya quia pa Jiyaniijia quiquio”, “Jati quiyaruhua”. Pueyasocuaajari tari niya jiiitaa na muerasu nia tajinia.

²²Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquiniuucua jiaatiantuniya niaata cua quiniuria rupaquijia, taa niaata cua quia quiri quiaacuani. Majaari nia niquini quiniutianiya janiya. ²³Tamasacaari nia sequenutaniya: “iNiya quiyacuaja nia Jiyaniijia!” Tamasacaari saniniuuja sequenutaniyacujua: “iNooj, jati quiyatej!” Majaari nia tojinu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴Mijiria cua tacatesacarihua, cuno juuca, janiyari niquishaanutaniyani, naatej, taa miacana puetunu jiya cajiniocuaajanaa niquishaaquiacuaani na nunujusacari. ²⁵Saniniuuja, mijiria cua quishacarijia, janiyari coteenu jiyanohua naquiya miishaanutaniyani. Nio pa

quishacari pueyari cua paniyaquiniutianiya. ²⁶Quera cua tiuquiniu panishacarihua mijiria, naa quiniutianiyaari taa mijiria quiniaa pueya quiquiaaricuaa supuetana Noé quishacari. ²⁷Naa quiquiaariiri cuno quishacari. Mijiria quiniaa pueyari juhuajaniya miaquenujuua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuca buquejina. Canashiyajiqi, maruuri jiyanohua niquiaari. Puetunu mijiria quiniaajanaari cusunuuquiaari pajaacajinia. ²⁸Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenujuua. Raruujuaari. Casami masejojuaari. Juhuajaniya na casami niquitiojuuaari. Na cuhuariquiacua natoonuaari. Na tiacara tiajojuaariuhua. ²⁹Naa juhuajaniya nojori quishacari, Lotri tohuataquiaari Sodoma tiacajini. Jiyacari, maniiri asufreta cojitishano juhua maru niquiaari jiyocuaaanuji. Puetunu cuno sesa miijiacajanaari manijinia catequiaari. ³⁰Naa quiniutianiyaariuhua quera jiya nequesacari. Pueyari juhuajaniya quiniutianiya. Janiyari jiyacari canashiyajiqi tiuquiniutianihuani.

³¹Cuno juuca, pueyano jaara na tia cacojiria quia, cuaara roseyaquiria na casamicua tajiniaaco. Naajuhua, pueyano jaara na cuhuariquijinia quia, nojuaja cuaara tacateyaquihuara na tajinia. ³²Nia niishiriquia supuetana Lot niquiocua. Na mashishacari, nojuajaari ritia cusoquiaari na nijiniara na niquiniuucua, na casamicua na taraajesacari. ³³Cante saaja shuquiriaatia mijiria na quiniuria niishiriojuani, nojuajaari na nuhuaji jiyanohua taraatia quiniutianiya Pueyasoju. Saniniuuja, cante tama na cuaqueyajaaja panitija cua tojijara na quiniuriani, nojuajaari pueyaracaanu shuquiriaatia quijara jiyatesaanutaniya.

³⁴Cua tojiri. Cuno niucujuhua, caapiqui pueya juriatoosacari juuca na maquetujinia, niquiriyatujuaari rishaanutaniya jiyocuaaanura, Pueyaso pueyano na quiniuucua. Tamonuuri tiujiasaanutaniya saniitosocoriquiano. ³⁵Cuno juucajuhua, caapiqui maajipohua riiquiniushacari jati quia juuca, cucua tiuujaari tarajanu shuriucuaari rishaanutaniya. Tamonuuri tiujiasaanutaniya saniitosocoriquiano. ³⁶Caapiqui pueya quishacari cuhuariquijinia, cua pueyanoori rishaanutaniya. Tamonuuri tiujiasaanutaniya saniitosocoriquiano.

³⁷Jesu pueya tojishacari naa Jesu sequesantej, nojoriiri na nequesotee:

—¿Tee nio quia pahuatasano niquishaanutaniyarini?

Jesuuri nojori riucaaree miriqui:

—Tee casaa moqueyani, mohuari tii rerejia.

Naajuhua, majaari quenaaja niquiriyatu Pueyaso tojiyashijia cureenu quiniutianiya saniitosoo.

Jesu pahuatasano mashiquiojiniji, pueya nequesoreena pueyanojiniijio

18 ¹Jesuuri na pueya pahuataquiaari nio miriqui pahuatasano nojori na niishitiojonura, nojori cuaara Pueyaso secojora pueyaracaanu, nojori taacanuyaquiniutia. ²Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetenano. ³Cuno tiacajiniaja tamonu mashiquioori quiquiaarijuhuaj. Mashiquioori cuno nequesoreenaacua rucanejojua pueyaracaanu. Na secojojuaari sesa na miinia pueyano cuaara na niquitiohuara na casaa saniniuuja, sesa na miishanojiniji nojuaja. ⁴Majaari nequesoreena tojinu panini quijia pueyaracaanu cuno mashiquio. Naajaa, pueyaracaanu nocua na rucanejosacari, cuno nequesoreenaari socua tama sequequiaarijaaja: “Janiyari maja Pueyaso puerejani. Janiyari pueya tojiyashijia cutarani. ⁵Naajaa, naa nio mashiquio taajetesacari janiya pueyaracaanutej, janiyari quiri quia na

panishano miiniutianiya nerani, mariqui cua juaatiijiore pueyaracaanuuri na nenecojosacari janiya”.

⁶Maninia na pueya niishiniuria na pohuatasano, Jiyaniijia Jesuuri naa nojori sequerohuacuahuaj:

—Naa miiquiaariiri, cuno pueya nequesoreena seque. Jiyanoehua pueya rerequeteja quiquiaariiri, naajaa, nojuajaari maninia miiquiaari cuno mashiquiora. ⁷¿Nia que Pueyasoorijia-taj? ¿Niaateeri jiyaniya maja nojuaja tojiniu quiniutianiya na muerasu, canapue te na secojoquiaani juuca, niucuanio? ¿Pueyasoteeri nia sashitiniutianiyaajara? ¡Maja! ⁸Nojuajaari maja na tarishiniu quiniutianiya. Ritia nia naacunutaniyari sesa nia miijia pueyacuaji. Sesa nia miijiaacari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasooeua tiuujiaca riuriatanutaniya naa pueyaracaanu secojonuujuacani?

**Jesu pohuatasano miriqui Fariseo pueyanojiniji,
Romano jiyaniijia cumaneeca masejojuajiniijio**

⁹Jesuuri socua nio miriqui pohuatasano pohuataquiaari noo pueya niquiara, canapue te tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasa pueya soojea, nojori jyanishacari cuno pueyari socua sesa miijia nojorijiniji. Cunora, Jesuuri nojori niquiara naa pohuataquiaari:

¹⁰—Fariseo pueyanoori quiaquiaari Pueyaso Secojojuatiajinia na secojonura Pueyaso. Jiyacaritij, Romano jiyaniijia cumaneeca masejojuua pueyanoori quiaquiaari Pueyaso na secojonura tiijiuhuaj. ¹¹Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasa pueyani. Tamasa cutaraari nohuasenujuuca, sesa miijia, maaji porocujuhuj. Naajuhuj, shuquiriaatia quianijia, janiyari maja sesa miijiani juhua nio pueyanojua niya cuata secojiyani, cumaneeca masejona pueyanoni. ¹²Janiyari caapiqui juuca miaqueyaqui-quiaani puetunu semaanajanaa cua shuquiritiniuria quiajaniya. Naajuhuj, janiyari pueyaracaanu puetunu cua masesanojinijijianaa niquitioquiaa quiarani, taa Moisés rootaquiaaricujani”. ¹³Cumaneeca masejonaari saniniuujia tucuaaanu ni nujuasee. Na secojosacari, majaari quenaaja na maunu quiriquiaa jiyocuaaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri. ¹⁴Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoaquishoo tacateyarohuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

**Jesu niasacari na juaashiquia conaajaacua
(Mt 19.13-15; Mr 10.13-16)**

¹⁵Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juaarii. ¹⁶Jesuuri saaja conaaja poonaa sequere, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenuunu. Cante Pueyaso muerasura quiniu paniani, nojori cuara jiyateera tama na cuaqueyajaaja juhua nio naatujooriria. ¹⁷Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

**Casamiriaca pueyano pocoojosacari Jesuta
(Mt 19.16-30; Mr 10.17-31)**

¹⁸Tamonu Judiocuaca camarnuuri Jesu nequesotaquiaari: —Maninia niishitiojonanaa, ¿taa cua miiniutianiya, jiya puequesacari cua samiitianishaanura, pueyaracaanu quijiaa cua quiniuria Pueyasotani?

¹⁹Jesuuri na riucuarere:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu. ²⁰Pueyanonaa, quiaacuajaari Moisés Rootasano niishijia. Naa naajiotasanocujaaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sajonota. Quia que, quia nucua tojijia quia quiri”.

²¹Pueyanoori Jesu riucuarere:

—Janiyacuajaari cua naatujuajini puetunu cuno tojijiajanaani.

²²Naa na sequesacaritij, Jesuuri na sequere:

—Quiyajaari niquiriyatu casaa quia miishoojua. Nio quia miiri: puetunu quia jitiananojuanaa quia niquitiojore cumaneeca. Na nuhuaji, casamijiunucua pueya cuno cumaneeca quia niquitiojore nareja. Naacuajitij, quiaari jyanohua casamiriaca quiniutianiya cutara jiyocuaaanu. Na nuhuaji, quicua nimiohua cutara, cua pueyano quia quiniuria.

²³Na tojishacari Jesu sequesano, nojuajaari jyanohua taraajee, jyanohua queraatia casamiriaca na quishacari.

²⁴Jesu niquishacari nojuaja taraajeyano, Jesuuri na pueya sequere:

—Casamiriaca pueyara, jyanohua jiyajenetaari Pueyaso muerasu nojori quiniuria. ²⁵¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jyanohua jiyajenetaari Pueyaso muerasu na jatanishaanura.

²⁶Pueya tojishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianiyanitioj?

²⁷Jesuuri nojori riucuarere:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸Pedroori Jesu sequere:

—Jiyaniijianaa, ¿canaarijataj? Canaari puetunu canaa jitiananojuanaa tiujiaquiaarini canaa nuhuajiniuria quiajaniya.

²⁹Jesuuri na riucuarere:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijonurani: na tia, na que, na nucua, tapueyocua, necocua, necohua, nojuajaari socua jyanohua queraatia masenutaniya mijiria na quishacarija.

³⁰Na nuhuaji, samiitianishano quiniutianiyaari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

**Jesu pacutesacari pohuatanu, nojuaja mosaanutaniya
(Mt 20.17-19; Mr 10.32-34)**

³¹Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quini puetunujuanaa miishaanutaniya taa tariucuaaanu pueyara Pueyaso sequesano caminiujunaa sequequiaaricujaa janiyajini. ³²Naacuajitij, janiyari tahua niquitiosaanutaniya ni. Nojoriiri cua macaatiutianiya. Taraatia cua miitiutianiyaari. Cua riocojotunutaniyaari. ³³Cua piquitiutianiyaariuhuj. Na nuhuaji, cua motunutaniyaari. Naajaa, jiuujianaraca juucajinia, janiyari samiitianutaniuhuanu.

³⁴Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu

sequeriquiaani. Juhua miriqui sequesanoori quiriquiaa nojoriria.

Jesu jeecasacari cariojuaru pueyano Jericó tiacajinia

(Mt 20.29-34; Mr 10.46-52)

³⁵Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nucuaco. ³⁶Cariojuaru tojishacari queraatia pueya tajiyano, pueya nequesotareeri:

—¿Casaatejanojoni?

³⁷Pueyari na sequereee:

—Nazaret tiacajinijinio Jesucujaja tajiya.

³⁸Cariojuaruuri nacaquee:

—iJesunaa! iSupuetana David niquiohuacuajinio supueno pueyanonaa! iCucua quia taraajere quenaaja!

³⁹Jesu puetanaa pueyari na juaarii na sanaajanura juucua. Nojuajaari saaja socua jiyanoohua nacaree:

—iSupuetana David niquiohuacuajinio supueno pueyanonaa! iCucua quia taraajere!

⁴⁰Jesu tojishacari nojuaja, nujuaseeri. Jesuuri pueya sequereee cariojuaru cuara jaatucusaaria nocua. Cariojuaru tiuquishacari nocua, Jesuuri na nequesotaree:

⁴¹—¿Casaa quia paniya cua miiniuria quiajaniani?

Cariojuaruuri Jesu riucaaree:

—iJiyaniijianaa, niquijiaara quiniu paniuhanijia!

⁴²Jesuuri na sequereee:

—iNiquijiaara quia quiriohua! Quia namijiacujaja tari jeequerohua cucua quia tiuushacari.

⁴³Jiyacaritij, cariojuaruuri maninia niquijiaara quiquii. Jesu nuhuaji sacuaareeri na shuquiritianuta Pueyaso. Puetunu Jesu miishano niquniaajanaari Pueyaso maninuhuaqueetariquiaa.

Jesu pocojosacari Zaqueota

19 ¹Jesuuri Jericó tiacajinia tiuquijioquiaari na pueyata. Tiaca jiuujiaaco quiariquiaari. ²Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijiaara cumaneeca masejonaa camarnu quiquiaari. ³Nojuajaari Jesu niishiniu panijia juucua. Majaari na naata niquniu quiriquiaa Jesu, puera jiyanoohua pueya quiniucua Jesu shocua. Naajuhuj, Zaqueori puera poscuashi quijia. ⁴Cunora, Zaqueori netequiaari Jesu tajoji. Nu shuucuaji sicómoro naanaacua macaseeri, maninia na niquninuria tiji Jesu, jaara cunoco tajimia. ⁵Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, iritia quia rosemohua! Janiya quiarijia quia tiajinia maquenutaniyani.

⁶Zaqueori ritia rosemohua. Jesu tiuquinitiaree na tiajiniaari jiyanoohua na shuquiriniutia. ⁷Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. ⁸Na nuhuaji, Zaqueori nujuaree. Jesu sequereeri:

—Seetanujanaa quia sequenyajia, Jiyaniijianaa, janiyari quiarijia quiocua tiuuriini. Naacuajitij, janiyari casamiijuuniucua nareja niqutiojonutaniya puetunu cua jiiitasano cajiniocujinijianaa. Naajuhuj, janiya jaara puera cumaneeca masecanu tamasa pueyajinijia cua sapojontutani, janiyari nojori niqutionutanihua socua jiyanoohua queraatia cumaneecani cua nohuasesanojinijia nojori.

⁹Jesuuri na sequereee pueya niquiara:

—iQuiarijiani, nio tiajinia quinia pueyari tari jiyanooshaaree! Nio pueyanocujajaari supuetana Abraham niquiohuacuajinio supuenojuhuj. Nojuajaari cucua tiuuri taa Abraham tiuquiaari Pueyasoocuaaani. ¹⁰Janiyacujajaari cunora mijiria niquiaarini, tashucano pueya cua pajenura, nojori cua jaariutianura Sesaaca.

Miriqui Jesu pohuatasano diez cumaneecajinijia

(Mt 25.14-30)

¹¹Tii quinia pueyari Jesu pohuatasano tojitiariquiaa. Jesuuri tari cateca quiriquiaa Jerusalén tiacajinijia. Pueyari jiyaniriquiaa Jesuuri Israel pueya jiyaniijiaara quiniutianiya tari, Pueyaso muerasu na jiiitanura mijiria. Nocujaj, Jesuuri nojori pohuatare nio miriqui pohuatasano, nojori na niishitiojonura. ¹²Naa nojori niquiara pohuatareeri:

—Tamonu jiyaniijia niyanuuri quiquiaari. Nojuajaari tucuaaanu tamonu jiyajinia quiaquiaari jiyaniijiaara na jiyatesaanura. Jiyaniijiaara na jiyatesaanu nuhuaji, nojuajaari tacateriquianohua quiriquiaa, narta pueya jiyaniijia na quiniuria. ¹³Na nuhuajiria, nojuajaari diez na seya sequereee nocua nojori nijionura. Nojuajaari puetunu nojorijianaa niqutiojoree niquiriyatu cumanee, orojinijia* shipinishano. Nojori sequereeri: “Nio cumanee nia poontitijore, janiya cuara tiuquiriohuajaatiinijia”. ¹⁴Na nuhuaji quiaqueeri. Na jiyajinijinio pueyari maja na niquniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

¹⁵Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poontitijosacari na niqutiojosano cumaneeca. ¹⁶Coteenu seruuri nocua nimiaa. Na jiyaniijia sequeseeri: “Cua jiyaniijianaa, cua poontitijosacari quia niqutiosano cumanee janiya, janiyari socua diez cumaneeca reratecanuni”. ¹⁷Na jiyaniijiaari na sequereee: “iManiniacujaja! iQuiaacuajaari maninia cua seru! Quiaari secaja cua niqutiosano quiajaniya poontitijoriquiaa shitimia quiria. Naaratej, janiyari quia jiyatenutaniya diez tiaca jiyaniijiaara quia quiniuriani”. ¹⁸Na nuhuaji, tamonu na seruuri nocua nimiaajuhuj. Nojuajaari na jiyaniijia sequereee: “Cua jiyaniijianaa, cua poontitijosacari quia niqutiosano cumanee janiya, janiyari socua cinco cumaneeca reratecanuni”. ¹⁹Na jiyaniijiaari na sequereeejuhuaj: “Quiaari cinco tiaca jiyaniijiaara quiniutianiya”.

²⁰Na nuhuaji, tamonu na seruuri nocua nimiaajuhuj. Na jiyaniijia sequeseeri: “Jiyaniijianaa, niya quia quia cumanee quia niqutiosano janiya. Janiyari na cojuacanu maniniani, toqueraujinia jiunicosano. ²¹Janiyari naa miiquianuni cua pueresacari quiajaniya. Janiyari niishiyani, quiaari cuarta pueyacua taraajeyashijia. Quiaari tamasa racatasanojinijia poojua. Quiaari tamasa natoosanojinijia senoojuajuhuj”. ²²Na jiyaniijiaari na juaarii: “Sesaacanaa, tama quia sequesanoatajaaja janiyari quia nequesoreenutaniyani. ¿Naate? ¿Quiaateeri niishiquianu janiyari pueyacua taraajeyashijiani? ¿Janiyateeri tamasa racatasanojinijia poojuani? ¿Janiyateeri tamasa natoosanojinijia senoojuajuhuj? ²³Quiaa jaara jiyaniquianu janiya naa miiijiani, ¿casaara cua cumanee quia niqutioyauquianu cumaneeca cojuanaarini? Nojori jaara cua cumanee poontitijocanu, janiya maara socua queraatia na riuriatasuhuaani, cua tiajinia cua tiuquishacarihua”. ²⁴Cunora, na jiyaniijiaari tii quinia pueya sequereee: “iCua cumanee nia jaariutiare cuno! Nia niqutioire cua maninia seru, cante diez cumaneeca jiiitaacuajani”. ²⁵Nojoriiri na sequereee: “Jiyaniijianaa, ¿casaarateni? Nojuacuaja tari diez cumaneeca jiiitaa”. ²⁶Jiyaniijiaari saaja nojori riucaaree: “Seetanujanaa nia sequenyajia, cante tari jiiitiani, nojuajaari socua niqutiosaanutaniya. Cante na jiiitaquiyani, secaja na jiiitasanoori puetunujanaa jaariutiasaanutaniya, cucua tiuyashijia na quiniucua. ²⁷Quiarijia, cua paraa saniniujia, cuno pojori canaputee cua paniaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruuretajaca seque”.

Jesu tiuquishacari Jerusalén tiacajinia

(Mt 21.1-11; Mr 11.1-11; Jn 12.12-19)

²⁸Nio na pohuatanu nuhuaji, Jesuuri na pueya puetaareecu-huaj Jerusalén tiacajiniara. ²⁹Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananuju-huaj, Jesuuri caapiqui na pueya sequeree:

³⁰—Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriantananiya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹Pueya jaara nequesotare niajaniya casaara nia samaacartaanoj, niocua na riucaare: “Jiyaniijia na paniya”.

³²Jesu pueyari quiaaree. Nojoriiri na riuriatasee taa Jesu sequequiaaricujani. ³³Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴Nojoriiri na riucaare:

—Jiyaniijia na paniya.

³⁵Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶Na quiasacari Jerusalén tiacajiniara, pueyari na toqueya muevojuaari nucuaco Jesuucujai. ³⁷Nojori rosetanu panishacari Olivo cuhuariquia tuhuananujini, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maniniuhuaqueetariquiaa puetunu na cumaacata na miishanojuanaa nojori niqiniuucua. Nojoriiri cunora jiyanojua shuquiritariquiaa Pueyaso. ³⁸Nojoriiri naa nacooriaquiaa:

—iPueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. iNojuajaari jiyanojua maninia! iPa shuquiritiireno!

³⁹Cuniqui pueya tajinia quiniaa Fariseocuaca tojishacari naa nojori sequesanoj, nojoriiri Jesu sequeree:

—iNiishitiojonanaa, quia pueya quia sanaajare, maja naa nojori sequenura!

⁴⁰Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, isairi saniniuuja nacoanutaniyacujua!

⁴¹Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. ⁴²Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijianaa, quia Jiyanooriquianoori juucua niya quia. Majaari quia niishiniu nojuaja, juhua nimishitiu quia quishacari. ⁴³Cunora, na nuhuajiiri jiyanojua taraatia quiniutianiya quiaara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuucujai. Naacuajitij, quia paraari quiocua juhuacanutaniya na miaquejonura quiajaniya. ⁴⁴Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niqiaari najuhuanaj, quiocujai na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Mr 11.15-19; Jn 2.13-22)

⁴⁵Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijoree, canapete na seya niqutiojoriquiaacuajani Pueyasoocua puecoosocoriquiano. ⁴⁶Jesuuri nojori sequeree:

—Tariucuaaanu Pueyaso Rupaajinia naa naajiotasaaquiaariti Pueyaso sequesano: “Cua tiaari pueya secojonuuja janiya”. iNiaari saniniuuja na jiyatecanu nohuasenuujuaca quiquiora!

⁴⁷Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutaniya Jesuni. ⁴⁸Puetunu pueyajanaari saaja shamaatia tojtariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

Pueya nequesotasacari Jesu, cante na jiyaronani

(Mt 21.23-27; Mr 11.27-33)

20 ¹Tamonu juuca, Jesuuri Pueyaso Secojoua tiajinia niishitiojoriquiaa. Pueya niqiaara pohuatariquiaari taate nojori naata Pueyaso muerasura quiniuni. Jiyacartij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomaajuhua, narta Judiocuaca camarucuanio. ²Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? iCanaa quia riucaare! ¿Cante quia jiyaronani?

³Jesuuri nojori sequeree saniniuuja:

—Janiya nia nequesotanu panijuhua. Cua riucaature.

⁴¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucaanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiyacuquiaariirini?” ⁶Saniniuuja, paa jaara na sequereni: “Juancuja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricujaari sequequiaa: “Juanna seetanujuanaa Pueyaso sequenu panishano caminiujiunia quiquiaari”.

⁷Nojoriiri cunora Jesu riucaaree:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸Naaratej, Jesuuri nojori sequeree:

—Janiyajuhua, majaari cua sequenu quiniutianiya niajaniya, cante cua jiyaroquiaarini naa cua miiniuriatej.

Miriqui Jesu pohuatasano sesa miijiaa poonijionaajini

(Mt 21.33-44; Mr 12.1-11)

⁹Na nuhuaji, Jesuuri pueya niishitiojonu coteerohuacuhua nio miriqui pohuatasano. Sequereeri:

—Tamonu pueyanoori cuhuariquiajinia uva natoquiaari. Na nuhuaji, na niqutioquiaari tamasa pueyari, nojori cojuanura nera. Na camaruari tucuaaanu quiaaree, tii na shocotejonura marijia. ¹⁰Uva quishacari noshuriujua, saniya cuhuariquia camarujanaari na seru jiyaroree cuhuariquia cojuanaa pueyacu. Jiyarosaareeri tiji na masenura na camarujanaa, uva carojotasanojiniji. Na camarujanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, icuhuariquia cojuanaari na piqitiurii saaja! Na jiyaroturohua juhuasuuri. ¹¹Cunora, cuhuariquia camarujanaari tamonu na seru jiyaroree. Cuhuariquia cojuanaari na miituri saajuhua. Na saarijotureeri. Na piqitiurii. Na jiyaroturohua juhuasuajuhua. ¹²Cuhuariquia camarujanaari socua tamonu na seru jiyaroree nojoriicua. Nojoriiri sesa miituri nojuajuhua. Na nuhuaji, nojoriiri na caponeeree cuhuariquiajiniji tariucua naatishano.

¹³Naaratej, cuhuariquia camaruari tama sequereejaaja: “¿Taa cua miiniutianiyarini? Quiyanuniojua jiyaroreeraquij. Cuno pojori jaara cua panishano niyanu niqitiuri, maja naasucua

nojori rerequetenu quiniutianiya nojuaja”. ¹⁴Saniniuujia, cuhuariquia cojuanaa jaara cuhuariquia camaru niyanujuanaa niquirii nojoriicua niyano, tama nojorijiaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. iPa morej! Paari nio cuhuariquia camarura quiniutianiya saniniunjia”. ¹⁵Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajini. iCuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini? ¹⁶Seetanujuanaa nia sequeyanijia, nojuajaari nocua quianutianiya nojori na puecoonura. Na nuhuaji, na cuhuariquia niqutionutianiya tamasa pueyari, nera nojori cojuanura cutara.

Pueya tojishacari nio, nojoriiri sequequiaari:

—iJuhuej! iPueyaco cuara naa miyaquiiariatej!

¹⁷Jesuuri nojori niqiniijioore. Nojori sequereeri:

—¿Naatee? ¿Nio naajiotasanooriuhuj, tariucuaaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tiana pueyari tamonu saajia soojotanutianiya, nojori jiyanihacari cuno saajia sesarujau. Na nuhuaji, cuno saajiaari socua panishano saajiaari jiyatesaanutaniuhua”.

¹⁸Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanooocua tiyare, cuno pueyano jacanajonutaniyari. Shahuej.

¹⁹Jiyacaritij, pueyacuara secojona jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirri, Pueyaso saquiriojosano Israel pueya jitianaa nojori quiniucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaa pueya.

Jiya jiyaniijia cuara niqitiosaaia na sequesano cumaneeca
(Mt 22.15-22; Mr 12.13-17)

²⁰Naaratej, nojoriiri tamasa pueya jiyaramiquiquiaari Jesuucua, sapuenu juhua maninia pueya niqishano. Cuno pueyari jiyaramiquishaaquiaari Jesu nojori pocuatenura sesa juucua, nocua tonujasaanura. Jesu jaara nojori riucuaquiaari sesa, maara Romano* jiyaniijia niqitiosaaquiaari saniitiosocoriquiano. ²¹Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niqiniu pueya. Quiaacuajaari seetanujuanaa niishitiojoniaa, taa Pueyaso paniya canaa miiniuracuajani. ²²Cunora, canaa quia sequere taa canaa miiniutianiya. Roma tiacajinia quijia jiyaniijiaari pa sequequiaari Judiocuaca cuara cumaneeca niqutiojora nera, na jitianasano pueya pa quishacari. Naaratej, ¿maniateeri pa miiniuria na sequesano?

²³Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

²⁴—Cua niqitiri quia cumanee. ¿Niooriuhuj? ¿Cana naaquito nocuani? ¿Cana sesate nocua naajiotasani? Jesu riucatureeri:

—Cunocua canaa sequesano Roma tiacajinia quijia jiyaniijia César* naaqui, na sesajuhuj.

²⁵Jesuuri nojori sequereeri:

—Jiyaniijia César cuara tama na casaajaaja niqitiosaaia. Nojuacuajaari na camaru. Saniniuujia, Pueyaso nia niqutioire cutara nerano tama na casaajaaja. Nojuajaari pa camarnu.

²⁶Saaja maninia Jesu riucuasacari pueya niqiuara nojori, majaari nojori naata nocua tonujunu quirii. Nojoriiri saniya jiuujiatee Jesu riucuasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhuani?

(Mt 22.23-33; Mr 12.18-27)

²⁷Na nuhuaji, noojiaqueya Saduceocuacajinijioori Jesuucua niquiaari. Saduceocuacaari jiyaniijia macunucua pueya maja na samiitiaconu quiniutianihua. Naaratej, nojoriiri Jesu sequereeri:

²⁸—Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu cuara camiiira mashiquio, mueya na mueratenura tarajanu niti. ²⁹Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuoju. ³⁰Cunora, na nuhuajishanaari na mashiquio camirii. Nojuajaari muetuhuoju cusoquiaarijuhuaj. ³¹Naaratej, neyaca tarajanuuri mashiquio camiquiaarijuhuaj. Nojuajaari muetuhuoju cusoquiaarijuhuaj. Puetunu cuno mashiquiorijianaari naa camioquiaari cuno maajitia. Puetunu nojorijianaari casonuquiaari muetuhuoju. ³²Na nuhuaji, pueya mashiquioori shaajequiaarijuhuaj. ³³Naacuajitij, macunucua jaara samiitacorohua, ¿teyano cuno siete neyacaajinijioote seetanu neyacajanaa quiniutianiya? Cuno mashiquiocuajaari puetunu cuno siete pueya niqiuocua quiquiaari.

³⁴Jesuuri nojori riucuaere:

—Mijiria pa quishacarijia, canuu, maajipohuari camioquiaa.

³⁵Saniniuujia, majaari noo pojori camiyonu quiniutianiya canapute samiitianijosaanutaniuhacuajani, maninia quijiaa nojori quiniucua Pueyaso niqiuara mijiria. ³⁶Majaari nojori shaajenu quiniutianihua. Nojoriiri shaajeyashijiaa quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujanaa quiniutianiya cutara. ³⁷Supuetana Moisés cuajaari pa niishitiquiaari, macunucuaari samiitianijosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

³⁸Naacuajitij, paari niishiyani, puetunu Pueyasoocua tiuujiaca shaajecono pueyajanaani, nojoricuajaari saminiucua quia Pueyasora. Pueyasoori maja macunucua Jiyaniijia. Na pueya shaajeconocuaajaari saminiucua quia nera cutara.

³⁹Noojiaqueya Moisés Rootasanojiniji niishitiojona pueya tojishacari naa Jesu sequesantej, nojoriiri Jesu sequereeri:

—Maniniacuajaari quia sequesano, Niishitiojonanaa.

⁴⁰Naa Jesu rihuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹Jesuuri naa nojori nequesotaree saniniuujia:

—¿Casaara na sequesaaquiaacuararini, Pueyaso Jiyarosanaari supuetana David niqiuohuacuajinio supuentaniya? ⁴²⁻⁴³Supuetana Davidjanaacuajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuara quia paraa shocotare puetunujanaajaajitija’”.

⁴⁴¿Cristotucua taa David niqiuohuacuajinio supuereni? Davidcuajaari na sequeya “cua Jiyaniijia”.

Cuno pueyari maja na naata na riucuanu quiriquiaa.

Jesu numootesacari na pueya,
Moisés Rootasanojiniji niishitiojona pueyacuaji
(Mt 23.1-36; Mr 12.38-40; Lc 11.37-54)

⁴⁵Puetunu pueyajanaa tojtiasacarijia Jesu, Jesuuri naa na saquiriojosano pueya sequereeri:

⁴⁶—Tama nia cuaqueyajaaja nia cojuare Moisés Rootasanojini niishitiojonaa pueyacuaji, nia miyaquiniuucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuanura nojori juhua tojishano pueya, nojori rucuanijosacari tiaca jiuujiajinia curotasano cajitiucujinia. Nojoriiri socua panishano cajitiucujinia cajiniu maniniucuaquiaa Pueyaso Secojoua tiajinia, tamasaca tiajiniajuhuj, nojori jaara masusaare queranacunura. ⁴⁷Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhua tucuyocua secojoquiaa Pueyaso, pueya jyaniniuria nojori maninia pueya cutara. Naa nojori miiniuucuatej, nojoriiri jyanohua saniitosano quiniutianiya.

**Casamijiu mashiquio niqutiosacari na
cumaneec juuraneec Pueyasora**
(Mr 12.41-44)

21 ¹Pueyaso Secojoua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiqiojinia, nojori niqutiosano Pueyasora. ²Jesuuri tamonu casamijiu mashiquio niquirijuhua caapiqui cumaneeniyojua niaano tijijuhuj. Na niasanoori nareja cobrejini* shipinishano cumaneeca quiquiaari. ³Jesuuri na pueya sequereec:

—Seetanujuanaa nia sequeyanijia, cuno casamijiu mashiquioori socua queraatia niqutioorec Pueyaso, cuno casamiriaca pueyajiniji. ⁴Puetunu cuno pojorijianaari saaja na cureeno cumaneecajiniji niqutiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqutioorec.

Jesu pohuatasacari, Pueyaso Secojoua tia niyartasaanutaniya
(Mt 24.1-2; Mr 13.1-2)

⁵Noojiaqueya tii quiniaa pueyari pocoojoriquiaa Pueyaso Secojoua tiajiniji. Jyanohua shanohua saitia shipinishano quiqioiaari. Nojoriiri na shootiariquiaa, naajuhuj taa na maniniushitishaaquiaari nareja pueya niqutiojosano casamitiani. Jesuuri nojori sequereec:

⁶—Puetunu cunojuanaa niaa na niquiyani, tamacari niyartasaanutaniyari. Majaari quenaaja tamonu saaja cureenu quiniutianiya tamonu caco maano. Puetunu niyartasaanutaniyajaanaari.

Taa nio jiya puequenu panishacari quiniutianiyan
(Mt 24.3-28; Mr 13.3-23)

⁷Na pueyari Jesu nequesotaquiaari:

—Niishitiojonanaa, ttaacari nio tia niyartasaanutaniyarini? ¿Casa canaa niqiniutianiyarini, canaa niishiniuria quia sequesanoori quera tohuateya?

⁸Jesuuri nojori riucaarec:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supenutaniya. Nojoriiri sequenutaniya: “iJaniya Cristoni, Pueyaso Jiyarosano! iNio jiya quera puequeya!” Naa jaara naa sequesaretej, majaari nia tojinu cuno sapojonuujuaca. ⁹Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetooyiya, naajuhuj, pueya jaara juaatioquiaa tama nojori jyanijia nojori jatanurajaaja. Naa quiniutianiyari coteenu. Naajaa, juhuanouaja maja nio jiya puequesacari.

¹⁰Jesuuri naa nojori pohuatariquiaa socua:

—Tamonu rupaa pocuajacaari miaquetojonutaniya tamaatia rupaa pocuajacata. Naajuhuj, tamonu jiyajinijinio jyanijiaari miaquetojonutaniya tamonu jiyajinijinio narta jyanijia.

Naa queraatia miaquetojonuuri quiniutianiya. ¹¹Rijiaari jyanohua jiuuquijutianutaniya queraatia jiyacajinia. Jyanohua miaajenuuri quiniutianiya queraatia tamonu jiyacajiniajuhuj. Paaqueja cusonuuri quiniutianiya niya, tamaquicuajuhuj. Naajuhuj, jyanohua puereeta casaari niquishaanutaniya jiyocuaaanu, mijiria quiniaa niishiniuria jiya puequenuraari tari catecanoya.

¹²Cuno puereeta quiaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonujua tiajiniaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jyanijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanuucua janiyajiniji pueya niquiara. ¹³Naacuajitij, nia naata cuno jyanijianucua niquiara pohuatanu janiyajiniji. ¹⁴Nioojia nia cajitiri, maja juhuacarijia nia niishiriojonura taa nia riucuanutaniya nojorini. ¹⁵Janiyacuajaari jiyacari nia niishitiojonutaniyani taa nia riucuanutaniyanoj, mariyata casaa nia pohuatanutaniya jyanohua cua niishitiatatani. Niaari nojori sanaajanutaniya maninia nia riuhanesacari saaja. Nia paraari maja na naata nia sequesano rerequetenu quiniutianiya. ¹⁶Jiyacarijuhuj, tama nia queyajaarijia nia tacartanutaniya, cua pueya nia quiniuucua. Nia tapueyocuaacari nia tacartanutaniyahuj, nia jiyasoocujinijio supueno pueyajuhuj, nia rupenaano. Nojoriiri noojiaqueya niajanijinijinio pueconutaniya. ¹⁷Puetunu mijiria quiniaa pueyajaanaari nia niqiniu paniaquiniutianiya cua pueya nia quishacari. ¹⁸Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniaquiri. Pueyaso jaara naa nia muesu cojuaacuaa, ttaatucua casaara cojuaacari saniya niajanijini? ¹⁹Naaratej, rejeretajaca nia quiri. Naa cutaraari shacantuuca quijiacaca jatanishaanutaniya pueyaracaanu nia rishiniuria, niaa jaara cumaatia nujuatere pueya miishacari sesa niajanija. ²⁰Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. ²¹Jiyacarijia, canapueete Judea jiyajinia quiyani, cuno pojori cuaara mashiiria tuhuananuhuaacua. Canapueete Jerusalén tiacajinia quiyani, nojori cuaara ritia mashiiria tiji. Canapueete na cuhuariquajinia quiyani, nojori cuaara tacateyaquihuara Jerusalén tiacajiniohua. ²²Cuno quishacari, jyanohua saniitosacari quiniutianiya. Jiyacarijia, puetunu Pueyaso Rupaajinia naajiotasanojuanaari tohuateenutaniya. ²³Jyanohua taraatia quiniutianiyari noo maajipohuara, canapueete manajaatohua quia jiyacarijia, mariyata canapueete conaaja supueja jiiitiaani. Jyanohua naquiya quiniutianiyari cuno quishacari nio jiyajinia. Nio jiya pueyari jyanohua saniitosaanutaniya. ²⁴Noojiaqueya nojorijinijinioori puecoosaanutaniya tahua miaquetoosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajinijianajanaa rijiosaanutaniya poonitijosocoriquiano. Taucuacaari Jerusalén tiaca jitianutaniya tama nojoririjaaja, Jerusalén tiaca nojori jitianu cuaara puequerejaatijia, taa Pueyaso sequequiaari tamajacuajani.

Taa na quiniutianiyani Jesu tacatesacarihua
(Mt 24.29-35, 42-44; Mr 13.24-37)

²⁵Mijiria quiniaa niishiniuria jiya quera puequeya, nojoriiri puereeta casaa niqiniutianiya pananujinia, racajinia, riyajiniajuhuj. Shoniniacu caminiaacuaji shiriqutiniutianiyajaarijuhuj, jyanohua na queyocuasacari. Nojoriiri cushitiniutianiya na pueretunajuhuj, jyanohua cojuata shoniniacu caminia cajiniuucuasacari. ²⁶Mijiria quiniaari cusojonunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquitiisaanutaniya jyanohua.

²⁷Jiyacaritij, mijiria quiniaari cua niqutiutianiya cohuaja najacajinia niyano, jiyano hua shacantuuca cua cumaacata.

²⁸Naaratej, niaa jaara nio cua pohuatasano niquiri tari coteyano, niocua tama cumaquitioorejaaja. iNiocua timiri! iNiaacuajaari quera rijiosanutaniya niqiuji, pueyaracaanu cuata nia quiniuria!

²⁹Jesuuri nojori pohuataree nio miriqui pohuatasanojuhuaj: —Higo naana nia niquiri, tamonu jaranacujua naananio. ³⁰Na jaamasucua jaara mueratuure, niaari niishiya, tacareejonuqui quera quiniutianiya. ³¹Naajuhuj, niaa jaara puetunu cua pohuatasanojuanaa niquiri tari tohuateyano, niocua jiyacari niishiri, janiyari quera tiuquihuani, Jiyaniijajanaa cua quiniuria.

³²Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojtiaashijiaca pueya puequeyaquishacarijia. ³³Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

³⁴Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyajuijia cua tiuquishacariuhua. ³⁵Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyajuijia majaacuani. ³⁶Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tajoji, cua nequesoresacari puetunu pueyajanaa.

³⁷Jesuuri puetunu juucajanaa niishitiojua Pueyaso Secojoua tiajinia. Saniniuujia, niucua quiojojuuari Olivo cuhuariquia tuhananujinia tii na quiniuria. ³⁸Puetunu pueyajanaari tariquicuaji quiojojuua Pueyaso Secojoua tiajinia, nojori tojiniuria Jesu pohuatasano.

Judiocuaca camarucua roojotoosacari Jesu nojori quianura
(Mt 26.1-5, 14-16; Mr 14.1-2, 10-11; Jn 11.45-53)

22 ¹Quera Pascuara queranacunuusacari quiquiaari, pueya miaquesacari pan* na poreetajaaju shipinishano.

²Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyano hua queraatia pueya paniniuucua Jesu.

³Jiyacaritij, Satanási Jesu pueyano Judas Iscariote jiuujiajinia tiuquiquiaari. ⁴Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacujahuaj. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. ⁵Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. ⁶Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

Jesu miaquesacari na nuhuajiria na pueyata
(Mt 26.17-29; Mr 14.12-25; Jn 13.21-30; 1 Co 11.23-26)

⁷Poreetajaaju pan miaquenu juucaari tari quiquiaari. Cuno juucajuhuj, borregoiri mosano quijia, Pueyaso niquiara miaquesocoriquiano Pascuara queranacusacari. ⁸Cunora, Jesuuri Pedro jiyaree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeetesecuaa pocuaji, pa miaquesocoriquiano quiarijia Pascuara*.

⁹Nojoriiri na nequesotaree:

—¿Tee quia paniya canaa majeetenurani?

¹⁰Jesuuri nojori riucuaare:

—Niaa jaara Jerusalén tiacajinia tiuquishii, niaari tamonu pueyano riuritanutaniya mohuaca taquitiaano patacojinia. Niocua na nuhuaji rupaamia na tiajinia. ¹¹Cuno tiajinia na tiuquishacari, niocua cuno tia camaru sequesee: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’” ¹²Nojuajaari nia niqutiutianiya puereetuca sohuaca, nataco na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

¹³Jesu pueyari quiaare. Nojoriiri puetunujuanaa riurataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquia-no.

¹⁴Jaara tari quiquiaari Pascuara miaquesacari niucua, Jesuuri na saquiriojosano pueyata cajitushii miaquejajinia. ¹⁵Jesuuri nojori sequereeri:

—Janiyari jiyano hua niaata miaquenu paniriquiaa nio Pascua niucuan, pueya moyaquishacarijia janiya. ¹⁶Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miaquenutaniyani, Jiyaniijajanaa cua quishacari.

¹⁷Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa.

¹⁸Seetanujuanaa nia sequeyanijia, majaari socua cua ratunu quiniutianiya uva* caacajiniji, janiya jaara tiuquiriohuajaatijia, Jiyaniijajanaa cua quiniuria puetunu Pueyaso muerasuranotajanaa.

¹⁹Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqutiujoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaracaanutej, nia niishiriojonura janiya.

²⁰Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. ²²Janiyari naa miishaanutaniyani taa janiyajiniji juhuacarijia pohuatasaaquiaricujani tariucuaanu Pueyaso Rupaajinia. Saniniuujia, cua tacartanaari jiyano hua taraatia quiniutianiya naa na miiniucua janiya.

²³Jesu pueyari jiyacari juhuacatecara nequesoreetoree tama nojoriijaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴Jesu pueyari tama juayonuutariquiaaajacujua, teyano nojoriinjiniote jiyaniijajanaani. ²⁵Jesuuri nojori sequereeri saaja:

—Mijiria, jiya jiyaniijianucuaari jiyano hua jiyaramiquiniu niishijia nojori jiiitasano pueya, juhua nojori poonitijosano pueya. Nojoriiri tama nojoriinjiniijaaja sequeja: “Canaari maninia miiquiaa canaa pueyani”. ²⁶Niajanija saniniuujia, majaari naa nia quiniu juhua nojoriija. Cante socua tojishano pueyano quia niajanijajiniinioni, nojuaja cuara tama na cuaqueyajaaja jiyateyaquiiira na cumaaca paaretaja pueyacu. Cuaara quiiria jacaria pocuaja. Naajuhuj, cante jiyaniijajanaa quia niajanijajiniinioni, nojuaja cuara jiyateera tama na cuaqueyajaaja juhua nia serura. ²⁷¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? iMiaqueyano pueyanocuja! Naajaa, janiyari juhua nia

seru quiquiaa niaarani, maninia cua miiniuria niajaninya. Naajuhuj, naa maninia miijiaa nia quiriqiaa.

²⁸Niaacuajaari pueyaracaanu cua cojiriqiaa janiya jaara saniniujiushaariquiaani. ²⁹Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuani, Jiyaniijia cua quiniuria. ³⁰Naacuajitij, niaari cua miaquejajinia cajitiunitianiya cuata nia miaquejonura, cuata nia raruujunurajuhuj, Jiyaniijijanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesorenaa nia quiniuria.

Jesu sequesacari Pedro, nojuaja nocuaji seetanutaniya
(Mt 26.31-35; Mr 14.27-31; Jn 13.36-38)

³¹Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanoehua na saniniujiuniuria niajaninya. Naacuajitij, niaari jiyanoehua saniniujiushaanutaniya, naatej, taa trigo quejooshiya jiyocuaacaanucuaani, paratu panura na cocua. ³²Janiyari saniniujia Pueyaso secojoree quiohuara cutarani Simónnaa, cucua tiuuniu quia tarinitiaquiniucua. Naacuajitij, quiaa jaara quiohuara tacatorohua cucua, quiohuara quiarta pueya cumaquiriohuajuhuj, nojori tiuuniuria seetanujanaa pueyaracaanu cucua.

³³Simónri Jesu sequere:

—iCua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuj! iQuiaa jaara mosaare, naajaa, janiya cuaara cojiritiasaaria quiajanijuhuj!

³⁴Jesuuri na sequere:

—Pedronaa, seetanujanaa quia sequeyanijia, caacaraja niunijiaquishacarijia quiaritia, quiaari tari naa cucuaji seetanu caminiujuniutianiya pueya niquiara: “iMaja cua niishiniu Jesu!”

Quera Jesu miishacari taraatia

³⁵Jesuuri na pueya nequesotaree:

—Janiya jaara nia jiyaramiquiiaari Pueyaso rupaa nia pohuatanura caashoqueejuni, cumaneeca quiquiohuu, sapatuujuunio, ñiaateeri nia panishano casaa niquitioyaquishaa-quiaari?

Nojoriiri Jesu riucaare:

—Maja. Canacuajaari puetunu canaa panishanojuanaa niquitiojosaaquiaarini.

³⁶Jesuuri nojori sequere:

—Quiaritia saniniujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucua mueruu jitiiaaquiyani, cuno cuaara niquitioora na shiniquiaacuaji toque, nijiniaquetucua mueruu na masenura na toque samitia. ³⁷Seetanujanaa nia sequeyanijia, tariucuaacaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori nia sequeyatej: “Nojuajaari jyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaricuaani.

³⁸Nojoriiri Jesu sequere:

—Jiyaniijianaa, niya quia caapiqui nijiniaquetucua mueruu.

Nojori riucaareeri:

—Tariucuaaja.

Jesu secojosacari Pueyaso, Getsemani cuhuariquiajia
(Mt 26.36-46; Mr 14.32-42)

³⁹Na nuhuaji, Jesuuri tohuataquiaari tiajiniji. Olivo cuhuariquia tuhananujiniara quiaareeri. Nojuajaari cuniqui quianura jitiqiaari. Na saquiriojosano pueyari na nuhuajiyaree. ⁴⁰Na tiuquishacari tii, Jesuuri nojori sequere:

—Pueyaso nia secojore, niaa mariqui sesa miiriiri niaa jaara saniniujiushaare.

⁴¹Na nuhuaji, Jesuuri tamajaaja quiaaree socua nojori tajoji, juhua saajia tishaqui, pueyano jasacari. Tii mojuquetasee Pueyaso secojonuraari. ⁴²Naa secojoreeri:

—iCua Quenaa, maja cua miini paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³Jiyacaritij, Pueyaso seruuri jiyocuaacaanuji nocua nimiaa na cumaquiniuria. ⁴⁴Jesuuri jiyanoehua naquiya miiriqiaa. Nojori quera jiaqueriquiaa na tacaaniutia. iJiyanoehua, jiyanoehua secojoriqiaa Pueyaso! Cunora, na paneyacaari puereetujuaaca juhua nanaca quiriqiaa, na caatesacari jiyocua. ⁴⁵Na secojonu nuhuaji, Jesuuri sanerohua. Na pueyacuatacayaroahuari. Nojori niquishuhua maquetiuyano saajaari, puera nojori taraajenuucua. ⁴⁶Jesuuri nojori sequere:

—¿Casaara nia maquetiuyani? Nia saneecuaate. Pueyaso nia secojore na cojanura niajaninya, maja sesa nia miiniuria niaa jaara saniniujiushaare.

Judiocuaa camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷Jesu pocusacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanaa. Na saruhuataseeri na nujuunuta.

⁴⁸Jesuuri na sequere:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹Jesu pueya niquishacari casaa cuno pueya miini paniriqiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰Tamonu nojorijinijioori pueyacuara secojonaa jiyaniijia seru piri na mueruuta. Saaja na miaquetajara numoco jaateereeri. ⁵¹Jesuuri na sequere:

—iTariucuaaja! Maja naa miiniu.

Jesuuri numoco ririi. Na rurohuhari. ⁵²Judasta quiriqiaari pueyacuara secojonaa jiyaniijianucua, Pueyaso Secojoua tia cojuanaa jiyaniijianucuaajuhuj, Judiocuaa camarucuanio. Nojoriiri Jesuucua nijioquiaari na quianura. Jesuuri cuno pojori sequere:

—¿Casaara cucua nia nijioree nijiniaquetucua muerutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? ⁵³Pueyaracaanu cua quishacari niaata Pueyaso Secojoua tiajinia, majaari nia quianu quijia janiya. Naajaa, quiaritia cutaraari niajaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaacaanuji na nuhuajiriqiaa. ⁵⁵Jiyacaritij, pueyari jiyaniijia tia carijiniacuma mani noshitirii. Na shocua cajitiurihuari. Pedroori nojori tajinia cajishijihuhuj. ⁵⁶Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariqiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuj.

⁵⁷Pedroori seetaree. Naa sequereeri:

—Niyacoonaa, imajaari quenaaja cua niishishano cuno pueyano!

⁵⁸Na nuhuaji, tamonu pueyanoori Pedro niquiriijuhuj. Nojuajaari cuno jiyaniijia seru quiriqiaajuhuj. Pedro sequereeri:

—iQuiaaqui cuno pojorijinijinio pueyanohuhuj!

Pedroori saa sequereejaa:

—iMaja, pueyanonaa! iJaniya maja nojorijiniunio!

⁵⁹Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocuaaari cuno pueyanota quijia. Nojuajaari Galilea jiyajiniuniojuhuaj.

⁶⁰Pedroori saa sequereejaa:

—iPueyanonaa, maja cua niishiniu quenaaja casaa quia sequeyani!

Pedro pocusacarijia, jiyacaritij, caacarajaari niunijioree.

⁶¹Jiyaniijia Jesuuri tacatequee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujuniutianiya janiyajini pueya niqiara, caacaraja niunijiyacuishacarijia”.

⁶²Pedroori cuniquiji tohuataquee. Jiyanhua njuquereeri na taraajenuta, sacuaaraatia na seetanuucua.

Pueya macaathishacari Jesu

(Mt 26.67-68; Mr 14.65)

⁶³Jesu cojuanaa pueyari Jesu macaatiiriquiaa. Nojoriiri na piquitiuriquiaa. ⁶⁴Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—iQuia niishiritio! ¿Cante quia piriini?

⁶⁵Nojoriiri socua queraatia sesa casaa sequeturiquiaa na macaatiinuria Jesu.

Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

⁶⁶Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

⁶⁷—Canaa quia sequere, ¿quiaate Cristo, Pueyaso Jiyarosano?

Jesuuri nojori riucaaree:

—Janiya jaara nia sequereni: “Taaquiriiriniy”, niaari saaja cua sequenutaniya: “Quiaa sapojiya”. ⁶⁸Saniniuuja, janiya jaara nia nequesoree Pueyaso Jiyarosanojinijini, majaari nia riucaanu quiniutianiya janiya. ⁶⁹Naajaa, quiarijiani, janiyari puetunu cumaacaraca Quijijajanaa miaquetajara cajiniutianiya jiyocuaaanuni.

⁷⁰Naa Jesu sequesacaritij, puetunu nojorijianaari na sequere:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucaaree:

—Taaquiriiriniy. Naacuaaquiniatejaj, taa nia sequeyacuajani.

⁷¹Nojoriiri tama sequetooreejajaa:

—¿Paatucua casaara socua tamonu pueyano pajere nocuara tonujuriquianoni? Paacuaajaari tari tama pa numaatajaaja sesa na sequesano tojitiareeni.

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

23 ¹Cuno nuhuaji, puetunu nojorijianaari sanetaree. Jesu jiyatatiyareeri jiyaniijia Pilatoocua. ²Cuniqui, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasojoquiaa pocuara. Nojuajaari niishitiojoquiaajuhuaaj, maja canaa Israel pueya niqitiojonura canaa cumaneeca pa jiyaniijajanaa Césarra, taa César sequequiaaricuajani. Naajuhuaaj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiriiriniy. Naacuaaj, taa quia sequereecujani.

⁴Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miiijia.

⁵Nojoriiri saaja socua jiyacaterree Jesuucua tonujunu. Naa sequetureeri:

—iNojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojijajaariuhua Judea jiyajiniani.

Jiyaniijia Herodes nequesoreesacari Jesu

⁶Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajiniunio?

⁷Nojoriiri na riucaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸Nojuajaari pueyaracaanu Jesu niqiniucua jiaatijaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niqiniu panijia juucua. Naacuaajitij, na niquishacari Jesu, nojuajaari timirii. ⁹Herodesri queraatia nequesoreeree Jesu. Majaari quenaaja Jesu riucaanu quiquiaari nojuaja.

¹⁰Pueyacuara secojonaa jiyaniijianucuaari tii quiriquiaajuhuaaj, Moisés Rootasanojiniji niishitiojonaanio. Cuno pojoriiri jiyanhua Jesuucua saquiriojotariquiaa queraatia sesa casaa.

¹¹Herodesri na soldadohuata Jesu rerequeteriquiaa. Na macaatiiriri. Na cushitirii jiyanhua shanhua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. ¹²Herodesri cuno juuca Pilato rupenara quiquiaari. Coteenu, majaari nojori niqitioonu paniniu quijia. Nojoriiri saaja shocotetoojua.

Puetunu pueyanaa sequesacari Jesu cuara mosaaria

(Mt 27.15-26; Mr 15.6-15; Jn 18.39-19.16)

¹³Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucuaajuhuaaj, tii quinia pueyano. ¹⁴Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojoquiaa.

Janiyacuaajaari na nequesoreeriquiaa nia niqiarani. Niaacuaajaari cua tojitiariquiaa cua nequesoreesacari nojuaja.

Quiarijia niishiya cutaranijia, puetunu nocuara nia tonujusanojuanaari maja seetanujuanaa. ¹⁵Jiyaniijia Herodesquiiri tari niishiyajuhuaaj, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miini quiquianu na mosaanura. ¹⁶Janiyari na majacutenutaniya narejani, cartesaarohuari.

¹⁷Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajiniji. Nojuajaari naa miiquiaari pueyaracaanutej, pueya na shuqiritiniuria.

¹⁸Jiyacaritij, puetunu pueyajanaari juhuacatecara jiyanhua nacaree jatiqui:

—iJesu quia more! iBarrabás quia cartere saniniuuja!

¹⁹Tarijia cuno Barrabásri narta nasojosano Judiocuacata Romano* pueya taanuuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. ²⁰Pilatoori Jesu cartenu panijia juucua. Naaratej, Pilatoori pueyata pocojorohua socua. ²¹Pueyari saaja jiyacaterree jiyanhua nacoonaari jatiqui:

—iCuara mosaaria niyacutesanojinia teetesano! iCuara mosaaria!

²²Pilatoori pueya sequenu pacuterohuacuahuaj:

—¿Maatucua casaara mosaarejaarani? ¿Sesa miiritijiaaraj? Janiyacuajaari tari na nequesoreereeni. Majaari sesa na miini quirii na mosaanura. Janiyari na majacutenutaniya narejani. Na nuhuaji cartesaarohuari.

²³Pueyari saaja socua jiyanoohua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanoohua nacooriquiaa. Puera jiyanoohua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴Naaratej, Pilatoori socua tariniriohua. Pueya panishano miiriiri. ²⁵Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanojuhuaj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari

(Mt 27.32-44; Mr 15.21-32; Jn 19.17-27)

²⁶Pueya jiyatasacari Jesu puecoosacari, nojoriiri tamonu pueyano quiaree Jerusalén tiacajiniara riujuuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

²⁷Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. ²⁸Jiyacaritij, Jesuuri cunoo maajipohuacua tacatereeri. Nojori sequereeri:

—Jerusalén tiacajiniiji maajipohuanaa, maja cucua nujuquetunu. Tama niaacuajaaja nia nujuquette, nia niqiuohuacuanio. ²⁹Na nuhuaji, jiyanoohua taraatia quishacariiri quiniutianiya niaara, jiyanoohua taraatia. Jiyacaritij, pueyari sequenutaniya: “Socua shuquiriaatia quijiaa cutaraari noo maajipohua cante muetuyashijiani, cante manajeyashijianucuaani, mariyata cante muela supueteyashijianucuaajanihuaj”. Mueyaraca maajipohuari jiyacari jiyanoohua taraajenutaniya, nojori niquishacari necohua miishacari naquiya. ³⁰Naquiya miishacari, jiyacaritij, pueyari tuhananuhua sequenutaniya: “iCanaacua quia jiyaretaare!” Naajuhuj, shiitianiyojua tuhananuhua sequenutaniyari: “iCanaacua nia tiyare canaa nia jamonura!” ³¹Jiyacariiri jiyanoohua naquiya miishacari quiniutianiya. Quiarijia, janiya jaara naa naquiya miishiyacuuaani, ¿taaqitijia Pueyaso tojitiaashijiaa miishaanutaniyatejaj?

³²Caapiqui sesa miijiaaari jaatucunuusaariquiaajuhuj, mariyata teetesocoriquiano Jesuta. ³³Nojoriiri puecoosacari tiuquijiosee. Cuniqiu pueya puecoosacari, na sesa quiquiaari “Pueyano Nacaco”. Nojoriiri tii Jesu teetere maca niyacutesanojinia. Cuno caapiqui sesa miijiaaari teetesaaareejuhuaj, niquriyatu na miaquetajara, tamonu na muenecara. ³⁴Jesu jaara tari pijiosaariquiaa maca niyacutesanoocua, nojuajaari na Que Pueyaso sequereeri:

—iCua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijiooree, nojori niishiniuria taa nojori seraatianutaniya Jesu toqueni. ³⁵Pueyari Jesu shootariquiaa. Judiocuaca jiyaniijianucuaari jaarajaaja Jesujiniiji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujanaa Pueyaso Jiyarosano Cristo quiri, cuara roseera niyacutesanojiniji pa niquiara.

³⁶Soldadohuari Jesu macaatiiriquiaajuhuj. Nojoriiri Jesu raatereeri piquia vino juucua. ³⁷Jesu sequetereeri:

—Quiaa jaara Judiocuaca jiyaniijia quiri, iniyacutesanojiniji quia roserecurajaj!

³⁸Jesu nacaacua, suruhuatuneeri rupotasaquiaari naajiosano Griego rupaajinia, Romano pueya rupaajinia,

Hebreo rupaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹Tamonu cunoo sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniqiuji. iCanaa quia roshiniorejuhuaj!

⁴⁰Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuahuaj. ⁴¹Pajaniya cutaraari sesa pa miiniuucua naquiya miishiyani. Paacuajaari maninia saniitioshiyani sesa pa miiniuucua. Saniniuujia, nio pueyano pa tajinia nujuataani, inojuajaari sesa miyashijia cutara!

⁴²Na nuhuaji, narta sesa miijia juaaniaari Jesu sequereeri:

—Jesunaa, majaari cua niyjetanuujua, Pueyaso jaara quia jiyatere Jiyaniijajanaa quia quiniuria.

⁴³Jesuuri na riucuaaree:

—Seetanujanaa quia sequenyaniija, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴Panacari, ijiyari ninishiquiria quiquiaari puetunujanaa, juhua niucua! Pananu piriuushacari, cuhatemohuari. ⁴⁵Jiya quishacarijia ninishiqui, jiyacaritij, Jerusalén tiacajinia Pueyaso Secojoja tajinia, ijiyanohua shiquiia quia toquejiniji sohuacaari nojiaacoji sutequiaari puetunujanaa querajaquera!

⁴⁶Jiyacarijiuhuj, Jesuuri nacaree:

—iCua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

⁴⁷Romano soldadohuaj jiyaniijia niquishacari puetunu niojuanaa, nojuajaari maninia sequereeri:

—iSeetanujanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

⁴⁸Puetunu pueyajanaa, canapete Jesu shootariquiaa cusoyanoni, nojoriiri taraatia na tajinia quiojoquiaariuhua. Nojoriiri tama na jiriquiaaja piquiniuuquiaariuhua, jiyanoohua nojori tacaaniutia naa nojori monuucua Jesu. ⁴⁹Saniniuujia, puetunu Jesu niishishano pueyajanaari tii jiyojetarohuajaa, maajipohuajuhuj, canapete Jesu nuhuajiquiaari Galilea jiyajiniijicuaajani. Puetunu nojorijianaari tucuaaanuji niqitiriquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰Tamonu maninia pueyanoori quiquiaari. Nojuajaari Pueyaso tojijia pueyano quiquiaari Arimatea tiacajinijinio. Cuno tiacaari Judea jiyajiniijuhuj. Cuno pueyano sesa quiquiaari José. Nojuajaari Judiocuaca jiyaniijianucuaajinijinio quiquiaari. ⁵¹Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijia jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuara mosaaria. ⁵²Naacuajitij, Jesu cusosacari, Joseeri Pilatoocua quiaquiaari, Jesu quete na masenura. ⁵³Na nuhuaji, Jesu quete roshinirii niyacutesanojinijiiri. Na jiuniooreeri cohuajaque quenaaruque toquejinia. Jesu quete niaree tarijia na jiuutianishano saajajiniaari. Cuno raajinia, juhuanojuaja maja macu niasaanu quiquiaari. ⁵⁴Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵Cuno maajipohua, cante Jesuta nijioquiaari Galilea jiyajiniijicuaajani, cunoo pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. ⁵⁶Nojori riujuuushacariuhua na tajiniuhua, nojoriiri juhuataja shanohua

jaanutaja cojitijiosuhua, macuucua nojori nojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaticuajani.

Jesu samiitiasacariuhua
(Mt 28.1-10; Mr 16.1-8; Jn 20.1-10)

24 ¹Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijiosano shanohua jaanutaja patootaareeri. ²Nojori tiuquiiiosacari raajinia, saajiajiniji quejasano raa tiootiu niqutiushuiri tariucua tamocora shuquitishano. ³Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴Nojoriiri shiriquirii. Majaari nojori niishiniu quiriquiaa taa nojori miniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu nojosaquini?
⁶Maja tari niya na quiniu. ¡Tari samiitarohuano! ¿Niaateeri tari niyajetaree na sequesano nijaniya, Galilea jiyajinia na quishacarijia? ⁷Nojuajaari tari nia sequecanucua, nojuaja sesa miijiaa niqutiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitanutaniuhua jiuujianaraca juucajinia.

⁸Jiyacaritij, maajipohuari shusha niishiquii tarijia Jesu sequesano nojori. ⁹Nojori tacatesacariuhua jamajini, nojoriiri Jesu once saquiriojosano pueya caminiujiushuhua puetunu nojuanaa, puetunu Jesuucua tiuuniaa pueyajanaano. ¹⁰Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Mariájuhua, socua tamasaca maajipohuano. ¹¹Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitiriijiaa maajipohua pohuatanuano.

¹²Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiuuicocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriqiniutia, na niquishanojiniji, maajipohua pohuatasanojinijinia.

**Jesu tojtianaa pueya niquishacari Jesu,
nojori quiasacari Emaús tiacajiniara**
(Mr 16.12-13)

¹³Cuno domingo* juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora* quiquiaari Jerusalén tiacajini, nioluacata quiasacari tiriara.

¹⁴Nojori quiojosacari nuacuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. ¹⁵Naa nojori pocoojosacari nuacuacotej, Jesujuanaari jiyacari nojori rupese. Juhujaniya nojoritia pacutaareeri. ¹⁶Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷Jesuuri nojori nequesotaree:

—¿Casa nia pocoojotaacuaani?
Nojoriiri nujuatuquee. Taraajecoyano niquishaariquiaari.
¹⁸Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

¹⁹Jesuuri nojori nequesotaree:
—¿Casaate tii miishaarucuaajaarani?
Jesu sequereeri:

—iNazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. iJiyanohua maninia quijiaari na cumaacata na miijosano, na niishitiojosa-

nojuhua! Pueyaso timitiasano quijiaari, puetunu pueya panishanojuanaano. ²⁰Pueyacuara secojona jiyaniijianucua, mariyata pa camarucuaari na niqutiorucuaa Romano jiyaniijia na motesocoriquiano. Niyacutesanojinia mosaarucuaari.

²¹Canaari juucua jiyaniqianuni, nojuajaari Romano pueya taanuunutaniya, pa Israel pueya quiniuria juhuajaniya tama pajaniyajaja. Quarijiani, jiuujianaraca juucaari tari na shoconujiya na mosaanujiniji. ²²Tamasaca maajipohua canaa maanujinijioori canaa shirioree nojori pohuatasano. Nojoriiri quarijia tariquicuaji quiojomaa Jesu raajinia. ²³Nojoriiri maja na riuriatanu quishii na quete. Nojori tacatesacariuhua, nojoriiri canaa pohuatasuhua, nojorinia Pueyaso seya niquirii juhua na maquenujinia. iCuno Pueyaso seyanaari nojori sequere, Jesu tari samiitarohua! ²⁴Na nuhuaji, tamasaca canaajinijioori raajinia quiojiyareejuhua. Seetanujuanaa naa quiquiaari, taa maajipohua sequere canaacuajani. Maja cutaraari nojori niqiniuria quirii Jesu.

²⁵Jiyacaritij, Jesuuri nojori sequere:
—Pueyanaa, majaquiri juhuanojuaja nia niishiniu. Niaari taacanuyajaa puetunu tariucuaaanu Pueyaso sequesano caminiujiuniaa naajiotasanoocujanaa nia tiuuniuria.
²⁶¿Majateeri naa na pohuatasaanu quiquiaaricuaa: “Cristoori coteenu naa mosaanutaniyaquij. Na nuhuaji cutara, jiyanohua cumaacaraca quijiaa jiyatesaanutaniuhuaari Jiyaniijianaa na quiniuria”?

²⁷Jesuuri juhuacatecara nojori niishitiojoree puetunu tariucuaaanu Pueyaso Rupaajinijianaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijianaa.

²⁸Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujoriquiaa. ²⁹Nojoriiri nojoritia na jiyojetenu paniriquiaa jiyanohua. Nojoriiri na sequere:

—iNiyaja canaata quia jiyojere! Paa tari niniyareeni.
Naaratej, Jesuuri nojoritia jiyojese cuniqui. ³⁰Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. ³¹Jiyacaritij, nojori namijiaari juhua riatequequee. Jiyacariqui na niishitiquiiri. Jesuuri saaja shaajequee cuniquijia nojori tajiniji. ³²Nojoriiri sequetoree:

—iJesuucuaquiri quiriquiaa! iCunora poojiaqui jiyamitia timiriquiaa na pocoojosacari pajaniyata nucaamaji, nojuaja jaara niishitiojoriquiaa pajaniya Pueyaso Rupaajinia naajiotasantej!

³³Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. ³⁴Tariucua tiajinia quiniaari Emaús tiacajiniji tiuquijionaa sequere:

—iPa Jiyaniijiaqui seetanujuanaa samiitarohua! iSimónri na niquirii!

³⁵Na nuhuaji, shusha tiuquijionaaari nojori pohuatareejuhuaj, taa Jesu pocoojoriquiaa nojoritiani, nuacuaco nojori quiasacari, mariyata taa nojori niishirii nojuajani, pan na neecasacari nojoriria.

Jesu muetasacariuhua na saquiriojosano pueyacua
(Mr 28.16-20; Mr 16.14-18; Jn 20.19-23)

³⁶Nojori pocoojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujuaque. Naa nojori sequereeri:

—¿Niaate quiyajaa? Nioojia nia cajitiri.
³⁷Nojoriiri shiriqitiqui. Jiyanohua puereturiquiaari. Nojoriiri Jesu jyaniriquiaa naaqui. ³⁸Jesuuri nojori sequere:
—¿Casaara nia pueretiuyani? ¿Casaara nia jiyajenetaa janiyani? ³⁹Cua juashiquia nia niquiri, cua nioluacano, nia

niishiniuria janiyacuaajaari quiyani. ¡Cua cootiuri! ¡Cua niquitiuri! Naaquiiri maja cuaqueyaraca, maja nuuhuaraca taa nia niquiya janiyacujani.

⁴⁰Naa nojori na sequesacariitij, Jesuuri nojori niquitijioree na juaashiquia, na niohuacanio. ⁴¹Puera nojori jiuujiatesacari, puera nojori shuquirishacarijiuhuj, nojoriiri taacanuuriquiaa-jaa, maja naasucua Jesu. Cunora, Jesuuri nojori sequereee:

—¿Niaate miaquesocoriquiano jiitiaacuaa?

⁴²Nojoriiri Jesu niquitioree sapitiaaja raqui caquishano.

⁴³Jesuuri na maseree. Nojori niquiara na miaquereeri. ⁴⁴Na nuhuaji, nojori sequereeri:

—Janiyari naa miishaarucuaani taa cua pohuataquiaari nijaniyacujani, pueyaracaanu niaata cua quishacari tarijia. Nia sequequiaaricujani, janiyari naa miishaanutaniyani, taa Moisés naajiotaquiaari janiyajinijicujani. Puetunu Pueyaso sequesano caminiujuniaajanaari janiyajiniji naajionuutaquiaarijiuuhuj. Supuetana Davidri janiyajiniji naajiotaquiaarijiuuhua na jaaquequejoneejinia. Quiarijia tari tohuateerucuaari puetunu janiyajiniji cuno naajionuutasanojuanaa.

⁴⁵Jiyacariitij, Jesuuri nojori niishitirii tariucuaaanu Pueyaso Rupaa naajiotasano. ⁴⁶Nojori sequereeri:

—Tariucuaaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuari”. ⁴⁷Naa naajiotasaaquiaarijiu-

huaj, Jerusalén tiacajinia, janiyajinijiiri pohuataaanutaniya pueya niquiara, na nuhuaji puetunu jiyacajiniajanaanio. Pueya tiushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. ⁴⁸Niaacuaajaari puetunu cua miishanojua-naa niquijiaca. ⁴⁹Cua tojitiare. Janiya jaara jiyocuaaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuaaanuji niriqiano cumaaca maserejaatijia.

Jiyocuaaanu Jesu tacasacariuhua

(Mr 16.19-20)

⁵⁰Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqii nojori quishacarijia, Jesuuri na juaashiquia shiitioquiaari nojoriicuaa na secojosacari Pueyaso, Pueyaso jiitianura maninia pueyaracaanu nojori. ⁵¹Nojoriicuaa na secojosacarijia, Jesuuri nojori shuriucuaaji tacanishaaquiaari jiyocuaaanu. ⁵²Nojoriiri na shuquiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoohua shuquiriaatia qiriqiaa. ⁵³Nojoriiri pueyaracaanu quijia Pueyaso Secojoua tijinia. Tii Pueyaso maniniuhuaqueetatujua pueyaracaanuuri. Tariucuaaja.

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

1 ¹Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiaariuhuj. ²Jiya coteesacari, nojuajaari na Que Pueyasota quiriquiaa. ³Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipininia quiniu socua. ⁴Nojuajaari quijiajuhanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. ⁵Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹“Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niqiaariiri puetunu pueyajanaa niishiniuria cante Pueyasoni.

¹⁰“Pueyaso Rupaari” mijiria rucanejoja quiquiaari. Pueyari tama nojori Shipinijajaaja niishiyaquiquiaari. ¹¹Tama na saquiriojosano Israel pueyacia niqiaariiri. Nojoriiri na tamacaquiaari saaja. ¹²Saaja nojiaqueya pueyari nocua tiuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiushacari saaja.

¹⁴“Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miiniosano niqiquiaariiri. Jiyanohua maninia quiquiaariiri. Na Que Pueyasoori na cumaquijia jiyanohua maninia na miiniuria, Neyanuniojua na quishacari. Nojuajaari saaja seetanu rupaajanaa sequeja Pueyasojiniji. Jiyanoojia quijiaari. ¹⁵Tiuquinijiona Juanri Jesucristojiniji pohuataquiaari pueya niqiaara. Jiyanohua na rupaa paaretaquiaariiri pueya tojtianura nojuaja. Naa sequejaari:

—Janiyacuaaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

¹⁶Jiyaniijajanaa Jesucristo quiniuucua, puetunu pajaniyajanaari na jiitiasanojiniji masequiaani. Jiyanohua capora na quiniuucua, nojuajaari pueyaracaanu pa cumaquiquiaa. ¹⁷Pueyasoori supuetana Moisés naajotequiaari na rootasano pajaniyara. Cunoori maja na cumaquiniu

quiquiaari pajaniya. Quiarjia saniniuujia, pa panijia Pueyaso quiniuucua, nojuajaari Neyanujanaa jiyaroquiaari pocua, pa jiyanooshaanura, naajuhuj, seetanu rupaajanaa pa niishiniuria nojuajiniji. ¹⁸Majaari quenaaja tamonu pueyano niqiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pohuatasano Jesucristojiniji

(Mt 3.11-12; Mr 1.7-8; Lc 3.15-17)

¹⁹Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Levi* niqiuoacuajinio supueno pueya. Nojiaqueya cuno pojorijinijioori quiquiaarijuhua pueyacuara secojonaa pueya. ²⁰Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujanaa naa nojori sequejaariiri:

—Janiyari maja Pueyaso Jiyarosano Cristoni.

²¹Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyaso sequesano caminiujunia Elías soj? ¿Quiaa jiyoteeri samiitariohuacuaa?

Tiuquinijiona Juanri saaja nojori riucaaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyaso sequesano caminiujunia, noj tariucuaaanu sequesaaquiaari niriqianotej?

Juanri saaja nojori riucaaree:

—Maja.

²²Cuno pueyari socua na sequeree:

—Canaa quia pohuatareja, ¿cante quiajaniyani? Canaacua saniniuujia canaa camarucua pohuatasuhanijia.

²³Juanri saaja naa nojori riucaaree:

—Janiyacuaaari noonni, cariquia jiyajinia nacajatej, ta supuetana Isaías juhuacarjia naajiotaquiaari janiyajinijicuaajani: “¡Jiyaniijiacuaji nia nuunore maninia! ¡Maja shuutiunio!”

²⁴Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵—Quiaa jaara quiyaquiri Cristo, Elíasjuhuaj, cuno tariucuaaanu sequesaaquiaari niriqiano Pueyaso sequenu panishano caminiujuniatej, ¿casaara pueya quia tiuquinijia moojiniacuaraarini?

²⁶Juanri nojori riucaaree:

—Janiyari nareja moojinia tiuquinijia pueyani. Saniniuujia, tamonuuri niya quiya, nia niishiyaquishoojua. ²⁷Nojuajaari cua nuhuaji niniutianiya. Nojuajaari Jiyaniijajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸Naa cuno pojori nequesoreesacari Tiuquinijiona Juantej, cunoori quiriquiaa Betania jiyaniishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

Jesu juhua Pueyaso borregoniojua pocuara mosaariquiano

²⁹Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niqiaara:

—Paari pueyaracaanu mooquiaa borregohuani Pueyaso jiyanooniuria pajaniya. iNia niquiri! iCuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanoinijini pa jiyanooshaanura! ³⁰Janiyacujaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijijanaa cutara. Nojuajaari tari rishijia cucuaji cua quiaquishacarijia”. ³¹Janiyari na niishiyakuquijaju-huaj, cante nojuajani. Naajaa, janiyari parta Israel pueya tiuquinioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³²Tiuquinijiona Juanri pueya sequerejuhuaj:

—Janiyari Pueyaso Sohuanu niquiriucuaani jiyocuaaanuji roseyano nocua juhua mococoonu. Nocua tiuushiiri. ³³Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanooocua roseyano, nocua na tiuuniuria, quiocua niishiri, cunocujaari cua sequesano quiajaniya. Nojuajaari cua Sohuanu tiuquinijionutaniya pueya jiuujajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyakuquianuni. ³⁴Janiyacujaari tari na niquiquianuni. Naaratej, janiyari saniniujia nia pohuataani pueyanaa, inojuajaari seetanujuanaa Cristo, Pueyaso Niyanu!

Coteenujanaa Jesu pueyajiniji pohuatasano

³⁵Tariqui, Tiuquinijiona Juanri tii quishiiquihua caapiqui na pueyata. Janiyari niquiriyatu cuno caapiqui pueyanoinijinio quiriquiaani. ³⁶Tiuquinijiona Juan jaara Jesu niquiquiaari shocoyano, jiyacari canaa sequereeri:

—iNia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

³⁷Naa canaa tojishacari Juan sequesantej, canaari Jesu nuhuajiquiaarini. ³⁸Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

³⁹Jesuuri canaa riucaaree:

—Miji. Nia niquiquii.

Canaari nata quiaareeni. Canaari na quijia niqutiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

⁴⁰Tiuquinijiona Juan niqitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiiitaja. Na sesaari quijia Simón Pedro. ⁴¹Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—iCua tarajanunaa, canaari Cristo niquiriquiaacuaani, tariucuaaanu Pueyaso sequesano na jiyarosocoriquianotej!

⁴²Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacujaari Simón, Juan niyanu. Quiarijia saniniujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniujia pueyano rupaajinia sequeya “Saajia”.

Jesu saquiriojosacari Felipe, Natanaelnio

⁴³Tariqui, Jesuuri Galilea jiyajiniara quiariquiaa. Felipe riuriasamaari. Na sequereeri:

—Cua tarajare cua pueyano quia quiniuria.

⁴⁴Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. ⁴⁵Na nuhuaji, Felipeeri Natanael pajeree. Na riuriasacari, na sequereeri:

—iCanaa noo pueyano niquiriini, Moisés nojuajiniji naajiotaquiaari tariucuaaanutej! Tariucuaaanu Pueyaso

sequesano caminiujuuniaa pueyari nojuajiniji naajionuutaquiaa-rijuhuaj. iNojuajaari Nazaret tiacajinijinio Jesu, José niyanu!

⁴⁶Natanaelri saa riucaareejaa:

—iJaj! ¿Na naatate maninia miijia pueyano supenujuuara cuno sesa miijia Nazaret tiacajiniji?

Felipeeri na sequere saaja:

—iMiji! iPa niquishii!

⁴⁷Jesuuri Natanael niquirii nocua niyano. Na sequereeri:

—Nio pueyanoori seetanu pa supetana Israel niquiohuacua-jinio supenujuanaa cutara. Majaari na niishiniu sapojonu.

⁴⁸Natanaelri na sequere:

—¿Taa quia niishiya janiyarini?

Jesuuri na riucaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹Natanaelri shiriquirii. Jesu sequereeri:

—Niishitiojonanaa, iquiaacujaqui Pueyaso Niyanu! iQuiaari parta Israel pueya jiyaniijiaranojuhuaj!

⁵⁰Jesuuri na sequere:

—¿Quiaateeri cucua tiuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijosano niqiniutianiya cutara.

⁵¹Jesuuri cuniqui quiniaa pueya sequerejuhuaj:

—Seetanujuanaa nia sequeyanijia, niaari jiya cajiniocua niqiniutianiya riateno. Pueyano cua quishacari, niaari Pueyaso seya niqiniutianiya cucua roseetaano, cucuaji taqueetaanojuhuaj.

Jesu jatanishacari mohuaca vinora, pueyano camishacari

2 ¹Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuahuaj. ²Jesuuri na saquiriojosano pueyata masuusaaquiarijihuaj, camishacari queranacunura. Janiyari na saquiriojosano pueyano quiriquiaa jiyacari tarijuhuaj. ³Jiyacaritij, mashacaari ritia puequemaa. Na nucuaari Jesu sequere:

—Sanaa, mashaca tari puequemaa.

Mashacaari quiquiaari uva* caaca, vinotuhuaj*. ⁴Jesuuri na nucua riucaaree saaja:

—Maajinia, ¿casaara quia sequeya janiyani? Juhuanujuaja maja cua poonijosacari Pueyaso cumaacata.

⁵Na nucuaari pueya raatojonaa sequere:

—iNiocua Jesu tojirijia! Jaara nia sequere, niocua puetunu na sequesanojuanaa miiri.

⁶Tii cajituriquiaari seis conatu, saajiajiniji quejasano. Canaa Judiocuaari sequeyarucua shuquirioojuaja tiacajinia nojori tiuquishacarihua, juhua jeequesano nojori quiniuria Pueyaso niqiuara. Nojori mohuaca cajitioojuaja quiquiaari cuno conaa. Jiyanhua puereetucocua quijiaari. Cuno conatuuri setenta tumococua mishaja mohuacata mishinishano quijia. ⁷Jesuuri pueya raatojonaa sequere:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma puecacosee. ⁸Jesuuri nojori sequere:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricujaari mohuaca mishinijioree cuno conaajinia. Queranacunu camaru saniniu nuhuaji cuno ratasano, camiyano pueyano piiriiri. ¹⁰Na sequereeri:

—Pueyaruhatijia coteenu raateja shocuanacu vinote. Puetunu masuusano pueya jaara tari raruere queraatia, na

nuhuaji raatesano cutaraari shaarunacu vino. iQuiarjia saniniuuja, nio cua ratasanoni, cunoori socua maniniuniacu vino coteenu quia raatojotesanojiniji!

¹¹Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niqitiquiaari Pueyasojiniji na cumaaca. Naacuajitij, canaa na saquirojosano pueyani, canaari niishiquiaarini Jesuuri seetanujuanaa Pueyaso Jiyarosano.

¹²Na nuhuaji, Jesuuri Capernaum tiacajinia quiaaree na nucuata, tapueyocucatajuhuaj, canaa na saquirojosano pueyano. Canaari tii camueenujuquiaari pasajani.

Jesu jaacasacari seya niqutiojonaa Pueyaso Secojoua tiajiniji
(Mt 21.12-13; Mr 11.15-18; Lc 19.45-46)

¹³Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. ¹⁴Na tiuquishacari, Pueyaso Secojoua tiajinia quiaaari. Tii niqishii pueyari juyaca niqutiojyano Pueyasocucara puecosocoriquiano, borregohua, noseyanio. Pueyari tii na juhuacutucujinia cajitiuriquiaajuhuj, pueya na tacatojonura taucuaca cumaneeca, Pueyaso Secojoua tiajinia niqutiojosocoriquiano cumaneecara. ¹⁵Naa na niquishacari pueya miyano Pueyaso Secojoua tiajiniatej, Jesuuri seya morojotaja jiyocua taticuaree. Na majacutajara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaano. Cumaneeca rerecojoree jiyocucara juhuacutucujinijiiri. Naajuhuj, cumaneeca juhuacutucua caponeetareeri. Pojotaariquiaacuaari. ¹⁶Noseya niqutiojonaa pueya sequereeri:

—iNiiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

¹⁷Jiyacaritij, canaa, Jesu saquirojosano pueyani, canaari niishiquini, seetanujuanaa tariucuaaanu Pueyaso Rupaajinia naa naajiotasanoori quia:

“Quia tiaacua juaatishaaree jiyanojuanijia, jiyanojuaa cua panishacari quia tia”.

¹⁸Naa Jesu miiniucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqutiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

¹⁹Jesuuri nojori riuucaree miriqui:

—Pueyaso tia nia niyartare, janiyacua saaja jiuujianaraca juucujinia na tucuatrohua tianu tamajaajani.

²⁰Narta Judiocuaca camarucuaari na riuucaree:

—iCuarenta y seis marijaari shoconujuquiaari pueya tucuatnura nio secojoua tia! ¿Quiaateeri jiyaniya quia naata na tianuhua ritia, saaja jiuujianaraca juucujinia? ¡Maja quia naata!

²¹Jesuuri tama na cuaqueyajaaja pohuatariquiaa, Pueyaso tia na sequesacari. ²²Naacuajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuaaanu Pueyaso Rupaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miijiosano niqiquiaari. Naaratej, queraatia pueyari nocua tiuquiaari.

²⁴Naajaa, majaari Jesu tiuuniu quiriquiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. ²⁵Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

Nicodemo pocojosacari Jesuta

3 ¹Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijiniojuhuaj. Tojishano pueyano. ²Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniucua canaa niqiuara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³Jesuuri Nicodemo sequere:

—Seetanujuanaa quia sequyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

⁴Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quia? Majaari na naata na nucua saracajinia tiuquiniuhua na rasaanuhua.

⁵Jesuuri na riuucaree:

—Seetanujuanaa quia sequesano. Cua tojiri. Paari coteenu rasaquiaari pueyano pa quiniuriani. Saniniuuja, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jiitiasanoniyojua na quiniu quiniutianiya. ⁶Mijiria pueya muetusanoori saaja pueyano. Saniniuuja, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriqiano. ⁷Naaratej, majaari quia shiriqini puera, naa cua sequenuucua quiajanijatej, quiaa cuara rasuhua, seetanujuanaa quiarinio pueyano quia quiniuria. ⁸Mijiria, paratuuri piyarojoquiaa taa na paniyacujani. Paari nareja na cojuatunenu tojiquiaani. Majaari pa niishiniu teje na piyarojijani, tee cunocora na quiajaaniuhuj. Naajaariuhuj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹Nicodemoori Jesu nequesotarohuacuhuj:

—¿Pueyanotucua taa quiarinio pueyanora jatanishaarejaarani?

¹⁰Jesuuri na riuucaree:

—¿Majateeri quia niishiniu cua sequesano quiajanijia? Quiaari Pueyaso Rupaa niishitiojonacujaja Israel pueyara. ¹¹Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuuja saaja na cuaracashitiquiaa, canaa pohuatasacari niajanijia seetanu rupaajanaa. ¹²Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriqiani, janiya jaara nia pohuatare jiyocuaaanu casaani? ¹³Janiyari jiyocuaaanu quijiani. Majaari quenaaja tamonu pueyano tacanu quiquiaari jiyocuaaanu, saaja tijinio roseno cutara. Nojuacuajaari janiya. ¹⁴Cariiquia jiyajinia pa supuetanaa Israel pueya rucanejosacari, Moisésri na shipinishano soconu nujuaretaquiaari macaacia, soconu sasuhua niquishocoriquiano. Na niqiniaa pueyari naatacoquiaariuhua. Naajuhuj, janiyari macaacia nujuaretasocoriquianoni. ¹⁵Naacuajitij, puetunu cucua tiuuniaajanaari pueyaracaanu quijiaa quiniutianiya.

Pueyasoori puetunu mijiria quiniaa pueyajanaa panijia

¹⁶Jiyanojuaa cua Que Pueyaso paniniucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutianiya cutara. Nojori cutaraari pueyaracaanu rishijiaa quiniutianiya Pueyaso shuriucua. ¹⁷Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸Cante cucua tiuujiani, majaari na saniitiosaanu quiniutianiya. Saniniuuja, cante cucua tiuyashijiani, nojuajaari

tari pueyaracaanu saniitiosocoriquiano jiyatesano quiya.

¹⁹Janiyari mijiria niqiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniucua. Sesa miijiaca nojori quiniucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. ²⁰Puetunu sesa miijiacajanaari cua niqiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maninijanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²²Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³Tiuquinijiona Juanri jiyacari pueya tiuquinijioriquiaajuhua Enón tiacajinia, Salm tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijosano nojori quiniuria. ²⁴Juanri jiyacari nujuatejojuajinia nujuatesoo quiriqiaajaa.

²⁵Cuno quishacari, Tiuquinijiona Juan pueyari tamonu narta Judío pueyanota pocoojoriqiaa taate pueya naata juhua jeequesano quiniu Pueyaso niquiarani. ²⁶Nocuaaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiquianu Jordán moo taquijiriatej, nojuajana pueya tiuquinijiyajuhuj. Puetunu pueyajanaana nocua quiojia tiuquinijosano nojori quiniuria.

²⁷Tiuquinijiona Juanri nojori riucuree saaja:

—Saaja Pueyaso camaquishacari pueyano, pueyano na naata maninia miiniu Pueyaso. ²⁸Niajanuyacuajani cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹Pueyano rupuenta jaara camiya necocuara, quiarijia cutara necocuari seetanujuanaa saaja nerano. Naajaa, na rupuenta quishacari na shuriucua, na timitiaari na tojishacari necota pocoojiano shuquiriaatia. Naajuhuj, janiyari cunora shuquiriaatia quiarijia quiyani pueya rupuesacari Jesucristo. ³⁰Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuara carteera janiya, Cristocua nojori pacunura saniniuujia, nojori tojiniuria nojuaja. ³¹Cante jiyocuaaanuji niqiaaricuajani, nojuajaari Jiyaniijijanaa cutara. Janiyari saaja mijiria quiniiani. Cunora, cua pohuatasanoori saaja mijiria cua tojishano. Jesucristo saniniuujia, nojuajaari jiyocuaaanuji ninio cutara. Nojuajaari Jiyaniijijanaa. ³²Naacuajitij, na pohuatasanoori tama na niquishanojuaja jiyocuaaanu, na tojishanonio. Pueyari na pohuatasano cuarachitiquiaa saaja. ³³Canapute Jesucristo pohuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴Pueyasoori jiyanoahua queraatia na Sohanu niqitioquiaari na Jiyarosano. Naacuajitij, seetanu Pueyaso rupaajanaa pohuataari. ³⁵Pueyasoori jiyanoahua panijia Neyanu. Naaratej, nojuajaari na jiyatequiaari puetunu casaa jitianarajanaa na quiniuria. ³⁶Canapute Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapute Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

Jesu pocoojosacari Samaria jiyajinijinio maajitia

4 ¹Fariseocuaari pohuatasaaquiaari, jiyanoahua queraatia pueya Jesuucua quiojia na tojitianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijia Tiuquinijiona Juanjiniji. ²Seetanujuanaa

majaari Jesujuanaa tiuquinijionu quiriqiaa pueya. Saaja canaa cutaraari pueya tiuquinijioriquiaani. ³Jesu jaara niishiquiaari Fariseocuaa naa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴Canaa quiasacari nucuaco, canaari Samaria jiyacuma tajiriquiano quiriqiaani. ⁵Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriqiaari supuetana José cuhuariquia, na que Jacobo niqitiosano nojuaja. ⁶Cuno cuhuariquiajia quiriqiaari cuari, supuetana Jacobo jiuutiasano tariucuaaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriqiaa. ⁷⁻⁸Jiyacaritij, canaari tiacajinia quiamaa canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹Cuno maajiri Jesu sequeree:

—Pueyanonaa, ¿casaara quia sequeya Samaria jiyajinijinio maajiri raatenura quiajaniani? Quiaacuajari Judío*.

Cuno maajiri naa sequeree Jesutej, na niishiniucua Judiocuacuaajari maja na niqiniu paniniu quijia Samaria jiyajinijinio pueya.

¹⁰Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiiitiaa quiarani, quiaa maara cua sequere cua raatenura quiajaniani. Quiaa jaara cua masere, janiya maara quia raatere pueya samiitianijia mohuacani.

¹¹Maajiri na sequeree:

—Jiyaniijijanaa, majaari quenaaja quia jitianu casaa, mohuaca quia taquiriatajara. Nio cuariiri jiyanoahua tucuaa. ¿Quiaatucua teje taquitiare cuno mohuacani, pueya samiitianijiani? ¹²¿Quiaateeri jiyaniijijanaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niqijij ratujua quiquiaari necohuata, na seesano seyanio.

¹³Jesuuri na riucuree miriqui:

—Puetunu nio cuarjiniji ratujuacajanaari saaja jiyamuecoquiaa. ¹⁴Saniniuujia, cante cua mohuaca ratunutaniani, majaari socua na jiyamueno quiniutianihua. Cua mohuacaari juhua samo naca pacartanutaniya pueyaracaanu nojiajinia, shuquiriaatia na rishiniuria pueyaracaanu.

¹⁵Cuno maajiri Jesu sequeree:

—iPueyanonaa, cuno mohuaca cua niqitioire cua ratusocoriquiano, maja socua cua jiyamuenura, naajuhuj, maja pueyaracaanu cua taquiriojonura nio cuarjiniji!

¹⁶Jesuuri na sequeree:

—Miji quia niyaca quia sequecoo coteenu.

¹⁷Maajiri na riucuree:

—¿Janiyate niyacaracajaranani, quiaa jaara naa cua sequere? Jesuuri na sequeree:

—Quiaacuajari seetanujuanaa cua sequeree: “Niyacaajunijia”. ¹⁸Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhuj.

¹⁹Naa cuno maajij tojishacari Jesu sequesantej, Jesu sequereeri:

—Jiyaniijijanaa, iquiaaqui Pueyaso sequenu panishano caminiujunija! ²⁰Canaa supuetanaa pueyari niya nio tuhananuucua Pueyaso secojonuujua tarijia. Niajanija saniniuujia, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

²¹Jesuuri na riucuree:

—Seetanujuanaa quia sequereera maajinijia. Cua sequesanoocua quia tiuuri. Quera quiniutianiyari Pueyaso nia secojosacari

puetunu tiqiyocua nia quishacarijanaa. Majaari tari Pueyaso secojoasaanu quiniutianiya saaja Jerusalén tiacajinia, nio tuhuananuucujahuaj, taa quia sequereecuajani. ²²Niajanitari maja nia niishiniu cana nia secojoquiaani. Canaa Judiocuacani, canaa cutaraari niishiyani cana cana secojoquiaani. Pueyasocuaaari canaa Judiocuaca supuetanaa niishitioquiaari pueyacuaaji Tacunaari supuenutaniya tama canaa Judiocuacajinijiniojuaaja. ²³Quiaritia cutara, cante seetanujanaa Pueyaso shuquiritiajacani, nojoriiri na Que Pueyaso seconotuniya puetunu nojiatajanaa, seetanujanaa na tojjijaca nojori quishacari. Pueyasoori naa paniya pueya seconotuniya puetunu nojiatajanaa, seetanujanaa na tojjijaca nojori quishacari. Pueyasoori naa paniya pueya seconotuniya puetunu nojiatajanaa, seetanujanaa na tojjijaca nojori quishacari. ²⁴Pueyasoori sohuano. Naaratej, cante Pueyaso shuquiritini panijiacani, nojori cuaraa secojora Pueyaso puetunu nojiatajanaa, Pueyaso Sohuano tojjijaca nojori quishacari.

²⁵Cuno maajiiri Jesu sequere:

—Janiyacuaaari niishiyani Pueyaso sequesano Cristo mijiria na jiyarocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanuniyajanaa.

²⁶Jiyacaritij, Jesuuri maatia na sequere:

—Janiyacuaaari cunoni, quiata pocoojiyacuaajani.

²⁷Jiyacaritij, canaari Jesuucua tiuquijiorohuani. Canaari jiuujiatequiaarini cana niquishacari Jesu pocoojiyano cuno maajitia. Majaari quenaaja cana nequesotanu quiri Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸Cuno maajiiri cuniquijia na pataco tiuquiaque. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹—iMiji pueyanaa, nia niquiqui pueyano! iNojuajaari cua sequere puetunu cua miishanojuanaa! ¿Majate Cristoni, tariucuaaanu Pueyaso sequesano pocua na jiyarocoriquiano-tej?

³⁰Pueyari cuno tiacajiniji Jesuucua nijioquiaari. ³¹Cuno maaji quiasacari na tiacajiniohua, jiyacaritij, canaari Jesu mianutenu paniriquiaa juucuan. Canaari na sequeriquiaani:

—iNiishitiojonanaa, quia miaquere!

³²Jesuuri saaja cana sequere:

—Janiyacuaa miaquesanoracani, cuno miaquesanoori nia niishishoo.

³³Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaque jiyotucuaajaari.

³⁴Jesuuri miriqui cana sequere:

—Cua miishacari cua Jiyara panishano, cunoori cua miaquesano, naajuhuj, cua tucuatascari na panishano.

³⁵Niaari sequequiaa: “Cuaara shocoojoraajaara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujanaa nia sequeya cutaranijia, nia namijia nia riatare maninia nia niquiniuria. Nataacuacacuaaari tari noshiquia, carojotasocoriquiano. ³⁶Na carojotanaari na poonijionu sami niquitioshiya. Na carojotasanoori pueyaracaanu quiriqiano. Naacuajitij, cuhuariquia natoonaari jatiqiu shuquiriniutianiya nataacuaca carojotanaa. ³⁷Naaratej, seetanujanaa nio tariucuaaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniujia na carojotaja”. ³⁸Janiyari saniniujia nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajia. Cunoori tamasaca poonijiosano quiquiaari. Niaari juhuajaniya tamasaca poonijiosanojiniji carojotaquiaa shuquiriaatia.

³⁹Queraatia pueya cuno Samaria tiacajinijioori Jesuucua tiuquiaari, nojori tojishacari naa cuno maaji sequesano-tej: “Cua sequere puetunu cua miishanojuanaa”. ⁴⁰Naaratej, cuno pueya jaara Jesuucua tiuquijioquiaari, nojoriiri na masuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani.

⁴¹Socua queraatia cuno pueyajinijioori Jesuucua tiuquiaari,

nojorijanaa jaara Jesu tojiquiaari Pueyaso rupaa pohuataano.

⁴²Naaratej, nojoriiri cuno maaji sequeturee:

—Quiaritia, majaari cana tiuuni Jesuucua, saaja cana quia pohuatanuucua nojuajiniji. Quiaritia cutara, canaacuaaari tama cana numaatajaaja tojiri na pohuatasano. Naaratej, canaari quiaritia niishiyani, Jesuuri seetanujanaa Pueyaso jyanootiriquiano pajaniya, puetunu mijiria quiniaa pueyajanaa.

Jesu naatanishacari jiyaniijia Herodes pueyano niyanu

⁴³Caapiqui juuca Jesu camueetanu nuhuaji cana, Samaria pueya tiacajinia, nojuajaari cuniquiji cana na pueya jiyataaree Galilea jiyajiniara. ⁴⁴Jesuuri tarijia sequequiaari: “Nio tariucuaaanu sequesanoori seetanujanaa sequesano. Naa sequeyari: ‘Pueyaso sequenu panishano caminiujuniaari maja tojishano quijia tama na jiyajiniajaaja’”. ⁴⁵Naajaa, Jesu jaara cana tiuquitiasequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niqiniucua Jesu miishano na cumacata Jerusalén tiacajinia, Pascuara nojori queranacusacari tii.

⁴⁶Galilea jiyajinia cana quishacari, Jesuuri cana jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaari tamonu pueyano, Galilea jiyajinia jiyatesano camarnura. Cuno pueyano niyanuuri jyanohua cusosu matariquiaa. ⁴⁷Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeseeeri:

—iJiyaniijianaa, cucua quia taraajere! iCua niyanu quia naataniqui, quera cusoyano!

⁴⁸Jesuuri na riucaaree:

—Niaa jaara cua cumacata cua miishano niquiyaquiri, niaari cucua tiuquiquiaa.

⁴⁹Cuno camarnuuri saaja Jesu sequere:

—iJiyaniijianaa, mijijiaj, jati pa quiaare cua tiajia, quiyanu cusoyaquishacarijia!

⁵⁰Jesuuri na sequere:

—Quia quiaarohua. Quia niyanucuaaari tari naatarohua.

Cuno camarnuuri Jesu sequesanoocua tiuuri. Quiaarohuari.

⁵¹Jiyacari na tiajia, na seyari niquiquiaari camarnu niyanuuri seetanujanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacutere saaja nuu cajiniocuacari. Nojoriiri na sequere:

—iQuia niyanu tari naatarohua!

⁵²Nojori camarnuuri nojori nequesotaree:

—¿Taaari na cusonu tajiyatemohuacuaani?

Nojoriiri na riucaaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³Cusosu queeri niishiqui, Jesucuaaari jiyacari na sequeriquiaa: “Quia niyanu tari naatarohua”. Naaratej, camarnuuri necocataja Jesuucua tiuuri, puetunu necohuatajanaa.

⁵⁴Judea jiyajiniji Jesu tiuquishacarihuaj, naa na naatanishacari cuno cusotej, cunota tari caapiqui quiquiaari na cumacata na miishano Galilea jiyajinia.

Jesu naatanishacari cumatacuruhua cusosu Betzata cuari shuriucua

5 ¹Tamacarihua, socua cana Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijuhuaj. ²Jerusalén tiacaari puetunujanaa puereetuaa sohuacajiniacua quia. Tohuatayacari quia tiuquitiacara. Tamonu tohuataya sesa quiquiaari “Borregohua tiuquitiacara”. Na shuriucua quiyari cuari. Cana Judiocuaca

rupaajiniani, cuno cuariiri sesojosaquiaari “Betzata”. Cuno suhuorotucuaari quijia cuno cuari shuriuquioco. ³Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiujiuniaa, cumatacuruhuaana cusosuhuanio. Nojoriiri mohuaca sashijia cuaara queyaquetesaaria. ⁴Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaarihua na cusonujiniji. ⁵Tamonu cusosuuri tii narta cusosuhua tajinia matariquiaajuhuj. Tari na shoconujuquiaariiri treinta y ocho marijia, pueyaracaanu na matasacari. ⁶Jesuuri na niquiquiaari mataano. Noojiajinia niishirijiaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocuai Jesuuri na sequere:

—¿Quiaate naatanu paniya?

⁷Cusosuuri na riucaare:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸Jesuuri na sequere:

—iQuia sanere! Quia matu quia pataarohua.

⁹Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriqiaa, canaa Judiocuaca samaatenu juuca Pueyaso niquiara. ¹⁰Canaa Judiocuaca camarucua jaara cusosu niquiquiaari na matu pataano, na juaatiiriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujaj!

¹¹Cusosu naatanohuari nojori riucaare:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹²Narta Judiocuaca camarucuaari na nequesotaree:

—¿Cantejaara naa quia sequereeni?

¹³Nojori riucaareeri:

—Johuj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriqiaa. Naacuajitij, Jesuuri ritia tajiniocuaareequiaari pueya tajinia, na naatanishano pueyanooquaji. ¹⁴Na nuhuaji, Jesuuri na riuriataquiaari cuno juucaja Pueyaso Secojoua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhua socua, quiaa mariqui socua taraatia miiriiri.

¹⁵Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeereeri:

—Jesuqui cunocuaaja cua naataniriini.

¹⁶Naa Jesu miiniucua samaatenu juucatej, narta Judiocuaca camarucuaari na quietunu panijia juucua. ¹⁷Jesuuri saaja nojori sequere:

—Cua Queeri pueyaracaanu poonijia. Janiyari cunora poonijijaacuhuj.

¹⁸Naa Jesu sequesacari nojoritij, narta Judiocuaca camarucuaari jiyanohua na monu paniriqiaa. Nojoriiri maja na monu paniniu quiriqiaa saaja samaatenu juuca na poonijionuucua. Socua jiyanohua na motunu paniriqiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹Nocuai Jesuuri narta Judiocuaca camarucua sequere:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajaacuhuj.

²⁰Cua Queeri cua panijia. Cunora, nojuajaari puetunu na miishanojuanaa cua niishitiojquiaa. Naajuhuj, cua niishitiojonutaniyari socua jiyajeneta casaa tariucua cua

miishanojinijicuaa. Niaari nocuai shiriqitiuniutianiya. ²¹Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacuajani. ²²Cua Queeri maja na nequesoreenu quiniutianiya pueya. Nojuacuajaari tari cua niquitioacu na cumaaca, puetunu pueyajanaa cua nequesoreenura. ²³Nojuajaari naa miiquianu puetunu pueyajanaa quiniuria cua tojitijajaca, naatej, taa cua Que na tojitiatuquiaacuani. Cante cua ruuretajani, cunoori cua Que ruuretajajuhuj, nooj, cante miriria cua jiyaroquiaaricujani.

²⁴Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasoori na quishacari. ²⁵Seetanujuanaa nia sequeyanijia, quera quiniutianiyaarini juhua macunucua quijiaa samiitiasacari. Seetanujuanaa quiarijiaari, juhua macunucua quijiaacari cua rupaa tojtianutaniya. Cua rupaa tojtijajacaari samiitiaconutaniya, pueyaracaanu rishijia nojori quiniuria. ²⁶Cua Queeri quijiajuhuanajaj. Majaari na naata shaajenu. Nojuajaari naa quijiaa cua jiyatequiaarijuhuaj, juhua nojuarajuhuj. Naacuajitij, cua naata pueya jiyatenu naa quijiarajuhuj. ²⁷Pueyanora cua quiniucua, na cumaaca cua niquitioereeri cuarta pueya cua nequesoreenura, nojori cua saniitonurajuhuj. ²⁸Cua tojitiare. Majaari nio sequesanoocuai nia shiriqini. Tamacari, puetunu macunucujanaari cua rupaa tojitiuniutianiya. ²⁹Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaa nojori quiniuria Pueyasota. Saniniujia, cante sesa miijiaca quiquiaarini, puetunu nojorijianaari quejoosanutaniya pueyaracaanu saniitiosocoriquiano.

Jiyaniijajanaa na quiniucua,

Jesu tama nojuajiniji pohuataajaaja

³⁰Pueyaso Niyanu cua quishacari, naajaa, majaari cua miiniu tama cua panishanojuaja. Janiyari sesa miijiaca juaaquiaacuajani, saaja cua Que niishitishacari janiya, nojori miishanoori sesa. Tama cua panishanojuaja miyashijia cua quiniucua, janiyari namitajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni.

³¹Pueyano jaara tama nojuajinijiaaja pohuataa narta pueyano, na pohuatasanoocua maja tiushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuaja maara najuhua quiriqiaaj. ³²Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pohuataa seetanujuanaa. Nojuajaari cua Que. Cunora, niishianijia na pohuatasano janiyajinijiiri maja najuhuanaj.

³³Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. ³⁴Nojuaja jaara seetacanu janiyajiniji nijaniya, quiria, naajaa. Janiyacuajaari niishiyani seetanujuanaari cua pohuatasano nijaniya tama janiyajinijiaaja. Tiuquinijiona Juanri seetanujuanaa pohuatacanu janiyajiniji nijaniya. Naa cuaara na pohuatasanoocua tiuuria, Pueyaso jiyanooniuria nijaniya. Janiyari saaja cunora nia pohuataa Tiuquinijiona Juanjinijini. ³⁵Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari nijaniya. Niaari najuhua tojiquianu na pohuatasano. ³⁶Tiuquinijiona Juan pohuatasano janiyajinijiiri seetanujuanaa. Naa jaara na pohuatasanoocua tiuuniu paniyashijiaa quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua

jiyaroquiaari. Nojuacuajaari cua sequequiaari naa cua miiniuritej. ³⁷Cua Quejanaari cua jiyaroquiaari. Nojuajaari janiyajini niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuaj. ³⁸Majaari quenaaja na rupaa quiniu noojiajini, nia tiyuaquishacari na Jiyarosanoocua. ³⁹Niaari suraatia serojoquiaa tariucuaaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaa quiri, niaari naa pueyaracaanu quiijara quiniutianiya. Seetanujuanaa majaari naatej. Cuno Naajioneejini, tiiri janiyajini naajiotasano quiyacuaja. ⁴⁰Niaari saaja cucua ninu paniyaquiaa cua jiyatenura niajaniya pueyaracaanu quiijacara cutara.

⁴¹Maninia cua miishanoori maja pueya sequenura janiya: “Quiaari maninia pueyano”. Janiyari saaja cua Que shuquiritiquiaa cutarani. ⁴²Janiyari seetanujuanaa nia niishiyani. Niaari Pueyaso shuquiritiaashijiaa, nia paniyaquishacari nojuaja. ⁴³Cua Quecuajaari cua jiyaroquiaari cua niishitiojonura niajaniya nojuajini. Quiarjiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosana nia quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja. ⁴⁴Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵Majaari nia jiyaniyu janiya niaacuara tonjunutaniya cua Queni. Tama Moisés cuajaari niaacuara tonjunutaniya, cua tojitiaashijiaa nia quiniucua. Niaari jiyaniya niaa Pueyaso muerasu, juhua Moisés tojijiaa nia quishacari. ¿Niaateeri seetanujuanaa Moisés tojijiaa? ¡Maja! ⁴⁶Nojuacuajaari janiyajini naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuaj. ⁴⁷Nocuaji, niaa jaara Moisés naajiotasanoocua tiyuaquiquiaa, ¿niaatucua taa tiuuri quiarjiaa cua pohuatasanoocuan?

Jesu mianuutesacari cinco mil canuu

(Mt 14.13-21; Mr 6.30-44; Lc 9.10-17)

6 ¹Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. ²Jiyanoohua queraatia pueyari Jesu niuquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquioco. ³Canaa shiitiasacari caminia taquijiria, Jesuuri canaa tacatamaa tuhananuucua. Tii cajitiasee canaari. ⁴Jiyacaritij, quera Pascuara queranacusacariiri quiriquiaa. ⁵Jesu niquishacari jiyanoohua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani.

⁷Felipeeri na riucaaree:

—iPaa jaara cumaneeca jiitiare doscientos juuca pa poonijiosanojiniji pan pa masetajarani, cuno maara najuhuana secaja quiri puetunu nojoririjanaa!

⁸Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquirojosano pueyanohuhaj. Jesu sequeereeri:

⁹—Jiyaniijianaa, caya samijia niya cinco pan jiitiaa cebada* cashojuajini shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

¹⁰Jesuuri saaja canaa na saquirojosano pueya sequereeri:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitiujia. Naaratej, pueyari cajitiurii. Puetunu cuno pueya maanujinijiojuanaani, saaja canuuri quiquiaari cinco mil pueya. ¹¹Jiyacaritij, Jesuuri cuno pan pataree. Pueyaso secoree nocuaraari. Na nuhuaji, canaa na serotaniiri. Canaari cajitiuyano pueya puetunu na

panishanojuanaa niquitiojoreeni nojori miaquenuusocoriquiano. Jesuuri naa miiri sapitiaajajuhuj. ¹²Puetunu pueyajanaa jaara tooquioquiaari, Jesuuri canaa na saquirojosano pueya sequereeni:

—Puetunu miaquesano raquiquiajanaa nia reraterohua, maja najuhuana na niitiasaanura.

¹³Canaari cuno cinco panjiniji pueya miaquesano raacua reratereni. Canaa reratesacari, canaari doce canaasatu mishinijoreeni. ¹⁴Pueya niquishacari naa Jesu miishano na cumaacatatej, nojoriiri sequeturiquiaa:

—iNio pueyanoqui seetanujuanaa Pueyaso sequenu panishano caminiujunua, nooj, tariucuaaanu sequesaaquiaari pocua niriqianotej!

¹⁵Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiaconaja tuhananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶Tariucua pananu tiuquishacari, canaa, Jesu saquirojosano pueyani, canaari rosetaahua caminiujiniani. ¹⁷Canaari botejina tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiri quiriquiaa. Majaari Jesu tiuquini quiriqiohua juhuanohuhua canaacia.

¹⁸Tari canaa niuutiasacari, paratuuri jiyanoohua piyorojoriquiaa. Caminiaari cunora jiyanoohua cajiniuucuariquiaa. ¹⁹Canaari tari caminia jiuujiajini quiriqiaani, seis kilométroruhua canaa ruparetasajiji. ¡Canaari jiyacari casaa niquirii canaacia catecanoyanoni! ¡Mohuaca caco canujuriquiaari! ¡Canaari nocuaji shiriquituri jiyanoohuan! ²⁰Jiyacaritij Jesuuri canaa sequereeni:

—iMaja pueretunu! ¡Janiyacujani!

²¹Na rupaa canaa tojishacari, canaari shuquiriaatia na tacanitiurii botejiniani. Canashiyajiji boteeri ritia shiitiasee terera canaa quiariquiaacuajani.

Jesu mianuutesano pueya pajesacari nojuaja

²²Jaara juhuaquequiaari, Jesu mianuutesano pueyari na pajenuunu coteequiaari tee canaa quiriqiaa caminia taquijiriacuajani. Nojoricuajaari tenacari niuquiquiaari saaja niquiriyatu boteeri shiitariquiaa. Saaja canaa, Jesu saquirojosano pueyani, canaari cuno botejina quiaquiaariuhua nojori niqianoni. Majaari Jesu quianu quiriqiaa cutara canaata. ²³Jiyacaritij, Tiberias tiacajini boteeri tiuquijioquiaari catecaja nojorijini, tee Jesu mianuutequiaari nojoricuajani. ²⁴Cuno pojori niishishacari maja Jesu quiniu quiriqiaa tari tii, canaa na saquirojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesu Cristo juhua poojia miaquesano

²⁵Cuno pojori tiuquijiosacari caminia taquijiria, Jesu riuriataseeri. Na nequesotatureeri:

—Niishitiojonanaa, ¿taacari quia niyarohuacuuarini?

²⁶Jesuuri saaja nojori sequereeri:

—Janiyari seetanujuanaa nia sequeyani, majaari nia pajenu janiya nia niuquiniucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacuajani, cua mianuutesacari niajaniya. ²⁷Maja saaja miaquesanoocua nia tacaaniu, nia cuaqueya nia cumaquitiajara. Cunoori maja na jiyatenu quiniutianiya niajaniya pueyaracaanu rishijara. Saaja nia taacari cutara noojia samiitiani miaquesanoocua, pueyaracaanu rishijia nia quiniuria. Janiyacuajaari cuno nia niquitioriquianoni, pueyano cua quiniucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosani.

²⁸Cuno pueyari Jesu nequesotaree:

—¿Casaa canaa miiniutianiyani Pueyaso panishano canaa miiniuria, Pueyaso shuquiritiasano canaa quiniuriajuhuaj?

²⁹Jesuuri nojori riucaaree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

³⁰Cuno pueyari Jesu sequeturee:

—Canaa niqiuara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niqitiniutianiya canaa tiuuniuria quiocuani? ³¹Canaa quia niqitiricuaraja quia cumaacata quia miishano, taa Moisés niqitiquiaari canaa supuetanaacuaani. Nojuajaari jiyocuaaanuji pan tiniquiaari pueyaracaanu nojoriria, cariiquia jiyajinia nojori rucuanesacari. Naa naajiotasano quiyacuajaari tariucuaaanu Pueyaso Rupaajinia: “Nojuajaari nojori mianuutequiaari jiyocuaaanuji tinio pan”.

Naacuajitij, canaari niishiyani Moisésuajaari Pueyaso jiyarosano quiquiaari.

³²Jesuuri nojori riucaaree:

—Seetanujuanaa nia sequeyanijia, cuno jiyocuaaanuji panni, cunoori maja Moisés tinishano quiquiaari. Majaari seetanujuanaa jiyocuaaanuji pan na quiniu quiquiaarijuhuaj. Quiaritia cutara, cua Queeri niaacua jiyarorucuaa seetanujuanaa jiyocuaaanuji panjanaa cutara. ³³Cuno, Pueyaso niqitiosano pan jiyocuaaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴Naaratej, cuno pueyari Jesu sequere:

—iJiyaniijianaa, quiocua pueyaracaanu canaa niqitioriquia cuno pan!

³⁵Jesuuri nojori sequere:

—Janiyacujaari cuno panni, pueya samiitianijiojua. Cante cucua niyani, majaari na miaajenu quiniutianiya socua. Cante cucua tiuuriijiaanihuaj, majaari na jiyamenu quiniutianiyaju-huaj. ³⁶Taa cua sequere tari nijaniyacujani, niari juucua cua niqiuia. Majaari quenaaja cucua nia tiuuniu. ³⁷Naajaa, puetunu cua Que niqitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸Majaari jiyocuaaanuji cua rosenu quiquiaari cua miiniuria tama cua miiniu panishanojuaja. Mijiria niqiaarinijia saaja cua Que panishano cua miiniuria, cante cua jiyaroquiaaricujani. ³⁹Majaari cua Jiyarona paniniu cua juurequetenura quenaaja niqiriyaatujua na niqitiosanojinijia janiya. Nojuajaari paniya cutara, nojori cua samiitianijionura jiya puequesacari. ⁴⁰Canapute cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaa nojori quiniuria. Naacuajitij, janiyari nojori samiitianijionutaniya jiya puequesacari.

⁴¹Jesu sequenucua, “Janiya jiyocuaaanuji roseno panni”, tii quiniaa narta Judiocuacaari cunora juaaquioree. ⁴²Sequetureeri:

—¿Majate nio pueyano Jesucuaaja, José niyanutej? iPaacuajaari na queya niishiyani! ¿Casaara quiaritia na sequeyari: “Jiyocuaaanuji rosenonijia”?

⁴³Jesuuri nojori sequere:

—iTariucuaaja! iMaja nia juaaquiou! ⁴⁴Pueyanoori maja na naata tiuuniu cucua tamajaaja, cua Que jaara noojiajinia poonijiaquiri. Janiyari puetunu cucua tiuuniaajanaa samiitianijionutaniya jiya puequesacari. ⁴⁵Tariucuaaanu pueyara Pueyaso sequesano caminiujunia naajiotasanocujaari naa sequeya:

“Pueyasocujaari puetunu nojorijianaa niishitiojonutaniya”. Naacuajitij, cante cua Que niishitiojosano tojjia seetanujuanaa-ni, nojuajaari cucua tiuya.

⁴⁶Cua Queeri maja pueya niquishano quenaaja. Saaja na niqinia cutaraari janiya cante Pueyasojinijia niqiaaricujani.

⁴⁷Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiaa jatanishaaree.

⁴⁸Janiyacujaari pueya samiitianijia panni. ⁴⁹Cariiquia jiyajinia nia supuetanaa camarucuneejotasacari, nojoriiri cuno jiyocuaaanuji tinio pan miaquenuquiaari juucua. Naajaa, saaja cusonuquiaariiri. ⁵⁰Saniniuujia, cante quiaritia seetanujuanaa jiyocuaaanuji roseno pan miaqueyani, majaari Pueyaso shaajanu quiniutianiya nojuaja. ⁵¹Janiyacujaari cuno samiitianijia panni, jiyocuaaanuji rosenoni. Cante nio panjinijia miaquejani, nojuajaari pueyaracaanu quijia quiniutianiya. Nio pan, janiya na niqitiojutaniya puetunu mijiria quiniaa pueyaracajanaani, cunoori tama cua cuaqueyajaaja.

⁵²Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

⁵³Jesuuri jiyacari nojori sequere miriqui:

—Seetanujuanaa nia sequeyanijia, nia jaara miaqueyaquiri cua shu, niaa jaara ratuyaquiri cua nanacajuahuaj, majaari samiitianijiosano nia quiniu quiniutianiya, pueyaracaanu quijia nia quiniuria. ⁵⁴Cante cua shu miaquereeni, cante cua nanaca ratureejaanihuaj, nojuajaari tari naatarohua shuquiriaata na quiniuria pueyaracaanu. Jaara cusoyare, naajaa, janiyari na samiitianiniutianiuhaa jiya puequesacari. ⁵⁵Cua shuuri seetanujuanaa miaquesano cutara. Naajuhua, cua nanacaari seetanujuanaa ratasano cutara. Cunoori maja juhua mijiria nia miaquesano. ⁵⁶Cante cua shu miaquenani, cante cua nanaca ratunajanihuaj, nojuajaari coojia rupueja. Janiyari noojia rupuejajuahuaj, pueyaracaanu rupuetootesano canaa quiniuria. ⁵⁷Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuahuaj, na rupesacari janiya. ⁵⁸Janiyari maja juhua nia supuetanaa miaquesano panni. Nia supuetanaari cuno pan miaquenuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuaaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutanihuari pueyaracaanu quijia na quiniuria.

⁵⁹Jesuuri puetunu niojuanaa pohuataquiaari pueya niqiuara Pueyaso secojojua tiajinia Capernaum tiacajinia.

Queraatia Jesu nuhuajiniaa pueya cartesacari nojuaja

⁶⁰Naa pueya tojishacari Jesu niishitiojosanotej, queraatia na nuhuajiniaa pueyari naa sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaarajaanijia?

⁶¹Jesuuri naa nojori sequesano niishirii noojiajinia. Nocujaji nojori sequereeri:

—¿Niaateeri naa cua sequenucua juaya? ⁶²¿Niaatucua taa sequere socuani, niaa jaara cua niqiri tacaanu jiyocuaaanu-hua, teje cua niqiaaricujani? ⁶³Cua shu maja cumaacaraca pueya na samiitianiniuria. Saaja cua Sohanu cutaraari pueya samiitianijia, pueyaracaanu rishijiaa nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria nijaniya. ⁶⁴Noojiaqueya nijaniyajinijioori cucujaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quietenutaniyani.

⁶⁵Naa sequere socua cuno pojoriiri:

—Janiyacujaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

⁶⁶Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucoojonu quijia.

⁶⁷Nocujaji, Jesuuri jiyacari canaa na saquiriojosano pueya nequesotaree:

—¿Niajaniryahuaj, niaateeri cua cartenutaniyajaacuhuj?

⁶⁸Simón Pedroori Jesu riucaaree:

—iMaja Jiyaniijiajanaa! ¿Canaatucua tamonu jiyaniijiaacua pacureni? Canaa quia pahuatasnocuajaari na naata canaa jataniniu pueyaracaanu rishijia canaa quiniuria. ⁶⁹Canaacuajaari tari quiocua tiuquianuni, canaa niishishacari quiaari Pueyaso Niyanu, saa maninia miijiaja.

⁷⁰Jesuuri canaa sequeree:

—Niaacuajaari tama cua saquiriojosano doce pueyajaaja. Saniniuujia, niquiriyatu nijaniyajiniiniori sesaaca.

⁷¹Naa Jesu sequesacariitij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajiniinijo Jesu doce saquiriojosano pueyajiniinijo quiquiaari. Naajaa, tama na Jiyaniijiaaja tacartariquiano quiriqiaaquiiri.

Tama Jesu tapueyocuaajaaja Jesuucua tiuyashijiaa quiquiaari

7 ¹Na nuhuaji, Jesuuri Galilea jiyajinia rucuaneriquiaa. Canaari na cojiriqiaani. Majaari na quiniu paniniu quiriqiaa Judea jiyajinia, tii quinia Judiocuaca monu panishacari nojuaja. ²Jiyacariitij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariiri pueyari ocho juuca shocotejoquiaari suhuorotucujinia nojori quishacari. Naa miituquiaari puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijiaa quiquiaari, pueyaracaanu nojori camarucuneejotasacari cariiquia jiyajinia nojori quishacari. ³Jiyacariitij, tama Jesu tapueyocuaajaari naa Jesu sequeturee nojori macaatinuria nojuaja:

—iMajaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niqiniuria puetunu quia miishanojuanaa. ⁴Pueyano jaara puetunu pueyajanaa tojinii panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niqiarajanaa Jerusalén tiacajinijuhuj.

⁵Majaari quenaaja tapueyocuaa tiuuniu quijia Jesuucua. Cunora naa na sequetureeri. ⁶Jesuuri saaja nojori riucaaree:

—Juhuanajuaja maja cua quiasacari cua miiniuria taa nia sequeyacuajani. Naa jaara quianu paniri, niama juhuajani quiaaretej. ⁷Narta mijiria quijiaa pueyari maja na naata juaani nijaniya. Janiya cutaraari nojori niqiniu paniaquishooni. Cua niqituniu paniaquiquiaari, nojori cua niishitishacari nojori miishanoori sesa. ⁸Nia quiojiyare queranacunuucua. Janiya cutaraari maja cua quianu quiniutianiya juhuanojuaja. Quiarijani, puera juhuacarijaari cua miiniuria taa nia sequeree janiyacujani.

⁹Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰Na tapueyocuaa jaara quiojoquiaaricuaa Jerusalén tiacajiniera tii queranacunuunura, Jesuuri jiyasohuaja quiaaree nojori nuhuajijuhuj. ¹¹Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹²Puetunu pueyajaari Jesujiniji sasacotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—iMaja maninia pueyano! iPueya sapojoua najuhuanaj!

¹³Puetunu pueyajaari naa sasacotooriquiaa jiyasohuaja, nojori pueresacari narta Judiocuaca camarucua.

¹⁴Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari

Pueyaso Secojoja tiajinia. Tii coteeree pueya niishitiojonuuri.

¹⁵Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—iCuno pueyanoori maja quenaaja na serojonu quiquiaari!

¿Taa na niishiya pueraarini?

¹⁶Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya. ¹⁷Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaja. ¹⁸Cante tama na niishiriojosanojuaja pahuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuujia, cante na jiyarona niishitiojosano pahuataa pueyani, pueya tojinuria na jiyarona, cuno pueyano pahuatasano cutaraari seetanujuanaa. Cuno pueyanoori maja pueya sapojoua.

¹⁹¿Niaateeri seetanujuanaa supuetana Moisés Rootasano tojtiajaca? Majaruhua. Majaari quenaaja niquiriyatu nijaniyajiniinijo na rootasano tojijia. ¿Casaara nia monu pania janiyani? ¿Supuetana Moiséste naa nia niishitiojiya na naajioneejinia?

²⁰Nojoriiri Jesu riucaaturee na juaaniutia:

—iQuiaaqui samaruraca! ¿Cante quia monu paniyani? iCanaa quia sequeretoj!

²¹Jesuuri nojori sequeree:

—Puetunu nijaniyajanaari shiriqituiquianu samaatenu juuca cua miishacari niquiriyatu casaaniyojua cua cumaacata. ²²Supuetana Moiséscaajaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaja. Cunoori tariucuaaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniurajuhuj. Naaratej, jaara quiri samaatenu juuca, naajaa, niaari naa nia niqiuohua cararaatiuuquia co miatejoquiaa. ²³Naa nia miishacari samaatenu juucatej Moisés Rootasano nia tojinuria, ¿casaara nia juaya janiyani, cua naataniniuucua cusosu samaatenu juucani? Naaari saaja shiitaniyojua miatejiya, maninia nia niqiuohua quiniuria Pueyaso niqiara. Janiya cutaraari puetunu cuno cusosu cuaqueyajanaa jeecacanuni. ²⁴Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojua nia quiri, niaa mariqui najuhua pueya juaariiri na miishano jaara sesa quiaquiri.

Jesu pahuatasacari tama nojuajiniijiaaja

²⁵Jiyacariitij, noojiaqueya Jerusalén tiacajiniinijo pueyari tama sequetooreejaaja:

—¿Majate nio pueyano pa camarucua pajesanocuaaja na mosocoriqianotej? ²⁶¿Taateni? Noocujaruhua juhuajaniya pahuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuaaanu sequesano pocua jiyarosaariqianotej? ²⁷Paacuajaari nio pueyano niishiyani, tejenote nojuajani. Saniniuujia, Cristojanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸Jesuuri jiyacari niishitiojoriqiaa Pueyaso Secojojuajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiya juhuaj, tejenote janiyani? Naajaa, majaari cua niiniu quiquiaari tama cua panishacarijaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia

niishishoo. ²⁹Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰Nojoriiri jiyacari Jesu quiatunu panirii. Naajaa, majaari quenaaja tamonu naata quiriqiaa na quianura. Majaari na naata quianu quishaaquiaari, juhuanojuaja na monu juuca quiyaquishacarijia. ³¹Saniniuujia, queraatia cuniqui quiniaa pueyari Jesuucua tiuuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³²Fariseocuacaari cuno pueya tojiqiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucua roojotooquiaari. Na nuhuaji, nojoriiri Pueyaso Secojoja tia cojuanaa pueya jiyaramiquiiaari Pueyaso Secojoja tiajinara, tii nojori quianura Jesu. ³³Jesuuri jiyacari nojori sequeree:

—Janiyari saaja rupaquijia niaata quiniutianiyani. Na nuhuaji, janiyari cua Jiyaronaacua riujiuuniutianihuani. ³⁴Niaari cua pajenuunutaniya najuhuanaj. Majaari nia riuritanu quiniutianiya janiya. Majaari nia naata quianu quiniutianiya tee cua quiniutianiyacuani.

³⁵Nocuaaji, cuno Judiocuacaari tama sequetooreejaaja: —¿Tee na quianutaniyajanojoni naa pocuaaniquitij, na riuritaacquishaanurajuhuj? ¿Parta Judiocuacaacua quianutaniya soj, noo pojoriicua Griegohua tajinia niaquejoquiaariti? ¿Tii niishitiojonutaniya cuno taucua soj?

³⁶¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuritanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuani”?

Jesu pohuatasano miriqui Pueyaso Sohuanujiniji

³⁷Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiuara. Jiyanohua na rupaa paaretareeri. Naa sequereeri:

—iCante jiyamueyani, nojuaja cuaara niiria cucua, na ratunura janiyajiniji! ³⁸Cucua na tiuushacari, nera quiniutianiyari taa na naajiotasaaquiaari tariucuaaanu Pueyaso Rupaajiniacuajani. Naa sequeyari:

“Cante cucua tiyani, pueyano samiitianiijojua mohuacaari noojiajiniji jaatenutaniya”.

³⁹Naa Jesu sequesacariitij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanojuaja maja na quiniu quiriqiaa mijiria, Jesu tacaquishacarijia Jiyaniijiajanaa na quiniuria. Naaratej, tii quiniaa pueya sequeriquiaari, cante quiarjia nocua tiyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juaatiosacari Jesuucua

⁴⁰Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijiniiniori sequeree:

—iNio pueyanoqui seetanujanaa Pueyaso sequenu panishano caminiujunua, nooj, tarijia sequesaaquiaari pocua niriqianotej!

⁴¹Tamasacaari saniniuujia naa sequeriquiaacujua:

—iNojuacuajaari Cristo, Pueyaso Jiyarosano pocua!

Tamasacaari saaja nojori riucaaree:

—¿Cristoteeri Galilea jiyajiniji supuenutaniya? iMaja!

⁴²Tariucuaaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niqiuohuaji-

niji supuenutaniya. Belén tiacajinia rasaanutaniyari, supuetana David tiacajinia.

⁴³Naacuajitij, puetunu pueyajanaari Jesuucua juayonuutaquiaari. ⁴⁴Tamasacaari saniniuujia Jesu quianu paniriquiaa juucua. Naajaa, majaari na quiatunu quiri.

Judiocuaca camarucua tiyaquishacari Jesuucua

⁴⁵Pueyaso Secojoja tia cojuanaa pueyari Jesu tojitiariquiaa juhuajaniya. Na nuhuaji, socua quiojyarohuari na jiyaramiquiniaa pueyacu. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

⁴⁶Nojori jiyaramiquishano pueyari saaja nojori riucaaree:

—iMajaari quenaaja tamonu pueyano pocuanu juhua cuno pueyanojua, seetanu rupaajanaa pohuataja cutara!

⁴⁷Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijuhuj? ⁴⁸¿Tamonu pa camarucujinijiniote nocua tiurii, canaa Fariseocuacajinijiojuhuaj? iMaja! ⁴⁹iCuno pojori Jesuucua tiuujiacani, nojoriiri Moisés Rootasano niishiyashijia! iNojoriiri sesoriquia seque!

⁵⁰Nicodemoori narta Fariseocuacata tii quiriqiaa. Nojuajaari noo Nicodemo quiriqiaa Jesuucua niqiaari niucatej.

Nojuajaari narta Fariseocuaca sequeree:

⁵¹—Pueyanaa, supuetana Moisés cuajaari pa rootaquiaari maja najuhuaana pa sesacanura pueyano, paa jaara coteenu na nequesoreyaquirini casaa na miiriini.

⁵²Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanojuhuaj?

iJacaria quia pajere tariucuaaanu Pueyaso Rupaajinia! iQuiocua jiyacari niishiri majaari quenaaja niquiriyatu Pueyaso sequesano caminiujunua pueyano supueno quiniutianiya Galilea jiyajinia!

⁵³Na nuhuaji, puetunu cuno pojorijianaari na tiajinia quiojyarohua.

Jesu jiyanooshacari maaji

8 ¹Jesuuri saniniuujia Olivo cuhuariquiajinia quiaaree.

²Jesuuri tariquicuaji tiuquiriohua Pueyaso Secojoja tiajinia. Canaari nata quiriqiaajuhuj. Pueyari nocua rerejoquiaari. Nojuajaari cajirii pueya na niishitiojonura juucua.

³Moisés Rootasanojiniji niishitiojonaa, mariyata Fariseocuacano, cuno pojoriiri jiyacari maaji jaatucumaa Jesuucua. Cuno maajiiri riuritasaaquiaari numuetucushiyano. Nojoriiri cuno maaji nujuateree pueya tajoji. ⁴Jiyacari Jesu sequetereeri:

—Niishitiojonanaa, nio maajiiri quiasaaree numuetucushiyano. ⁵Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanijarijataj, taa quia sequeyanijia?

⁶Judiocuaca camarucuaari naa Jesu nequesoteree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucaanu quiri. Nojuajaari saaja jojoree, jiyajinia na naajionura na juaashiquiata. ⁷Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijinijiniote sesa miyashijiani, nojuaja cuaara na coteetaara janu.

⁸Jesuuri jororohuacuhua socua na naajionura jiyacua. ⁹Cuno pojori tojishacari naa Jesu sequesantej, puetunujanaari sanaa quiojorohua. Juhucatecara quiojonu coteequiaariiri socua saaqiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujanaa. Saaja Jesuuri jateequie

cuno maajitia. ¹⁰Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajaniya saitia?

¹¹Maajiiri Jesu riucaaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janiyari quia jiyanoaya cutarani. Juhujaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

¹²Nojori nuhuaj, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³Tii quinaa Fariseocuacaari naa Jesu juaari:

—iQuiaacuajaari tama quia cuaqueyajini pahuataa! iPuetunu quia pahuatasanojuanaaari maja tojishano!

¹⁴Jesuuri nojori riucaaree:

—Tama cua cuaqueyajiniijaaja cua pahuatasacari, cunoori maja najuhuana pahuatasano. Cua pahuatasanoori seetanjuanaa cutara. Janiyacuajaari niishiyani teje cua niqiaarini, tee cua quianutaniuhuanu. Niaari saniniuujia niishiyacuiyacuua teje cua niqiaarini, tee cua quianutaniuhuanu. ¹⁵Niaari pueyacuara saquiriojotaquiaa saaja nia niqishanojiniji, nia tojishanojinijiuhuj. Janiya cutaraari maja cua saquiriojotanu pueyacuara. ¹⁶Janiya jaara juaari sesa miijia cutarani, cua sequesano cutaraari seetanjuanaa, niqiriyatujua cua quiaquishacari. Cua Jiyarona cua Quecuajaari cua cojqiaa cuata na juaaniuria sesa miijiaa.

¹⁷Niaacuajaari Moisés Rootasanojiniji niishitiojoquiaa:

“Caapiqui pueyano pahuatasano jaara juhua tarajanu pahuatasano quirijuhuj, cuno cutaraari seetanjuanaa”.

¹⁸Naajuhuj, canaari caapiquini. Tama cua cuaqueyajaaja cua pahuatasacari, cunoori seetanjuanaa, cua Jiyarona cojishacari janiya. Nojuajaari cua Que.

¹⁹Fariseocuacaari na nequesotaree:

—¿Teeteeri quia queni?

Jesuuri nojori riucaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijuhuj.

²⁰Jesuuri puetunu nio pahuatariquiaajanaa Pueyasora niqitiojosano cumaneeca racataja shuriucuaji, Pueyaso Secojoja tiajinia. Naajaa, majaari pueya quianu quiriioquinioj, juhuanajuaja na monu juuca quiaquishacarija.

Jesuucua tiyashijiaaari jiyanoaquishaanutaniya

²¹Jesuuri cuno Fariseocuaca sequerohuacuahuaj:

—Janiyari quianutaniyani. Niaari cua pajenuunutaniya juucua. Niaari cusonuunutaniya sesa miijiacaja, jiyanooshoo nia quishacarija, cucua nia tiyacuquiniucua. Naaratej, majaari nia naata quianu quiniutianiya tee cua quianutaniyacuanaa.

²²Naa Jesu sequesacari, cuno narta Judiocuacaari tama sequetooreejaaja:

—¿Casaara na sequerecuaraarini: “Maja nia naata quianu quiniutianiya tee cua quianutaniyacuanaa”? Tama na cuaqueyajaaja miaquenutaniya jiyoteeri.

²³Jesuuri nojori sequeree:

—Niaari ninishiqui quiquiojinijinio. Janiya cutaraari jiyocuacaanujinijionu. Niaari saaja mijiria quijiaa. Janiya cutaraari maja niqijinioni. ²⁴Janiyacuajaari cunora nia sequereeni, niaari jiyanooshoojua cusonuunutaniya nia cuaracashitiniucua janiyari maja Pueyaso Niyanuni, taa cua sequequiaa nijaniyacuajani. Cunora niaari jiyanooshoo quiniutianiya, pueyaracaanu saniitiosano nia quiniuria.

²⁵Nojoriiri Jesu nequesotaree:

—¿Canteeri quiajaniyani?

Jesuuri nojori riucaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani.

²⁶Janiyari queraatia jiitiaajaa cua sequesocoriquiano nijaniyani. Niaa jaara nocua tiyacuquini, niaari pueyaracaanu saniitiosaanutaniya. Puetunu cua sequesanojuanaa nijaniyani, cunoori seetanjuanaa. Cua pahuatasano mijiria, cunoori cua Jiyarona sequesano janiya. Na sequesanoori seetanjuanaa cutara.

²⁷Majaari nojori niishiniu quiriquiaa Jesuuri na Que Pueyasojiniji pahuatariquiaa na sequesacari “cua Jiyarona”.

²⁸Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuj, majaari tama cua niishiriojosanojuaja cua miiniu quijia. Janiyari saaja cua Que niishitiojosano pahuatajani. ²⁹Cua Jiyaronaacuajaari cuata quia. Majaari cua Que cartenu janiya, pueyaracaanu cua miiniuucua na panishano.

³⁰Naa Jesu pahuatasacari pueya niqiaratej, queraatia pueyari jiyacari nocua tiuuri.

Pueyaso pueyajini pahuatasano, Sesaaca pueyajinijinio

³¹Jesuuri shusha nocua tiuunaa narta Judiocuaca sequeree:

—Niaa jaara seetanjuanaa cua pahuatasano tojjiaa quiri pueyaracaanu, niaari cua pueya quiniutianiya. ³²Niaa jaara naa miiritij, niaari seetanu rupajanaa niishijiaa quiniutianiya. Naacuajitij, niaari seetanjuanaa juhua cartesano pueya quiniutianiya, juhujaniya quijiaa nia quiniuria.

³³Narta Judiocuacaari Jesu riucaaree:

—Canaacuajaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴Jesuuri nojori sequeree:

—Seetanjuanaa nia sequeyanijia, cante sesa miijiacani, nojoriiri juhua poonijotesano pueya quia. Majaari na naata maninia miijia na quiniu. ³⁵Poonijotesano pueyanoori maja seetanjuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶Naajuhuj, janiya jaara nia jaariuutiare nia poonijotenajinijini, niaari seetanjuanaa cartesano pueya quiniutianiya, Pueyaso muerasura nia quiniuria cutara. ³⁷Janiyacuajaari niishiyani, niaari seetanjuanaa pa supuetana Abraham jihuacuajinio supueno pueya. Naajaa, niaari cua tojiniu paniaquiya. Niaari cunora cua monu pania. ³⁸Janiyari nia pahuatariquiaa cua Quejiniji cua niqishanoni. Niaari saniniuujia nia que sequesano miiquiaacuua.

³⁹Nojoriiri Jesu sequeree:

—iAbrahamcuajaari canaa shipinini!

Jesuuri nojori riucaaree saaja:

—Abraham jaara seetanjuanaa nia shipinini quiri, niaa mariqui maninia miijiaa quiricuara, taa Abraham quiquiaaricuanaa. ⁴⁰Saniniuujia, niaari cua monu pania saaja cua pahuatanuucua seetanu rupajanaa, cua tojishano Pueyasojiniji. Abrahamri maja naa na miiniu quijia cutara.

⁴¹Niaari saaja sesa miijiaa taa nia que miiquiaacuanaa.

Nojoriiri Jesu juaari:

—¿Casaa quia sequeyani? iCanaari maja saa maaji rasanajuani! iPueyasocuajaari canaa Que, maja tamonu!

⁴²Jesuuri nojori sequeree:

—Pueyaso jaara nia Que quiri seetanjuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninio quiquiaari. Cua Que Pueyasocuajaari cua jiyaroquiaari.

⁴³Cua rupaa nia tojiniu paniyaquishacari, niaari cunora cua pohuatasano niishyaquiya. ⁴⁴Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojouaari. Na sapojosacari, naa miyari sapojoua na quiniucua. Sapojonu niishiniuni, cunoori nojuajiniji supuequiaari. Niaari cunora nia que tojjiaaca. Nocuaji niaari naa sapojonuujuaacajuhuj. ⁴⁵Saniniuuja, cua pohuatasacari seetanu rupaajanaa nijaniya, majaari cucua nia tiuuniu quiquiaa. ⁴⁶¿Casaa cua miiquianu sesani? Cante na niishiyani cuaara sequeera. Saniniuuja, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari nijaniyani? ⁴⁷Cante Pueyaso pueyani, nojoriiri Pueyaso rupaa tojjiaaca cutara. Nijaniya saniniuuja, niaari na rupaa tojiaquiya, na muerasu nia quiaquishacari.

Jesucristoori tariucuaaanu quijiajuhuanaja Abrahamjiniji

⁴⁸Narta Judiocuacaari naa Jesu juaari:

—iCanaacuajaquiiri maninia sequeriquiaa quiajanijiniijini, quiaari Samaria jiyajiniijinio tahue, samaruraca pueyanotuhuj!

⁴⁹Jesuuri nojori riucaaree:

—Majaari janiya samaruracani. Janiya cutaraari saaja cua Que tojjiaaani. Niaari saniniuuja cua rerequetequiaacujua.

⁵⁰Naajaa, majaari cua tacaani naa nia sesacasacari janiya. Tamonu cutaraari quia, nojuajaari paniya pueya tojiniuria janiya. Nojuajaari cua rerequetejaca saniitioriquiano.

⁵¹Seetanujuanaa nia sequeyanijia, cante cua rupaa tojjiani, nojoriiri maja na shaajenu quiniutianiya.

⁵²Narta Judiocuacaari na sequeere:

—iQuiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujunaaajanaano. Quiaari saniniuuja quiarjia sequeyacuaja: “Cante cua rupaa tojjiani, majaari na shaajenu quiniutianiya”. ⁵³¿Quiaateeri jiyaniya quiaa socua cutara pueyano canaa supuetana Abrahamjiniji? iMaja! Nojuajaari shaajequiaari. Mariyata puetunu Pueyaso sequesano caminiujunaa pueyajanaari shaajequiaarijuhuaj. ¿Canteeri quiajaniani naa quia sequenuratej?

⁵⁴Jesuuri nojori riucaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. ⁵⁵Niaari seetanujuanaa na niishiyashijia. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuani. Janiya cutaraari na niishiyani. Janiyari cunora na rupaa tojjiani. ⁵⁶Nia supuetana Abrahamri timiquiaari na niishishacari janiya mijiria supuentaniyani. Nojuaja jaara cua niquiquiaari mijiria pueyano tari, jiyanoahua timiquiaariiri.

⁵⁷Narta Judiocuacaari Jesu juaari. Naa na sequeteeri:

—iJaj! Majaruhua juhuanajuaja cincuenta marijia shocojonu quiajaniani. ¿Taa quia sequeyarini quiaa canaa supuetana Abraham niquiquiaari?

⁵⁸Jesuuri nojori riucaaree:

—Janiya nia sequeya seetanujuanaani, Abraham raquishacarijia, janiyari tari quijiani.

⁵⁹Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicujaji jamaari saaja. Pueyaso Secojoua tijiniji tohuatamaari.

Jesu jeeacasacari cariojuaru namijia, naa rasanojuhuanajaj

9 ¹Tamacari Jesu rucanejosacari canaata, canaari cariojuaru pueyano niquirini, naa rasanojuhuanajaj.

²Canaari cunora Jesu nequesotareeni:

—Niishitiojonanaa, ¿casaara naa cunora pueyano rasaaquiaari cariojuaru, na queya miiniucua sesatee, tama sesa na miiniucuaajaaja soj?

³Jesuuri canaa riucaaree:

—Maja. Maja cunora naa na rasaaquiquiaari. Naa rasaaquiaariiri Pueyaso cumaaca niishishaanura, na namijia jaara jeeacasare niquijia na quiniuria. ⁴Juucua quishacarijia, pa tucuatere miiniu cua Jiyarona sequesano cua miiniuria. Paa quera niniyani. Jaara niniquii, majaari pa naata poonijionu quiniutianiya tari. ⁵Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶Naa Jesu sequenu nuhuajitij, nojuajaari jiyocua riocoree. Na riacaata coniquioreeri. Coriyacau mara ruporohua cariojuaru namijiaacuara. ⁷Cariojuaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyaroso cuari”. Cariojuaruiri cuarimia quiaaree. Tii na namijia jeequeseeri. Tariucua niquijiaari na tijajinia tiuquiriohua. ⁸Cariojuaru na quishacarijia, nojuajaari na miaajau na masetajara cumaneeca mashiniquijiojua quiquiaari. Puetunu pueyajanaari na niqitiujia naa na mashiniquijiosacari. Naacuajitij, nojuaja jaara niquijia quiquiaari, tarijia na niquinia pueyari, mariyata na shuriucua quinia pueyano, nojoriiri tama sequetoquiaarijaaja:

—¿Cante cunora pueyanojaari? ¿Majate noocuaja tarijia cumaneeca mashiniquijiojuatej?

⁹Noojiaqueya pueyari sequeere:

—iTaaquiririniij, nojuajacuaj!

Tamasacaari saniniuuja sequeerecujua:

—Nojuajaquinio naasucua. Juhua nojuaja niquishiyacuaj, majaari seetanujuanaa nojuaja.

Tarijia quijia cariojuaruiri saa sequeerejaa:

—Taaquiririniij, janiyacuaaquiniatejaj.

¹⁰Naaratej, pueyari na nequesotaree:

—iQuiaacuaja cariojuaru quijiaruhua! ¿Taa niquijia quia quiriouharini?

¹¹Nojuajaari pueya riucaaree:

—Cuno, Jesu jiyaniishano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, janiyari niquijia quiquini!

¹²Pueyari na nequesotaree:

—¿Teeteeri quia namijia jeecana pueyanoni?

Nojori riucaareeri:

—Johuj. Maja cua niishiniu.

Fariseocuaca nequesoreesacari na namijia jeeacasano pueyano

¹³Pueyari Fariseocuacaacua jiyataaree Jesu jeeacasano cariojuaru pueyano. ¹⁴Jesu jaara mara coniquioquiaari na jeeanura cunora pueyano namijia, cunora juucaari Judiocuaca samaatenu juuca quiquiaari. ¹⁵Nocuaji Fariseocuacaari tarijia cariojuaru quijia nequesotaree taa niquijia na quiriini. Nojuajaari nojori riucaaree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuajitij, janiyari quiarjia niquijia quiyani.

¹⁶Noojiaqueya cunora Fariseocuacajiniijioori saa sequeerejaa:

—Cuno pueyano, nio pueyano namijia jeeacaruaani, nojuaja maja Pueyaso Jiyaroso. iNojuajaari Moisés Rootasano tojishijia, naa na miiniucua samaatenu* juuca!

Tamasacaari saniniuuja sequeriquiaacujua:

—Jaara sesa mijia quiri, ¿maatucua casaara poonijioree Pueyaso cumaacatacuaraarini?

Naa nojori juayonuutanuucuatej, nojoriiri juhua raquitiiri.

¹⁷Nocuaji tarijia quijia cariojuaru nequesotaturohuariuhuj:

—Niquijia quia quishacari quiarjia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucaaree:

—Janiyara, nojuajaari Pueyaso sequesano caminiujuunia.

¹⁸Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyajuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyajuaru rasanohuhanani? ¿Taa quiarjia niquijia na quiriohuanini?

²⁰Na queyari cuno pojori riucaaree:

—Taaquiriirinij, nojuacuacaquinateja canaa niyanujuaj. Naa cariyajuaru rasaquiaariiri. ²¹Majaari canaa niishiniu cutara taa na quiriohua niquijiarani. Majaari canaa niishiniujuhuaj, cante na namijia jecarucuana. Nojuaja nia nequesotare, tari cumantumacuaja. Nojuajanaa cuara nia pohuataara cutara.

²²Na queyari naa riucaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuiquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuara tenujusaaria maja Pueyaso secojojua tiajinia na tiuquiniuria socua”. ²³Naaratej, na queyari naa narta Judiocuaca riucaquiaari: “Nojuaja nia nequesotare, cumantumacuaja”.

²⁴Cunora cuno Judiocuacaari socua piiriohua na namijia jecasano pueyano. Nojoriicua na nishacari, na sequetureeri:

—iPaacuajaari Pueyaso niquiara nia quiyani! Naaratej, isetanujuanaa canaa quia pohuatare cuno pueyanojini! iCanaa cutaraari niishiyani cuno pueyanoori sesa miijia!

²⁵Na namijia jecasano pueyanoori nojori riucaaree:

—Naajaa, jaara sesa miijia quiri, jaara maninia miijia quirijihuaj, maja cua niishiniu cuno. Janiya cutaraari niishiyani, iJaniyari tarijia niquiyashijia quiquiaarini! iJaniyari saniniujuia quiarjia niquijia quia cutarani!

²⁶Nojoriiri na nequesotaruahuaj:

—¿Taa na miirucuaa quiajanijiaarini, niquijia quia quiniuriani?

²⁷Narta Judiocuaca camarucua sequere saajaari:

—Janiyacuaja tari nia pohuatareeni. Majaari nia tojinii paniniu janiya. ¿Casaara nia paniya socua cua pacutenura sequenu niajaniani? ¿Niaate na pueyara quiniu paniya soj?

²⁸Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—iQuiaari cuno pueyano tojjiaacuaja! iCanaa cutaraari supuetana Moisés Rootasano tojjitajacani! ²⁹iCanaa cutaraari niishiyani Pueyasojuanaa Moisésua muetaquiaari na rootanura nojuaja! iSaniniujuia cuno pueyanoorijiatat, majaari quenaaja pa niishiniu teje na supuequiaarini!

³⁰Na namijia jecasano pueyanoori nojori riucaaree:

—iNiaaquiri mosanucua seetanujuanaa! ¿Majateeri nia niishiniu teje na supuequiaarini? iNojuajaari cua namijia jecarucuaa!

³¹iPaacuajaari niishiyani Pueyaso maja na tojinii quijia sesa miijia secojosano! iSaaja na timitajaca secojosano tojiya cutaraari, cante na panishano miquiaacuajani! ³²iMajaari quenaaja pa tojinii quijia tamonu pueyanojini, cante cariyajuaru namijia jecajani, naa cariyajuaru rasanohuhanaj! ³³Cuno pueyano jaara Pueyaso Jiyarosano quiaquiri, ¿taa cua namijia na jecarucuaacuaraarini?

³⁴Cuno pojoriiri na juaaniutia na sequeturee:

—iQuiaari sesa miijia rasaquiaari! ¿Quiaateeri jiyanojuua canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitajaca pueyajini.

Jesu tojjitashijia pueya juhua cariyajuaru

³⁵Jesuuri niishiquiaari cuno pueyanoori tenujusaarucuaa. Jaara na riurataquiaari, Jesuuri na sequere:

—¿Quiaate Pueyaso Niyanucua tiujuja?

³⁶Jesu sequereeri:

—Jiyaniijanaa, cua sequere canteeri nojuajani, nojuaja cua niishiniuria nocua cua tiuuniuria.

³⁷Jesuuri na sequere:

—Quiaacuaja na niquiyaruhua. Nojuajaari cunocuaja, quiata pocoojiyani.

³⁸Jiyacaritij, pueyanoori Jesu cariquimijia mojuquetaree. Na sequereeri:

—iQuiocua tiuyanijia, cua Jiyaniijanaa!

³⁹Na nuhuaji, Jesuuri cuniqui quiniaa pueya niquiara sequere:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariyajuaru quia, nojuajaari juhua namijiaraca quiniutianiya cucua na tiuushacari. Saniniujuia, cante jiyaniyani nojuaja niquijia cutara, nojuajaari juhua cariyajuaru tari jiyatesaaree, cucua na tiyuaquiniucua.

⁴⁰Tii quiniaa Fariseocuaca jaara tojjiaquiari naa Jesu sequesantej, nojoriiri Jesu sequere:

—Naa quia sequesacaritij, ¿quiaateeri sequeya canaari cariyajuaru jiyajihuaj?

⁴¹Jesuuri nojori riucaaree:

—Niaa jaara tama nia cuaqueyajaaja jiyatere juhua cariyajuaru cucua nia tiuuniuria, Pueyaso maara nia jiyanoori. Quiarjiani, tama nia sequenucuajaaja, “Canaa niquijia cutarani”, niaari jiyanooshoojua nioojia nia tacatoyaquiniucua.

Jesu pohuatasano miriqui borrego cojuanajini

10 ¹Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuatayaco tiuquiyajiani, nojuaja jaara tamocoji tiuquimia, cunoori nohuasejojua. ²Saniniujuia, cante tohuatayaco tiuquijia cutarani, cunoori borregohua camarujanaa cutara. ³Tohuataya cojuanaari tiotiu riataquiaa nocuaji. Borregohua camaruuari puetunu na seya sesacajanaa jiyaniquijia. Na borregohuari na rupaa niishijia. Na camaruuari naa na tohuatanijiojua puetunujanaa na matacainijia. ⁴Puetunu na borregohujanaa jaara tohuareetama, na camaruuari na puetaja. Na seyari na nuhuaji sacua, na camaruuari rupaa nojori niishishacari. ⁵Saniniujuia, borregohuari maja na nuhuajini quijia na niishiyashoo pueyano. Saaja nocuaji cocuatejari na niishishacari cunoori maja na camaruuari.

⁶Jesuuri naa pohuataquiaari miriqui nojori niquiara. Nojoriiri saaja niishiyajiquiaari casaa na niishitiojonu paniriquiaa nojorini.

Jesu Cristo, maninia pa cojuana

⁷Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuatayani, cua borregohua tiuquitanura cua Que Pueyasocua. ⁸Cante cua niyacarijia nijioquiaari coteenuni, nojoriiri sesa miijia quiquiaari, nohuasenujuua. Cua borregohuari namitia nojori numueejushiquiaari. ⁹Janiyari juhua tohuatayani. Cante janiyajini tiuquiyua cua Queecuanii, nojuajaari Pueyaso pueyanora jiyatesaanutianiya cutara. Cuno pueyanoori maninia cojuasano juhua borrego. Janiyari na tiuquiniutianiyanii, tii na quiniuria maninia cojuasano. Janiyari juuca na tohuatenutianiyanii, jiyasocua cua miaquetenura carijiniacuma.

¹⁰Nohuasejojuaari saaja tiuquijia borregohucua na nohuasenujuua, na pueconurajuahuaj. Naa na shaajaaja puetunujanaari. Janiyari saniniujuia niquiaarini cua borregohua cua jiyatenura pueyaracaanu quijiacara, seetanujuanaa jiyanojua shuquiriaatia quijia nojori quiniuria.

¹¹Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuara. ¹²Saniniuuja, borregohua camarujanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiujiaqueeri. Naa miijaari cuno borregohua quiyaquiniuucua na seyajanaa. Naacuajitij, sareeri borregohua soojua. Naa na cocuatajaari. ¹³Cuno borregohua cojuanaari naa neteja sareecuaji na tacayaquishacari seetanujanaa cuno borregohuacua. Nojuajaari saaja paniya na poonijiosano sami na niqitiosaanura.

¹⁴Janiya cutaraari maninia cojuaja borregohuani, na camarujanaa cua quishacari. Janiyari puetunu cua seyajanaa niishijiani. ¹⁵Nojoriiri cua niishiyajuhua, taa cua Que niishiya janiyacuaani, mariyata taa cua niishiya cua Quejanihuaj. Janiyari tama cua cuaqueyajaaja panitiaja cua borregohuacuarani. ¹⁶Janiyari socua borregohua jiitiaani. Nojoriiri maja nio cua borregohua maanujinijinio. Janiyari nojori rijiionutaniya niyarajuhua. Nojoriiri cua tojitiariquiano. Naacuajitij, puetunu cua borregohuajanaari jatiqui quiriquiano, niquiriyatu cojuanaracajuhua.

¹⁷Cua Queeri cua paniya naa cua panitiasacari tama cua cuaqueyajaaja cuno borregohuacua. Janiyari tama cua panishacarijaaja mosaanutaniyani, na nuhuaji cua samiitianuhua, pueyaracaanu quijia cua quiniuhua. ¹⁸Majaari quenaaja tamonu naata monu janiya cua paniyaquishacari. Janiyari cua panishacari cusionutaniya cua borregohuacuarani. Janiyari cumaacaracani nojoriicuaa cua cusionura. Janiyari cumaacaracajuhua cua samiitianuhua. Cua Quecuajaari naa cua miiniuria cua jiyaroquiaari mijiria.

¹⁹Narta Judiocuaca jaara tojiquiaari naa Jesu sequesantej, nojoriiri socua tama juayonuutaquiaarijaaja Jesuucua.

²⁰Queraatia pueyari jiyacari sequere:

—iCuno pueyanoori samaruraca! iMaja na tojinu, pueyanaa! iNajuhua pocuaano!

²¹Tamasacaari saniniuuja sequeriquiaacuaja:

—¿Samaruraca pueyanoteeri maninia casa pohuatajaara juhua nio pueyanojua? iMaja! ¿Pueyanoteeri na naata samaru cumaacata jeeccanu cariyajuaru namijiajaara? iMaja na naata!

Judiocuaca camarucua niqiniu paniyaquishacari Jesu

²²Tamacari, Jerusalén tiacajiniaari queranacusaariquiaa. Cunoori quiriquiaa pueya niishirojonura nojori juhua cuno juucajinia Pueyaso Secojoua tia jiyatequiaariuhua seetanujanaa juhua Pueyaso quiqiora na quiniuhua. Jiyacariiri shuniya quiriquiaa. ²³Jesuuri tii quiriquiaajuhua. Pueyaso Secojoua tiacijinia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojuajinia riujuuuniuquioriquiaa. ²⁴Jiyacaritij, canaa Judiocuaca camarucuaari tii na cosese. Naa na nequesotatureeri:

—¿Taacari canaa quia sequenutaniya socuaari cante quiajaniyani? iQuiaa jaara seetanujanaa Pueyaso Jiyarosano quiri, quiarijia canaa quia sequere!

²⁵Jesuuri nojori riucaare:

—Janiyacuaa tari nia sequenanuni. Niaari saaja na cuaracashitiqianu. Naa cuara niishiiria cante janiyani, nia niquishacari cua miishano cua Que sequesano janiya. ²⁶Niaari saaja cucua tiyauquiquiaa cua borregohua maanujinijinio nia quiyaquishacari. ²⁷Cua borregohuari cua rupaa tojjia cutara. Janiyari nojori niishiyajaanuhua. Nojoriiri cunora cua nuhuajiquiaa. ²⁸Janiyari pueyaracaanu quijia nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariutianu quiniutianiya nojori janiyajiniji. ²⁹Cua Queeri cua borregohua cua niqitioquiaari. Nojuajaari socua jiyanohua cumaacaraca tamasa cumaacaraca quijiacajiniji. Naacuajitij, maja quenaaja tamonu naata cua borregohua jaariutianu cua Quejiniji. ³⁰Janiya cua Queta, canaari juhua niquiriyatuni.

³¹Jiyacaritij, canaa Judiocuaca camarucuaari sai rijiorohuacuhua, Jesu na jacutajara juucua. ³²Jesuuri saaja nojori sequere:

—Janiyari queraatia maninia casa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³Nojoriiri Jesu riucaare:

—Majaari canaa jacunu quiniutianiya quiajaniya maninia quia miiniuucua. iCanaari quia jacunutaniyani sacuraatia quia pocuanuucua Pueyaso niqiarara! iQuiaari tama quia cuaqueyajaaja jiyateya juhua Pueyasora! iCunoori jiyanohua sesa! iQuiaacuajaari pueyano, juhua canaajuhua!

³⁴Jesuuri nojori sequere:

—Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quia tii:

“Janiyacuaari nia sequequiaarini, niaari pueyasohua”.

³⁵Paacuajaari niishiyani, Pueyaso Rupajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiitianaaracujani. ³⁶Naajuhua, Pueyasocuaari cua saquiriojoquiaari mijiria na jiyarosocori-quiano. Naa Pueyasojanaa Jiyarosano cua quishacariitij, ¿niaatucua casaara sequerene janiya Pueyaso niqiarara pocuaree sesani, cua sequesacari janiya Pueyaso Niyanuni? ³⁷Janiya jaara cua Que panishano miyaquiri na cumaacatani, janiya maara nia juayaquirini cucua nia tiyauquiniuucua.

³⁸Niaacuajaari cua Que cumaacata cua miishano niqiquiaa. Naa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Naa jaara niishiri puetunu cua miishanojuanaari cua Que Pueyaso cumaacata miishano, nia maara niishiri Pueyasoori coojia rupueja, janiyari noojia rupueyajaanuhua.

³⁹Jiyacaritij, nojoriiri socua Jesu quietunu paniriohuacuhua. Jesuuri saaja nojoriicuaa mashiqui.

⁴⁰Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini.

⁴¹Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaarijaaja Jesujiniji: —Tiuquinijiona Juanri maja quenaaja na miiniu quijia casa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujanaa quijia.

⁴²Naacuajitij, queraatia pueyari Jesuucua tiuquiquiaari tii, tee canaa quiriquiaacuajani.

Lázaro shaajenujini pohuatasano

11 ¹Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhua. ²Lázaro rimiatu Mariani, nojuajaari noo maajicuaa Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. ³Lázaro matasacari cusosu, na rimiatuhuari pueyano jiyarotiquiaari Jesu numootenuucua. Naaratej, cuno pueyano tiuquishacari Jesuucua, nojuajaari na caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴Jesu tojishacari naa cuno pueyano sequesantej, tii quiniaa pueya sequereeri, canaajuhua:

—Nojuajaari maja na cusonu quiniutianiya na shaajenua puetunujuanaa. Cuno cusonu na jiitiasanojinijini, pueyari Pueyaso cumaacata miishano niqiniutianiya. Pueyari cunora Pueyaso Niyanu maniniuhuaqueetanutaniya, cua Que Pueyasojuhua.

⁵Marta, María, Lázaronio, nojoriiri Jesu panishano pueya quijia. ⁶Naajaa, Jesu jaara numootesaaquiaari Lázaronijini, majaari nocua na quianu quiquiaari ritia. Caapiqui juuca

camueeree cuniquijiaaraari, tee canaa quiriqiaacuajani. ⁷Na nuhuaji, canaa na saquirojosano pueya sequereeri:

—Judea jiyajinia pa quiaarohuacuara socua.

⁸Canaari Jesu sequereeni:

—Niishitiojonanaa, cuniquijinio Judiocuacacujaari shusha naataja tii quia jacunu paniquianu. ¿Casaara socua tii quia quianu paniuhuariniuhua?

⁹Jesuuri canaa riuuaree miriqui:

—Janiyara, juuca juhuanajuaja. Juucaari maninia seetanujuanaa pa rucuanenonura. Paa jaara pananu tiuquiyaquishacarijia rucuanenonura, paari maninia niquiya pocujajini. Majaari pa tiuriini. ¹⁰Paa jaara ninishiqui rucuanenonura saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriqiaa Judiocuaca niquiara na rucuanenonura, na mosaanu juuca quiyaquishacarijia. ¹¹Na nuhuaji, Jesuuri naa canaa sequeree socua:

—Pa rupena Lázaro tari maquequee. Janiyari na niucujanuucua quianutaniyani.

¹²Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacuajiti paari niishiyani naatanutaniuhuaacujaajaqui. ¿Paatucua casaara najuhuaa nocua quiaareni?

¹³Naa Jesu pohuatasacari canaa Lázarojinijitij, canaa sequeriquiaa juucaari Lázaro tari macu quiriqiaa. Canaari saniniunijia jiyaniiriquiaani Jesu naasucuaari canaa pohuatariquiaa Lázaro nareja maqueriquiaa. ¹⁴Nocuaji Jesuuri maatia canaa sequeree:

—Lázaro tari cusoyarucuaa. ¹⁵Janiyari timiyani tii quia quiaquiniuucua Lázaro quishacarijia saminio. Naa quiarjia macu na quishacarijia, niaari socua jiyajeneta casa cuu miishano niquiniutianiya, seetanujuanaa cucua nia tiuuniuria cutara. Quiarjia cutara, nocua pa quiaare.

¹⁶Jiyacarijij, Tomásri canaa narta saquirojosano pueya sequeree:

—Pa Jiyaniijia pa quiaarejuhuaj, nata pa cojiritiasaanura pueconu.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijiojua

¹⁷Canaa jaara tiuquijioseequiaarini, Jesuuri pohuatasacari Lázaro tari cuatro juuca shocotejoriquiaa raaco na niasaanujini. ¹⁸Betania tiacaari catecaja Jerusalén tiacajini. (Nareja media hora* paa jaara ritia rucuaneyareni). ¹⁹Naaratej, queraatia narta Judiocuacacari quiojoquiaari Marta, María tijinia, nojori na cumanijianura na nanu nuhuaji. ²⁰Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María ninu quiriqiaa cutara. Tijiniaja quiriiri. ²¹Canaacua Marta tiuquishacari, nojuajaari Jesu sequese:

—Jiyaniijianaa, iquiaa jaara niya quiquianu, cua nanu maara shaajeyaquiquianu! ²²Naajaa, janiyari niishiyani quiaa jaara Pueyaso secojore, Pueyasoari quiaa secojosano tojiniutianiya.

²³Jesuuri Marta sequeree:

—Quia nanucuaa samiitianutaniuhua.

²⁴Martaari na riuuaree:

—Taaquiriirinj, janiyacuaa niishiyani nojuajaari samiitianutaniuhua macunucua samiiticosacariuhua jiya puequesacari.

²⁵Jesuuri na sequeree:

—Janiyacuaaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. ²⁶Cante cucua tiuuri saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷Nojuajaari Jesu riuuaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, noj tariucuaaanu sequesaaquiaari mijiria niriquianotej.

²⁸Naa Marta riuuanu nuhuaji Jesutej, na tijinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

²⁹Naa María tojishacari Marta sequesanootej, ritia sanequeeri.

Jesuucua nimiaari tee canaa quiriqiaacuajani. ³⁰Jesuuri juhuanajuaja maja na tiuquitianu quiquiaari canaa cuno tiacajinia. Canaari tiaca shuriucua quiriqiaajaani tee Marta naacuquiaari canaacuajani, Jesuucua na nishacari. ³¹Nojori cumaniijianaa pueya jaara María niquiquiaari ritia tohuataano tijiniji, nojoriiri na jiyaniquiaari na nanu raajinia nujuquenucua quiaa naasucua. Naaratej, nojoriiri na nuhuaji quiaaree.

³²María tiuquishacari canaacua, Jesu cariquimijia mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

³³Jesu niquishacari María nujuqueyano, mariyata nata quiniaa nujuqueyanujuhuaj, Jesuuri nojori taraajetaree.

³⁴Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

³⁵Jesuuri nujuquesee. ³⁶Tii quiniaa Judiocuaca niquishacari Jesu nujuqueyano, tama sequetooreejaarijia:

—iNia niquiri! Jiyanohua Lázaro panijiaquii.

³⁷Noojiaqueya cuno pojorijiniinijioori sequeriquiaajuhua:

—Jesu jaara cariyujuaru namijia jeecacanicuaa, maara Lázaro naataniquianujuhuaj maja na shaajenura.

Jesu samiitianishacari Lázaro

³⁸Jesuuri jiyanohua na taraajenuta raa jiyajiria catecanoquiaari, canaajuhua. Raari puereetua saajia mishiquiosano quiriqiaa. ³⁹Jesuuri pueya sequeree:

—iSaajia nia ruutiniri tamocora!

Martaari Jesu sequeree:

—iJiyaniijianaa, cuatro juuca tari na shoconujia! iTari mocuaatia jaaniuya naasucua!

⁴⁰Jesuuri Marta sequeree:

—Janiyacuaa tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹Jiyacarijij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quena, quia timitiaanjia. Quiaari tari cua sequesano tojiriucuaacua. ⁴²Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³Naa Jesu sequenu nuhuajitij, jiyanohua na rupaa paaretareeri. Naa sequereeri:

—iLázaronaa, quia tohuatama!

⁴⁴Macuuri tariucua saminio tohuatamaa. Na juaashiquiaa, na nihuacaari jiuniosano quiriqiaajaa. Na nacaari puetunu na jiquiocotajanaa mishiquiosano quiriqiaajuhua, toquerata morosano. Jesuuri pueya sequeree:

—Nia saacatare, cuara rucuanera.

Judiocuaca camarucua rojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵Naa Jesu samiitianishacari Lázaro, queraatia narta Judiocuacacari nocua tiuquiaari, noj pojori canapuee Maríacua nijioquiaari na cumanijianuracuajani. ⁴⁶Noojiaqueya cuno Judiocuacajiniinijioori Fariseocuaca quiojoquiaari nojori pohuatanura Jesu miishano. ⁴⁷Naaratej, Fariseocuaca, pueyacuara secjonaa jiyaniijanucuanio, nojoriiri rerejoquiaari

puetunu Judiocuaca camarucatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niquiara. ⁴⁸Paa jaara nareja na shanacure naa na miiniuriatej, ipuetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijia socua na jiyatenutaniya. Naaratej, pa jiiitanaa Romano pueyari pocua nijionutaniya Pueyaso Secojoua tia nojori niyartanura, pa pueya na pueconurajuhuaaj.

⁴⁹Caifásri tii quiriquiaajuhuaaj. Nojuajaari canaa pueyacuara secोजना jiyaniijiajanaa quiriquiaa cuno marijiaara. Jiyacaritij, nojuajaari narta camarucua sequere:

—iNiaaquiiri niishiyashijiaca seetanujuanaa! ⁵⁰¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuaana puetunu pa pueyajanaa puecoosaanura.

⁵¹Caifás sequesanoori maja tama na sequesanojuaja quiquiaari. Pueyacuara secोजना jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani. ⁵²Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojoso-pueyapuecuarajanaajuhuaaj, tee tiquiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqiu na qitiuniuria juhua niquiriyatu maanu. ⁵³Naacuajitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

⁵⁴Nocuaaji, Jesuuri maja tari na rucuanenonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriucua. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricujani. Nojoriiri naa miiquiaari juhuajaniya nojori queranacunura Pueyaso niquiara Pascua juuca. ⁵⁶Pueyari tii Jesu pajenuuriquiaa. Pueyaso Secojoua tijania nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyate-nojotij, maja soj?

⁵⁷Pueyacuara secोजना jiyaniijianucua, Fariseocuacano, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

María totasacari na shanhua jaanutaja Jesuucua

(Mt 26.6-13; Mr 14.3-9)

12 ¹Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitianiqaaricujani. ²Cuno tiacajinijinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatano. ³Jiyacaritij, Marfari Jesuucuaara pataree na shanhua jaanutaja. Cunoori “nardo” jiyaniishano nataujiniji shipinishano quiquiaari. Jiyanoohua queraatia cumaneecata masano. Puereetuua motiiquio cajiniocua puecariquiaari cuno shanhua jaanutaja. Marfari Jesu niuhuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanhua jaanuriquiaa. ⁴Naa María miishacaritij, niquiriyatu canaajinijinio Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequere:

⁵—¿Casaara cuno shanhua jaanutaja niqutioyaquishaaree queraatia cumaneecarani, casamiijiunucua pueya niqutiojosocoriquianoni? ¡Jaara masenu panishaare, maara niqutiosaare juhua niquiriyatu marijiaara pueyano poonijionu sami!

⁶Naa Judas sequesacaritij, majaari seetanujuanaa na taraajenu quiriquiaa casamiijiunucua pueyacuara. Naa sequereeri saaja cumaneecaacua jiaatiaja na quiniucua, nohuasejojua na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejojua, pueya niqutiojosanojiniji canaara. ⁷Jesuuri saaja Judas sequere:

—Nareja quia niquiri. Nojuajaari nio shanhua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸Casamiijiunucua pueyari pueyaracaanu niaata quiriquiano cutara. Saniniuujia, janiyari maja pueyaracaanu niaata quiriquianoni.

Pueyacuara secोजना jiyaniijianucua roojotoosacari Lázaroocuaari

⁹Queraatia canaa Judiocuacaari niishiquiaari Jesu Betania tiacajinia quiriquiaa. Cunora, nojoriiri nocua quiojoquiaari na niqiniucua, Lázaro niqiniucuaajuhuaaj, teyano Jesu samiitianiqaaricujani. ¹⁰⁻¹¹Jesu samiitianiiniucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa pueyacuara secोजना jiyaniijianucuaari roojotooquiaari Lázaro na motunurajuhuaaj.

Juhua Jiyaniijiajanaa Jesu tiuquishacari Jerusalén tiacajinia

(Mt 21.1-11; Mr 11.1-11; Lc 19.28-40)

¹²Cuno queraatia pueya, tari Jerusalén tiacajinia quiriquiaacua Pascua juucara queranacunurani, nojoriiri niishiquiaari Jesu tariqui tiuquiniutianiyajuhuaaj. ¹³Nocuaaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacooriquiaajaariuhua nojori shuquiritiasacari Jesu:

—iPocuaaji Tacuna! iPocuaaji Tacuna! iCuaara shuquiriaatia quiriira pa Jiyaniijia, teyano Pueyaso jiyaroquiaari pocuacuajani! iNojuacuajaari Israel pueya Jiyaniijiajanaa!

¹⁴Jesuquiri jiyacari burro niquiojua riuriatamaa. Tari na nijinia cajiriquiaari, taa tariucuaanu Pueyaso Rupaajinia naajiotasano quiyacuajani. ¹⁵Naa sequeyari:

“iSión* tuhuananuucua quiniaa pueyanaa, maja puerenu! iNia niquiri! iNia Jiyaniijia cumaji niya niaacua! iBurro niquiojua nijinia cajiyari!”

¹⁶Jiyacaritij, majaari canaa niishiniu quiriquiaa naa canaa tiuquishacari canaa Jiyaniijia Jesutej, canaari nio tariucuaacuanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiqaariuhua, canaari jiyacari shusha niishiquiaarini cuno naajiotasanoquiri Jesujiniji quiquiaari.

¹⁷Cuno pueya, Jesu samiitianishacari Lázaro niqiquiaarini, nojoriiri pueya pohuatariquiaa taa Jesu jiiquioquiaari Lázaro na raacoji na tohuatanurani. ¹⁸Queraatia pueya niishishacari naa Jesu miishano na cumaacatej, nojoriiri Jesu naacunuucua nijiyaree. ¹⁹Nocuaaji, Fariseocuacaari tama sequetooriquiaajaaja:

—iCanaacuajaari cunora nia sequequiaani pa morejanaa! ¿Niaate na niquiya? iPuetunu pueyajanaari cuno pueyanooocua pacuree, na pueya nojori quiniuria!

Grecia jiyajinijinio taucuaa pocoojonu panishacari Jesuta

²⁰Grecia jiyajinijinio taucuaacari Jerusalén tiacajiniara nijioquiaarijuhuaaj Pueyaso niquiara nojori queranacununura Pascua. ²¹Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniani.

²²Jiyacaritij, Felipeeri Andrés sequeese cuno pojori sequesano nojuaja. Na nuhuaji, Andrésri Felipeeta quiaaree Jesuucua. Nojoriiri Jesu pohuataseejuhuaj. ²³Jesuuri naa nojori riucaaree: —Quiarrijiani, tama janiyajaarijia mosaanutaniya pueya nitini. ²⁴Seetanujuanaa nia sequeyanijia, sohuajajau jaara raama jataaquishaare, pueyaracaanu niqijijajau quiniutianiya-ri. Saniniuuujia, jaara natasaare juhua na moquenura, saaja moritianutaniyari queraatia na muetunura. ²⁵Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuuujia, cante tama na cuaqueyajaaja panitijia na tojiniuria janiya mijiriani, nojuajaari pueyaracaanu shuquiriaatia rishijia jiyatesaanutaniya. ²⁶Cante quiria poonijionu paniyani, cuara seetanujuanaa cua tojjijia quiiria. Tee cua quiniutianiyacuani, cua tojtijajacaari tii quiniutianiya-juhuaj. Cua Queeri cua tojjijia timitianutaniya. IJiyanhua maninia nojori miiniutianiyajaariuhuj!

Jesu pohuatasacari nojuaja mosaanutaniya

²⁷Quiarrijiani, janiyari jiyanhua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niqiaari mijiriani. ²⁸iCua Quenaa, janiya cuara miishiiriaqui taa quia paniyacuajani, pueya niishiniuria quiaari jiyanhua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

²⁹Cuno pueya, canaata tii quiriqiaa Jesutani, nojori tojishacari Pueyaso pocuaano, nojoriiri sequeturee:

—iMiacanacuaja cuno tojishaareeni!

Tamasacaari saniniuuujia sequereecujua:

—iPueyaso serucuaja nocua pocuareeno!

³⁰Saniniuuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriqiaa. Cunoori nia tojihocoriquiano quiriqiaa, nia niishiniuria cua Queeri cua tojiquiaa cua secojosacari nojuaja.

³¹Quiarrijiani, mijiria quiniaa miishacari naquiya janiya, nojoriiri saniniuuujia saniitiosocoriquiano jiyatesaaree tari. Naajuhuj, mijiria jiyaniijia Sesaacaari jataaanutaniyajuahuaj, maja cumaacaraca na quiniuria socua. ³²Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

³³Naa Jesu sequesacari, canaa niishitiriiri taa pueya monutaniya nojuajani. ³⁴Tii quiniaa pueyari na riucaaree:

—Canaacuajaari tariucuacaanu Pueyaso Rupaajinjii niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajaniyarijiataj, ¿casaara quia sequeyarinijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanoori?

³⁵Jesuuri nojori sequere saaja:

—Janiya, nioojia cuhuatanani, janiyari niaata quiniutianiya-jaara rupaquijiani. Nocua nia tiuuri juhuacarijia, ninishiqui quiyaquishacarijia. Cante ninishiqui rucuanajojuani, nojuajaari maja na niishiniu tee na quiaani. ³⁶Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijijia nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaji jamaashiiri.

Judiocuaca tiyuaquishacari Jesuucua

³⁷Jesuuri jiyanhua queraatia jiyajeneta na cumaacata miishano miiquiaari pueya niqiaara. Nojoriiri saaja nocua tiyuaquiquiaari. ³⁸Naacuajitij, tariucuacaanu Pueyaso sequenu

panishano caminiujuunia Isaiás pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? iShaaqui! ¿Cante niishirijiaaniuhuj, jiyajeneta casaa nojori niquishanoori seetanujuanaa quia cumaacata miishano quiriqiaa? iShaaqui!”

³⁹Naacuajitij, majaari nojori naata tiuuniu quiquiaari Jesuucua. Isaiási naa naajiotaquiaarijuhuaj:

⁴⁰“Pueyasoori nojori jiyateree juhua nimishituri, maja nojori niqiniuria na namijiaata. Nojori niishitijia cushitioorejaariuhuj, maja nojori niishiniuria nojori jiuujiaata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojoriujuhuaj”.

⁴¹Supuetana Isaiási naa caminiujuquiaari Pueyaso niishitishano nojuajatej, Jesu na niqiniuuucua na shacantuuca cumaacajinia quiyano. Naa na pohuatasacari, nojuajaari juhuacarijia Jesujinjii pohuatariquiaa.

⁴²Naajaa, queraatia narta Judiocuacaari Jesuucua tiuquiaari. Queraatia canaa jiyaniijianucuaari nocua tiuquiaarijuhuaj. Cuno jiyaniijianucuaari maja na pohuatanu quijia pueya niqiaara, Jesuucua tiuujia nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujereeri maja socua nojori tiuquitianura Pueyaso secojojua tiacajinia. ⁴³Nojoriiri saaja narta pueya shuquiritasano pueya quiniu panijia, maja Pueyaso shuquiritasano cutara.

Pueya tojtijaaquiniucua Jesu sequesano, nojoriiri saniitiosariquiano

⁴⁴Jesuuri jiyanhua na rupaa paaretaree. Naa sequereeri: —iCante cucua tiuuriini, majaari saaja na tiuuniu cucua!

iCua Queecua tiuuriijaariuhuj, cante cua jiyaroquiaaricuajani! ⁴⁵iCante cua niqiriini, nojuajaari cua Jiyarona niqiriijuuhuj!

⁴⁶Janiyari mijiria niqiaarini cua cuhuatanura nijaniya. Naacuajitij, cante cucua tiuuriini, majaari tari na quiniu ninishiqui. ⁴⁷Pueyano jaara cua rupaa tojiriqiaa najuhuanaj, janiyajanaari maja nocuara cua saquirojotanu quiniutianiya na saniitiosaanura. Majaari cua ninu quiquiaari mijiria, pueya cua saniitionura. Janiya cutaraari niqiaarini nojoriicuaji cua tacunura. ⁴⁸Cante cua ruuretaja saajani, cua sequesano tojiaquiyajaariuhuj, nojuajaari tari nocuara saquirojotana jiiitaa na saniitiosaanura. Nojoriiri cua sequesano cutaraari tama nojoriicuara saquirojotariquianojuaja nio jiya puequesacari. ⁴⁹Cua pohuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰Janiyari niishiyani cante cua Que rupaa tojjijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacuajani.

Jesu jeequejosacari na saquirojosano pueya niohuaca

13 ¹Jesuuri canaa na saquirojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaari quera na tiujiasacari canaa mijiria, na Queecua na tacanuhua. Nojuajaari canaa paniriqiaajaa, taa canaa na paniquiaari pueyaracaanucujani, mijiria na quishacari canaata.

²Cuno niucuaja, Jesuuri canaa na saquirojosano pueyata miaqueriquiaa. Sesaacaari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jiyaniishano pueyano niyanu quiquiaari. ³Jesuuri niishijia nojuaja seetanujuanaa Pueyasojinjii niqiaari. Naajuhuj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu

casaa jiitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴Jiyaniijajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. ⁵Na nuhuaji, mohuaca shuurii tohuatashijiniaari. Canaa niohuaca jeequejoriqiaari juhua tiaco seru. Na nuhuaji, na sacuanijariquiaajaariuhua na cajiniocua na camarucutesano cuaqueya tuujutajata.

⁶Na jeequenu panishacari Simón Pedro niohuaca, Pedroori saaja Jesu sequere:

—Jiyaniijjanaa, ¿taa quia miyani? ¿Quiaateeri cua niohuaca jeequenutaniya?

⁷Jesuuri Pedro riucuaare:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸Pedroori Jesu sequere:

—iCua Jiyaniijjanaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucuaare:

—Janiya jaara quia niohuaca jeequejiaquirini, majaari cua pueyano quia quini quiniutianiya.

⁹Simón Pedroori na sequere:

—iJaara na quirij Jiyaniijjanaa, maja saaja cua niohuaca jeequenucuarajaj! iQuia jeequerejuhua cua juaashiquiaca, cua nacanio!

¹⁰Jesuuri na sequere:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quia. Puetunu nijaniyajanaari tari jeequejosano quiyacuaja. Saa niquiriyatujaaari jeequesoo quia saniniujia.

¹¹Jesuuri tari niishiquiaari cante na quietanutaniya na paraano. Nocuaji sequeriquiaari: “Niquiriyatu pueyanoori jeequesoo quia cutara”.

¹²Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajaniija, taa nia jiyaniiquiaa janiyacujani. ¹⁴Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhua, naa nia miiriquia niarta Pueyaso muerasujuhua. ¹⁵Janiyari naa miiriini, cua niishitiojonura nijaniya, naa nia miitioonurajuhua taa cua miirii nijaniyacuaani. ¹⁶Seetanujuanaa nia sequeyanijia, seruuri maja socua tojishano quijia na camarnujiniji. Naajuhua, jiyarosano pueyanoori maja socua tojishano quijia na jiyaronajiniji. ¹⁷Niaa jaara cua rootasano niishiri, niaari shuquiriaatia quijia quiniutianiya niaa jaara na tojijiaa quiri.

¹⁸Shusha cua sequesano nijaniyani, cunoori maja puetunu nijaniyaranajuanaa. Janiyacuajaari niishiyani canapue cua saquiriojoquiaarini, taamueca pueyate nijaniyani. Naacuajitij, tariucuaaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojiyajuhua. Cante cua tojijiaa quiriini, nojuajaari cua Jiyarona tojijiaa quiriijuhua.

Jesu pohuatasacari, Judascuajaari na paraa na quiateriquiano
(Mt 26.20-25; Mr 14.17-21; Lc 22.21-23)

²¹Naa Jesu sequenu nuhuaji canaatej, jiyanohua na taraajenuta naa canaa sequereeri:

—Seetanujuanaa nia sequeyanijia, niquiriyatu nijaniyajiniji-nioori cua paraa cua quietanutaniya.

²²Canaari jiyacari tama niqutiooreejaanijia. Majaari canaa niishiniu quiriquiaa canajiniji naa Jesu sequeriquiaani. ²³Jiyacaritij, janiyari na shuriucuaaji cajiriquiaa miaquenujuajiniani, na panishano pueyano cua quiniucua. ²⁴Naaratej, Simón Pedroori cua mashiniquiri sanaa cua nequesotanura Jesu, canajiniji naa na sequereeni. ²⁵Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijjanaa, ¿canteeri naa quia miiniutianiya?

²⁶Jesuuri cua riucuaare:

—Janiyari pan rau piquiojonutaniya caacajiniani. Cana cua niqutionutaniya, nojuajaari cuno.

Jesuuri jiyacari pan rau piquiojoree. Judas Iscariote na niqutiooreeri. Nojuajaari tamonu Simón jiyaniishano niyanu.

²⁷Judas masesacari cuno pan rau, Satanásri noojiajinia tiuquiqui. Jesuuri jiyacari Judas sequere:

—Cuno, quiaa na niishiriojiya miiniuni, quioqua ritia miirinoj.

²⁸Canaa na saquiriojosano pueya nata miaquenuriquiaani, majaari quenaaja canaa niishiniu quiriquiaa casaara naa Jesu sequere Judasni. ²⁹Judasri canaa cumaneeca cojuatana quijia. Naaratej, noojiaqueya canaajiniinooori jiyaniiriquiaani Jesu naasucua na jiyaroriquiaa socua casaa na masenura canaa queranacunuutajara, casamiiuniucua na niqutiojonura cumaneeca soj. ³⁰Judas jaara masequiaari Jesu niqutiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹Judas tohuatanu nuhuaji, Jesuuri canaa sequere:

—Quiarijia cua miishanojiniji, janiyari maniniuhuaqueetasanutaniya. Pueyasoori jiyanohua

maniniuhuaqueetasanutaniyajuhua, naa cua miishanojiniji.

³²Pueyaso jaara maniniuhuaqueetasaare naa maninia cua miiniucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiya.

³³Quiquihuaniojuanaa, janiya rupaquijia niaata quiniutianiya-jaarani. Taa cua sequecanu parta Judiocucacuaani, janiyari naa nia sequeyajaaniuhua. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴Quiarijia nia niishitiriiria nio quiarinio rootasano. Nia tojiri. iPanitiojuaca nia quiri! Naatej, taa cua paniquiaacuaa nijaniyani, naa nia panitioorejuhua. ³⁵Niaa jaara naa panitiojuaca quiri, puetunu Pueyaso niishiyashijiaa pueyajaani naacuaji niishiniutianiya, niaari cua tojitiajaca pueya.

Jesu pohuatasacari Pedro nocuaji seetanutaniya

(Mt 26.31-35; Mr 14.27-31; Lc 22.31-34)

³⁶Simón Pedroori jiyacari Jesu nequesotaree:

—Jiyaniijjanaa, ¿tee quia quianutaniya?

Jesuuri na riucuaare:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷Pedroori na sequere:

—Jiyaniijjanaa, ¿casaara quia sequeyarini, quiarijia cutara maja cua naata quianu quiaata? Janiyacuaja tama cua cuaqueyajaaja tarinijotaaree quiocurani.

³⁸Jesuuri na riucuaare:

—¿Naatee? ¿Quiaate tama quia cuaqueyajaaja tarinijotaaree cucua? Janiyari seetanujuanaa quia sequeyani: juhuaquenu panishacari caacaraja niunijiaquishacarijia, quiaari jiyacari cucuaji seetanu pacutejonutaniya tari.

Jesuuri juhua nuu Pueyasocua

14 ¹Jesuuri naa canaa sequere socua:

—Maja nia tacaani, pueyanaa. Nioojia nia cajitiri. Saaja Pueyasocua nia tiuuri. Cucua nia tiuurijuhua. ²Cua

Que tiaari puereetuca. Queraatia quiquoori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. ³Cua jeenucuanu nuhuaji nia quiquiora, janiyari niaacua tacatenutaniuhuani, cua rijionuhua niajaniya, cuata nia quiniurajuhua tee cua quiniutianiyacuaani. ⁴Niaacuajaari cua quiquojinara neteja nuu niishiya, tee cua quianutianiyacuaani.

⁵Tomásri Jesu sequeere:

—Jiyaniijianaa, imaja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶Jesuuri na riucaaree:

—Janiyacujaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijajuhua. Majaari pueya naata Pueyaso rupeenu tamajaaja. Saaja janiya cutaraari pueya rupeuteja Pueyasoni, nojori tiushacari cucua. ⁷Niaa jaara seetanujuanaa cua niishiquiaaricuaa, niaa maara cua Que niishirijuhua. Seetanujuanaa, niaari tari na niishiyacuaja. Niaari na niquiquiaajuhua.

⁸Felipeeri na sequeere:

—Jiyaniijianaa, quiaa jaara canaa niquitiri quia Que Pueyaso, canaacua panaatia quirohuanu.

⁹Jesuuri Felipe riucaaree:

—Felipenaa, janiyacujaruhua pueyaracaanu niaata quiquiaa juucuanu. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajariuhua. ¿Casaara quia sequeya cua niquitiniuria cua Que nijaniyarini? ¹⁰¿Majateeri quia tiuuni cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacujua? Canaari maja rimiajatani. Nio, cua sequesano nijaniyani, cunoori maja tama cua niishishanojuaaja. Cua Que, coojiajinia quiyani, nojuajaari na panishano miitiquiaa janiya. ¹¹Cucua nia tiuuri cua sequesacari nijaniya, janiyari cua Que jiuujiajinia quiyani, cua Queeri saniniuujia coojiajinia quiyacujua. Niaa jaara cua sequesanoocua tiuuni paniaquiri, cucua nia tiuuriqui na cumacata cua miiniucua nia niquiara. ¹²Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhua. Cua tacasacariuhua cua Que shuriucua cua quiniuhua, cucua tiuujiaacari cua cumacata seetanujuanaa socua jiyajeneta casa miiniutianiya cua miishanojiniji. ¹³Seetanujuanaa nioojiajinia cua quishacari, janiyari niaara miiniutianiyani puetunu nia masanojuanaa nia secosacari cua Que. Naacuajitij, pueyari cua Que timitianutaniya, nojori niishishacari cua Queeri jianohua maninia mijia. ¹⁴Nioojia rupetoosacari coojiata, janiyari puetunu nia masanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵Niaa jaara seetanujuanaa cua panijiaacari quiri, niaari cua rootasano tojitiajaca quiniutianiya. ¹⁶Naajuhua janiyari cua Que secosonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriqiano. ¹⁷Nojuajaari Pueyaso Sohuanu, seetanu rupaa jitianajanaa. Pueyaso tojiyashijiaacari pueyari maja na naata cuno Sohuanu na jitianu, nojori niquiaquiniucua nojuaja, na niishitiyaquiniucua nojuajuhua. Niaa cutaraari na niishijia. Nojuajaari niaata quiyacuaja. iPueyaracaanu nioojiajinia quiriqianojariuhua!

¹⁸Majaari seetanujuanaa cua tiujianu quiniutianiya nijaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhua. ¹⁹Pueyaso tojitiaashijiaacari pueyari quiari naataja cua niquiaquiniutianiya socua. Niaa cutaraari cua niquijiaacari quiniutianiya.

Samiitianijiojua cua quiniucua, niaari pueyaracaanu quijiaacari quiniutianiyajuhua. ²⁰Jiyacaritij, niaari niishiniutianiya janiyari cua Que jiuujia rupuejani, niaari coojia rupuejajuhua. Janiyari saniniuujia nioojiajinia quijiani. ²¹Cante cua rootasano niishijiani, nojuaja jaara na tojijia quiriujuhua, nojuajaari cua panijia cutara. Cante cua panijiani, cua Queeri na panijia quiniutianiyajuhua. Janiyari na panijia quiniutianiyajuhua. Janiyari cua panijiaacari niniutianiyani, seetanujuanaa na niishiniuria janiyari nata quiyani.

²²Canaa cojinia Judasni, nooj, Judas Iscariote sesaanucatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyari, maja puetunu mijiria quiniaa pueyacuajanaa?

²³Jesuuri na riucaaree:

—Cante cua panijiani, cua rootasano tojijiajariuhua. Cua Queeri jiyano pueyano panijia. Naaratej, canaari nocua niniutianiyani, nioojiajinia canaa quiniuria, canaa quiquiora canaa jiyatenura nojuaja. ²⁴Saniniuujia, cante cua paniaquijiani, jiyano pueyari cua rootasano tojiyashijiaacariuhua. Puetunu cua rootasanojuanaa, niaa na tojiqiaani, cunoori maja tama cua niishishanojuaaja. Cunoori cua Que niishitishano janiya, cante mijiria cua jiyaroquiaaricujani.

²⁵Janiyari puetunu niojuanaa nia pahuataani, niaata cua quishacarijia mijiria. ²⁶Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitiojonu panishanojuanaa nijaniya. Naajuhua, nojuajaari nia niishitiojonu puetunu tari cua pahuatasano nijaniyajanaa.

²⁷Janiyari nioojia cajitiniutianiyani. Janiyari coojia nianutaniya nioojiajiniani, juhuanijia quijiaacari nia quiniuria taa cua quiyacuani. Naacuajitij, niaari seetanujuanaa juhuanijia quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaani. Majaari puerenujuhua. ²⁸Tari nia sequeerecujianijia: “Janiya quera quiohuani. Janiyari na nuhuaji tacatenutaniuhuani niaata cua quiniuria”. Niaa jaara seetanujuanaa cua panijiaacari quiriqia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijiajanaa cutara janiyajiniji. ²⁹Janiyacujaari juhucarijia nio nia sequeyani. Naacuajitij, niaa jaara niquiri tohuatayano cua sequesano nijaniya, niaari niishiniutianiya puetunu cua pahuatasanojuanaari seetanujuanaa.

³⁰Majaari puera cua pocojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniaquajani. Nojuajaari Pueyaso tojitiaashijiaacari jiyaniijia. Pueyaracaanu cua Que Pueyaso tojijia cua quiniucua, cua Paraca maara naquiya cua miyaquiri janiya jaara cucua na shanacuyquirini. Na cumaacari maja na shocotanu cua cumaca cutara. ³¹Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojijiani, na panijia cua quiniucua.

‘Nia sanetare. Niiquiji pa quiaare.

**Jesu pueyari juhua Jesu cashacucua,
Jesu quishacari juhua neyona**

15 ¹Jesuuri naa pahuataquiaru socua canaa niquiara: —Janiyari juhua uva* jiyonani, cua Que natau. ²Cua pueyari juhua cua cashacucua. Tamonu cua cashacucujinijini jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. ³Nia tojiniucua cua rootasano, niaari tari juhua nacareetasano quiya. ⁴Pueyaracaanu coojia nia rupeere, taa cua rupeya nioojiaacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhua, majaari nia naata muetujua quini, niaa jaara coojia rupeyashijiaacari quiri.

⁵Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya nijaniyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju.

⁶Cante cua rupueyashijiani, nojuajaari taraatia miishaanutianiya juhua uva cashacucua piyotasano neyonajiniji, tamocora jaquerootasano. Jaara sorere, tatucusaarohuari manijinia quejosocoriquiano. Tii cateyari.

⁷Niaa jaara coojia rupuejaca quiri, niaa jaara cua rootasano tojjijaca quiririjuhuj, puetunu nia panishanoocuarajanaa nia secojore Pueyaso. Nojuacuajaari nia masesano miiniutianiya.

⁸Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanoehua timitiasaanutianiya. Naacuajitij, niishishaanutianiya-jaariuhua niaari cua tojitiyajaca pueyaniyojua. ⁹Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria.

¹⁰Janiyari cua Que panishanoni, pueyaracaanu cua miiniuucua na panishano. Naajuhuj, niaa jaara cua rootasano tojjijaca quiriquia, niaari pueyaracaanu cua panishano pueya quiniutianiyajuhuj.

¹¹Janiyari naa nia sequeyani, shuquiriaatia quijia nia quiniuria, taa shuquiriaatia quijia cua quiyacuaani. Naacuajitij, niaari tojetaarucujanaa shuquiriaatia quijia quiniutianiya.

¹²Cua tojiri. Niiori cua sequesano niaara: "iPueyaracaanu panitiojuaca nia quiriquia, taa cua paniya nijaniyacuaani!"

¹³Cante tama na cuaqueyajaaja panitija na cusonura na rupuenaa nitini, naa miijia cutaraari seetanujanaa jiyanoehua narta pueya panijia. ¹⁴Niaa jaara cua sequesano miijia quiri, niaari cua rupuenaa. ¹⁵Naacuajitij, majaari cua sequenu quiniutianiya tari nijaniya cua seyata. Pueyano seruuri maja na niishiniu casaa poonijiosano na camarnu miiquiaacuaani.

Janiyari quiarijia nia sequeya cua rupuenaatani, cua niishitiniuucua nijaniya puetunu cua Que sequesanojuanaa janiya. ¹⁶Majaari nia saquiriojonu quiquiaari janiya. Janiya cutaraari nia saquiriojoquiarini cua jiyaramiquiniuria nijaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanojuanaa nia niqutionutianiya seetanujanaa coojia rupuejaca nioojia quishacari. ¹⁷Janiyari cunora nia sequeyani: "Pueyaracaanu panitiojuaca nia quiri".

Pueyaso niishiyashijia pueyari Pueyaso muerasu niqiniu paniyashijia

¹⁸Pueyaso niishiyashijia jaara nia niqiniu paniaquiri-quia, majaari nia tacaani. Cuno pojoricuajaari naa cua niqitiuniu paniaquijiacacuaa. ¹⁹Niaa jaara Pueyaso muerasu quiaquiriquia, Pueyaso niishiyashijia maara nia panijia quiriquia, taa nojori paniquiaa narta Pueyaso niishiyashijiacuaani. Niaari Pueyaso niishiyashijia quiquiaarijuhuj. Naajaa, janiyari nojori tajiniji nia saquiriojoquiarini, cua pueya nia quiniuria. Cunora, Pueyaso niishiyashijiaari nia niqiniu paniaquiquiaa, maja tari nia quishacari juhua nojori. ²⁰Majaari nio cua sequesano nia niyajetanu: "Seruuri maja socua tojishano na camarnujiniji". Naaratej, Pueyaso niishiyashijia jaara naquiya cua miiquiaacuaa, niaari naquiya miishaanutianiyajuhuj. Naajuhuj, nojori jaara cua rootasano tojjijacacuaa, nojoriiri nia rootasano tojjijaca quiniutianiyajuhuj. ²¹Nojoriiri nia naquiya miiniutianiya nijaniyatej, cua pueya nia quiniuucua, nojori niishiyaquishacari cua Jiyarona.

²²Janiya jaara niaquiquiaari nojori cua pohuatanura Pueyaso rupaani, nojoriicuaa maara saquiriojotaaquishaare, sesa nojori miishanojiniji. Nojori niqiuara cua pohuatanuucua Pueyaso rupaa, majaari nojori naata sequenu quiniutianiya:

"Cua jiyanoori. Maja cua niishiniu quiquiaari quia rootasano".

²³Cante cua niqiniu paniyashijiani, nojoriiri cua Que niqiniu paniyashijiajuhuj. ²⁴Sesa nojori miishano maara nojoriicuaa saquiriojotaaquishaare, janiya jaara cua cumaacata miyaquiquiaari nojori niqiuarani. Janiyari socua jiyajeneta casaa miijioquiaari cua cumaacata nojori niqiuarani, socua tamasaca miishanojiniji. Naajaa, nia nojori niquishacari cua cumaacata cua miishanotej, nojoriiri saaja cua niqitiuniu paniaquijia, cua Que niqitiuniu paniaquijiacajariuhuj. ²⁵Naajaa, nia nojori miiniuucua janiyatej, tariucuaanu Pueyaso Rupaajinia naajiotasano janiyajinijiri tari tohuateeree. Naa sequeyari:

"Janiyari najuhuana niqiniu paniaquishiyani".

²⁶Janiya jaara cua Que shuriucua quishuhuanu, janiyari tiji Pueyaso Sohuanu jiyaronutianiya mijiriani. Nojuajaari seetanu rupaajanaa jiitija. Nojuajaari janiyajiniji niishitiniutianiya pueya. ²⁷Niaari janiyajiniji pohuatanutianiya pueyajuhuj, pueyaracaanu cuata nia quiniuucua janiyatej, tariucuaanu cua coteesacari pohuatanu Pueyaso rupaa.

16 ¹Janiyari naa nia numooteyani maja nia tarinitianura cucua tiuuniu niaa jaara naquiya miishaare. ²Cua pueya nia quiniuucua, majaari nia shanacusaanu quiniutianiya nia tiuquitanura Pueyaso secojua tiacajinia. Pueya jaara nia puecoorejuhuj cua tojitiyajaca nia quiniuucua, nojoriiri jiyaniutianiya nojori maninia miya Pueyasora, nia nojori miishacari. ³Nojoriiri nia miiniutianiya nijaniyatej, nojori niishiyaquiniuucua janiya, cua Quejuhuaj. ⁴Janiyacajaari juhuacarijia nia nia sequeyani. Naacuajitij, niaa jaara naquiya miishaare, niocua jiyacari niishiri janiyacujaari tari naa nia sequequiarini. Majaari quenaaja nio cua sequenu quijia nijaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵Quiarrijiani, janiyari cua Jiyaronaacua quiohuani. Quiarrijiani, majaari quenaaja nijaniyajinijinio nequesotanu janiya: "¿Tee quia quiohuarini?" ⁶Janiya jaara nia sequereeni janiya quianutaniuhuanu, niaari saaja taraajequee. ⁷Seetanujanaa nia sequeyanijia, socua maninia quiniutianiya niaaraari, janiya jaara quiaarohuanu. Janiya jaara quiaaquiyoarohuanu, majaari Pueyaso Sohuanu niniu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutianiya. ⁸Mijiria na tiuquishacari, nojuajaari pueya jiuujajinia poonijionutianiya, nojori na niishitiniuria nojoriiri seetanujanaa sesa miijia. Nojori niishitiniutianiyajariuhua nojoriiri na naata sesa miyashijia-cara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. ⁹Seetanujanaa, Pueyasora, nojoriiri sesa miijia nojori tiuyaquiniuucua cucua. ¹⁰Jiyocuaanu cua tacasariuhua cua Queecua, majaari socua nia niqiniu quiniutianiya janiya. Naacuajitij, Pueyaso Sohuanu pueya niishitiniutianiya, janiyari seetanujanaa cua Que Pueyaso jiyanootijia cucua tiuriquiano pueyani. ¹¹Cua shocotasacari Sesaaca, Pueyaso Sohuanu pueya niishitiniutianiya, nojoriiri saniitosaanutianiya. Naacuajitij, nojori jiyaniijia Satanás jaara tari saniitosocoriquiano quiyacuaa, nojoriiri saniitosaanutianiyajuhuj, cucua nojori tiuyaquiniuucua.

¹²Janiyari queraatia jiitiaajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanuajaaja maja nia naata na niishiniu. Pueraruhua. ¹³Pueyaso Sohuanu tiuquishacari niaacua, nojuajaari nia niishitiniutianiya puetunujanaa cutara. Nojuajaari seetanu rupaajanaa jiitija. Nojuajaari maja tama na niishishanojuaaja na niishitini quiniutianiya nijaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajariuhua

taate nio pa quishacari nuhuaji quiniutianiyani. ¹⁴Niaari cua shuquiritianutaniya, nojuaja niishitiniucua niajaninya janiyajiniji. ¹⁵Puetunu cua Que jiiitiasanojuanaani, cunoori cua casaajuhua. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiiitiasano niaara, na caminiujiuniuria niajanijarahuhua.

¹⁶Niaari saaja quiarjia cua niquiya. Na nuhuaji cutara, majaari socua nia niquiniu quiniutianiyani janiya. Pasa naataja na nuhuaji, niaari cua niquiniutianihuacuuhua.

Nia taraajenuuri jatanutaniya shuquiriaatia nia quiniuria

¹⁷Jiyacaritij, noojiaqueya canaa na saquiriojosano pueyajinijinooori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarjia cua niquiya. Na nuhuaji cutara, majaari socua nia niquiniu quiniutianiyani janiya”? ¿Casaa na sequenu panijajaaranuhua na sequesacari: “Pasa naataja na nuhuaji niaari cua niquiniutianihuacuuhua”, na sequesacarijuhuaj: “Cua Queecua quianutaniuhuanijia”? ¹⁸Naajuhua, ¿casaa na sequeyarini na sequesacari “quiarjiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarjia cua niquiya, na nuhuaji cutara maja socua nia niquiniu quiniutianiyani janiya. Pasa naataja na nuhuaji, niaari cua niquiniutianihuacuuhua”.

¿Niaatejaara niojiniji nequesoreetoya tama niajanijajaaja? ²⁰Seetanujuanaa nia sequeyanijia, niaari nujuquenutaniya. Niaari taraajeconutanijahuaj. Jiyacaritij, Pueyaso niishiyashijiaacari taquiya shuquiriaatia quiniutianiyacuaa niajanijajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹Naajaariuhua, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²²Quiarjiani, niaari naa taraatia quiyajuhua. Naajaa, niaacua tacatenutaniuhuanijia. Niaari jiyanoehua shuquiriniutianiyani nia niquishacari janiya. Majaari quenaaja tamasa pueya naata quiniutianiyani cuno nia shuquiriniu jaariutianu.

²³Jiyacaritij, majaari socua nia nequesotanu quiniutianiyani janiya. Seetanujuanaa nia sequeyanijia, cua Queeri nia niquitionutaniya puetunu nia masanojuanaa nojuaja, seetanujuanaa coojia rupuejaca nioojia quishacari. ²⁴Majaari juhuanujuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

Jiyaniijia Jesuuri Sesaaca shocotana

²⁵Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiyani cua shiniujiuniuria cua Que, na tojinuria niajaninya. ²⁷Cua Quejanaacuajaari nia panijia, nia paniniucua janiya, nia niishiniucua juhua janiyari na jiyarosani. ²⁸Niaacuajaari niishiya, janiyari cua Que shuriucuaji niquiaarini pueyanora cua quiniuria mijiria. Quiarjia saniniucua, janiyari nio jiya tiujanutaniyani, cua Queecua cua quianuhua.

²⁹Naa Jesu sequesacari canatej, canaari na sequereeni:

—Quiarjia cutara, quiaari maatiajanaa sequeree, maja miriqui. ³⁰Quiarjia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaninya. Naacuajitij, canaari niishiyani, quiaacuajaqui Pueyaso Jiyarosano.

³¹Jesuuri canaa sequeree:

—¿Naaate? ¿Niaate shusha cucua tiyuruhua? ³²Tari quenaacoyari naquiya cua miishaanura. Seetanujuanaa quiarjiaari. Niaari cucuaji cocuataasanutaniya puetunujuanaa. Niaari tamajaaja cua tiujanutaniya. Naajaa, seetanujuanaa maja cua quiniu tamajaaja. Cua Quecuajaari cua cojiani. ³³Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiyani. Naajaa, janiyacuajaari mijiria jiyaniijia shocotareeni. Naacuajitij, nioojia nia cumaquiri tamajaaja.

Jesu secojosacari na pueyacuara

17 ¹Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricuaajani. Cua tojinuucua quiajaninya, quia Jiyarosano quia jiyatere pueya timitiasano cua quiniuria. Naacuajitij, janiyacuua saniniucua quia jiyatere pueya timitiasano quia quiniuriani, tojetaarucuaajanaa maninia mijia quia quiniucua. ²Quiaacuajaari quia cumaaca cua niquitioquiaari puetunu pueyanaa cua jiiitanura. Naacuajitij, janiyari saniniucua nojori jiyatenutaniya pueyaracaanu quijiaa nojori quiniuriani, teyano pojori quia niquitioquiaari janiyacuajani. ³Nojori niishishacari saaja quiajaniyari seetanujuanaa Pueyasocua, naajuhua, nojori niishishacari janiyari quia jiyarosani, naacuajitij, nojori pueyaracaanu quijiaa quiniutianiyani shuquiriaatia.

⁴Janiyari tari tucataree quia sequesano cua miiniuria mijiriani. Naa cua miiniucua puetunu quia panishanojuanaatej, pueyari quia timitia. ⁵Jiya shipiniyaquishacarijia, janiyari jiyanoehua shuquiriaatia quijia quiquiaari quia shuriucua, jiyaniijajanaa cua quishacari. Cua Quena, naa quijiaa cua jiyaterohua quiarjiani, quia shuriucua cua quiniuhua.

⁶Quia niquitiosano pueya janiya, quia saquiriojosano pueya quia niishiyashijia pueyajinijinioni, quiarjia cutara, nojori niishiya cante quiajaniyani. Nojori quia niishiya, nojori niquiniucua cua miijiosano quia cumaacata, cua pohuatasano quiajanijajiniji nojori tojinuucua juhua. Nojori quia pueya quijia. Quiaari saniniucua nojori cua niquitioquiaari. Nojori quiarjia quia rupaa tojitajaca cutara. ⁷Nojori niishiya puetunu cua jiiitiasanojuanaani, cunoori quia niquitiosano janiya. ⁸Janiyari quia rupaa rootacanu nojorini, quia niishitishano janiyani. Nojori seetanujuanaa nocua tiuuri. Nojori seetanujuanaa niishiya, janiyari quia shuriucuaji niquiaarini. Niishituyajariuhua, janiyari seetanujuanaa quia jiyarosani.

⁹Janiyari cunora nojoriicua quia secojijani, seetanujuanaa quia pueya nojori quiniucua. Majaari cua secojonu quia niishiyashijia pueyacuara. Saaja noo pojoriicua quia secojijanjia, quiaa na niquitioquiaari janiyatej. ¹⁰Naaratej, puetunu cua jiiitiasano pueyanaa quia pueyajuhua. Mariyata puetunu quia jiiitiasano pueyanaa quia pueyajuhua. Nojori tiuuniucua cucua, nojori jatanishano pueya quiniutianiyani. Naacuajitij, queraatia pueyari cua timitianutaniyajuhua, naa nojori niquishacari cua cumaaca.

¹¹Majaari puera cua tarishiniu quiniutianiyani mijiria. Cua pueya cutaraari mijiria quiniutianiyajaa, janiya jaara quiaarohua quocuani. Jiyanoehua maninia cua Quena, nojori quia cojuare quia cumaacata, teyano pojori quia niquitioquiaari janiyacuajani. Naa quia jiiitare nojori, qiatiqui nojori quiniuria juhua niquiriyatu jiuujiaraca, taa pa quiyacuani. ¹²Mijiria quia quishacari nojoritia, janiyari nojori cojuajani quia cumaacata, quia rupaacua tiuujiaa nojori quishacari. Majaari quenaaja niquiriyatu nojorijinijinio cua juurequetenu quiquiaari. Saa nojuaari juurequecanu cutara, tariucua juurequeriquiano quijiacuajatej. Naacuajitij, tariucuaacuani quia rupaajinia naajiotasanoori tohuatecanu.

¹³Quiarjiani, janiyari quiocua quianutaniyani, tee quia quiyacuaani. Niaa cua quishacarijia, janiyari nio sequeya nojori niquiarani, nojori jiitianura cua shuquiriniujuhuaaj, tojetaarucujanaa shuquiriaatia quijiaca nojori quiniuriajuhuaj. ¹⁴Janiyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niqiniu paniyaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyari nojori niqiniu paniyaquiquiaa. ¹⁵Naa cua secojosacari quiarjia nojoriicuaratej, majaari cua sequenu quiajaniya nojori quia rijionura niqijiji. Saaja quia secojiya cutaranijia, nojori quia cojuanura Sesaacaacujaji. ¹⁶Nojoriiri maja mijiria quijiaca na quiniu tari cua pueya nojori quishacari, taa nio jiyajinijinio cua quiaquiyacuaani. ¹⁷Quia rupaa quia poonijiotere nojori jiuujiajinia, tojetaarucujanaa quia tojijiaca nojori quiniuria. Quia rupaari seetanu rupaaajanaa cutara. ¹⁸Quiaacujajaari cua jiyaroquiaari mijiria quiniaa pueya niqiuara cua pohuatunura quia rupaa. Naajuhuaaj, janiyari cua pueya jiyaramiquiyani mijiria quiniaa pueyacuajuhuaaj. ¹⁹Quia tojijiaca nojori quiniuria seetanujanaa, janiyari tama cua cuaqueyajaaja jiyateya puetunu quia panishanojuanaa mijia cua quiniuriani. Naacuajitij, nojori niishishacari seetanu rupaaajanaa janiyajiniji, nojoriiri tojetaarucujanaa maninia miijiacara jatanishaanuta-niya.

²⁰Majaari saaja cua secojonu nio pojoriicuaru, tariucua quia tojitiyacuaani. Janiyari secojiyajuhuaaj na nuhuaji cucua tiuuriquiano pueyacuara, noo pojoriicuaru cante cucua tiuuniutianiya na nuhuajini, nojori tojishacari nio pojori pohuatasano janiyajiniji. ²¹Cucua tiuuriquiano pueyacuara secojiyanijia puetunu cucua tiuuniaajanaa cuaara quiiria jatiqii, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniaacuaani, quiaari saniniuujia coojiajinia quiyacujua. Nojori jiuujia cuaara juhua rupuetootesano quiiria poojiatajuhuaj, mijiria quiniaa pueya niishiniuria, quiaari cua jiyaroquiaari mijiria. ²²Janiyari nojori cumaquiya quia Sohanutani, quia niqutiosano janiyacuaa, juhua niquriyatu jiuujiaraca nojori quiniuria, naatej, taa niquriyatu jiuujiaraca pa quiyacuaani. ²³Quiaari coojiajinia quia. Naajuhuaaj, janiyari nojori jiuujiajinia quiyajaacuhuaaj. Naacuajitij, paari nojoritia juhua niquriyatu quiniutianiya. Naacuajitij, mijiria quijiacaari niishiniutianiya, quiaari seetanujanaa mijiria cua jiyaroquiaari. Nojoriiri niishiniutiani-yajuhuaaj, quiaari jiyanojuaa cua pueya panijia, taa quia paniya janiyacuaani.

²⁴Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shuriucua, nojori niqiniuria cua shacantuuca cumaaca. Quiaari cuno cumaaca cua niqutioquiaari pueyaracaanu quia paniniucua janiya, jiya shipiniyaquishacarijia. ²⁵Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuaaj, janiyari seetanujanaa quia jiyarosononi. ²⁶Janiyari nojori niishitiocanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanujanaa nojori niishiniuria quiajaniya. Naacuajitij, taa quia paniya janiyacuaani, nojori cuaara cuno paniniu jiitiaara nojori jiuujiajiniajuhuaj. Naa nojori niishishacari quiajaniyatej, janiyari nojori jiuujiajinia quiniutianiya juhuaj.

Na paraa quiasacari Jesu

(Mt 26.47-56; Mr 14.43-50; Lc 22.47-53)

18 ¹Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari maticosano quijia puetunu na shocujanaa. Jesuuri tii tiuquitiamaa canaa, na Que

Pueyaso na secojonura. ²Jesuuri tii jiitiquiaari canaata na rerejonura. Naacuajitij, na paraa na quiateriquiano Judasri cuno cuhuariquia niishiquiaarijuhuaj. ³Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴Jesuuri tari puetunujanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia maticajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriquiaa tii. ⁶Jesu sequesacari, “Janiyacuaaja nojuajani”, na paraari na nijiniara pojotuquee. ⁷Jesuuri socua nojori nequesotarahua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani.

Niaa jaara cua pajeya, nareja nia niquri nio, cua cojiniaani.

⁹Naacuajitij, tama Jesu sequesanojuaarijia tohuateequiaari, nojuaja jaara naa na Que sequequiaari: “Majaari quenaaja niquriyatu pueyano cua juurequetenu quiquiaari quia niqutiosano pueyajinijinio janiya”. ¹⁰Jiyacaritij, Simón Pedroori tama na mueruujuaaja shitiaree na shuucujaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco.

¹¹Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaquiri naquiya cua miishaanurani? ¡Taaquiriirinij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹²Jiyacaritij, na paraari Jesu quiaaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. ¹³Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniucua. Cuno marijia, Caifásri pueyacuara secojonaa jiyaniijiajanaa quiriquiaa. ¹⁴Cuno Caifáscajajaari tari naa sequequiaari narta Judiocuaca camarucua: “Maniniacuajaari niquriyatu pueyano mosaanura puetunu pueya nitijianaa, maja najuhuaana puetunu pueyajanaa puecoasaanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵Simón Pedroori cuata Jesu nuhuajiriquiaa tucuaaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua maticajiniacuma. ¹⁶Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. ¹⁷Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuaaree:

—¡Maja janiya!

¹⁸Shiniquiaari jiyacari jaanujiriquiaa. Nocuaji cuno jiyaniijia seyari Pueyaso Secojoua tijinia cojuanaa pueyata mani

naatequiaari. Nojoriiri na jitiuriquiaa. Pedroori nojoritia tii quiriquiaajuhuj. Mani jitiuriquiaari.

Pueyacuara secojonaa jiyaniijia nequesoreesacari Jesu
(Mt 26.59-66; Mr 14.55-64; Lc 22.66-71)

¹⁹Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreerejaariuhuj.

²⁰Jesuuri na sequere:

—Janiyacujaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiqiyocua Pueyaso secojonuujuaca tiacajiniaqueya niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹¿Casaara quia nequesoreya janiyani? Quia nequesoreere juhuari cuno pojori, canapue te cua pohuatasano tojiqianuni. Nojoricujaari quia sequenutaniya casaa cua rootaquiaa nojorini.

²²Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riuucasacari jiyaniijia Anástej, Secojonuuju tiaco cojuana pueyanoori Jesu jiquioco maseteree. Naa Jesu sequereeri:

—¿Naa riuucasante pueyacuara secojonaa jiyaniijia?

²³Jesuuri na riuuaree:

—Janiya jaara sesa riuuareeni, cua sequere casaate sesa quiriini. Saniniujia, janiya jaara maninia sequereeni, ¿casaara quia maseteree cua jiquiocoacaraarini?

²⁴Canaa pueyacuara secojonaa jiyaniijiajanaa Caifás quiniucua, jiyacaritij, Anásri Jesu moronucua jiyarotaree Caifásca.

Pedro pacutesacari seetanu Jesujiniji
(Mt 26.71-75; Mr 14.69-72; Lc 22.58-62)

²⁵Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiojuhuaj?

Pedroori saaja seetaree. Sequereeri:

—iMaja janiya!

²⁶Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequere:

—iJaniyacujaruhua quia niquirii cuno pueyanota quia quishacari olivo cuhuariquiajiniani!

²⁷Pedroori na seetarohuacuahuaj. Caacarajaari jiyacari niunijioquee.

Jiya jiyaniijia Pilato nequesoreesacari Jesu
(Mt 27.1-2, 11-14; Mr 15.1-5; Lc 23.1-5)

²⁸Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari jiyanohua puereetuca quiriqiaa, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuca quiri Pueyaso niquiara, naacuajitij, nojori maara Pascuara miaquesano borrego miaqueyaquirij. ²⁹Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucaani, miji nia nitianura cucuani?

³⁰Nojoriiri saaja riuuaree:

—Jaara sesa miyashijia quiriquia, ¿canaatucua casaara quiocua na nitiamani?

³¹Pilatoori nojori sequere:

—iNiiquiji nia jiyataarohua! iTama nia nequesoreesuhujajaa, taa nia supuetanaa rootasano sequeyacuajani!

Canaa Judiocuaca camarucuaari Pilato riuuaree:

—iNiajaniya Romano pueyani, niaacuajaari canaa sequecanu maja canaa monura pueyano!

³²Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujanaa Judiocuaca jiyaniijia?

³⁴Jesuuri Pilato sequere:

—¿Cunote tama quia niishishanojuaja naa quia nequesotanura janiyatej? ¿Tamonu soj quia pohuatacanu janiyajiniji?

³⁵Pilatoori Jesu juaarii. Na sequereeri:

—iQuiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? iTama quiarta Judiocuacacujaari cucua nitiamaa quiajaniya, nia pueyacuara secojonaa jiyaniijianucuata! iCua sequere casaa quia miiriucaani!

³⁶Jesuuri na riuuaree:

—Janiyacujaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riuuaree:

—Jaa. Janiyacuaja Jiyaniijiani. Janiyacuajaari cunora rasaquiaarini. Janiyari mijiria niquihaarini seetanu rupaaajanaa cua niishitiniuria pueya. Cante seetanu rupaaajanaa panijiani, nojoriiri cua sequesano tojitiataca.

³⁸Pilatoori najuhuaana na nequesotaree:

—¿Casaateeri cuno seetanu rupaaajanaani?

Naa na nequesotanu nuhuajitij, Pilatoori tohuatamohuacuuhua canaa Judiocuacaacua.

Pueya sequesacari Jesu cuaara mosaaria
(Mt 27.15-31; Mr 15.6-20; Lc 23.13-25)

Pilatoori jiyacari pueya sequere:

—Nio pueyano nequesoreereecuajaniijia. Nojuajaqui maja sesa na miiniu quiquianu. ³⁹Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰Puetunu pueyajanaari naa jiyanohua nacoorohuacuahuaj:

—iMaja cuno cartenu! iBarrabás quia cartere cutara!

Cuno Barrabásri nohuasejojua quijia.

19 ¹Jiyacaritij, Pilatoori na soldadohua majacuteree Jesu, coqueeca casaata. ²Soldadohuari juhuacontucua maaturee Jesu nacaquera. Na nuhuaji cushitishaarohuari. Na macatiniuria, shaaruque toque cushitishaarohuari, juhua jiyaniijia toque. ³Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—iJudiocuaca jiyaniijianaa! iQuia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiuri.

⁴Pilatoori socua tohuataquiaari canaa Judiocuacaacua. Nojori sequereeri:

—iNia niquiri! Janiya na tohuateya niaacuani, nia niishiniuria janiyacuja tari na nequesoreereeni. Janiyari

quiarjia niishiyani, nio pueyanoqui maja sesa na miiniu quirucuaa.

⁵Jesu muetasacari nojoriucua, juhuacontucujiniji nacaque cushiriquiaari, shaarueque toquenio. Pilatoori Judiocuaca sequereee:

—Nia niquiri niarta pueyano.

⁶Canaa pueyacuara secojonaa jiyaniijianucua, Pueyaso Secojojuua tiaco cojuanaa pueyajuhua, nojori jaara Jesu niqiuquiaari, naa nacoonu coteetureeri:

—iNiyacutesanojinia quia teetere tii na cusonura!
iNiyacutesanojinia quia teetere!

Pilatoori nacoyano riuwaree saaja:

—iMaja! iJaniyacuajaari niishiyani, nio pueyano maja sesa na miiniu quiquianu! iNiaa jaara na monu paniri, nia teetere tama niyajaniyajaaja!

⁷Canaa Judiocuacaari Pilato riuwaree:

—iCanaari Pueyaso Rootasano naajione jiiitiani! iCanaari cunojiniji niishiyani, nio pueyano cuara mosaaria tama na cuaqueyajaaja na jiyatenuucua Pueyaso Nyanura!

⁸Pilato tojishacari naa canaa Judiocuaca sequesantej, nojuajaari socua puerequiaari. ⁹Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniani?

Jesuuri maja na riuuanu quirii. ¹⁰Pilatoori na sequereee:

—iCua riuwareejaj! ¿Quiaate niishiyakuia, janiya jiyaniijiani? iJaniya jaara panirini, cua naata cua pueya sequenu na teetenura quiajaniani! iJaniya jaara paniyaquirijiu-huaj, cua naata quia cartenujuhuaj!

¹¹Jesuuri saaja na riuwaree:

—Jiyocuacaanu Quijia jaara quia jiyateyakuiaari jiyaniijia quia quiniuria, quiaa maara quia cumaaca paaretaquiri cucuaj. Naaratej, cante niyara cua nitiamaa quiocuanu, nojuajaari socua jiyanojua sesa miirii quiajanijini.

¹²Naa Pilato tojishacari Jesu sequesantej, nojuajaari socua shiriquiaari. Nocuaji, Jesu cartenu saniniujiuriquiaa juucuaari. Judiocuacaari saa nacooreejaa. Naa Pilato sequetureeri:

—iCante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! iNaaratej, quiaa jaara cuno pueyano cartere, majaari socua pa jiyaniijijanaa César rupuena quia quiniu quiniutianiya!

¹³Naa Pilato tojishacari pueya sequesano nojuajatej, nojuajaari na soldado sequereee na tohuatenuhuara Jesu pueya niqiuara. Pilatoori jiyacari cajirii pueya na nequesoreesaquiji cajitijinia. Pilato tii cajiriquiaani, na tacoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniuuja, cunoori quiquiaari “Gábata”. ¹⁴Jiyacariiri panacari quiriqiaa. Cuno juuca, canaa Judiocuacaari juhucarijia jeenucuariquiaa Pascuaa juucajinia. Pilatoori jiyacari tii quinia Judiocuaca sequereee:

—iNia niquiri nia jiyaniijia!

¹⁵Pueyari saa nacooreejaa:

—iCunoori maja canaa panishano canaa jiyaniijia na quiniuria! iNiyacutesanojinia quia teetere!

Pilatoori nojori sequereee:

—¿Janiyatucua nia jiyaniijia teetereeni? iMaja!

Pueyacuara secojonaa jiyaniijianucuaari Pilato sequereee:

—iJiyaniijia Césarcuajaari canaa jiyaniijijanaa! iMaja socua tamonu jiyaniijia canaa jiiitiani!

¹⁶Pilatoori socua Judiocuaca niqitioree Jesu, nojori teetesocoriquiano. Naaratej, nojoriiri na jiyataquiaari na teetenuucua.

Jesu teetasacari

(Mt 27.32-44; Mr 15.21-32; Lc 23.26-43)

¹⁷Jesuuri tama na teejaranojuajaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhananu”. Judiocuaca rupaajinia saniniuuja, “Gólgota”.

¹⁸Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree. ¹⁹Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”.

²⁰Naajiosano quiriqiaari canaa Judiocuaca rupaajinia, Romano pueya rupaajinijuhua, Griego rupaajiniano. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹Naaratej, Judiocuacaaru secojonaa jiyaniijianucuaari Pilato juaatiurii: —¿Casaara naa quia naajiotereeni: “Judiocuaca jiyaniijia”? Cuaara naajiosaria cutara: “Tama na cuaqueya sequejajaaja, Judiocuaca jiyaniijianijia”.

²²Pilatoori nojori riuwaree saaja:

—Janiyacuajaari naa naajiotereeni. iCuaara naa quiiriatej!

²³Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriqiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuatequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuaa tacuarishiyonuureeri, na pasocoriquiano”.

Seetanujuanaa, naa miitiquiaariiri cuno soldadohua.

²⁵Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhua, Cleofas niqiuocua Maríajuhua, María Magdaleniano. ²⁶Jiyanojua Jesu panishano pueyanoori Jesu nucua shuriucua nujuariquiaa. Cuno pueyanocuajaari janiya. Jesu niqishacari canaa, na nucua sequereeri:

—Maajinia, cua panishano pueyano cuara quiiria juhua quia mueya cua niti.

²⁷Na nuhuaji, cua sequereejariuhua:

—Juanna, cua nucua cuara quiiria juhua quia nucua.

Naaratej, janiyari María riquiaari cua tijinijiarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateere. Naajuhua, tariucuacaanu Pueyaso Rupaajinia naajiotasano tohuateenurajuhua, Jesuuri sequequiaari:

—iJiyamueyanijia!

²⁹Cuniqui, vino jereecaari patacojinia mishaja cajitiriquiaa.

Jiyacariitij, namasu casaari jereeca vinojinia shishaaree. Naajuacua na morotatureeri. Na nuhuaji, Jesu rupaama shitiasaareeri. ³⁰Jesu ratunu nuhuaji cuno jereeca vino, naa sequerohuari:

—iTari tucuatere puetunujuanaacuajaniijia!

Naa na sequenu nuhuajitij, naniquiiri. Cusoqueeri.

Soldado jitiasacari Jesu shuucuaaji na cashanata

³¹Cuno juucaari canaa Judiocuaca jeenucuasacari quiriqiaa Pascuaacuara juucajinia. Cuno marijara, Pascua juucaari Sábado juucajinia quiriqiaajuhua, samaatenu juuca. Naaratej, canaa Judiocuaca camarucuari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequereee cuno teetejosano pueya cashacucua na shuniitianiuria, ritia nojori cusonunura, na roshinijiosaanura cuno juucaja. ³²Naaratej, Pilatoori na soldadohua jiyaramiquirii. Cuno soldadohuari coteenu shuniitiree niquiriyatu pueyano cashacucua. Na nuhuaji, tamonu cashacucua shuniitiatureejariuhua. ³³Saniniuuja, nojori pacusacari Jesuucua, Jesuuri tariucua macu quiriqiaa cutara. Nojoriiri cunora na cashacucua shuniitiaquirii.

³⁴Naajaa, tamonu soldadoori Jesu shuucuaji jitiaree na cashanata najuhuanaj. Ritia shooqueeri nanaca, mohuacanio. ³⁵Cuno pueyano, na naajiojinia naa nia pohuataani, cunocuaajaari janiya. Janiyajanaari na niqiquiaarini. Naarate janiyari seetanujuanaa nia pohuataani. Tama janiyajaari nia niishiyani cua sequesanoori seetanujuanaa, nocua nia tiuuniuria. ³⁶Jesuuri naa miishaaquiaari-tij, tariucuaaanu nojuajiniji naajiotasano tohuateenura. Naa sequeyacuajaari juhuacarijia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷Tamaquiri nojuajiniji naa naajiotasano quiyajuhuj:

“Cashanata na shuucuaji na jitiatusano niqitiuniutianiya”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸Na nuhuaji, Arimatea tiacajinijinio Joseeri Pilato sequeese: —Cua niqitiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri.

³⁹Nicodemojuhuaj, noo pueyano Jesuucua niqiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja niitariquiaa, macuucua niojosocoriquiano. Na niqiaari quiquiaari cuarenta y cinco kilo. Cuno shanohua jaanutajaari quiquiaari mirra*, aloeta cojitijiosano.

⁴⁰Joseeri Nicodemota Jesu jiuniooree toqueneecajinia. Nojori jiunioosacari, nojoriiri nocua niojoriquiaa cuno shanohua jaanutaja. Canaa Judiocuacari naa miitijiaa quiquiaari, na macu na niatunura raaco. ⁴¹Tee Jesu teetesaaquiaaricujani, cuniquijia na shuriucua quiquiaari cuhuariquia. Cuno cuhuariquiajiniani, quiarinio jiutiasano raari quiriquiaa, macunucua niojojuara. Cuno raaconi, juhuanojuaja maja macu niasaanu quiquiaari. ⁴²Macuuri cuno raaco niasaaquiaari, cateca na quiniucua. Naajuhuj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

Jesu samiitiasacarihua

(Mt 28.1-10; Mr 16.1-8; Lc 24.1-12)

20 ¹Domingo*, coteenujanaa semaana* juucani, María Magdalenaari tariquicuaji quiaquiaari Jesu raajiniara. Ninishiquiri quiriquiaajaa. Na tiuquishacari, cuno puereetucaa saajia niqishiiri tariucua tamocora ruutinishano, teyanota raa tiosaaquiaaricujani. ²Naa na niquishacari, nojuajaari neterohua Simón Pedroocua, cucuanio. Canaa sequesuhuari:

—iPueyanaa, pa Jiyanijiaqui na raajiniji pasaree! iMajaari canaa niishiniu teeriquitijia na niasaaretejaj!

³Naaratej, janiyari Pedrota netequiaari raajiniarajuhuj. ⁴Canaari mariyata netecuaturiquiaa coteenu. Janiya cutaraari socua ritia netequiaari Pedrojinijini. Naacuajitij, janiyari coteenu tiuquishii raajiniani. ⁵Janiyari raaco cuuqueseeni. Janiyari saaja Jesu jiuniocotaja toque niqiriiri maanoni tee Jesu quete niasaarucua-cujani. Majaari cua tiuquiniu quimaa raaco. ⁶Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niqishii tii maanojuhuaj. ⁷Jesu naca jiuniocotaja niqiriijiaariuhuj tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. ⁸Pedro tiuquiniu nuhuaji raaco, janiyari shusha jiyacari tiuquimiaajaniuhuj. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. ⁹Canaari juhuanojuaja maja canaa niishiniu quiriquiaa tariucuaaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutianuhua macujiniji. ¹⁰Na nuhuaji, canaari tijajinia quiaarohuani.

Jesu muetasacari María Magdalenaacua

(Mr 16.9-11)

¹¹Canaa quiojosacarihua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta,

raaco cuuquereeri. ¹²Raaco na niquishacari, caapiqui Pueyaso seya niqiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. ¹³Pueyaso seyari María Magdalena sequeere:

—Maajiniaa, ¿casaara quia nujuqueyani?

Nojuajaari Pueyaso seya riucuaaree:

—Cua jiyaniijia quete niqiji pasaarucuaa. Majaari cua niishiniu teeriquitijia na niasaarucuaatejaj.

¹⁴Naa na sequenu nuhuajitij, na nijinara tacaterohuari. Saaja Jesu niqiriiri na shuriucua nujuaanooori. Maja cutaraari na niishiniu quiriquiaa nojuaja Jesu.

¹⁵Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jiyaniiri cuno cuhuariquia cojuana pueyano naasucua. Cunora, naa na sequeereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶Jesuuri na sequeere:

—iMaríanaa!

Jiyacari, Maríari nocua tacatequee na niishishacari nojuajaari Jesu. Hebreo rupaajinia na sequeereeri:

—iRabuni!

Cunoori sequeya, “Cua Niishitiojonanaa”. ¹⁷Jesuuri María sequeere:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapueyocua quia sequesuhua: “Janiya cua Que Pueyasocua tacanutaniuhuanu. Nojuajaari nia Quejuhuaj. Nojuajaari cua Jiyanijia, nia Jiyanijiajuhuaj”.

Jesuuri naa na saquiriojosano pueya sequeere na tapueyocua-cata, na Que Pueyaso na jiyatesacari nojori Quejuhuaj.

¹⁸Jiyacari, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatashuhua taa Jesu na niqiriiri. Naajuhuj, Jesu sequesano caminiujirui canaaraari.

Jesu muetasacari na saquiriojosano pueyacu

(Mt 28.16-20; Mr 16.14-18; Lc 24.36-49)

¹⁹Cuno domingo juucajani, shusha ninishacari, canaa, Jesu saquiriojosano pueyani, canaari jatiqiri quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiotiu mishiquiojosano quishacari, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequeereeri:

—¿Niaate quiyajaa? Juhujaniya nia quiri.

²⁰Naa canaa na sequenu nuhuajitij, canaa niqitijoree na juaashiquiaari, na shuucuaji cashana jiyano. Canaari jiyanohua timiriini canaa niquishacari canaa Jiyanijia.

²¹Jesuuri socua pacuterohua sequenu:

—iJuhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuhuj.

²²Naa canaa na sequenu nuhuajitij, canaa caco nooriiri. Sequeereeri:

—Pueyaso Sohanu nia tiuquini nioojiajinia. ²³Naa jaara pueyano jiyanoori sesa na miishanojiniji, seetanujuanaa jiyanooshano quiniutianiyaari. Saniniujia, nia jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyajaariuhuj.

Tomás niquishacari Jesu, samini seetanujuanaa

²⁴Majaari Tomás quini quiriquiaa canaata, narta saquiriojosano pueyatani, Jesu muetasacari canaacua.

²⁵Naaratej, canaari Tomás sequequiaari na nuhuajini:

—iCaapueyanonaa, canaa pa Jiyaniijia niquiriicuaani!
Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajiniya niqiyaaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucuaajijuhuj, janiyari nia cuaracashitiniutianiyanani.

²⁶Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuanani. Tomásri jiyacari canaata quiriqiaa cutara. Tia tiootiuri maninia mishiquiojosano quiriqiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

²⁷Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaaji quia puerarejuhuaj. ¿Casaara cucuaji quia taacanuyajaani? Cucua quia tiuuri.

²⁸Tomásri jiyacari Jesu sequereeri:

—iCua Jiyaniijianaa! iCua Pueyasonaa!

²⁹Jesuuri na sequereeri:

—Quia niqishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapueete cucua tiuuniutianiya saaja nojori tojishacari janiyajiniini, nojori niqiyaaquishacari janiya.

Casaara Juan naajioquiaari nio naajioneeni

³⁰Jesuuri jiyanoahua socua queraatia casaa miiquiaari na cumaacata canaa na saquiriojosano pueya niqiyara. Cunoori nio nequesoreetuneejinia naajiotasoo. ³¹Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujanaa Pueyaso Jiyarosano, Pueyaso Niyanutuhuj. Janiyari nio naajioeneeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

Tiberias caminiajinia Jesu muetasacari na saquiriojosano pueyacua

21 ¹Na nuhuaji, Jesuuri canaa na saquiriojosano pueyacua muetaquiaariuhua Tiberias caminiajinia. Naa quiquiaariti na muetasacari canaacua. ²Nio pojoriiri jiyacari mariyata quiriqiaa: Simón Pedro, Tomás (Caapueyano jiyaniishano), Natanaeljuhuaj. Nojuajaari Caná tiacajiniinjio quiquiaari, Galilea jiyajiniinjio. Janiyari cua tarajanata tii quiriqiaajaaniuhuj. Canaari Zebedeo niqiuohuani. Socua caapiqui Jesu saquiriojosano pueyajiniinjioori tii quiriqiaaju-huj. ³Simón Pedroori jiyacari canaa sequereeri:

—Sapitiaajara quejootaseera shiyaru.

Canaari na riucaareeni:

—Canaa quiata quiaajuhuj.

Naacuajitij, canaari quiojyareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuanani. Canaari shaa juhuaquetumaani. ⁴Jiyacaritij, Jesuuri caminia casaqueyaji jaaquiajiniya nujuariquiaa. Majaari canaa niishiniu quiquiaari cante nojuajani. ⁵Jesuuri canaa jiiquiooree. Canaa nequesotareeri:

—iSanajooriniaa! ¿Niaate na quiaree?

Canaari na riucaareeni:

—iMaja! iShaaqui sacaj!

⁶Jesuuri canaa sequereeri:

—iNia shiyaru nia jartare nia miaquetajara bote tamajiria!

iNiaari cuniqui na quianutaniya cutara!

Canaari naa miiriini taa na sequereeri canaacuajani. Na nuhuaji, majaari canaa naata canaa shiyaru jaatianu quiriqiaa, queraatia sapitiaajara canaa ritiasacari. ⁷Jiyacaritij, janiyari Pedro sequereeni:

—iPa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriqiaa. Na toque na cushiniu nuhuaji, caminiajinia jaataareeri Jesuucua na quianura. Jiritiuri quiriqiaa. ⁸Canaari na nuhuaji jaatiariquiaa shiyaru botejinijini. Jaaquiaari namitia maja tucuaaanu na quiniu quiriqiaa, saaja cien metroruhua. ⁹Canaa rosetasacari botejiniji, canaari na mani niqishiini. Sapitiaajari tii majeriquiaa, pannio. ¹⁰Jesuuri canaa sequereeri:

—Nia sapitiaajajiniiji miji nia riri rarishocoriquiano.

¹¹Simón Pedroori ritia botejinia tacamaa. Shiyaru tacanitiaree jaaquiajiniyaari. Queraatia sapitiaajari quiriqiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹²Jesuuri canaa sequereeri:

—Pueyanaa, miji. Nia miaqueseeri.

Majaari quenaaja niqiriyatu canaajiniinjio nequesotanu quiriqiaa, cantejaaranononi. Canaacuajaari niishiriquiaani nojuacuajaari canaa Jiyaniijia Jesu. ¹³Jiyacaritij, Jesuuri pan rishii manijini. Canaa na serotareeri. Sapitiaaja rariquia canaa niqitiojoreejaariuhuj.

¹⁴Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samiitanu nuhuaji.

Jesu pocoojosacari Simón Pedrota

¹⁵Canaa miaquenuunu nuhuaji, Jesuuri Simón Pedrota pocoojoriqiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniiji?

Pedroori na riucaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequereeri:

—Cua borregohua niqiuohuanioyua cojuanara quia quiriqii.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. ¹⁶Jesuuri Pedro nequesotarohuacuahuaj:

—Juan niyanu Simónnaa, ¿quiaate cua panijia?

Pedroori Jesu riucaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequereeri:

—Cua borregohua cojuanara quia quiriqii.

¹⁷Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujanaa Jesu riucaareeri:

—iJiyaniijianaa, quiaacuajaari puetunujuanaa niishijia!

iQuiaari niishiya janiyari quia paniyani!

Jesuuri na sequereeri:

—Cua borregohuanioyua cojuanara quia quiriqii.

¹⁸Seetanujanaa quia sequeyanijia, mashaja quia quishacari, tama quiajanijia quia toque cushijia, quia quianura quia panishaqui. Saniniujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniaquishaquiria.

¹⁹Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutianiya na mosaanucua. Na nuhuaji, Jesuuri na sequereeri:

—iPueyaracaanu cua tojijia quia quiri! Pa quiaarej.

Juanjiniiji pohuatasano

²⁰Pedro tacatesacari na nijiniara, Jesu panishano pueyano niqiriini na nuhuaji sacuaanoori. Nojuacuajaari janiya. Janiyari

noo pueyanocujani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” ²¹Quiarijjiani, Pedro niquishacari janiya saniniuujia, Jesu nequesotareeri:

—Jiyaniijiana, janiya jaara naa mosaanutaniyacuaani, ¿nojuajaarijataj, taa na miishaanutaniyarini?

²²Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuaaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojjia quia quiri.

²³Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajeyaquiri-

quianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuaaanuji tacatemohuajaatijia, quiajanijara naajaa”.

²⁴Janiyacuaajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵Jesuuri jyanohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetunecaacuajijiana.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosanutaniya”

1 ¹Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijosano coteequiaari mijiriani. Puetunu na miishanojuanaa naajiotaquiaarinijia, mariyata na niishitijosano na coteenujiniji, jaara tacanishaaquiaariuhua jiyocuacaanu na Queta na quiniuhua. ²Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³Jesu cusun nuhuaji, nojuajaari muetaquiaariuhua na saquiriojosano pueyacua. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocojoquiaariiri taa Pueyaso jitianutaniya na muerasuni.

⁴Nojoritia na pocojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijiaara cua Que cuaara niqutioorajaara na Sohuanu nijaniya. Nojuajaari cua sequequiaari na niqutionutaniya nijaniyana, taa cua caminiujuquiaari tari niaaracuajani.

⁵Naa sequequiaari nijaniyacujajinija: “Tiuquinijona Juanri nia tiuquinijioquiaari moojinia, Pueyaso tojjijara nia jatasacari. Pueyasoori saniniujia na Sohuanu nioojiajinia tiuquinijionutaniya, seetanujuanaa Pueyaso tojjijara nia quiniuria”. Quera niaacua tiuquiniutianiyacuajaari. Naaratej, nia sashiri.

Jesu tacasacariuhua jiyocuacaanu

⁶Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijara jiyatesaanutaniya quiarijia Israel pueyara, maninia pa quiniuhua tama pa jiyaniijiatajaaja, taa pa supuetanaa quiquiaaricuaani?

⁷Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyaniijara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸Naajaa, niaari Pueyaso cumaaca masenutaniyacujaja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niqiuara Jerusalén tiacajinia, puetunu Judea jiyajiniajanaanio, Samaria jiyajiniajuhuaj. Naa pohuataaanutaniyajaariuhua puetunu jiyacajiniajanaa, socua tucuaacaanu jiya puequeetujinianio.

⁹Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niqiuayacuiniucujaji nojuaja. ¹⁰Nojori mautasacari jiya cajiniocua Jesu tacasacari, canashiyajiqiji, caapiqui pueyari nojori shuriucua nujuatuquiaari. Nojori toqueeri jiyano hua cohuajaque quiriqiaa. Nojoriiri jiyocuacaanujinio Pueyaso seya quiquiaari. ¹¹Nojoriiri Jesu pueya sequeeree:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niqiriiri tacaanocujajani, niaari naa na niqiniutianiya tacatehuanohuajuahuaj.

¹²Nojoriiri jiyacari Olivo nacuhua tuhananuucua quiriqiaa. Pueyaso seya nuhuaji, Jesu pueyari Jerusalén tiacajiniuhua

tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuaacaanu nojori rucuanenura samaatenu* juuca. ¹³Nojori tiuquijiosacari Jerusalén tiacajinia, nojoriiri nojori quijia tiacajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujajani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujajani. Quiquiaarijiaariuhua Simón, cante tari quiquiaari Romano pueya jatanu panijiacujajani. Mariyata quiriqiaari Judas, Santiago tarajanu. ¹⁴Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Maríata, Jesu tapueyocucatanio.

Pueya saquiriojosacari Matías Judas niti

¹⁵Nojori sashishacari Pueyaso Sohuanu tii, tamonu juuca, Pedroori nujuaquiaari pueya niqiuara na sequenura nojori. Naa naasucuatuhuj ciento veinte pueyari tii quiriqiaa puetunujuanaa. Naa nojori sequeeree:

¹⁶—Cua tapueyocucanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitj, Judasri Jesu monaarano niishitiquianu tee Jesu quiriqiaani, nojori na quiatenura. Judasri cunora niqitiosaacanu cumaneeca, naa nojori na niishitiniucua Jesu quiasaanura. ¹⁷Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriqiaa juhua pajaniyajuhuj.

¹⁸Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuacaanuji tiqianu na nacaraari. Na saracaari cocuaretasee. ¹⁹Jerusalén tiacajinia quiniia jaara na niishiquianu, nojoriiri cuno cuhuariquiaa sesojoree “Acéldama”. Acéldamaari pueyano rupaajinia sequeya “Nanaca samitia masesano cuhuariquiaa”. ²⁰Judasjinijiiri naa naajiotasaaquiaarijuhuaj tariucuaacaanu supuetana David jaaquequejojuajinia. Naa sequeyari:

“Na quiquio cuaara quiriia shaaco. Cuaara quiriia sanaaca, camaruuju”.

Sequeyajaariuhuj:

“Tamonu pueyano cuaara jiyatesaaria na poonijosano miiriquiano na niti”.

²¹Cuarta Jesu saquiriojosano pueyanaa, niya quiyacuaja pueya, canapuetucujaja pa tarajaquiaarini pueyaracaanu pa Jiyaniijia Jesu quishacari pata. ²²Nojoriiri Juan niqiquiaarijuhuaj Jesu tiuquiniyano moojinia, Jesu tacasacariuhua jiyocuacaanunio. Canapuetucujaja puetunu nio niqiquiaarijianaani, niquriyatu nojorijinijinio cuaara jiyatesaaria Jesu jiyaramiquishanora, pata na quiniuria, Jesu samitianujiniji na pohuatanurajuahuaj.

²³Naaratej, pueyari caapiqui pueya saquiriojoquiaari. Cuniqiji quiriqiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriqiaajuhuj, Matías. ²⁴Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni,

quia jiyaramiquishocoriqiano na quiniuria, Judas niti poonijioriquiano. ²⁵Judasri quia niqutiosano poonijosanojiniji catecanu sesa na miiniuucua, naquiya miishaqui na quianura, sesa mijia na quiniuucua.

²⁶Na nuhuaji, pueyari naajosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhanoraja quiquiaariuhua doce.

Pueyaso Sohuanu tiuquishacari

2 ¹Pentecostés juuca jaara quiquiaari, puetunu Jesuucua tiuuniaajanaari rerejono quiquiaari tamonu tiajinia Jerusalén tiacajinia. ²iCanashiyaquiji, paratuuri tojishaquiaari jiyocuacaanuji, juhua paratu pocuaano jiyanoehua cojuata! Jiyanoehua tojishaareeri cunó tiajinia tee Jesu pueya cajitiuriquiaacuajani. ³Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. ⁴Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquiriri. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

⁵Cuno quishacari, queraatia Judiocuaca puetunu jiyacajinijiniojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojtiajaca quiquiaari. ⁶Nojori tojishacari cunó cojuatunenu, nojoriiri cuquere tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyanoehua cushitiirii. Naatej, puetunu rucoonaajanaari tama na jiyajinijinio rupaacajaaja tojtiajariquiaa, cunó pojori pocosacari. Nojoriiri maja na niishiniu quiquiaari casaara naa nojori miiriini. ⁷Nojoriiri jiyanoehua jiuujiatecoree. Tama sequetooreejaarijia:

—iJuhuej! ¿Cuno pojoriti maja Galilea jiyajinijinio pueyacuaja naa pocoyaniquitij? ⁸¿Taa nojori pocuaa puetunu coteenu pa rupaacajanaani? Pajaniyacujaari queraatia tamaatia jiyacajinijionio, puetunu tamaatia rupaaca pocuajacajanaa.

⁹Seetanujuanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. ¹⁰Quiquiaarijiaariuhua Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucujaji quiquiaari. Roma tiacajinijinio pueyari tii quiquiaarijuhuaj, canapuee Jerusalén tiacajinia pacuna quiquiaaricuajani. Puetunu cunó pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojjiacara nojori quiniu panishacari. ¹¹Creta jiyajinijinio pueyari tii quiriquiaajuhua, Arabia jiyajinijinionio. Puetunu cunó jiyacajiniajanaari tamaatia rupaaca pocuajaca quiquiaari. Nojoriiri socua naa sequetooquiaari:

—¿Taateni? iPuetunu pajaniyajanaari cunó Galilea pueya tojtiaani Pueyaso cutara miishano pohuataano, tama pa coteenu rupaajiniaajaaja!

¹²Puetunu nojorijianaari jiuujiaateriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casa na miitiuyajaanonjoni?

¹³Tamasaca nojorijinijinoori saaja Jesu pueya macatirii.

Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuata.

Pedro pohuatasano pueya niquiara

¹⁴Jiyacaritij, Pedroori juhuacatecara pocuaree cunó pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojtiare casaa cua sequenutaniya nijaniyani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵Niaari canaa jiyaniya mashaasequenuyano. Pananucuajaari shusha taqueejia. Maja canaa mashaasequenuunu. ¹⁶Niaari canaa tojtiaa tamaatia rupaaca pocuaano. Niocuajaari tariucuacaanu Pueyaso sequesano caminiujiunia Joel pohuatasano. Cuno niaa na niquiyani, cunocuajaari na sequesano, shusha tohuateyani. Nojuajaari naa sequequiaaritij:

¹⁷“Pueyasoori naa sequeyauqij: ‘Quera jiya puequesacari, janiyari cua Sohuanu niqutionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niqutiniutianiya mashiquiori juhua na maquenujia. Cua niishishano niishitiojonutaniya saaquiapue na maquenujiniajaariuhua. ¹⁸Cuno quishacari, janiyacu cua Sohuanu niqutiore puetunu cua tojtianaajanaani, canuu, maajipohuanio. Nojoriiri janiyajiniji pohuatanutaniya pueya niquiara. ¹⁹Puereeta cua miishanoori jiya cajiniocua niquishaanutaniya. Cua miishanoori jiyacu niquishaanutaniyajuhua, pueya na numootenura. Nanacaari niquishaanutaniya, mani, jiyanoehua najacanio. ²⁰Pananuuri ninishiquiria quiniutianiya. Racaari juhua nanacara quiniutianiyaju-hua. Naa coteenutaniyari jiya puequenura. Na nuhuaji, Jiyaniijiajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhua. Jiyanoehua shanohua quiniutianiyari na rosesacari. ²¹Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria’”.

‘Supuetana Joelri naa naajiotaquiaari Pueyaso sequesano tarijiatej. ²²Naaratej, socua cua tojtiare cuarta Israel pueyanaa. Jesujiniji nia pohuatanutaniyanijia, Nazaret tiacajinijinio pueyano. Pueyasocujaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanoehua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Nijaniyacujaari maninia niishiya puetunu maninia na miishanojuanaa. ²³Saniniuuja, Jesu jaara niqutiosaarucuaa nijaniya, niaari na qiarucuaa juhua sesa mijia. Na nuhuaji, niaari Pueyaso tojiyashijaca pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocujaari niishiquiaari naa mosaanutaniyari Jesu. ²⁴Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. ²⁵Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. ²⁶Naaratej, coojiaari timirii. Cua niti taquiriocrateree cua shuquiriniutianijia. ²⁷Naajuhua, cua cusosacari, cua queteeri juhuajaniya quiniutianiya, cua niishishacari quiaari cua tarinitiaquiniutianiya macunucua quiquiojinia. Quiaari cua shu moquijiaaquinutianiya saa maninia mijiaja cua quishacari quia niquiara. ²⁸Quiaari cua niishitiojoree maninia cua miiniuria, pueyaracaanu quijiaa cua quiniuria. Quiaari jiyanoehua cua shuquiriniutianiya quiata cua quishacari pueyaracaanu”.

²⁹Cua pueyanaa, paacuajaari niishiyani, pa supuetanaa jiyaniijia Davidri jamosaaquiaari na cusosacari. Na jamaari

niya quiyajaa Jerusalén tiacajinia. ³⁰Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajanijajini, jiyanhua quia nuhuaji. Cuno pueyanoori Jiyaniijia cua jiyatesano quiniutianiya quia niti. Nojuajaari cua jiyarocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

³¹Pueyanaa, paacuaajaari niishiyani Davidri Pueyaso sequesano caminiujunua quiquiaari. ³¹Naacuajitij, Davidri Cristojiniji pohuatariquiaa jiyanhua tariucuaaanujiniji, juhua tari na niqishano. Pueyaso Sohuanuuri na nishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquinutianiya macunucua quiquiojinia”, mariyata naa na sequesacari: “Na quete moquijiaaquinutianiyari”.

³²Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niqiquianuni. Janiyari nia pohuataa seetana canaa niqishanojuanaani. ³³Cutara na cumaacata, Pueyasoori na tacaniriohua na miaquetajara cajiriquiano, Jiyaniijiajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniujia quiarjia canaa na niqitioree. Naaratej, niari canaa niqiri tamaatia rupaaca pocuaano. ³⁴Majaari David tacanu quiquiaari jiyocuaaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: ³⁵“Cua miaquetajara quia cajishijiaara, janiya cuara quia paraa shocotarejaatija”.

³⁶Cunora, puetunu niajanijajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijiajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijia. Majaari canaa pohuatasanojiniji nia taacuanu pueyanaa.

³⁷Pueya tojishacari naa Pedro pohuatasantej, nojoriiri tetecatuquiaari. Pueyari saniniujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸Pedroori nojori riucaquiaari:

—Nioojia nia tacatore sesa nia miiniujiniji. Niajanija cuara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqitiore na Sohuanu. ³⁹Pueyaso sequesacari nojuaja na Sohuanu niqitionutaniya pueya, cunoori niaaranocuaaja, nia niqiohuanonio, tucuaaanu quijiacarajuhaj. Pueyaso Sohuanucuaajaari puetunu pueyajanaa niqitiosaanutaniya, cana pa Jiyaniijia Pueyaso sequeya na muerasura na quiniuriacuajani.

⁴⁰Pedroori jiyacari pueya pohuataree queraatia socua Jesujiniji na niishishano. Jiyanhua nojori nacasureeri. Naa nojori sequeeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiquiojinia.

⁴¹Pedro pohuatasanoocua tiunuaari tiuquinijiosaquiaari. Cuno juuca, tres mil pueya naasucuaari coteenu Jesu tojitianaa rupenaara quiquiaari. Pueyaso pueyari naa canequiaaritij.

⁴²Puetunu nojorijianaari maninia tojitiaquiaari pueyaracaanu Jesu jiyaramiquishano pueya nishitiosano. Nojoriiri jatiqii quijia maninia. Majaari nojori juayonuujutanu quijia. Nojoriiri pueyaracaanu rerejojua neecaru serotanura Jesu cusonu niishiniuria. Mariyata Pueyaso seconuujua pueyaracaanuuri.

Panitiojuaca Jesu tojitianaa quishacari juhua tapueyocucata

⁴³Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriqitiuri. ⁴⁴Puetunu Jesuucua tiunuaajanaari maninia rupetooquiaari juhua

tapueyocucata. Nojoriiri maja jamuejaca quiquiaari. Casamiriaca pueyari na casami niqitiojoquiaari nareja casamiijuniucua pueya. ⁴⁵Tamasacaari na jiiatasano casami niqitiojoquiaari na cumaneeca na masenura na casami sami. Na cumaneeca na masenu nuhuaji, nojoriiri tamasa niqitiojoquiaarijuhuj, casamiijuniucua jiiatanura puetunu nojori panishanojuanaajuhuj. Tamasaca pueyari na cuhuariquia niqitiojoquiaari nojori jiiatanura na cumaneeca, tamasa na naacunarajuhuj. ⁴⁶Nojoriiri jatiqii rupetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniajaaja nojoriiri rerejojua, neecaru neecasenura Jiyaniijia Jesu cusonu nojori niishiniuria, mariyata jatiqii nojori miaquenuunura nojori shuquiriniutia. Nojoriiri maninia jiuujaraca quiquiaari. Nojoriiri maja tamonu pueya shocotanu panijiaa quiquiaari. ⁴⁷Nojoriiri pueyaracaanu Pueyaso maninuhuaqueetariquiaa nojori shuquiriniutia. Puetunu Jesuucua tiuyashijiaa pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

Sesarunocua pueyano jecacasari

3 ¹Tamonu juuca, Pedroori Juanta tacatariquiaa Pueyaso Secojoua tiajinia. Tari quiquiaari pananu piriushacari. Nojoriiri jiyacari quiojonu jiiatiquiaari Pueyaso seconura Secojoua tiajinia. ²Jiyacaritij, tamonu sesarunocua pueyanoori tii cajitiariquiaa Secojoua tia tohuatayaji. Nojuajaari naa rasanohuanaja quiquiaari. Pueyaracaanu potojotasaaquiaari Pueyaso Secojouajinijia, pueya na mashiniquiniuria cumaneeca nojori tiuquitiasacari. Na cajitiasaqui tohuataya sesa quiquiaari “Tohuataya Maniniu”. ³Sesarunocua pueyano jaara niqiquiaari Pedro, Juannio, nojori tiuquitianu panishacari Secojoua tiajinia, nojori maseree juucua na cumaneecaari. ⁴Pedroori Juanta na shootiaree tacuriitia. Jiyacaritij, Pedroori na sequeeri:

—Canaa quia niqiri.

⁵Sesarunocuaari juucua shootiariquiaa nojori. Cumaneeca niqitiosaaquiano jyaniriquiaa juucuaari. ⁶Pedroori na sequequiaari:

—Shaaqui cua cumaneeca. Shaaqui tojetaarucuaajanaa.

Naajaa, cua jiiatasanta quia naacureera quiarjia. Quia sequeya Jesucristo sesajinianijia: “Quia sanere. Quia rucanerejuhuj”.

⁷Pedroori na juashiquajiniji na quiaquiaari. Na nujatereeri. Na niohuacaari jiyacari ritia jeequequiaari na sanesacari. Na sairi maniniujiaacara quiquijuhuj.

⁸Sesarunocuaari juhuacatecara rucanequiaari. Nojoritia tiuquiquiaari Pueyaso Secojoua tiajiniaari. Maninia rucaneriquiaari. Jaacuatariquiaari. Pueyaso maninuhuaqueetariquiaajarijuhuj. ⁹Puetunu pueyajanaari na niqiquiaari rucaneyano, Pueyaso maninuhuaqueetaanojuhuj. ¹⁰Puetunu pueyajanaari na niishiquiaari nojuajaari sesarunocuaaja, Secojoua tiajinia tohuataya Maniniujinia cumaneeca mashiniquijiojuatej. Pueyari cunora jiuujiatequiaari. Jiyanhua shiriqitiquiaariiri.

Pedro pohuatasacari Pueyaso rupaa pueya niqiiara

¹¹Sesarunocuaari Pedro juashiquia carteyaquiquiaari, Juan juashiquiano. Nojoriiri Pueyaso Secojouajinia nujuaturiquiaa tamocora. Nojori nujuatasaquii pueya jyaniquishano tariucuaaanu jyanijia Salomón canujucojojua quiquiaari. Puetunu pueyajanaari nocua netecuatiquiaari na shiriqiniutia. ¹²Pedro niqishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini?

¿Casaara nia niqititaa canaani? ¿Niaate jiyaniya canaa na niohuaca jecareeni? Maja canaa. Majaari canaa cumaacata na jeequenu quiri. Naa naasucuaari jiyaniya canaari nio miiriini socua maninia miijia canaa quiniucua Pueyaso niqiiara tamasa pueyajiniji. ¡Maja! ¹³Jesuucuaajaari na jecarohua!

Nojuacuajaari na Que Pueyaso jiyatesano Jiyaniijajanaa na quiniuria. Jiyaniijajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricuaajani: Abraham Jiyaniijia, Isaac Jiyaniijiano, Jacobo Jiyaniijajuhua. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijajanaa na quiniuria. Niaa cutaraari Pueyaso Niyanu niqutiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiqianu na cartesaanura. ¹⁴Niaa maara maninia pueyanoocuaaji tacucanu saniya cutara, niaari pueyano puecoojuaacua shiriiqutiurii saaja Pilato cartenura jiyano sesoriquia pueyano seque. ¹⁵Niaari naa motecanu pueyano samiitianiijacuajatej. Naajaa, Pueyasoori na samiitianiqianuhua macujiniji. Canaari na niqiquianuni. Naacuajitij, canaari nojuajiniji nia pohuataani. ¹⁶Nio sesarunocua pueyanoori Jesuucua tiuurii. Naacuajiti jeequerohuari. Nojuacuajaari sesarunocua quiquiaari taa nia niqiquiaaricuaajanoj. Jesuucua na tiushacari, na cuaqueya cumaquiriiri. Na cuaqueyari seetanujanaa jeequerohua maninia, taa nia niqiyacuajanoj. ¹⁷Cuarta Israel pueyanaa, quiarijia niishiyaniijia, majaari nia niishiniu quiqianu casaa nia miiqianuni. Majaari pa camarucua niishiniu quiqianujuhua. Niaari Pueyaso Jiyarosano mocanu nia niishiyaquishacari cante nojuaja quiqianuni. ¹⁸Naacuajitij, Pueyasoori na sequesano tohuateecanu, tarijia na niishitishano na rupaa caminiujuninaa. Seetanujanaa, puetunu Pueyaso sequesano caminiujuninaajanaari pa supuetanaa niqiuara poojotaquiaari: “Pueyaso Jiyarosanoori naquiya miishaanutaniya”. Jesuuri naa miishaacanu taritij. ¹⁹Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miiniu tuujusaanura. ²⁰Naacuajitij, pa Jiyaniijia Pueyasoori na naata juhua maniniushiquiariria jyatenuhua pajaniyara, shuquiriaatia pa quiniuhua mijiria na jiyarosacariuhua Jesu. Pueyasoori tarijia na sequequiaari pa Jiyaniijia na quiniuria. ²¹Nojuajaari jiyocuaaanu quiqianuni na Que shuriucua, Pueyaso cuaara tucutarejaatijia puetunu tariucuaaanu na pohuatanishanojuanaa na sequenu panishano caminiujuninaa. ²²Moisés cuajaari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pohuataa tama nia niqiuoacuajinino supuenojuaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. ²³Canapete cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

²⁴Pueyanaa, puetunu Pueyaso sequesano caminiujuninaajanaari Moisés nuhuaji naa Jesujiniji pohuataquiaari jiuuhua. Naacuajitij, Samuelri Jesucristojiniji pohuataquiaari taa na niniutianiyanu. Naajuhua, Samuel nuhuaji, puetunu Pueyaso sequesano caminiujuninaajanaari naa pohuatanuquiaarijiuhua. ²⁵Puetunu Pueyaso sequesano Jesujinijianaani, cunoori quiarijia pajaniyara, taa Pueyaso pohuataniquiaari tariucuaaanu na sequenu panishano caminiujuninaacuaajani. Nojoriiri pa supuetanaa quiquiaari. Pajaniyaranooariuhua Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanoiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajinijanaacuaajani”.

²⁶Pueyaso jaara na tojijia Niyanu samiitianiqianu, coteenu na jiyaroree pocuuri poojia tacatoriquiano, sesa pa miiniu pa cartenura, shuquiriaatia quiijara pa quiniuria.

Pedroori naa pohuataquiaari pueya niqiaratej.

Judiocuaca camarucua nequesoreesacari Pedro, Juannio

4 ¹Pedro pohuatasacarijia pueya niqiuara, nocua nijioquiaariiri pueyacuara secojonaa, Pueyaso Secojojuua tia cojuanaata, Saduceocuatania. ²Nojoriiri Pedro tojiquiaari

pueya niishitiojiyano. Nojuajaari pueya niishitiojoriqiaa macunucuaari saneecuatuunutaniuhua na jamacajiniji, naatej taa Jesu samiitarihuacuuaani. Cuno jiyaniijianucua jaara naa tojiquiaari sequesihanotej, nocuaji jiyanohua juaaquiocuaariiri, na ruuretasacari Pedro sequesano. ³Cuno juaaquiocuaariiri Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiariiri. Nojoriiri tii juhuaquequiaari nujuatejojuajinia. ⁴Naajaa, queraatia pueyari Jesuucua tiuucuaari Pedro pohuatasacari Jesujiniji. Quera cinco mil saaja canuuri tari Jesuucua tiuuninaa quiquiaari. Maajipohuari serojosoo quiquiaari.

⁵Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuataanaa nojori nequesoreenura. ⁶Anásri tii quiriquiaajuhua. Nojuajaari pueyacuara secojonaa jiyaniijia quiquiaari. Caifásri tii quiriquiaajuhua, tamonu Juannio, Alejandronio, mariyata puetunu secojonaa jiyaniijia tapueyocuaanio. ⁷Pedro, Juannio, nojoriiri nujuatejojuajiniji tohuatejosaaquiari. Nujuatejosaaari jiyaniijianucua tajiniaari. Pedro shocua, Juan shocua cajituniiaari nojori nequesoreere:

—¿Taa nia miirucuaa noonijia, sesarunocuatej? ¿Cana cumaacata nia jeeocarohuacuuaanoj? ¿Cante nia sequecanu naa nia miiniuriani?

⁸Jiyacarij, Pueyaso Sohuuanuuri Pedro jiuujia cumaquiucuaari Pueyaso niishitijata na pocuanura. Naacuajitij, Pedroori naa nojori riucuaquiaari:

⁹—Canaa camarucuaanaa, nia pohuatareera sesarunocujiniji, taa na jeequerohuacuuaani. ¹⁰Niaa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyanaa niishiniuriajuhuaj. Nio pueyano niya nujuuaani, nojuajaari Jesucristo cumaacata jeequerohuacuua. Niaari Nazaret tiacajinijinio Jesu cusojucuanu niyacutesanojinia. Pueyaso cutaraari na sanacanuhua macujiniji, pueyaracaanu na quiniuhua. ¹¹Niajanitari juhua saitia tijaonaa Pueyasora. Nia tiasacari, niaari maniniujiajau saajia jataquiaari, nia jyanishacari sesarujau naasucua. Na camarucuaari saniniucua sequeya: “Cuno nia jatasano saajiani, cunoori saniya cua maniniujiajau saajia”.

Niaari naa Jesu jataquiaari juhua saajia sesarujau. Naajaa, Pueyasoori na niaquiaariuhua socua maniniushiqui. ¹²Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jiyaniqiniu quiquiaari cante pocuaji tacuriquianoni. Saaja Jesu cutaraari sequesaaquiari pocuaji tacuriquianora.

¹³Judiocuaca camarucuaari jyanohua na namijiaa riunitiquioquiaari nojori niqishacari taa Pedro, Juan seetanujanaa cumaacata pohuataquiaari nojori niqiarani. Nojoriiri Pedro, Juan niishiquiaari nojoriiri seetanujanaa maja puera naajionuujuaa quiquiaari. Nareja poonijionuujuaa pueyajinijinio quiquiaariiri. Naa nojori niishishacarij, nojoriiri seetanujanaa niishirii nojoriiri Jesu cojiniaa quiquiaari.

¹⁴Sesarunocua jeequenohuari cuniqui nojori shuriucua nujuariquiaajaacuhua. Naaratej, jiyaniijianucuaari socua sanaajetaquiaari. Saaja niishiriojonuuriquiaari. ¹⁵Camarucuaari Pedro, Juan tohutanijioquiaari tamocora nojori tajiniji. Jiyareta camarucuaari tama pocoojoquiaarijaaja. ¹⁶Naa sequetucuaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeecasoo. Nojori cuajaari tari maninia na niishitiya. ¹⁷Nio pojori pa piriyojore juhuari, maja socua quiarijia nojori pohuatanura Jesujiniji pueya niqiuara, nojori miishano paaqueyaquiniuria socua niya pa tiacajiniani.

¹⁸Camarucuaari socua piqiaariuhua Pedro, Juannio. Nojori nacasuree jyanohuari, maja socua quenaaja nojori pohuatanura Jesujiniji pueya niqiuara.

¹⁹Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijaniyani? ¿Taa nia sequeyani jiyaniijianucuaanaa? ²⁰Maja cutaraari canaa naata tarinitianu pohuatanu canaa niquishano, canaa tojishanonio.

²¹Camarucuaari nojori piriyajoquiaari juucuohuaj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii.

²²Pedro jecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquiniuria nojori

²³Pedro, Juan jaara cartesaaquiaari, nojoriiri narta Pueyaso pueyacua quiojoquiaariuhua. Nojori pohuatatureeri Judiocuaca camarucua sequesano nojori, camarucua nacasunaa sequesanojuhuaj. ²⁴Na tojishacari camarucua piriyosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipininia, jiyanio. Shoniacu caminiaari quia shipinishanojuhuaj. Puetunu casaajanaari quia shipinishano. Quiaari jiyano hua maninia. ²⁵Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujini juhua tariucua miishano. Quiaari naa na pohuatequiaaritij:

“¿Casaara jiyacua quinia pueya juayani? Pueyari najuhuaana sesa niishiriojoriquiaa juucua. ²⁶Jiyajini jiyaniijianucuaari na juaaquiaca sanetaree. Queraatia tiacajini jiyaniijia camarucuaari Jiyaniijia Pueyasocua roojotooree, na jiyarosano Cristocuaranio”.

²⁷Pueyasonaa, naacuaaquinatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucacata, Israel pueyatano. Quia Niyanuucua roojotoocanuuri, tama quia Jiyarosanoocuarajaaja. ²⁸Naa nojori miiniucuatej, nio pueyari tari quia miiniu panishano miirucuaa, taa quia sequequiaari tariucuaanucuaajani: “Cua Niyanu cuara mosaaria puetunu pueyacuarajanaa”. ²⁹Canaa Pueyasonaa, quia tojishuriucuaraj. Nojoriiri quiarjia canaa miananojiya saniniuujia. Canaacuaajaari quia seyani. Canaa jiuujia quia cumaquiri quiarjia, canaa pohuatanura socua quia rupaa canaa puereyaquiniutia. ³⁰Cusosuhua cuara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuara mijiosaaria quia cumaacata pueya niquishocori-quiano. Nojuacuajaari saa maninija.

³¹Nojori puecasacari secojonu, nojori quishaqui tiari canashyaquiji jiuuquiutiaquiaari. Pueyaso Sohuanuuri puetunu nojori jiuujiajania tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

Jamueyashijiaa Jesu tojtianaa quishacari

³²Jesuucua tiuuniaari maninia juhua rupuetootesano quiquiaari puetunujuanaa. Nojoriiri juhua seetanujanaa tapueyocacataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuujia puetunu narta Jesuucua tiuuniaarajanaa quiquiaarijuhuaj. ³³Jesu saquiriojosano pueyari Jesu samiitanujini poojotaquiaari jiyano hua cumaacata. Naajuhuj, Pueyasoori puetunu Jesuucua tiuuniaajanaa naacuriquiaa jiyano hua, shuquiriaatia nojori quiniuria. ³⁴Puetunu Pueyaso pueyajanaari na panishano jiiitiaquiaari puetunujuanaa. Nojorijini jiyano jaara cuhuariquia jiiitiaquiaari, tiano, nojoriiri na niqutioquiaari cumaneecara. ³⁵Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniuujia casamiijiu Pueyaso pueya na serotaquiaari, nojori

jiiitanura na panishanojuhuaj. ³⁶Nojorijini jiyano, tamonu pueyanoori quiquiaari. Na sesaari José, Levita* pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. ³⁷Bernabeeri cuhuariquia jiiitiaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamiijiu narta Pueyaso pueya niqutiojosaanura saniniuujia.

Ananías, Safira sesa miishanojiniji pohuatasano

5 ¹Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecarajuhuj. ²Ananíasri na cuhuariquia samijini quiyataquiaari nera. Na cureno pataquiaari Jesu saquiriojosano pueyacuaari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiri quia Ananías niqutiosacari nareja na cumaneeca. ³Ananías niqutiosacari na cumaneeca, Pedroori na sequere:

—Ananíasnaa, ¿casaara quia tiuquiniri Sesaaca quioojiajania, quia sapojonura Pueyaso Sohuanu juucua ni? ¡Nojuacuajaari quia niishitiqui nio cumaneecaari maja puetunu quia masanojuanaa quia cuhuariquia samijini! ¡Quiaacuajaari tiji queyataree! ⁴Quia cuhuariquia quia niqutioyacuquishacarijia cumaneecara, cuno cuhuariquiaari quia casaa quiri quia. Na nuhuaji, quia jaara quia cuhuariquia niqutiooree cumaneecara, quia cuhuariquia samiiri quia casaa quiri quiajuhuaj. ¿Casaara naa sesa quia niishiriojoreerini? Naa sacuaatia quia miishacarijia, majaari quia sapojonu quirii parta pueyano. ¡Quia cutaraari Pueyaso sapojoree juucua!

⁵Ananías tojishacari naa Pedro sequesantej, imacuuri pojoquee! Puetunu pueyajanaa jaara tojiniuuquiaari nocuaji, jiyano hua shiri quiquiaariiri. ⁶Mashiquioriiri na jiunioquiaari toquejia. Na nuhuaji, na patuquiaari na jamonuraari.

⁷Jiuujianaraca hora nuhuaji, necocuaari juhuajania tiuquiquiaari Pedrocuajuhuj. ⁸Pedroori na nequesotaree: —Cua sequere, ¿niojuanaate nia cuhuariquia sami quiriucua?

Na riucuaaree:

—Jaa, niojuanaacuaaquinatejaj.

⁹Pedroori na sequere:

—¿Casaara naa nia roojotoorucua Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarjia quia panutanijajuhuj.

¹⁰Jiyacaritij, maajiiri macu pojoquee Pedro shuriucujuhuj. Mashiquiori tiuquijiosacariuhua, nojoriiri Safira niquishuhua pojijanojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. ¹¹Puetunu Pueyaso pueyajanaa, tamasa pueyano, nojori jaara tojiniuuquiaari puetunu nio miishanojinijianaa, jiyano hua pueretuquiaariiri.

Queraatia mijiosacari Pueyaso cumaacata pueya niquiara

¹²Jesu jiyaramiquishano pueyari jiyano hua cutara casaa mijioquiaari Pueyaso cumaacata. Queraatia pueya naatanijioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuaaanu jiyaniijia Salomón canujuucojojuajinia, Pueyaso Secojoua tiajia. ¹³Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijini sequetujua: —Cuno pojoriiri maninia pueya.

¹⁴Queraatia pueyari Jiyaniijia Pueyasocua tiuquiquiaari, canuu, maajipohuanio. ¹⁵Naajuhuj, cusosuhuari patootasaquiaari na maquetucujia nuujinijia. Pueyari naa niishiriojioquiaari, Pedro jaara cusosuhua shuriuquico tajimia,

cusosuhuari naataconutaniuhua Pedro naaqui jaara nojori caco netema. ¹⁶Queraatia Jerusalén tiaca shocua quiniaa pueyari na cusosuhua patootaquiaarijiuhuj, Jerusalén tiacajiniara. Samaruhua sesosano pueyari jaatucunuusaaquiaarijiuhuj. Puetunu pueyajanaari naatanijiosaaquiaari.

Pedro, Juan nujuatejosacari nujuatejojuajinia

¹⁷Naaratej, pueyacuara secojonaa jiyaniijia, nata quiniaa narta Saduceocacano, nojoriiri juaaquiouiaari shocotano nojori quishacari. ¹⁸Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. ¹⁹Pueyaso seruuri niucua jiyocuaaanuji nojoriicua rosequiaari. Nujuatejojuu tohuateya riataseeri. Na tohuatejosacari Pedro, Juannio, nojori sequereeri:

²⁰—Juhujaniya nia quiaarohua. Pueyaso Secojouua tijajinia puetunu Jesujiniijianaa nia pohuatare pueya niquiara. Nia pohuatarejuhuaj taa jatanishano pueya nia quiya quiarijiani.

²¹Nojoriiri Pueyaso seru sequesano tojiqiaari. Nojoriiri tariquiucaji quiojoquiaari Pueyaso Secojouua tijajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniuuja quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreeso-coriquiano. ²²Na pueya jaara tiuquitiaquiaari nujuatejojuajinia, majaari nujuatejosano na riuriatatu quishii nujuatejojuajinia. Nojoriiri tacaretacuhua na shaacanu nuhuaji. ²³Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, ishaacoori quiriqiaa!

²⁴Secojouua tia cojuanaa camarnu, mariyata pueyacuara secojonaa jiyaniijianucuaari tama sequetooquiaarijiaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiya-tej?

²⁵Jiyacaritij, tamonu pueyanoori camarucuaacua tiuquishii. Naa nojori sequeeseeri:

—iNoo pojori, niaa na nujuatejocanu nujuatejojuajinatej, nojoriiri juhuajaniya pueya niishitiojonuya Pueyaso Secojouua tijajinia!

²⁶Tari nojori niishishacari tee Jesu jiyaramiquishano pueya quiriqiaani, Secojouua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojouua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaniutia, pueya mariqui nojori jacure saitia saniniuurijia. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaaquiaari. Majaari na caponeesaanu quiquiaari. ²⁷Jaara tiuquitasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrincuaca* tajiniatuhuj. Pueyacuara secojonaa jiyaniijiaari nojori sequequiaari:

²⁸—iMajaquiiri nia niishiniu tojinuu! Canaacujaari tari nia tenujucanu juucuanu maja socua cuno Jesujiniji nia pohuatanura pueya niquiara. ¿Niaate nia numaa shama tojiqianu canaa sequesano? Naa nia niishitiojosacaritij, ipuetunu Jerusalén tiacajinia quiniaajanaari canaacua tiutianutaniya Jesu mosaanu! Canaa sequetunutanitari: “Cuno pojoriiri Jesu motucanu”.

²⁹Pedroori narta Jesu saquiriojosano pueyata nojori riucuaquiaari:

—Seetanujanaari, pueya cuara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijianucua sequesano cuara miishaaria. ³⁰Pueyasoori tariucuaaanu pa supuetanaa Jiyaniijia quiquiaarijiuhuj. Cuno Pueyasojanaa-cujaari niyacutesanojinia nia cusojasano samiitianiquianuhua. ³¹Pueyasoori na tacaniquianu jiyocuaaanu. Na miaquetajara na cajitiquianuuri Jiyaniijianaa na quiniucua, pocuaji Tacuna na quiniucujahuaj. Naa miqianuuri Israel pueya tacatonuhuaa noojia Pueyasocua, Pueyaso jiyanooniuria pajaniya sesa pa miishanojiniji. ³²Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocujaari na tojtianaa niqutioquiaa na Sohuanu.

³³Naa Judiocuaca camarucua tojishacari nojori sequesanootej, juaaquioreeri. Nojori puecoonu panirii juucuaari. ³⁴Jiyacaritij, tamonu pueyanoori narta camarucua tajiniji nujuaqiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojouua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishirojore taa nia miiniutianiya nio pueyani. ³⁶¿Majateeri nia niishiniu taa Teudas miiquiaari quiari naatajani? Nojuajaari jiyaniijiaa quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niyaquejoquiaariuhua. Naa puequequiaariiri Teudas miiniu panishano. ³⁷Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajiniinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijiuhuj. Puetunu na pueyajanaari niyaquejoquiaariuhujahuaj. ³⁸Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaja quiri, shaajenutanitari. ³⁹Saniniuuja, nojori miishano jaara seetanujanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetoojonuuhua, naa nojori nia miishacaritij.

⁴⁰Puetunu camarucujanaari Gamaliel sequesano tojiqiaari. Na nuhuaji, Jesu jiyaramiquishano pueyari tiuquinitiasarohua. Camarucuaari nojori mojooree nareja. Nojori tenujutereeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari carteqesaaquiaariuhua. ⁴¹Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴²Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojouua tijajinia, mariyata puetunu Jerusalén tiacajiniaqueyanaano.

Mashiquiopue mianuutenaara saquiriojosacari

6 ¹Jiyacaritij, Jesuucua tiuninaa pueyari socua canequiaari. Puetunu nio pojorijiniijiniojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiQUIOPUE nia niqUITIOYAQUIQUIAA miaquesanonijia?

²Nocujaji, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatenu, canaa mianuutenura mashiQUIOPUE. ³Cunora canaa tapueyocua-canaa, tama nijaniyajinijinio nia saquiriojore siete maninia miijiaa pueya, niishijiaa, Pueyaso Sohanuraca cutara. Nojori nia searatere nio poonijiosano, maninia nojori mianuutenura pa mashiQUIOPUE. ⁴Canaacua saniniuuja saa Pueyaso secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

⁵Puetunu pueyajanaari na shuquiriniutia naa riucuaquiaari:

—Taaquiriirinij, naacuaaquinateja maninijaj.

Jiyacaritij, pueyari Esteban saquiriojoquiaari. Nojuajaari jiyanohua Pueyasocua tiuuja pueyano quiquiaari. Nojuajaari Pueyaso Sohanu cumaacaraca quiquiaarijuhuaj. Nio pojoriiri Estebanta saquiriojosaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquia tiacajinijinio. Tii rasaanquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juaashiquiaa. Pueyaso secojoturee nojoriicuaaraari Pueyaso Sohanu cumaquiniuria nojori, miaquesano niqUITIOJONAA nojori quiniuria.

⁷Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara secojonaa pueyari Jesuucua tiuuquiaarijuhuaj.

Jesu ruuretajaca quiasacari Esteban

⁸Estebanri Pueyaso cumaacaraca quiquiaari jiyanohua. Pueyasoori maninia na jiitiaquiaari. Naacujitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanujanaa Pueyasojiniji quiquiaari, nojori niqUSHACARI jiyajeneta na miishano Pueyaso cumaacata. ⁹Jiyacariti, tamasa Judiocuacaari Jerusalén tiacajinia quiriQUIAA. Nojori maanuuri sesojosaquiaari “Quioosanojiniji carteqesano pueya”. Quiquiaarijuhuaj Cirene tiacajinijinio pueya, Alejandría tiacajinijinio pueya, Cilicia jiyajinijinio pueyajuhuj, Asia jiyajinijinio pueyano. Puetunu nojorijianaari Estebancua rerejoquiaari nata juayonutanura. ¹⁰Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohanu niishitiojosanota saa maninia pohuataquiaarijia nojori niQUIARA. ¹¹Maja socua nojori rejeretasacari Esteban pohuatasano, nojoriiri tamasa pueya niqUITIOQUIAARI cumaneeca, najuhuaa nojori cuaracashiniuria camarucua niQUIARA Estebancuara. Cuno pueya, cumaneeca niqUITIOJOSAQUIAARI na cuaracashiniuriani, nojoriiri naa sequequiaari Judiocuaca camarucua niQUIARATEJ:

—iTaaquiriirinij, canaacujaari cuno pueyano tojiquianu Moisés sesacaanoni, Pueyaso sesacaanojuhuaj!

¹²Naa nojori sequesacariitij, puetunu pueyajanaari juaaquioree, Judiocuaca camarucujuhuj, Moisés Rootasano niishitiojanaano. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesacariiaari, Israel pueya camarucua nequesoreesocoriquiano tii nojuaja. ¹³Socua pajesaaquiaariiri tamasa, Estebancuara tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niQUIARATEJ:

—Nio pueyanoori pueyaracaanu sesacaQUIAA Pueyaso Secojoua tia. Moisés Rootasano sesacaariQUIOHUARIHUJ. ¹⁴Canaari socua naa na sequesano tojiquiaajaaniuhuj: “Nazaret tiacajinijinio Jesuni, nojuajaari Pueyaso Secojoua tia niyartanutaniya”. Naajuhuj, tariucuaaanu Moisés niishitiojosano pajaniya pa cartetenutaniyaquinaari.

¹⁵Puetunu camarucujanaari na cajitiusaQUII niqUITIARIQUIAA Esteban. Nojoriiri na jiquioco niQUIAARI shacantuca, juhua Pueyaso seru jiquioco.

Esteban pohuatasano

7 ¹Pueyacua secojonaa jiyaniijiaari Esteban nequesotaquiaari:

—¿Seetanutejanaa taa nio pojori sequereecuajani?

²Nojuajaari na riucuaaree:

—Cua panishano pueyanaa, cua camarucua, cua tojitiare. Pueyasoori jiyanohua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarjia Harán tiacajinia.

³Pueyasoori jiyacari naa na sequequiaari:

“Quia tiujiaare quia jiya, quia pueyano. NiQUII quia quiaare, janiya cuaara quia sequerejaatijia, niya quia quishii. Quiocua tii jiyojese cutara”.

⁴Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininoori. Na nuhuaji, niyara pacuquiaariiri, paa tii quiyani. ⁵Jiyacaritij, Pueyasoori juhuanoujaaja maja Abraham na niqUITIONU quiquiaari nio jiya. Naacujitij, Abrahamri maja quenaaja jiya na jiitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqUITIONUTANIYA nio jiyani. Quiaa jaara shaajeyare, quia niQUIOHUARA quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanoujaaja niQUIOHUJU quiquiaari. ⁶Pueyasoori naa pacutequiaari sequenu Abrahamtej:

“Puetunu quia jinianuucujinijio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanohua. Naa naquiya miishaanutaniyari. Tii nojori quishacari, na shoconujunutananiyari cuatro ciento marijia”.

⁷Pueyasoori Abraham sequerejuhuaj:

“Janiyari saniniuujaa cuno taucuaa naminiutianiya quiocujinijio supueno pueyacuaani. Janiyari nojori sanitionutaniya saniniuinijia nojori poonijiotenuucua quiocujinijio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaca quiniutianiya niya”.

⁸Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano nijaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaanquiaari, na queeri neyanu cararaatiuuquia co miatequiaari na camuesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojouquiaari “Israel”. Jacoboori naa miiquiaari necohujuhuj. Necohuari quiquiaari doce canuu. Cuno doce canuu, Jacobo niQUIOHUANI, nojoriiri puetunu pa doce Israel pueyapue supuetanaajanaa.

⁹Pa supuetana Jacobo niQUIOHUAJINIJINIONI, taonuuri sesojosaquiaari José. Tapueyocuaaari José juajiaa quiquiaari jiyanohua, puera na que panishano José quishacari. Majaari nojori niqUITIUNI panini quijia nojuaja. Na queeri socua jiyanohua José panijia quiquiaari na pueranaajiniji. Tapueyocuaaari cunora casami niqUITIOJONAA pueya niqUITIOQUIAARI cumaneecara tarajanu José. Casami

niquitiojonaari José jiyataquiaari Egipto jiyajinia, saniniuuja tii na niquitiosocoriquiano serura. Naajaa, Pueyasoori Joseeta quiriquiaa. ¹⁰Pueyasoori na naacuquiaari naquiya na miishacari. Pueyasoori na jiyatequiaari niishijiara. Naaratej, Egipto jiya jiyaniijia Faraónri na maniniucuaquiaari. Na jiyatequiaari puetunu Egipto jiya pueya camarnurajanaa. Na jiyateree na tia camarnurajaariuhuj.

¹¹Na nuhuaji, miaajenuuri quiquiaari puetunu Egipto jiyajinijanaa, Canaan jiyajinianio. Pa supuetanaa quishacari Canaan jiyajinia, nojori quera titicoquiaari na miajajaara. Seetanujanaa shaaqui quiquiaari nojori miasano. ¹²Jiyacaritij, Jacoboori caminiujiushaaquiaari: “Egipto jiyajinia quiyaquinia trigo*”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquihuani, nojori pa supuetanaacuja. ¹³Coteenu nojori maseno jaara puequequiaari, nojori Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón* niishitiquiaari tapueyocacajuhuj. Naaratej, Faraónri shusha niishitiquiaari tejeno pueyanote José quiquiaarini. ¹⁴Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya. ¹⁵Jacoboori naa pacuquiaari Egipto jiyajinaratej. Na nuhuaji, saaquianoori tii shaajeseequiaari. Necohuari tii puequeseequiaarijiuhuj, tariuca saaquiapue. ¹⁶Na nuhuaji, Egipto jiyajini pacusaaquiaari nojori nucuhua. Siquem tiacajinia nijosaaquiaari na supuetana Abraham raaco. Cuno raari cuhuariquiajia quijia. Abrahamri cuno cuhuariquia masequiaari tariucuaaanu pueyajiniji raa na jitianura necocua na niajara jaara cusoyare. Cuno cuhuariquia masequiaari cumaneecata Hamor niquihuajiniji, Siquem tiacajinia.

¹⁷Pueyasocujaari tariucuaaanu Abraham sequequiaari nojuajaari nio jiya na niqutionutaniya. Quera na niqutionu panishacari, Israel pueyari jiyanoohua canequiaari Egipto jiyajinia. ¹⁸Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoohua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaari shusha roosano cuaara quejoosaaria moojinia. Pa supuetanaari taraatia miiquioquiaari naacuatej. ²⁰Moisésri jiyacari rasaaquiaari. Pueyasoori na maniniucuaquiaari. Na pueyari na jittiaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. ²¹Faraón niyatuuri na paquiaari saniniuuja. Na canashitiquiaari juhua na mueyari. ²²Egipto pueyari Moisés niishitiojuaari puetunu nojori niishishanojuanaa. Puetunu Moisés sequesanojuanaari jiyanoohua tojishano quiquiaari cutara. Puetunu na miishanojuanaari maninia quiquiaarijiuhuj.

²³Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaari, nojori na niquiniuria. Judiocuacacujaari cuno pojori, naa sesojoshiya Israel pueyatani, maja tamonu. ²⁴Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuuja cuno Egipcio pueyanoori. ²⁵Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶Moisésri socua tariqui quiaquiaari narta Israel pueya niquiniuuquiohua. Nojuajaari saaja riuriatasee tama nojori piyotanojuaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitoyaniquitij? ¿Casaara naa nia nootujutoyani?” ²⁷Cuno narta pueyano piquiriquiaani,

nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoreenarani? ²⁸¿Quiaateeri cua monu panijajuhuj, naatej taa quia morucuaa cuno Egipto pueyanocuaani?”

²⁹Moisés tojishacari naa cuno pueyano sequesanootej, ritia mashiquiaari Egipto jiyajiniijiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyoja mueratejoquiaariiri.

³⁰Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucuaneriquiaa cariquia jiyajinia, pueya sesojosano Sinaí tuhananu shuriucua. Pueyaso seruuri tii nocua muetaquiaari nequeru casaja noshijanojiniji. ³¹Moisés niquishacari mani noshijano, nojuajaari shiriiquiaari. Jaara nocua catecanoquiaari na niquiniuria maninia, saaja Jiyaniijia Pueyaso tojirii manijiniji pocuaanoori. ³²Pueyasoori naa na sequequiaariti:

“Janiyacujaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijajuhuj, Jacobo Jiyaniijianio”.

Moisés jaara naa tojiquiaariti, tetecareeri. Majaari mani noshijano na niquini paniniu quiquiaari na puerenuta.

³³Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuuani, niiori cua quishaqui. ³⁴Janiyacujaari cua pueya niquiquiaa Egipto jiyajinia quiyanoni. Egipto pueyari nojori miitaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaariti.

³⁵Israel pueyari tarijia Moisés juaaquiaraicuja. Naa na sequetiquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuj?” Naajaa, Pueyaso cutaraari seetanujanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuquiaari nequeru casaja noshijanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji.

³⁶Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niutiasacari Naatunacu jiyaniishano caminiajuhuj. Naa miiquiaari pueyaracaanu cariquia jiyajinijaariuhuj. Cuarenta marijiaari nojori shocojoquiaari pueyaracaanu nojori rucuanesacari tii. ³⁷Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiara, taa na jiyaroquiaari janiyacuaani. Tama nia niquiohuacuajiniojuaja supuenutaniyari. Niocua saa nojuaja tojiri cutara”.

³⁸Nio Moisésri narta Israel pueyata quiquiaari cariquia jiyajinia. Nojuajaari Pueyaso seruta pocojoquiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojuaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

³⁹Pa supuetanaari saa na ruuretaquiarijia. Majaari nojori tojinu paniniu quiquiaari Moisés. Egipto jiyajinia tacatenu paniquiaariuhua saajaari. ⁴⁰Naacuajitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipiniijorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”. ⁴¹Naacuajitij, nojoriiri na pueyasora shipiniquiaari juhua seru juunu

niyanujua niquishano. Nojoriiri na seya puecooquiaari na shuquiriniutia na juaashiquiata na shipinitushano pueyasooacara. Nojoriiri jiyacari sacuaraatia timiquioriquiaa. ⁴²Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuaanaa naa naajiotasano quiyajaariuhua tariucuaacaanu Pueyaso sequesano caminiujuniana naajioneeginia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariquia jiyajinia nia camarucuneetasacari cuarenta marijia cuaara nia shocojoquiaariijaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuacuaraajaaja. ⁴³Niaari Moloc* suhuorotu pataquiaari, shoquejinijia suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam* pataquiaarijiuhuaaj, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimiaaji nia mojuquetaconura, nia shuquiritasacari nojori. Nocuaaji, janiyari nia jiyaronutaniya tucuaacaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

⁴⁴Estebanri socua pohuataquiaari naatej:

—Pa supuetanaari Pueyaso secojojua suhuorotu jiitiaquiaarijiuhuaaj, cariquia jiyajinia nojori quishacari. Nojoriiri tii racataquiaari Pueyaso niqutiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujinijia pocuaquiaari na pueyacia. Cuno suhuorotuuiri shipinishaaquiaari taa Moisés niqutishaaquiaaricuaajani Sinaí tuhuananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niqutiquianu quiajaniyacuajani”. ⁴⁵Na nuhuaji, pa supuetanaa, canapueete naatujoori quiriqiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucucata, nojoriiri Pueyaso secojojua suhuorotu patariquiaa. Pueyasoori cuno taucuaa jataquiaari nio jiyajinijia, saniniuuja pa supuetanaa jiya na quiniuria. Cuno suhuorotuuiri pa supuetanaa quiquiaarijia, David jaara jiyaniijia quiquiaari. ⁴⁶Jacoboari pa supuetanaa jiyaniijia David supuetana quiquiaarijiuhuaaj. Davidri Pueyaso tojjijia quiquiaarijiuhuaaj. Pueyasoori na shuquiritaquiaari. Naaratej, Davidri Pueyaso Secojojua tiara tianu paniquiaari juucua. ⁴⁷David niyanu Salomón cutaraari Pueyasora tiaquiaari. ⁴⁸Naajaa, jiyocuaacaanu Quijiaari maja na quiniu pueyano tiasanojiniaaco. Tariucuaacaanu Pueyaso sequesano caminiujunianaari naa naajiotaquiaari Pueyaso sequesano nojuaja:

⁴⁹“Jiyocuaacaanuuri cua quiquio. Jiyari saniniuuja cua niohuaca cua niaja. ¿Taamueca tia nia tianutaniya quiriijaarani? Jiyaniijiaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quijiaara? Maja. ⁵⁰¿Majateeri puetunu nio jiyajinia niquishanojuanaa cua juaashiquiata cua miishanocuaaja, jiyocuaacaanujuhuaaj?’”

⁵¹Estebanri socua nojori sequequiaari:

—iNiaari tojtiaashijianucua! iNiaari Pueyaso sequesano ruuretaquiaa juhua nia supuetanaa! Nioojiaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojiaquiyua Pueyaso Sohanu niishitiojosano. Niaari Pueyaso tojiyashijianucua juhua nia supuetanaajuhuaaj. ⁵²Nia niishiritioj, ¿nia supuetanaate quena niquiriyatujua Pueyaso sequesano caminiujuniana miitiaaquiquiaari? Nia supuetanaari puetunu

Pueyaso sequesano caminiujunianaari miiquioquiaari naquiyua. ¿Quenaaja niquiriyatu nojoriinjiniote miitiasoo cureequiaari? Maja. Nojoriiri tari puecooquiaari noo pueya, canapueete maninia miijia mijiria niriqianojinijia pohuatanuquiaaricuaajani. Cuno maninia miijia jaara tiuquiquiaari, niaari sesa miijia pueya na niqutitocanu nojori mosocoriquiano. iNiaari naa mocanu Pueyaso Jiyarosantej! iNiaari pueyaracaanu Pueyaso ruuretaquiaa! ⁵³Naacuajitij jiyocuaacaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhuaaj.

Jesu ruuretajaca mosaicari Esteban

⁵⁴Pueya jaara naa tojitiuquiaari Esteban sequesantej, nojoriiri jiyanojua juaaquioree. Na juaaniutia miaquenuuree na quiaacari. ⁵⁵Jiyanojua Pueyaso Sohanu cumaquishacari Esteban jiuujia, nojuajaari jiyocuaacaanu mauquiaari. Saaja Pueyaso shacantuuca niquriiri. Jesu niquriijiaariuhua na Que Pueyaso miaquetajara nujaano. ⁵⁶Naa na niquishacaritij, nojori sequere juucuaari:

—iNia niquishuriniaja! Jiyocuaacaanu niquiya riatenonijia. iPueyaso Niyanu niquiyanijia na Que miaquetajara nujaano!

⁵⁷Pueyari na numaaca mishiquiojonuquiaari saaja, maja na tojitiuniuria Esteban sequesano. Jiyanojua sariyocuatiquiaari na juaaniutiaari. Na nuhuaji, Estebancua cocuatequiaariiri. ⁵⁸Na caponeetiquiaari Jerusalén tiacajinijiri. Tiacajinijia tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacuturiqianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. ⁵⁹Nojori jacutusacari saitia Esteban, Estebanri Pueyaso secojoriqiaa naatej:

—Jiyaniijianaa, cua sohanu quia riri quia shuriucuaa.

⁶⁰Na nuhuaji, mojuquetareeri. Jiyanojua nacaquiaari na nuhuajiriaari:

—iJiyaniijianaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

Saulo miishacari naquiyua Jesuucua tiuniana

8 ¹⁻²Pueyaso panijia pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuaacari juhuacatecara miitianu coteequiaari puetunu Jesuucua tiunianaajanaa. Nocuaaji, puetunu nojoriijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niaquejoquiaari puetunu Judea jiyajiniaajanaa, Samaria jiyajinariano. ³Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajaari Jerusalén tiacajinia. Na riuriatasacari, na jayoquiaari tiacojiiri, na nujuatejosocoriquiano nujuatejojuajinia, maajipohua, canuunio.

Jesujinijia pohuatasacari Samaria jiyajinia

⁴Mashiyocuatuno pueyari puetunu na quiasacojuanaa Jesujinijia pohuatanuquiaari pueya niquiara. ⁵Nojoriinjiniot quiquiaarijiuhuaaj Felipe. Nojuajaari mashiquiaarijiuhuaaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijiaariuhuaaj. ⁶Puetunu pueyajaari Felipe pohuatasano tojiniuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. ⁷Samaruhua tohuareetasacari pueyajinijia, sariyocuaquiaari. Queraatia cumatacuruhuaana cusosuhuari naatanijiosaaquiaarijiuhuaaj, sesacujanucuanio. ⁸Naaratej, puetunu cuno tiacajinia quiniaa pueyajaari jiyanojua shuquiriquiaari.

⁹Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu

pueyajanaa sapojojuuari jiyajeneta na miijosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰Puetunu pueyajanaari na tojjia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanhua Pueyaso cumaaca jitiiaa”.

¹¹Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquuaari. ¹²Na nuhuaji, nojori jaara tojiqiaari Felipe pahuatasacari Pueyaso rupaa, Jesucristojiniijiuhuaj, cuno Samaria pueyari Jesuucua tiuquuaari cutara. Canuu, maajipohuajuhuj, nojoriiri tiuquinijosaaquiaari moojina. ¹³Simónri Jesuucua tiuquuaarijuhuaj. Tiuquinishaaquiaarijia-riuhuj. Na tiuquinishaanu nuhuaji Felipeecua sacuaquiaariiri. Felipe shootiaquiaari tacuriitiaari Felipe miijosacari jiyajeneta casaa Pueyaso cumaacata.

¹⁴Jerusalén tiacajinia Jesu saquiriojosano pueya jaara tojiqiaari taa Samaria pueya tiuuri Pueyasooocuani, nojoriiri cuniqui jiyarotuquiaari Pedro, Juannio. ¹⁵Nojori tiuquishacari Samaria jiyajinia, cuniqui quiniaa Pueyaso pueyacuara secotureeri nojori jiuujiajia Pueyaso tiuquitiniuria na Sohuanujuhuaj. ¹⁶Majaari Pueyaso Sohuanu tiuquini quiquiaari juhuanojuaja nojori jiuujiajia. Nojoriiri nareja moojina tiuquinijosano quiquiaari Jesuucua nojori tiushacari. ¹⁷Pedro, Juan, cunora na juaashiquia niojoquiaari pueyacu, nojoriicuara na secotusacari Pueyaso. Naa nojori miishacaritij, Pueyaso Sohuanuuri cuno pueya jiuujiajia tiuquuaari cutara.

¹⁸Simónri niquiriquiaa taa Pueyaso Sohuanu tiuquuaari pueya jiuujiajia Jesu saquiriojosano pueya niasacari na juaashiquia nojoriicuani. Naaratej nojuajaari Jesu saquiriojosa-no pueya niqutionu paniquiaari cumaneeca juucua, cuno cumaaca na jitianurajuhuj. ¹⁹Simónri naa sequequiaari nojori: —Cua niqitiotureja cuno cumaaca. Janiyacu Pueyaso Sohuanu panijiacacua niare cua juaashiquianijia, Pueyaso Sohuanu nojori masenurajuhuj, taa nia miyacuani.

²⁰Pedroori na sequequiaari saaja: —iQuia cumaneeca cuaara shaajeera quiatajuhuaj! Quia naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqitioquiaa nareja na tojtijajaca pueya. ²¹iPueyaso Sohuanu cumaacari maja quiarano! Quioojiaari jiyanhua sesa quia Pueyaso niqiuara, nocuaji maja na cumaaca niqitiosaanu quiniutianiya quiajaniya. ²²Jiyanhua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojiajinatej. ²³Niishiyacuajani-jia, quiaari juhua cartesoo quiyajaa, sesa miiniucua jitiinio quia quishacarijia. Quioojiaari puera najiqitishano quiyajaa jiyanyashijia quia quiniucuajuhuaj.

²⁴Simónri na riucaquiaari: —iPueyaso nia secojorequi cucuara, mariqui cua saniitioreeri taa nia sequeyacuajani!

²⁵Na nuhuaji, Pedroori Juanta socua pohuataquiaari Jiyaniijia Pueyaso rupaa cuno pueya niqiuara. Pueya niqiuara pohuatatureeri socua Samaria jiya tiacajinia, cuniqui quiniaa tiuuniuria Jesuucua juhuaj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajiniohua.

Jesujiniji Felipe pohuatasacari Etiope pueyano

²⁶Cuno nuhuaji, Pueyaso seruuri Felipeecua rosequiaari. Na sequeeri:

—Quia sanere Felipeana. Pananu shuucujiria nuucama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajinijia. Cuno nuuri cariiqua jiyacuma neteya.

²⁷Felipe tojishacari naatej, nojuajaari ritia sanequiaari. Nuucama quiaquiaariiri. Nuujinia naacuneetooquiaari saaja

Etiopia jiyajiniinio pueyanoaari. Cuno pueyanoori riyacajajaaju quiquiaari Etiopia jiya jiyaniijia naacutana na quiniucua, maaji na jiyaniijia quiniucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopia jiya casami jitianara, na cumaneeca cojuariquiano nera. Nio Etiope pueyanoori Jerusalén tiacajinia quiaquiaari Pueyaso secjonuucua. Cuniqiji tacateyanoori Felipeta naacuneetooquiaari nuujinia. ²⁸Nucucoji na tacatesacariuhua na jiyajiniohuara, caballoori na jaatiariquiohua, rucanejotajaru-jinia cajiyano. Pueyaso rupaa serojoriqiuohuari, tariucuaaanu Pueyaso sequesano caminiujunia Isaías naajionejiniji. ²⁹Pueyaso Sohuanuuri jiyacari Felipe sequequiaari:

—iRitia nocua quia catecanore! Quiocua nata quiaare.

³⁰Jaara nocua catecanoquiaari, Felipeeri Etiope pueyano tojiqiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹Etiope pueyanoori na riucaquiaari:

—¿Janiyatucua taa niishirinio, tamonu jaara cua serojosano niishitioyiquiri janiyani?

Felipe sequeeri:

—Miji quia tacama. Cua shuriucua quia cajishii.

³²Etiope pueyanoori nio serojoriquiaa tariucuaaanu Pueyaso Rupaajinia:

“Juhua borrego jaatucusaquiaariiri mosocoriquiano.

Naatej, taa borregocuaani sanaa niqiyari na cajaca miatesacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. ³³Naquiya miishaaquiaari cararaatiaari. Nocua namiyaquishaaquiaariiri. Mashaja na quishacari-jia, nojuajaari shaajasaquiaari nio jiyajiniji. Cunora, majaari na muetunu quiquiaari. Niqiuohajuuri mosaaquiaari”.

Etiope pueyanoori nio serojoriquiaa Pueyaso rupaajiniji.

³⁴Na nuhuaji, Etiope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naajiosanojiniani? ¿Tama nojuajiniji pohuataate?

¿Tamonujiniji soj?

³⁵Felipeeri Etiope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohuataquiaari, taa quarijia Jesu miishaacanu taraatiacuajani. Felipeeri socua na pohuataquiaari Jesu miishanojiniji.

³⁶Nojori quiasacari nucuo, caminiaco shuriuquico tajitariquiaari. Etiope pueyano jaara caminiaco niqiuquiaari, Felipe sequeeri:

—¿Majate maninia cua tiuquinishaanura niya?

³⁷Felipeeri na sequeree:

—Quia jaara seetanujanaa tiuuri Jesuucua, quia naata tiuquinishaanu.

Cuno pueyanoori na riucaaree:

—Jaa, janiya Jesucristooocua tiuyani. Nojuacuajaari Pueyaso Niyanu. Na niishianijia.

³⁸Etiope pueyanoori jiyamitia na seru sequeree:

—Quia nujuaretare rucanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiushacari. ³⁹Nojori tacatasacariuhua caminiacojiniji, Pueyaso Sohuanuuri Felipe riquiaari canashyaquiji cuno Etiope pueyano shuriucua. Nojuajaari juucua tacareecuaquiaari na tiuquininiaacua. Majaari socua na niqiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰Pueyaso Sohuanuuri Felipe jataquiaari Azoto tiacajinia. Nojuajaari cuniqui puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

Saulo jatasacari Jesu tojiniara na quiniuria

9 ¹Sauloori jiyacari pueyaraaanu Jesuucua tiuuniaa miananajoriqiuase. Nojori pueconu paniquiaari puetunujuanaari. Naaratej, Sauloori pueyacuara secojonaa jiyaniijiaacua quiaquiaari. ²Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojojuua tiaca camarucuaacuara Damasco tiacajiniani, cuno naajioneeta cua tiuquiiijionura nojori rerejojuacajinia. Jesu tojiniiaa pueya morojonu paniya cuniquiijinjia. Janiyari cua quioosano jaatucunutaniya niyara Jerusalén tiajinianani, canuu, maajipohuanio.

³Naacuajitij, nucuaco Saulo quiasacari, tari quenaacoturi-quiaa Damasco tiacajiniaraari. Jiyacaritij, ishacantucaari canashiyajiqi nunuquiaari jiyocuacaanuji! ⁴Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—iSaulonaa, Saulonaa, cua tojiri! ¿Casaara quia miitiaa puera janiyani?

⁵Sauloori na riucaaree:

—¿Cantequia Jiyaniijianaa?

Jiyocuacaanuji nocua pocuaanoori na riucaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

⁶Sauloori na puerenuta na teteacasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

⁷Saulota quiojonaari shiriquitituaquiaari nojori jaara tojtiquiaari jiyocuacaanuji pocuanu. Nojoriiri juucua na niquiniu paniquiaari. Saaja shaaquiiir quiriqiaa. ⁸Na nuhuaji, Sauloori na pojosaquiji sanerohua juucua. Majaari na naata niquiniu quiquiaari saaja. Nata quiniaari na jaatucutaquiaari Damasco tiacajiniara. ⁹Nojuajaari tii camueenujuquiaari jiuujianaraca juuca, cariyajuuaru na quishacari. Majaari na miaquenu quiquiaari pueyaraaanu cariyajuuaru na quishacari. Ratuyaquiquiaarijuahuaj.

¹⁰Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujiniia:

—iAnaníasnaa!

Nojuajaari na riucaquiaari:

—¿Casaate cua Jiyaniijianaa?

¹¹Jiyaniijiaari na sequeeree:

—Quiarjia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quia. Judas tiari jati tamonu nuujinia quia. Cuno nuu sesa, Nuu Maniniu. Sauloori cuno tiajinia secojiya Pueyaso.

¹²Nojuajaari juhua na maquenujiniia tari niquirii quiajaniya nocua tiuquiyano. Tari quia sesa niishiyajariuhuj. Sauloori tari quia niquirii na maquenujiniia. Quiaari quia juashiquia niariquiaa nocua, na namijia jeequenuhuara, maninia na niquinihuara.

¹³Ananías jaara naa tojiquiaari Jiyaniijia sequeyanotej, nojuajaari sequeeree:

—iCua Jiyaniijianaa, queraatia pueyari cuno pueyanojiniji cua pohuatacanuni! iQuiocua tiuuniaa pueya miitiquiaa taraatia Jerusalén tiacajiniaraari! ¹⁴Pueyacuara secojonaa jiyaniijia jiyarosanoonaa cunohuj, quiarjia niya tiuquiriini. iNojuajanaari quia secojonaa pueya quioonutaniya, morojonucua canaa na jiyatasocoriquiano Jerusalén tiacajiniara!

¹⁵Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojuquiaari tarijia cua jiyaramiquishocoriquianoni. Nojuajaari tamasa jiyacajinia poojotanutaniya janiyajiniji tautuaca niquiara. Tautuaca jiyaniijianucua poojotanutaniya janiyajinijiaariuhuj, Israel pueyano. ¹⁶Janiyacujaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pohuatasacari.

¹⁷Naaratej, Ananíasri quiaquiaari. Judas tiajinia tiuquishiiri, tee Saulo quiriqiaacuajani. Na tiuquishacari, Sauloocua niasee na juaashiquiaari. Na sequeereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nucuamaji niyara quia nishacari, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajinijuhuj.

¹⁸Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaaquiaari moojinia Jesuucua na tiushacari. ¹⁹Na nuhuaji, miaquereeri, raturohuajariuhuj. Noojia jatarohuari. Pasaja camueenujuquiaari Damasco tiacajiniara Jesuucua tiuuniaa pueyata.

Jesujiniji Saulo pohuatasacari Damasco tiacajinia

²⁰Sauloori juhucatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niquiara na pohuatasacari sequeja:

—iJesuuri seetanujanaa Pueyaso Nyanu!

²¹Naa nojori tojishacari Saulo pocuaanotej, pueyari shiriquiquiaari. Na shiriquitituniutia sequeureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajinatej? Niyara niyareejaariuhuj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiojosocoriquiano, nojori nujuatejosaanura.

²²Sauloori socua noojia cumaquiquiaari Pueyaso Sohuanuta, jiyanohua maninia na pohuatanura puetunu juucajanaa. Nocujia pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuaaanu Pueyaso Rupaajiniji, seetanujanaa maatia pueya niishiniuria Jesuuri Pueyaso Jiyarosano pocujia tacuriquiano.

Saulo mashishacari narta Judiocuacaacua

²³Quiniqui Saulo camueenujusacarijia pueyaraaanu, narta Judiocuacaari nocuara roojotooquiaari na motunura juucua.

²⁴Tamonuuri Sauloocua jiyanoocua. Naa na sequequiaariiri: —iQuiaa monu panishiya sacaj!

Judiocuacaari na sashiriquiaa tiaca tohuatayaji, na monu paniniutia juucua Saulo. Na shanacuturiquiaari juuca, niucuanio. ²⁵Damasco tiacaari puereetuca sohuacaraca quiquiaari puetunu na shocujanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuacaanuji puereetuca canaasatujiniiaari. Sauloori naa mashiquiaariritij.

Saulo quishacariuhua Jerusalén tiacajinia

²⁶Na tiuquishacariuhua Jerusalén tiacajinia, Sauloori Jesuucua tiuuniaa pueya rupeenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasoocua tiuujiaquinio naasucua jiyanotej.

²⁷Bernabé cutaraari maja na puerenu quiquiaari Saulo.

Nojuajaari Jesu saquiriojosano pueyacuara na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocoojocanu. Sauloori cunora juhujaniya pohuatariquiaa Jesujiniji Damasco tiacajinia.

²⁸Sauloori narta Jesuucua tiuunaa pueyata jiyojequiaari cuniquijia Jerusalén tiacajinia. Nojoritia rucanejojuuari, mariyata Jesujiniji pohnataa juhuajaniyari. ²⁹Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocoojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰Jesuucua tiuunaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniqijiji jiyarosaquiaari na raja Tarso tiacajiniaari.

³¹Na nuhuaji, puetunu Judea jiyajinia Jesuucua tiuunaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojtiajacara quiquiaari nojori pueretusacari nojori mariqui na tojiyashijara quiriohuari. Pueyaso Sohanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

³²Pedroori pueyaracaanu rucanejojuua Jesuucua tiuunaa pueyacia, nojori na niishitiojonura socua Jesujiniji. Tamonu juuca nojuajaari Pueyaso pueya niqiniuuca quiaquiaari Lida tiacajinijuhuj. ³³Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuaa cusosu quijia. Tari na shocojoquiaari ocho marijia pootia na matasacari na matujinia. ³⁴Pedroori cuno cusosu sequequiaari: —Eneasnaa, iJesucristo tari quia naataniriri! iQuia sanere! Quia matu quia jecare.

Eneasri ritia sanequiaari. ³⁵Puetunu pueyajanaa Lida tiacajinia quiniaa, mariyata Sarón tiacajinijinio pueyajuhaaj, puetunu nojorijianaari nio miishano niqiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

Dorcias samiitianishaanujiniji pohnatasano

³⁶Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcias”. Dorciasri saniniuuja pueyano rupaajinia sequeshiyacujua “nequeru”. Cuno maajiiri Jesuucua tiuuja quiquiaari. Nojuajaari maninia mijia maaji quiquiaari. Casamijijuniucua pueya niqitiojojuua nareja na jiiitasanojinijiri. ³⁷Na nuhuaji, Pedro quishacari Lida tiacajinia, Dorciasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸Jope tiacaari cateca quia Lida tiacajiniji. Pedroori Lida tiacajinia quiriqiaajaa Dorcias shaajesacari. Jesuucua tiuunaa pueyari tari niishiriqiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹Pedroori nojoritia tacatequiaarihuua Jope tiacajiniohuua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niqitiojojuuari Dorcias cusupuenusano toqueya, cacojoquiyano. Cunoori quiquiaari na cusupuenusano saminio na quishacarijia. ⁴⁰Pedroori jiyacari puetunujuanaa pueya tohuanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequesee:

—iDorciasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuunaa pueyari, mashiquiopuenio:

—Miji pueyanaa, inia nimia!

Nojori tiuquitasacari, saaja maaji niqitiusii nujuanoori, tariucua saminio. ⁴²Pedro miishanoori puetunu Jope tiacajinijanaa niishishaaquiaari. Queraatia pueyari cunora Jesuucua tiuquiaari. ⁴³Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriqiaa cuniqui na camueenujusacari. Nio Simónri piiquia casaata shoqueya majeetejojuua quiquiaari, casaara shipinishocoriquiano shoquejiniji.

Pedro quiasacari Cornelio niqiniuuca

10 ¹Cesareya tiacajinia quiquiaariiri tamonu tahue, Romano soldadohuua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohuua maanuuri sesojosaaquiaari “Italiano”. ²Cornelioori Pueyaso secojojuua pueyano quiquiaari, mariyata puetunu na tiajinia quiniaatajanaano. Nojuajaari seetanujuanaa Pueyaso shuquiritini panijia quiquiaari. Cornelioori queraatia na cumaneecajiniji niqitiojojuua quiquiaari nareyajuhuj, casamijijuniucua Judiocuaca niqitiojosocoriquiano. Pueyaso secojojuua pueyaracaanuuri. ³Tamonu juuca, tariucua pananu piriushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na sequesee:

—Cornelionaa.

⁴Cornelioori saaja Pueyaso seru shootiaquiaari na shiriqiniutia. Na nuhuaji na riucaareeri:

—¿Casaate jiyaniijianaa?

Pueyaso seruuri na sequesee:

—Pueyasoori quia secojosano tojiqiaa. Quia timitiaari capora quia quiniuuca, quia jiiitasanojiniji quia niqitiojosacari nareja casamijijuniucua pueyara. ⁵Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuaj. ⁶Nojuajaari na sesaanucua pueyano tiajinia quia. Tia camaruuri shoque majeetejojuua piqiajinia. Cunoori na poonijiosano. Na tiaari shoniniacu caminia casaqueyajj naniya. Simón Pedroori quia sequentaniya casaa quia miiniutianiyanu Pueyaso jiyanooniuria quiajaniya.

⁷Pueyaso seru jaara quiaquiaarihuua, Cornelioori caapiqui na seyajinijinio piqiaari, niqiriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyaniijia naacujua quiquiaarijiaarihuaj. ⁸Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

⁹Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari.

¹⁰Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacarijia, Pueyasoori casaa na niqitiquiaari juhua na maquenujinia, na quishacari tia cacojiria. ¹¹Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. ¹²Sonaque jiniacuma quiriqiaari puetunu casaajanaa: sacocua, jiyacua rucojuacano, jiyocuacaanu jaacuatujucajuhuj. Cuno casamijijini quiquiaari Judiocuaca pueresano casaa puetunujuanaa. Maja nojori miaquesano. ¹³Jiyacarijij, Pedroori rupaa tojirii jiyocuacaanuji na sequesee. Naa sequeriquiaari:

—iPedronaa, nocua quia sanere! Quia puecoore quia miaquesocoriquiano.

¹⁴Pedroori na riucaaree:

—iMaja cua Jiyaniijianaa! ¿Janiyatucua taa miaquere sacuraatia cua miaquesooni? iCunocuaari tarijia quia sequesano canaa pueresocoriquiano!

¹⁵Jiyocuacaanuji rupaari socua na sequerohua:
—Pedronaa, majaari miaquesocoriquiano Pueyaso jiyatesano soonu.

¹⁶Pueyasoori naa pacutejoquiaari sequenu Pedrotej. Na nuhuaji, sonaqueeri tacanitasaaquiaariuhua jiyocuacaanu.

¹⁷Pedro tacaashacari naa na niquniuucua juhua na maquenujiatej, jiyacari Cornelio jiyaramiquishano pueyari tia tohuateyaji tiuquijioquiaari, Simón tia na pajetunura. Cornelio pueyari nequesoreetariquiaa nuacuaji nojori tiuquiniuria Simón tiajinia. ¹⁸Nojoriiri tohuateyaji nacaquiaari:

—¿Niya quiyate Simón jiyanihano pueyano? Na sesaari Pedrojuhuaj.

¹⁹Pedroori juhuanojuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na sequere:

—Pedronaa, jiuujianaraca pueya quia pajeya. ²⁰Tariucua. Quia sanerohua. Nojoriicua quia roseyarohua. Quiocua nojortia quiaarohuajuhua. Majaari taacanuunu. Janyacuajaari nojori jiyaramiquiriuucuaa quiocuani.

²¹Pedroori Cornelio jiyarosano pueyacua rosequiaari. Nojori sequeeseri:

—Janyacuaja nia pajesano pueyanoni. ¿Casaacua nia niyareecuarani?

²²Nojoriiri na riucaare:

—Canaa jiyaniijaari Romano soldadohua jiyaniija. Na sesa Cornelio. Nojuajaari canaa jiyarorucuaa quiocuani. Maninia miiija pueyanori. Jiyaniija Pueyaso tojjiajaariuhua. Puetunu Judiocuacajanaari maninia na miiniucua na panitiyua. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

²³Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maqesejaara. Pocua tariqui quiaariquiani.

Jaara juhuaquequiaari, Pedroori nojortia quiaquiaari. Nata quiojoquiaarijiaariuhua Jope tiacajinijinio Jesuucua tiuuniaa pueya.

²⁴Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupenaatanio. Cornelioori puetunu nio pueyajanaa masuuquiaari, nojori rerejonura juhuacarijia na tiajinia Pedro tiuquiyaquishacarijia. ²⁵Pedro tiuquishacari, Cornelioori nocua tohuataquiaari. Carijiniacuma na naacuseeri. Pedrocuara mojoquetaquiaariirihua Jope Pueyasocuara. ²⁶Pedroori saaja na sanaquiaari. Na sequereeri:

—¡Quia nujuare! Janyari cayajuhua, juhua quiajaniya.

²⁷Tiaco na tiuquitasacari, pocojoriquiaa Pedrotaari. Pedro tiuquishacari, saaja queraatia pueya niqishiiri. ²⁸Pedroori nojori sequere:

—Taucuacanaa, niaacuajaari niishiya canaari Judiocuacani. Judiocuacari rootasaaquiaari maja canaa rupenura taucuaca, maja quenaaja tahue* tiajinia canaa tiuquiniuriajuhuaj. Saniniuujia, Pueyasoori quiarjia quia niishitiorucuaa cutara maja quia soonura tamasa. Taucuacaari maja sacuraatia quiarjia quiria. ²⁹Naaratej, quia niishishacari niaari quia masuurucuaa niyara, janyari ritia canujiyarucuaani quia taacanuyaquiniutia. Cua totureja, ¿casaara nia masuurucuaa janyani?

³⁰Cornelioori na riucaare:

—Cuatro juucaari tari shoconujiya. Janyari jiyacari Pueyaso secoriquiaa juucua quia tiajiniani, pananu mueecosacari. Jiyacaritij, pueyanori quia muetarucuaa. Jiyacaricuajaari quiriquiaa, tee pananu tiyanijia. Cuno pueyano toqueeri shacantuque quiriquiaa. ³¹Cua sequereeri: “Cornelionaa, Pueyasoori quia secijosano tojirii. Naajuhua, niishiyari taa quia niqitiojoquiaa quia casami casamijiuniucuaani.

³²Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuaj. Nojuajaari na sesaanucua tiajinia quia, shoniacua caminia casaqueyaji. Tia camaruuri piiquiajinia shoqueya majeetejonu poonijiojua. Simón Pedro jaara nimia quia tiajinia, quiata pocojonutaniyari”. Pueyaso seruuri naa quia sequerucuaaqui Simónnaa. ³³Janyari jiyamitia ritia jiyarorucuaa quia seya Jope tiacajiniani, nojori pajenura tii quiajaniya. Quiaacuajaari maninia miiri quia quia nishacari. Quiarjiani, puetunu pajaniyajanaari niya Pueyaso niquiara quiyani. Naa quia pohuatare canaa tojishocoriquiano quiarjia, taa Pueyaso niishitiojorucuaa quiajaniya canaa quia pohuatanuracuajani.

Pedro pohuatasacari Cornelio tiajinia

³⁴Pedroori juhuacatecara pohuatanu coteequiaari. Sequereeri:

—Quiarjia niishiya seetanujanaa cutaranijia, Pueyasoori maja rimiajata na niqiniu pajaniya. Majaari nia jyaniniu Pueyasoori saaja Judiocuacaacua jiaatiaa, Israel pueya nojori quiniuucua. Maja. Nojuajaari tamasaacua jiaatiajuhuaj. ³⁵Tiquiyocua jiyacajinia Pueyaso secojojua pueya quishacari, nojoriiri Pueyaso jiyanooshano pueya quiyajuhua, maninia miiija nojori quishacari. ³⁶Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiushacari. Nio Jesucristoori puetunu mijiria quiniaa Camarnujuanaa. ³⁷Tiuquinijiona Juanri Pueyaso rupaa pohuataquiaari pueya tiuquinijiosaana. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajinijanaano. ³⁸Niaari niishiyajuhua, Pueyasoori na Sohuanu niqitioquiaari Jesu, na cumaaca na jitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojuuari. Samaruhua camarnu sesosano jeecaquiaarijiaariuhua. Puetunu naa miiija maninijanaari na Que Pueyaso quiniuucua nata. ³⁹Canaari puetunu na miishanojuanaa niqiuiaarini, puetunu canaa Judiocuaca jiyajinijanaa, Jerusalén tiacajinijuhua. Janyari seetanujanaa canaa niquishano pohuataani. Na nuhuaji, pueyari na teetequiaari niyacutesanojinia. Tii na cusojuatuquiaariiri. ⁴⁰Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacua na mueratereri. ⁴¹Majaari na muetanu quiquiaari puetunu pueyacujanaa. Saaja canaaca muetaquiaariiri, teyano Pueyaso saquiriojoquiaari coteenu tariucuaaanucuaani, Jesujiniji pohuatuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijuhuaj. ⁴²Jesu jaara canaa jiyaramiquiquiaari, nojuajaari canaa sequequiaari: “Naa nia pohuatare pueya niquiara: ‘Pueyasoori Jesu jiyatequiaari puetunu mijiria quinia nequesoreenarajanaa, macunucua nequesoreeriquianojuhuaj’ ”. ⁴³Tariucuaaanu pueyara Pueyaso sequesano caminiujuniiaari naa juhuacarijia sequetuquiaari Jesujinijijuhua: “Cante nocua tiyani, nojuajaari jiyanooshaanutaniya sesa na miishanojiniji”.

Pueyaso Sohuanu tiuquishacari taucuaca jiuujiajiniajuhuaj

⁴⁴Pedro pohuatasacarijia taucuaca niquiara, Pueyaso Sohuanuuri Pedro tojtianaa taucuacaacua niquiaari, nojori jiuujiajinia na tiuquiniuria. ⁴⁵Pueyasooqua tiuunia Judiocuacani, Pedrotia nijioquiaari Jope tiacajinijini, nojoriiri shiriqiquiaari Pueyaso niqitiosacari cuno taucuaca na Sohuanu. ⁴⁶Cuno taucuacaari nojori niquiara pocooriquiaa tamaatia rupaacajinia. Pueyaso manihuuaqueetaturiquiaari. ⁴⁷Naaratej, Pedroori sequequiaari: —Nio pueyari tari jitiaa Pueyaso Sohuanu noojajinia, taa pa jitiaacuana. Naaratej, nojori cuara tiuquinijiosaaria quiarjia. ¿Cantucua nojori tenujura maja na tiuquinijiosaananurani?

⁴⁸Pedroori na nuhuaji sequequiaari cuno taucuaca tiuquinijiosaana Jesucristo sesajinia, nojori tiushacari nocua. Na nuhuaji, Cornelioori Pedro sequequiaari:

—Niyaja quia camueenujrejaara canaata. Maja senota quianuhua.

Taucuacajiniji Pedro pohuatasacari Jerusalén tiacajinia

11 ¹Jesu jiyaramiquishano pueya, mariyata puetunu Jesuucua tiuunaa pueyajanaa Judea jiyajinia, nojoriiri naa pohuatasaaquiaritij: “Taucuacanaari Pueyaso rupaacua tiuuriucuaajuhua”. ²Nocuaji, Pedro jaara tacatequiaariuhua Jerusalén tiacajiniuhua, narta Pueyaso pueyari na juaaquiariuhua. Na juaaniari taucua cararaatiuuquia co miatejonu panijiaa quiquiaari, taucuaa quiniuria seetanujanaa Pueyaso pueya nojoriiri. ³Nojoriiri naa juaaquiari Pedro:

—¿Casaara quia quiaarucuaa cuno taucuaacuani? Nojoriiri maja Judiucuaa juhua pajaniya. ¡Quiaanaari nojoritia miaquejocanujuhua! Quia miishanoori maja maninia taa Pueyaso rootaquiari tariucuaaanucujani.

⁴Pedroori suraatiya nojori pohuataquiari puetunujanaa tahuajiniji. Coteenu pohuataree na niqishano juhua na maquenujinaari. Naa sequereeri:

⁵—Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucujiniji morojotasano niqiriini. Jiyareta cucujanaa roshinitiasaareeri. ⁶Cua niqishacari sonaquejinia cua niishiniuria casaate mii quiriquiaani, janiyari saa puereeta casami niqiriijiaani. Janiyari niqiriini jiyacua rucojuaca, sacocajuhua, jiyocuaaanu jaacuatujuacano. Puetunujanaa pa miacuecoriquiano pa pueresano casaa quiriquiaa.

⁷Janiyari jiyacari jiyocuaaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸Janiyari saaja na riucaareeni: “iMaja cua Jiyaniijiana! ¿Janiyatucua taa miaquere sacuraatia cua miaquesooni?” ⁹Jiyocuaaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. ¹⁰Pueyasoori naa pacutejocanu sequenu juucua janiyatej. Na nuhuaji, sonaque tacanitiarohua jiyocuaaanuuri. ¹¹Jiyacaritij, jiuujianaraca canuuri cua quijia tiacajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. ¹²Nojori tiuquiyaquishacarijia, Pueyaso Sohuanuuri cua sequeree: “Quiocua nojoritia quiaare. Majaari taacanuuu. Majaari tahua soonu nojori quia rupesacari”. Naa cua tojinuucuatej, janiyari cunora juhujaniya nojoritia quiaarucuaani. Nio seis parta Jesuucua tiuunaa pueyari cuata quiojyarucuaajuhua. Canaari mariyata cuno tahua tiacajinia tiuquishiini. ¹³Tia camaruuri canaa pohuatarucuaa taa na niqiquianu Pueyaso seru na tiacajinia nocua nujuanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhua. ¹⁴Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiacajinia quiniaajuhua”. ¹⁵Saaja cua coteesacari Pueyaso rupaa pohuatanu nojori niquiara, Pueyaso Sohuanuuri nojoriicua niqianu, taa pocua coteenujanaa na niqianucuaani. ¹⁶Janiyari jiyacari niishiquii pa Jiyaniijia sequesano. Naa na sequesantej: “Juanri moojinia tiuquiniijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”. ¹⁷Naacuajitij, taucuaa tiuushacari pa Jiyaniijiaacua, Pueyasoori na Sohuanu niqitiorucuaa nojoriijuhua, taa na niqitiocanu pajaniyacuaani. Cante Jesucristoocua tiuyani, Pueyasoori na Sohuanu na niqitioya. ¿Janiyatucua taa Pueyaso sequereruhuarini: “Maja cuno pojori niqitioya quia Sohuanu”?

¹⁸Jerusalén tiacajinia quiniaa Pueyaso pueya jaara tojiquiaari naa Pedro sequesantej, nojoriiri sanaajetaquiari. Tama nojoriijiaarijia Pueyaso maniniuhuaqueetaquiari. Naa sequetiquiaariiri:

—iPueyasojuhuanaja jiyanoohua maninia! Nojuajaari taucuaa panijajuhua nojori tacatonura noojia sesa nojori miishanoini-

ji, jiyanooshano nojori quiniuriajuhua, pueyaracaanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹Esteban jaara mosaaquiaaricuaa, Judiucuaari juhucatecara Jesuucua tiuunaa miiquiaari naquiyajuhua. Queraatia Jesuucua tiuunaa pueyari nocuaji mashiyocuatiquiaari. Nojoriiri tiquiyocua niaquejejoquiari. Noojiaqueyari na mashiyocuatiusacari tiuquijioquiari Fenicia jiyajinia. Tamasacaari tiuquijioquiari Chipre jiyajinia. Noojiaqueyari Antioquiya tiacajinia tiuquijioquiarijuhua. Nojoriiri tii pohuatanuuquiari Pueyaso rupaa Jesujiniji saa Judiucuaacaja, maja taucucara. ²⁰Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhua. Nio pueya jaara tiuquijioquiari Antioquiya tiacajinia, nojoriiri Jesujiniji pohuataquiari Griegohua niqiarajuhua. ²¹Jiyaniijia Jesu cumaacaari nojoritia quiquiaarijuhua. Naacuajitij, queraatia Griegohuari tariucuaaanu tama nojori niishishanojuaaja cartequiaari, Jiyaniijia Jesu tojijiaa nojori quiniuria.

²²Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuhuaari Antioquiya tiacajinia. ²³Bernabé jaara tiuquiquiaari nojoriicua, nojuajaari jiyanoohua shuquiriquiaari na niqishacari taa Pueyaso miirucuaa maninia cuno Griegohuani, nocua nojori tiuushacari. Naaratej, nojuajaari naa rootaquiari nojori: —Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijia nia quiri.

²⁴Bernabeeri jiyanoohua maninia pueyano quiquiaari. Pueyaso Sohuanuuri noojia cumaquiquiaari jiyanoohua. Naacuajitij, na pohuatasacari Jesujiniji, queraatia pueyari Jiyaniijiaacua tiuquiaari.

²⁵Na nuhuaji, Bernabeeri Tarso tiacajinia quiaquiari Saulo pajenuucua. Jaara na riuriataquiari, na jiyataquiari Antioquiya tiacajiniaari. ²⁶Nojori quishacari Pueyaso pueyata cuno tiacajinia, nojoriiri tii shocotequiari niqiriyyatu marijia. Nojoriiri queraatia Pueyaso pueya niishitiojonuuquiari. Tii Antioquiya tiacajiniani, Jesuucua tiuunaa pueyari coteenu sesojosaaquiari “Cristiano”. Nioori pueyano rupajinia sequeshiya “Cristo tojiniaa pueya”.

²⁷Cuno quishacari, Jerusalén tiacajiniji Pueyaso sequenu panishano caminiujunaa pueyari tiuquijioquiari Antioquiya tiacajinia. ²⁸Tamonu nojorijinijinioni, na sesa quiquiaari Ágabo. Nojuajaari Jesuucua tiuunaa pueya rerejonaa tajiniji nujuajaari pocuanura. Naa caminiujiquiaari Pueyaso Sohuanu niishitiosano nojuajaari:

—iPueyanaa, puetunu pa jiyacajiniajanaani, miaajenuuri quiniutianiya!

Seetanujanaa sequequiariiri Ágabo. Cuno miaajenuuri quiquiaari Claudio quishacari jiyaniijijanaa, Césartuhua. Nojuajaari Roma tiacajiniji jitiaciaquiari puetunu jiyacajanaa. ²⁹Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiari:

—iJudea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jitiaciaquiari, nojoriiri queraatia niqitioquiari. Saniniuujia, cante maja puera cumaneecaraca quiquiaarini, nojoriiri secaja niqitioquiari na jitiiasanojiniji. ³⁰Na nuhuaji, nojoriiri nareja na niqitiojosano cumaneeca jiyarotaquiari Bernabeeta, Saulotano. Nojoriiri Pueyaso pueya jitiianaa niqitioquiari saniniuujia Judea jiyajinia.

Jacobo nacatasaujiniji pohuatasano, Pedro nujuatesaujinijinio

12 ¹Jiyacaritij, Herodesri* jiyaniijia quiquiaari Judea jiyajinia. Nojuajaari Jesuucua tiuunaa miiquiaari naquiya. Noojiaqueya quiootequiari na saniitosocoriquiano

nujuatejojuajiniaari. ²Naa Juan tarajanu Santiago motequiaari-cuajaari nijiniaquetucujaja mueruuta. ³Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua* nuhuajiiri, na nequesoreesocori-quiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootoquiaariiri; coteenu cuatro, na nuhuaji socua cuatro. Nojoriiri naa sanitijiootoquiaariti. ⁵Pedroori maninia cojuasaaquiaari nujuatejojuajinia. Jiyacariti, Jesuucua tiuuniaa pueyari saniniujia nocuara seconuuriquiaa jiyanoehua, Pueyaso naacunura Pedro.

Pueyaso mashiquishacari Pedro nujatejojuajiniji

⁶Cuno niucujani, na juhuaqueyaquishacarijia, quera Herodes tohuatesee tariquicuajaji Pedroni, na nequesoreesocori-quiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujatejojuaja tohuateyaji cojuariquiaacujaja. ⁷Jiyacariti, Pueyaso seruuri canashiyaquiji coretaquiaari jiyareta Pedro shuriucujajanaa nujatejojuaja jiniacuma. Na shacantuucuari jiyanoehua cuhuataquiaari nujatejojuaja. Pueyaso seruuri Pedro jiuuquirii na shuucujaji. Na niucujajareeri. Na niucuasacari, na sequereeri: —iRitia quia sanere!

Cumayocuaari tamajaaja saacarejetaquiaari Pedro numatucuaacujaji. ⁸Pueyaso seruuri na sequereehujaj: —iQuia cajiniocua camarucujaja quia saatiri socua! iQuia sapatu quia cushirijuhuj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—iQuia toque quia cushiri ritia! Majaari tarishiniu. iQuiocua cua nuhuaji rupaashijia!

⁹Pedroori ritia Pueyaso seru nuhuaji sacuariquiaajaja. Jiyanoehua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jyaniriquiaa na maquenujia niquiya naasucua. ¹⁰Nojoriiri coteenu shocomaa na tacoji cojuanaa soldadohua. Socua na tacoji cojuanaa tajitiumiaajaariuhuj. Naa quenaacoturee nujatejojuaja tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquiaari. Jiyacariti, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujuuara tiaca jiuujiaaco. Na nuhuaji, na shuriucujaji shaajequeeri. ¹¹Pedroori jiyacari shusha niishiquii. Naa sequereeri:

—iSeetanujuanaaqui quiriquiaa! iCua Jiyaniijiaquiiri na seru jiyaroree cucua, na mashiquiniuria janiya Herodescuaji, cuarta Judiocuacaacujajihujaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹²Nojuajaari naa na niishiriojonuta María tiajina quiaquiaari. Nio Maríacuajaari tamonu Juan nucua. Cuno Juan sesaari Marcojuhuj. Cuno tiajina, queraatia Pueyaso pueyari Pedroocua tii seconuuriquiaa jiyacari. ¹³Pedroori jiyacari piquiquiaari carijiniacuma mataka tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyadoo. Nojuajaari juucua catecanoquiaari tohuateyaji, na niquniuria cante quiriquiaani. ¹⁴Nojuajaari saaja Pedro tojishii tia camaru jyaniquiyano, na tiotiu na riatanura nocuaji. Niyadoo tojishacari seetanujuanaa Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—iPedrocuaajaku nooj, tohuateyaji nujatej!

¹⁵Pueyari saa niyadoo riucuaquiaarijia:

—¿Quiaate paateya? Teyano Pedrote nujatesaarucuaacujajani.

Niyacoori nojori sequenu pacutequiaariuhua:

—iTaaquiririni! iPedrocuaaquiniatejaj, nooj nujatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaajaja.

¹⁶Nojori nacoosacari tiaco, Pedroori tohuateyaji piquijioriquiaajaja. Tiootiu jaara socua riatasaaquiaari, nojuacuajaari quiriquiaa. Pueyari na niquishacari shiriqitiquiaari. ¹⁷Pedroori nojori sanaajaree jiyacari na juaashiquiata. Cuniqui quiniaa pohuatareeri taa Pueyaso tohuaterohua nojuaja nujatejojuajinijini. Pedroori naa sequequiaari nojoritij:

—Niocua naa pohuatare Santiagojuhuj, parta Jesuucua tiuuniaano.

Na nuhuaji, Pedroori tiji tohuatacuhua. Tamaqui quiaareeri.

¹⁸Jaara juhuaquequiaari, nujatejojuajinia cojuanaa soldadohuari jyanohua shiriqitiquiaari. Majaari nojori niishiniu quiquiaari taa Pedro miiri nujatejojuajiniji nojori tajinijini. Tama nojoriiaarijia naa sequetuquiaari na puerenuta:

—iPa jiyaniijia Herodesri quiarjia pa puecoonutaniya, maninia pa cojuaaquiniucua Pedro!

¹⁹Herodes niishishacari, na shuriucua nujuatunaa soldadohua jiyaroquiaari nujatejojuajinia nojori pajenura Pedro. Nojori jaara na riuriataaquiquiaari, Herodesri nujatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequereeri nojori shuriucujajini. Na nuhuaji, Herodesri jyanohua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniucua maninia Pedro nujatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia qishiiri.

Herodes shaajenujini pohuatasano

²⁰Jiyacariti, Herodesri jyanohua juaariquiaa Tiro tiacajinia quiniaa pueyata, Sidón tiacajinia quiniaatano. Nio caapiqui tiacajinijinio pueyari jiyaniijia Herodes tiajina quiojoquiaari nata nojori pocoojonura juucua. Majaari cuno juuca nojori pocoojonu quiri jiyaniijia Herodesta. Nocuaji, nojoriiri Herodes seru sequereeri:

—Quiocua quia jiyaniijia sequere, canaa nata jyanootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaariiaariuhuj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujaja na miaquesocori-quiano jiyaniijia Herodes jiiatano pueyajiniji. Nojoriiri jiyamitia jeecatooonu paniriquiaa cuno jiyaniijia, maninia nojori quiniuhua nata, Herodes niqitiojotenuhuara na jiiatano pueya na miajajaura Sidón tiacajinijinio pueya, Tiro tiacajinijinio pueyano. ²¹Herodes seruuri nojori sequequiaariuhua:

—Niocuaana tamonu juuca nimia, jiyaniijia nia pocoojonura.

Na nuhuaji, cuno pueyari na sequesano juucujajinia niqiaariuhua. Jiyaniijia Herodesri nojoriicujaji maniniushiquiaari. Na maniniuqui toque cushiquiaariiri. Jiyaniijiaacujajinio shipinishano cajitujajia cajiriohuari. Tiji pocuaquiaari cuno pueyacuara. ²²Puetunu cuniqui quiniaa pueya tojishacari naa maninia Herodes pocuaano nojori niquiaratej, nojoriiri nacoonu cotequiaari. Naa sequetuquiaari na nacoosacariiri:

—iNio pueyano pocuaani, majaari nareja pueyano!

iNojuajaqui Pueyaso!

²³Pueya sequesacari naa Herodestej, nojuajaari juhua shuquiuriosaaquiaari sajaruhua. Majaari quenaaja cuno pueya

na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyauji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

²⁴Pueyaso rupaari saniniuujia socua niyacasaquiaari, tiquiyocua pohuatasacari puetunu pueya niqiarajanaa. Naacuajitij, Pueyasoocua tiuunaa pueyari socua queraatiara canequiaarijiuhuj. ²⁵Bernabé, Saulonio, nojori jaara niqitioquiaari cumaneeca Jerusalén tiacajinia Pueyaso pueya jiiitanaa, nojoriiri ritia quiojoquiaariuhua Antioquiya tiacajiniohua. Nojoriiri jiyacari Jerusalén tiacajiniji riqiaariuhua Juan. Juan sesaari quiquiaarijiuhuj Marco.

**Saulo Bernabeeta rucuanenon coteesacari
Jesujiniji pohuatanura tiquiyocua**

13 ¹Antioquiya tiacajinia Jesuucua tiuunaa pueyajinijinio- ni, noojiaqueyari quiquiaari Pueyaso sequenu panishano Pueyaso pueyara caminiuujunaa. Quiquiaarijiariuhua Pueyaso Rupaa niishitijonaa. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiariuhua Manaén. Nojuajaari mariyata Galilea jiyajinia jiyaniijiarano Herodesta canashitijiosaaquiaari. Quiquiaarijiariuhua Saulo. ²Tamonu juuca, puetunu nojorijianaari Pueyaso secojonuuriquiaa. Cuno juucajuuhuj, majaari nojori miaquenuunu quiriqiaa socua na secojonunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuaanucujani.

³Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nuucaco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuca buquejia Chipre jyanishano jiyajiniara. Chipre jiyari jiya tucuaatija, shoniniacu caminia jiuujajinia. ⁵Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajiniaqueyajaanaari. Juanri nojoritia quiriqiaajuhuj, nojori naacuriquiano. ⁶Naa nojori rucoojosacari Pueyaso rupaa pohuatanura Chipre jiya tucuaatijaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacuaja Pueyaso sequenu panishano caminiuujunia pajaniyarani”.

⁷Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jyanohua niishijia quiquiaari. Nojuajaari Bernabé masuquiaari Saulonio, nojori pohuatanura Pueyaso rupaa nojuaja. ⁸Cuno shimiacu sesaari Griego rupaajinia sequesaaquiaari Elimas. Nojuajaari saaja cuno jiyaniijia niqiaara cuaracashitiquiaari Pueyaso rupaa. Naa sequeere cuno jiyaniijiaari:

—Maja cuno pojori tojinuu. Jyanohua sesaari nojori pohuatasano. Quia sapojotuyano.

⁹Saulo sesaari Pablo quiquiaarijiuhuj. Jiyacari, Pueyaso Sohuanu cumaquishacari nojuaja, Pabloori jyanohua shitimia shimiacu jiquioco shootiaree naa na sequesacari nojuaja:

¹⁰—iSesaaca niyanu sequenaa! iManinia miijiaa paracaajianaa! ¿Casaara pueya quia tenujiya Pueyasoocujini? ¹¹iCua Jiyaniijiaari quiarijia quia saniitionutaniya! iQuiaari cariojuarura quiniutianiya seetanujanaa! iQuiaari pasaja tarishiniutianiya cariojuaru quia quishacari!

Jiyacaritij, juhua niniquiaari na namijajinia cajimaa. Cariojuarura quiquiiri. Juhua ninishiqui quiaquejoquiaari puetunu cunocojuanaari, na juaashiquiaajiniji na jaatucusaanura juuca. ¹²Cuno jiyaniijia jaara naa niqiquiaaritij, Pueyasoocua tiuuriiri na niqiaara nojori pohuatasacari shanohua Jiyaniijia Jesujiniji.

Pablo, Bernabé quishacari Antioquiya tiacajinia, Pisidia jiyajinia

¹³Pabloori na cojiniaata Pafos tiacajiniji quiaquiaari buquejia Perge tiacajiniara, Panfilia jiyajinia. Juanri Perge tiacajinia cateseequiaari nojoriicujaji. Tiji riujuuquiaariuhua Jerusalén tiacajiniohuari. ¹⁴Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujia tiajinia. Na tiuquishacari, cajitiushiiri. ¹⁵Jiyacaritij, tariucuaaanu Moisés Rootasanoori serojosaaquiaari. Tariucuaaanu Pueyaso sequesano caminiuujunaa naajiotasanoori serojosaaquiaarijiuhuj. Na nuhuaji, rerejojua tia camarnuuri naa sequequiaari Pablo, Bernabeenio:

—Cuarta Judiocuaanaa, niaa jaara Pueyasojiniji nia niishishano casaa sequenu paniri, nia niishitiojore quiarijia niya quiniaa niqiaara.

¹⁶Pabloori sanequiaari. Na juaashiquiata sanaajaree pueyari. Naa nojori sequeereeri:

—Nia tojitiare cuarta Israel pueyanaa, nijaniyajuuhuj, canapute Pueyaso tojitajacacujani tamasa pueyapuejinijio. ¹⁷Paari sequequiaani: “Pueyasoori pa Jiyaniijia, Israel pueya pa quiniuucua”. Seetanujanaa, paacuaajaari Pueyaso saquiriojosano pueyacuajinioni. Tariucuaaanu, Pueyasoori maniniushiquiari pa supuetanaa saquiriojiaari na pueyara quiriqiano. Na nuhuaji, jyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiaria cuno jiyajiniji na cumaacata. ¹⁸Cuarenta marijaari pa supuetanaa shoconujuquiaari pueyaracaanu nojori rucoojosacari najuhuaa cariiquia jiyajinia. Pueyasoori jiyacari nojori rejeretaquiaari na tojitiaquishacari nojuaja. ¹⁹Na nuhuaji, Pueyaso cumaacata, siete tamaatiuucua rupaa pocuajaca taucuaacari puecoosaaquiaari Canaán* jiyajiniji, saniniuujia cuno jiya na niqitiosocoriquiano pa supuetanaa. ²⁰Pa supuetanaa jaara Canaán jiya camaruhua quiquiaari tari, socua cuatrociento cincuenta marijaari nojori shoconujuquiaari saaja nequesoreenaa jiiitiasacari nojori. Na nuhuaji Samuelri nojori nequesoreenara jiyatesaaquiaarijiuhuj. Nojuajaari Pueyaso sequesano caminiuujunia quiquiaarijiuhuj. ²¹Samuel quishacarijia, pa supuetanaari Pueyaso secojonuquiaari na panitushacari jiyaniijia, nojori jiiitariquiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niqiuohuacujinjo supueno pueyano. Saúlri nareja cuarenta marija shocotejoquiaari pa supuetanaa jiyaniijia na quishacari. ²²Na nuhuaji, Pueyasoori Saúl soojotaquiaariuhua Saúl tojiyaquiniuucua nojuaja. Saúl niti David jiyatequiaariuhua Israel pueya jiyaniijia saniniuujia. Pueyasoori naa sequequiaari Davidjiniji, na timitiasacari nojuaja:

“Isaf niyanu Davidcuajaari cua shuquurijua. Nojuajaari cua panishano pueyano. Nojuajaari puetunu cua panishano miiniutianiyajanaa”.

²³Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niqiuohuacujinjo supuenoni. Pueyasoori na seerataquiaari Israel pueyacuaji Tacuna quiriqiano, taa na sequequiaari

tariucuacaanucujani. ²⁴Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niqiarajanaa. Tiuquinijiona Juanri nojori sequequiaari nojia nojori tacatonuhua Pueyasocua, naajuhua, moojinia nojori tiuquinijosaanura, Pueyaso tojijia nojori quiniuria. ²⁵Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosanonni taa nia jiyaniquiaa najuhua janiyuacujani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyaniijijanaa cutara. Janiya maara jiyanohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miiijia”.

²⁶Cuarta pueyanaa, niyajaniya cante Abraham niqiuohuacujani pueyacuajani, cua tojitiare, niyajaniyajuha taucacanaa, canapuee Pueyaso tojijiacacuajani. Niaaranoori nio maninia rupaa Pueyasojiniji, nia jiyanooshaanura sesa nia miishanojiniji. ²⁷Jerusalén tiacajinia quiniaa, mariyata na camarucanio, nojoriiri maja na niishiniu quijia cante Jesu quiquiaarini. Majaari nojori niishitiniui quiquiaarijuhuaj Pueyaso sequesano caminiujuuniaa naajiotasano tariucuacaanu. Cunoori najuhua nojori seronuuasano puetunu samaatenu juucajanaa. Naacuajitij, nojori jaara moquiaari Jesu, maninia tohuateequiaariiri Pueyaso sequesano caminiujuuniaa naajiotasano, taa Jesujiniji sequesaaquiaari tariucuacaanucujani. ²⁸Jesuuri seetanujuanaa maja na miiniu quiquiaari sesa. Tama nojoriiaarijia juhua sesa miiijara na jiyatequiaari cutara. Naacuajitij, Pilato sequetuquiaariiri cuaara na moteeranoj. ²⁹Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupaajiniacuajani, na roshinitiuquiaari niyacutesanojinijiiri. Raaco na niatureeri. ³⁰Naajaa, macu na quishacari, Pueyasoori saaja na samiitianiquiaariuhua. ³¹Na samiitanu nuhuaji, Jesuuri sequeyarucua na pueyacu mueranacuquiaari, noo pojoriicua canapuee na tarajaquiaari na quiasacari Galilea jiyajiniji Jerusalén tiacajiniacuajani. Nojoriacuajari quiarijia nojuajiniji poojotaniuhua puetunu pueya niqiarajanaa.

³²Canaari timiyani canaa pohuatasacari niyajaniya, iPueyaso pohuatasano pa supuetanaari tari tohuateecanu! iPocujaji Tacunacuajaari tari miiquianu puetunu pa jiyanooshaanurajanaa! ³³Seetanujuanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacuajinio pa quiniuucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia* na sequesano quiyacuajani. Naa naajiotasano quiyari segundo Salmojinia:

“Quiaari cua Niyanucujaja. Janiyari quiarijia quia samiitianiriini”.

³⁴Pueyasocujajaari sequequiaari, nojuacuajaari na samiitianiniutianihua na moqueyaquiniuucujaji na raaco. Nioori naajiotasano quiyajuhua tariucuacaanu Pueyaso Rupaajinia. Naa sequeyari:

“Janiyari maninia niaara miiniutianiyanii taa cua sequequiaari Davidcuajani”.

³⁵Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijijanaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujuanaa moquequiaari cutara. ³⁷Noo Jesu saniniuujia, Pueyaso cutaraari na samiitianiquiaariuhua. Majaari na moquenu quiquiaari cutara.

³⁸Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua

tiuari, niaari sesa nia miishanojiniji jiyanooshaanutaniya.

³⁹Moisés Rootasanojinia, paari tariucuacaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacartij. Quiarijia cutara, canapuee Jesuucua tiuya saniniunijia, nojoriiri puetunu sesa na miishanojinijijanaa jiyanooshiya. ⁴⁰Niaa cutaraari cocuaatia miiniutianiya pueyanaa, nia jaara cua pohuatasano ruuaretare. Pueyasoori na tojiyashijiaa saniitionutaniya taa tariucuacaanu Pueyaso sequesano caminiujuuniaa sequequiaaricujani. Naa sequetuquiaariiri:

⁴¹“Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuha. Janiyari Pueyasoni. Janiyari tarijia nia niqishoo casaa miiniutianiyanii. Tamasaca jaara nia pohuatare, niaari saaja na cuaracashitiniutianiya”.

⁴²Na nuhuaji, Pabloori narta Judiocuaca rerejoja tiajiniji tohuareetaquiaariuhua na cojiniaata. Taucuacaari tii quiriqiaajuhua. Nio taucuacaari Judiocuacaacua pacunaa quiquiaari, Judiocuaca nojori quiniurijuhua, Pueyaso sequesano tojitianaara na quiniuria. Nojoriiri Pablo sequetquiaari, Bernabeenio:

—Niocua tamonu sábadu canaa pohuatareeruhua, socua canaa tojiniuria Jesujiniji.

⁴³Nojori quiojosacariuhua Judiocuaca rerejoja tiajiniji, queraatia narta Judiocuacaari nojori nuhuajiquiaari, queraatia taucuacajinijinio Judiocuacaacua pacunaa. Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta na rootaquiaari nojori:

—Saaja Pueyasocua tiuujia nia quiri. Majaari nocuaji taacanunu. Nojuacuajaari pa cumaquijia.

⁴⁴Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejoquiaari. ⁴⁵Judiocuaca secojoja tia camarucua jaara niquiquiaari queraatia pueya na rerejojuajinia mishiyano, Pablo pohuatasano na tojitianura, nojoriiri juaaquoquiaari. Nojoriiri tama sequetooquiaarijiaaja:

—Puetunu pueyajanaari cuno pojori tojitiaacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niqiuara Pablorinijiaariuhua: —iPabloori maja maninia na niishiniu Pueyaso rupaa!

iNajuhua sesa pohuataano! iNojuajaari niishiyashijia!

⁴⁶Pabloori saaja Bernabeeta sequequiaari na pueyacuiniutia:

—Maniniacuajajui, cuarta Judiocuacanaa. Canaacujajaari na panitaja niyajaniyatej, Pueyaso rupaa canaa coteetanura pohuatanu niyajaniya, Pueyaso saquiriojosano Judiocuaca nia quiniuucua. Niaacuajaari saa na ruuareteejaa. iMajaquiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuujia taucuacaacua quianutianiyanii, Pueyaso rupaa canaa pohuatanura nojori niqiuara. ⁴⁷Canaa Jiyaniijia jaara canaa jiyaramiquiquiaari, nojuajaari naa canaa sequequiaariti: “Quia jiyatequiaari mijiria cuhuatariquianonijia. Quia pohuatasano janiyajinijiiri caminiujuushaanutaniya taucuaca niqiuara puetunu jiya puequeetujinijanaa, Pueyaso jiyanooniuria nojoriijuhua”.

⁴⁸Cuniqui quiniaa taucuaca jaara naa tojiquiaari sequeshianotej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—iJiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriqianocujani, pueyaracaanu nata rishiniuriacujani, jiyacartij, nojoriiri Jesuucua tiuquijiaari. ⁴⁹Jiyaniijia rupaari pohuatasaaquiaari puetunu cuno jiyajinijanaa.

⁵⁰Judiocuacaari na juaaniutia Pueyaso panijiaa maajipohua

shiniujuquiaari na cojituniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucuaariuhua, mariyata cuno jiyajiniji nojori taanuunura Pablo, Bernabeenio. ⁵¹Naaratej, na nuhuajiria, Pablo, Bernabeenio, nojoriiri na nohuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitosacari nojori, majaari nojori Pabloocua, Bernabeecua na tiutianu quiniutianiya Pueyaso jiyanoaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵²Jesuucua tiunuaa pueyari saniniuujia shuquiriaatia jateequiaari Antioquiya tiacajinia, nojori jiitiasacari Pueyaso Sohuanu.

Pablo, Bernabé quishacari Iconio tiacajinia

14 ¹Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejojua tiacajinia tiuquitiaciaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuquiciaari, Judiocuaca, taucuaanio. ²Noojiaqueya Judiocuacajinijinoori maja na tojinu paniniu quiquiaari Jesujiniji pohuatasano. Cuno pojoriiri taucuaa shiniujuquiaari nojori juaaniuria Jesuucua tiunuaa pueya. ³Pabloori, Bernabeeta cunora socua jiyojequiaari pueyaracaanu cuniqui, Jesuucua tiunuaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujuanaa, Jiyaniijiaari nojori naacuquiaari jiyanohua cutara maninia miishano nojori miiniuria, pueya naatanijionurajuhua. Jiyaniijiaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. ⁴Cuno tiacajinia quiniaa pueyari raquitiquiaari. Noojiaqueyari tama narta Judiocuaca tojiquiaarijiaaja. Saniniuujia, tamasaari Jesu jiyaramiquishano pueya tojjiara quiquiaari. Nojoriiri naa quiquiaari cuno tiacajinia. ⁵Naa nojori quishacaritij, Judiocuacari taucucata rojotooquiaari cuno tiacajinia jiyaniijianucua. Naa rojotooquiaariiri nojori sesacanura Pablo, Bernabeenio, na jacutunura saitiajuhuaj. ⁶Pablo, Bernabé jaara niishiquiaari naa cuno pueya miiniu panishacari nojoritij, tiji mashyocuatiquiaariiri Licaonia jiyajiniara. Nojoriiri Litra tiacajinia quiojoquiaari, Derbe tiacajiniariano, cuno caapiqui tiaca shocua quijiaca tiacajiniajuhuaj. ⁷Nojoriiri tii poojotaquiaari Jesujiniji nojori niishishano.

Litra tiacajinia pueya jacutusacari Pablo saitia

⁸Litra tiacajinia quiquiaariiri sesarunocua pueyano. Majaari na rucuanenu quijia. Nojuajaari na rasaanuquiarajuhuanajaj. Majaari na pooniniu quijia na cajitijiniji. ⁹Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujuanaa tiuuriquiaa na pohuatasanoocua. Naa Jesuucua na tiuuniuucuatej, Pabloori niishiriiri cuno pueyano na naata na cashacu jeequenuhua.

¹⁰Pabloori jiyamitia jiyanohua na sequeere:

—iManinia quia nujuare! iMaja porequetanu!

Cuno pueyanoori ritia sanequee. Rucuanenu saniriiri. ¹¹Cuno Licaonia pueya jaara niqutiquiaari naa Pablo miishanotej, nojoriiri tama na rupaajiniajaaja sequetuquiaari:

—iCumaacaraca quijiacaari juhua pueyasohua pocua rosetareeni, juhua pueya niquishano!

¹²Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaajiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanohua pocuanu niishijia na quiniuucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiitiasano juhua na pueyasohua cuno jiyajinia.

¹³Júpiter secojojua tiaari Litra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca

jaatucunuquiaari, Pabloocua nojori puecosocoriquiano Bernabeecuaranio, juhua nojori pueyasohuacua. Maniniushitajara naana shuucuaa shiyosano patootaquiaari-jiariuhua. Cuno pueyanoori puetunu pueyatjanaa Pablo, Bernabé shuquiritianu paniriquiaa juucua, juyaca na puecosacari nojoriicua juhua Pueyasooocua. ¹⁴Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

¹⁵—iPueyanaa! ¿Casaara naa nia miya canaani? iCanaari nareja pueyani taa nijaniyacuaani! iCanaari naacua niyarucuaa niaacuatej canaa sequenura nijaniya, puetunu nio najuhua nia miishanojuanaa nia cartenura! iSaaja nia shuquiritiara cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. ¹⁶Pueyasoori tarijia puetunu pueyajanaa tarinitiaquiaari nojori miiniuria tama nojori panishanojaaja. ¹⁷Naajaa, nojuajaari pa supuetanaa niishitiquiaari cante nojuajani, maninia na miishacari nojoriiri. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniurajuhua.

¹⁸Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicua na pueconu panishano juyaca.

¹⁹Jiyacaritij, Antioquiya tiacajinijinio Judiocuacari tii tiuquijioseequiaari, Iconio tiacajinijinionio. Nojoriiri cuniqui quiniaa nasojoosee Pabloocua, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰Jesuucua tiunuaa pueya jaara rerejojuaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹Jaara Jesujiniji pohuataquiaari tii, queraatia pueyari Jesuucua tiuquiciaari. Na nuhuaji, nojoriiri Derbe tiacajiniji riujiuutiquiaariuhua. Tiuquijioquiaariuhuari Litra tiacajinia, Iconio tiacajinia, Antioquiya tiacajinianio. ²²Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiunuu. Pabloori naa nojori sequequiaari:

—Canapuate Pueyaso shuriucua quiriquianoni, nojoriiri naquiya miiniutianiya mijiria.

²³Nojoriiri maninia Pueyaso tojjiaca pueya saquiriojotuaquiaari, nojori jiyatesocoriquiano Pueyaso pueya jiitariquiano. Naa miitiquiaari puetunu cuno tiacajiniajaanaari, Pueyaso pueya jiitianura tama nojori nacasunaaajaaja. Jesu saquiriojosa-no pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocua:

—Canaa Jiyaniijianaa, nio pueya quiocua tiuujiacani, nojori quia naacure quiocua tiunuaa narta pueya nojori jiitianura maninia.

Pablo tacatesacariuhua Bernabeeta Siria jiyajinia Antioquiya tiacajiniara

²⁴Nojori riujiuuniuhua Antioquiya tiacajiniohuara, Pisidia jiya shocotumohuari. Na nuhuaji, tiuquijioquiaariuhua Panfilia jiyajiniaari. ²⁵Tii Pueyaso rupaa pohuataquiaari Perge tiacajiniaari cuno pueya niquiarara. Nojori pohuatanu nuhuaji, Atalia tiacajinia quiojoquiaarijiariuhua. ²⁶Cuniquiji, buquejinia jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya

niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa nojori pohuatanura taucuaca. Cunoori quiquiaari shushajanaa nojori coteenu panishacari rucuanjonu tamaquiicua. Naacuajitij, nojori tohuateenu nuhuaji puetunu Pueyaso panishanojuanaa, jiyacari shusha tiuquiijoriqiuohuari. ²⁷Antioquiya tiacajinia nojori quishacari tari, nojoriiri puetunu Jesuucua tiunna pueya masuunujuquiaarijanaa. Cuniqiu pohuataturee puetunu nojori niquiarajanaari, taa Pueyaso naacucanu maninia nojori pohuatasacari Jesujiniini. Pohuatanuquiaarijiaarihuaj taa Pueyaso taraajetequiaari taucuaca jiuujiani, Jesuucua nojori tiuuniuriajuhuaj. ²⁸Pabloori, Bernabeeta cuniqiu tarishiquiaarijiaara narta Jesuucua tiunnaata.

Jesuucua tiunnaa jitianaa nacoosacari Jerusalén tiacajinia

15 ¹Jiyacaritij, Judea jiyajiniini pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqiu quiniaa Jesuucua tiunnaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—iPueyanaa, Jesuucua tiunnaa pueya cuaara na cararaatiuquia co miatejoteera, taa Moisés niishitiojoquiaaricujani! iJaara miatesoo quiri, majaari Pueyaso jiyanooni uquiutianiya jiyantej, na pueya nojori quiniuria!

²Pablo, Bernabeenio, nojori jaara tojiquiaari naa cuno pojori niishitiojosantej, nojoriiri cuno pojoritia nacojoquiaari jiyanoohua. Naacuajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniqiuini pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiunnaa pueya jitianaa. Nojoriiri jiyaramiquishaaree cuno pojori nequesotasanaa, ¿seetanutejanaa naa miishiyatena, taa cuno Judea jiyajiniini nijiono pueya niishitiojiya canaacuajani?

³Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumanio. Nojoriiri cuno jiyacajinia Pueyaso pueya pohuatanuquiaari taa taucuaca cartequiaari tama sesa nojori miishanojuajani, Pueyaso tojijiaari nojori quiniuria. Jesuucua tiunnaa pueya jaara naa tojiquiaaritij, nojoriiri jiyanoohua shuquiriquiaari.

⁴Nojori tiuquiijosacari Jerusalén tiacajinia, puetunu Jesuucua tiunnaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohuataquiaari puetunujuanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniini. ⁵Cuniqiu quiriqiaajaarihuua Fariseocuaca, tariucua Jesuucua tiuujiaa. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiunnaani, na cararaatiuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojijiaari quiiria, taa Moisés rootaquiaari tariucuaaanucujani.

⁶Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiunnaa narta pueya jitianaa. Nojoriiri maninia niishiriojonuquiaari taa na miiniutianiyan. ⁷Naa pueyaracaanu nojori pocoojosacaritij, Pedroeri socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquiriojoquiaari na rupaa pohuatariquiano taucuaca tojishocoriquiano, nojori tiuuniuria Pueyasocujahuaj. ⁸Pueyasocujajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohuanu na niqitiosacari nojori, taa na

niqitioquiaari pajaniyacuaani. ⁹Majaari nia jiyaniini Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuquiaari, nojuajaari nojori jiuujia jeequereehuj saaja Jesuucua nojori tiushacari. ¹⁰Naa nia tamacasacari taucuacajiniini parta Pueyaso pueyatej, niaari Pueyaso miishano sojotaaruhua. ¿Casaara nia tamacaa Pueyaso miishanoni? Niaari quiriaria Moisés niishitiojosano tojitini paniya Jesuucua tiunnaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricujani. ¹¹Paari niishiyani pa Jiyaniija Jesuuri pa jyanoojia. Naaratej, pa jyanooquiaari, na pueya pa quiniuria. Mariyata naa miiquianu cuno taucuacajarihuaj. Majaari seetanujanaa maninia pa miiniu quiquiaari pa jiyanooshaanura.

¹²Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumacata miitiquiaari maninia taucuaca niquiarani, naajuhuj, taa nojori naatanijioquiaari cusosuhua-niuhuj. ¹³Naa nojori pohuatanu nuhuajitij, Santiagoeri sequequiaarijuhuaj:

—Cuarta Pueyaso muerasanaa, cua tojitiare. ¹⁴Simón Pedrocuajaari tari pa pohuataree taa Pueyaso coteecanu shusha na Sohuanuta poonijonura cuno taucuaca jiuujajiniani. Pueyasocujajaari nojoriniini jiyateya seetanujanaa na pueyara, nojori manihuuaqueetanura nojuaja. ¹⁵Seetanujanaari nio. Naajuhuj, tariucuaaanu Pueyaso sequenu panishano caminiujiunaaquiaari naa naajionuutaquiaari Pueyaso sequesantej:

¹⁶“Janiyari David niqiuhuacuajini mueratenutaniya tamonu pueyanoni. Davidcuajaari na supuetanarano. Nojuajaari Jiyaniijaanaa quiriqiano puetunu pueyapuerajanaa, taa David quiquiaari Israel pueya jiyaniijiacuaani. ¹⁷Naacuajitij, puetunu taucuacajanaari cua pajenuunutaniya, noo pojori teyano cua saquiriojoquiaari tariucuaaanucujani, nojori jiyatesocoriquiano na Jiyaniijaari janiya”. ¹⁸Jiyaniijaari naa sequeyaquij. Nojuajaari tariucuaaanu pueya toquiaari nio”.

¹⁹Naaratej pueyanaa, janiyari nia sequeyani, nareja nia niqiri cuno taucuaca, Jiyaniija Jesuucua tiunnaani. Majaari nojori najiqitini Pueyasocujaji, nia tojitini panishacari nojori tariucuaaanu Moisés niishitiojosano. ²⁰Nareja nojoriicuaa pa naajiore. Pocua pa naajionejiniya sequere nojorini, maja tari nojori miaquenuunura shipinishano pueyasocuaa na puecootusano casaa, juunu, borregonio. Cuaara qituuuria saa necocuataja, maja tamonu na numetucunura socua. Jaara shu miaquetunu paniri, cuaara na miaqueera puetunu na nanaca caatinijiasanojuanaa, naajuhuj, maja na miaquenuunura casami nanaca. ²¹Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tajiniaqueya naa serojosaaquiaa Moisés naajionejini puetunu samaatenu juucajanaa, puetunu tiqiyocua tiacajinijanaa.

²²Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiunnaa pueyajanaanio, nojori jitianaaajuhuj, puetunu nojorijanaari mariyata niishiriojonuquiaari. Naacuajitij, nojoriiri narta Pueyaso pueya saquiriojotuchiaari na jiyarotusocoriquiano Antioquiya tiacajinia Pablota, Bernabeetani. Jiyacari saquiriojosaareeri Judas, Silasno. Judas sesaari Barsabás quiquiaarijuhuaj. Cuno pojoriiri Jesuucua tiunnaa pueya tojishano quijia cutara, cuniqiu Jerusalén tiacajiniani. ²³Nojoritia jiyarotasaquiaariiri naajione. Cuno naajionejiniyaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiunnaa jitianaa, Jerusalén tiacajinia

niarta Jesuucua tiunaa pueyajuhua. Canaari nia saruhuataani pueyanaa. Taucuaca nia quishacari, naajaa. Jesuucua tiunaa nia quishacari, niaari canaa tapueyocucajuhua, tiqiyocua Antioquiya tiacajinia quijia, Siria jiyajinia quiniaano, Cilicia jiyajinia quiniaajuhua. ²⁴Canaari niajanijini pohuatasaru-cuaani, niqijij pueyanaari niaacua quiacanu. Canaa nia jiyanoori. Majaari canaa jiyaronu quiqianu nojori. Cuno pojoriniaari nia taajetecanu tamaatia nojori niishitiojosacari niajanii. Naajuhua, nia cushitocanuuri nojori sequesacari nia cararaatiuquia co nia miatejonura taa Moisés niishitiojoquia-ricuajani. Nojoriniaari nia shiniujuquianu nia tojtianura socua Moisés Rootasanojuhua. Quiaritia maja naate pueyanaa. ²⁵Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. ²⁶Canaa panishano pueya Pablo, Bernabeenio, nojoriiri tama na cuaqueya panitiaquiaari-jiaaja Jesujiniji nojori pohuatasacari tiqiyocua. ²⁷Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miinitianiyani, naatej, taa canaa pocoojoree canaa rerejosacari cuajani. ²⁸Canaa niishiriojosanoori maninia quiya Pueyaso Sohuanura. Canaari na shuquiritiaajuhua. Majaari canaa cushitonu paniniu niajanii puera canaa supuetanaa niishitiojosanota najuhuanaj. ²⁹Canaari saaja nio nia sequenu paniiyani pueyanaa. Nia tojitiare. Majaari socua nia miaquenu shipinijiosano pueyasohuacuara puecoosano casaa. Majaari nanaca miaquenu. Naajuhua, niaa jaara shu miaquenu paniri, nia miaquere maninia na nanaca caatinijiasano. Naajuhua, saaja nia niqiuocohuata nia quiri quia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

³⁰Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiunaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niqitiosaaquiaariirri cuno naajione puetunu nojori niquiarajanaa serojosocoriquiano. ³¹Naajione jaara serojosaaquiaari, puetunu Jesuucua tiunaa taucucajanaari shuquiriquiaari jiyanoohua. Naacuajitij, nojoriiri noojia cajitiquiaariuhua tacaquioyano juucua. ³²Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jitiiaquiaari, Pueyaso sequenu panishano nojori caminiujiniuria. Naacuajitij, nojoriiri Jesuucua tiunaa pueya cumanijaquiaari jiyanoohua. Na rootatuquiaariirri maja nojori tarinitianura Jesuucua tiunuu. ³³Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniohua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhujaniya nia quiaarohuaqui.

³⁴Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniohua. ³⁵Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiunaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhua. Puetunu nojorijianaari Jiyaniijia Jesujiniji pohuataquiaari tamasaca niquiarajuhua.

**Pablo pacutenu panishacariuhua quianu
Pueyaso pueya na niqiniuhua**

³⁶Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niqiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiunaa pueya quiyani.

³⁷Bernabeeri na riucaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. ³⁸Majaari Pablo paniniu quiquiaari Juan quianura nojoritia. Nocuaaji Bernabé sequequiaariirri:

—¿Paatucua casaara rupoyare pocua Marco saajaaniiuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacuajaa.

³⁹Saa nojorijiaari socua juayonuutaquiaari Juan Marcoocua. Nocuaaji Bernabeeri jiyacari Pabloocuaaji rupatequiaari. Na rupatesacari na rupena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarjia buquejinia quiaquiaari Chipre jiyajinara. ⁴⁰Pabloori saniniujujia Silas saquiriojoquiaari na tarajariquiano. Nojori quiaaquiuhacarijia, Jesuucua tiunaa pueyari nocuara Pueyaso secojotuquiaari. Naa na miituniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. ⁴¹Nojori quiasacari Jesuucua tiunaa pueya shiniujiniuhua, Siria jiyacuma tajitiumiaquiaariirri, Cilicia jiyacumanio. Pabloori cuno jiyaca tiacajinia socua poojotaquiaari Jesujiniji. Naa cumaquiaari Jesuucua tiunaa pueyari.

Timoteo cojishacari Pablo, Silasnio

16 ¹Pabloori Silasta tiuquijioquiaari Derbe tiacajinia, Listra tiacajiniano. Tii riuriatatuquiaari Timoteo jiyaniuhua pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiunaa juhuaj. Timoteo queeri tahue quiquiaari cutara. ²Listra tiacajinia Jesuucua tiunaa pueyari Timoteo maniniucuatujua. Naa sequetujuuari nojori: “Timoteori jiyanoohua maninia pueyano”. Iconio tiacajinijinio Jesuucua tiunaa pueyari naa sequetujuajuhua. ³Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuquia co miatetequiaariirri, cuno jiyajinia quiniaa Judiocuaca soojotanuucuaji nojuaja. Puetunu pueyajanaari na niishijia, na queeri seetanujuanaa tahue quijia. Nocuaaji naa miishaareeri. Na nuhuaji, Timoteo cutaraari Pablo cojiquiaari. ⁴Pabloori Jesuucua tiunaa taucuaa niqiquiaari puetunu tiacajinijianaa. Nojori niquiar caminiujuquiaari Jerusalén tiacajiniji Jesu jiyaramiquishano pueya sequesano nojorirriaari, mariyata Jesuucua tiunaa pueya jitianaa sequesanojuhuaj. ⁵Naa Pablo caminiujishacaritij, puetunu Jesuucua tiunaa pueyajanaari socua noojia cumaquiaari jiyanoohua. Tamasaari socua Jesuucua tiuquiaarijuhuaj. Jesuucua tiunaa pueyari naa canequiaari socua. Naa caneriquiaa puetunu juucajanaari.

**Pueyaso Sohuanu tosacari Pablo,
Macedonia jiyajinara na quianura**

⁶Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumanio. ⁷Naa tiuquijioseequiaari Misia jiya shuriucuari. Nojoriiri cuniquiji quianu paniquiaari Bitinia jiyajinia juucua. Naajuhua, majaari Pueyaso Sohuanu paniniu quiquiaari tii nojori quianura. ⁸Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quia. Tiiri buque tiutiacojua. ⁹Pabloori cuno niucua juhua na maquenujinia niqiquiaari Macedonia jiyajinijinio pueyano nocua nujuanao. Cuno pueyanoori Pablo sequequiaari: “iMiji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. ¹⁰Naa Pablo niqiniuhua nuhuaji juhua na maquenujinatej, canaari jiyacari ritia pajequiaariirri taa canaa quianutaniya cuniquijini. Canaari sequeereeni:

—iPa quiaarequij! Pueyasocuaajaari pa panitiaa Jesujiniji pa pohuatanura cuno pueya niquiarajuhuj.

Pablo quishacari Filipo tiacajinia Silasta

¹¹Canaari Troas tiacajiniji quiaquiaari buquejiniani. Canaari Samotracia jiya tucuaatiajaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. ¹²Canaari cuniquiji quiaamaa Filipo tiacajiniani. Filipo tiacaari socua panishano tiaca quiquiaari tamasaca tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipo tiaca jiyatequiaari nojori quiquiora. Canaari tii camueenujuquiaari rupaquijiani. ¹³Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiiriani. Canaari soquequiaarini cuno pueyari tii jiiitiquiaari Pueyaso secojonura. Canaari tii narejashiquijia cajitiuquiaari mariyatani. Jiyacaritij, maajipohuari cuniqui rerejoquiaari na secojonunura juucua. Canaari saaja nojori niqieraara pohuataree Jesujinijini. ¹⁴Cuniqui maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqitiojua quiquiaari na cumaneecaraari. Nio maajiiri tarijia Pueyaso secojoju quiquiaari. Tii na quishacari, Pablo pohuatasano tojiri quiaari. Pueyasoori jiyacari na tojeteree. Juhua noojia riatareeri seetanujuaana Pablo pohuatasano na tojiniuria maninia. Jesuucua tiuuriiri. ¹⁵Na nuhuaji, Lidiaari puetunu na tiajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujuaana canaa panitiaquiaari na tiajinia canaa quiniuria. Naacuajitij, canaari na tiajinia camueenujuquiaarini.

¹⁶Tamonu juuca, socua canaa pacutesacari quianu pueya secojonuujajiniara, canaari samaruraca niyacoo niquiquiaari. Cuno niyacoori camaruharaca quiquiaari. Niyacoori “niishijia samaru” jiiitaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhara maseja queraatia cumaneecaari. ¹⁷Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—iNio canuu cutaraari jiyocuaaanuji Jiyaniijiajiniji pohuatanaa! Nia niishitiojijiyari Pueyaso jiyanooshano nia quiniuria, pueyaracaanu nia rishiniuria nata.

¹⁸Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—iJaniyari Jesucristo sesajinia quia jiyaroyani! iCuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiiiri.

¹⁹Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuuquiaari tiaca jiuujajinia curotasano pueya cajitiuujajiniaraari. Tiaca jiyaniijianucuaari tii quijia pueyaracaanu, nojori jiiitianura pueya. ²⁰Niyacoo camaruhuari Pablo, Silas nujuatejoquiaari tiaca jiyaniijianucua tacoji, cuniqui na nequesoreesaanura. Jiyaniijianucua sequetureeri:

—iNio canuuri Judiocuaca! Nojoriiri niya pa tiacajinia quiniaa pueya juaatijioosee. ²¹Nojoriiri tamaatia niishishano niishitiojonuya. Maja cumaati pa tojiniunioj. iPaari Romano pueyani!

²²Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya

jaamitiquiaari jiyanoehua, na jocojosacari nojorijiniji. Na nuhuaji, tamasacaari seeratasaaere nojori na mojoonura macata. ²³Jiyanoehua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojuatia camarnu seeratasaaereeri maninia na cojuatenura nojori nujuatejojuajinia. ²⁴Naacuajitij, cuno nujuatejojuatia camarnuuri Pablo, Silas nujuatejojuatia socua mij, nujuatejojuatia cariquimiatej. Cuniqui nujuatejosaquiaariiri tii na cojuasaanura maninia, na mashiyocuatunuucuaaji. Nojori cashacucuaari suruhuatuneeeca quejasano tajiniocoma saatijosaaquiaarijuhuaj.

²⁵Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maniniuhuaqueetaturiquiaari na jaaquequejosanota. Cuniqui nujuatejosano pueyari nojori tojtiri quiaa. ²⁶Jiyacaritij, rijaari canashiyaquiji jiuuquitiaquiaari jiyanoehua cuno nujuatejojuatia. Puetunu na tiotiuhuajanaari riataquequiaari. Puetunu pueya numatucuaa-cua morojotasano casaajanaari tamajaaja saacarejetaquiaari. ²⁷Nujuatejojuatia camarnuuri ritia niucuaquiaari. Saaja niqiriiri puetunu tohuateya riataquenojuanaari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jiyaniishacari puetunu nujuatejosano pueyajanaa naasucuaari tari mashiyocuatuneeeca. ²⁸Pablo jaara na niquiquiaari, nocua nacareeri:

—iMaja najuhuaana naa miiniutij! iCanaacuajaari puetunujuaana niya quiyani!

²⁹Nujuatejojuatia camarnuuri na shiriiquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojuatia jiniacumara. Pablo, Silas cariquimijia mojuquetaseeri. ³⁰Jiyacari nojori tohuatejoree carijiniacumara. Nojori nequesotareeri:

—iPueyanaa! ¿Taa cua miyarinjia, Pueyaso jiyanooshano cua quiniurajuhuj?

³¹Nojoriiri na riucaeree:

—Jiyaniijia Jesucristooocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³²Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. ³³Jiyacaritij, nujuatejojuatia camarnuuri cuno niucuaaja Pabloori jiyanoocua, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijosaaquiaari moojinia Jesuucua nojori tiuushacari. ³⁴Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojuatia camarnuuri jiyanoehua shuquiriaatia quiri quiaa puetunu na tiajinia quiniaatajanaa, Pueyasocua tiuuniaa nojori quishacari.

³⁵Cuno tariqui, Filipo tiaca jiyaniijianucuaari na seya jiyaroquiaari nujuatejojuatia camarnuucua, na sequenura nojuaja cuara Pablo, Silas tohuatanijioora tari. ³⁶Nujuatejojuatia camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarjia nijaniya. iJuhujaniya nia quiaarohuaqui!

³⁷Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano* pueyajuhuj? Canaa mojuoturiquiaacuaa puetunu pueya niquiarajanaari. Majaari coteenu canaa nequesoreesaanu quiriucuaa. Canaari jiyanojuua nujuatejosaarucuaani. ¿Taa na miitiuniu pania quiarjia canaari, jiyasohuaja tohuatejonu paniniu? ¿Jiyasohuaja mojuoturiquiaacuaa canaatucuaa? iNojorijianaa cuara niiria quiarjia, niiquiji nojori tohuatejonura canaa!

³⁸Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipo tiaca jiyaniijianucua niquiarari. Nocuaji jiyaniijianucuaari pueretiquiaari nojori niishishacari Pablo, Silas Romano pueya

quiquiaarijihuaj. ³⁹Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootoonura. Jiyaniijianucuaari nojori tohuatejosee. Nojori sequereeri cuara quiojooa quenaaja nojori tiacajiniji.

⁴⁰Naacuajitij, Pablo, Silas jaara tohuareetaquiaari nujuatejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuunaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

Tesalónica pueya juaashacari Pueyaso pueya

17 ¹Pablo rucuanesacari Silasta Jesujiniji nojori pohuatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquiiijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejooa tia. ²Taate Pablo quijiacuajani, nojuajaari narta Judiocuaca rerejooa tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijanaa, samaatenu juuca, cuno pueya niqiara pohuataquiaari Pueyaso rupaari. ³Pabloori nojori niishitiojoquiaari taa tariucuaaanu Pueyaso sequesano caminiujuninaa naajiotaciaari Pueyaso Jiyarosocoriquianojini-jicuajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaquiaari, naajuhuj, Jesu jaara na cusunu nuhuaji samiitiaquiaariuhua. Naa nojori sequereeri:

—Nio Jesucuaajani, janiya nia pohuataani, nojuajaari Pueyaso Jiyarosano pocua.

⁴Jiyacaritij, noojiaqueya Judiocuacaari Jesuucua tiuquiaari. Queraatia taucuaacari Jesuucua tiuquiaarijihuaj, canapute tari Moisés niishitiojosano tojijiaa quiquiaaricuajani. Queraatia cuno tiacajinia quiniaa pueya tojishano maajipohuari Jesuucua tiuquiaarijihuaj. ⁵Pueyasocua tiyashijiaa Judiocuacatej, nojoriiri juaaquoquiaari juhua shocotasano nojori quiniuucua. Nocuaji, nojoriiri sesa miijiaa taajecori masuunujuquiaari. Nooj, nareja rucojuaca tiacaacotej. Cuno pojoriiri masuusaquiaari nojori na cojiniuria, tamasaca nojori nasojonura. Na nuhuaji, puetunu cuno pojorijianaa jaara tonujutooquiaari taa na miitiuniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquiyoano pueya nojori niqitiosocoriquiano. ⁶Nojori jaara na riurataaquiquiaari, noojiaqueya Jesuucua tiuunaa pueyari Jasóna cojiritiasaquiaria quioonu. Cuno tiacajinia jiyaniijiaacua na jayotuquiaariiri. Naa nacatureeri:

—iNio canuuri puetunu jiyacajinia pueya sesojijajanaa! iNiya tiuquiiijioreejaariuhua naa na miiniurajuhuj! ⁷iJasónri nojori masecanu maninia na tiajinia! iPuetunu nojorijianaari pa jiyaniijia César sequesano tojitiaashijiaa! iNojoriiri saaja sequequiaa socua tamonu jiyaniijianaari quiya! iNa sesanaari “Jesu”! Naa sequetuquiaaqui nio pojori.

⁸Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquoquiaari. ⁹Jiyacaritij, tiaca jiyaniijianucuaari queraatia cumaneeca masequiaari Jasónjiniiji, narta Jesuucua tiuunaa pueyajinijinio. Naa sequeturee nojoriiri:

—iPablo jaara niqijiji quiaaquiri, majaari canaa niqitionu quiniutianihua nia cumaneeca!

Naa na miishaanu nuhuajitij, Jasónri nata quioosano pueyata carquesaquiariauhua.

Berea tiacajinia Pablo quishacari Silasta

¹⁰Cuno niucuaaja, cuno tiacajinia quiniaa Jesuucua tiuunaa pueyari Berea tiacajiniara mashiquiquiaari Pablo, Silasno. Berea tiacajinia na tiuquiiijosacari, cuniqui quiniaa Judiocuaca rerejooa tiajinia quiojoquiaariiri. ¹¹Cuniqui quijiaa Judiocuaca cutaraari maninia pueya quiquiaari, maja juhua

Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niqiara, nojoriiri maninia tojitiaquiaari na pohuatasano. Na nuhuaji, puetunu juucajanaa, tama nojorijiaarijia tariucuaaanu Pueyaso Rupaajinia naajiotasano pajenuquiaari, nojori niishiniuria seetanujanaa quiriqiaate Pablo niishitiojosano. ¹²Naacuajitij, queraatia Judiocuacaari Jesuucua tiuquiaari, queraatia taucuaacano, canuu, mariyata queraatia tojishano maajipohuanio. ¹³Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuatasecuhuj, nojoriiri nocua quiojoquiaari nojori taanuunura nojuaja cuniquijijihuaj. Na tiuquiiijosacari Berea tiacajinia, cuniqui pueya nasojoseeri, Pablo na juaatiuniuria. ¹⁴Nocuaji, Jesuucua tiuunaa pueyari cuniquiji ritia mashiquiquiaari Pablo shoniniacu caminiajiniara. Silasri Timoteota Berea tiacajinia jateequiaari saaja. ¹⁵Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquesee.

Pablo quishacari Atenas tiacajinia

¹⁶Pabloori Silas, Timoteo sashiquiaari Atenas tiacajinia. Cuno tiacajinia na rucuanesacari pueya na sashishacari, Pabloori niquiquiaari tama cuno pueya shipinijiosanojuaaja na pueyasohuara. Nojori shipinijiosanoori puetunu cuno tiacajinijanaa quiriqiaa. Pabloori cunora jiyanojuaa tacaquiaari. ¹⁷Pabloori Jesujiniji Judiocuaca poojotaquiaari nojori rerejonuuja tiajinia, noo pojori taucuaajuhuj, canapute Pueyaso tojitiajaca quiquiaaricuajani. Naajuhuj, Pabloori cuno tiaca jiuujiajina pueya cajitiucuaa curotasanojini pohuataquiaari Jesujiniji cuniqui quiniaa niqiara. ¹⁸Tamasaca niishijiaacari Pablo pohuatasacari Jesujiniji tojitiariqiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jyanishano niishijia niishitiojosano tojitiajaca nojori quiniuucua. Tamonu maanuuri saniniuuja sesojosaaquiaari “Rejeretajaca”. Naa sesojosaaquiaariiri Zenón jyanishano niishijia niishitiojosano nojori tojiniuucua. Pablo pohuatasacari nojori niqiara, nojoriiri maja na niishitiniuu quiquiaari casaa na pohuatariquiaani. Nocuaji tama nojorijiaarijia sequetooquiaari:

—¿Casaariquitijia cuno paateca pohuataa pajaniyatejaj? Najuhua pocuaa pueyaracaanuuri.

Tamasacaari saniniuuja sequetuquiaari:

—Tamasaca pueyasohujiniji poojotana juhuanaruhua.

Nojoriiri naa sequeriquiaa Pablo pohuatanuucua Pueyaso rupaa Jesujiniji, mariyata taa cusunuunoo samiitiaconutaniuhua. ¹⁹Na nuhuaji, nojoriiri Pablo jiyataquiaari tuhananujiniji, tee nojori jitiquiaari rerejonuunucuaajani. Cuno tuhananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohuatasanojiniji socua maninia niishiniuu paniani. ²⁰Quiaari jiyajeneta sequeriquiaa canaa niqiara quia pohuatasacari. Quiarijia canaa quia tore maninia.

²¹Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuj, nojoriiri maja socua tamonu casaa na miitiuniu quijia. Saaja quiarinio sequesanojiniji niishitiniuu panijiaacari.

²²Jiyacaritij, Pabloori Areópagojiniji nujuaquiaari na pohuatanura na tojitianu panijiaa niqiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatijaca jyanohua.

²³Janiyari naa nia sequeyani pueyanaa, cua niquiniuucua

queraatia nia shipinijosano pueyasohua, cua rucanejosacari nia tiacajinia. Naajuhua, janiyari saajijini nia shipinishano juhua juhuacutura niquiriucuaajuhua. Nocua naajoori sequeya, “Niishishoo Pueyasora”. Cuno Pueyaso nia na tojitiaquiaa na niishyaquiniutiani, nojuajaari nio Pueyasocuaa janiya nia pohuataani.

²⁴Cuno Pueyasoori nio jiya shipiniquiaaricuaa, puetunu pa niquishanojuanaano. Nojuajaari jiyocuaaanu camarnujuhua. Nojuajaari puetunu tiqiyocuaajanaa Quijia. Majaari pueya tiajosano secojua tiajinia na quiniu. ²⁵¿Taa nia jiyaniyari pueyanaa, cutara Pueyasojuaanaate pa jiiatiasano casamijini panyajuhua? Maja. Nojuacuajaari puetunu pa jiiatiasanojuanaa shipiniquiaari puera. Pa rishiniuria, na Sohuanujini pa niqitioquiaarijiaariuhua, pa rijiosocoriqiano paratunio.

²⁶Pueyasoori niquiriyatu pueyano shipiniquiaari juhuacatecara. Paari cuniqui canequiaarini, puetunu jiyacajiniajanaa pa quiniuria. Pueyasoori tarijia sequequiaari tee pueya quiniutiani. Sequequiaarijiaariuhua taacari tii pa quiniutiani. ²⁷Pueyasoori naa panitiaquiaaricuaa puetunu jiyacajinia quinia pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutaniyari pa riuritanura nojuaja? Pueyasocuaajaari maja na quiniu tucuaaanu pajaniyajini. ²⁸Pueyasoori pa samiitianiya. Pa cumaquiquiaaariuhua pa poonijionura. Pa rishitiquiaaariuhua. Naatej, taa nia pohuatajaca sequequiaaricuaajani: “Paari Pueyaso muerasuni”. ²⁹Paa jaara seetanujuaanaa Pueyaso muerasu quirini, majaari socua pa jiyaniyu Pueyaso naasucuaari juhua orojini pa shipinijosano niquishano. Majaari juhua platajiniji shipinishano, juhua saajijini shipinishanonio. Pueyaso cutaraari maja na niquishaanu juhua tama pa niishiriojosanojuaja. Majaari na niquishaanu taa pueya shipinijioquiaacuaajani, nojori jyanishacari Pueyaso naasucuaari naa niquishanotej. ³⁰Pueyasocuaajaari pueya miiniu sesa rejeretariquiaa pueyaracaanu. Saniniuujia, nojuajaari quiarijia puetunu tiqiyocuaa quiijaca pueyajanaa sequeya, nojori cartenura puetunu sesa na miiquisosanojuanaa, saaja nojuaja nojori tojitanura. ³¹Pueyasocuaajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuaanaari. Pueyasoori tari na saquiriojosano pueyano jiiatia pa nequesoreeriquianojuhua. Na samiitianishacari cuno pueyano macujini, nojuajaari naa pa niishitiquiaari, cunocuaajaari na saquiriojosano pueyano.

³²Nojori jaara tojiquiaari Pablo pohuatasacari taa macunucua samiiticonutaniuhuanu, cuno niishijiacaaari na saroojotiquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhua.

³³Na nuhuaji, Pabloo cunocua pueya tajini quiacuhua.

³⁴Noojiaqueya cuno pueyajiniinooi Jesuucua tiuquiaari, Pablo pohuatasano nojori tojitasacari. Nojorijiniinooi quiquiaari Dionisio jyanishano pueyano. Nojuajaari Areópago niishijiacua pueya maanujiniinoo quiquiaari. Jesuucua tiuquiaarijiaariuhua tamonu maaji. Dámaris na sesa. Socua tamasaca pueyari Jesuucua tiuquiaarijiauhua.

Pablo quishacari Corinto tiacajinia

18 ¹Na nuhuaji, Pabloo Atenas tiacajini quiaquiaari Corinto tiacajinia. ²Cuniqui riuriataseequiaari tamonu Judio pueyanooi. Na sesaari Aquila quiquiaari. Nojuajaari Ponto jiyajinia rasaquiaari. Aquilaari necocua Priscilata shusha Italia jiyajini tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jyanijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuaanaa quiquiaari puetunu jiyacajiniajanaa. Nojori jiiatiaquiaari Roma tiacajiniijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanunura Roma tiacajini. Naaratej, Aquilaari

necocua quiaquiaari Roma tiacajini. Corinto tiacajinia quishiiri. Pabloo nojoriicua quiaquiaari nojoritia na pocoojonura. ³Aquilaari necocuaa suhoronutaja toqueya cusupuenuuja quiquiaari juhua Pablojuhua. Naaratej, Pabloo nojoritia quishii, mariyata na poonijionunura tii. ⁴Pabloo maja nareja na shocotenu quijia samaatenu juuca. Nojuajaari Judiocuaca rerejojua tiajinia rucanejojua. Tii nojori pohuataquiaari Jesujiniijiiri, taucuaa niquiaranio, noo pojori canapue Judiocuacaaari jiyatesaaquiaaricuaajani, tariucuaaanu Moisés niishitiojosano nojori tojishacari.

⁵Silas jaara Timoteota Pabloocua tiuquijioquiaari Macedonia jiyajini, Pabloo jiyacari coteequiaari puetunu juucajanaa Jesujini pohuatanura Judiocuaca niqiuara. Nojori sequequiaari:

—Jesuucuaajaari nia sashishano, Pueyaso Jiyarosano seetanujuaanaa pocua!

⁶Judiocuaca jaara tojiquiaari naa Pablo sequesanotej, na tojitiaquarii saajaari nojori cuaracashitiniutia Pablo sequesano. Saaja juaaquioreeri. Sesa pocoojeeaariuhua. Naaratej, Pabloo nojori niqiuara na toque nuutojoquiaari, nojori niishiniuria Pablo tari nojori tiujiaarohua. Pabloo nojori sequequiaari:

—Majaari cucua nia tiutianu, Pueyaso jaara mijiria quinia saniitiore. Niaacuajaari Pueyaso rupaa ruuretaquiaa saaja. Quiarijia taucuaacua quiaa cutaranijia, nojori cua pohuatanura Pueyaso rupaa Jesucristojini.

⁷Na nuhuaji, Pabloo cunocua Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiiari jiyareta Judiocuaca rerejojua tia shuriucua quiriqiuase. ⁸Crispooi jiyacari cuno Judiocuaca rerejojua tia camarnu quijia. Nojuajaari puetunu na tiajinia quinia pueyatananaa Jesuucua tiuquiaari. Naajuhua, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniajanaari moojinia tiuquiniijosaaquiaari. ⁹Jiyacari tamonu niucua, Jyanijia Jesuuri Pablo sequequiaari na maquenujia:

—Maja quia puerenu Pablonaa. Socua quia pohuatare cuno pueya tojishocoriqiano. Majaari sanaajenu. ¹⁰Janiyacuaajaari quiata quiyani. Majaari quenaaja tamonu pueyano jiyashini quiniutianiya taa na miiniu paniniuria quiajaniya. Janiyari queraatia pueya nio tiacajinia jiiatia cucua tiuuriqianoni.

¹¹Naaratej, Pabloo Corinto tiacajinia jiyojequiaari. Tii na quishacari, quera shocotequiaari caapiqui marijiaari. Cuniqui na quishacari, Pueyaso rupaa niishitiojoriqiaa cuno pueyari.

¹²Jiyacaritij, Galión jyanishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriqiuasejuhua. Jiyacari, Judiocuacaari tii Pabloocuaa roojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnucuaari, Pablo nequesoreesaanura. ¹³Naa sequetusee camarnuuri:

—iCanaa camarnunaa, nio pueyanooi pueya shiniujia Pueyaso nojori shuquiritanura tamaatia canaa supuetana Moisés Rootasanojiniji!

¹⁴Pabloo jiyacari juucua pocuanu paniriqiaa. Galióni saa na rupaa niyacutequejaa senota. Cuno Judiocuaca sequereeri:

—Judiocuacanaa, nia jaara maninia miyashijia cucua jaatucure cutara, sesa miijiaa sequenio, janiya maara jiyano pueyanooacara nia tonujusacari tojiri cutarani. ¹⁵Niaari saaja tama nia niishishanojiniji juayonuutaajaacuja. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajini, tama nia supuetanaa rootasanojinijiaajania. ¡Tama nia jeecatoorejaaja!

¹⁶Na nuhuaji, cuno camarnuuri nojori juaarii. Na shuriucuaari na jiyaramiquiriohuari. ¹⁷Naa Galión miishacari nojoritij, narta taucuaari cuniquijia quiatuquiaari Sóstenes, Judiocuaca rerejojua tia cojuana. Na piqituri camarnu Galión niqiuara

cuniquijiaari. Majaari Galión tenujunu quirii nojori. Nareja na niquiriquiaari.

**Pablo riujuushacariuhua Antioquiya tiacajiniohua.
Na nuhuaji jiuujianaraca pacutequiaariuhua quianuuri**

¹⁸Pabloori cuniqui queraatia camueenujuquiaarijiaara Corinto tiacajinia. Tari na riujuushacariuhua cuniquiji, na nuhuajiria saruhuataarohua narta Jesuucua tiuunaa pueyari. Buquejinia quiaarohua Siria jiyajinihuari. Na cojiriquiaajaari Priscila, neyaca Aquilano. Nojori tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riujuuquiaari caritianajara. Nojuajaari Pueyaso sequequiaari tari, maja na naca na riujuutiniu quiniutianiya nojuaja jaara na sequesano Pueyaso tucataaquiri.

Cunora, naa quiarjia riujuutirii na nacaari. ¹⁹Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca refejua tiajinia. Cuniqui rerejono Judiocuaca pohuatasee Jesujiniiri.

²⁰Nojoriiri Pablo nenecojuquiaari juucua cuniqui na camueenujunurajaara nojoritia. Majaari Pablo paniniu quiquiaari. ²¹Cuniqui quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutianiya Jesuucua tiuunaa pueyatani. Pueyaso jaara paniri, janiyacua nia niqiniuria tacatemohuara-niuhuj.

Cuniquiji tacaquiaariuhua buquejiniaari. Éfeso tiacajiniji quiaarohuari. ²²Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniaari, puetunu Jesuucua tiuunaa na saruhuatanurajanaa. Na nuhuaji, quiaarohua Antioquiya tiacajiniaari. ²³Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajiniarajanaa. Quiariquiaari na niqiniuhua Jesuucua tiuunaa pueya Galacia jiyajinia, Frigia jiyajinianio. Pabloori nojori niqiaara pohuatquiaari socua Pueyaso rupaajiniji. Jesuucua tiuunaa nacasuquiaariiri maja nojori tarinitianura Jesuucua tiuunuu.

Éfeso tiacajinia Apolo pohuatasacari Pueyaso rupaa

²⁴Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriuiase. Tariucuaaanu Pueyaso Rupaa naajiosano niishijia quiquiaarijiaariuhuj. ²⁵Nojuajaari maninia niishitiojosaquiaari Jiyaniijia Jesu niishitiojosanojiniji. Shitimia pohuatata pueya niqiaaraari. Maninia niishitiojua Jesujiniji na pohuatasacarijiaariuhuj. Seetanujanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojquiaaricuaani. ²⁶Aploori na puerenu jataquiaari tii na pohuatasacari Pueyaso rupaa narta Judiocuaca refejua tiajinia. Aquilaari Priscilata tii quiriuijaajuhuj. Apolo pohuatasano tojitiariquiaari. Apolo jaara puecaquiaari pohuatunu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. ²⁷Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuunaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuunaa pueyacuara naajioquiaari Apolo patasocoriquiano, maninia cunoo pueya tojiniuria nojuaja na tiuquishacari tii. Jaara tiuquishiquiaari Acaya jiyajinia, Apoloori Jesuucua tiuujiaa cumaquiquiaari jiyanohua, nojori na niishitiojosacari.

²⁸Aploori nojori niqiaara niishitiojquiaari tariucuaaanu Pueyaso Rupaajiniji naajiotasano. Jiyanohua maninia na niishitiojosacari Jesuuri seetanujanaa nojori sashishano quiquiaari, naacuajitij Judiocuaca niishishano pataquiaariiri.

Pablo quishacari Éfeso tiacajinia

19 ¹Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nuucuo Éfeso tiacajiniara. Na quiasacari, tuhananuhua shoconujuquiaariiri. Naa tiuquishiquiaari Éfeso tiacajiniaari. Tii riurataquiaari Pueyaso pueya maanuuri. ²Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso rupaacua nia tiuushacari?

Pablo riuucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

³Pabloori nojori sequequiaari:

—¿Casaara nia tiuquinijiosaacanucuaarini?

Nojoriiri na riucaquiaari:

—Canaari tiuquinijiosaquiaariiri taa Tiuquinijiona Juan niishitiojquiaaricuaani.

⁴Pabloori nojori riucaaree:

—Taaquiriirini. Tiuquinijiona Juancuaaquiniateja pueya tiuquinijioquiaarijia, nojori jaara noojia tacatoquiaari sesa na miitiushanojiniji. Nojori sequequiaarijiaariuhuj: “Cua nuhuaji Niriquianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijiosaquiaariuhua Jesuucua nojori tiuushacari seetanujanaa. ⁶Naacuajitij, Pablo niasacari na juaashiquia nojori nacaacua Pueyaso na secijosacari, Pueyaso Sohuanuuri cuno pojori jiuujiajinia tiuquiquiaari. Naacuajitij, nojoriiri niishishoo rupaacajinia pocooree. Naajuhuj, Pueyaso Sohuanu niishitiojosano Pueyasojiniji pohuatanuquiaariiri. ⁷Cuno pojoriiri doce canuu quiquiaari.

⁸Pablo quishacari cuno tiacajinia, nojuajaari tii shocotejuquiaari jiuujianaraca raca. Jiyacari, puetunu samaatenu juacajanaa quaja Judiocuaca refejua tiajiniaari. Tii pohuatata Pueyaso rupaa pueya niqiaaraari. Naajuhuj, nojori niishitiojuaari taa Pueyaso jiitianutaniya pueyaracaanu Jesuucua tiuunaa pueyani. Pueyari na tojitiaquiaari maninia, na puereyaquiniutia na niishitiojosacari. ⁹Noojiaqueya cuno pueyajinijinoori saaja ruuretaquiaari Pueyaso rupaa. Na rerequetequiaari saajaari. Sacuaraatia pocoquiaari Jesu rupaajiniji pueya niqiaaraari, Jesuucua nojori tiuuniu paniaquishacari. Nocuaji, Pabloori saa jiyareta Jesuucua tiuunaa pueya jiyataquiaari cuniquiji, tamaqireta serojonuuja tiajinia. Tirano jiyaniushano pueyanoori cuno serojonuuja tia camaru quiquiaari. Pabloori cuniqui puetunu juacajanaa niishitiojua Pueyaso rupaa Jesuucua tiuunaa pueya.

¹⁰Caapiqui marijiaari socua Pablo shocojuquiaari tii na poojotasacari Pueyaso rupaa Tirano serojonuuja tiajinia. Naacuajitij, puetunu Asia jiyajinia quiniaa pueyajanaari Pueyaso rupaajiniji caminiujiushaaquiaari, Judiocuaca, taucuacajuhuj. ¹¹Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. ¹²Naacuajitij, pueyari Pablo paneyaca tuujataqueya rijioquiaari, Pablo cooshano toqueraacuanio. Cuno pueya jaara na cusosuhuaa niojoquiaariuhua cuno toqueraacua, icusosuhuari naatocoquiaariuhua! Naajuhuj, samaruuari tohuaretaquiaarijihuaj, samaruuari jiitiaja pueyacua.

¹³Tamasaca Judiocuacajinijinoori quiriuijaajuhuj, pueyajiniji samaruuari tohuatanijiojua. Nojoriiri puetunu tiacajiniajanaa rucojojuaca quiquiaari. Jiyacaritij, nojoriiri juhua Pablo miiniu paniquiaarijihuaj. Juucua naa sequetuquiaari samaruuari:

—Pablo pohuatasano Jesu sesajinia nia sequeyanijia: “iNio pueyanojiniji nia tohuaretare!”

¹⁴Naa miijiaaari siete canuu quijia. Nojoriiri Esceva jiyaniushano pueyano niqiohua quiriuija. Escevaari

pueyacuara secojonaa camarnu quiriquiasejuhuaj, Judío pueyanotuhaj. ¹⁵Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacujanijia. Janiyari Pablo niishiyajaanuhaj. ¿Canteerini nijayanijia, naa nia sequenura janiyatej?

¹⁶Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj. ¹⁷Puetunu Éfeso tiacajinia quiniaa Judiocuacajanaa, mariyata tii quiniaa taucucacano, nojori jaara niishiquiaari naa miishanojinijitij, jiyanojua pueretuquiaariiri. Naacuajitij, puetunu Éfeso tiacajinia quiniaa pueyajaari sequequiaari:

—iJesucui seetanujanaa Jiyaniijajanaa cutara!

¹⁸Naajuhaj, queraatia Jesucua tiunuaa pueyari nijioquiaari, tarijia sesa na miitiushano pohuatanura puetunu pueya niqiarajanaa. ¹⁹Naajuhaj, queraatia pueyari juhua shimiacuri miijiojuaca quiquiaari. Nojoriiri na nequesoreetuneececa mueratejotaquiaari. Cuno nequesoreetuneececajinaari serojosano quijia taate pueyano cumueca shimiadura quiniuni. Na camaruhuari jiyacari puetunu cuno nequesoreetuneececajanaa patootaquiaari. Na catijiaquiaari puetunu pueya niqiarajanaari. Puetunu cuno nequesoreetuneececajanaa catijiasaaquiaarini, cunoori cincuenta mil platajiniji* shipinijosano cumaneecata masano quiquiaari. ²⁰Naacuajitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujajinia.

²¹Na nuhuaji, Pablori cuniquiji naquerejoquiaari Macedonia jiyajiniarajuhaj, Acaya jiyajiniarano. Cuniquiji riujiuuni paniriquiohua Jerusalén tiacajiniohuaraari. Sequequiaarijiaariuhaj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²²Jiyacaritij, Pablori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiojequiaarijiaara.

Éfeso pueya cushitiishacari na juaaquiionuta najuhuanaj

²³Pablo quishacari Éfeso tiacajiniaja, Éfeso tiacajinia quiniaa pueyari jiyanojua juaaquiionuara Pablo niishitiojonuucua Jesucristojiniji. ²⁴Naa quiquiaariiri. Demetrio jiyaniushano pueyanocuaajari juhuacatecara narta pueya nasojosajiaari. Cuno pueyano, Demetrioni, nojuajaari shiirijiaa tia platajiniji* shipinijiojua quiquiaari. Cuno shiirijiaa tiacaari juhua nojori jiyaniushano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niqitiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. ²⁵Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasaca pueya, casaa shipinijionaa platajiniji juhua nojoriujiuhaj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jitiiaani pa niqitiojosacari pa cumaneecara pa shipinijosano. ²⁶Quiarijia cuno Pablo jiyaniushano pueyanoni, nojuajaari queraatia pueya niishitiojioquiaa, pueyano shipinijosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhaj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejajaari na sequesano tojitiaajuhaj. ²⁷Taa cua

sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyaariuhaj. Nocuaji, majaari pueya nijionu quiniutianiya tari pa pueyaso Artemisa secojojua tijajiniara, tii nojori secojonura, naa cuno Pablo niishitiojonuucua pueyaracaanu pueyatej. iNaacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejajaari pa pueyaso Artemisa rerequetejacara jatanutaniya! iPuetunu pueyapuejajaari na nijajetanutaniya socua pa pueyaso Artemisatej!

²⁸Cuniqui quiniaa pueya jaara tojiquiaari na Demetrio sequesantej, nojoriiri jiyanojua juaaquiionuara. Naa nacoquiaariiri:

—iPa timitiasano Artemisa cuaara pueyaracaanu quiriia Éfeso tiacajinia quiniaa pueyaso!

²⁹Naa nojori juaaquiiosacaritij, puetunu cuno tiacajinijanaa pueyari cushitiiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tijajiniaraari. ³⁰Pablori cuno pueya nacoosaqui tijajinia tiuquiniu paniquiaari juucuaajuhaj. Quera na pocuasee cuno pueya tajiniani. Jesucua tiunuaa pueyari saa na cosequiaarijia na tiuquiyacuiniucua. ³¹Asia jiya camarucuaari na seya jiyaroquiaari Pablocuajuhaj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojosacari, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupueaa quijia. ³²Cuno nasojosano rerejono pueyari saaja cushitiiquiaari na juaaquiionuta. Jiyanojua nacooreeri. Tamasacaari saniniuujia tamaatia nacooriqiaajuhaj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriqiaani. Secaja nojorijinijinioori na niishiquiaari cutara. ³³Jiyacaritij, Judiocuacari Alejandro jiyaniushano pueyano caponeequiaari pueya nacoyano tacoji na nujuatesocoriquiano. Cuniquijinio pueyajaari tii toquiaari Alejandro casaara pueya nacoyani. Alejandroori Judío pueyano quiquiaarijiuhaj. Naaratej, Judiocuacacuaji tacunu paniriquiaa juucuaari. Alejandro jaara nujuaquiaari pocuajajiniji, na juaashiquia shiitioquiaariiri pueya sanaajetanura. ³⁴Saniniuujia, cuno pueya jaara niishiquiaari Alejandroori Judío pueyano, puetunu pueyajaari socua jiyacatequiaari nacoona. Nojoriiri caapiqui hora* shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—iPa timitiasano Artemisa cuaara pueyaracaanu quiriia Efeso tiacajinia quiniaa pueyaso!

Naa pueyaracaanu nacooriqiaari. ³⁵Cuno tiaca camarucua naajiona pueyano jaara na naata quiriquiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishituyajaariuhaj paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatanoni.

³⁶iCanteeri nio niishiyaquianijia! Shaaqui. Cunora tariucua. iNia sanaajetarohua! Majaari najuhuaa sesa nia miitiuniu, maninia nia niishiriojiyaquishacari. ³⁷Nio canuu niaa niyara na jayoreeni, nojoriiri maja na nohuasenu quiri casaa pa pueyaso secojojua tijajiniji. Majaari na sesacatunu quiquiaa pa pueyasojuhaj. ³⁸Demetrio jaara nata poonijionaata cuno pueyacuara tonujunu paniri, ¿casaara na quiaaquia pa nequesoreena niquiara tonujunuraari? ¿Casaara pa jitiia nequesoreena pa tiacajiniarini? ¿Najuhuanaj? Pa nequesoreenaari pa paraa tacujua pocuaji. ³⁹Niaa jaara tamonu casaacua juaaquioreja, pocua tamonu juuca na rerejotariquiani

pa jiyaniijianuacua pa jecanura puetunu nia sequesanojuanaa.
⁴⁰Pueyanaa, ¿majate nia puerenu, Roma tiacajinia quijia pa jiyaniijijanaa jaara pocuara tosaare pa nacojonujiniji? Paa jaara sequesaa nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹Tiaca camarucua naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

Pablo rucuanajosacariuhua Macedonia jiyajinia, Grecia jiyajinianio

20 ¹Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiuunaa pueya sequequiaari tama jiyareta nojorijiaa rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ²Nojuajaari puetunu cuno jiyajinia rucuanequiaarijanaa. Jesuucua tiuunaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajinatej, socua tiuquishiiquiaari Grecia jiyajiniaari. ³Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴Nucuaco na quiasacariuhua, na tarajaquiaariiri Sópater jiyaniishano pueyano Brea tiacajinijinio, Pirro niyanu. Na tarajaquiaariiria-riuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariiriauhua Gayo, Derbe tiacajinijinio. Timoteori nojoritia quiriquiaajaacuhuj, Tíquiconio, Trófimojuhuaj. Nojoriiri Asia jiyajinijinio quiquiaari. ⁵Puetunu nio canaa tapueyocujacajanaari canaa puetaquiaari. Canacuajij tiuquijiosequiaari coteenu Troas tiacajiniaari. Cuniqui sashitiquiaari canaari. ⁶Jiyacariiri queranacunuusacari quiquiaari, porejetaaju shipinijosano pan miaquesacari. Queranacunuunu nuhuaji, canaari Filipo tiacajiniji jaquetaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitijosacari Troas tiacajinia

⁷Shusha semaana* coteejajinia domingo* juuca, canaari rerejoquiaarini pan neecasenua pa Jiyaniijia cusosacari niishiriojonura. Pabloori jiyacari Jesuucua tiuunaa pueya rootariquiaa niucua. Nojuajaari cuno tariqui quiariquiano quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. ⁸Cuno tiajinia canaa tii quiriquiaani, canaari jiyocuaanu tercio na natacojinia rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niqiara. ⁹Jiyacaritij, tamonu mashajaari tia shuucuaaji tacuhajiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyanohua na maquesacari, jiyocua tiquii socuaari. Cusoseejanaari. ¹⁰Pabloori nata quiniata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuunaa pueya sequereeri: —Maja najuhua shiriqitiuniu. Saminiocujaja.

¹¹Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaru neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuacuemaajaja socuaari. Tariucua juuca quiaqueeri. Nojuajaari nucuaco quianu paniquiaari

cuniquiji Asón tiacajiniara. ¹²Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³Pabloori na quiaaquishacarijia tari canaa sequequiaari: —Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. ¹⁵Canaari tariqui shocomaa Quío jija tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. ¹⁶Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaariuhua Jerusalén tiacajiniaari. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuunaa jiidanaa pueya

¹⁷Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuunaa pueya jiidanaa. ¹⁸Nojori jaara canaacia tiuquijioquiaari, Pabloori nojori sequere:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijia cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejuani. Janiyari pueyaracaanu naquiya miishanoni, cuarta Judiocuaca paracaashacari janiya. ²⁰Naajaja, majaari cua pishiniu quijia nia niqiara cua pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia miiija nia quiniuriajuhuaj. Majaari cua niishitiojonu quijia jiyasohujaja. Janiyari puetunu pueya niqiaraana nia niishitiojuani, tama nia tiacajiniaqueyajaajiano. ²¹Janiyari Judiocuaca sequejani taucuaanio, nojori tacatonuhua noojia Pueyasocua, sesa nojori miishanojiniji, pa Jiyaniijiaacua nojori tiuuniuria cutara. ²²Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³Janiyari saaja niishiya cutarani, puetunu tiacajiniajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuaj”. ²⁴Janiya jaara na niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucuatani paniya cutarani. Pa Jiyaniijia Jesuuri cua jiyaroquiaari cua pohuatanura pueya niqiara, taa Pueyaso jiyanooni paniya pueyani.

²⁵Janiyari seetanujuanaa nia sequeyani pueyanaa. Puetunu nijaniyajanaa, cana niqiara cua pohuataquiaari Pueyaso rupaacuajani, majaari socua nia niquiniu quiniutianiya mijiria janiya. ²⁶Naaratej, janiyari nia sequeyani, majaari na nuhuaji nia sequenu: “Maja canaa pohuataaanu quiquiaari Pueyaso rupaani”. ²⁷Janiyacujajaari tari nia pohuataquiaari puetunu Pueyaso sequesanojuanaa pajaniyarani. ²⁸Quiarijiani, tama nia cuaqueyajaaja nia cojuare. Maninia nia cojuare Jesuucua tiuunaa pueyajuhuaj. Pueyaso Sohuanucujajaari nia jiyatequiaari Jesuucua tiuunaa pueya jiidanaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹Janiyari seetanujuanaa niishiyani, janiya jaara niqijij quiaqueeni, tamasaari cua nuhuaji nijionutaniya. Jesuucua tiuunaa pueya sesonutaniyari,

tari tariucuaaanu Moisés niishitiojosano. Quiaanaari niishitioquiaajuhujaj maja nojori necohua cararaatiuuquia co nojori miatejonura, taa pa supuetanaa niishitiojosaaquiaari-cuaani. ²²Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. ²⁴Nojori quia jiyataare Pueyaso Secojoua tiajinia. Niocua nia cuaqueya jeequejosee taa pa supuetanaa sequequiaaricujani. Naajuhujaj, quiocua nojoriria cumaneeca niqutiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuaanaa quiquianu pueya sequesano quiajanijini. Niishituniutianiyajaruahujaj, quiaaqui tariucuaaanu Moisés niishitiojosano miyajaa. ²⁵Majaari Jesuucua tiuunio taucuaacaacia quia tacaani. Canaacuajari tari nojori nacasuquiaari canaa naajioneejiniani, nojoriicuaa canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenuunura shipinishano pueyasohuacuara puecoosano casaa, naajuhujaj, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacataja, naajuhujaj, maja na numuetucunura na camishoo maaji. Puetunu pa supuetanaa rootasanojinijianaani, saa nojuaari taucuaa tojishocoriquiano rootasano.

Na cojiniaata Pablo quioosacari Pueyaso Secojoua tiajinia

²⁶Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricujani. Naa na miiniu nuhuajitij, Pueyaso Secojoua tiajinia tiuquitiaquiaari pueyacuara secojonaacua. Na sequetuquiaari casaa juuca na tucuatatunutananiya na cuaqueya na jeequejonuununi, naajuhujaj, casaa juuca nojori panutananiya Pueyasora na niqutiosocoriquianoni.

²⁷Quera nojori tucuatasaacari puetunu cuno semaana juucajanaa, Asia jiyajinijinio narta Judiocuacaari Pablo niqiquiaari Pueyaso Secojoua tiajinia. Nojoriiri puetunu pueyajanaa nasojoquiaari ritia. Jiyacari Pablo quietureeri. ²⁸Na quietusacari Pablo, pueya na jiiquioonutareeri:

—iIsrael pueyanaa, miji! iCanaa nia naacuseeja! Niiori noo pueyanocuaa tiqiyocua na rucuanesaqui pueya niishitiojoquiaa sacuaratia pucuaratej, nio Pueyaso Secojoua tiaacuaraajuhujaj. Naajuhujaj, tariucuaaanu Moisés Rootasano sesacatequiaa pueyajaariuhujaj. iQuiarijiani, pa Secojoua tiajinia sacuaratia tiuquinitiaree taucuaacari!

²⁹Cuno Judiocuacaari naa sequetuquiaari Pablotej, Trófimo jiyaniushano pueyanota nojori niqiniucua nojuaja tarijia na rucuanesacari cuno tiacajiniaja. Trófimoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojoua tiajinia.

³⁰Puetunu Jerusalén tiacajinia quiniaa pueyajanaari juaaquoquiaari. Pabloori netecuatuquiaariiri. Na quietureeri. Pueyaso Secojoua tiacoci na jaatiuquiaari carijiniacumaari. Pueyaso Secojoua tia tohuateyari ritia tionujusaquiaari na nuhuaji. ³¹Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “iJudiocuaca na juaniutia nacoya!” Cuno comandanteni, nojuajaari soldadohua capitancuaa jiyaniijia. ³²Jiyacaritij, comandanteeri na soldadohua rerejotequiaari ritia, na capitancuaanio. Tee pueya nacooriaquiaani, nocua netecuatuquiaariiri. Judiocuaca jaara niqiquiaari comandante na soldadohua neretaano nojoriicua, jiyacari shusha cartetuquiaari Pablo piqutiuniuuri. ³³Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴Pueyari saaja jiyajeneta nacooriaquiaa. Niiori tamaatia nacooriaquiaacujua. Tamasacaari socua tamaatia nacooriaquiaa-janaajataj. Comandanteeri cunora maja na niishiniu quiquiaari casaa Pablo miirijiaarani, puera nojori cojuatunenuucua na nacoosacari. Cunora na soldadohua sequereeri:

—iPa quijia tiajinia nia jaatucuyarohua!

³⁵Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloori, na monu paniniuria juucua. Soldadohuari nojoriicua Pablo shiitioquiaari jiyocuaaanu. ³⁶Pueyari soldadohua nuhuaji na cocuatasacari jiiquioonuuriquiaa:

—iNia more cuno sesaaca! iNia more!

Tama nocuaji Pablo tacusacarijiaaja

³⁷Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucaaree:

—¿Quiaaquiiri Griego rupaa pocuaja? Janiya juucua quia jiyaniquiaa Egipto jiyajinijinio pueyanoni. ³⁸¿Majateeri noo quiajanija quiquianucuaaja, cariiquia jiyajinia jiyatacanu cuatro mil puecojuuca pueyatej?

³⁹Pabloori saaja na sequereeri:

—Janiyari Judio pueyanoni, Tarso tiacajinia rasanotuhujaj. Naacuajitij, janiyari Tarso tiacajinijinio pueyanoni, teyano tiacatucuaaja socua panishano tiaca Cilicia jiyajiniani. Quenaaja rupaquijia cua tarishitricuarajaj. Cuno pueya sequenu panija niquiriyatu rupaa quenaajanijia.

⁴⁰Comandanteeri socua na sequereeri:

—Quia pocuare.

Pabloori jiyacari tacatujini nujuaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicuaa pocuaree tama nojori Hebreo* rupaajiniaari. Naa nojori sequereeri:

22 ¹—Cua tapueyocuaanaa, cua jiyanijianucuaanaa, nia tojitiare cua sequesano niajanija tama cua tacusacarijiaaja cucuaji.

²Cuno pueya jaara tojiquiaari Pablo pocuasacari nojoriicuaa Hebreo rupaajinia, pueyari maninia sanaajetaquiaarijianaa. Pabloori nojori sequereeri:

³—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaari. Gamalielri cua niishitiojona quijia. Jiyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniuucua jiaatiaquiaani, taa quiarijia nia miiniu panianijia. ⁴Janiyari tarijia Jesuucua tiuuniaa pajejani naquiya cua miitiasocoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵Pueyacuara secojonaa camarnuuri cua miijiosano niishiyajuhujaj, puetunu pa jiyanijianucuaajanaanio. Nojoricuajari cua niqutioquiaari nojori naajione Damasco tiacajinia quiniaa parta Judiocuacaacua. Janiyari juucua quiariquiaa Jesuucua tiuuniaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiosocoriquiano.

Pablo pohuatasacari Jesuucua na tiuuniujini

⁶Janiyari juucua nucuaa quiariquiaani. Quera cua tiuquishacari Damasco tiacajinia, panacariiri quiriquiaa. Canashyaquiji jiyanohua shacantuuca juhua miacanaari cua nunuquiaari. ⁷Janiyari juhua jatasaareeni. Jiyacaritij, janiyari rupaa tojirii cua sequayanoni: “Saulo, Saulona, ¿casaara quia

miitiaa puera janiyani?”⁸ Janiyari na nequesotareeni: “¿Cantequia Jiyaniijiana?” Cua sequereeri: “Janiyacuajaari Jesuni, Nazaret tiacajiniinio pueyano. Cunocuajaari quiaa na miitiaani”.⁹ Cua cojiniaa pueyari cuno shacantuuca na niquishacari shiriqituiquiaari. Majaari na tojitiuniu quiquiaari cutara jiyocuaaanuji rupaa cucua pocuaano.¹⁰ Janiyari socua na sequereeni: “¿Casaa cua miyarini Jiyaniijiana?” Jiyaniijaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”.¹¹ Cuno shacantuuca cua nunuquiaari jiyocuaaanujini, cua namijia sesoquiaariiri. Janiyari cariyajuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹²Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuaaanu Moisés niishitiojosano tojjia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”.¹³ Ananíasri jiyacari cua niqiniuucua niquiaari. Jaara tiuquiquiaari cucua, cua sequeeseeri: “Cua tarajanu Saulonaa, maninia niquijia quia quiriohua”. Jiyacaritij, cua namijiaari ritia jeequequee. Janiyari maninia niquiqui Ananíasri.¹⁴ Cua sequereeriariuhua: “Pa supuetanaa Jiyaniija Pueyasocuaajaari quia saquiriojoquiaari tariucuaaanujiniji, na niishitiojua quia panishano quia miiniuria. Quia saquiriojoquiaari-jiaariuhua quia niquiniuria taquiya pocuajinio sesa miyashijia cutara, tama na camaru rupajiniji quia tojiniuria na sequesanojuhuaj. Nojuacuajaari pa Jiyaniija Jesucristo.¹⁵ Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

¹⁶Ananíasri socua cua sequequiaari: “¿Casaara quia tarishiyarini? Quiarijiani, quiaa cuara tiuquinishaaria. Jiyaniija Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucuaacuani

¹⁷Janiya jaara riujuuquiaariuhua Jerusalén tiacajiniuhua, janiyari Pueyaso Secojonuuja tiajinia secojoriquiaani.¹⁸ Cua secojosacari, janiyari Jesu niquiquiaari juhua cua maquenujiniani. Cua sequereeri: “Ritia quia quiaare niiquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji”.¹⁹ Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejojua tiajinijianaa cua nujuatejosocoriquiano nojori. Janiyari nojori mojuajuahuaj.²⁰ Naajuahuaj, quia rupaa pohuatana Esteban jaara mosaquiaarritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhua, nojori mosacari Esteban. Janiyari jaarajaaja sequequiaarini: ‘Cuaara mosaaria’”.²¹ Naa cua sequesacaritij, Jiyaniijaari saaja cua sequereeni: “iNiiquiji quia quiaarejaj! Janiyacuajaari tucuaaanu quia jiyaronutaniya taucuaacuani”.

Comandante jiitiasacari Pablo

²²Pueyari sanaa tojitiariquiaa Pablo pohuatasacari. Saniniuujia, Pablo jaara jiyaniquiquiaari taucuaa, pueyari jiyacari coteequiaari nacoonu, taucuaa soojeaca nojori quiniuucua:

—iCuaara mosaaria cuno pueyano! iMajaari maninia jiyano pueyano rishiniuria socuatej!

Cuno pueyari naa nacooriguiaa.

²³Na juaaquionuta na nacoosacarijia, na toqueya quejootuquiaari jiyocuaaanuuri quera na macaaniutia. Naa quejootuquiaari jiyajuajaariuhua.²⁴ Comandanteeri na capitancuaa sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuara sequeera casaara naa pueya nacoyani.

²⁵Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniija César rootasanotee, naa nequesoreesoojua nia majacunura narta Romano* pueyanotej?

²⁶Capitán jaara tojiquiaari naa Pablo sequesantej, ritia netequiaariiri. Na comandante sequeeseeri:

—iQuiaa cocuaatia miya! iCuno pueyanona Romano!

²⁷Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucaaree:

—Taaquiriririnj.

²⁸Comandanteeri na sequerohuacuahuaj:

—Romano pueyano cua quiniuria, janiyari queraatia cua cumaneeca niquitioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanuucua.

²⁹Cuno pojori, Pablo majacunura seeratasaaquiaari juucuan, naa nojori tojitiacacariitij, Pablo shuriucuaaji ritia shiriqituaquiaariiri. Comandante niishishacari Pablo seetanujuanaa Romano quiquiaari, puererejaariuhua, Pablo na morojotenuucua.

Tama nocuaji Pablo tacusacarijiaaja Judiocuaca jiyaniijanucua niquiara

³⁰Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuua naa Pablóni. Naaratej, comandanteeri Judiocuacaacuara secojonaa jiyaniijanucua rerejotequiaari. Puetunu Judiocuaca camarucua nacasunaa maanujuanaa rerejotequiaarijiaariuhua. Nojoricuajaari Sanedrín* maanu. Jiyacari Pablo numatucujiniji rupareetaquiaari cumayocua saatijiotasanoori. Puetunu nojorijianaa jaara tari rerejojuaari, jiyacari Pablo tohuatequiaariiri. Nojori taccoji na nujuatereeri.

23 Pabloori juhuacatecara pohuatanu coteequiaari camarucua niquiara. Nojori sequereeri:

—Cua tapueyocuaanaa, janiyari pueyaracaanu juhuajaniya quiquiaani, Pueyaso tojjia cua quishacari pueyaracaanu.

²Naa Pablo sequesacaritij, pueyacuara secojonaa

jiyaniijianaari juaarii. Ananías na sesa. Nojuajaari Pablo jiyaniquiaari najuhuana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—iNa rupajinia nia piri naa pocuaaniquitij!

Pablo shuriucua nujuanaari jaarajaaja na piqii.³ Majaari Pablo niishiniu quiquiaari casaate Ananías quiquiaarini.

Naacuajitij, Pabloori juhuajaniya Ananías sequequiaari:

—iPueyasoori saniniuujia cucua quia naminiutianiyacujua, Moisés Rootasano tojiyashijianaa! Nia jyanishacari janiyari Moisés Rootasano tojiyashijiani, niaari coteenu cua nequesoreya maninia taa Moisés rootaquiaaricujani. iQuiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

⁴Pablo shuriucua nujuatunaaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵Pabloori nojori riucaaree:

—Cua tapueyocuaanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaatia rimiaaquenu nia camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniija.

⁶Pabloori niishiqui cuno Judiocuaca camarucua nacasunaa cuniqui quiriquiaani, nojorijinijinoori Saduceocua-

ca* maanujiniji quiriqiaa. Tamasacaari saniniuujia narta Fariseocuaca* maanujiniji quiriqiaacujua. Naaratej, Pabloori jiyanoohua na rupaa paaretaquiaari naa na sequenura nojori:

—iCua tapueyocuacanaa, janiyari Fariseo pueyanoni! Cua shipininioori Fariseo pueyano quiqiaarijihuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniaa tiuyanijia. iNiaaquiiri jiyamitia cua nequesoreya!

⁷Pablo jaara naa sequequiaaritij, Fariseocuacaari Saduceocua-cata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquitiiquiaari.

⁸Saduceocuacaari jiyaniya maja macunucua samiitiaconu quiniutianihua. Nojoriiri sequeyajuahuj: “Maja Pueyaso seya quiniu”. Pueyapueaari sohanuujuhuj. Fariseocuaca cutaraari nojori cuaracashitishanoocua tiuya. ⁹Naacuajitij, puetunu pueyajanaari nacooriqiaa na juayonuutasacari.

Jiyacaritij, tariucuaaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pabloriniji:

—iNio pueyanoori maja sesa na miiniu quiquianu! Maninia sohanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujire Pueyaso panishano na miishacarini?

¹⁰Pueyari socua jiyacatequiaari nacoonu. Comandanteeri puerequiaari, na jyanishacari Pablo naasucua socua suresaanutaniyaquij. Naa jiyaniquiaariiri, puerajanaa pueya juaaquiiosacari. Nocuaji, comandanteeri ritia na soldadohua jiyaramiquiquiaari, na tiajinia nojori tiuquininiuhua Pablo pueya tajiniji. Naa miituuquiaariiri.

¹¹Cuno niucujani, Jiyaniijia Jesuuri Pablocua muetaquiaari. Na sequeereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuj, Césarjanaa* niqiarajuhuj.

Judiocuaca roojotoosacari Pablo na motunura juuca

¹²Tariqui saniniuujia, noojiaqueya Judiocuacajinijinioori Pablocuara roojotooquiaari na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirinianiuhuj.

¹³Nojoriiri cuarenta canuu quiqiaari, naa sequetuquiaarini.

¹⁴Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín* maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casa, canaa cuaraa more Pabloriaaja. ¹⁵Niajaniya, pueyacuara secojonaa jiyaniijianucuaanaa, puetunu Sanedrín maanujanaa- nio, nia sequeere comandante cuaraa nitiaara tariqui Pablo niaacua. Niocua naa na sequeerenoj: “Miji Pablo quia nitiaare. Canaari socua maninia na nequesoreenu paniani”. Canaacia jiyacari niaacua na tiuquiyaquishacaritia nuu cajiniocua na moreni.

¹⁶Tamonu pueyanoori Pablo raaquia caminiujuquiaari naa cuno pojori sequesano camarucatej. Pablo raaquiaari nocuaji ritia soldadohua quijia tiajinia quiaquiaari na cama Pablo na pohuatanura. ¹⁷Jaara tari na pohuataquiaari, Pabloori jiyacari cuniqui cojuanaajinijinio capitán piqiaari. Na sequeereeri:

—Nio caya samijia quia jiyataare comandanteecua. Nojuajaari comandante numootenu pania.

¹⁸Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequeereeri cua nitianura quiocua nio caya samijia. Nojuajanaari casa quia sequenu pania.

¹⁹Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu pania janiyani?

²⁰Caya samijiaari na sequeere:

—Noojiaqueya Judiocuacajinijinioori Pablocuara roojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujanaa niqiaara nequesoreesocoriquiano. ²¹Quiaa jaara sequesaare, majaari nojori tojinu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miaquenuunu quiniutianiya, majanaari na raruunu quiniutianiyajuhuj, cuaraa moture Pabloriaaja.

²²Comandanteeri caya samijia sequequiaari:

—Maniniacuja. Majaari tamasa pohuatanu quia sequesano janiya. Tariucuja. Quia quiaarohua.

Soldadohua jiyatasacari Pablo camarnu Félixua

²³Comandanteeri caapiqui capitán piqiaari. Nojori sequeereeri na numootenura dosciento soldadohua, Cesareya tiacajinia quiojoriquiano cuno niucuja. Mariyata cuara quiojora setenta soldadohua caballohua nijinia cajitiujiajuhuaj, socua dosciento soldadohua saa cashiriacajanio.

²⁴Comandanteeri na capitánucua sequequiaarijihuaj, nojori nojotanura cajitiucua tamasa caballohua nijinia Pablo cajijiara. Nojori sequequiaarijiaariuhuj:

—Niocua maninia cojuare Pablo, cuara tiuquiiria camarnu Félix nequesoreesocoriquiano.

²⁵Comandanteeri na naajione niquitioquiaari Pablo jiyatanaa. Naa naajiosanoori quiquiaari camarnu Félixua:

²⁶“Camarnu Félixua. Nio Claudio Lisias naajione. ¿Taa quia quiani cua panishano camarnunaa? ²⁷Cua jiyarotano pueyanojiniji quia pohuatareeraj. Na sesa Pablo. Narta Judiocuacaari na motunu paniquiano. Janiyari jiyacari cua soldadohua nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequeereeri: ‘Judiocuacaacujia nia quiare ritia cuno pueyano, mariqui na motureeri’. ²⁸Maninia cua niishiniuria casaara naa pueya nacoortariquiaa Pabloni, janiyari puetunu Judiocuaca camarucua nacasanaa rerejotecanuni. Janiyari nojoriicua tohuatecanu Pabloni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriqiaanoj, janiyari jiyacari shusha niishiriini. ²⁹Nojoriquiiri na nacootacanu Pablo tojiyaquiniuucua tariucuaaanu tama nojori supuetanaa rootasanojuaja. Cunora na motunu paniriqiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. ³⁰Janiyari sequesaarucuaajuhuj, noojiaqueya Judiocuacajinijinio- naari na monu pania. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuj, cuara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuja”.

³¹Soldadohuari naa miiquiaari taa comandante sequequiaari nojoricujani. Nojoriiri cuno niucuja Pablo jiyataquiaari.

Antípatris tiacajinia tiuquijioseeri. ³²Na nihuacata quiojonaa soldadohuari Antípatris tiacajiniji tariquicuaji rujuutuquiaa- riuhua Jerusalén tiacajiniohua. Caballohua nijinia cajitiuniaa soldadohua cutaraari Pablo jiyataquiaari. ³³Pablo jiyatanaa jaara tiuquijioseequiaari Cesareya tiacajinia, nojoriiri comandante naajione niquitiosee camarnu Félix. Pablo na niquitiotureejaariuhuj. ³⁴Camarnu serojonu nuhuaji comandante naajione, Pablo nequesotaquiaariiri:

—¿Tee quia rasaquiaarini?

—Pabloori na riucaare:

—Cilicia jiyajinia rasanonijia.

³⁵Camarnuuri na sequereer:

—Janiyacua quia nequesoreeriquiani quiocuara saquiriojotanaa jaara tiuquiijiore.

Jiyacaritij, camarnuuri na soldadohua sequequiaari cuara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiara.

Tama Pablo tacusacari nocuajijiaaja camarnu Félix niqiuara

24 ¹Pabloori cinco juuca camueequiaari tari Cesareya tiacajinia. Jiyacari tiuquiijiocuaariiri nocuara saquiriojotanuuriquiano pueya. Nojoriiri quiquiaari pueyacuaa secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jiyaniishano pueyanohuaj. Jiyanohua pocuanu niishijia. Puetunu nio pojoriijanaari camarnu Félixua tiuquitiaciaari Pabloocuaa na saquiriojotanaa. ²Pablo jaara tohuatesaaquiaari nojoricua, Tértulo juhuacatecara coteequiaari camarnu Félix saquiriojotanaa nocuara. Naa sequequiaari camarnu Félixri:

—Canaa camarnunaa, quiaari jiyanohua niishijia. Naa niishijia quia quishacaritij, quiaari maninia quia pueya jiiitiaa. Canaari naacua juhuajaniya quiyani, maninia canaa quia jiiitasacari. ³Canaari cunora quia timitiaani camarnunaa, maninia quia jiiitanuucua canaa pueyaracaanu, puetunu canaa jiyajinijanaa. ⁴Maja puera quia tarishitini paniniu quiajaniya. Quenaaja rupaquijia canaa quia tojiricuara. ⁵Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojocuaa tamonu jiyacajinia quinia Judiocuacajuhaaj. Naa sesa na niishitiojonuucua pueyatej, tamasaacari maja tari na rupenu paniniu narta pueyano. Nio pueyano tojitiajacaari sesojosaaquiaari Nazarenoocua tiuuniaa maapue. Nio pueyanocuaajaari cuno pojori jiyaniijia. ⁶Juucua Pueyaso juaatiniu paniquianuajariuhuaaj, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesocoriquiano taa tariucuacaanu canaa supuetanaa rootasaaquiaaricuaajani. ⁷Comandante Lisiasri canaa na jaariutiarucuaa saajani. ⁸Canaa sequerucuaajaariuhuaaj: “Cante nio pueyanocuaa saquiriojotanu paniyani, cuara quiaara camarnu Félixua”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuaaj, canaari cunora nocuara quia saquiriojotanaa.

⁹Cuniqui quinia Judiocuacaari jaarajaaja sequeturee:

—Taaquiriirinij, camarnu Félixnaa. Naacuaaquinatejaj, taa Tértulo sequeyacuajani.

¹⁰Camarnuuri na juashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiriirinij, pocuashiyacuaaquinatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niqiuara tama cucuaji tacunu paniyani, cuarta Judiocuaca saquiriojotasacari cucuara quiajaniya. ¹¹Janiyari shusha tiuquirohuacuaa Jerusalén tiacajiniani, Pueyaso quia secojonura Secojonuuja tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹²Nojoriiri maja quenaaja na riuritanu quiquianu janiya tamonu pueyanota juayonuutaano. Majaari na riuritatunu quiquianu janiya pueya ruutaqueyano quenaaja Pueyaso Secojoua tiajinia. Majaari quenaaja nojori riuritanu quiquianu janiya canaa Secojoua tiajinia juayonuutaano pueyata. Majaari quenaaja naa quia miiniu quiquiaari puetunu tiacajinijanaa quia rucuanesacari. ¹³Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miijiani. ¹⁴Nojori sequesacari janiyanaari Pueyaso tojjia

tamaatia nojoriinijini, quia tojiniucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa quia tiuushacari puetunu Moisés naajiotasanoocuaajanaa, naajuhuaaj, quia tiuushacari puetunu canaa supuetanaa caminiujuashano Pueyasojinijia naajionuutasanoocuaajanaa. ¹⁵Janiyari juhua cucuara saquiriojotanaa pueya tiuya Pueyasoocuaajuhuaaj, taa Pueyaso samiitianiionutaniuhua macunucuaani; maninia miijia, sesa miijiacanio. ¹⁶Naaratej, janiyari pueyaracaanu sesa miyaquiniu saniniujuquiaani, maninia quia quiniuria Pueyaso niqiuara, pueya niquiaranio. Naacuajitij, janiya jaara samiitiarohuani, majaari quia macuhuaajenu quiniutianiya.

¹⁷Queraatia marijia quia shocotejonu nuhuaj quia rucuanesacari tamonu jiyacajinia, janiyari shusha tiuquirohuacuaa quia jiyajiniani. Tamonu jiyacajinijia Jesuucua tiuuniaa niqitiojosano cumaneeca tiuquitiarohuaaani. Janiyari na tiuquitiarohuani na jatanuhuaa Jerusalén tiacajinia, Jesuucua tiuuniaa casamijiumiucua niqitiojosocoriquiano, mariyata quia jiiitasanojinijia quia niqitionuhuaa Pueyaso. ¹⁸Naa quia miiniu nuhuaj Pueyaso Secojoua tiajinatej, Asia jiyajinijinio Judiocuacaari quia naacutucanu tohuataano juucua Pueyaso Secojoua tiajinijia. Janiyari juucua tohuatariquiohuani quia quaqueya quia jeequenu nuhuaj, taa canaa supuetanaa niishitiojosaaquiaaricuaajani. Cuno juuca, majaari queraatia pueya quiniu quiriqiaa Pueyaso Secojonuujuajinia. Majaari quenaaja pueyata quia juayonuutunu quiriqiaajuhuaaj. ¹⁹¿Teete cuno pojoricuarani? Mariqui niya niqiuara cucuara na saquiriojotanuunura, janiya jaara sesa miiquianuni. ²⁰Cucuara saquiriojotanaa jaara niqiuajimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quitiuquianu jiyacarijuhuaj. Nojori cuara sequeera, ¿cuno camarucuaa sequecanu janiya sesa miiquianuni? ²¹¿Pueyateeri cucuara saquiriojotaa soj, nio quia sequenuucua Judiocuaca camarucua: “Niaari quia nequesoreya quiarinijia, quia niishacari macunucuaari samiitianiijosaanutaniuhua”? Janiyacuajaari naa nacacanu camarucua nequesoreesacari janiyani.

²²Camarnu Félix jaara naa tojiqiaari Pablo sequesantej, nojuajaari pueya sequequiaari:

—Comandante Lisias cuara tiuquiriijaara, janiyacua Pablo nequesoreeriquiani.

Camarnu Félixri Jesujinijia pahuatasano tari maninia niishiquiaari. Naaratej, nojuajaari Pabloocua saquiriojotanaa pueya tarinitiaquiarinijia. ²³Na nuhuaj, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupena, tapueyocuaanio, nojori jaara Pabloocua nimiaquia, majaari nocuaji na tenujununoj. Nojori cuara na niqitiotuura na panishano.

²⁴Na nuhuaj, camarnu Félixri tamaqui quiaquiaari camueenuunura. Na nuhuaj, juhua shusha tiuquiquiaariuhua necocuaari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari: —iPablo nia tohuatere! Janiyari quia niqiuocuaa na tojiniu paniyani. Cuara canaa niqiuara pahuataara taate Jesuucua tiuushanojuarani.

²⁵Naacuajitij, Pabloori Félix pahuataquiaari nojori niqiuara taate pa naata maninia miijia pa quiniuni. Pahuataquiaari-jiariuhuaaj taate pa naata tama pa quaqueyajaaja pa cojuanu maniniani, sesa pa miyaquiniuucuaajia. Naajuhuaaj, Pabloori na numootequiaari Pueyasoosi sesa miijiaa saniitionutianiya.

Camarnu Félix jaara naa tojiqiaaritij, jiyanohua shiriiquiquiaariiri. Pablo sequereeri:

—iTariucuaaja! Quia quiaarohuacuarajaara. Janiya jaara jeya quiriqiani, janiyacua quia sequereeraniuhuaaj.

²⁶Camarnu Félixri naa sequerucuaa na soldadohua sequequiaari Pablo na jiyatanura nocua, nata na pocojonura.

Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. ²⁷Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuuja camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

Pablo pahuatasacari Festo niqiuara Jesujiniji

25 ¹Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. ²Jerusalén tiacajinia na quishacari, pueyacuara secojonaa jiyaniijianucuaari tii Judiocuacajinijinio socua tojishano camarucuata Pabloocuara saquirojotaquiaari camarnu Festo. ³Nojoriiri camarnu Festo sequequiaari cuara na soldadohua jiyarooru, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nuquamaji na nishacari. ⁴Camarnu Festoori saaja nojori riucaquiaari:

—Nujuatesano quiya Cesareya tiacajiniacuajaruhua.

¿Maatucua casaara niyara rishaareni? Janiyacuajaari nocua tacatenutaniuhuanu.

⁵Camarnuuri nojori sequequiaarijuhuaj:

—Niajanijajinijinio socua tojishano pueya cuara quiojohuara cuata Cesareya tiacajinia. Nojoriiri na naata Pabloocuara saquirojotanu cua niqiuara tii, cua niishiniuria maninia, Pablote seetanujanaa sesa miiquianujuaara.

⁶Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniuhuari. Na tiuquiniu nuhuaji, saniniuuja tariqui cajiquiaari nequesoreesaqui camarnu cajitijiniiaari, camarnu na quishacari. Jiyacari na soldado sequequiaariiri cuara Pablo tohuateera na nequesoreesocoriquiano.

⁷Judiocuacaari tari tiuquiquiaari Jerusalén tiacajinijijihuaj, Pabloocuara na saquirojotanuunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocuara. Nojoriiri jiyanohua sesa nocuara saquirojotanuquiaari najuhua queraatia casa. ⁸Jiyacaritij, Pabloori tama nocuaji na tacsacarijaaja naa sequequiaari:

—Maja sesa cua miiniu quiquianu. Janiyari tariucuaaanu Moisés Rootasano tojiquiaaaniuhua. Majaari sesa cua miiniu quiquianu Pueyaso Secojoua tijahuaj. Majaari Roma tiacajinia quijia pa jiyaniijia tojishijia cua quiniu.

⁹Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quiyanu paniya, tii cua nequesoreenura quiajaniya?

¹⁰Pabloori na riucaquiaari:

—¿Majateeri Roma tiacajiniji pa jiyaniijijanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhua, majaari sesa cua miiniu quiquianu Judiocuaca. ¹¹Janiya jaara sesa miirii seetanujanaani, cuara cua motuuraku. Cucuara cuno pojori saquirojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuara cua nequesoreeraqui.

¹²Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarcuara, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

Jiyaniijia Herodes* Agripa niqiuara Pablo pahuatasacari Jesujiniji

¹³Naa Pablo sequesaaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatannura nojuaja. Agripaari tiuquiquiaari na rimiatu Bereniceta. ¹⁴Nojori camueenujusacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. ¹⁵Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquirojotacanu, Judiocuaca camarucuata. Nojoriiri cua sequetucanu Pablo cua motenura. ¹⁶Janiyari saaja nojori riucaacanuni: “Roma tiacajiniji jiyaniijiaari maja ritia na monu pueyano. Nocuara saquirojotanaa cuara niijoma niya nocuara saquirojotanuunurajaatijia. Monu panishano cuara riuhuaneera tamajaaja quenaaja nocuaji, jaara seetanujanaa quiyaquiri nocuara saquirojotasano”. ¹⁷Naacuajitij, Jerusalén tiacajinijinio pueya nocuara saquirojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreeja cajitijiniya cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. ¹⁸Cuno pojori Pabloocuara saquirojotanuucanuni, nojoriiri maja quenaaja na saquirojotanuunu quirucuaa juhua cua niishiriojosano. ¹⁹Saaja tamaatia nocuara cua saquirojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhua, Jesu jiyaniishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyaniishanonaari samiitiaquiaariuhua. Saminionaari quiari quiyajaa. ²⁰Naa cua tojishacari nocuara pueya saquirojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quiyanu paniya, tii cua nequesoreenura socua quiajaniya?” ²¹Nojuajaari saaja cua sequecanu: “Jiyaniijia César Augustojanaa cuara cua nequesoreera juhua”. Janiyari cunora niyaja nujuatesano na jiitiaani, janiya cuara na jiyarore jiyaniijia César Augustoocujaatijia.

²²Jiyaniijia Agripaari camarnu Festo sequequiaari:

—Janiyari cuno pueyano tojiniu panijajaacuahuaj.

Festoori na riucaquiaari:

—Quiaacuajaari tariqui na tojiniutianiya.

²³Tariqui, jiyaniijia Herodes Agripaari niqiuariuhua Bereniceta. Nojoriiri tiuquiquiaari nequesoreeja sohuacajinia, shanohua jacaria na rucuanenuta, shanohua na toqueya maniniquiyatajuhua. Puereeta niquishano. Nojori tiuquitasacari, nojori cojiquiaariiri soldadohua camarucua, mariyata tama cuno tiacajinijinio camarucuaajajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. ²⁴Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiyani, queraatia Judiocuacaari nocuara cua saquirojotanuquiaa, Jerusalén tiacajinia cua quishacari, niya Cesareya tiacajinijahuaj. Nojoriiri pueyaracaanu cua taajetequiaa. Cua sequetiquiaari: “Cuno pueyano cuara mosaaria camarnunaa”.

²⁵Janiyacujaari tari niishiyani, nio pueyanoori maja sesa na miiniu quiquianu. Naacuajitij, janiyari niishiriojiyani, ¿pueyanotucua casaara najuhua mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijijanaa nequesoreenura nojuaja. Janiyari cunora na jiyaronutaniyani. ²⁶Saniniuuja majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa

cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustocuara casaara nio pueyano cua jiyaroree nocuani. ²⁷Majaari cua naata naajaa jiyaronu quiasano pueyano, maninia nequesoreyaquishoojua.

Pablo riuhanesacari jiyaniijia Agripa

26 ¹Jiyacaritij, Jiyaniijia Agripaari Pablo sequequiaari: —Quiocuaji quia riuhanereja, jaara seetanujuanaa quiaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

²—Timiyaniijia jiyaniijia Agripanaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. ³Quiaari puetunu cuarta Judiocuaca miijosanojuanaa niishijiajuhuaj, puetunu canaa nacojotasanojuanaano. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuquishacarijiani

⁴Puetunu Judiocuacajanaari niishiyajuhuj taa quijia cua quiquiaari cua naatuajiniji nojoritia cua quishacari cua jiyajiniani, Jerusalén tiacajiniano. ⁵Cuno Judiocuaca quia nequesotasureeraj. Nojori cuara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijianaa tojitiaja cutara, socua tamasa cuarta Judiocuacajiniji. ⁶Nojoriijaari cucuara saquiriojotacanu cua tiuushacari Pueyasocua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuaaanu canaa supuetanaacujani. ⁷Quiarijiani, canaa supuetana Israel doce niquihuacujinijo caneno pueyari naa seetanujuanaa Pueyaso sequesano niqiniuria sashiyajaa. Naaratej, nojoriiri pueyaracaanu Pueyaso secojonuquuaa, juuca, niucuanio, Pueyaso na tojitasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quarijia cucuara saquiriojotanuquuaa. ⁸¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniaa tarijiani

⁹Janiyari tarijia sequequiaari tamajaajani sesa cua niishiriojosacari Jesujiniji: “Nazaret tiacajinijinio pueyanoocua tiuuniaa pueya paracaariiraj”. ¹⁰Janiyari seetanujuanaa taraatia nojori miitiaquiaari Jerusalén tiacajiniani. Pueyacuara seconaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuuquiquiaari nujuatejojuajiniani. Nojori jaara puecoosaaquiarjihuaj, janiyari jaarajaaja sequequiaarini: “Maniniacuaja, cuara puecoosaria”. ¹¹Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.

¹²Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jyanohua nojori juaajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

Pablo pohuatasacari taa Jesuucua tiuujara na quiquiaarini

¹²Naacuajitij, janiyari juucua quiariquiaa Damasco tiacajiniani, pueyacuara seconaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. ¹³Nucuaco cua quiasacari jiyaniijia Agripanaa, janiyari jiyocuaaanuji nunusaquiaarini, cuata quiojonaajuhuj. Cuno shacantuucuari

socua jyanohua shacantuuca quiquiaari pananujiniji. Panacariiri jiyacari quiquiaa. ¹⁴Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaajinia cua sequeriquiaari: “iSaulo, Saulonaa! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari”. ¹⁵Janiyari na sequereeni: “¿Cantequia Jiyaniijianaa?” Cua riucaareeri: “Janiyacuajaari Jesuni, quiaa na miitiaquiaani. ¹⁶Quia sanerohua. Janiyacuajaari quiocua muetareeni puetunu cua panishanojuanaa miijara cua jiyatenura quiajaniya, quarijia janiyajiniji quia niquishano quia pohuatanurajuhuj. Naajuhuj, na nuhuaji janiyari quiocua muetananiuhuaani janiyajiniji quia niquishanorano pohuataa quia quiniuria. ¹⁷Cua jiyarosacari quiajaniya, janiyari quarta Judiocuacaacujia quia cojuanutaniyacuajani, tamonu jiyacajinijinio taucuaacujinijo, tiqiyocua quia rucuanesacari janiyajiniji quia pojojotasacari. ¹⁸Nojoriicua quia jiyaroyaniijia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiiitasanojinijianaa nojori jiiitianurajuhuj”.

Pablo pohuatasano Jesu tiuujara na jatanujiniji

¹⁹Naacuajitij jiyaniijia Agripanaa, janiya jaara naa tojiquiaari sequehiyano jiyocuaaanujini, majaari cua tarijionu quiquiaarinioj. ²⁰Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajiniajanaano. Maja saaja cuarta Judiocuaca cua pohuatanu quiquiaari Jesujiniji, janiyari taucua pohuataquiaarijuhuaj. Nojori nacasuquiaarinijia cuara sesa nojori miishano carteera, Pueyasocua nojori tacatonuhua nojori jiuujia. Janiyari nojori sequequiaarijuhuaj, cuara saaja maninia miijiaa quiriia, na niishishaanura Pueyasoori seetanujuanaa nojori jataniquianu. ²¹Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuujua tijajinia. Cua motunu paniquianuuri. ²²⁻²³Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyano. Majaari tama cua niishishanojuajaa cua pohuatanu quiquiaa. Janiyari pueya niishitiojoquiaani taa tariucuaaanu Pueyaso sequesano caminiujunuaa naajionuutaquiaaricujani, naajuhuj, taa Moisés naajiotasano quia tariucuaaanu Pueyaso Rupaajiniacuajani. Nojori naajionuutaanoori seetanujuanaa. Naa sequeyari:

“Pueyaso Jiyasocoriquianoori naquiya miishaanutaniya. Na cusionu nuhuaji, nojuajaari coteenu samiitiriquianohua. Jaara samiitiarohua, nojuajiniji pohuatasanoori puetunu pueyapuejanaa cuhuatanutaniya. Naacuajitij, nojoriiri niishiniutianiya nojori jaara nocua tiuuri, nojoriiri samiitiaconutaniuhujuhuj; Judiocuaca, taucuaanio”.

Pablo tiuutiniu panishacari jiyaniijia Agripa Jesuucua juucua

²⁴Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablona? ¡Quia mueyocuaquiqui seseree puera quia niishiniuucua!

²⁵Pabloori na riucaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuaracashiniu. ²⁶Jiyaniijia Agripaari

puetunu cua sequesanojiniji niishiyajuhua. Cunora majaari cua puerenu na niqiara pocuanu. Nojuaja naasucuaari tarijia tosaquiaaricuaaja Jesujiniji, Jesuucua tiuuniaa pueya miishanojinijijuhua. Puetunu canaa miishanojuanaari maja jiyasohuaja na miishaanu quiquiaa. ²⁷Jiyaniijia Agripanaa, ¿quiaate tariucuaacaanu Pueyaso sequesano caminiujuniaa naajionuutasanoocua tiuyajuhua? Quiaacuaajaari nocua tiuya. ¿Naatejaaratej?

²⁸Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹Pabloori na riucuaquiaari:

—Naajaa, ritia, na nuhuaji soj, taa quia paniyacujani.

Pueyaso maara seetanujuaanaa naara quia jiyatere taa quia sequeyacuajani; maja saaja quiajaniya, mariyata puetunu pueyjanaa niya cua tojtiaani, juhua janiya nia quiniuriajuhuaj. Maja naatej, taa cumayocuata moronucua cua nujuatashuyanijia.

³⁰Jiyacaritij, jiyaniijia Agripaari sanequee, camarnu Festojuhua, Bereniceño, puetunu cuniqui nojoritia cajitiuniaa pueyano. ³¹Nojoriiri cuniquiji tamaqui pacutaquiaari jiyareta nojori pocoojonura Pabloriniji. Tama nojoriiri sequetooquiaari: —Cuno pueyanoqui seetanujuaanaa maja sesa na miiniu quiquianu na mosaanura, maja quenaaja na nujuatesaanuraju-hua.

³²Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

27 ¹Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaquiaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. ²Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitiariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuara tacaara na rupuenaa pueyacu, nojori na saruhuatnura Sidón tiacajinia, naajuhua, na rupuenaa niqutionura puetunu Pablo panishanojuanaano. ⁴Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatijani. Paratuuri buque nacaacoji piyarojoriquiaa saaja. ⁵Canaari Sidón tiacajiniji niutiaquiaari Cilicia jiyacuani, Panfilia jiyacuano. Canaari na shuriuquiumia jaaretamaani. Canaari Mira tiacajinia tiutiaseeni, Licia jiyajinia.

⁶Capitánri cuniqui riuriataquiaari Alejandría tiacajinijinio buque. Italia jiyajinia quariquiaari. Naaratej, canaa tacanitiaquiaari cuno buquejinaari, tii canaa quianura saniniujia. ⁷Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatijani-yojua shuriucuaratamaani. Canaari Creta jiya tucuaatijaja camarucutamaajaniuhua. ⁸Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

⁹Canaari puera tarishiiquiaari tarini. Judiocuaca miaquenuya-quiniu juucaari tari shocoquiaari. Jiyacaritij, shoniniacu caminiajiniaari puereeta quijia tari buqueta jaaretanura. Pabloori juucua sequequiaari:

¹⁰—Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusonuunutanijajuhua. ¿Casaatejaj pa toyani?

¹¹Pablo jaara naa sequequiaaritij, majaari buque jiyatana capitán tojiniu quiquiaarinioj. Saaja buque camarujanaa tojiquiaariiri, buque capitánio. ¹²Cuno tacatajajiniji canaa tii tiutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetooquiaari: —iNiiquiji pa quiaarej! Fenice tiacajinia pa quishii shuniyacujani.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatijajaacua.

Shoniniacu caminiajinia paratu piyarojosacari jiyanojua nojori

¹³Jiyacaritij, paratuuri jacaria piyarojonu coteequiaari pananu shuucujia, canaa muenecarajiniji. Naaratej, nojoriiri sequetooquiaari:

—iPa naatacujajiqui niiquiji quianu!

Canaari cuniquiji ruparetaquiaarini. Creta jiya tucuaatijaja shuriuquiumia jaaretaareeri. ¹⁴Na jaaretasacari shiitianiyojua, paratuuri canashyaquiji jiyanojua piyarojoquiaari buque. Cuno paratu sesaari quijia “Noreste”. ¹⁵Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocuaji, canaari buque tarinitiaquiaarini paratu cuara na capotaara tamajaaja. ¹⁶Paratuuri canaa capotaquiaari tamonu jiya tucuaatijaja tamajiria. Cuno jiya tucuaatijaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanojuaa poonijioquiaari cuniquini, canaa tacaniniuhua buque cacojiria cuno boteniyojua. ¹⁷Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucujia. Pueyari na puerenuta sequetooquiaari:

—iParatuuri pa capotanutanija jaaquajiniara! iPaari tii riitianutanianiyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque. ¹⁸Jaara juhuaquequiaari, paratuuri saaja jiyanojua piyarojoriquiaajaa. Naaratej, nojoriiri buque pasano casami quejoonu coteequiaari moojinia. ¹⁹Canaa camueenujusacari jiuujianaraca juuca naquiya canaa miishacari, canaari buque casamijianaa quejooquiaari socuani, buque namuenura quenaaja. ²⁰Tari canaa shocojoquiaariiri queraatia juuca. Majaari quenaaja canaa niquiniu quiquiaari pananu, rianio. Paratu piyarojosacari canaacua, mohuacaari socua jiyanojua cajiniuucuaquiaari canaacua. Nocuaji, canaari niishirojoriquiaani canaari quiarijia cusonuunutanianiyani.

²¹Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiqianu quenaaja cua sequesano, maja pa ruparetanura Creta jiya tucuaatijajiniji, paatuma naa miya naquiyani. ²²Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa buque cutaraari juhua rapitiasaanutanija puetunujuanaa. ²³Janiyari quiarijia cua maquenujinia cua Jiyaniijia Pueyaso seru niquiri cua shuriucua njuaanoni. Janiyari cuno Pueyaso tojjiani. Janiyacuajaari na pueyanoni. ²⁴Pueyaso seruuri cua sequeere: “Majaari puerenu Pablona. Quiaacuajaari jiyaniijiajanaa Augustooocua tiuquiniutianiya Roma tiacajinia. Quiaari na taccoji nujuanutanija quia pocuanura. Naajuhua, Pueyasoori quia secojosano tojiriuucua. Naaratej, puetunu quiata quiniaajanaari quiata rishiniutianiyajuhua”.

²⁵Naacuajitij camarucuaanaa, nioojia nia cumaquiri.

Janiyacujajani seetanujuaanaa niishiyani, naa quiniutianiyari

taa Pueyaso seru sequeree janiyacujani. ²⁶Naajaa, paari tamonu jiya tucuaatijaacua juhua niojosaanutaniyani.

Pabloori naa canaa cumanijiaquiaari.

²⁷Pueyaracaanu canaa jaaretasacari shoniniacu caminiajia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriqiaa tarini. Pueyari cuno shoniniacu caminia jiuujiajia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriqiaa cuno niucua, buque jiniacuma poonijionaari niishiquiaari canaari tari jiyacua catecanoyani. ²⁸Buque jiniacuma poonijionaari jiya shanacuquiaari, na niishiniuria queroni quiriqiaajaa. Na shanacutusacari, saaja treinta y seis metro queroni quiriqiaari. Jaara socua na tacoji shanacutuquiaarihua, saaja veintisiete metro queroni quiriqiaari. ²⁹Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohuaneyocuata morojotasano cuatro nijaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuaara juhuaqueera. ³⁰Jiyacarijij, buquejia poonijionaa pueyari juucua cuno niucuaa jiyasohuaja mashiyocuatunu paniriquiaa buquejiniji. Naaratej, nojoriiri buque nacaacaji sapojonu tinijiotariquiaa nijaaca casaa moojinia. Jiyasohuaja roshiniquiaa jiyocuaaanu tacanishano boteeri, tii na mashiyocuatunura. ³¹Pabloori jiyacari na jiyatana capitán toquiaari, na soldadohuano. Naa nojori sequetuaariiri:

—Cuno pojori jaara niya juhuaqueyaquimia pata, niaari cusunuriquiano.

³²Soldadohuari ritia jiyocuaaanu tunusano bote neyocua jiyatajotaquiaari. Moojinia na tinituriiri. Paratuuri na piyarojoquiaari tamoco nojorijiniji.

³³Juhuaquenu panishacari, Pabloori puetunu buquejia quiniaajanaa sequetuaari cuaara quenaaja miaquenuura. Naa nojori sequetuaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhua. ³⁴Quiarijia nia miaquerecuara, nia cuaqueya nia cumaquitiajara quenaaja. Majaari quenaaja niquiriyatu niajanijajinijinio cusonu quiniutianiya quiarijia.

³⁵Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiarajanaari. Na nuhuaji miaquerohuari.

³⁶Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhua.

³⁷Cuno buquejia, puetunu canaajanaari quiquiaarini doscientos setenta y seis pueya. ³⁸Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminiajia

³⁹Jaara juhuaquequiaari, buquejia poonijionaa pueyari maja na niishiniu quiquiaari teyano jiya tucuaatijatejaara cunoni, nojori na niquiriquiaani. Nojoriiri cuno jiya tucuaatijaacua niquiquiaari puereetuca surocohua. Jaaquiaari puetunu na shocujanaa quiriqiaa. Naacuajitij, nojoriiri sequetuaari:

—Buque pa saniri shiitaniiniuno cuno surocohuama.

⁴⁰Buquejia poonijionaa pueyari nijaaca sohuaneyocua jiyatajotaquiaari. Cuno nijaacaari caminia jiuujiajia jateequiaari cuniquijia. Nojoriiri buque niquinijiotetajaa roshiniquiaarijiuhua, buque tacatajara. Buque nacaacuaaji teeha toque tacanitiatureejaariuhua. Buqueeri canujataree jaaquijiniara, paratu piyarojosano. ⁴¹Buqueeri saacariji jaaquijia riitiseequiaari, caminia cajiniucuasacari mohuaca paatishano jaaquijia. Buque nacaari jiyanohua tiuquishii cumaatia jaaquijia. Majaari quenaaja na naata pooniu quiriqiaa na matasaquiji. Na pajaari maa rapuequiaari-

jiya moo cajiniucuasacari jiyanohua nocua. ⁴²Soldadohuari nojori jiyatasano quioosano pueya puecoonu paniquiaari cuniquijia, nojori jiyanihacari cuaconutaniya naasucua, mashiyocuatumaari. ⁴³Capitán cutaraari Pablo tiuquitiniuno paniquiaari jiyaniijia Augustoocua. Naaratej, na soldadohua sequetuaariiri:

—iMaja quioosano pueya puecootunu!

Cuno capitánri puetunu pueyajanaa sequetuaari:

—Cante cuacojua cutarani, nojori cuaara cuacoora coteenu, jaaquijia rupaatiushiucaari. ⁴⁴Cuaashijianucua saniniujia cuaara buque jiniacumaji suruhuatuneeacaacua jacamatuura na cuatajara. Tamasaca cuaara buque neecaacua jacamatuuraju-huaj.

Naa miitiquiaariiri. Puetunu pueyajanaari jaaquijia rupaatiushiucaari.

Pablo quishacari Malta jiya tucuaatijajia

28 ¹Puereeta canaa cuaconu nuhuaji shoniniacu caminiajia, canaari namitia puetunujuanaa maninia tacataseequiaari cuno jiya tucuaatijaacua. Canaari jiyacari shusha niishiquiaarini, cuno jiya tucuaatija sesaari quiquiaari Malta. ²Cuno jiya tucuaatijaacua quijia taucuaacari maninia canaacua jiyanoocuaari. Shiniquiaari quiriqiaa. Maruuri niriqiaajuhua. Naa canaa shiniquiosacarijij, taucuaacari canaara noshitiquiaari puereetuca mani. Na nuhuaji canaa sequetureeri:

—Miji. Nia jitiushii.

³Pabloori naanacucua reratejoriquiaajuhua. Manijinia na quejooriquiaari. Jiyacarijij, soconuquiri maniucua mashiriquiaa juucua. Pablo juaashiquia saariiri. ⁴Cuno jiya tucuaatijaacua quijia pueyari soconu niquiquiaari Pablo juaashiquiaacuaji sohuataano. Jaara naa niqitiquiaaritij, tama nojorijiaarijia sequetooquiaari:

—iNio pueyano naasucuaari pueyano moju! Cocuaatia miirii juucua shoniniacu caminiajia na cuasacari buquejinijiiri. Pueyasoori quiarijia saniniujia cunora soconu na sajitirii na cusonura.

⁵Pabloori saaja manijia majiriataree soconu. Majaari quenaaja na sajiyashi noonu quiri. ⁶Puetunu pueyajanaari na sashiriquiaa, taacari na porenutaniyani. Na sashituriquiaajaa-riuhua na jiyantiushacari canashiyaquiji cusonutaniya naasucua. Naa pueyaracaanu na sashitushacari juucatej, nojoriiri socua tamaatia niishiriojonuuquiaari. Nojoriiri Pabloriniji sequetooquiaari:

—iCuno pueyano naasucuaari pueyasojuhanajaj!

⁷Cuniqui canaa quishaquini, canaari tamonu pueyano cuhuariquia shuriucua quiriqiaani. Na camaruuri cuno Malta jiya tucuaatija camarnu quiquiaari. Na sesaari Publio quijia, maninia pueyano. Nojuajaari canaa masuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajia camueequiaarini. ⁸Cuno camarnu queeri jiyacari cusos matariquiaa. Jiyanohua naseecaari quiriqiaa. Coriyacau rurequeriquiaajariuhua, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secosacari, nocua niaquiaari na juaashiquiaari. Pueyanoori naatarohua. ⁹Cuno jiya tucuaatijaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijiuhua. Pabloori puetunujuanaa na naatanijioquiaari. ¹⁰Naa Pablo miiniucuatej, cuno pueyari na jiiitasano casamijiniji canaa niqitiojiquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqitiojotiquiaari narejajuhua.

Pablo tiuquishacari Roma tiacajia

¹¹Canaa sashishacari shuniya cuaara tajiiria, jiuujianaraca raacari canaa shocujoquiaari Malta jiya tucuaatijaacua canaa

quishacari. Alejandría tiacajinijinio buqueeri tii nujuatariquiaa-juhuaj. Shuniyacuaaji tiutiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. ¹²Canaari Siracusa tiaca tacatajajiniji tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. ¹³Cuniquiji canaa quiasacari, canaari cuno jiya tucuaatiaja shuriucuaataareeni. Canaari Regio tiacajinia tiuquishiini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. ¹⁴Puteoli tiacajinia Jesuucua tiuunaa pueyari canaa masuquiaari na tiajinia. Canaa sequetquiaariiri:

—iMaja canaa shoconu pueyanaa! Canaa tiajinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nuacuoc quiaquiaarini. ¹⁵Roma tiacajinijinio Jesuucua tiuunaa pueya jaara niishiquiaari canaa tari nuquamaji niyani, nojoriiri nuacuocaji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jiyanihano tiacajinia. Pablo jaara narta Jesuucua tiuunaa niquiquiaari, noojia cumaquiquiaariiri. Naaratej, Pueyaso sequequiaariiri:

—iPaacarasho cua Pueyasonaa!

¹⁶Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqutioquiaari Roma tiacajinia quioosano cojuanaa camarnu. Pabloori saniniuujia tarinitiasaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pohuatasacari Jesujiniji Roma tiacajinia

¹⁷Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujajanaa masuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaanaa, majaari cua miiniu quiquiaari sesa parta Judiocuacani. Majaari cua numueejushini quiquiaa pa supuetanaa niishitiosanojuhuaj. Naajaa, pueyari cua quiatucanu Jerusalén tiacajinia. Cua niqutiotucanu Romano pueyari, cua morosaanura. ¹⁸Nojori nequesoreenu nuhuaji janiya, cua cartetunu paniquianu juucaari, nojori niishishacari maja sesa cua miiniu quiquiaari cua mosaanura. ¹⁹Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijajanaacua niya Roma tiacajiniani, Césarjanaa* nequesoreenura janiya. Naajaa, majaari cua saquirojotanu quiniutianiya saniniuujia nojoriicuaa, cuarta Judiocuaca nojori quiniucua. ²⁰Janiyari cunora nia niquiniu paniriquiaani, cua pohuatanura nijaniya taa puetunujuanaa parta Israel pueya niishiyacuajani, nijaniyajuhuaj; macunucuaari samiitianiijosaanutaniuhua. Janiyari cunora cumayocuata moronucua niya quiyani.

²¹Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajione, canaa pohuatasaanura quiajaniyajiniji. Cuniquijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pohuatanuunu quiquianu canaa quiajaniyajiniji. ²²Canaari saaja niishiyani, puetunu tiqiyocujanaa sesacasaaquiaaquiniaari Jesujiniji pohuatasano. Quiaa mariqui cunojiniji canaa pohuatare, canaa niishiniuria socua.

²³Jiyacaritij, Judiocuacaari Pablo sequetquiaari:

—Canaacua tamonu juuca quia tojiquiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiquiaariiri. Pabloori nojori niqiuara pohuatanu coteequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaarijiaariuhuj taa Pueyaso jiiitaa na jiyanooshano pueyani. Naajuhuj, tariucuaaanu Moisés naajiotasano Jesujiniji niishitiojoquiaariiri, Pueyaso sequesano caminiujunaa naajionuutasanonio. ²⁴Noojiaqueya nojorijinijioori Pablo sequesano tojiquiaari cutara. Tamasacaari saaja na cuaracashitiquiaari saniniuujia. ²⁵Nojorijinijinio jaara Pablo niishitiosano tojiquiaari cutara, tamasaari nojoritia juayonuutatu coteequiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiri seetanujuanaa tariucuaaanu Pueyaso sequenu panishano caminiujunaa Isaías pohuataniquiaari parta Israel pueya niqiuara, jaara na sequequiaari:

²⁶“Quia quiaare cuno pueyacu. Quiocua nojori sequesee:

‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquiniutianiyajuhuj. Majaari quenaaja nia niishiniu quiniutianiya’. ²⁷Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijaari mishiquiojosa-nojuhuaj, na niqutiaaquinuucuaaji, maja na numaata na tojitianura, noojiata na niishituyaquiniurianio. Naa jiyatecanu nojorinjia, maja na niishituniuria janiya, mariqui cucua tacateturohuari, nojori cua naarajonura”.

²⁸Pueyanaa, nia niishiri. Naa jaara ruuretare cua pohuatasano Jesujiniji, taucuaari saniniuujia pohuatasaanutaniyacujua, taa Pueyaso jiyanooni pania pueyani, maninia na jitianura nojori. Taucuaari na tojitianutaniya cutara.

²⁹Pablo jaara naa sequequiaari nojoritij, Judiocuacaari quiojyarahua. Tama nojorijiaarijia juayonuutaarohua na quiojosacariuhua.

³⁰Caapiqui marijiaari Pablo shocojoquiaari rupaquijia na masano tiajinia moronucua na quishacari Roma tiacajinia. Puetunu pueyajanaa jaara nocua niqiuari na niquiniuria, nojuajaari maninia na masequiaari na quijia tiajinia. ³¹Majaari jiyasohuaja na pohuatanu quijia taa Pueyaso jiiitaa na jiyanooshano pueyani. Jiyaniijia Jesujiniji niishitiojuajaariuhuj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

1 ¹Janiyari Pablóni, Jesucristo seru. Nojuajaari cua saquiriojoquiaari saa neraja cua poonijonura. Nojuajaari cua jiyatequiaari na jiyaramiquishano cua quiniuria, seetanu rupajaanaa cua pohuatanura pueya niqiuara, Pueyaso pueyara nojori jatanishaanura. Janiyari cunora nio naajioteya niaacuarani.

²Pueyasocuaajaari tariucuaaanu na sequenu panishano caminiujiuniaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. ³Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴Jesu sohuanuuri saniniuujia pueyaracaanu Pueyaso Niyanjuhuanajaj. Paa cutaraari quiari naataja niishitishaa-quiaarini, nojuajaari seetanujuanaa Pueyaso Niyanu. Paari quiaririja na niishiya seetanujuanaa cutarani, Pueyaso Sohuanu samiitianiniucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jiitianurajuhujaj. Nojuajaari pa Jiyaniijia Jesucristo.

⁵Nocua canaa tiuuniucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriri puetunu jiyacajinijinio pueyajanaa canaa tiutiniuria Neyanuucua, na tojitiajaca nojori quiniuria. ⁶Niajanijuhujaj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniuriajuhuaj. ⁷Puetunu Pueyaso panishano pueyajanaa, canapue Pueyaso saquiriojoquiaari saa maniniaja nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiiria njajaniya, maninia na tojijia nia quiniuria. Naajuhujaj, nojori cuara niojiaca cajitiria shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸Coteenu nia sequenu paniyanijia, janiyari nia timitiaquiaani, maninia njajaniyajiniji pueya pohuatanuucua puetunu jiyacajinijanaa. Nojoriiri pohuataquiaa, niaanaari maninia tiuujia pa Jiyaniijia Jesucristoocua. Naa Jesucristo miiniucua njajaniyatej, janiyari cua Pueyaso sequequiaani: “iPaacarasho! Quiaari jiyanojua maninia”. ⁹Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuaajaari niishiya, pueyaracaanu cua secojosacari nojuaja, janiyari niaacuara secojoquiaajuhujaj. ¹⁰Naa cua secojosacari nojuajatej, janiyari na sequequiaani cuara cua tiuquitiria niaacua, rupaquijia cua quiniuria niaata, nojuaja jaara naa paniri. ¹¹Janiyari nia niqiniucua jiaatiaani, cua cumaquiniuria socua njajaniya na Sohuanu cumaacata, socua jiyanojua Pueyasocua tiuujia nia quiniuria. ¹²Majaari cua cumaquiniu paniniu saa njajaniyaja. Janiyari paniyani nia cumaquiniuria janiyajuhujaj. Naacuajitij, mariyata pa tiushacari Jesucristoocua, paari mariyata cumaquitiojonutaniyani.

¹³Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuan. Majaari juhuanajuaja cua naata quianu niaacua.

Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaa tiuuniuria Jesuucujuhujaj. Tamonu jiyacajinia taucuaaari tari Jesucristoocua tiuujia quiyacuaa, cua pohuatanuucua Jesucristojiniji nojori niqiuara. Janiyari naa miiniu paniya nia tajiniajuhuaj. ¹⁴Cua Jiyaniijiaari cua jiyatequiaari na rupaa pohuatanura. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuara pohuataara na rupaa puereetuca tiacajinia pueya niqiuara, mariyata tiqiyocua quijia pueya niqiuarajuhujaj. Janiya cuara na rupaa pohuataara niishijia pueya, niishiyashijia pueyano. ¹⁵Janiyari cunora quianu paniya Roma tiacajiniani, cua pohuatanura Jesucristojiniji njajaniya.

Pueyaso Rupaari cumaacaraca na jataniniuria pajaniya

¹⁶Maja cutaraari cua caririquiniu Jesucristojiniji cua pohuatanura. Jesucristo rupaacuajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiushacari. Puetunu Jesuucua tiuuniaa pueyapuejajaniya Pueyaso pueyara jatanishaanutaniya, taa Judiucua jatanishaaquiaa Pueyaso pueyaracaanu. ¹⁷Jesucristo pohuatasanojiniji paari niishiyani, Pueyasoori pa jiyanoquiaa sesa pa miishanojiniji, saaja Jesucristoocua pa tiushacari. Saaja nocua pa tiuuniucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucuaaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasocua na tiushacari”.

Pueyasora, puetunu pueyajanaari sesa miijiaa

¹⁸Pueyasoori jiyocuaaanu na tojiyashijia pueya saniitioquiaa. Naa nojori na saniitosacartij, Pueyasoori nojori numootequiaa, nojuajaari puetunu na tojiyashijia pueyajanaa saniitionutaniya jyanohua na juaaniutia. Naa saniitiosaanutaniyajaariuhujaj, puetunu sesa miijiaa pueyajanaa. Naa sesa miijiaa pueya quishacartij, nojoriiri Pueyasojiniji niishishano ruuretaquiaa saaja. ¹⁹Nojori jaara Pueyaso niishiniucua jiaatiariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuaajaari tari maninia nojuajiniji niishiya. ²⁰Majaari pa naata Pueyaso niqiniu pa namijiaa, pa niishiniuria taamuecate nojuajani. Naajaa, Pueyaso shipininiucua jiya, maatia niishishiyacuajaari nojuajaari Pueyaso, pa niqishacari puetunu na shipinishanojuanaa. Na shipinishanojiniji niishishiyajaariuhujaj, majaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitionu panishacari na tojiyashijia pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijiniji”. ²¹Nojoricuaajaari Pueyaso niishijia najuhuanaj. Na niishijia nojori quishacari, nojoriiri saaja na rerequeteja. Nojoriiri na tojitiaaquiaajuhujaj. Pueyaso miiniucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasonaa”. Tama nojoriijaarjia jyanohua cushitiquiaa sesa nojori niishirojonuusacari najuhuanaj. Naa mosanucua nojori quishacartij, nojori jiuujiaari juhua ninishiquiria quiquiaa. ²²Nojori jyanishacari nojori cutaraari seetanujuanaa

niishijaca, naacujitij nojoriiri socua niishiyashijiacara quiquiaa. ²³Nojoriiri Pueyaso shuquiritiaquiquiaa tama nojori shipinishano casaajaaja nojori shuqiritianura. Pa shipinia Pueyaso cutaraari jyanohua cumaacaraca, pueyaracaanu quijiajuhanajaj. Nojoriiri Pueyaso niti shuquiritiaquiaa tama nojori shipinijosanojuaja. Cuno, nojori shipinijosano Pueyaso niti na shuqiritiasocoriquianoni, cunoori quiquiaa juhua shaajeja pueya niquishano, juhua jaacuatujuaa niquishanojuhuaj, juhua nacujiniaaco canujuucatujuaca niquishanojuhuaj, juhua roshiyocuatujuaa niquishanonio.

²⁴Naaratej, Pueyasoori nojori tarinitiaquiaa sacuraatia casaa nojori miiniuria tama na cuaqueyatajaaja, taa nojori miini paniquiaacuajani. Nojoriiri socua jiyacatequiaa sesa miiniuria. Naacujitij, pueyari tama na cuaqueyajaaja miiquiaa sesa, cararaatia nojori miitiosacari narta pueyanota. ²⁵Naa sesa miijiacara nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonuunu nojori tojinuria saniniujia. Naaratej, pueyari Pueyaso shipinijosano casami shuquiritiaquiaa, saniya na Shipinia niti. Nojuajaari pa Pueyasojuanaa cutara. Nojuaja cuaara shuqiritiasaaria pueyaracaanu cutara.

²⁶Pueya jaara Pueyaso cartequiaa, Pueyasoori nojori tarinitiaquiaa juhuaj, cararaatia casaa nojori miiniuria, taa nojori jiaatiaquiaa miiniuriacuajani. Naacujitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷Naajuhua, canuuri maajitia quini paniaquiquiaa, sacuraatia na jiaatiasacari narta canuucua. Canuuri jyanohua cararaatia miitioquiaa. Naa nojori miiniucuatej, nojoriiri tama na cuaqueyajaaja miitiquiaa naquiya na miishaanura.

²⁸Nojori niishiniu paniaquiniucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na miijiacara quiquiaa, cararaatia miini niishiriojonujuuaca nojori quiniucua. ²⁹Naacujitij, nojoriiri puetunu tamaatia sesa miishanojuanaa miini niishijiacara. Jaara sesa miiri, timiquioyari. Nojoriiri nio miijiacara: puera casamiriaca quiniucua jiaatiajaca. Sesa miiquiaari na panishano nojori jitianura. Nojoriiri tamasa pueya jitianasano casamiicua jiaatiajaca. Nojoriiri pueya puecoojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitiano panijiacara. Rimiaacaturijiaarihuaj. ³⁰Nojoriiri sacuraatia sequejoju narta pueya. Nojoriiri Pueyaso niquini paniyashijiacara. Nojoriiri tama saca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasaajini. Nojoriiri najuhuana sequeja: “Janiya maninia miijiani”. Nojoriiri jyanohua niishijiacara, niishishoo sesa casaa na miiniuria. Nojoriiri na queya tojiyashijiacara. ³¹Nojoriiri seetanujuanaa mosanucua Pueyaso na tojitiaaquiniucua. Nojoriiri saaja tama na rupaajaaja jataja. Majaari na sequesano na miini. Nojoriiri narta pueya paniyashijiacara. Majaari nojori niishiniu jyanooniu. Majaari nojori niishiniu taraajenu narta pueyacua. ³²Nojoricuajaari tariucuaanu naa Pueyaso sequesano niishiya: “Cante naa sesa miijiacani, cuaara puecoosaaria”. Naajaa, nojoriiri saaja sesa miiquiaa juhuajaniya. Majaari nojori quini shuquiriaatia saaja tama nojori miishacarijaaja sesa, nojoriiri shuquiriaa juhuaj tamasa jaara sesa miiri juhua nojori.

Pueyasoori sesa miijiacara saniitionutaniya sesa nojori miiniucua

2 ¹Naacujitij pueyanaa, niaa jaara tamonuucua tonujuaa quiriqia, majaari nia jyaniniu niaari sesa miyashijiacara cutara. Niaa jaara tamonuucua tonujure sesa na miishano, niaari tama niaacurajaaja tonujia naa sesa miini niishijiacara nia quishacarijuhuaj. ²Paacujaari niishiyani, Pueyasoori puetunu sesa miijiacaranaa saniitionutaniya, maninia na

niishishacari nojori miijosano. ³Quiajaniya saniniucua, quarta pueyacua tonujuanaa, majaari quenaaja quia jyaniniu quiaa saniitioyaquishaanutaniya. Quiaari saniitiosaanutaniyahuaj. Quiaacuajaari juhua nojori, sesa miijiajuhuaj. ⁴Maateeri quia niishiniu, Pueyasocujaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaaarihuaj. ¿Quiaateeri jyaniquiaa Pueyasoori naa maninia quia miiquiaa, maninia quia quiniucua na niquiara? ¡Maja! ⁵Quiaari quioojia tacatonu paniaquiquiaa, sesa quia miishanojiniji quia taraajeyashijiacara. Cunora, quiaari puetunu sesa quia miishanojinijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujuanaa maninia saniitiojua. ⁶Pueyasoori puetunu pueyajanaa miiniutaniya taa nojori miishano quiquiaari mijiriacuajani. ⁷Naacujitij, Pueyasoori maninia miijiacara jiyatenutaniya pueyaracaanu rishijiacara. Nojoriiri pueyaracaanu maninia miijiacara quiquiaari mijiria, Pueyaso timitiasano nojori quiniuria, shaajeyashijiacara nojori quiniuriajuhuaj. ⁸Saniniucua, Pueyasoori na tojiyashijiacara saniitionutaniya jyanohua na juaniutia. Naa saniitiosaanutaniyajaarihuua noo nojori, canapueete saaja sesa miini panijiacara quiquiaarini. ⁹Puetunu sesa miijiacara pueyapuejanaari naquiya miishaanutaniya, taa Pueyaso tojiyashijiacara cuarta Judiocuaca miishaanutaniyacuana. ¹⁰Saniniucua, Pueyasoori puetunu maninia miijiacara pueyapuejanaa miiniutaniya maninia, taa maninia miijiacara Judiocuaca miishaanutaniyacuana. Pueyaso timitiasano pueya nojori quiniucua, nojoriiri jyanohua shuquiriaatia quijiacara quiniutaniya pueyaracaanu. Naacujitij, nojoriiri juhuajaniya quiniutaniya Pueyasota pueyaracaanu.

¹¹Pueyasoori maja rimiajata na miini quiniutaniya taucua, Judiocua. Puetunu maninia pueyajanaari maninia miishaanutaniya. Sesa pueyari saniitiosaanutaniyacuana. ¹²Naacujitij, pueya jaara Pueyaso rootasano Moisés niishiyashijiacara quiriqia, naajaa, nojori jaara sesa miijiacara quiri, nojoriiri saniitiosocoriquiano. Naajuhua, pueya jaara Pueyaso rootasano Moisés niishijiacara quiriqia, nojori jaara na tojiyashijiacara quiquiaarijuhuaj, nojoriiri cuno Moisés Naajioneejiniji nequesoreesaanutaniya na tojitiaaquiniucua. ¹³Majaari nia jyaniniu niaari jyanooshaanutaniya sesa nia miishanojiniji nareja najuhuana nia tojishacari Moisés Rootasano. Niaari jyanoyaquishaanutaniya maja seetanujuanaa na tojiijiacara na quiniucua. Noo nojori cutaraari jyanooshaanutaniya, canapueete seetanujuanaa na tojiijiacacuajani. ¹⁴Moisés Rootasano jiaatashijiacara pueya jaara tamajaaja maninia miini niishijiacara quiriqia, naacujitij, niishishiyari, nojoriiri tamajaaja maninia miini niishijiacara cutara. ¹⁵Naa maninia miini niishijiacara nojori quiniucuatej, niishishiyari, Pueyaso rootasano Moisésri juhua nojori jiuujiajania naajiotasano quiya. Naaratej, nojori jaara sesa miiri, tama nojori jiuujiajaarija nojori niishitiya: “Sesa miiriinijia”. Naajuhua, nojori jaara maninia miiri, tama nojori jiuujiajaarija nojori niishitiya: “Maninia miiriinijia”. ¹⁶Naacujitij, cuno juuca, Pueyaso nequesoreetesacari Neyanu Jesucristo puetunu mijiria quinaa pueyajanaani, jiyacaritij, tama pueya jiuujiaari nojoricuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojini.

Pablo nacasusacari Judiocuaca nojori tojitiaaquiniucua Moisés Rootasano

¹⁷Cuarta Judio pueyanona, quiaari jyaniniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸Janiyari niishiyani casaa Pueyaso pania cua

miiniuriani. Moisés Rootasano niishijia cua quishacari, janiyari niishiyani teyano casaate socua tojshocoriquiano rootasanoni Pueyaso cua shuquiritiniuria".¹⁹ Quiaari sequequiaajuhua: "Janiyacuaajaari seetanu rupaajanaa niishiyashijia pueya niishitiojonani. Janiyari juhua ninishiqui quijia pueya cuhuatanani.²⁰ Janiyari niishiyashijia niishitiojojuani, naatujoorinio, maninia cua niishishacari seetanu rupaajanaa Moisés Naajioneejiniji".²¹ Naa tamasa niishitiojona quia quishacaritij, tama quia cuaqueyajaaja quia niishitiojore coteenu, maninia mijia quia quiniuria. Quiaa jaara tamasa niishitiojoquiaa maja na nohuasenuunura, ¿casaara nohuasejojuia quia quiyacuaraarini? ²²Quia rootasacari tamasa, maja nojori numuetucunura niyacaraca maaji, ¿casaara saniniujia naa quia miqiaacuaraarini? Quiaacuajaari sequeja: "Janiyari pueya shipinijosano casa soojeani, nojori shipinijosano na secojonuoscoriquiano juhua Pueyasoni". Naa quia soosacari nojori shipinijosano casaatej, ¿casaara quia nohuasejoquiaa cuno casa nojori secojonuuja tiacajinijicuaaraarini? ²³Quiaari sequequiaajuhua: "Moisés Rootasanoori jiyano maninia. Na timitiaanjia". Naajaa, quiaari Pueyaso rerequetequiaa quia tojiyaquishacari Moisés Rootasano.²⁴ Cunora, tariucuacaanu Pueyaso Rupaajinia naajiotasanoori seetanujanaa naa sequeya:

"Pueyaso niishiyashijia taucuaaari Pueyasoocuaa rimiaaquequiaa sacuaaraatia, Pueyaso tojiyashijia nia quiniuucua nojori niqiuara".

²⁵Cuarta Judiocuacanaa, Pueyasocuaajaari pa supuetanaa rootaquiaari pa cararaatiuuquia co cuara miatesano quiri, na saquiriojosano pueya pa quiniuucua. Naacuajitij, nia cararaatiuuquia co jaara miatesano quiri, cunoori maniniacuaaja, nia jaara seetanujanaa Moisés Rootasano tojiijia quiri. Saniniujia, nia jaara Moisés Rootasano tojiyashijia quiri quia, niaari juhua miatesoo quiyajaa Pueyaso niqiuara. Nia cararaatiuuquia coori najuhua miatesano quia.²⁶ Saniniujia, taucuaa jaara maninia mijia quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojori juhua miatesano quia, na muerasu nojori quiniuria.²⁷ Naacuajitij, na cararaatiuuquia co miatesoo tahue jaara maninia mijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniujia Judio pueyanonaa, quiaari Moisés Rootasano niishijacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitosaanutaniya quia tojiyaquiniuucua Moisés Rootasano. Naacuajitij, cuno tahueri quocuara tonujuriquiano saniya, Judio pueyanonaa.²⁸ Pueyasocuaajaari Judiocuaca saquiriojoquiaari na muerasu nojori quiniuria juucua. ¿Cante seetanujanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja.²⁹ Noo pojori cutaraari seetanujanaa Judio pueyano Pueyasora, noojia jatanishano pueyanotej. Pueyaso Sohanu jaara pueyano jiuujia jataniri Pueyaso tojiia na quiniuria, cunoori juhua na cararaatiuuquia co miatesano cutara, seetanujanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohanu cutaraari na naata.

3¹ Naa cua sequesacari niajaniatej, niaa naasucuaari sequeya: "Taucuaa jaara naa maninia miishaanutaniya nojori quiaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaricuaaraarini? ¿Paateeri najuhua Pueyaso saquiriojosano Judiocuaani?"² Maja, Judiocuacanaa. Maniniacuajaari pa quishacari Judiocuaca. Pueyasocuaajaari Judiocuacaacua tiuquuaari nojori jitianura na rupaa.³ Noojiaqueya Judiocuacajinijio jaara Pueyaso Rupaacua

tiyashijia quia, ¿Pueyasoteeri cunora na rupaa jatanutaniyajuhua? ¡Maja! ⁴Puetunu pueyajanaa jaara sapojonuuja quiri quia, naajaa, Pueyaso cutaraari tojtaarucuaajanaa sapojiyashijia. Naaratej, nojuajiniijiri naa naajiotasano quia tariucuacaanu na Rupaajinia:

"Puetunu pueyajanaari niishiniutianiya puetunu quia sequesanojuanaari seetanujanaa cutara. Naajuhua, pueya jaara quocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu".

⁵ Pa supuetanaa tiyacuiniuucua seetanu Pueyaso rupaacuajanaa, naacuajitij, mijiria quinia pueyari niishiya, Pueyasoori socua jiyano maninia pueyajiniji. Sesa pa miiniujiniji, paari niishiyani Pueyaso cutaraari jiyano maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyari? ¿Nojuajate sesa, jaara pa saniitiore sesa pa miiniuucua? ¡Jua! Juhua niishiyashijia pocuareenijia. ⁶ Seetanujanaa, Pueyasoori sesa miyashijia! Nojuaja jaara sesa mijia quiri quiajuhuaj, ¿maatucua taa mijiria quinia nequesoreereni?

⁷ Tamasaca naasucuaari sequequia: "Sapojoua cua quishacari, pueyari Pueyaso timitiaquia socua, nojori niishishacari saaja nojuaja cutaraari seetanu rupaajanaa jitiija. Naaratej, ¿Pueyasotucua casaara cua saniitioreni?"⁸ Teyano pueyanote naa sequejani, nojuaja naasucuaari naa sequejajuhua: "Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori". Tamasacaari canacuara tonujucua najuhuanaj, canaanaari naa niishitiojoquiaani. Canapete naa sapojonuuquia canacuaraani, nojori saniitosaanutaniya, nojori sesacuanuucua canaa.

Pueyasora, puetunu pajaniyajanaari sesa mijiacani

⁹ Quiriija, jaara naa quiritij cuarta Judiocuacanaa, ¿paateeri socua maninia mijia taucucajiniji Pueyasorani? Maja. Janiyacuajaari shusha nia pohuatariquiaani, puetunu mijiria quinia pueyajanaari sesa mijia; Judiocuaca, taucucanio.¹⁰ Tariucuacaanu Pueyaso Rupaajiniacuajaari naa naajiotasano quia:

"Majaari quenaaja niqiriya maninia mijia quini. Shaaqui tojtaarucuaajanaa. ¹¹ Majaari quenaaja maninia niishiriojua pueyano quini. Majaari quenaaja Pueyasocuaa jiaatija pueyano quiniujuhua. ¹² Puetunu pueyajanaari Pueyasocuaa tashuquoorucua. Puetunu nojorijianaari seserucua. ¿Cante maninia mijiani? Shaaqui. Shaaqui tojtaarucuaajanaa. ¹³ Nojori miananajonu maniniu. Nojori rupaari saa monujua. Nojori niti taquiriocuateja saa sapojonuraja. Cuno pojori juhua soconu noonacu jitiia na rupaama, rimiaacatujuri nojori quiniuucua. ¹⁴ Nojori jaara pocuare, saaja tamasa sesacaquaa, puera juaaja nojori quishacari. ¹⁵ Nojori puecojuaca. Puereeta nanaca shooteja. ¹⁶ Puetunu mijiria nojori miishanojuanaari casa sesojua, narta pueya taraajetejajuhua. ¹⁷ Majaari nojori niishiniu jiyanooni. ¹⁸ Nojori juhuajaniya miiquiaa sesa saaja. Majaari na pueretunu Pueyaso".

¹⁹ Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuaca quiquaari, nojori niishiniuria, puetunu pueyajanaari sesa mijia. Naacuajitij, puetunu mijiria quiniajanaari sanaajetanutaniya, nojori niishishacari puetunu nojorijianaari sesa mijia; Judiocuaca, taucucanio. ²⁰ Naacuajitij, pueya tojshacari Moisés Rootasano juucua, cuno rootasanoori maja na naata nojori na jiyatenu sesa miyashijia. Moisés Rootasanojiniji, paari saaja cunojiniji niishiyani, puetunu pajaniyajanaari sesa mijiacani.

Paari Pueyaso jiyanooshano cutarani, Jesuucua pa tiushacari

²¹ Pueyasoori quiari naataja pa niishitiquianu cutara, taate pa naata maninia mijia pa jatanishaanuni. Moisés Rootasanoji-

nia, tariucuacaanu Pueyaso sequenu panishano caminiujiuniaa naajionuutasanojiniaari naa sequeyajujuhuaj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaca quiri. ²²Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucucacajujuhuaj, Pueyasoori puetunujuanaa jiyanooquiaa Neyanuucua nojori tiuushacari. Majaari rimajata na jiyanooni. ²³Puetunu pueyajaari sesa miijiaca; Judiocuaca, taucucacano. Naacuajitij, nojoriiri juhua tucuaaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. ²⁴Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusonuucua pocuara. Naacuajitij, Pueyasoori pa jiyatequiaari juhua sesa miyashijiara. ²⁵Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhua, Pueyaso saniitioyauquishacari tariucuacaanu nocua tiuujia pueya Jesu cusoyauquishacarija, majaari najuhua puera jiuujiaja na quini quiquiaari. ²⁶Pueyasoori niishiquiaari Neyanu Jesucristoori nojoriicuara mosocoriquiano, sesa nojori miijosano tuujusaanura seetanujuanaa. Naaratej, nojuajaari pueyaraaanu sesa nojori miijosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujuanaa maninia miijia. Nojuajaari maja najuhua na jiyanooni pajaniya. iNeyanu motequiaari pocuaraari!

²⁷¿Teyano niajanijajinijinote tojetaarucujanaa saaja maninia miijiani? Shaaqui. Naacuajitij, maninia miyashijiaca pa quishacari, puetunu pueyajaari sanaajasaanutianiya Pueyaso nequesoreesacari pueya. Saniniuuja, paa jaara puetunu Moisés Rootasanojuanaa tojitiacua quiriquia maniniani, paa maara tama pa cuaqueyajaaja shuquiritajaca quiriquia cutarani. Saniniuuja, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitianu tama pa miishanojuaaja pa shuquiritiasocoriquiano. ²⁸Naacuajiti paari niishiyani, Pueyasoori pa jiyanoojia puetunu sesa pa miishanojinijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

²⁹¿Niaateeri jiyaniya, Pueyasoori saaja Judiocuaca Jiyano? iMaja! Pueyasocuaajaari puetunu mijiria quiniaa pueyapuejanaa Jiyano. ³⁰Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacara, socua tamonu Pueyaso taucucacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucucacano. ³¹Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuara Jesucristoocua tiuuria, jiyanooshano pa quiniuria.

Pueyaso jiyatesacari Abraham juhua sesa miyashijiara

4 ¹Naaratej cuarta Judiocuacanaa, ¿taa nia sequeya pa supuetana Abrahamjinijini? ²¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniucua. Pueyaso jaara nojuaja jiyanooquiaari maninia na miiniucua, nojuaja maara tama na cuaqueyajaaja timitiaja quiquiaari. ³Saniniuuja, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasocua tiuujiaari. Naaratej, Pueyasoori na jiyatequiaari juhua sesa miyashijiara”.

⁴Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niqutiosaare, cuno cumaneecaari maja nareja niqutiosano. Cunoori seetanujuanaa na poonijosanojiniji. ⁵Saniniuuja, maninia miyashijiara jaara Pueyasocua tiuuri, Pueyasoori na jiyatenutianiya juhua sesa miyashijiara saaja nocua na tiuuniucua. ⁶Pa supuetanaa jiyaniija Davidcuaajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijiaca pa quiniuria na niqiara, maninia miyashijiara pa quishacarija. Naa naajiotasaaquiaariiri David sequesano:

⁷“Shuquiriaatia quijiaca cutaraari noo pueya, canapue Pueyaso jiyanooya sesa na miijosanojinijicujajani, Pueyaso jaara tuujure sesa nojori miijosanojuhuaj.

⁸Shuquiriaatia quijiacaari noo pueyajujuhuaj, puetunu sesa nojori miishanojuanaa Pueyaso saneyaquishootej”.

⁹Janiyacuajaari tari sequereeni, Pueyasoori Abraham jiyatequiaari juhua sesa miyashijiara na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooni panijia, noo nojori canapue na cararaatiuuquia co miatesano jitiiani, taa nojori supuetana Abrahamcuaani? ¿Taa nia sequeyani? ¿Taucuacaarijiaataj? ¿Nojoriti jiyanooshiyajujuhuaj? iTaaquiririni! ¹⁰¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuaajaari na jiyanooquiaari miatesoojua na quishacari. ¹¹Na tiuuniu nuhuaji Pueyasocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiuushacari, Pueyasoori na jiyatequiaari juhua sesa miyashijiara, miatesoojua na quishacari. Naacuajitij, miatesoo taucua tiuushacari Jesucristoocua, taa Abraham tiuujiaaricuaani, Pueyasoori nojori jiyateya juhua sesa miyashijiaca nojori quiniurijahuaj, mariyatu juhua Abraham niqiohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjahuaj. ¹²Naajuhua, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuujiaaricuaani miatesoo na quishacarija, Pueyasoori nojori jiyateya juhua Abraham niqiohua nojori quiniurijahuaj.

Pueyaso sequesano Abrahamni, cunoori Jesucristoocua tiuujiacarajuhua

¹³Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaaanu quiquiaari Moisés Rootasano tojijia na quiniuucua. Jiyacaritij, Moisés Rootasanoori maja na quiniu quiquiaari juhuanujuaja. ¹⁴Pueyaso sequesano Abraham jaara saaja Moisés Rootasano tojjiacara quiriquia, na sequesano maara najuhua quiri Pueyasocua tiuujia pueyara. Naajuhua, pueya maara najuhua Pueyasocua tiuujia quiri quiri quihuaj. Seetanujuanaa Pueyaso sequesano Abrahamni, cunoori puetunu Pueyasocua tiuujiacarajanaa. ¹⁵Cunoori maja saaja Moisés Rootasano tojjiacara. Pueyasocuaajaari niishiquiaari, pueyari maja na naata Moisés Rootasano tojinu quiniutianiya puetunujuanaa. Moisés Rootasanojiniji, paari niishiyani, paari saniitiosaanutianiya pa tojitiaquiniuucua cuno rootasano. Saniniuuja, Moisés Rootasano jaara quiyaquiri quiri, pueya maara sequeyaquishaare: “Niaari sesa miijiaa”.

¹⁶Pueyasoori tariucuacaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutianiya nocua tiuujia. Naacuajitij, Pueyaso sequesanoori maja saaja Moisés

Rootasano tojjiacara. Cuno sequesanoori puetunu pueyapuera-janaa, canapue te Pueyasooocua tiuujiaca quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujiaca pa quishacari taa Abraham tiuuquiaari Pueyasooocua-cuaani, paari Abraham niqiuohuani. Naaratej, Pueyasora, Abrahamri pa que. ¹⁷Pueyasocuaajaari naa sequequiaari Abrahamtej nojuajaari queraatia niqiuohuaraca quiriquiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarjia quia jiyateree queraatia tamaatia rupaaca pocuajaca que quia quiniuriani”.

Abrahamri Pueyaso sequesanoocua tiuuquiaari. Nojuajaari niishiquiaari Pueyasoori macunucua samiitianijia. Niishiquiaari-rijiaarihuaj, Pueyasoori cumaacaraca na panishano na shipininiuria shaaquijinjia.

¹⁸Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuuquiaari.

Naacuajitij, nojuajaari seetanujanaa queraatia tamaatia rupaaca pocuajaca pueyapue que, taa Pueyaso sequequiaari nojuacuajani. Pueyasoori naa na sequequiaari:

“Quia niqiuohuari tojtaarucujanaa queraatia quiriquiano”.

¹⁹Naa Pueyaso sequesacari nojuajatej, nojuajaari tari cien* marijia shocotejoquiaari. Naa saaquiano na quishacaritij, necocua Saarajuhuaaj, naajaa, majaari na tarinitianu quiquiaari Pueyaso sequesanoocua tiuuniu. ²⁰Saaja Pueyaso sequesanoocua na tiuushacari, nojuajaari maja noojia na niqiujiotenu quiquiaari. Majaari Pueyaso sequesanojinijia na taacanuunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishianijia quiaari canaa muetutenutaniya taa quia sequecanu janiyacuajani. ²¹Quiaacuajaari cumaacaraca quia miiniuria puetunu quia sequesanojuanaa”. ²²Naa Abraham tiuuniucua Pueyasooocutej, Pueyasoori na jiyatequiaari juhua sesa miyashijia pueyanora.

²³Jaara naa naajiotasaaquiaari Abrahamjinijia: “Pueyasoori na jiyatequiaari juhua sesa miyashijia”, cunoori maja saaja Abrahamra sequesano. ²⁴Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuaaj, nocua pa tiuushacari, pa niishishacarijuhuaj nojuacuajaari pa Jiyaniijia Jesucristo samiitianiquiaarihuua macujinjia.

²⁵Pueyasocuaajaari mijirja na jiyaroquiaari sesa pa miishanoocua mosocoriqiano. Nojuajaari na samiitianiquiaarihuua, Jesu jaatianura nocua pajaniya, juhua tariucua sesa miyashijia.

Jesuucua tiuunaa pueyari jiyanooshano

5 ¹Naacuajitij, paa jaara tari jiyanooshano quiyani Jesucristooocua pa tiuushacari, paari juhujaniya quiya Pueyaso niquiarani. Jesucristoori na Que pa jiyanootiquiaari, pocuara na cusosacari. ²Jesucristooocua tiuujiaca pa quishacari, Pueyasoori pa timitiaquiaa. Pa cumaquiquiaajaarihuua maninia necohua pa quiniuria. Paari shuquiriyajaacuhuaaj, pa niishishacari paari jatanishaanutaniyani, shacantuuca quijia pa quiniuria juhua nojuajuhuaaj. ³Majaari saa cunojua. Paari shuquiriquiaajuhuaaj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhujaniya rejeretajaca quiniutianiyan. ⁴Naa rejeretajaca pa quishacaritij, paari cumueca Pueyaso muerasu quiniutianiyan. Naa cumueca Pueyaso muerasu pa quishacaritij, paari juhujaniya sashijia quiniutianiyan, pa niishishacari Pueyasoori seetanujanaa maninia miiniutianiya pajaniya, taa na sequequiaaricujani. ⁵Naa pa niishishacaritij, majaari sapojosano pa quiniu quiniutianiya. Pueyasocuaajaari tari jiyaroquiaari na Sohanu, poojajinia quiriquiano, seetanujanaa Pueyaso paniniu pa jitianura poojajinia.

⁶Pueyaso tojyashijia pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. ⁷Sesa miyashijia pueyano jaara monu panishiya juucua, tãmonu maninia pueyanoteeri quiya na sequentura: “Janiya cuaara mosaaria juhuaari cuno pueyano niti”? Majaruhua. Monu panishano pueyano jaara seetanujanaa maninia pueyano quiri, na rupena pueyano jaara jiyanoohua na panijia quiri, nojuaja maara seque: “Janiya cuaara na niti mosaaria juhuaari”. ⁸Saniniuuja, sesa miijia pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanoohua pa panijia. ⁹Quiarjia, paari sesa miyashijia quiya Pueyaso niquiarani, Jesucristo cusonuucua pocuara. Naacuajitij, paa cutaraari niishiyani, Pueyaso saniitiosacari na tojyashijia pueya, Cristoori pocuaji tacunutaniya cutara, tariucua na jatanishano pueya pa quiniucua. ¹⁰Na paraa pa quishacarijia, Pueyasocua-jaari pa jiyanootiquiaari, Neyanu cusonuucua pocuara. Quiarjia, nata jecatoono pa quishacari, Neyanuuri saminio quiya pueyaracaanu pocuaji na tacunura. ¹¹Majaari saaja cunora shuquiriaatia pa quiniu. Paari shuquiriyajuhuaaj, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹²¿Casaara pa cusonuquiaani? Juhuaatecara pa supuetana Adán miiniucua sesa, naaratej puetunu pueyajanaari sesa miijiacajuhuaaj. Pueyasocuaajaari tari sequequiaari: “Cante sesa miijiani, cuaara shaajeera”. Seetanujanaa naari. Puetunu pajaniyajanaari shaajeriquianoni, sesa miijia pa quiniucua. ¹³Moisés Rootasano quiyaquishacarijia, pueyari tari sesa miini niishijia quiquiaari. Jiyacaritij, pueya miishacari sesa, majaari nojoriicua saquiriojotasaanu quijia sesa nojori miishacari. ¹⁴Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesanoocuaani. Naajaa, puetunu nojorijianaari cusonuquiaarijuhuaj sesa miijia nojori quiniucua, sesa miijia Adáncujainio nojori supenuucua. Quiarjia saniniuuja, nia pohuatareera Adán miishanojinijia, Jesucristo miishanojinijio.

¹⁵Adán miishanoori jiyanoohua tamaatia Jesu miishanojinijia. Coteenu shipinishano pueyano miiniucua sesa, puetunu pueyajanaari shaajenu niishiya. Saniniuuja, Jesucristo miiniucua maninia, Pueyasoori queraatia pueya jiyatequiaa pueyaracaanu rishijia nojori quiniuria cutara. ¹⁶Pueyaso miishano maninia pajaniyarani, cunoori sesa Adán miishano shocotaa jiyanoohua cutara. Naa niquiriyatu sesa casaa Adán miiniucuatej, puetunu pueyajanaari saniitiosocoriqiano. Saniniuuja, maninia Jesucristo miiniucua pajaniyarani, Pueyasoori pa jiyanootiquiaa puetunu sesa pa miishanojinijianaa. ¹⁷Niquiriyatu pueyano miiniucua sesa, puetunu pueyajanaari cusonujuacua quiquiaari. Saniniuuja, niquiriyatu pueyano miiniucua maninia pajaniyara, cunora, Pueyasoori pa jiyateya juhua sesa miyashijia pa quiniuria. Cunoori, Jesucristooocua pa tiuushacari. Majaari saaja cuno, naajuhuaaj, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸Naa Adán miiniucua sesatej, nojuajaari puetunu nocuajainio supueno pueyajanaa jiyatequiaari sesa miijiacara, saniitiosano nojori quiniuria. Naajuhuaaj, Jesucristo miiniucua maninia, puetunu pueyajanaari na naata jiyanooshano, nojori saniitioyaquishaanuucuaaj, pueyaracaanu quijia nojori quiniuria. ¹⁹Adán tojiyaquiniucua Pueyaso sequesano, puetunu pueyajanaari sesa miijiacara jiyatesaaquiaarijuhuaj. Saniniuuja, Jesucristo tojiniucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

²⁰Moisés Rootasano jaara niishishaaquiaari, pueyari socua sesa miijiacara jiyacatequiaari. Naa socua sesa miijiacara pa quishacaritij, naajuhuaq, Pueyasoori socua jiyacatequiaari pocua taraajenujuhuaj. ²¹Sesa miiniu tarinitianu niishiyashijia pa quiniuucua, puetunu pueyajanaari cusunuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samiitianijioquiaariuhua, pueyaracaanu rishijia pa quiniuria pa Jiyaniijia Jesucristota.

Pablo niishitiojosano moojinia tiuquinijonujiniji

6 ¹Pueyaso jaara naa pa jiyanooquiaa pocua na taraajesacari, čtaa nia sequeyani pueyanaa? ²Paate socua pueyaracaanu sesa miijia quiniutianiyani, pueyaracaanu Pueyaso jiyanooniuria pajaniya, pueya niishiniuria, Pueyasocuaajaqui jiyanoohua maninia na jiyanooniuria pajaniya? ²ⁱMaja pueyanaa! iMaja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, čpaatucua casaara socua sesa miijia quirini? Pueyasora, paacuajaari tari cusunuuquiaari Jesutani. ³čNiaateeri cuno niishiyaqiyajaa? Naajuhuaq, paa jaara moojinia tiuquinishaare Jesucristoocua pa tiuushacarini, Pueyaso niqiuara, paari Jesu rupuequiaari niyacutesanojiniani. Nojuacuajaari pa niti saniitosaaquiaari. ⁴Naacuajitij, paa jaara moo cariquimia shishaareni, jiyacaritij, paari juhua Jesuta jamoshijuhuaq. Naa juhua macu pa quishacaritij, paari samiitianijiosanohuani, taa Jesucristo samiitianishaquiaariuhua macujiniji jiyanoohua Pueyaso cumaacatacuaani. Naa samiitianijiosanohua pa quishacaritij, maninia miijia pa quiri juhua quiarinio pueya.

⁵Paa jaara Jesucristo rupuetesaaquiaari sesa pa miishanoocuara na cusosacarini, naajuhuaq, paa cutaraari tari samiitianijiosanohua juhua nojuajani, maninia quijia pa quiniuria. ⁶Tarijia, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jitianura, sesa na miitiniuria pajaniya. ⁷Naacuajitij, sesoriquia poojia seque jaara tari jatanishano quiya, majaari tari sesa miijia pa quiniu. ⁸Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹Cristocuaajaari samiitiaquiaariuhua. Paari niishiyajuhuaq, majaari socua na pacutenu quiniutianiu-hua cusunu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuusaanuhua. ¹⁰Majaari socua Jesucristo pacutenu quiniutianiu-hua cusunu, sesa pa miishanoocuara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiri-quiano Pueyasora cutara. ¹¹Naajuhuaq pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Naa niishirijuhuaq, niaacuajaari Jesucristota samiitiaconohua, Pueyaso tojjijia nia quiniuria.

¹²Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyajetare tama nia cuaqueya panishanojuajaaja nia miyaquiniuria. ¹³Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niacuajaari tari samiitacoquiaariuhua juhua macunucua nia quiniujiniji. Naacuajitij, nia cuaqueya nia jiyatere saa maninia miijia na quiniurijaja. ¹⁴Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Naa niishiri, niaari quiarijia Pueyaso tojtijajaca cutara, maja tari Moisés Rootasano tojjijia.

Pueyaso tojjiyashijia pueyani, nojoriiri Sesaaca pueya

¹⁵Cua sequesacari niajaniya, pajaniya maja tari Moisés Rootasano tojjijiacani, čniaateeri cunora sesa miiniutianiya, Pueyaso quishacari pa jiyanoojia? iMaja naa nia miiniu pueyanaa! ¹⁶Niacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojjijia quiniutianiyani. Naajuhuaq, niaa jaara sesa miijia quiriuhua, niaari Sesaaca tojjijia. Naa sesa miijia nia quishacaritij, niaari cusunutaniya. Saniniuujia, niaa jaara Pueyaso tojjijiacara quiri, niaari sesa miyashijia quiniutianiya. ¹⁷Tarijia, niaari Sesaaca tojjijia quijia, juhua na seya, sesa miijia nia quishacari. Quiarijia, janiyari Pueyaso timitiaani nia tojjijiacara Jesucristo rootasano puetunu nioojiatajanaa, taa nia niishitiojosaaquiaari-cuajani. ¹⁸Jesucristo rupaa nia tojjishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojjijiacara jatanishano, saaja maninia miijia nia quiniuria. ¹⁹Janiyari naa pohuataa serujiniji niajaniyani, maatia nia tojjiniuria cua niishitiojosano. Majaari juhuanojuajaaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanoohua sesa miijiacara jiyacatequiaari. Naajuhuaq, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Niaa jaara naa miiri, niaari tojtaarucuajanaa maninia miijia quiniutianiya Pueyasora.

²⁰Niaa jaara sesa miijia quiquiaarijia Sesaaca tojjijia nia quishacarijia, niaari juhuajaniya Pueyaso tojjiyashijia quiquiaari. ²¹čSesaacate maninia nia miiquiaari sesa nia miiniuucua nera? iMaja! Niaa cutaraari saaja caririquiaa sacuaraatia casaa nia miiniuucua tarijia. Niaari quiarijia niishiyajuhuaq, cante sesa miijia quiquiaani, nojoriiri shaajasaariquiano. ²²Naa sesa miyashijia nia quishacari quiarijia saniniuujia, niaari Pueyaso tojjijiacara jiyatesaaquiaari, saaja na panishano nia miiniuria cutara. Naa Pueyaso tojjijia nia quishacaritij, nojuajaari nia jiyatenutaniya seetanujuanaa maninia miijia nia quiniuria. Naacuajitij, niaari pueyaracaanu shuquiriaatia rishijia quiniutianiyajuhuaq. ²³Saniniuujia, sesoriquia pueya miiniuucua sesa saaja, nojoriiri naa na miiniuucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijia pa quiniuria, pa Jiyaniijia Jesucristo rupuejaca pa quishacari.

Paari juhua camishanoni

7 ¹Pueyanaa, niacuajaari Moisés Rootasano niishijia. Niaari niishiyajuhuaq, paa jaara shaajeqeeni, paari jiyacari Moisés Rootasano carteqee shushani. ²Naajuhuaq, paacuajaari rootasaaquiaarini, maaji jaara camishano quiri, cuara tamonu cayata quiyaquiri, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojjishocori-quiano. ³Saniniuujia, maaji jaara tamonu pueyanota quiriquia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojjiyashijia na quiniu cunora. Nojuajaari maja paanatu, naa na miishacari.

⁴Niaari naajuhuaq pueyanaa. Jesucristo cusunucua pa niti, niaari juhua cusunuuquiaarijuhuaj, maja Moisés Rootasano tojjijia nia quiniuria socua. Naacuajitij, niaari tamonu tojjijia quiya cutara. Nojuajaari pa Jiyaniijia Jesucristo, nooj, macujiniji samiitiaquiaariuhuatej. Naacuajitij, quiarijia pa Jiyaniijia Jesucristo tojjijia pa quishacari, paari maninia

mijjiaca Pueyatorani. ⁵Tarijia, Pueyaso tojiyashijiaca pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacuajitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶Tarijia, paari juhua quioosano pueya Moisés Rootasano tojitishaaquiaarini. Saniniuuja, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojinu cartequiaarini. Moisés Rootasano pa tojiyaquishacari quiarijia, naacuajiti pa naata Pueyasojuaanaa tojinu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitiyajaca quiquiaari maniniani, pa puerenuta paa mariqui saniitiosareeri pa tojiyaquiniucua niquiriyatu queraatia na rootasanojiniji.

Poojiaari saa sesa miiniu niishijaja

⁷Tamasaca naasucuaari jiyaniya janiyari Moisés Rootasano soojeani. Maja. Quiria, jiyanoohua maniacuajaari Moisés Rootasano. Moisés Rootasanojiniji, paacuajaari niishiyani paari sesa mijjiacani. Moisés Rootasano jaara quiaquiriquia, janiya maara niishiyaquiaarini, cua jiaatiasacari tamasaca jiiitasano casamiicua, cunoori sesa Pueyasora. ⁸Saniniuuja, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujishaaquiaarini casamiicua jiaatiaja cua quiniuria socuani. Naacuajitij, Moisés Rootasano cua niishiyaquishacarijia, coojiaari juhujaniya quiquiaari juhua maqueja. Saniniuuja, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹Moisés Rootasano cua niishiyaquishacarijia, janiyari juhujaniya quijia quiquiaarini. Saniniuuja, Moisés Rootasano cua niishishacari, janiyari jiyanoohua taraajequiaarini, cua niishishacari janiyari jiyanoohua sesa mijjia Pueyaso niquiarani. ¹⁰Naa sesa mijjia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuuja, Moisés Rootasanoori saaja cucuara tonujuquiaari puetunu sesa cua miishanojinijianaa. ¹¹Naacuajitij, janiyari jiyanoohua jiyajenequiaarini, cua jyanishacari cua naatacuaja Moisés Rootasano tojinu maninia, Pueyaso jiyanooniuria janiya. Jaara maja cua naata quiquiaari Moisés Rootasano cua tojinuria maninia, janiyari niishiquiaarini Pueyasoori cua jyanoyaquiniutianiya.

¹²Seetanujuaanaa nia sequeyanijia pueyanaa, Moisés Rootasanoori jiyanoohua maninia. Tojetaarucujanaa maninia rootasano. Cunoori seetanujuaanaa rupaa maniniu Pueyasojiniji. ¹³Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanoohua sesa Pueyasora. Naacuajitij, paari Moisés Rootasanojiniji niishijiani, paari puetunujuaanaa jatasocoriquiano quijia juucuanu, seetanujuaanaa sesa mijjiaca pa quiniucua.

¹⁴Paacuajaari niishiyani, Moisés Rootasano, cunoori maja nareja pueyano niishitiosano. Pueyaso niishitiosanocuaajaari pa tojishocoriquiano puetunu poojiatajanaa. Saniniuuja, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojinu. ¹⁵¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacujani. ¹⁶Janiya jaara cua panishoo sesa casaa miirini, naacuajitij, janiyari sequequiaani, Moisés

Rootasanoori seetanujuaanaa maninia. ¹⁷Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja.

¹⁸Quiarijia niishiya cutaranijia, coojiaari tojetaarucujanaa sesa miiniu niishijia. Naacuajitij, janiyari juucua maninia miiniuucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹Naacuajitij, cua miishanoori maja maninia, taa cua miiniu paniquiaa juucucujani. Cua miishanoori saaja cua miiniu paniyaquishoo quiquiaa.

²⁰Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaja.

²¹Quiarijia niishiya cutaranijia, janiyari naa sesa mijjiani: janiya jaara maninia casaa miiniu paniyani, janiyari saaja sesa miiquiaani. ²²Janiya cutaraari niishiyani Pueyaso rootasano Moisésri seetanujuaanaa maninia cua tojishocoriquiano. Na tojinuucua jiaatiaquiaa juucuanijia. ²³Janiyari niishiyajaniuhua, coojiaari juhua cua niishitiaja paraca quiya. Naacuajitij, cua niishiriojosacari, “Maninia miiniutianiyani”, coojiaari saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

²⁴¿Taa cua miiniutianiya socuuarini? ¡Tojetaarucujanaa taraatia quijianijia! Pueyaracaanu sesa mijjianijia. Majaari cua naata tamajaaja maninia mijjia cua quiniu. Naa sesa mijjia cua quishacaritij, cua cuaqueyari macu quiriqiano. ¿Cante na naata cua jataniniuni, naa sesa mijjia cua quishacaritij?

²⁵¡Pueyaso shuquiritiaanjia cua niishishacari, nojuacuajaari cua Jyanijia Jesucristota cua jataniniutianiya tojetaarucujanaa maninia mijjia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuuja, naa coojia quiniucua sesatej, saaja sesa cua miitiniu paniquiaari.

Pueyaso Sohuanu pa tojishacari, paari maninia mijjia quiniutianiyani

8 ¹Pa rupesacari Jesucristo, nocua pa tiushacari, Pueyasoori pa jyanooquiaa. Naacuajitij, paari tojetaarucujanaa jyanoooshano quiyani. ²Puetunu pueyajaari cusonuuriqiano quijia, sesa mijjiaca nojori quishacari. Saniniuuja, Jesucristo pa rupesacari, Pueyaso Sohuanu pa jiyatequiaa saaja maninia mijjiaca pa quiniuria. Naacuajitij, majaari tari sesa mijjiaca pa quiniu pa saniitiosaanura. ³Moisés Rootasano pa tojishacari juucua, majaari pa naata quiniu jyanoooshano. Cunoori saaja sesa mijjiaca pa quiniucua. Naaratej, Pueyasoori Neyanujuaanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiiitiasacari juhua pa cuaqueyajuahua, Pueyasoori juhua sesa mijjiara na jiyatequiaari, pa niti na saniitiosocoriquiano. ⁴Naacuajitij, Pueyaso Sohuanu pa jiiitiasacari quiarijia, pa naata maninia mijjiaca quiniu, taa Moisés Rootasano sequeyacuajani. Pueyaso Sohuanu tojjijia pa quishacari, majaari tari pa quiniu sesa mijjiaca, taa pa quiquiaari tarijacujani.

⁵Canapuate tama na panishanojuaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuuja, canapuate Pueyaso Sohuanu tojjijia cutarani, nojoriiri saaja Pueyaso shuqiritiniuria jiaatiaquiaa. ⁶Tama na cuaqueyajaaja shuqiritiniuria jiaatijacaari saaja shaajecoriquiano cutara. Saniniuuja, Pueyaso shuqiritiniuria jiaatijacaari pueyaracaanu rishiriquiano cutara. Nojoriiri juhujaniya shuqiriaatia quijiacajuahua. ⁷Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujuaanaa majaari na naata Pueyaso tojjia na quiniujihua. ⁸Naacuajitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniuria.

⁹Niajanía cutaraari maja nia quiniu juhua cuno pojoriia, tama na cuaqueyajaaja shuquiritiniuria jiaatiajacani. Níaa cutaraari Pueyaso shuquiritijíaca, Pueyaso Sohuanu cumaquishacari niajanía, nojuaja jaara seetanujuanaa nioojiajinía quíya. Cante Pueyaso Sohuanu jítíaaquiyani, nojuajaari maja Pueyaso pueyano. ¹⁰Cristo quishacari poojiajinía, pa sohuanuuri tari jatanishano quíya manínía miijiaca pa quiniuria, pueyaracaanu rishíjiaca pa quiniuriajuhuaj. Pa cuaqueya cutaraari shaajasocoriquiano, sesa miijiaca pa quiniucua. ¹¹Naajaa, Pueyaso Sohuanu jaara poojiajinía quíya, nojuajaari pa cuaqueya samiitianijionutaniuhua, taa na samiitiani-quiaariuhua macujiníji Jesucuaani.

¹²Naa Pueyaso miishacari manínía pajaniyatej, manínía miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijiacuajani. ¹³Cante naa miijiaca quiyajaani, nojoriiri shaajasaariquiano. Saniniuuja, níaa jaara Pueyaso Sohuanu cumaacata rejeretariquía saaja tama sesa nía cuaqueya miiniu panishanojuaja, níaa cutaraari pueyaracaanu shuquiriaatia quijiaca quiniutianiya.

¹⁴Canapueje Pueyaso Sohuanu tojtíatíjacani, nojoriiri Pueyaso níquíohua cutara. ¹⁵Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacuajitíj, cuno pa jítítasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritíj, majaari tari pa puerenu paari saniitiosaanutaniyani, Moisés Rootasano pa tojijiquiniucua. ¹⁶Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. ¹⁷Naa Pueyaso muerasu pa quishacaritíj, puetunu Pueyaso jítítasanojuanaari pa jítítasano quiniutianiyajuhua. Pueyasoori Neyanu Jesucristota pa cojiritianutaniya naa manínía na miiniuria pajaniya, paa jaara naquíya miiniu rejeretajaca quirini, Jesucristooocua tiuujiaca pa quiniucua. Paa jaara naquíya miishaare nocuara mijiriani, paari jiyanhua manínía quijíacata jiyatesaanutaniyani juhua nojuajuhua.

Pueyasoori manínía miiniutianiya na muerasu

¹⁸Quiarijía mijiría naquíya pa miiniuni, cunoori saaja rupaquijíja. Janiyara, naajaa, cua niishishacari naa naquíya pa miiniu nuhuajitíj, paari jiyanhua manínía miishaanutaniyani, pueyaracaanu shuquiriaatia pa quiniuria. ¹⁹Quiarijiani, puetunu Pueyaso shipinishano casaajanaari pa níquiniucua jiaatiaa paa jaara quiariníora jatanishaareni. Na niishíni panyari taamueca quijíacata Pueyaso jataniniutianiya pajaniya na cumaacatani, tojetaarucujanaa manínía jeenucasano na muerasu pa quiniuria. ²⁰Coteenujanaa pa supuetana pueyano jaara juhucatecara sesequiaari, jiyacaritíj, puetunu Pueyaso shipinijiosano casaajanaari sesequiaarijuhuaj. Majaari na sesenu quíquiaari tama na panishacarijaaja. Pueyasocuaajaari naa paniquiaari sesa na quiniuria, na shipinishano pueya sesenucuajuhuaj. Naajaa, majaari pueyaracaanu sesa na quiniu quiniutianiya. ²¹Pueyaso muerasu jaara jatanishaare shacantuca quijíaca pa quiniuria, jiyacaritíj, puetunu Pueyaso shipinijiosano casaajanaari pata cojiritiasaanutaniya jeecanujuhua. Naacuajitíj, puetunu Pueyaso shipinijiosano casaajanaari maníniara quiniutianíuhua, maja na sesenura socua. ²²Quiarijiani, puetunu Pueyaso shipinijiosanojuanaari jiyanhua noojía nojijía taraatia na quishacari. Quiatojijiyari juhua maají noyano, cuara quiariníora jatanishaarejaatijía. ²³Majaari saaja puetunu Pueyaso shipinishano casaajanaa quiatójonu, poojiaari juhua quiatójiyajuhua, na panishacari tojetaarucujanaa jatanishano quijíaca pa quiniuria. Paacuajaari tari jítíaa Pueyaso Sohuanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhuanójua jatanishoojua. Paari cunora quiatójiyajaani. ²⁴Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuca quijíacata

pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quíriquia, paa maara na jataniniucua jiaatiaaquirini. Paa jaara tari jítíariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanójua jatanishoojua. ²⁵Naajaa, paacuajaari niishiyani pa cuaqueyari jatanishaanuta-níya, jiyocuaaanu pa rupenura pa Jiyaniijía. Cunora, paari mijiría taraatia pa quishacari juhujaniya rejeretaquiaani pueyaracaanu pa sashishacari.

²⁶Naa rejeretajaca pa quishacari mijiría pa sashishacari pueyaracaanutej, Pueyaso Sohuanuuri pa cumaquiquíaa, cumueeca pa quíyaquishacari. Naacuajitíj, Pueyaso pa secojosacari, pa niishiyaquishacari casaacua pa secojonutani-yani, Pueyaso Sohuanucuaajaari poojiajiníji Pueyaso secojoquiaa pocuara. Jiyanhua na secojosacari pocuara, jiyasohua quiatójiya poojiajiníaa. ²⁷Poojía niishíjía Pueyasoni, nojuajaari niishiyacuaja casa na Sohuanu secojijía nojuaja pocuarani. Na Sohuanucuaajaari manínía secojijua cutara, taa Pueyaso miiniu paníya na muerasuracujani.

Jesucristo pa shocotanija cutara

²⁸Paacuajaari niishiyani, paa jaara manínía miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja manínía na quiniuria na paníjacata. Nojuacuajaari pa saquiriojoquiaari na muerasuniyojua pa quiniuria. ²⁹Naajuhua, jiyá shipiniyaquishacarijía, Pueyasoori tari niishíquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quíriquianojuhuaj. Naa sequequiaari-ri Jesucristo quiniuria pa puerana, queraatia tapueyocuaaraca na quiniuria. ³⁰Naacuajitíj, canapue Pueyaso saquiriojoquiaari na muerasu nojori quiniuríacuajani, juhua Jesucristo nojori quiniuriajuhuaj, Pueyasoori cuno pojori niishitiquíaa nojori tiuuniuria Neyanuucua. Jesucristooocua nojori tiushacari, Pueyasoori nojori jiyatequiaa juhua sesa miyashíjacata. Jiyanooshano nojori quishacari, Pueyasoori nojori níquitioquiaa na Sohuanu, na Sohuanu jataniniuria nojori shacantuca quijíaca nojori quiniuria juhua Neyanu.

³¹Naa Pueyaso miishacari manínía pajaniyaratej, ¿taa pa sequeyani? Pueyaso jaara pa jiyano quíya, ¿tamonute na naata sesonu pajaniya? ¡Maja! ³²Pueyasoori jiyanhua pa paníjía. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquíaaaricuaa, ¿maatucua casaara quíaríjía níquitioyáquiri puetunu pa panishanojuanaani?

³³¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuaacuajaari pa jiyatequiaari juhua sesa miyashíjía pa quiniuria. ³⁴Jesucristocuaajaari tari cusoquiaari pa nítí. ¿Cantucua saniniuuja quíaríjía Pueyaso sequeríquia pocuarani: “Cuno pojori quíaa shaajare”? Pocuají Tacunacuaajaari samiitiaquiaariuhua. Quiarijía na Que Pueyaso miaquetajara cajiyari, pocuara na Que na secojonura pueyaracaanu. ³⁵Nojuajaari jiyanhua pa paníjía. ¿Tamonu casaate na naata Cristo tarinítíni maja na paníniuria pajaniya? ¡Majaari quenaaja casa quíniú na tarinítíniuria nojuaja! Naaratej, majaari nía jiyaniú Cristo pa paníyaquíya, paa jaara taraatia miishiyani, paa jaara casaacua tacayani, tamasa jaara naquíya miya pajaniyani. Naajuhua, paa jaara quera titíacoya pa miaajenutani, majaari nía jiyaniú Cristo pa paníyaquiyani, naajuhua, paa jaara toqueju quiyani, paa jaara cocuaatia miyani, paa jaara miananajoshiya monurajaniuhua. Puetunu nojuanaari maja na tarinítíniú Jesucristo, na paníyaquiniuria pajaniya. ³⁶Paacuajaari taraatia miishocoriquiano, naatej, taa tariucuaaanu Pueyaso Rupaajinía naajíotasano quíyacujani. Naa sequeyari:

“Canaa Pueyasonaa, canaari puecooshiya pueyaracaanuni, quíaa tojtíatíjaca canaa quiniucua. Nojoriiri juhua miaquesocoriquiano borregohua canaa puecooquiaa juhujaniya”.

³⁷Paari naa miishaaquiajaaniuhuj. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacujitij, majaari saaja pa rejeretanu naquiya pa miishacari. Jesucristoori seetanujanaa cuno naquiya pa miiniu jiyatequiaa maninia na jeeanura pajaniya, juhua nojuaja pa quiniuria socua. ³⁸Seetanujanaa niishianijia, Pueyaso panishacari jyanohua pajaniya, majaari quenaaja tamonu casa na naata rupatanu pajaniya Nojuajiniiji. Paa jaara quiri saminiojuani, macu soj, naajaa, pa panijia Pueyasocujaari pata quiyajaa. Naajuhuj, Pueyaso seya, samaruhuano, puetunu cunoujanaari maja na naata pa rupatanu Pueyasocujaji. Naajuhuj, majaari quenaaja tamonu cumaacaraca quijiaca na naata pa rupatanu Pueyasocujaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio. ³⁹Naajaariuhuj, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuaj. Naacujitij, pa Jiyaniijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniiji.

Pueyasojunaari pueya saquiritiojua na pueyara

9¹⁻³Naa Pueyaso pueyano cua quishacaritij, janiyari jyanohua cuarta Israel pueyacu taraajequiaani, nojori tiuyaquiniucua pa Jiyaniijia Jesucristoocua. Janiyari pueyaracaanu nojoriicua taraajequiaa jyanohuani, maja cua naata quishacari cuarta Israel pueya tiuutiniu Jesucristoocua. Seetanujanaa nia sequeyanijia, Pueyaso jaara na naata quiri mani quiqiuojinia na jatanura janiya nojori niti, janiya maara sequereni, maniniacuajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniiji, saniya cuarta Israel pueya jiyatesaanura Pueyaso muerasura cutara”. Naa cua sequesacari nijaniyatej, janiyari coojiajinia niishiyani, seetanujanaari cua sequesano. Pueyaso Sohanuuri cua niishitijuhujaj majaari cua sapojonu. ⁴Cuarta Judiocuacaari pa supuetana Israel niqiuohuacujajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niqitiquiaari shacantuuca na cumaaca, tariucuaacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuj, Pueyasoori Moisés niqitioquiaari caapiqui saajianeecua na naajosano, saniniujia Moisés niishitiojuna tiji nojori. Pueyasoori nojori niishitiquiaarijuhuj taa nojori miiniutianiyan, tariucua jiyanooshano nojori rerejonura na niqiuara. Pueyasoori nojori sequequiaarijuhuj, nojuajaari puetunujanaa na sequesano Abraham tohuateenutaniya nojoriria. ⁵Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niqiuohuacujajinio supuequiaari. Nojuajaari tari jiyatesaaquiaari Jiyaniijiajanaa na quiniuria, puetunu casamijanaa jiiitiana na quiniuriajuhuj. Nojuajaari Pueyasojuhuanajaj, juhua na Quejuhuaj. iNojuaja cuaara pueyaracaanu maniniuhuaqueetasano quiiria! iCuaara naa quiiria pueyaracaanutej!

⁶Quiarijiani, queraatia parta Israel pueyajiniijio pueyari maja Pueyaso muerasu. Naa cua sequesacari nijaniyatej, majaari nia jyaniniu tariucuaacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocujaja. Jaara naa qiritij, ¿casaara puetunu Israel pueyajanaa maseyaquiniutianiya Pueyaso sequesano nojoririarini? Cua tojitiare pueyanaa. Puetunu pa supuetana Israel niqiuohuacujajinio supueno pueyajanaari maja seetanujanaa Israel pueya Pueyasora. ⁷Naajaariuhua Abraham niqiuohua. Puetunu Abraham niqiuohuajanaari maja seetanujanaa Abraham niqiuohua na quiniu quiqiuiaari Pueyasora. Pueyasocujaari naa sequequiaari Abraham:

“Cua sequesano quiajaniyari saaja quia niyanu Isaaccuajinio supueno pueyarano quiniutianiya cutara”.

⁸Naa Pueyaso sequesacari Abrahamtej, naacujiti paari niishiyani, majaari puetunu Pueyaso saquiritiojosano pueyacuajinio supueno pueyajanaa seetanujanaa Pueyaso muerasu. Saniniujia, seetanujanaa Pueyaso muerasu cutaraari noo pojori, Pueyaso sequesanoocua tiuujicacatej, taa pa supuetana Abraham tiuquiaari Pueyaso sequesanoocua-cuaani. Pueyasora, nojori cutaraari Abrahamcuajinio supueno pueya. ⁹Abrahamri Pueyaso sequesanoocua tiuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia niqiuo Saara riuriatanutaniuhua tariucua mueyaracani”.

Naacujitij, Isaac jaara rasaaquiaari, Pueyaso sequesanoori tohuateequiaari. Naacujitij, puetunu Abraham niqiuohuajiniijiojunaani, saaja Isaacri Pueyaso saquiritiojosano pueyano quiqiuiaari.

¹⁰Naa quiqiuiaarijiaariuhua Isaac niqiuohua. Isaac jaara neco Rebeca manajoquiaari, Rebecaari caapueya manajequiaari.

¹¹⁻¹³Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojjiarani”.

Naa Pueyaso sequesacarijij, cunoori juhua Pueyaso sequesano tariucuaacaanu. Naa sequequiaari cuno royaquishoojua caapueyajiniiji:

“Jacoboari cua panishano quiniutianiya. Esauuri saniniujia cua soosano quiniutianiyacuajia”.

Naa Pueyaso sequesacarijij, paari niishiyani, Pueyasoori saquiritiojuaa cana na saquiritiojonu paniyacuajani, tama na miiniu panishanojuaaja na tohuateenura. Naacujitij, Pueyaso jaara saquiritiojore pueya, nojuajaari maja na niishiriojonu nojori miishanojiniiji; maninia, sesa soj.

¹⁴Naa Pueyaso miishacari tama na panishanojuaajatej, ¿taa pa sequeyani? ¿Pueyasote sesa miya, naa rimijata na saquiritiojosacari pueyatej? Maja. ¹⁵Pueyasocujaari naa Moisés sequequiaari:

“Janiyari pueya jiyanooniutianiyan teyano pueyano cua jiyanooni paniyacuajani. Naajuhuj, janiyari pueyanoocua taraajenutaniyani, teyano pueyanoocua cua taraajenu paniyacuajani”.

¹⁶Naacujitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocujaari tama saquiritiojuaajaaja cana na jiyanooni paniyani. ¹⁷Naajuhuj, tariucuaacaanu Pueyaso sequesano Egipto jiyaniijiaaraari naa naajiotasano quiyajuhujaj:

“Faraónnaa*, janiyari quia jiyatequiaari Egipto pueya jiyaniijia quia quiniuriani, cua cumaacata cua miijosano cua niqitiniuria quiajaniya. Naacujitij, puetunu jiyacajinia quiniaa pueyapuejanaari niishiniutianiya, janiyari Pueyasojuna cutarani”.

¹⁸Naacujitij, paari niishiyani, Pueyasoori taraajeja teyanoocua na taraajenu paniyani. Naajaariuhuj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu panija naaracuajani.

¹⁹Naa cua sequesacari nijaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojiniijini?” ²⁰Majaari naa sequenu pueyanonaa. ¿Canteeri quiajaniyani, naa quia juaaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaani: “Juaashiquiaracanaa, ¿casaara quia panirii conatura janiyani?” ²¹Paniyojuacuajaari na naata paniniu

maraujiniji na panishano casaa, shanohua pataconiyojua, mashaca quiqiora manijinia cajitiriquiano conatunio.

²²Naajuhuj, čtaa pa sequenutaniyani, Pueyaso jaara niishitini paniya na juaaniu, na cumaacanio, na saniitosacari sesa miijiaca? Naajaa, Pueyasoori jiyanoohua rejeretaquiaa sesa miijiaca, cante tari saniitosocoriquiano quiyacuajani.

²³Pueyasoori naa tarishiyajaara na saniitionura na tojtiaashijia-ca pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriquianocujani. ²⁴Paacuajaari cuno jiyanooshano pueyani, canapue tari Pueyaso saquiriojoquiaaricujani Judiocuacajinijinio, taucuacajinijinio. ²⁵Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyaquiaarini, janiyari nojori sequenutaniyani: ‘Niaari cua quiqiohuanijojua’.

Naajuhuj, cante cua shuquiritiasoo pueya quiqiaarini, nojoriiri cua timitiasano pueyara quiniutianiya”.

²⁶Naa naajiotasanoori quiyajuhuj:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniquijia jiyaniquishaanuta-niya: ‘Niaari Pueyaso niqiohuajanaa cutara’”.

²⁷Saniniuujia, supuetana Isafasri naa sequequiaari Jacobo niqiohuacuajinijinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquico paajia jaaquia, serojosoo. Saniniuujia, saaja seaja nojorijinijinoori Pueyaso pueyara jatanishaanutaniya. ²⁸Pueyasoori mijiriara na sequesano tohuateenutaniya. Majaari na tarishini quiniutianiya”.

²⁹Supuetana Isafascuajaari naa sequequiaari tarijajuhuj:

“Pa Jiyaniijia Pueyaso jaara Israel pueya niqiohuanijojua jiyanoaquiquiaari, Israel pueya maara quiarijia quiyaquiri. Maara tari shaajasaacano tojetaarucujanaa, naatej, taa Sodoma* tiacajinia quiniacua pueya puecosaa-quiaaricuaani, Gomorra tiacajinia quiniacua pueyano”.

Judiocuacaari Pueyaso rupaacua tiuyashijia saaja

³⁰Naa cua pahuatasacari nijaniya tariucuaanu Pueyaso Rupaajinijitij, paari quiarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarijia, Pueyasoori nojori jiyatequiaa juhua sesa miyashijacara, saaja Jesucristoocua nojori tiuushacari. ³¹Israel pueyari saniniuujia jiyanoohua Moisés Rootasano tojijia juucua, nojori jiyanihacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. ³²čNiaate niishiya casaara Pueyaso jiyanoaquiquiaari nojorini? Pueyasoori nojori jiyanoaquiquiaari nojori tiuyaquiniucua nocua. Nojoriiri jiyaniquiaari tama nojorijiaarijia na naata tama nojori cuaqueyajaaja jiyatenu juhua sesa miyashijacara, Moisés Rootasano nojori tojishacari. Naaratej, majaari nojori tiuuni quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriniuria. ³³Jesucristojiniji miriqui Pueyaso sequesanoajaari naa naajiotasaaquiaari tariucuaanu, Jesucristo niyacarijia:

“Cua tojtiare. Janiyari Sion* tuhuananuucua nianutaniya saajiani, pueya tiuriniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

10 ¹Cuarta Pueyaso muerasunaa, janiyari jiyanoohua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniurijuhuj. Janiyari jiyanoohua nojoriicua tacayani. ²Janiyacuajaari seetanujanaa niishiyani, Israel pueyari

seetanujanaa Pueyaso panishano miiniu panijia juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³Nojoriiri saaja sequequiaa, majana Pueyaso naata pueya jiyanooni saaja nojori tiuushacari nocua. Naaratej, nojoriiri jiyanoohua saniniuujiquiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiuyaquiquiaa Pueyaso jiyanooniuria nojori. Pueyasojuaanaari Cristo jiyatequiaa pa niti mosocoriquiano. ⁴Naacuajitij, Cristo jaara mosaaquiaari, nojuajaari Moisés Rootasano tojinu tohuatequiaari cutara. Naacuajitij, Pueyasoori puetunu nocua tiuuniajanaa jiyatequiaa juhua sesa miyashijacara. ⁵Moiséscuajaari naajioquiaari taa na rootasano tojijia miiniutianiya, juhua sesa miyashijia nojori quiniuria. Nojuajaari naa naajioquiaari:

“Cante puetunu cua rootasanojuanaa tojijiani, nojuajaari pueyaracaanu rishijia jiyatesaanutaniya”.

⁶Saniniuujia, saaja Jesucristoocua pa tiuushacari, paari juhua sesa miyashijacara jiyatesaaquiaani, pueyaracaanu rishijia pa quiniuria. Naacuajitij, majaari naa nia niishiriojonu nioojiajinia nia taacanusacari: “čCante na naata jiyocuaanu tacanu Jesucristo na roshiniuria Pueyaso pueyara na jataniniuria pajaniyani?”

⁷Naajuhuj, majaari naa nia niishiriojonu: “čCante na naata macunucua quiqiojinia quianu, Jesucristo na tacaniniuria pocuani?” iPueyanaa, majaari quenaaja naa nia niishiriojonutej!

⁸Pueyaso Rupaacuajaari tari naa naajiotasaaquiaari pajaniyara: “Niaacuajaari cua rupaa jitiia. Niaari na niishiyajuhuj. Nioojiajinia quiyacuajaari”.

Cuno rupaa canaa na pahuataquiaa nijaniyani, cunocuajaari Jesucristoocua nia tiuuniuria. ⁹Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niquiara pahuatare: “Jesucristoori seetanujanaa Jiyaniijiajanaa cutara”, noojiajinia na niishishacarijuhuaj Pueyasoori Jesu samiitiani quiaariuhua macujiniji. ¹⁰Seetanujanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuj, pa rupaata pa pahuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹Tariucuaanu Neyanujiniji Pueyaso sequesanoori naa naajiotasano quiyajuhuj:

“Puetunu nocua tiuuniajanaari puetunu cua sequesanojuanaa cua muerasurano masenutaniya”.

¹²Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimajata na jiyanooni nocua tiuujia pueya. Nojuajaari jiyanoohua capora. Jiyaniijiajanaa cutaraari. ¹³Tariucuaanu Pueyaso Rupaajiniaari naa naajiotasano quiyajuhuj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’”.

¹⁴Jaara naa qiritij, čpueyatucua taa Jiyaniijia secojonuureni, nojori jaara nocua tiuyaquiyajaa? Naajuhuj, čpueyatucua taa nocua tiuurini, nojori jaara nojuajiniji pahuataquishoo quiyajaa? čNojoritiucua taa nojuajiniji niishijia quirini, tamasaca jaara quenaaja nojori pahuataaquiri? ¹⁵čPueyaso Rupaa pahuatanaatucua taa cuno pojoriicua quiaareni, nojori jaara jiyaramiquiyaquishaare? čPueyaso rupaa pahuatanaate jiyaramiquiyaquishaaquiaari? iMaja! Jiyaramiquishaaquiaaricua. Naaratej, naa naajiotasano quiyari tariucuaanu Pueyaso Rupaajinia:

“Jiyanoohua timitiasano pueya cutaraari, noo pojori canapue tamasacaacua quiajani, nojori na pahuatanura Pueyaso rupaa”.

¹⁶Naajaa, majaari puetunu pueyajanaa tojinu quiquiaa, Pueyaso Rupaa jaara nojori niquiara pahuatasaa. Naacuajitij, supuetana Isafasri naa sequequiaari na taraajenuta:

“Jiyaniijanaa, majaari pueya tojiniu paniniu canaa pohuatasano quiajanijini”.

¹⁷Naacuajitij pueyanaa, paa jaara Jesucristo rupaa pohuataaareni, paari pa numaata na tojiyani. Paa jaara pa tojishanocua tiuurini, Pueyasoori pa jiyatenutaniya na pueya pa quiniuria.

¹⁸Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiritij, ¿casaara puetunu Israel pueyajanaa Pueyaso pueyara jiyateyaquishaa-quiaariirini? ¿Cristo rupaateeri nojori niquiara pohuataaquishaaquiaari? Maja. Nojori niquiaraacuaari pohuataaquiaari. Naa naajiotasano quiyacuajaari tariucuaaanu Pueyaso Rupaajinia:

“Pueyaso Rupaacuajaari puetunu jiyacajinjajanaa pohuataaquiaari. Na rupaari tojishaaquiaari puetunu tiqiyocujanaa, jiya puequeetujinia”.

¹⁹Jaara naa pohuataaquiaaritiij, ¿Israel pueyateeri Pueyaso rupaa niishiyacuquiaari nojori tojishacari? Maja. Nojoriacuaari na niishiyacuquiaari. Nojoriiri saaja na ruuretajaca quiquiaari. Supuetana Moisésacuaari naa naajiotacuaari Pueyaso sequesano Israel pueyara, tariucua na tojiyashijaca nojori quishacari:

“Maninia cua miishacari tiqiyocua quijica taucua nia niti, janiyari nia juaatiutiyaniani. Niaari jiyanohua juaatiutiyaniani cua jiyanooahacari mosanucua taucua”.

²⁰Na nuhuaji, supuetana Isaíasri naa maatia sequequiaari Pueyaso niishitiosano nojuaja:

“Cucua jiaaataashijica taucua cutaraari cua riuriataquiaa, cua tojijica nojori quiniuria cutara. Naajuhua, janiyari cua pajeyashijica taucuaacua muetaquiaani”.

²¹Saniniujia, Isaíasri naa Pueyaso sequesano Israel pueyajini naajiotacuaari:

“Janiyari puetunu juucajanaa Israel pueyacuaji masequiaa juucuan, maninia cua miiniu panishacari nojori. Nojoriiri saaja cua shocotequiaa, cua tojiyashijica pueya nojori quishacari”.

Israel pueyajini cureenoori Pueyaso saquiriojosano

11 ¹Israel pueya jaara naa Pueyaso tojiyashijica quia, ¿Pueyasote seetanujanaa nojori tarinitianu, na tojiyashijica nojori quiniucua? ¡Maja pueyanaa! Janiyacuajaari Israel pueyanojaniuhua. Abrahamri cua supuetana. Janiyari na jinianu Jacobo niyanu Benjamíncuajinio supuenoni. ²Naacuajitij, janiyari niishiyani, Pueyasoori maja na cartenu quiquianu puetunu tariucuaaanu na saquiriojosano Israel pueyajanaa. ¿Niaateeri supuetana Elíasjini naajiotasano niishiyacuquia? Tariucuaaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniucua sesa:

³“¡Cua Jiyaniijanaa, cuarta Israel pueyari puetunu quia sequesano caminiujunaa pueyajanaa puecoorucuaa! ¡Saa janiyajaari cureyani! Naajuhua, nojoriiri puetunu juhuacutucujanaa niyarequetarucuaa, tee quia tojitajaca pueya catijiaquiaa na seya quiocuaracuajani. ¡Nojoriiri quiarijia cua pajenuyajuhua, na motunura janiya!”

⁴Pueyasoori naa Elías riucuaquiaari saaja:

“Janiyari siete mil pueya jiitiajaani. Nojoriiri cua tojitajaca. Nojoriiri maja na mojuquetaconu quiquiaa cuno sacuraatia shipinishano Baalcuara* cua niti, taa narta Israel pueya miiquiacaani”.

⁵Quiarijiaari naajuhua, Pueyasoori secaja na saquiriojosano Israel pueyajinijinio jiitiaa, jiyanootio na quiniucua. ⁶Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniucua.

Nojori jaara maninia miijiaca quiriquia, nojori maara paniaquiri na jiyanooshaanura.

⁷Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniujia, nojoriiri saaja maninia quiniuria saniniujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno nojori jiuujiaari saaja cumajiuujiaacara quiquiaari, tojetaarucua-janaa niishiyashijica nojori quiniuria. ⁸Tariucuaaanu Pueyaso Rupaajiniacuajaari naa naajiotasano quia:

“Pueyasoori nojori jiyatequiaari niishiyashijicara, maja nojori niishiniuria nojuaja. Naaratej, majaari nojori niishini quijia, nojori niquishacari Pueyaso miishano. Majaari nojori niishini quijiajuhuaj, nojori tojishacari na rupaa. Israel pueyari naa Pueyaso tojiyashijica quiyajaa quiarijiani”.

⁹Supuetana David sequesano nojoriijini naa naajiotasano quiyajuhua:

“Pueyasonaa, Israel pueyari puetunu nojori panishanojanaa jiitiaa, maninia quia miishacari nojori. Saniniujia, nojori tojiyacajiniucua quiajaniani, nojori shuquiritiasano casaa cuara quiri juhua norijia tama nojoriacuaaja, nojori saniitiosaanura. ¹⁰Nojori jiuujia cuara jataara juhua cariyojuarurirria, maja nojori niishiniuria seetanu Pueyaso rupajanaa. Nojori cuara porequetacoora socua, pueyaracaanu taraatia nojori miishacari”.

Pueyaso jiyanooshacari taucua, Israel pueya niti

¹¹¿Niaateeri jiyaniya Pueyasoori Israel pueya cartequiaarijiana, tojiyashijica nojori quiniucua? Maja. Pueyaso tojiyashijica nojori quiniucua, taucuaari saniniujia Pueyaso muerasura quiquiaa, nojori tiuushacari Jesucristocua. Cunoori Israel pueya jiaatiani quia taucuaacua, Pueyaso muerasu nojori quiniurijuhua. ¹²Quiarijia, puetunu jiyacajinjajanaa taucuaari shuquiriaatia quia, Pueyaso muerasu nojori quishacari Israel pueya tiuyacuquiaa Jesucristocua. Saniniujia, Israel pueya jaara Pueyaso muerasura quiriocua Jesucristocua nojori tiuushacari, jiyacaritij, socua jiyanohua maninia quiniutiyaniani puetunu pueyapuerajanaa, puetunu jiyacajinjajanaa.

¹³Taucuacajinijinio cuarta Pueyaso muerasuna, cua tojiri. Nia sequenu panianijia. Janiyari seetanujanaa jiyaramiquishaaquiaari Jesucristo rupaa cua pohuatanura taucua niquiarani. Naaratej, janiyari puetunu cua cumaacatajanaa pohuataquiaa Jesucristojini taucua niquiarani, nojori quiniuria Pueyaso muerasujuhua. ¹⁴Janiyari seetanujanaa naa miiquiaca cuarta Israel pueya jiaatiana niaacua, nojori tiuuniuria Jesucristocua juhuaj, nojori quiniuria Pueyaso jiyatenura na pueyara. ¹⁵Pueyasoori juhua taanuquiaari Israel pueya nocuaji, nojori tiuyacuquiaari Nyanuucua. Naajaa, naacuajiti Pueyasoori puetunu mijiria quiniuria pueyapuejanaa jiyanoocua, na muerasu nojori quiniuria. Saniniujia, Israel pueya jaara jiyanooshaanura, jiyacaritij, jiyanohua maninia quiniutiyaniani puetunu pueyapuerajanaa. Israel pueya tiuushacari Jesucristocua, nojoriiri juhua macujinijini samitiiconutaniuhua. ¹⁶Seetanujanaa maninia nia niishiniuria nio miriqui cua pohuatasano, maatia nia pohuatareeraj. Nia tojiri. Coteenujanaa pa jiuuicotasano neecaruu jaara maninia quiri Pueyasora pa niquitosocoriquiano, tariquiaari puetunujanaa maninijuhua Pueyasora. Naajuhua, naana nujuaca jaara maninia quiri puetunujanaa, na cashacuaari maniniquiquiaajuhua. Nio miriqui cua pohuatasano nia niishitiya cutara Israel pueyajinijini. Naacuajitij, Pueyaso jaara Abraham jiyanoocuaari-cua nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutiyanijuhua, nojori jaara tiuuriquia Jesucristocua.

¹⁷Supuetana Abrahamri juhua Pueyaso panishano olivo naana nujuaca. Saniniuujia, na jinianuucujinino supueno Israel pueyari juhua na cashacucua. Cuno na cashacucujinijinio jaara Jesucristoocua tiyuquiquiaari, Pueyasoori na piyotaquiaari. Niajaniya saniniuujia taucucanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jyaniniu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Naa nujuaca cutaraari nia rishitiya.

¹⁹Naa naasucuaari sequeya: "Taaquiriirinij. Cuno olivo cashacucuaajaari canaacuaji piyotasaaquiaari, saniniuujia canaa rupotasaanura nocua nojori niti". ²⁰Taaquiriirinij, seetanujuanaacuaquiniateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaaquiaari, nojori tiyuquiniucua Jesucristoocua. Naaari saniniuujia cuno naanaacua rupotasano quiya, saaja Jesucristoocua nia tiuuniucua. Naacuajitij, maja tama nia cuaqueyajaaja nia shuquiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucucanaa, niaa mariqui piyotasaarohuari, niaa jaara Pueyaso tojiyashijiacara quiriohua. ²¹Pueyaso jaara jyanoyaquiquiaari na saquiriojosano pueyacuaa, nojori tiyuquiniucua nocua, cmaatucua casaara jyanoori niajaniyanijia? Naaacuajaari taucucua. Naaacuajaari maja na saquiriojosano Israel pueyacujinino. ²²Naacuajiti pueyanaa, nia niishiri. Pueyasoori jyanohua maninia. Naajuhuj, nojuajaari saniitionu niishijia cutara. Naaratej, nojuajaari na tojitiaashijiacara Israel pueya jyanoyaquiquiaari. Saniniuujia, nojuajaari jyanohua maninia miiquiaa niajaniya na jyanoooshano pueya nia quishacari, niaa jaara pueyaracaanu nocua tiuujiaca quiriquia. Naaajaniya taucucanaa, niaa jaara nocua tiuyashijiacara quiriohua, niaari nocuaji rupotasaanutaniuhua. ²³Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracacuja na rupotanuuhua na panishano naanaacua. ²⁴Niajaniya taucucanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacujanaa. Naaratej, majaari jiyajeneta Pueyasora, na piyotasano olivo cashacucua na rupotanuuhua tama neyonaacujajaaja, nojori jaara Jesucristoocua tiuujiacara quiriohua.

Pueyaso jatanishacari puetunu Israel pueyajanaa na pueyara

²⁵Taucucujinijinio cuarta Pueyaso pueyanaa, tariucuaaanu pueyari niishiyajijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jyaniniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiacara quiya. Nojoriiri naa quiniutianiya, puetunu Pueyaso saquiriojosano taucucujinijinio pueyajanaa cuara Jesucristoocua tuurijiaatijia. ²⁶Jiyacaritij, puetunu Israel pueyajanaari jiyatesaanutianiya Pueyaso pueyarajuhuj, taa tariucuaaanu Pueyaso Rupaajinia naajiotasaaquiaaricujani. Naa sequeyari:

"Si6n* tiacajinia supenutaniyari pueyacujia Tacuriquiano. Nojuajaari puetunu sesa casaajanaa jaariutianutianiya

Jacobo niquihuacujinino supueno pueya jiuujajiniji.

²⁷Naa cua jyanoooshacari puetunu sesa nojori miishanojuanaatej, janiyari jiyacari tohuateenutianiya tariucuaaanu cua sequesano nojori supuetanaani".

²⁸Quiarijia Israel pueya tiyuquishacari Jesucristo rupaacua saniniuujia, nojoriiri juhua Pueyaso paraa, Pueyaso jyanooniuria niajaniya saniniuujia, taucucanaa. Naajaa, Pueyasoori cuno Israel pueya paniyajaa, nojori supuetanaa quiniucua na saquiriojosano pueya. ²⁹Pueyasoori maja na jaariutianu quijia na niqutiosano. Na saquiriojosano pueya jyanoojiaari. Majaari nojori na ruuretano. Pueyasocujiaari Israel pueya saquiriojoquiaari na pueya nojori quiniuria, maninia na miiniuria nojori. ³⁰Maniniushiquiari, niajaniya taucucanaa, niaari Pueyaso tojiyashijiacara quijia. Israel pueya tojiyquiniucua Pueyaso quiarijia saniniuujia, Pueyasoori niaacua taraajequiaa. ³¹Nojoriiri Pueyaso tojiyashijiacara quiya quiarijia, Pueyaso taraajenura nojoriicua taa na taraajeya niaacuacuaani. ³²Naacuajitij, Pueyasora, puetunu pueyajanaari na tojiyashijiacara quiya, Israel pueya, taucucanio. Naacuajitij, Pueyasoori na naata jyanooniu nojorijuhuj, nojori tiuushacari Jesucristoocua. Pueyasoori maja rimijata na jyanooniu.

³³iPa Pueyasoori jyanohua niishijia, maninia na miiniuria! iNojuajaari puetunu niishijajanaa cutara! iCante niishiquiaari ni casaa Pueyaso miiniutianiya? Na miishanoori jyanohua jiyajeneta. iCante na naata na niishiniuni? Shaaqui. ³⁴Naaratej, seetanujuanaari nio tariucuaaanu sequesano:

"iCante na naata Pueyaso niishiriojosano niishiniuni? iTamonuteeri na naata Pueyaso rootanu, maninia na miiniuria? iMaja! ³⁵iPueyasoteeri na panishano jiitiaaquiquiaari tamonu niqutionura nojuaja na panishano, na nuhuaji na niqutionuhua? iMaja!".

³⁶Seetanujuanaa puetunu casaajanaacujiaari Pueyaso shipinishano. Na amaruuri na rishitiquiaa na cumaacata. Puetunu cunojuanaari nerano. iPueyaracaanu pa shuquiritiare pa Que Pueyaso! iNojuajaari jyanohua maninia! iCuaara naa quiiriatej!

Saaja Pueyasora pa quirij

12 ¹Cuarta Pueyaso niquihuanaa, jyanohua maninia Pueyaso jyanoooshacari pajaniya, tama nia cuaqueyajaaja nia jyatere tojetaarucujanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojiijia nia quishacari. ²Majaari socua nia quiniuri taa Pueyaso tojiyashijiacara quiquiaacuaani. Saniya Pueyaso Sohanu tojiijia nia quiri cutara, seetanujuanaa quiariniura jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Naa niishitijia jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jyanohua maninia.

³Jyanoojia Pueyaso quiniucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajaniyajanaa cua tojitiare quiarijia. Naa jaara Pueyaso cumaaca masequiaari nocua nia tiuushacari, nojuajaari puetunu niajaniyajanaa jiyatequiaari tamaatia poonijosano miiijia nia quiniuria. Naaratej, majaari tama nia cuaqueyajaaja nia jyatenu paniniu socua maninia quijia nia quiniuria tamasaajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuracujani. ⁴Pa cuaqueyajiniacuma, paari queraatia tamaatia casaa jiitiaani. Puetunu cunojuanaari tamaatia miiniuri niishijia, maninia pa quiniuria. ⁵Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupetootesano pa quishacari, maninia pa miitioonura.

⁶Naatej, taa pa cuaqueyajiniacuma casaa tamaatia poonijiosano miiniu niishiyacuaani, naajuhuj, Pueyasoori puetunu na muerasujuanaa na cumaaca niqutioquiaa, tamaatia miiniu niishijiaa pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niquiara pohuataara na taacanuyaquniutia. ⁷Naajuhuj, cante Pueyaso cumaaca jiitiaa pueya na naacunurani, nojuaja cuaara maninia naacuura pueya. Naajuhuj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. ⁸Cante Pueyaso cumaaca jiitiaa pueya na shiniujiuniuriani, nojuaja cuaara pueya shiniujiuura, maja pueya cartenura Pueyaso rupaa. Cante na jiitiasanojiniji nareja niqutiojojua casamiiuniucua pueyani, nojuaja cuaara juhuajaniya niqutiojora nareja, nojori na paniniutia. Naajuhuj, cante Pueyaso pueya jiitianani, nojuaja cuaara jiitiaara Pueyaso pueya nojoriicua na tacaaniutia. Cante taraatia miishano pueya naacujani, nojuaja cuaara shuquiriaatia na naacuuranoj.

Pueyaso tojjiaa nia quiri, taa Pablo rootaacujani

⁹Seetanujuanaa panitiojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰Jiyanoehua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya nijaniyajiniji. Majaari nojori nia rerequetenu.

¹¹Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

¹²Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoehua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secujonu.

¹³Niarta Pueyaso pueya jaara na panishano jiitiaaquiri, nareja nia niqutiojore nojori nia jiitiasanojiniji. Naacuajitij, nojori jaara rucoona quiri, nojori nia masuure nia tiacora.

¹⁴Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicua, Pueyaso taraajenura nojoriicua.

¹⁵Cante shuquiriaatia quiyacuaani, nojoritia nia shuquiririjuhuj. Saniniuujia, cante nujuqueyacuaani, nojoritia nia nujuquerejuhuaj.

¹⁶Jiyanoootiojuaca nia quiriquia, jatiqiri nia quiniuria maninia. Majaari tama nia cuaqueyajaaja nia jiyatenu juhua socua maninia quijiaa pueya tamasaajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupuenura paniyaquishoo pueyajuhuj. Majaari tama nia cuaqueyajaaja nia jiyatenu juhua socua niishijiaa pueya nia quiniuria tamasaajiniji.

¹⁷Niaa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaara quiri maninia puetunu pueya niquiarajanaa. ¹⁸Maninia nia quiri puetunu pueyatajanaa, majaari nojori ruutaquenu niaacuara. ¹⁹Socua cua tojjiare cua panishano cuarta Pueyaso pueyanaa. Niaa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocujajani niaacua naminiutianiya nojori. Pueyaso sequesanojuacajani naa naajiotasano quiya na rupaaajinija:

“Quiria nia tarinitiare puetunu sesa nojori miishanojuanaa nijaniyani. Janiyacuajani nojori naminiutianiya niaacuani”.

Cua tojiri. Pueyasojuaacujajani naa sequequiaari. ²⁰Naaratej pueyanaa, majaari nia paraca nia naminiu. Saaja maninia nia miiri nojori taa tariucuaacuanu Pueyaso Rupaaajinia naajiotasaaquiaricujani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuj, quia raatorenoj. Quiaa jaara naa na

miiritij, tama nojuajaarijia jiyanoehua caririquiniutianiya noojiaajinia”.

²¹Naacuajitij, niaa jaara sesa miishaariquia, majaari nia juaaniu, niaa mariqui sesa miijara quiriiaariuhuj. Saaja maninia nia miiriquia nia paraca. Naacuajitij, niaari Sesaaac shocotanutianiya.

Pa jiya jiyaniijianucua tojjiaa pa quiri

13 ¹Pueyanaa, mijiria nia jiyaniijianucua tojjitajaca nia quiri. Nojoricuajajani Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. ²Naacuajitij, cante mijiria jiyaniijianucua tojjiyashijiani, nojuajaari jiyaniijara Pueyaso jiyatesano tojjiyashijia. Cante naa mijiria jiyaniijianucua tojjiyashijiani, nojuajaari saniitiosaanutianiya. ³Paa jaara maninia miijiaa quirini, çpaatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiaa. Sesa miijiaa cuaara na puereera cutara, sesa miijiaa nojori quiniucua. Saaja maninia miijiaa nia quiri. Naacuajitij, nia jiyaniijianucuaari maninia poojotanutianiya nijaniyajiniji. ⁴Nojoricuajajani Pueyasora poonijionaa, maninia nojori jiitianura nijaniyani. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuajajani jiyaniijianucua cumaacaraca, sesa miijiaa nojori saniitionura. ⁵Naacuajitij, nia jiyaniijianucua tojjiaa nia quiri maja nia saniitiosaanura, naajuhuj, maja Pueyaso tojjiyashijia nia quiniuria. ⁶Naajuhuj, nia cumaneecajiniji nia niqutiojore nia jiyaniijianucua, taa nojori sequequiaa nia niqutionuracuajani. Nojoricuajajani Pueyasora poonijioquiaa pueyaracaanu, maninia nojori jiitianura nijaniyani. Naaratej, nojoriiri cumaneeca masequiaa nijaniyajiniji.

⁷Naaratej, puetunu nojorijianaa nia niqutiojore, taa nojori sequequiaa nia niqutionuracuajani. Naacuajitij, niaa jaara sequesaaare nia cumaneecajiniji nia niqutionura nia jiya jiyaniijara, nareja nia niqutiojore. Naajuhuj, cumaneeca jaara jiya jiyaniijara masenu cojiritiasaaare, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuj, nia jiyaniijianucua tojjiaa nia quiri, nojori quiniucua Pueyaso jiyatesano nia jiyaniijianucua.

⁸Pueyanaa, majaari najuhuaa casami nia poonu, niaa jaara cumaneecajajajani quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijiaa nia quiri cutara. Naacuajitij, cante narta pueya panijiani, nojuajaari Moisés Rootasano tojjia cutara.

⁹Supuetana Moiséscuajajani naa naajiotajajani puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasa jiiitiasano casamiicua jiaatiaja nia quiniu”.

Socua queraatia na rootasanoiri quiya. Niocuajajani socua pa tojjishocoriqiano na rootasano:

“Quarta pueyano panijia quia quiri, taa quia paniya tama quia cuaqueyacuaani”.

Paa jaara saaja nio Moisés rootasano tojjia quirini, paari tari puetunu na rootasanojuanaa tojjia quiyani. ¹⁰Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriqiani, paari puetunu Moisés Rootasano tojjia cutarani.

¹¹Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuaara niucuaara, pa Jiyaniijara na poonijionura. ¹²Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa

Jiyaniijaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujananaa pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquicuaji na poonijionuracuaani, naa nia cushiri Pueyaso cumaacajuhua. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurijuhua. ¹³Seetanujanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaaari cuhuashiqui quijiaca. Naaratej, majaari mashaasequenuujaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuraatia casaa miiniucua nia jitiiniu. Majaari juayonuujutajaca nia quiniujuhua. Naajuhua, majaari tamonu pueyano jitiiasano casaacua nia jiaatianu. Naajuhua, majaari nia juaaniu tamonu jaara nia shocotare. ¹⁴Naacuajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuraatia nia miiniuracuaani. Saniniujia, maninia cutaraari Jiyaniija Jesucristo niishitaja nia jitianura, na cumaacano. Naa nia miishacaritij, niaari juhua soldadohua miaquetojojota toque cushiyojua, maja Sesaaca miitiniuria sesa nijaniya.

Maja quarta Pueyaso pueyacuara nia rimiaaquenu sacuraatia

14 ¹Pueyaso pueyajiniinio pueyano jaara Pueyaso rootasanojiniji taacanuuja quiri quia pueyaracaanu, naajaa, na rupuejaca nia quiri. Majaari nata nia juayonuujutatanu tamaatia na niishiriojosacari Pueyaso rootasanojiniji. ²Naacuajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniujia, cante Pueyaso rootasanojiniji taacanuujuani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³Cante puetunu casaajanaa miaqueja cutarani, nojuaja cuaara soyaquiri narta Pueyaso pueyano, cante na miaquesano miaqueyashijia saniniunijia. Naajuhua, cante puetunu casaajanaa miaqueyashijiani, nojuaja cuaara sesacaquiri puetunu casaa miaquejajanaa. Cuno nojori, shu miaquejaca cutarani, nojoricuajaaari Pueyaso jiyatesano na muerasu nojori quiniurijuhua. ⁴¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaaari nojori sequenutaniya, nojori miishanote maninia, sesa soj. Naajuhua, pa Jiyaniija Jesucristocuaajaaari cumaacaraca, na muerasu na jiyatenura maninia quijiaca nojori quiniuria.

⁵Cua tojiri pueyanaa, noojiaqueya Pueyaso muerasujiniinioori niquiriyatu juuca semaanajiniiji jiyatequiaa nojori maniniuhuaqueetanura Pueyaso. Tamasacaari saniniujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuaara taacanuyaquiri tama nia miishanojinijiaaja, maja nia macuhajetenura noojia. ⁶Cante niquiriyatu juuca semaanajinia jiyatequiaa samaatenu juucara Pueyaso na maniniuhuaqueetanurani, maniniacuajaaari. Nojuajaari naa miiquiaa Pueyaso na shuquiritiniuria. Naajuhua, cante puetunu casaa miaquejajanaa, maniniacuajaaari. Pueyaso na shuquiritiniuria, nojuajaari na miaquequiaa nocuara na secojonu nuhujaji. Naajuhua, cante shu miaqueyajiia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhua na secojosacari Pueyaso, na natau na miaquenura.

⁷Seetanujanaa pueyanaa, majaari pa quiniu tama pajaniyarajaaja. Naajuhua, majaari quenaaja pa shaajenu tama pajaniyarajaaja. ⁸Paa jaara mijiria quiyani, paari pa Jiyaniija rishiquiaani. Paa jaara cusoyareni, paari pa Jiyaniija cusoqueeni. Naaratej, paa jaara saminio quiyajaaani, naajuhua, paa jaara tariucua macu quiyani, paari pa Jiyaniija jitiiasanoni. ⁹Jesucristocuaajaaari cunora cusoquiaari, macunucua

Jiyaniija na quiniuria. Nojuajaari samiitiaquiaariuhua saminiucua Jiyaniija na quiniurijuhua. Naacuajitij, nojuajaari pa Jiyaniijajanaa cutara.

¹⁰Naaratej, saaja niquiriyatu Jiyaniija pa jitiiasacari, ¿paatucua casaara parta Pueyaso muerasu sojeaca quirini, nojori miaqueyaquiniucua shuni? Naajuhua, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaa? Nia niishiri pueyanaa. Puetunu pajaniyajanaari nujatejosaanutaniya Pueyaso tacobini, Pueyaso nequesoreenura pajaniya. ¹¹Tariucuacaanu pa Jiyaniija sequesanoori naa naajiotasano quiya na rupaajinia:

“Seetanujanaa sequeyanijia, puetunu pueyajanaari cucuara mojuetaconutaniya, nojori niishishacari janiyari seetanujanaa Jiyaniijajanaa cutarani. Puetunu nojorijianaari sequenutaniya: ‘iJiyaniijanaa, quiaari Pueyasojuanaa cutara! Puetunu quia miishanojuanaari maninia’”.

¹²Naacuajitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijia quiri parta Pueyaso pueyajiniiji saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiyaniishano sesa casaa. Nojori jaara saniri miiniu nia miishanocuaa, naacuajitij, niaari tari sesa miitiri nojori Pueyaso niquiara. ¹⁴Janiyacuaajaaari niishiyani, majaari quenaaja tamonu sumatuu quiniu pa miaquesacari sesa miijacara na jiyatenura pajaniya Pueyaso niquiara. Janiyari naa niishiyani cua Jiyaniija Jesu rupaacua tiujia cua quiniucua. Saniniujia, cante jiyaniyanijia tamonu sumatuu na naata na jiyatenu sesa miijara nojuaja jaara na miaquere, nojuaja cuaara miaqueyajiirianoj. Jaara na pueresano saniri miaquenu, nojuajaari tama noojiaaja macuhajanutaniya. ¹⁵Naacuajitij, paa jaara parta Pueyaso pueyano macuhajetere pa miaquenuucua na miaqueyaquishoo casaani, majaari seetanujanaa parta Pueyaso pueyano panijia pa quiniu. Jesucristocuaajaaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niqiarani? ¹⁶Naacuajitij, majaari nia shanacunu Pueyaso tojiyashijia pueya sesacanura Pueyaso rupaa, nia miaquesano casaacua nia juayonuujutatanuucua niarta Pueyaso pueyata. ¹⁷Seetanujanaa nia sequeyanijia, majaari Pueyaso muerasu pa quiniu casaa pa miaqueyaquiniucua, casaa pa ratuyaquiniucuanio. Pueyaso muerasu pa quishacari, nojuaja cutaraari paniya maninia miijia pa quiniuria, jatiqiu pa quiniuria juhuajaniya. Pa panitiajaariuhua shuquiriaatia quijiaca pa quiniuria. Paacuajaaari na Sohuanu jitiiaani, naa maninia pa quiniuria. ¹⁸Paa jaara naa quijiaca quiri quiani Cristora pa poonijiosacari, Pueyasoari pa shuquiritiaa. Naacuajitij, Pueyaso tojiyashijia pueyari maja na rerequetenu quiniutianiya pajaniya.

¹⁹Naarate cuarta Pueyaso pueyanaa, jiyanhua nia saniniujiuri taate nia naata maninia ruputoosano quiniu puetunu niarta Pueyaso pueyatajanaa. Naacuajiti nia naata tama cumaquitioonuujaja maninia Pueyaso muerasu nia quiniuria. ²⁰Majaari nia sesonu Pueyaso miishano niarta Pueyaso pueya jiuujajinia, saaja nia miaquenuucua nojori niquiara nojori pueresano casaa. Seetanujanaa, Pueyasora, puetunu miaquesano casaajanaari maninia pa miaquesocoriquiano. Saniniujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, nia mariqui nojori cushitioreeri. Naacuajitij, majaari nia naata maninia ruputoosano quiniu nia jaara nia miishanota tarajoriquia

niarta Pueyaso pueya. ²¹Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuaaj, majaari pa ratunu jereeca mashaca nojori niquiara, cuno naa pa miishano jaara quiri nojori shiniujuniuria sesa nojori miiniuria. Naajuhuaaj, pa cartere puetunu parta Pueyaso pueya jyanishano sesa miiniu casaajanaa, maja nojori pa taraajonura nojori ruparetanura pocuaji. ²²Naacuajitij, Pueyaso Rupaacua nia tiuushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhajetenura na miiniu nuhuaji. ²³Saniniuuja, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyaari taa na niishiriojiyacuaajani. Paa jaara casaa miaquere seetanujuanaa pa tiyacuquiniutia Pueyasocuaani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanunuta na miiriquiani. Naaratej poojiaari macuhajenutaniya.

Parta Pueyaso pueya pa shuqiritiri, maja tama pa cuaqueyajaaja

15 ¹Noojiaqueya parta Pueyaso muerasuuri juhuanouaja seetanujuanaa Pueyaso Rupaacua tiyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojjijiacuaani, pajaniya cuara nojori rejeretaara juhuajaniya. Paa jaara socua Pueyaso Rupaa niishijiacuaani, nojori pa cumaquiri. Majaari pa niishiriojonu tama pa cuaqueyajaaja pa shuqiritiniuria tamajaaja. ²Puetunu pajaniyajanaa cuara niishiriojooora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojjia na quiniuriajuhuaj. ³Paacuajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuqiritiniuria. Saniniuuja, nojuaja cutaraari taraatia miiniu rejeretaquiaari na rupenura mijiria quiniaa pueya, nojori na jaariutianura Sesaaca. Naacuajitij, nojuajaari nio tariucuaaanu tama nojuajiniijiaaja naajiotasano tohuateequiaari:

“Cua Quena, cuno pojori, canapue te quia sesacajacani, nojoriiri cua sesacajuhuaaj, cua miiniuucua quia panishano”.

⁴Seetanujuanaari pueyanaa, puetunu tariucuaaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanjiaajaarihuaj. Naacuajitij, paari juhuajaniya sashiya pa Jiyaniijiani.

⁵Pueyasocuaajaari pa cumaquina, maninia rejeretajaca pa quiniuria, cumanjiasano pa quiniuriajuhuaj. Nojuaja cuara nia jiyateera jyanoojiaca nia quiniuria taa Cristo quiquiaari jyanoojiacuaani, rupuetoojuaca nia quiniuria niarta Pueyaso pueyata. ⁶Naacuajitij nia naata pa Que Pueyaso, mariyata pa Jiyaniijia Jesucristo maniniuhuaqueetanu, juhua niqiriyaatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷Pueyanaa, jyanootiojuaca nia quiri quia, taa Jesucristo jyanooquiaa pajaniyacuaani, maninia rupuetosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucacata Pueyaso maniniuhuaqueetaano jatiqiu. ⁸Janiyari seetanujuanaa nia sequeyani, Cristoori mijiria niquiara Judiocuacaacua, na tohuateenura Pueyaso sequesano nojori supuetanaa. Tariucuaaanu Pueyaso sequesanoori seetanujuanaa. Nojuajaari maja na sequesano na jatanu. ⁹Judiocuacara Cristo miishanoori taucacara quiquiaarijuhuaj, nojori maniniuhuaqueetanura Pueyaso, na jyanooniuucua nojori juhuaj. Tariucuaaanu Pueyaso Rupaajinia supuetana David naajiotasanoori naa quiyajuhuaaj:

“Maninia quia miiniuucua janiya Pueyasonaa, janiyari quijaniyajini poojotanutaniya maniniani taucacata jiyacajinia. Maninia quia miiniuucua janiya, janiyari quia timitianutaniya cua jaaquequejosanotani”.

¹⁰Tamaqui Pueyaso Rupaajinia naa naajiotasanoori quiyajuhuaaj:

“Pueyaso niishiyashijiaca taucacanaa, Pueyaso saquiriojosano pueya nia cojiri, mariyata jatiqiu nia shuqiritianura pa Pueyaso”.

¹¹Pueyaso Rupaajinia, supuetana David naajiotasanoori naa sequeyajuhuaaj:

“Pa Jiyaniijia Pueyaso nia maniniuhuaqueetare, puetunu nijaniyajanaa, tamaatia rupaaca pocuajaca taucacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

¹²Supuetana Isafas naajiotasanojinijijuhuaaj, paari niishiyani Pueyasoori taucacata jitiianu panijia pueyaracaanu, maja saaja Judiocuaca. Naaratej, Isafasri naa naajiotasanoori:

“Supuetana Isaf nyanujini supenutaniyari pueya Jiitiana. Nojuajaari puetunu mijiria quiniaajanaa jiyaniijia quiri quiano. Puetunu jiyacajini quia taucacajanaari nocua tiuujiaca quiniutianiya”.

¹³Pueyasocuaajaari poojajinia poonijiojua, juhuajaniya pa sashiniuria pueyaracaanu, nojuaja cuara miirijiaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jyanohua. Naajuhuaaj, nojuaja cuara nia jitiiaara juhuajaniya, canapue te nocua tiuujiacacuaajani. Naacuajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari nijaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

¹⁴Cua panishano Pueyaso niquihuanaa, naa cua naajiojina cua nacasacari jyanohua nijaniyatej, majaari nia jyaniniu janiyari niaacuaji taacanuyajaani. Maja. Janiyacuajaari niaacu tiyani niaacuajaari seetanujuanaa maninia quijiaa.

Niaacuajaari Pueyaso rupaa niishijiacajuhuaaj. Naacuajitij, nia naata tama nacasutojonuuaaja maninia, maninia rupuetoojuaca nia quiniuria Pueyaso niquiara. ¹⁵Naajaa, quarijia janiyari niaacuara naajiyani cua niishitiniuhuaa nijaniya tarijia nia niishishano. Cua jyanootiuri, nio cua naajiojina jyanohua cua nacasunuucua nijaniya. Naa nia rootanijia Pueyaso jiyatenuucua janiya Neyanu Jesucristo jiyaramiquishano, taucacata cua pohuatanura na rupaa. ¹⁶Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucacani. Naacuajitij, Pueyaso Sohuanu poonijionuucua nojori jiuujiajina, nojoriiri Pueyaso shuqiritiasano muerasu quiniutianiya juhuaj.

¹⁷Pueyasora cua poonijosacari, janiyari jyanohua timitiaa Jesucristoni, cua niquishacari taa taucacata tiuuquiaa na rupaacuaani. ¹⁸Majaari cua timitianu tama cua miishanojuaja. Janiya cutaraari Jesucristo miishano timitiaani. Nojuacuajaari taucacata tiuuti quiaa na rupaacua. Nojoriiri nocua tiuuquiaa nojori niquiara cua pohuatasacari na rupaa, naajuhuaaj, Pueyaso Sohuanu cumaacata cua miiniuucua nojori niquiara. ¹⁹Nojori niquishacari Pueyaso Sohuanu cumaacata cua mijiosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojini tari pohuataquiaari puetunu tiquiyocuaajanaani, Jerusalén tiacajiniji, puetunu Iliria jiyajinarajanaano. ²⁰Naa cua pohuatasacari pa Jiyano Jesucristojini puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojini tojiyaquishaaquiaari juhuanouajacuaajani. Majaari cua pohuatanu paniniu quiquiaari tee tamasa pohuataquiaari tari Jesucristojinijini. ²¹Naa cua pohuatasacari Jesucristojini cuno pueya niquiaratej, janiyari nio tariucuaaanu Pueyaso Rupaajinia naajiotasano tohuateeriquiaani. Naa sequeya Jesucristojini:

“Nojuajiniji pahuatasoojua pueyari nojuajiniji pahuatasaa-
nutaniya. Nojoriiri jiyacari niishiniutianiya cante
nojuajani”.

Pablo naquerejosacari Roma tiacajiniara

²²Pueyaracaanu nio jiyacajinia cua pahuatasacari
Jesucristojiniji, majaari jeya cua quiniu quiriquiaa nia
niquiniuucua cua quianura. ²³Quiaritia cutara, janiyari
Jesucristojiniji pahuatanu tucuarucuaa tarini, tee Jesucristo
rupaa tojiyaquishaaquiaari juhuanojuajacuajani. Janiyari
Espania jiyajinia pahuatanu paniya Jesucristojinijijuhua.
Queraatia marijaari tari cua shocojocanu pueyaracaanu cua
naquerejosacari niaacua cua quianura. ²⁴Naacuajitij, Espania
jiyajiniara cua quiasacari, janiyacua nia tiacajinia jateemani.
Janiya jaara pasaja camueenujusee niaata shuquiriaatiani, na
nuhuaji, janiyari paniniutianiyanani nia naacunura janiya, cua
quianura Espania jiyajiniara. ²⁵Janiyari coteenu Jerusalén
tiacajinia tacatenutaniuhua tii quiniaa parta Pueyaso muerasu
cua niqutionuhuaa cumaneecani, niya quiniaa parta Pueyaso
pueya niqutionosano nojoriria. ²⁶Puetunu parta Pueyaso pueya
maapuejanaa Macedonia jiyajinia, mariyata niya Acaya
jiyajiniani, nojoriiri jiyanoehua maninia miya. Nojoriiri tama
niishiriojonuucanujuaaja nareja na cumaneeca niqutiononura
Jerusalén tiacajinia quiniaa casamijuniucua Pueyaso pueyara.
Cunora, nojoriiri quiaritia na rerateya cuata na jiyarosocori-
quiano. ²⁷Nojoriiri naa miya nojori niishiriojosacari,
maniniacuajaari nojori naacunura narta Pueyaso pueya.
Seetanujuaana maniniacuajaari nojori miishano. Judiocuacaari
maja na jamuenu quiquiaari Pueyaso rupaa pahuatasaanura
taucuaca niqiuara. Naaratej, taucuaca cuara saniniuuja
quiarijia naacuura casamijuniucua Judiocuaca, nojori
jiitiasano cumaneecata. ²⁸Naacuajitij pueyanaa, janiyari nojori
jiyarosocoriquiano cumaneeca niqutionutaniya Jerusalén
tiacajinia parta Pueyaso pueya jiitianaani. Na nuhuaji, janiyari
Espania jiyajiniara quianutaniya cutarani. Cua quiasacari,
janiyari nia tiacajinia tacanutaniyanani cua niquniuria nijaniya.
²⁹Janiyari seetanujuaana niishiyani, Cristoori cua naacunutani-
ya maninia pa shuquiriniuria jatiqii, niaacua cua tiuquishacari.
³⁰Cuarta Pueyaso pueyanaa, cua Jiyaniijia Jesucristo nia
jiitianuucujuhua, mariyata Pueyaso Sohanu panitiootesacari
pajaniya, janiyari jiyanoehua paniyanani nia cojiniuria janiya,
Pueyaso nia secojonuta cucuara. ³¹Cucuara nia secojore
Pueyaso, na cojanura janiya Jesucristo rupaa paraa
Judiocuacaacuaji, Jerusalén tiacajinia cua quiasacari.
Naajuhua, nia secojore Pueyaso, Jerusalén tiacajinia quiniaa
Pueyaso pueyacuara. Nojoriicuara nia secojore, nojori masenura
shuquiriaatia narta Pueyaso pueya taucuaca jiyarosocoriquiano
cumaneeca nojoriria. ³²Naajuhua, quiria nia secojore, niaacua
Pueyaso tiuquitiniuria shuquiriaatia janiya, nojuaja jaara naa
paniri. Tii cua quishacari niaata, janiyacua tii samaatesee nia
shuriucuanani. ³³Pa jiyanoojia Pueyaso cuara maninia jiitiaara
puetunu nijaniyajanaa. Cuara naa quiiriatej.

Nata quiniaata Pablo saruhatasacari nojori niishishano pueya

16 ¹Cuarta Pueyaso pueyanaa, nio maaji niaacua
tiuquiniutianiyanani, nojuajaari maninia maaji, Pueyaso
tojijia. Na sesaari Febe. Nojuajaari Cencrea tiacajinia Pueyaso
pueya maanu naacujua maninia. ²Pa Jiyaniijia panijia nia
quishacari, nia paniniutia nia masuure nia tiacora nio parta
Pueyaso muerasu naacuna maaji. Niocua nia tiaco jiitiarenoj,
taa nia jiitiaquiaacuana parta Pueyaso muerasuni, maninia na
quiniuria na camueenujusacari nia tiacajinia. Nojuaja nia
naacure maninia, puetunu na panishanotajanaa. Nojuajaari
queraatia parta Pueyaso pueya naacujuacuua. Cua naacujuajaa-
riuhua.

³Quiria nia saruhatate Priscila, neyaca Aquilano. Nojoriiri
cua cojiniaa pa Jiyaniijia Jesucristora poonijionura. ⁴Nojoriiri

tama nojori cuaqueyajaaja panitiaquiaari cucuara, nojori
tacunura cucuaji cua moyaquishaanura. Janiyari cunora
jiyanohua nojori timitiaani, naa nojori jiyanootiuniuucua
cucuatej. Majaari saa janiyaja nojori cua timitianu.

Seetanujuaana puetunu parta Pueyaso muerasu taucuacajiniji-
niojuanaari nojori timitiaajuhua, naa nojori miiniuucua.

⁵Quiria nia saruhatatejuhua parta Pueyaso pueya, noo pojori
Priscila, Aquila tiajinia rerejoquiaa Pueyaso secojonuunuratej.
Quiria nia saruhatatejuhua cua rupena Epéneto. Nojuajaari
coteenujuanaa Jesucristoocua tiuquiaari Asia jiyajinia. ⁶María
nia saruhatate quiriajuhua. Nojuajaari jiyanoehua
poonijioquiaari niaara. ⁷Quiria nia saruhatatejuhua
Andrónico, Juniasnio. Nojoriiri cuarta Judiocuaca. Nojoriiri
cuata nujuatejosaaquiaari nujuatejojuajinia, canaa pahuatanuu-
cua Jesucristojiniji. Puetunu cuarta Jesucristo jiyaramiquishano
pueyajanaari nojori panijiacajuhua. Andrónico, Junias,
nojoriiri socua coteenu janiyajiniji tiuquiaari Jesucristoocua.

⁸Nia saruhatatejuhua Ampliato. Nojuajaari cua panishano
pueyano, Jesucristoocua na tiuuniuucua. ⁹Naajuhua, quiria nia
saruhatate Urbano. Nojuajaari pa Jiyaniijia Cristora
poonijionajuhua. Cua rupena Estaquis nia saruhatatejuhua.
¹⁰Apeles nia saruhatate quiriajuhua. Nojuajaari puetunu
casaajanaa rejeretaja cutara, Jesucristoocua tiuujia na
quiniuucua. Aristóbulo tiajinia quiniaa pueya nia saruhatate
quiriajuhua. ¹¹Naajuhua, quiria nia saruhatate Herodión,
parta Judio pueyano. Naajuhua, Narciso tiajinia quiniaa pueya
nia saruhatate quiria, noo pojori pa Jiyaniijiaacua tiuujia
pueyatej. ¹²Trifena nia saruhatate quiria, Trifosajuhua. Cuno
maajipohuari pa Jiyaniijia poonijionuujuaa. Naajuhua, pa
panishano maaji Pérsida nia saruhatate quiria. Nojuajaari
jiyanohua poonijiojua pa Jiyaniijia. ¹³Rufo nia saruhatateju-
hua. Nojuajaari maninia tojijia pa Jiyaniijia. Na nucua nia
saruhatatejuhua. Nojuajaari juhua cua nucua quiquiaari
quiria. ¹⁴Nio pojori quiria nia saruhatatejuhua, Asíncrito,
Flegonte, Hermes, Patrobas, Hermasnio, mariyata nojoritia
quiniaa parta Pueyaso pueyano. ¹⁵Naajuhua, nio pojori nia
saruhatate quiria, Filólogo, necocua Julianio, Nereo, na
rimiatunio, Olimpasjuhua, mariyata nojoritia quiniaa parta
Pueyaso muerasunio.

¹⁶Niarta Pueyaso pueya nia saruhatate seetanujuaana nia
paniniutia nojori. Puetunu niqijinio parta Pueyaso pueya
maapuejanaari cua sequecanuni cua saruhatanura nijaniya.

¹⁷Cuarta Pueyaso pueyanaa, nia numooteyanijia, jiyanoehua nia
cojuare tama nia cuaqueyajaaja najuhuaa tamaatia
niishitiojonuujuaa pueyacuaji. Nojoriiri Pueyaso pueya maapue
cushitiojoquiaa, sesa nojori niishitiojosanota. Naacuajitij,
Pueyaso pueyari juaatiooquiaa. Majaari nojori niishitiojonu
pueya taa coteenujuanaa nia niishitiojosaaquiaari seetanu
rupaajanaa cutarani. Naa sesa niishitiojonuujuaacuaji nia
rupatere. ¹⁸Nojoriiri maja seetanujuaana na poonijionu pa
Jiyaniijia Jesucristora. Nojoriiri poonijioquiaa tama nojori
panishanojuaja nojori masenura. Najuhuaa shanohua nojori
pahuatananota, nojoriiri niishiyashijia pueya sapojoquiaa.
¹⁹Puetunu tamonu jiyacajinijinio parta Pueyaso pueyajanaari
niishiyani, niaari seetanujuaana Jesucristo rupaa tojitiajaca cutara.
Naaratej, janiyari jiyanoehua nia timitiaani. Naajuhua, janiyari
paniyani niishijia nia quiniuria, saaja seetanu rupaajanaa
tojijia nia quiniuria, maninia mijia nia quiniurajuhua.
Saniniuuja, sesa niishitiojosano niishiyashijia nia quitiriquiani,
maja sesa mijia nia quiniuria. ²⁰Naacuajitij, poojia cajitijia
Pueyaso nia cumaquiniutianiya, Satanás nia shocotanura na
sapososacari nijaniya juucua. Niaari juhua na tanacunutaniya
jiyocuara, Pueyaso tojijia nia quiniuucua. Pa Jiyaniijia Jesu
cuara nia cumaquiriia, shuquiriaatia nia quiniuria.

²¹Timoteo, cuata poonijiona Jesucristorani, nojuajaari cua
sequeya nera cua saruhatanura nijaniya. Cuarta Judiocuaca
Lucio, Jasón, Sosípater, nojoriiri nia saruhatatejuhua.

²²Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaaniuhuj Cristoocua tiujia cua quishacarijiuhuj. Niojuanaa, pueyanaa.

²³Parta Pueyaso pueyano Gayoori nia saruhuataajuhuj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuj.

²⁴Pa Jiyaniijia Jesucristo cuaara cumaquiiria puetunu niajanijajanaa.

**Pablo maniniuhuaqueetasacari Pueyaso,
quera na tucuatasaacari na naajio**

²⁵iPueyanaa, jiyanoehua pa maniniuhuaqueetare pa Pueyaso! Nojuajaari na naata cumaquiniu niajanijia, seetanujuanaa na muerasu nia quiniuria na rupaacua nia

tiushacari. Janiyari naa rootaquiaa niajanijacujani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyoyua, Pueyasoori jiyasohua tamajaaja na niishishano jiitaja Neyanu Jesucristojiniji.

²⁶Saniniuujia, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiunaa naajionuutasanojiniji paari quiarjia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarjia pa niishiniuria Neyanujiniji. Quiarjiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaa nojori quiniuria, Judiocuaca, taucucanio.

²⁷Pa Pueyasoori jiyanoehua niishijia cutara. iPueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiushacari! Cuaara naa shuquiritiisaaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

1 ¹⁻²Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricujani. Canaa niaacuara naajiyani, socua canaa niishitiojonura nijaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupesacari. Niaari seetanujuanaa Pueyaso muerasu, puetunu jiyacajinia pueyatajanaa, canapue te Jesucristoocua tiuujiacacuajani. Jesucristocuajaari nojori Jiyaniijia, pa Jiyaniijiajuhuaj. ³Pa Que Pueyaso, pa Jiyaniijia Jesucristo cuaara cumaquiiria nijaniya, juhuajaniya nia quiniuria.

Paari maninia miishaaquiaani Cristo pa rupesacari

⁴Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuajaari jiyanoohua maninia miiquiaari nijaniya, nia rupesacari Jesucristo. ⁵Nia rupesacari Jesucristo, Pueyasoori puetunu cumaquiiaarijia-naa nijaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. ⁶Maninia nia tojitasacari Cristojiniji pohuatasano, niaari maninia miishaaquiaari taa canaa sequequiaari nijaniyacuajani. ⁷Naacuajitij, niaari tari masequiaari puetunu Pueyaso niqitiojonura panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. ⁸Pueyasoori nia cumaquiniutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohuan na ruuretajaca na saniitionura, niaa cutaraari juhuajaniya quiniutianiya. ⁹Pueyasocuajaari maninia tohuatteequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanujahuaj. Cuno Neyanuni, nojuacuajaari pa Jiyaniijia Jesucristo.

Pueyaso muerasu juhua tamasa niqitiooquiaari

¹⁰Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasa nia niqitioonu. Maja tamasa nijaniya. Maninia nia niishiriojore, maja tamaatia. Nia jiuujiaatioorejuhuaj. ¹¹Naa nia sequeyanijia cuarta Jesuucua tiuuniaanaa, Cloe niqiohuan pohuatanuucua janiya nijaniyajiniji. Nojoriiri cua sequerucuaa niaana juayonuujutaquiaa. ¹²Naa pohuatasaru-cuaa nijaniyajinijiniija: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniuuja sequequiaacuaja: “Canaari Apolo pueyani”. Tamasacanaari sequequiaacuaja: “Canaari Pedro pueyani”. Tamasacanaari sequequiaajuahuaj: “Canaari Cristo pueyani”. ¿Naatee pueyanaa? ¿Casaara tamajaaja nia nia raqititijquianuni? ¹³¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquiniijosaaquiaari moojinijahuaj? ¡Maja, cuarta Pueyaso pueyanaa! ¹⁴Janiyaqui-

ri namitia nia tiuquiniijaquiaari moojiniani. Naacuajitij, majaari nia naata sequenu niaa cua sesajinia tiuquiniijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵Naacuajitij, majaari quenaaja tamonu na naata sequenu janiyari na tiuquiniquiaarini. ¹⁶Quera niyetaanijia. Janiyari Estéfanos tiuquinijoquiaarijuhuua necohuatajani. Majaruhua socua pueya cua tiuquinijonu quiquiaari.

¹⁷Jesucristoori maja na jiyaronu quiquiaari janiya pueya cua tiuquinijonura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaari. Cuaara tiuutiuria cutara Jesucristoocua, na miiniuucua maninia pocuara. Pueyasoori pa jiyanooquiaa saaja Jesucristo cusonuuca niyacutesanojinia pocuara.

Cristoori Pueyaso cumaaca jitiiaa, Pueyaso niishitijahuaj

¹⁸Canaa pohuatasano Cristo cusunujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacuaja na tojitianaara, Pueyaso muerasura na jataniniuria pajaniya. ¹⁹Pueyaso sequesanoocua nia naajiotasaaquiaaritij:

“Janiyari niishijiaa niishishano cushitionutaniyani. Mijiria pueya niishishano jiyatenutaniya najuhuanaranijia”. Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

²⁰¿Pueyanoteeri jiyanoohua niishitijaraca Pueyaso muerasura na jataniniuria pajaniya? ¡Maja! Niishijiajanaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiushacari? Maja. Naacuajitij, puetunu mijiria niishishanojuanaari najuhua quiya Pueyasora. ²¹Pueyari maja na naata Pueyaso niishiniu quiquiaari tama nojori niishitijatajaaja. Pueyasoori tama sequequiaarijaaja na niishitijata cutara:

“Jaaja. Maninia naatej. Pueya jiyanooriiri saaja nojori tiushacari cua Niyanuucua”.

Pueyari saniniuuja jiyaniya Jesucristo rupaari nareja sequesanojuhanajaj, tojishoo. ²²⁻²³Naaratej, cuarta Judiocuacaari maja Jesucristoocua tiuuniaara na quiniu ritia. Nojoriiri Pueyaso cumaacata miishano niquiniu paniquiaa coteenu saaja. Cunora, nojoriiri canaa tojitiaaquiiaa canaa pohuatasacari Jesucristo mosanujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari najuhua. Majaari ritia nojori quiniu paniniu Jesucristoocua tiuuniaara. Nojoriiri saaja niishiniuucua jiaatijaca. Nojoriiri jiyaniya Jesucristoori najuhua cusoquiaari juhua moseeca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaju quiquiaari. Nojoriiri jiyaniyahuaj Pueyaso Jiyaroscoriguanoori ritia Judiocuaca jiyaniijia quiniutianiya cutara. Majaari na niishitiniu quijia Cristo cuaara coteenu miishaaria naquiya, jiyanooshano nojori quiniuria sesa nojori miijosanojiniji. Griego pueyari canaa pohuatasano tojiyaquiiaajuahuaj.

Nojoriiri jiyaniya Pueyasoori niishiyashijia quiquiaari Neyanu na motenura. ²⁴Paa cutaraari niishiyani Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. iPueyasoori jiyanhua niishijia cutara! ²⁵Pueyari jiyaniya Pueyasoori niishiyashijia quiquiaari. Cunora Neyanu cusojuquiaari niyacutesanojiniaari. Naajaa, naacuajiti Pueyasoori pa jiyanoquiaari. Pueyasoori jiyanhua socua niishijia cutara mijiria niishijiacajiniji. Pueyari jiyaniyajuhaaj, Pueyasoori cumueecaaju quiquiaari Cristo cusosacari niyacutesanojinia. Naajaa, naacuajitij, iCristoori Sesaaca shocotaquiaaricuaaja! Pueyasoori jiyanhua socua cumueeca pajaniyajiniji.

²⁶Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niquiarani, Pueyaso sequesacari njaniya na muerasu nia quiniuria. Saaja secaja njaniyajinijinoori niishijiaa quiriqiaa. Saaja secaja njaniyajinijinoori tojishano pueya quiriqiaajuhuaaj. Saaja secaja njaniyajinijinoori jiyaniianucua niquihuaacujinino supueno quiriqiaa. ²⁷Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacuajitij, mijiria niishijiaaari tamajaaja caririquiniutianiya nojori jaara saquiriojiaquishaare. Pueyasoori tojishoo pueya saquiriojoquiaarijuhuaaj, na muerasu nojori quiniuria, mijiria tojishano pueya caririquiniuria nojori jaara saquiriojiaquishaare. ²⁸Pueyasoori soosano pueya saquiriojoquiaarijuhuaaj, tojishoo pueyanio. Pueyasoori naa saquiriojoquiaari najuhuaa quijiaca. Canapueete tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutianiya. ²⁹Naacuajitij, majaari quenaaja jiyanhua pocuaja cureenu quiniutianiya Pueyaso niquiarani. Tojetaarucujanaa shaaquiiri pocuajaca quiniutianiya. ³⁰Pueyasojuaacuajaari nia rupueetequiaari Jesucristo. Naacuajitij, niaari Pueyaso niishitijiaa jiiitiaa. Nia rupuesacari Jesucristo, niaari maninia mijiaa quiaa Pueyasora. Pueyasoori nia jataniana saa na tojijiacaraja nia quiniuria, juhua Neyanu nia quiniuriajuhuaaj. Nijaniyari puetunu jeeasaanutaniyajanaa. Paari naa miishiyani Jesucristo pa rupuesacari. ³¹Seetanujuaaari nio sequesano tariucuaaanu Pueyaso Rupaajiniji:

“Cante shuquiriaatia quiniu paniani, nojuaja cuaara shuquiritiaara pa Jiyaniijia”.

Jesucristo mosaanujiniji pohuatasano

2 ¹Cuarta Jesuucua tiuuniaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa njaniyani. Majaari jiyajeneta cua pohuatanu quiquiaari niishijiaa niishishano rupaacata. Cua pohuatasanoori niishishaatia quiquiaarijia, maja juhua cutara pueyano pohuatasano. Janiyari jacaria pohuataquiaari Pueyaso rupaa njaniyani. ²Janiyari tari tama sequequiaarijiaanjia: “Janiyari saaja Jesucristojiniji pohuatanu pania Corinto pueya niquiarani, naajuhuaaj, taa na cusoquiaari pocuara niyacutesanojiniani”. ³Cua pohuatasacari Jesucristo rupaa nia niquiarani, janiyari sasaca quiriqiaa cua puerentani. Janiyari tetecariquiaani. ⁴Majaari cua paniniu quiquiaari cua tiutiniuria njaniya Jesucristoocua tama cua niishitijataajaaja. Naaratej, majaari cua pohuatasano quiniu quiquiaari juhua shanhua pohuataja sequesano. Naacuajitij, cua pohuatasacari Jesucristo rupaa nia niquiarani, Pueyaso Sohanu cutaraari nioojiacajinia poonijioquiaari Pueyaso cumaacata cutara. ⁵Naacuajitij, niaari Jesucristoocua tiuquiquiaari Pueyaso cumaaca miishacari maninia nioojiajinia. Maja cutaraari nia tiunuu quiquiaari saaja pueya niishishanoocua.

Pueyaso Sohanucuaajaari pa niishitijia Pueyaso

⁶Naajaa, canapueete Pueyasocua tiuujia seetanujuaana cutarani, nojoriiri niishiya canaa pohuatasano Jesucristojinijiiri

seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniianucua niishishano. Mijiria niishijiaaari shaaeconutianiya. Nojori niishishanoori najuhuaa quiniutianiya. ⁷Canaa pohuatasano cutaraari Pueyaso niishishano tarijia, jiya shipinishaacarijiojua. Pueyasoori jiyacari niishiriojoquiaari jiyanhua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitijon quiquiaari pueya tari. ⁸Mijiria jiyaniianucuaari nio niishiyajiojuaari. Nojori jaara na niishijiaaari tarijia, nojori maara pa Jiyaniijia moyaquiquiaari niyacutesanojinia. iNa Shipinina motuquiaarijiaari, pueyaracaanu shacantuuca quijia! ⁹Naa naajiotasano quiyacuajaari tariucuaaanu Pueyaso Rupaajinia:

“Pueyasoori jiyasohuaja casaa jeenucuasano jiiitiaa na panijiaa pueyara. Cunoori maja pueya niquishano quenaaja. Majaari cunojiniji nojori tojishano quenaajuhuaaj. Majaari quenaaja pueya niishiriojonu quiquiaari jiyano casaate na naata quiniu nojoriiri”.

Quiarijiani, canaari saniniuujia pueya niquiarani na pohuataani. ¹⁰Pueyasocuaajaari quiarijia canaa niishitijiaaari canaa jiuujiajinia na miiniu panishano pajaniyara. Canaa niishitijiaariiri na Sohanuta. Na Sohanuuri puetunu Pueyaso niishiriojosanojuanaa noojiajinia niishiya. ¹¹¿Cante pueyano niishiriojosano noojiajinia niishiyani? ¿Majate saa na camarau sohanuujua niishiniu? Taaquiririniij. Naajuhuaaj, saaja Pueyaso Sohanuuri Pueyaso niishiriojosano noojiajinia niishiya. ¹²Naaratej, Pueyasoori na Sohanu niquithoquiaari pajaniya, pa niishiniuria Pueyaso niishishano. Naacuajitij, majaari pa jiiitanu saaja tama pa sohanuujuaaja Pueyaso niishishano pa niishiniuria. Paa cutaraari Pueyaso Sohanuracajaniuhuaaj. Naacuajitij, Pueyaso Sohanu cumaquishacari pajaniya, pa naata puetunu Pueyaso niquitosano pajaniyarajanaa niishiniu. iJiyanhua capora Pueyaso! ¹³Naacuajitij, canaa pohuatasanoori maja saaja mijiria pueya niishishano. Pueyaso Sohanuujuaanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohanu jiiitanaa niishitiojonu seetanu Pueyaso rupaajanaa, mariyata taa Pueyaso Sohanu niishitiojoquiaa canaacuaani.

¹⁴Mijiria quiniaa pueyari Pueyaso Sohanu niishitiojosano niishiniu paniaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuaana, nojoriiri maja na naata niishiniu. Saa Pueyaso Sohanutaja pa naata Pueyaso Sohanu niishitiojosano niishiniu. ¹⁵Cante Pueyaso Sohanu jiiitiaani, nojuajaari na naata puetunu niishishanojuanaa saniniuujia. Saniniuujia, tamasa pueyari maja na naata Pueyaso Sohanu jiiitana miishano niishiniu nocuara na rimiaaquenura. ¹⁶Tariucuaaanu Pueyaso Rupaajinia naa naajiotasaaquiaarijuhuaaj:

“¿Cante pa Jiyaniijia jiuujiajinia na niishiriojosano niishiyani, socua na niishitiojonura nojuajani? Shaaqui”. Paa cutaraari Jesucristo niishishano niishiyani Pueyaso Sohanuraca pa quishacari. Naacuajitij, majaari pa niishiniu saa mijiria pueya niishishanojua.

Pueyasora poonijionaa pueya cuaara poonijionuuriquia nojori panitioonuta

3 ¹Cuarta Jesuucua tiuuniaanaa, cua quishacari naata, majaari cua naata jiyajeneta Pueyaso niishishano cua niishitiojonu quiquiaari njaniya. Niaari quera juhua Pueyaso Sohanuujua quiriqiaajaa. Niaari juhua Cristo conaaja quiriqiaajaa, maja Pueyaso tojijiaa seetanujuaana. Nocuaji, janiyari nia niishitiojoriqiaa jacariani, juhua Pueyaso niishiyashijia pueya nia quishacarijia. ²Cua niishitiojosano njaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari

nijaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacarijia, majaari nia naata na tojini quiquiaari. Juhuanajujaari maja nia naata na tojini quiarjiani. ³Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacarij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. ⁴Niaana sequequiaa: “Canaari Pablo pueyani”. Tamasacanaari sequequiaajuhuj: “Canaari Apolo pueyani”. Naacuajitij, puetunu nijaniyajanaari saaja juhua Pueyaso niishiyashijiaca pueya quiyajaa.

⁵Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojtianura. Canaari Jesucristo panishano miiquiaarini taa na sequequiaari canaa miiniuriacuajani. ⁶Naacuajitij, janiyari Pueyaso rupaa nia pahuataquiaarini, naatej, taa casaa jajau pueyano natoojoquiaacuaani. Apoloori saniniuujia socua Pueyaso rupaa nia niishitiojoquiaari na cumaquiniuria nijaniya, naatej, taa pueyano na natau shijioya mohuacatacuaani, maninia na maashiniuria. Pueyaso cutaraari na rupaa maashitioquiaari nioojiaacajinia, na muerasu nia quiniuria cutara. ⁷Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitiini na rupaa, seetanujuanaa na muerasu pa quiniuria. ⁸Naacuajitij, paari niishiyani, cante natoojonani, cante mohuaca shijiotanani, canaari mariyata saaja Pueyaso poonitijosanoni. Pueyasocuaajaari canaa niqutionutaniya na jitiiasano, nera canaa poonijionuucua. Cante socua poonijioreeni, Pueyasoori socua na jitiiasanojiniji na niqutionutaniya taajecori pueyajini. ⁹Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰Pueyaso jaara jiyaroquiaari janiya, janiyari Jesucristo rupaa pahuatanu coteequiaari maninia nijaniyani, Pueyaso muerasu nia quiniuria nia tiuushacari cua pahuatasanoocua. Naacuajitij, janiyari juhua Pueyaso tiara shipinini coteequiaarini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji, tamasaacari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuuara niishiiria maninia, maninia nojori niishitiojonura nijaniya, juhua maninia tiasano nia quiniuria.

¹¹Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pahuataquiaari nijaniyani. Saa na rupaacuaja nia tiuushacari, niocua maninia quiri, juhua maninia morijiuacuacua tiasano tia, maja na matanura. ¹²⁻¹³Cante socua Jesucristo rupaa niishitiojiya nijaniyani, cuno cuuara niishitiojoora jiyanohua maninia. Cuuara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniujiuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota*, platatanio*, shanohua saitanio, maniiri maja na naata na catijianu. Cante saniniuujia tiare macacatani, tucurutajuhuj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia?

¹⁴Tamonu jaara maninia mijia quiquiaari Pueyaso cumaacata,

na miishanoori maja najuhua quiniutianiya Pueyasora. Pueyasoori cuno pueyano niqutionutaniya na jitiiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵Cante saniniuujia tiaquiaari cateja casaatani, na tiasanoori catenutaniya. Puetunu na jitiiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijini jaashano. Naa miishaanutaniyari Jesucristo tiuunaa, canapete maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijini jaashano.

¹⁶¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiaacajinia quijia.

¹⁷Tamonu jaara Pueyaso quiquio sesore, Pueyasoori cuno pueyano saniitionutaniya saniniuujia. Puetunu Pueyaso muerasujuaari juhua na tia quiya. Pueyaso quiquio cuuara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

¹⁸Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijiaca niqiuara. Cuno pueyano cuuara jataara cuno na niishishano juhua niishiyashijia na quiniuria narta pueya niqiuara. Na nuhuaji, cuuara maseera Pueyaso niishitijaja, seetanu niishijia na quiniurijanaa. ¹⁹Mijiria pueya niishishanoori juhua paateca sequesano Pueyasora. Tariucuaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquitianiniutianiya, tama nojori niishitiojoshanoocuaajaaja nojori tiuushacari najuhuanaj”.

²⁰Naa naajiotasanoori quiyajuhuj:

“Pueyasocuaajaari mijiria niishijia niishiriojosano niishiya. Naa sequeyari: ‘Najuhuaari cuno pojori niishiriojonuucuaano’”.

²¹Naaratej, maja shuquiriaatia nia quiniu saaja niquiriyatu Pueyaso rupaa pahuatana nia tojishacari. Pueyasoori tamasa pueya jiyaramiquiquiaa nia cumaquiniurijuhuj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoocuaaja nia jiaatianu. ²²Pueyasoori canaa jiyaramiquiquiaari canaa cumaquiniuria nijaniya. Naacuajitij, janiya, Apolo, Pedro, canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhuj. Pueyaso shipinisanocuaajaari niaara. Naajuhuj, mijiria nia quishacari, cunoori niaara quiya, socua maninia quijia nia quiniuhua. Taa nia miishiya quiarjiacuajani, taa nia miishaanutaniyani, puetunu cunojuanaari niaara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhuj. Pueyasoori nia shaajeteya na shuriucua nia quianura. Naacuajitij, puetunu casaajanaari niaara quiya. ²³Nijaniyari Cristora quiya saniniuujia. Cristoori saniniuujia Pueyasora quiyacuaja.

Jesucristo jiyaramiquishano poonijosano

4 ¹Naaratej pueyanaa, nijaniya cuuara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura nijaniya, Pueyaso niishitiojosano canaa. Cunoori tarijia pa niishishoo. ²Cante Pueyaso niishitijaja jitiiaani, cuno cuuara quiiria seetanujuanaa Pueyaso miiniu panishano panijia, na rupaa na pahuatanura puetunu maninijanaa. ³Nijaniya, tamasa pueyajuhuj jaara sequenu paniya taamueca pahuatanate janiyani, quiria, naajaa. Mijiria nequesoreena jaara cua nequesoreere cua niishitiojonujini, naajaa. ¿Janiyate sesa niishitiojoquiaani? Johuj. Maja cua niishiniu. ⁴Janiya jaara sesa miiriquiaa cua Jiyaniijia nia poonijosacariini, majaari cua niishiniu. Majaari cojia macuhujenu quijia.

Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijaja na naata sequenu taa cua quiquiaarini. ⁵Naaratej, maja nia rimiaaquenu tamonuucua, Jesucristo tiuquiquishacariuhua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajuahua casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miijia quiriquiaa mijiria na quishacarini.

⁶Cua tojitiare cuarta Jesuucua tiunuaanaa. Janiyari nareja nia pohuatariquiaa Apolojinijini, janiyajiniijiuhuaj, maninia nia niishiniuria casaa cua niishitiojiya nijaniyani. Naacuajitij, nia niishitiojoriquiaanijia saa Pueyaso rupaa nia tojitianura suraatiaja. Majaari socua tamonu niishitiojosano nia tojinu. Naajuhua, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiraj, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa. ⁷¿Niajanijariuhua? ¿Taa nia sequeya tama nia cuaqueyajiniijiaajani? ¿Niaateeri socua maninia pueya tamasaajiniji, socua niishijiacajuhua? Majaruhua. Naajaa, niaa jaara seetanujuanaa socua niishijiacara quiri tamonujiniji, ¿taa jiyanohua niishijiacara nia quiquianuni? ¿Tamajaatej? ¡Maja tamajaaja! Niaacuajaari Pueyaso niishitija jiiitiaa. Naaratej, maja nia jiyaniini niaa socua maninia pueya tamasa pueyajiniji, tama nia niishishanotajaaja.

⁸Niaa jiyoteeri jiyaniya niaa tari cutara niishijiacara quirii. Niaa jiyoteeri jiyaniyajuhua, niaa tari jiiitiaa puetunu Pueyaso niqutionu panishanojuanaa nijaniya. Naajuhua, niaa jiyoteeri jiyaniya Pueyaso nia jiyateere jiyaniijianucua nia quiniuria. Niaa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijianucujuhua, shuquiriaatia pa quiniuria mariyata. ⁹Janiyar cuarta Jesucristo jiyaramiquishanoocua niishiriojori-quiaani, Pueyaso naasucuaari canaa jiyatequiaari juhua najuhua quijiacara, saa puecoosocoriquianojua. Canaa naasucuaari nia quiya mijiriani, puetunu pueyajanaa shootianura canaa, Pueyaso seya shootianura canajuhua. ¹⁰Canaa tojtiasacari Cristo, canaa naasucuaari niishiyashijiacara quiya tamasaarani. Niajanijari saniniujia niishijiacara quiya tamasaara, Jesucristo nia rupesacari. Canaa naasucuaari Pueyaso muerasu sasaca quiya saajani. Niaari saniniujia Pueyaso muerasu cumueeca quiya tama nia niquirarajaaja. Pueya jiyoteeri nia shuquiritiaa. Canaari saniniujia saaja rerequetesano quiyani, pueya soosanujuhua. ¹¹Canaari pueyaracaanu miaajequiaaani. Canaari jiyamuequiaaaniuhua. Canaa cushishano toqueniyojuuari jiyareta sesaruqueniyojua. Pueyari canaa miiquiaa taraatiani. Shaaquiri canaa tia, canaa rucoojonuucua pueyaracaanu. ¹²Canaari samareequiaani pueyaracaanu canaa poonijiosacari tama canaa juaashiquitatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniujia nojori. ¹³Pueya jaara tamasa niquiara rimiaaquequiaa canaajiniji, canaari nojortia jeecatoonu saniquiaa juucuanu. Pueyari canaa jiyatequiaa juhua rucucuarani. Canaari nia quiyajaa nojoririani.

¹⁴Naa cua naajiosacari niaacuaratej, majaari cua cararonu paniniu nijaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani.

¹⁵Niaa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Nia tojtiasacari Jesucristo rupaa cua pohuatasacari nijaniya, niaari Pueyaso muerasura quiquiaari. ¹⁶Juhua nia que cua quishacari, nia

nacasurenija pueyanaa. Naate taa maninia muerasu na queecua jiaatiaacuani, naa cucua nia jiaatiarejuhuaj, juhua janiya nia quiniurajuhua.

¹⁷Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajinijanaacuani. Naa nia rootanutaniyari nia niishiniuhua maninia cua niishitiojosano nijaniya tarija. Nojuajaari nia pohuatanutaniyajuahuaj taa quijia cua quiyani cua tojishacari pa Jiyaniijia Jesucristo, naa maninia nia miiniurajuhua.

¹⁸Noojiaqueya nijaniyajinijinoori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojori nia miiri qui nojori jiyaniyahacari maja naasucuaari cua tacatenu quiniutianuhua, cua niquiniuhua nijaniya socua. ¹⁹Janiyacuaajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiacara pueya saniniujiniutianiyani, cua niishiniuria casaate nojorini, maja nia sacuaatia nojori quiniuriatej. ¿Cumaacarate nojori, saaja pocuajaca soj? ²⁰¿Canteeri seetanujuanaa Pueyaso pueyanoni? ¿Saaja pocuajatej? ¡Maja pocuaja! Cante Pueyaso Sohanu jiiitiaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. ²¹Nia niishiriojore, cuarta Jesuucua tiunuaanaa. ¿Taa nia paniya cua miiniuria nijaniya cua quiasacari niaacuani? ¿Niaateeri paniya cua saniitionura nijaniya, jacaria cua niishitiojonura nijaniya cua paniniutia soj? ¿Taa nia paniyani?

Na que niquicuata quijiajiniji pohuatasano

5 ¹Niajanijajiniji pohuatasaarucuaa taraatianijia. Tamonu nijaniyajinijionaaari jiyanohua sesa miya. ¡Na que niquicuata quiquiaari! ¡Pueyanaa, cuno miishanoori socua jiyanohua cararaatia Pueyaso niishiyashijiacara miishanojiniji! Pueyaso niishiyashijiacara pueyani, majaari quenaaja nojori nia sesa miiniu niishiniutij. ²Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiiitiaruhua? ¡Niaa cuara na tacaatiaara! Cuno sesa miijia cuara taanusaaria nia tajiniji, maja na cojinuria socua nijaniya nia rerejosacari. ³Cua tojiri taa pa miiniutianiyani. Janiyari maja cua quiniu niaata. Naajaa, cojiaari niaata quiya cua niishiriojosacari nijaniya. Naacuajitij, janiyar juhua nia tajinia quiyani. Naacuajitij, janiyar tari cuno sesa miijia saniniujiriini. ⁴⁻⁵Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Cojiaari niaata quiniutianiya nia nia miishacari pa Jiyaniijia Jesucristo cumaquishacari nijaniya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari nia naquiya miishaanutaniya noojia na tacatonuhua, Pueyaso tojijia na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitianishaanutaniuhua puetunu Pueyaso muerasutajanaa.

⁶Cuarta Jesuucua tiunuaanaa, ¿taate nia naata shuquiriaatia quiniu tamajaajani, nia sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujishoojua, socua pueyari mariyata nia sesa miiniutianiyaqij! Sesa miijia niishishanoori tamasaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojua miniquootasanojuanaari. Naajuhua, sesa miijia jaara sequeyakuishaare na miishano, sesa na miishanoori socua paaquenutaniya.

⁷Tarija, Pueyaso nia supuetanaa Judiocuaca rootaquiaari puetunu na pan poreetejajanaa nojori jatanura puetunu

marijarajanaa. Nojoriiri naa rootasaaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niqiuara. Pueyasoori naa nojori niishitiojoquiaari miriquitij, nojori cartenura puetunu sesa nojori miitushanojuanaa, nojori rupenura Pueyaso. Naajuhuj quiarijiani, nia taanuure cuno sesa miijia nia tajiniji, seetanujanaa sesa miyashijiaca nia quiniuria Pueyaso niqiuara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuaaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸Naa Pueyaso pa cojishacari quiarijiatej, tojetaarucujanaa sesa miyashijiaca pa quirij, shuquiriaatia pa quiniuria pa Jiyanoonia niqiuara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujanaa maninia pa quiri puetunu pajaniyajanaa.

⁹Pueyanaa, janiyari tari niaacuara naajocanuni cua sequenura nijaniya, maja nia cojiniuria sesoriqia pueya, cuno pojori canapuate na camishoo maaji numuetucuquiaani. ¹⁰Naa cua sequesacari nijaniyatej, majaari cua sequenu nia rupueyaquiniuria puetunu sesoriqia pueya sequejanaa mijiria. Saa nia shaajesacarijia cutara nia naata puetunu sesoriqia pueyacujijianaa rupatenu. Nio jiyacua, pueyari naa sesa miijiacata quiya: nojoriiri sesa miiquiaa tama na niishiriojosano-tajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocujaja jiaatiaquiaa puera, maja Pueyasocua. ¹¹Cua tojitiare casaa cua sequecanu tari nijaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucuquiaa. Naajuhuj, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocujaja jiaatiaquiaaaniuhuj, maja Pueyasocua. Majaari nia cojiniu narta pueya sesacaja. Majaari nia cojiniu mashaasequejoja. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. ¹²⁻¹³Naa cua sequesacari nijaniyatej, majaari cua sequenu quiriqiaa tamasa pueyajiniji, canapuetucujaja maja Pueyaso muerasuni. ¿Paate nojori nequesoreenaani? Maja. Pueyasocujajaari nojori saniniujiunutiianiya. Pajaniya cumaati parta Pueyaso pueya saniniujiunutiiani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuaratia na que niquiocuaa quiyacuajani.

**Sesa miijia cuaara nequesoreesaaria narta
Pueyaso muerasu niqiuara**

6 ¹¿Seetanutejanaa naa nijaniyajiniji pueya pahuatasanojuhuaj? Niarta Jesuucua tiunua jaara sesa miiri nijaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niqiuara nia jecatoyaquiquiaani? ²¿Niaate niishiyaquiya, Pueyaso muerasuuri Pueyaso niishiyashijiaca nequesoreeriquianocujaja, Pueyaso saniniujiushacari nojori? Pueyaso jaara naa nia nequesoreetenutiiani na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianojuja? ³¿Majate nia niishinujuhuaj, paari Pueyaso seya nequesoreeriquianojuhuaj? Pueyaso jaara pa nequesoreetenutiiani na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? ⁴Niaa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutiiani nojoriicuara? ¡Maja maninia naatej! Cuno pojoriiri maja Pueyaso muerasu jitiiana. ⁵Naa nia sequeyanijia cua cararonura quenaaja nijaniya, cua niishiriojotenura nijaniyajuhuj. ¿Seetanujua-

naa tojetaarucujanaa shaaquiti niishijia nijaniyajinijino, cante na naata nia tonujutoosacari nequesoreenu nijaniya maniniani? ¡Quiya jiyotucuaajaari! ⁶Nijaniyanaari tama niarta Jesuucua tiunuaacuaraajaaja tonujutoojoquiaa Pueyaso niishiyashijiaca nequesoreena niqiuara. Naa nia miishacaritij, iniaari sesa miiquiaa pueyanaa!

⁷Niaari jiyanohua jiyajeneya nia juayonuujutasacari. Niaa jaara sesa miishaare, niaa cuaara jiyanoootoora saniniujia, nia casami jaara nohuasesaarejuhuaj. ⁸Nijaniyarijiatej, iniaari saaja sesa miiquiaacujaa! ¡Niaanaari niarta Pueyaso muerasu miiquiaa sesa! Niaanaari tama niarta Jesuucua tiunuaajaaja nohuasejoquiaa, sesa miijiacata nia quiniucua.

⁹⁻¹⁰Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutiianiya sesa miijiacata na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapuate na camishoo maajipohua numuetucuquiaani, naajuhuj, noo pojori, canapuate tama na panishanoocujaja jiaatiaquiaani, maja Pueyasocua. Quejoosaanutaniyajaariuhua noo pojori, canapuate narta pueyano niquiocua numuetucujujua, naajuhuj, canapuate maajishuriutia quijia juhua maajitiani. Nohuasenujuacaari quejoosaanutaniyajuhuj, noo pojoriuhuj canapuate pueyaracaanu socua casami paniquiaa tama nerajaajani. Mashaasequenujuacaari puetunu quejoosaanutaniyajuhuj, tamasa sesacajacano, tamasaacuara rimiaaquejajuhuj. Naa quejoosaanutaniyajaariuhua noo pojori, canapuate nohuasejoquiaa na sapojonutani. Puetunu jiyano pueyanaari maja Pueyaso muerasu na quini quiniutiianiya, Pueyasota nojori quiniuria shuquiriaatia pueyaracaanu. ¹¹Noojiaqueya nijaniyajinijinoori jiyano sesa miijiacata pueya quiquiaari tarjia. Na nuhuaji, sesa nia miishanoori jeequesaaquiaari Jesucristoocua nia tiushacari. Pueyaso Sohanuuri noojiajinia tiuquiquiaari, Pueyaso na tojitiniuria nijaniya. Naacujitij, nia rupesacari Jesucristo, Pueyasoori nia jiyanoocujajaari. Nia sequeereeri: “Niaari saa maninija quiya cua niqiuara”.

Pa cuaqueya cuaara quiriia saa Pueyasoraja

¹²Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miini panishanojuanaa pa miiniuriani”. Seetanujanaa naacuj. Saniniujia, majaari puetunu pa miini panishanojuanaa maninia na quini pajaniyara. Seetanujanaa cua naata miini puetunu cua miini panishanojuanaa. Naajaa, maja cutaraari cua miini puetunu cua miini panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jitiishano casaa pa tarinitianu. ¹³Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujaja saniniurijia, shuquiriaatia pa quiniuria”. Seetanujanaa cuno sequesano. Naajaa, majaari nio pa niyjetanu, na nuhuaji, Pueyasoori na shaajanutiiani puetunujanaa. ¿Pa cuaqueyariuhuj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijia, na panishano pa miiniuria. Naajuhuj, pa Jiyaniijiaari pa cuaqueyara quiyacuajaa, na cumaquiniuria pajaniya, maninia pa quiniuria pueyaracaanu. ¹⁴Naajuhuj, taa Pueyaso samiitianiqaaricuaa pa Jiyaniijia Jesu na cuaqueyatani, nojuajaari macujiniji naa pa samiitianiutiianiuhua na cumaacatajuhuaj.

¹⁵¿Niaateeri niishiyaquiyajuhuj, Pueyaso Sohanu quiniucua poojiajinia, pa cuaqueyari seetanujanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanohua sesa!

¹⁶Pueyasocujajaari coteenujanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiqii?

¹⁷Naajuhuj, paa jaara Jesucristo rupuereni, pa sohuanuuri ruputooree na Sohuanuta, niquiriyatu sohuanuraca pa quiniuria Jesucristota.

¹⁸Naaratej, nioojia nia tacatore maja nia numuetucunura tamasa, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujua, nojuaja cutaraari tama na cuaqueyajaaja sesoya. ¹⁹⁻²⁰¿Majateeri nia niishiniu, nia cuaqueyari Pueyaso Sohuanu quiqii? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. iJiyanojua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuquiritiri pa Pueyaso pa cuaqueyata, pa sohuanutajuhuj. Nojuacuajaari pa cuaqueya camaru, pa sohuanu camarujuhuj.

Pablo rootasano pa caminiuria, camiyojua pa quiniuria soj

7 ¹Quiarijiani pueyanaa, cucuara nia naajiosanojinia nia nequesotasano riucuaereeraj. Cante niquiriyatu quiniu paniya tamajaajani, cuno pueyanoori maninia miya, maaji na camiaquishacari. ²Saniniuujia, quiarijiani, pueyari puera sesa miiniu niishiquiaa. Nocuaji pueya cuaara camiiria. Maajipohua cuaara camiirajuhuj. ³Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. ⁴Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujuhuj. Necocuaari neyaca cuaqueya camaru cutara. ⁵Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijonu na panishacari na numuetucusaanura. Saniniuujia, jiyanojua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriri tamonu maaji nia paniniuria, nia camuenujusacari puera. ⁶Nioori quiarijia maja niaara Pueyaso rootasano janiya. Janiyari nareja naa sequeya niajaniyani socua panaatia nia quiniuria. ⁷Naaratej, nia jiyateriquiani taa cua quiyacuanaa, niquiocuaaju. Naajaa, Pueyasoori puetunu pa cumaquiiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiqiiiaa Pueyaso cumaquishacari pajaniyani.

⁸Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacuanaa, niaari maninia quiniutianiya. ⁹Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajicua nia jiaatianura pueyaracaanu. ¹⁰Camiyona pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹Cante neyaca carteyani, nojori cuaara jiyanojooora, na ruputoonuhua. Jaara maja na naata jiyanojooonu, cuaara quiiria tamajaaja pueyaracaanu. Cuaara camiaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: “Maja nia cartenu nia niquiocua”.

¹²Quiarijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano.

Pueyano jaara Pueyaso tojiyashijia niquiocuaraca qui, cuaara jiitiaara maninianoj. Quia niquiocua jaara quiata quiniu paniyajaaja, majaari na cartenu. ¹³Naajuhuj, maaji jaara Pueyaso tojiyashijia niyacaraca qui, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. ¹⁴Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesucristo tiuuniaata caminio quiya. Nojoriiri seetanujuaanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaniya cuaara neyaca jiyanooria necocua quiniucua niarta Pueyaso pueyano. Nareja nia niquirinioj, niaata na rerejonu panishacari. Naajuhuj, nia jiyanoori niarta Pueyaso pueyano niquiocua, naajaa, Jesucristo tiuyashijia na quishacarijia. Naa Pueyaso pueyano neyaca quishacarijia, necocua cuaara nareja niquishaariajuhuj, na rerejosacari niaata. Naajuhuj, maja rimiajata nia niqiniu necohua. Necohuari maniniacuaja Pueyasora, maja juhua tama maaji muetusanujoaja.

¹⁵⁻¹⁶Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaniya, niaari juhua camishoo quirohua. Majaari socua nia tojiniu coteenu nia niyaca, coteenu nia niquiocuanio. iMaja cutaraari nia cartenunioj! Naa niishitiojore pueyanaa, nia niquiocua jaara Pueyaso tojiyashijia qui, ¿nia naatate na tojitiu Pueyaso rupaa, Pueyaso muerasu na quiniuria, jaara quiata quiyajaaja? Maja pa niishiniu. Naajuhuj, maja niishishano quia naatate quia niyaca quia tojitiu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷Cuarta Jesucristo tiuuniaanaa, taa nia quiqiiiaari Pueyaso sequesacari niajaniya na muerasu nia quiniuriacuajani, naajaa, naa nia quiqiiiaari Pueyasora. Janiyari naa nia sequeyani, taa cua rootaquiiaacuaja puetunu Pueyaso pueya maapuerajanaani. Taa nia quiqiiiaarini, naajuhuj casaate quia poonitijosano quiqiiiaarini, cunocuaajari Pueyaso panishano quiqiiiaari niaara. ¹⁸Naacuajitij, cante tarijia na cararaatiuquua co mialesano quiqiiiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiuushacari quiarijia. Naajuhuj, cante mialesoo quiqiiiaari Pueyaso sequesacari na pueyano na quiniuriani, cuno cuaara quiiria naajuhuj. ¹⁹Cante Judio pueyano na quiniuria mialesaaquiiaarini, naajaa. Cante mialesoo quiyani, naajaa. Saa ja maninia cutaraari pa tojitiu Pueyaso niishitiojosano pajaniya. ²⁰Naarate nia sequeyanijia, nia quiqiiiaari taa nia quiqiiiaaricuajani shushajanaa Pueyaso sequesacari na muerasu nia quiniuria. ²¹Cante poonitijiotasano pueyano quiqiiiaari Pueyaso sequesacari na muerasu nia quiniuriani, naajaa, maja nia niishitiojonu nocua. Juhujaniya nia poonitiojore saaja. Saniniuujia, jaara nia naata quiqiiiaarini cartesano pueyano nia camarnujini, maniniacuajaa-ri. ²²Cante poonitijiotasano pueyano quiqiiiaari Pueyaso sequesacari niajaniya na muerasu nia quiniuriani, naajaa, niaari seetanujuaanaa cartesano pueya quiya pa Jiyaniijia. Naajuhuj, cante camarnuujia quiqiiiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. ²³Pueyasoori jiyanojua naquiya miqiiiaari na cusojuasacari Neyanuniyojua, na masenura niajaniya, na muerasu nia quiniuria. Naa masequiaari tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraaja nia quiqiiiaarini. ²⁴Naaratej cuarta Pueyaso muerasunaa, taa nia quiqiiiaari tarijia Pueyaso muerasu nia quiyacuquishacarijiani, naa nia quiqiiiaarini Pueyaso cumaquishacari pueyaracaanu niajaniya. ²⁵Quiarijia nia sequeyera cua niishitiojosano, taa camishoo pueya miiniutianiya. Nioori maja pa Jiyaniijia rootasano

janiya. Majaari na sequenu quiquiaari cunojiniji. Naajaa, pa Jiyaniijaari cucua tiuquuaa na sequenu panishano cua caminiujiuniuria nijaniya, na Sohuanu cumaquishacari janiya. ²⁶Naacuajitij, naa nia sequeyanijia: niaacuajaari niishiya, quiarijiani, jiyanoehua puereeta quishacari. Nocuaijij niajaniya cuaara quiiria taa nia quiyacuajani. ²⁷Cante niquiocularani, maja nia paniniu na cartenu. Cante niquiocularaju quiyani, majaari nia niquiocularani paniniu. ²⁸Naajaa, mashaja jaara camiri, cunoori maja sesa. Naajuhua, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniucua mijiria quiarijiani. Majaari cua paniniu taraatia nia miishaanura. Nocuaijij janiyari naa nia niishitiojiyani puera sesa quishacari quiniucua quiarijiani.

²⁹Cuarta Pueyaso muerasunaa, nijaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanoehua pa tojitiare pa Jiyaniija. Naacuajitij, cante niquioculara quiyani, majaari nocua nia niishiriojonu puera. ³⁰Cante na shaajasanocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuaj. Cante casami niquitiojia quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasocua. ³¹Canapute niishijiacani, queraatia casami na masejonura mijiriani, nojori cuaara niishiiria maja casami panijiaci nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³²Janiyari paniyani mijiria casaacua tacayashijiaci nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijaacua niishiriojonu na tojiniuria maninia, pa Jiyaniija na shuquiritiniuria. ³³Cante niquioculara saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴Naacuajitij, noojia niquijioteyari. Naajuhua, camishoo maajiiri pa Jiyaniijaacua niishiriojoquiaa maninia, tama na cuaqueya na cojuasacarijiaaja Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

³⁵Janiyari naa nia sequeyani socua shuquiriaatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniija nia tojitanura maninia. Naa jaara cua niishitiojosano tojiri, nia naata pa Jiyaniija tojiniu maninia. Naacuajitij, niaari nioojia niquijioteyaquiniutianiya.

³⁶Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷Cante saniniuujia maja noojia niquijioteyaquiya na niishiriojosacari neyatuucuaani, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸Naacuajitij, cante neyatu camitiriini, maninia miyari. Cante neyatu camitiyaquiyajanihuaj, nojuajaari socua maninia miya. Naacuajitij, cuno neyatuuri na naata Pueyaso panishano miiniu socua, camishoo na quishacari.

³⁹Camishano maaji cuaara carteyaquiiria neyaca, saminio neyaca quishacarijia. Pueyasoori naa sequejaaritij. Neyaca jaara cusoyare, na mashiquoori maja tari na quiniu juhua camishano. Na panishacari, cuaara camiriira cana na caminiu paniyacuajani. Jaara caminiu paniri, cuaara camiriira

Pueyasocua tiuujia pueyanota cutara. ⁴⁰Naajaa, mashiquio jaara camiyaquiriohwa, socua shuquiriaatia quiniutianiya, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequetere nio.

¿Maniate cuno shu pa miaquenura, seya jaara puecoosano quiri nareja shipinishano casaacua, juhua Pueyasocuarajanaa?

8 ¹Cuarta Jesucua tiuunaa pueyanaa, janiya quiarijia nia niishitiojonutaniyani teyano pa miaquesanojinijiti puerehiyani. Pueyaso niishiyashijiacari na miaquesocoriquiano seya puecoonu niishijia shipinishano casaacua juhua Pueyasocua. Pueyari nequesotaquiaa, ¿maniate cuno shu, Pueyaso muerasu miaquesocoriquianojuhuaj, cuno seru jaara taucuaa jyanishano cumaacaraca quijiaacuara mosano quiri? iJaniya cutaraari maja cua miaquenunoi! Nia pohuatareera casaara cua miaqueyaquiiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocua puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanocua. Cante narta pueya paniquiaani, cunoori narta pueyacu niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ²Naacuajitij, cante tama na cuaqueyajaaja jiyaniya niishijiani, cunoori juhuanajuaja maja niishijia seetanujuanaa. ³Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴Juhuanajuajaari maja cua riucuanu nia niishiniu panishano: “¿Maniatenaari cuno shu pa miaquenu, seru jaara pueya jyanishano pueyasocua mosano quiri?” ¿Casaatejaara cuno nojori jyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuaanu Quijia. Maja socua tamonu quiniu juhua nojuaja. ⁵Tamasaca pueyari jiyaniya queraatia cumaacaraca quijiacari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuaj. ⁶Naajaa, paari niishiyani saa niquiriyatu Pueyasojuaari quiya. Nojuacuajaari pa Que Pueyaso, pa shipinia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuahuaj. Cunoori pa Jiyaniija Jesucristo. Na Queeri na shipiniquiaari puetunu na shipinishanojuanaa. Pajaniyajuahuaj, paari rishiyani saaja na cumaquishacari pajaniya.

⁷Noojiaqueya Pueyaso pueyari saniniuujia jiyaniyaja taucuaa shipinijosano casaari seetanujuanaa cumaacaraca quijiaci juhua Pueyasojuhua. Nojoriiri najuhuaa sesa niishiriojonujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “iJaniya naasucuaari sesa miiri Pueyaso niquiarani!” Naacuajitij, nojoriiri noojia macuhajetequiaa. ⁸Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootini pajaniya. Cante cuno shu miaqueyaquiiaani, naajaa, majaari socua maninia pueyanora na quiniu Pueyasora. Naajuhua, cante na miaquequiaani, majaari socua sesa pueyanora na quiniujuhuaj. ⁹⁻¹¹Niaacuajaa-ri jyanohua tiuquuaa Pueyasocua. Naacuajitij, niaa

naasucuaari na naata juhuajaniya tiuquiniu cuno shu miaquenura nojori jiyanihano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquniutianiya na pueresano shu miaquenuyano. Na niquishacari nijaniya, tamajaaja sequenutaniyari: “iJaj! iNojoriqui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijiaacuara. Naacuajitij, na sanishacarihua cuno shu miaquenu, tamajaaja noojia macuhujanutaniyari. Naacuajitij, niaari niarta Pueyaso pueyano sesoya, na niqiara nia miaquesacari cuno shu. Na niquniuucua nijaniya cuno shu miaquenuyano, nojuajaari cunora na miaquereehuhuj. Saniniuujia, nojuajaari juhuanojuaja maja jiyanoohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuarihua, na rupesacari nijaniya. ¹²Nia miaquesacari, niaari na pueresano shu na miaqueteya. Naacuajitij, noojaari macuhujanutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhuj, naa nia sesosacari tama na pueyanojuaja. ¹³¿Taa nia sequeyani pueyanaa? ¿Maniate shu pa miaquenu, seya jaara taucuaca jiyanihano pueyasooacara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniacuaani.

**Taa quijia Pablo quiquiaarini,
Jesucristo jiyaramiquishano na quishacari**

9 ¹Janiya jaara cuno shu miaquenu paniyani, cua naata miaquenu cua panishano. Naajuhuj cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuj. Seetanujuanaa cua namijiaata Jesucristo niqiquiaarinijia. Nojuajaari cua jiyatequiaari na jiyaramiquishano cua quiniuria. Naajuhuj, cua pohuatasacari Jesucristojiniji nia niqiara, niaari na muerasura quiquiaari cua pohuatasanoocua nia tiushacari. Naacuajitij niishishiyari janiyari Jesucristo jiyaramiquishanojaaniuhuj. ²Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesuucua tiuquiaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniuucua, cua naata miiniuujuhuj taa cuarta Jesu jiyaramiquishano pueya miiquiaacuani.

³Tamonu jaara cua nequesoreere taa cua miiquiaani, janiyari saaja naa na riucuaquiaani: ⁴“Pueyasoori sequequiaari, na jiyaramiquishano pueya cuaara niqutiosaaria na miaquesocori-quiano”. Naaratej, canaa jaara naa miiniu paniriquiani, canaa maara nia sequereni canaa nia niqutiojonura canaa panishano. Naajaa, majaari canaa masenu quiquiaa canaa panishano nijaniyajiniji, janiya, Bernabeenio. ⁵Naajuhuj, canaa jaara niqiocuaraca quiriqiani, canaa maara canaa niqiocua rupejoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniijia Jesu tapueyocuaacari naa miiquiaajuhuj. Pedrojuanaari necocuata rucuanajoquiaa-juhuj, Jesucristo rupaa na poojotasacari. Naajaa, majaari naa canaa miiniu quiquiaquij. ⁶Jesucristoori sequequiaarijuhuj: “Cua jiyaramiquishano pueya cuaara niqutiosaaria cumaneeca,

na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuj? ¡Cunocuaajaari naa sequesaaquiaari canaarajuhuj! Naaratej, canaa jaara naa paniriquiani, canaa maara canaa panishano masere nijaniyajiniji, canaa niishitiojonuucua nijaniya. Naajaa, canaari tama canaa juaashiquiatajaja poonijioquiaani, canaa panishano canaa masetajara.

⁷¿Soldadoteeri tamonu poonijosano jiitiaja, na miaquesano na masetajara? ¡Maja! Soldadohua jiyaniijiaari na niqutiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri seru juunu camarú ratunu na seru quitiaaca, jaara na paniri? ¡Taaquiririni! Na ratuyacuaaquiniatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano nijaniyajiniji. Naajaa, majaari canaa mashiniquijionu quiquiaa quenaaja canaa panishano nijaniyajiniji. Canaari nareja poonijioquiaa tama canaa juaashiquiatajaja, Jesucristo rupaa canaa pohuatasacari nijaniya.

⁸Nio cua pohuatasano nijaniyani, majaari tama canaa niishiriojosanojuaja. Nio niishitiojosanoori tariucuaaanu Pueyaso Rupaa naajiosanojinia quiyajuhuj, taa cua sequeriquiaacuajani. ⁹Supuetana Moisés caminiujishano Pueyasojiniji nia naajiotasaaquiaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! ¹⁰Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijiojanaani, na niishitiojosano pueya cuaara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiaa? Taaquiririni. Na camaruu niishiya na poonijosanojiniji mianutaniya na nuhuajiri. ¿Majateeri pueyano carojotanu shuquiriaatia na nataujuhuj? Jaa. Niishiyacuajaari na mianutaniyari. ¹¹Naajaa, niaata cua quishacari, canaari naa poonijioriquiaa Pueyasorani, nioojia canaa cumaquiniuria maninia. Naacuajitij, canaa cuaara niqutiojosaaria saniniuujia canaa panishano. Naajaa, majaari canaa paniniu canaa panishano nia niqutiojonura canaa. ¹²Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujuanaa pohuataquiaari Jesucristo rupaa nijaniyani. ¿Majateeri coteenu canaa niqutiosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia nijaniya, canaa jiitiaaquishacari canaa panishano. Canaari naa miiquiaaritij, niaa mariqui Jesucristo rupaa tojiniu paniyaquiriri canaa taajetesacari nijaniya, pueyaracaanu canaa mashiniquijiosacari canaa panishano nijaniyajiniji.

¹³Niaacuajaari niishiyajuhuj, Jerusalén tiacajinia Pueyaso Secojoja tiajinia, cuarta Judiocuaa miaquesocoriquianoori puecoosaaquiaa Pueyasooacara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuj, shu camaruu secojojuajinia poonijiojanaa niqutioquiaa nojori miaquesocoriquianojuhuaj? Naacuajitij, Pueyaso secojoja tiajinia poonijiojanaari miaquesonoraca quiquiaajuhuj. ¹⁴Pa Jiyaniijia Jesucristoori na rupaa pohuatajanaa naa sequequiaarijuhuj: “Cua rupaa pohuatajanaa cuaara niqutiojosaaria na panishano pueyaracaanu”. ¹⁵Naacuajitij, cua naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuani. Naajaa,

majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiarjia niaacuara naajioree nioni, cua shiniujiuniuria niajaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juashiquiatajaaja poonijionu paniyani, Jesucristo rupaa nia tojtianura, cua panishano cua maseyaquiniutia niajaniyajiniji. Naacuajitij, janiyari tamajaaja shuquiriaatia quiya Pueyaso niquiarani.

¹⁶Cua tojtianaa jaara niqutiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniuucua nojuaja. Cua pohuatasacari na rupaa, janiyari saaja na tojyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniuriajaaja. ¹⁷Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajanijara”. Janiya jaara naa na sequequiaarini, cua Jiyaniijia maara cua niqutiore cua poonijosanojiniji nera, na shuqiritiasacari janiya. Saniniuujia, tama na panishacarijaaja cua Jiyaniijajanaacuajaari cua jiyaroquiaari na rupaa cua pohuatanura. Cunora, majaari cua naata na tarijonu. Janiyacuajaari na seruni. ¹⁸Naacuajitij, ¿taa cua miya socuani, cua Jiyaniijia cua shuqiritiniuria socuani? Naa miiquiaacuajaniija, nareja poonijioquiaanijia tama cua juashiquiatajaaja cua panishano cua jitianura, na rupaa cua pohuatasacari. Naaratej, majaari cua sequenu quiquiaa cua tojtianaa, nojori niqutiojonura janiya cua panishano. Jesucristocuajaari sequequiaari na rupaa pohuatanaa cuaara niqutiosaaria na panishano. Naajaa, majaari naa cua sequenu quiquiaa niajaniya. Naacuajiti cua naata pa Jiyaniijia shuqiritiniu socua, cua pohuatasacari na rupaa cua maseyaquishacari cua panishano cua tojtianaaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.

¹⁹Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujanaa cua quiniuriani, socua pueya quiniuria pa Jiyaniijia Jesucristo tojtianaa. ²⁰Jesucristo rupaa cua pohuatasacari cuarta Judiocuaca niquiara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquiarani. Naacuajitij, socua Judiocuacaari Jesucristo rupaa tojtiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritiatej cante cuno rootasano tojtiaajaani. Naacuajitij, cua quishacari juhua nojori, nojoriiri socua cua tojtiaa cua pohuatasacari Jesucristojiniji. ²¹Naajuhuaaj, cua quishacari tamasa pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiquiaajuhuaaj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhuaaj, puetunu Jesucristo niishitiojosanojuanaa tojiquiaanijia. ²²Noojiaqueya Pueyaso muerasuuri maja na naata tarinitanu najuhuaana na supuetanaa rootasano. Cuaara tarinitiaara najuhuaana na supuetanaa rootasano. Naajaa, janiyari mariyata cuno najuhuaana rootasano tojiquiaajuhuaaj nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso

rupaata, nojori tojtiasacari janiya, juhua nojori cua quishacari. ²³Janiyari puetunu naa miiquiaajanaani, socua pueya cua tojtiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

²⁴Niaacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajaanaari jyanohua netecuatujaaja jaaraajaaja. Cante narta netecuatumaa shocotajani, shanohua casaa niqutioshiyari. Rituuquia pueyanoori jyanohua shuquiriaatia quijia na shocotanojiniji na masacari casaa. Naajuhuaaj pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jiitiasanojiniji jiyocuacaanu. ²⁵Naajuhuaaj, pueya jaara tacuarishijionu paniri, cante shocotanu paniyani, cuno pueyanoori puetunu najuhuaana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masenura na shocotanojuanaa, cunoori saaja shanohua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacari. Naaratej, pa tarinitiare puetunu najuhuaana tama pa miiniu panishanojuanaa, pa shuqiritiniuria pa Pueyaso.

²⁶Pueya netecuatusacari, netecuatumaa cuaara niishiiria tee netenu puequeetu quiyani. Majaari najuhuaana na camarucuneejonu. Naajuhuaaj, cua poonijosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuaana na piquiniu capa. Naajuhuaaj, pa cartere najuhuaana pa miiijosano. Saaja pa niishiriojore Pueyasocua, maninia pa tojiniuria nojuaja. ²⁷Janiyari jyanohua saniniuujia quiaaja maja cua miiniuria tama cua cuaqueya miiniu panishanojuajaani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuaja tojiyaquirini, Pueyaso mariqui cua cartereeri, maja na rupaa cua pohuatanura socua.

Supuetanaa Israel pueya miishanoori pajaniyara naajiotasaaquiaari pa niishiniuria maninia

10 ¹Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanesacari pueyaracaanu cariquia jiyajinia. Majaari nia niyajanu niaa mariqui Pueyaso tojiyashijara quiriohuajuhuaaj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaaj. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajaanaari niuutiaquiaari joojuashiquio. ²Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiaconio. Majaari socua na qutiuniu quiquiaari Egipto pueya seya. ³Puetunu nojorijianaari jiya cajiniocuaji casaa miaquenuujua, Pueyaso tinishano nojori miaquesocori-quiano pueyaracaanu cuno cariquia jiyajinia nojori rucuanesacari. ⁴Naajuhuaaj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajaanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵Puetunu cuno supuetanaa Israel pueyajaanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojtiaashijia quiquiaari saaja. Pueyasoori cuno nojori shuqiritiaaquiquiaari. Naaratej nojori cusojuanuuriquiaari

cuno cariquia jiyajinia nojori camarucuneetasacari pueyaracaanu, cuaara puequequiaaritiaatijia puetunu cuno tojiyashijiacajanaa.

⁶Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniijiri puetunu naajiotasaaquiaarijanaa pajaniyara, pa niishiniuria maja sesa casaacua pa jiaatianurajuhua. ⁷Shushajanaa nojori coteesacari rucuanenu cariquia jiyaco, noojiaqueya nojorijiniijinoori caapiqui casaa shipiniquiaari orojiniji juhua juunu niqishano. Nojoriiri tama nojori shipinijosano casaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaaritij:

“Pueyari cajituri queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miituquiaariiri”.

iMaja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸Na nuhuaji, tamacari, noojiaqueya nojorijiniijinoori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “iCuaara puecoosaaria cuno sesa miijia!” Cunora, veintitres mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhua, taa nojori miiquiaaricuaa taatujuritiani.

⁹Na nuhuaji, noojiaqueya nojorijiniijinoori Pueyasota juaaquoquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusuquiciaari. Naaratej pueyanaa, maja cumaati pa juaanu, Pueyaso jaara pa saniniujuri. Maja naa pa miiniutij paa mariqui Pueyaso juaatiriiri.

¹⁰Tamacari, noojiaqueya cuno pueyajiniijinoori Moisésta juayonuutaquiaari. Moiséscuajaari nojori jitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajia na cusojuanura. Queraatia pueyari cusuquiciaari jiyacari. Naaratej pueyanaa, majaari pa juaatianu pa jiyaniijianucua.

¹¹Puetunu pa supuetanaajiniji naajiotasanojuanaari tariucuaaanu naajiotasaaquiaari, pa numootesaaquari quarijiani, quera pa Jiyaniijia muetasacariuhua. ¹²Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojjia seetanu cutarajanaa, niaa mariqui sesa miiriiri, juhujaniya nia quishacari tamajaaja. ¹³Niaari mariyata saniniujiushaaquiaajuhua, taa puetunu parta Pueyaso pueyajanaa saniniujiushaaquiaacuani. Naajaa, nia naata Pueyasocua tiuuniu maja puera nia saniniujiushaanura. Pueyasocuaajaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuanu taraatia nia miiniuucua. Naacuajiti pa naata rejeretanu, Pueyaso jaara Sesaaca saniniujitiri pajaniya.

Maja pa cojiniu tamasaca, na miaquenuusacari na jyanitiushano na pueyasooocua na puecootusano

¹⁴Cua panishano Pueyaso muerasunaa, maja nia tiuquitianu tamasaca pueya jyanitiushano pueyaso quiquiojinia, na tojtianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosaareeri. ¹⁵Niaacuajaari niishijia. Naaratej, nia niishiriojore cua sequesanoocua.

¹⁶Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ratusacari cuarta

Pueyaso muerasunaa, puetunu pajaniyajanaari pa Jiyaniijia rupuesano quiquiaani, na nanaca shoonuucua puetunu pocuarajanaa. Naajuhua, pa miaquesacari, paari sequequiaani: “Canaa Jiyaniijianaa, quiaari quia cuaqueya nootunequiaari puetunu canaacuarajanaa”. Naa pa miaquesacari, puetunu pajaniyajanaari jatiqiu pa Jiyaniijia cojiquiaani, na cuaqueya cusonuucua pocuara. ¹⁷Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetono quiya pa Jiyaniijiatani, juhua niquiriyatu cuaqueyaja.

¹⁸Nia niishiriojoriquia taa Israel pueya miiquiaacuani. Nojori miaquesacari Pueyasooocua na mosano Pueyaso niqiuara, na niti nojori mosano seruuri juhua tama nojorijiaaja, Pueyaso jyanooniuria nojori. Naacuajitij, nojoriiri na naata Pueyaso rupeenu, nojori secojonura nojuaja. ¹⁹Jaara naa quiritij, taateerini, pueya jaara shipinijosano casaacuara mosano shu miaquere? ¿Casaate pueya jyanishano pueyasooocua mosano shuni? Nareja shucuaajaari. ¿Cumaacacara quijiate cuno, pueya shipinishano casaa juhua Pueyasorani? iMaja! ²⁰Naajaa, nia tojtiane casaa cua sequenutaniyani. iPueyaso niishiyashijia pueyari na miaquesocoriquiano na seya puecooquiaa samarhuacuara! Naa nojori miishanoniquitij, cunoori maja Pueyasora. Naacuajitij, nojoriiri samarhuarupequiaa, maja Pueyaso. iMajaari cua paniniu nia rupeenu samarhu! Nocuaji, maja Pueyaso niishiyashijia nia cojiniu cuno shu nia miaquenura. ²¹Majaari pa naata pa Jiyaniijata rupuetoonu, samarhuata pa rupuetosacarijuhua. ¿Pueyasote samarhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samarhuacuara mosano casaajuhua? ¿Cojitishiatee? iMaja pueyanaa! ²²¿Paateeri pa Jiyaniijia paraca cojiniu paniani, pa Jiyaniijia pa juaatiniuriani? ¿Pajaniyate socua cumueeca pa Jiyaniijajinijini? ¿Majateeri nia puerenu pa Jiyaniijia saniitonu?

Taa pa miiniutiani

²³Tari sequerecuaajiniji, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacu, maninia nojori quiniurijuhua. ²⁵⁻²⁶Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaano”. Naaratej, niaa jaara shu masere shu niqitiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhujaniya. Pa Jiyaniijia shipinishanocuaajaari. Pa miaquesanoori maja na naata na sesonu pajaniya Pueyasora.

²⁷Pueyaso niishiyashijia jaara nia masuure nata nia miaquenura, nia quiaare, niaa jaara quianu paniri. Juhujaniya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucua?” Majaari naa nia nequesotanu niaa mariqui nioojia macuhajetereeri niaa jaara niishiri nia miaquesanoori shipinishano casaacuara mosano juhua Pueyasooocua. Juhujaniya nia miaquere nareja. Puetunujuanaari pa Jiyaniijia shipinishanocuaaja. ²⁸Saniniujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasooocua”, majaari nia miaquenunoj, niaa jaara naa sequesaa. Maja nia miaquenunoj, nia cojinia mariqui na miaquerejaariuhua na cojishacari nijaniya. Nia tarajana jiyoteeri jyaniyajaa cuno shipinishano casaari seetanujuanaa cumaacacara quijia. Naacuajitij, na miaquesacari nocuara mosano shu, noojia macuhajanutaniyani. ²⁹Majaari nio cua sequenu niaara.

Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? ³⁰Paa jaara Pueyaso sequereni ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacari?” ³¹Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. ³²Puetunu nia miishanojuanaa cuaara quiriia maninia Judiocuaca niquiara, taucuaca niquiarajuhua, parta Pueyaso pueya niquiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyantiushano sacuarataa casaa. ³³Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuaara tojitiara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

11 ¹Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuanaani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

Maajipohuatucua taa quiriqiani Pueyaso pueya rerejosacari

²Cuarta Jesuucua tiuniaanaa, janiyari nia shuquiritiaani, pueyaracaanu nia niishishacari janiya, naajuhua, maninia nia tojitasacari puetunu cua niishitiojosanojuanaa Pueyasojiniji. ³Janiyari paniya cutarani socua nio nia niishiniuria: Cristocuajaari caya camarnu. Cayari saniniujia necocua camarnu, taa pa Que Pueyaso pa Jiyanijia Cristo camarnu quiyacuanaani. ⁴⁻⁵Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhua, jiyacari, canuu cuaara jocuara na nacaque na pocuasacari. Saniniujia, maajipohua pocuanura, nojori cuaara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhua, na naca mishiquiosano. Cararaatiajaariuhua, maaji pocuasacari Pueyasota, Pueyasorano, na naca mishiquiosoo. Maaji jaara caririqiyashijia quiri, ¿casaara na naca na tuqueteyaqiuya puetunujuanaacuaraari? ¿Maajiti juhua cayara quiniu paniya? Maja naasucua. ⁶Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuaara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririni. Cararaatia quiyajaariuhua, na secojosacari Pueyaso, na caminiujiushacari Pueyaso sequenu panishano pueya niquiarajuhua, mishiquiosoo na naca quishacari. ⁷Maajiiri neyaca shuquiritiya na tojjia na quishacari. Naacuajitij, neyacaari narta pueya shuquiritiasano quiyajuhua. Naaratej, maaji cuaara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniurajuhua. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

⁸Pueyaso jaara coteenujuanaa caya shipiniquiaari, majaari maajijini nia shipini nia quiquiaari caya. Maaji cutaraari caya riuquicuajini nia shipinishaaquiaari. ⁹Naacuajitij, maajiiri cayara shipinishaaquiaari. Majaari caya shipinishaanu quiquiaari

maajiria. Naaratej, maaji cuaara caya tojiiria cutara.

¹⁰Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhua. ¹¹Naajaa, puetunu pajaniyajanaari mariyata Pueyaso muerasuni, Jesucristoocua pa tiushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhua, cayari maja na naata supueno tamajaaja maajijiu.

¹²Seetanujuanaari, maajiiri coteenu shipinishaaquiaari caya cuaqueyajini. Na nuhuaji, puetunu canujuanaari saniniujia supuequiaa maajijini. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

¹³¿Taa nia sequeyani pueyanaa? ¿Maninateeri, maaji jaara Pueyaso secojore na naca mishiquiosoo pueya niquiara? Maja maninia. ¹⁴Naajuhua, quera puetunu pueyajaari sequeja, cararaatia niquishanoori caya jaara tucumuejaru quiya juhua maaji. ¹⁵¿Maajirijiataj? Jaara tucumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucumuejaru na quiniuria, na naca mishiquioriquiano na mucacata. ¹⁶Tamonu jaara nacoonu panijajaa socua pa muesujini, niocua na sequere: “Pablocuajaari tari pa niishitiojoree puetunu na miishishanojuanaa. Naajuhua, puetunu Pueyaso pueya maapuejanaari tamaquicuana nia miiquiaa taa Pablo pohuatere pajaniyacujani. Majaari socua pa niishiniu tamaatia quiniu”. Niojuanaari cua rootasano cunojini, pueyanaa.

Corinto pueyari sesa miiquiaari na miaquenujuajinia, pa Jiyanijia cusonu nojori niishishacari

¹⁷Cuarta Jesuucua tiuniaanaa, nio, janiya niaacuara na naajiyani, niiori maja cua shuquiritanura nijaniya. Nia rerejosacari pa Jiyanijia cusocari nia niishiniuria, niaanaari saaja sesa miiquiaa. Nia rerejonuni, cunoori nia cumaquitoonura juucua. Nia rerejosacari saniniujia, niaari saaja socua seseyaree. ¹⁸Janiyari naa pohuataaarucua nijaniyajini: “Corinto pueyari sesa na niishiriojonuta nojori jiuujajinia raquirijitiaquiaa nojori rerejosacari”. ¿Seetanutejanaa nio pohuatasano nijaniyajini? Naa naasucua. ¿Casaate cua toyani? ¹⁹⁻²⁰Seetanu naasucujanaa niaari nioojajinia nia niaquejoquiaaqui. Paacuajaari tari niishiquiaarini nojiaqueya pueyari Pueyaso pueya maapuecuaji rupanutaniya. Naa niishishanote canapueete maja Pueyaso muerasuni. Cante seetanujuanaa Pueyasocua tiujiani, majaari na rupanu quiniutianiya narta Pueyaso muerasuucua. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyanijia cusonu nia niishiniuria, maja sesa nia niishiriojonu juhua niyaquejono nia quiniuria. Naa jaara nia niyaquejoriquiatej, majaari pa Jiyanijia cusonu nia niishiniu quiquiaa seetanujuanaa. ²¹Niajanianaari tama nia patasanojuaja coteetaquiaa miaquenu. Naaanaari nia miaquesano serotaaquiquiaa. Naacuajitij, casamijuniucuaari miaajecoquiaacuua. ¡Saniniujia casamiriacaari juhuajaniya mashaasequenuquiacua! ²²¡Jiyanohua cararaatiaari naa nia miishanote! Naa jaara nia jamuejaca quiriqiatej, ¿majate nia naata tama nia tijajiaaja nia miaquenuu, ratunonio? ¿Niaateeri niarta Pueyaso muerasu soquiaa? Naa nia miishacari casamijuniucuatej, niaacuajaari nojori cararaquiaa, casamijuniucua nojori quiniucua. ¿Taa nia sequeyani pueyanaa? ¿Janiyate nia maninihuaqueetaani? ¡Maja! Jiyanohua tacayanijia. Majaari cunora cua shuquiritanu nijaniya.

Pa Jiyanijia rootasano na cusonu pa niishiniuria

²³Janiyacujani nia rootacanu tari pa Jiyanijia Jesu pohuatasano janiyani, taa na miaquequiaari na saquiriojosano

pueyatani. Cuno niucuaja, Judasri pa Jiyaniijia quiateriquiano quiriqiaa taucuaca mosocoriquiano. Cua tojitiarohuacuara pueyanaa. ²⁴Judas quiateyaquishacarijia nojuaja, pa Jiyaniijia Jesucristoori pan riqiaari. Na Que Pueyaso sequereeri: “Paacarasho cua Quena”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶Naa nia miaquesacaritij, nia ratusacarijuhuaj, pueyari niishiniutianiya niaari Pueyaso jiyanooshano pueya, pa Jiyaniijia Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniijia cuara tiuquiriohuajaatijia.

**Nia niishiri taate pa naata miaquenu pa
Jiyaniijia cusonu pa niishiniuriani**

²⁷Naaratej, niaa jaara sesa miiri, Pueyaso nia secojore ritia na jiyanoonihuara nijaniya, nia miaquenuhuara pa Jiyaniijia cusonu nia niishiniuria. Niaa jaara pa Jiyaniijia pan miaquere jiyanooshoo nia quishacarijia, niaa jaara na cusonu mashaca rature jiyanooshoo nia quishacarijuhuaj, iniaari na cusonu rerequeteya! Niaari juhua sequeyaruhua, pa Jiyaniijia najuhua cusoquiaari. Naa nia miishacaritij, niaa cutaraari saniitiosaanutaniya.

²⁸Naaratej, tama nioojiajiniaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoaquishacarijia nijaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturuhua pa Jiyaniijia raatonuquejini-ji cutara. ²⁹Cante juhuajaniya miaquereeni, cante juhuajaniya raturee najuhuanani, jiyanooshoo na quishacarijia, cuno pueyanoori Pueyaso saniitiotenutaniya tama na cuaqueyajaaja. ³⁰Naacuajitij, jiyanooshoo nia quishacarijia nia miaquesacari, queraatia nijaniyajinijiniori cunora cusosuhua quiya. Nioojiaqueya nijaniyajinijinio cutaraari tari cusonuucanujuhuj, Pueyaso saniitiosacari nojori. ³¹Nocuaji tama nia cuaqueyajaaja nia jeecare suraatia, pa Jiyaniijia mariqui saniniuujia nia saniitioreeri. ³²Pa Jiyaniijia jaara pa saniniuujia, canapute sesa quiyani, Pueyasoori na saniitioquiaa na muerasu nojori quiniucua, maninia nojori quiniuhua juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretajacata jiya puequesacari, Pueyaso jaqueroosacari na tojiyashijiaca.

³³Naaratej cuarta Jesuucua tiunuaanaa, niaa jaara pa Jiyaniijia pan sanu paniriquia na cusonu niishiniuria, nia sashiri niarta Pueyaso muerasu, jatiqui nia miaquenura maninia. ³⁴Miaajeyano maaraja, cuara miaqueera coteenu tama na tiajiniaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

**Pueyaso Sohuanu cumaquishacari puetunu
Pueyaso muerasujanaa**

12 ¹Cuarta Pueyaso muerasunaa, niaacuajaari tari niishiya Pueyasoori na Sohuanu niqutioquiaa puetunu pajaniyajanaa, na cumaaca pa jiitianura. Quiarijiani, socua nia

niishitiojonu paniya cunojinijiniya. ²Niaacuajaari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiarijianaa, pueya shipinishanoocua nia tiuuniucua najuhuanaj. Sesaacaari naa nia tojitiqiaari najuhua nia pueya shipinishano, nia jyanishano pueyasohuani. ³Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojinijini? Naa nia saniniuujitij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesuacujaari Jiyaniijiajanaa”. Naacuajitij, maja nia tojiniu na rupaa, cante Jesucristo sesacajani.

⁴Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujanaa cumaquiquiaa tamaatia miishano pa miiniuria na cumaacata. ⁵Queraatia tamaatia poonijiosanoori Pueyasora quiya. Naajaa, puetunu pajaniyajanaari niquiriyatujua Jiyaniijia poonijioquiaani. ⁶Puetunu pajaniyajanaari tamaatia miiquiaa pa poonijiosanoni. Saniniuujia, Pueyasojuanaari na panishano miiquiaa puetunu pueya jiuujiajiniajanaa. ⁷Pueyasoori puetunu na muerasujanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujanaa. ⁸Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹Pueyaso Sohuanuuri tamonu cumaquiquiaa Pueyasoocua na tiuuniuria jyanohua, na shiniuujiniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhuj cusosuhua na naatanijionura Pueyaso cumaacata. ¹⁰Pueyaso Sohuanuuri tamonu pueyano jiyajeneta miishano miitijuhuj Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niqiaari. Pueyaso Sohuanuuri tamonu niishitiquiaa teyano sohanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojioquiaa tamaatia rupajinia sequesano na pacunura pueya rupajiniajuhuaj, pueya tojiniuria maninia tama nojori rupajiniaaja. ¹¹Naacuajitij, Pueyaso Sohuanujanaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacujani, cana na panijajaaniuhuj.

Puetunu Pueyaso pueyajanaari juhua niquiriyatu cuaqueya quiya

¹²Tamaatia poonijiosano puetunu pajaniyajanaa jiitiasacari, paari juhua niquiriyatu cuaqueya quiyani. Mijiria pa cuaqueyari jyanohua maninia shipinishano jyanohua Pueyaso niishitijata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhuj. Naacuajitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijia pa poonijionura jatiqui. ¹³Pueyasoori pa rupuetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasujanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari rupuetootesano quiya niquiriyatu Sohuanutani. Naacuajitij, paari juhua niquiriyatu cuaqueya quiyani: Judiocuaca, taucuacanio, poonitijiosano pueyajuhuj, camarnuuj pueyano.

¹⁴Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa

cuaqueyajinia. ¹⁵¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuj, majaari pa soonu tamaatia poonijosano pa jiitiasacari Pueyasora.

¹⁶Naajuhuj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷Paa jaara saaja puereetuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

¹⁸Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaquiaari tee Pueyaso paniquiaari nianucujani. Naajuhuj, Pueyasoori puetunu na muerasujanaa cumaquiquiaa mariyata, tamaatia poonijosano pa jiitianura taa na paniyacujani. ¹⁹Pa cuaqueya jaara quiriquia saa namijiaja puetunujuanaa, ¿pa cuaqueyatuma tee quiriquia socuani?

²⁰Puetunu pa cuaqueya casaajanaari namitia saaja niquiriyatu cuaqueya quiya.

²¹¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuaa quijiaa. Maja nia naata niqiniuu”, ¿majate pa juaashiquia pa panishanojuhuaj? Taaquiririnij. Naajuhuj, pa naca jaara pa niohuaca sequere: “Niohuacanaa, niaari najuhuaa quijiaa. Maja cua paniniu niya nijaniya”, ¿majate pa niohuaca pa panishanojuhuaj pa rucanejotajara? Taaquiririnij. Pueyanaa, naa pa quiri jatiquijihua puetunu parta Pueyaso muerasutajanaa, taa puetunu pa cuaqueyajinia pa jiitiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitionura maninia. ²²Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³Naajuhuj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririqijia cutarani, juhuasu pa quishacari. ²⁴Saniniujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuananarajuhua teyanote maja maninia niquishano pa cuaqueyajiniani.

²⁵Naacuajitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. ²⁶Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijuhuj.

²⁷Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸Cristo cuaqueya pa quishacari, Pueyasoori coteenujuanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari

cusosuhua naatanijionaa nojori quiniurijuhuj, Pueyaso Sohuanu cumaquishacari nojori. Tamasacaari jiyatesaaquiaari-jiuhuj Pueyaso muerasu naacunaara nojori quiniuria. Tamasacaari jiyatesaaquiaarijiuhuj Pueyaso muerasu jiitianaa nojori quiniuria. Tamasacaari pohuatesaaquiaari tamaatia rupaacajuhuj. Naacuajitij, queraatia tamaatia poonijosanoori quiya. ²⁹¿Puetunu Pueyaso muerasujanaateeri jiyaramiquishaaquiaari Jesucristojiniji nojori pohuatanaa tamasaca niquiara? Maja. ¿Puetunu Pueyaso muerasujanaateeri Pueyaso rupaa pohuatanaa? Maja. ¿Puetunu Pueyaso muerasujanaateeri Pueyaso rupaa niishitiojonaa? Maja. ¿Puetunu Pueyaso muerasujanaateeri jiyajeneta miishano miijiaa? Maja.

³⁰¿Puetunu Pueyaso muerasujanaateeri cusosuhua naatanijionaa? Maja. ¿Puetunu Pueyaso muerasujanaateeri tamaatia rupaaca pocujaja? Maja. Tamaatia rupaajinia pohuatasano jaara quiriquia, ¿puetunu Pueyaso muerasujanaateeri na naata na pacunu tama nojori rupajiniaajaaja? Maja. ³¹Naaratej, nijaniya cuara jiaatiaara socua maninia poonijosano nia jiitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiunianaana, quiarijiani nia niishitiojoreera casaate socua panishanoni, Pueyaso shuquiritianura pajaniya.

Panijiaa pa quirij

13 ¹Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani. ²Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniaquishacari pueya, janiya maara najuhuaa quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuaa quijia quiri Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasooocua cua tiuuniuucua jiyanoahuani, naajaa. Cua paniaquishacari pueya, janiya maara najuhuaa quijia quiriquia Pueyasorani. ³Naajuhuj, janiya jaara puetunu cua casamijianaa nareja niqutiore casamijiumiucua cua paniaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuatunurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatunuucua, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jiitiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. ⁵Cante pueya panijiani, majaari pueya na cararojonu. Cante pueya panijiani, majaari saaja nera niishiriojojua tamajaaja. Cante pueya panijiani, majaari ritia juaajia. Majaari na niishiniu naminiujiuhuj, tamonu jaara sesa na miiri. ⁶Cante pueya panijiani, nojuajaari pueyacua taraajeja, nojori miishacari sesa. Saniniujia, nojuajaari shuquiriaatia quiya pueya miishacari Pueyaso panishano. ⁷Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojininio. Naajuhuj, majaari na tarinitianu maninia miiniu pueyaracaanu. Pueya panijiaari naa puetunu rejeretajajanaa, taraatia na miishacari.

⁸Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara

panijara pa quirij. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujiuniuria, pa niishishoo rupaaca pa pocuanurajuhua, Pueyaso niishitishano pajaniya pa pohuatanuranio. Puetunu nio niishishanojuanaari puequenutaniya Jesucristo tiuquishacarihua pocua. Paniniu cutaraari puequeyaquiniutianiya. ⁹Mijiria pa quishacari, paari saaja shiitianiyojua Pueyaso niishishano jiiitiani. Pa niishishano Pueyasojiniji pa pohuatasani, cunoori saaja shiitianiyojua Pueyaso niishishanojiniji. ¹⁰Naacuajitij, mijiria pa niishishanoori najuhuana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyaajanaani.

¹¹Janiya jaara naatujua quiquiaarini, juhua naatujua pocuaquiaarinijia. Juhua naatujua niishiriojoquiaarinijia. Saaja naatujua niishitiaja jiiitaciaarinijia. Saniniuujia, janiya jaara cumantumaca quiquiaarini, janiyari cua naatujua quini niyajetaquiaarini. Naajuhua mijiria pa quishacari, paari juhua naatujoori quiyajaa Pueyaso niquiarani. Pa Jiyaniija tiuquishacarihua, paa cutaraari cumueeca Pueyaso pueya quiniutianiya. ¹²Mijiria pa quishacari, paari shiitianiyojua niishiyani. Paari juhua ninitia niquiya jaryani, juhua sesarunee niqitiujinia. Pueyaso shuriucua pa quishacari, paari maatia niishiniutianiya. Quiarijiani, saa shiitianiyojua jaari pa niishishano. Na nuhuaji, Pueyasota pa quishacari, paari puetunu maninijanaa niishiniutianiya, naatej, taa Pueyaso niishiya puetunu pajaniyajanaacuaani. ¹³Quiarijiani, paari Pueyaso rupaacua tiuuni niishiyani. Naajuhua, paari juhujaniya sashini niishiyani, maatia pa niishishacari nojuajaari maninia miiniutianiya pajaniya. Nioori maniniacua. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajiniujinaana.

Niishishoo rupaaca pocuanujiniji niishitiojosano

14 ¹Naarate cua panishano Pueyaso muerasunaa, nia jiaatiare socua jyanohua pueya panijia nia quiniuria, Pueyaso panijiacajuhua. Naajuhua, nia jiaatiare Pueyaso Sohuanu cumaaca nia jiiitanura maninia nia miiniuria. Panishano cutaraari Pueyaso Sohuanu niishitiaja nia jiiitanura, Pueyaso sequenu panishano nia caminiujiuniuria Pueyaso pueyara. ²Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohua Pueyaso Sohuanu niishitishano pohuataa pueya niquiara najuhuanaj. Majaari pueya niishini casaa na sequeyani. ³Saniniuujia, cante Pueyaso sequenu panishano caminiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanjiajaariuhua. ⁴Na pohuatasanoori maja najuhuana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuana pocuaari. Saa tama noojia cumaquiyajaarijia. ⁵Puetunu nijaniyajanaa jaara niishishoo rupaaca pocuanu niishijia quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu nijaniyajanaa jaara Pueyaso sequenu panishano caminiujiniana quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhua, maatia Pueyaso sequesano nojori tojishacari.

⁶Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuataase nijaniya nia niishishoo

rupaajiniani? ¿Niaatucua cumaquishaare cua pocuasacari najuhuana naa nia niquiaratej? Maja. Naa cutaraari cumaquishano quiniutianiya, janiya jaara nia pohuatare nia rupaajinijanaa Pueyaso niishitiojosano janiyani. Maninijaariuhua janiya jaara nia niishitiojore Pueyaso rupaa nia rupaajiniani. ⁷Nia niishiriojore. Jiuujiaaju casamiiri rupaaracajuhua. Naaratej, paari shuquiriaatia tojitiaa naajua jonesesarini, jaaquequejotaja taquinosacarijuhua. Saniniuujia, pueyano jaara naajua jonejono saniniujia nia niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishini casaa na jonenenu paniya juucuan. ⁸Naajuhua, trompeta jaara sesa jonesesaare, ¿soldadohuate na naata niishini casaa na miiniutianiya? Maja. ⁹Mariyata naajaariuhua, nia jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuana nojori niquiara. ¹⁰Niaacuajaari niishiya queraatia rupaacaari mijiria quiya. Puetunu maninijanaa cutaraari na niishinara. ¹¹Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuaari tahue quiya quiriajuhua. ¹²Cuarta Jesucua tiuuniiana, niaacuajaari Pueyaso Sohuanucua jiaatiaquiaa, na cumaaca nia jiiitanura. Maniniacua. Naajaa, nijaniya cuara jiaatiaara Pueyaso Sohuanu cumaquiniuria nijaniya, puetunu tamaatia poonijosanojuanaa nia miiniurajuhua, maja saaja tamaatia rupaacajinia nia pocuanura. Naacuajitij, nia naata narta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari nijaniya.

¹³Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuara secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajinijuhua. ¹⁴Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishini cutara casaa pa sequeyani. ¹⁵Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuara secojora Pueyaso pa niishishoo rupaajinia. Pueyaso pa secojorejuhua tama pa rupaajinijaja. Naajuhua, pa sohuanu cuara jaaquequejora Pueyaso niquiara pa niishishoo rupaajinia. Pa jaaquequejorejuhua tama pa rupaajinijaja. ¹⁶Pueyaso Sohuanu jaara nia sohuanu secojotere niishishoo rupaajinia, nia tojitianaari maja na naata sequenu: “Jaa, cuara naa quiiriatej”. Majaari nojori niishini tamaatia rupaajinia nia secojosano. ¹⁷Niaa naasucuaari jyanohua maninia secojiya Pueyaso. Naajaa, saaja najuhuana quiyari tamasaara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasa. ¹⁸Pueyanaa, shuquiriaatia quiyanija Pueyaso niquiara, Pueyaso Sohuanu pocuasacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaaja socua nijaniyajiniji cutarani. ¹⁹Naajaa, janiya jaara pueyacaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriquiaj. Rupaquijia pohuatasano tama pueya rupaajinijajaani, cunoori jyanohua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiriaquiaa quiarinio tacuarishijotajacuaani. Naa jaara juhua naatujoori quiniu panijajaa, sesa niishiriojijashijia nia quiri, taa naatujoori quiyacuaani. Saniniuujia, majaari seetanujanaa naatujoori nijaniya. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. ²¹Tariucuaanu, tama Pueyaso sequesanojaarijia naajiotasaaquiaari. Naa sequeyari:

“Janiyari taucuaca jiyaramiquiniutianiya cua saquiriojosa-
no Israel pueyacuani, cua sequenu panishano nojori
pohuatanura cua pueya. Cua pueya niishiyaquishoo
rupaacajinia pohuatanutaniyari. Naajaa, niishiyanjia,
tahua pohuatasacari cua rupaa, cua pueyari saa cua
ruuretanutaniyajaa, taa nojori ruuretaquiaa cua
rupaacuaani jaara tama nojori rupaajiniajaaja
pohuatasariquiaa”.

²²Naa Pueyaso sequesaciritij, paari niishiyani, Pueyasoori
tamaatia rupaacata na tojiyashijiaa tojitiniu saniniuquiciaa
na rupaa juucua. Paari saniniuujia tari na rupaa tojitiajaca
cutarani. Naaratej, majaari socua panishano Pueyaso sequenura
pajaniya pa niishishoo rupaajinia, na tojitiniuria pajaniya
nojuaja. Pueyaso sequenu panishano caminiujiushano cutaraari
pajaniyara. Cunocujaari tama pa rupaajiniajaaja. Cunoori
maja Pueyasocua tiuyashijiacara. ²³Naaratej, Pueyaso pueya
maapue rerejosacari, saaja secaja nijaniyajinijinio cuaara
pocuaara niishishoo rupaajinia. Naa pocuanu nia tariniutare
quenaaja, tamasaca Jesuucua tiuyashijiaa quishacari nia
rerejojuajinia, nojori mariqui jyaniriiri: “iNio pueyaqui
puetunu paatecoorijihuuanajaj!” ²⁴Saniniuujia, puetunu
nijaniyajanaa jaara Pueyaso sequenu panishano caminiujiya
tama nia rupaajiniajaaja, tamonu pueyano jaara niaacua
tiuquiri, nojuajaari maninia niishiniutianiya nia pohuatasano.
Puetunu nia pohuatasanojuanaari noojia tacaatiniutianiya sesa
miijia na quiniuucua. Tama nojuajaari nia niishiniutianiya:
“iJaniyaqui sesa miijia Pueyaso niquiarani!” ²⁵Nia pohuatasano
Pueyasojinijiri puetunu sesa na miishanojuanaa na
niishitiniutianiya noojiajinia. Nocuaji, nojuajaari Pueyaso
tojijiaa quiniutianiya. Sequenutaniyari: “iPueyasoqui
seetanujuanaa nia tajinia niya quiya!”

Puetunu nia miirijianaa maninia.

Majaari nia riutiocojonu tamonu pocuasacari

²⁶Naaratej, cua tojitiare taa nia miiniutianiyanu cuarta
Pueyaso muerasunaa. Naa nia miiri nia rerejosacari. Puetunu
nia miishanojuanaa cuaara quiiria nia cumaquitioonura, socua
maninia Pueyaso tojitianaara nia quiniuria. Naacuajitij,
Pueyaso Sohuanu cumaacata, tamonu naasucuaari jaaquequejo-
nutaniya. Tamonu naasucuaari Pueyaso Sohuanu
niishitiojosano noojiajinia caminiujiuniutianiya. Tamonu
naasucuaari niishishoo rupaajinia pocuanutaniya. Na nuhuaji,
tamonu cuaara na pacuura nia rupaajinia, maninia nia
tojiniuria. Naa nia miiri maninia. Niquiriyatujua cuaara
pocuaara coteenu, na nuhuaji tamonu, na nuhuaji socua
tamonu. Naate nia miiri. Majaari nia riutiocojonu tamonu
pohuatasacari. ²⁷Naa jaara niishishoo rupaajinia pocuanu
paniri, cuaara pocuaara saa querajaa pueyaja, maja socua.
Cuaara pocuaara niquiriyatujua, na nuhuaji tarajanu, na
nuhuaji socua tarajanu. Naate maninia. Maja nia pocuanu
tamonu pocuasacari. Na nuhuaji, tamonu cuaara pacuura
pueya rupaajinia, niishishoo rupaajinia nia sequesano, pueya
tojiniuria maninia. ²⁸Niishishoo rupaajinia pacuna quiyaquishacari,
cuaara pocuaaquiiria cante tamaatia rupaajinia pocuanu
paniriquiaa nia niquiarani. Na naata sanaa pocuanu noojiajinia
tamajaaja, saa Pueyaso niquiaraja.

²⁹Naajuhuj, niaa jaara Pueyaso Sohuanu niishitiojosano
nioojiajinia pohuatanu paniri, cuaara pocuaara saa querajaa
pueyaja, maja socua. Na nuhuaji, Pueyaso Sohuanu cumaaca
jiitianaa cuaara saniniujuuria nia pohuatasano, nia
niishiniuria, cunote seetanujuanaa Pueyaso Sohuanu
niishitiojosano, maja soj. ³⁰Nia pohuatasacari Pueyaso rupaa,
tamonu jaara pohuatanu paniya shusha Pueyaso Sohuanu
niishitiojosano noojiajinia, cante pohuataajaani cuaara
sanaajeera, na tarajana pocuanura. ³¹Naacuajitij, puetunu
Pueyaso niishitiojosano jiitianaajanaari na naata na pohuatanu.

Naaratej, niquiriyatujua cuaara pohuataara, na nuhuaji
tamonu, na nuhuaji socua tamonu. Naacuajitij, puetunu
nijaniyajanaa na naata pohuatanu nia niishishano Pueyasojinijia.
Naacuajitij, puetunu Pueyaso muerasujanaari maninia
niishitiojosano quiniutianiya, maninia cumaquishanojuhuaj,
maninia nia miiniuria. ³²Maja timia pocuanu jaarajaaja tamonu
pocuasacari. Majaari Pueyaso Sohuanu pocuatenu tari
nijaniya, tari tamonu pocuasacari. Naa nia naata cutaraari
sashiniu nia pocuanura. ³³Pa Pueyaso cutaraari maninia
miijiajanaa. Maja cushitiojojua. Naarate pueyanaa, maja
tamasaca pocuasacari pa riutiocojonu. Saaja maninia pa
miiriquia pueyaracaanu.

Cua tojitiare socua. Puetunu Pueyaso pueya maapuejanaa
cuaara nia miiria na rerejosacari. ³⁴Maajipohua cuaara sanaa
tojitiaara Pueyaso rupaa pohuatasacari. Maajipohua cuaara
niishitiojiaquiiria pueya niquiara. Maajipohua cuaara tojijiaa
quiiria, taa pa niishitiojosaaquiiaari Moisés Rootasanojinijicua-
jani. ³⁵Maajipohua jaara niishiniu paniya socua pohuataana
niishitiojaninjia, nojori cuaara nequesotohuara neyaca tama
na tajiniajaaja, na que maaraja. Cararaatia cutaraari maaji
jaara nequesoreetare caya pohuatasacari, Pueyaso muerasu
rerejojuajinia. ³⁶Nia tojiri nio cua rootasano pueyanaa.
Niaacuajaari niishiya, Pueyaso rupaari supueyaquiquiaari
nijaniyajinijia. Naajuhuj, majaari Pueyaso rupaa pohuataana
jiyaramiquiniu quishaaquiiaari saa niaacuaja. Tamonu
jiyacajinia, queraatia Pueyaso pueya maapueeri cua
niishitiojosano tojitiaquiaa maninia cutara. ³⁷Nijaniyajinijinio,
noojiaqueya pueyari Pueyaso Sohuanu cumaaca jiitaa, nia
niishiniuria cana cumaacata tamonu pueyano niishitiojiani.
Naacuajitij, ¿taa nia sequeyani? ¿Majate Pueyaso Sohuanu
niishitiojosano cua sequesano nijaniya? ³⁸Cante nio niishiniu
paniyaquiyani, cuno jiyoteeri maja Pueyaso Sohuanu
cumaacaraca quijia. Cuno pueyano cuaara tojiyaquishaaria
saniniuujia.

³⁹Naacuajitij cuarta Pueyaso muerasunaa, nia jiaatiare
Pueyaso Sohuanu cumaaca nia jiitianura, pueya niquiara nia
pohuatanura Pueyaso Sohuanu niishitishano nijaniya.
Naajuhuj, majaari nia tenujunu noo pojori, canapue
niishishoo rupaacajinia pocuanu paniyani, Pueyaso Sohuanu
cumaquishacari nojori. ⁴⁰Nareja maninia nia miiriquia
puetunujuanaa. Naacuajitij, niquiriyatu cuaara pocuaara
coteenu, na nuhuaji tamonu, na nuhuaji socua tamonu.

Cristo samiitiasacariuhua

15 ¹Cuarta Jesuucua tiuuniaanaa, Jesucristo rupaa nia
niishiriohua, tarijia cua pohuatasano nijaniya, nia
jiyanooshaanurani. Naaari nocua tiuquiquiaari maninia. Naaari
quiarajia maninia na tojitiaajaa. ²Naacuajitij, Jesucristoori
niaacuaji tacuquiaa quiarajia, maninia nia tojitasacari na
rupaa, taa cua pohuataquiaari nijaniyacuaajani. Naaacuajaari
Pueyaso pueyara jatanishano quiya niaa jaara maja najuhuaana
na rupaa tojiyaquiquiaari. ³Janiyari niaara caminiujiuquiaari
Jesucristo rupaani, taa cua tojiyaaaricuaani. Nio cutara rupaa
nia coteetaquiaari pohuatanunjia: Cristoori pocuara
cusoquiaari niyacutesanojinia, sesa pa miiniuucua.
Tariucuaaanu Pueyaso sequenu panishano caminiujiuniaru
naa naajiotaquiaari, taa Cristo miishaanutaniya naquiyani.
Seetanujuanaa naa miishaquiaariiri. ⁴Jesucristo cusonu
nuhuaji, raaco niasaaquiaariiri. Jiuujanaraca juuca jaara na
shoconujuquiaari macu na quishacari, na raaco samiitiaquiaa-
riuhuari. Naa tohuateequiaariiri puetunu tariucuaaanu
Pueyaso Rupaajanaa, taa nojuajinjia naajiotasaaquiiaaricuaajani.
⁵Na nuhuaji, Jesucristoori Pedroocua muetaquiaariuhua. Na
nuhuaji, na jiyaramiquishocoriquiano pueyacu muetaquiaari-
jiaariuhua. ⁶Na nuhuaji, muetaquiaarijihuuj na tojitianaa
rerejosaaquiiri. Socua quinientos* pueyari na niqutiaquiaari
jiyacari. Queraatia jiyacari na niqutiaajinijinio pueyari

saminio quiyajaa. Noojiaqueyari tari shaajecocanu. ⁷Na nuhuaji, pa Jiyaniijiaari Santiagocua muetaquiaarijuhuaj. Na nuhuaji, muetanu pacutequiaariuhua na doce jiyaramiquisho-coriqiano pueyacuari.

⁸Puetunu cuno pojori nuhuaji, Jesucristoori socua cucua muetaquiaarijuhuaj, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. ⁹¿Casaaraqitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijiacua na qutiuniu quiquiaari. ¹⁰iPueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiarijiacuajani. Naa quiyaniijia Pueyaso jiyanooniucua janiya. Majaari najuhuaana na jiyanooni quiniuriaari janiya. Na jiyanooshacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajiniijini. Naajaa, maninia cua poonijosanoori maja tama cua miishanojuaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

¹¹Naacuajitij, naa sequeriquiaa nijaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaaacuahuaj, mariyata taa cuarta Jesucristo jiyaramiquishano pueya pohuataquiaacuani. Majaari rimijata canaa pohuatasano. Niaari cuno rupaacua tiuquiciaari maninia.

Pueyaso muerasu macunucua samiitiasacariuhua

¹²Cuarta Jesuucua tiuuniaanaa, canaa jaara pohuatariquiaa taa Cristo samiitiaquiaariuhua macujiniijini, ¿casaara noojiaqueya nijaniyajiniijinio sequequiaani: “Macunucua maja na samiitiaconu quiniutianihua”? ¹³Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaa? iMaja! ¹⁴Cristo jaara macu quiriqiaja, canaa maara najuhuaana pohuataa na rupaani. Naajuhuaaj, niaa maara najuhuaana Jesucristoocua tiuya, na pueya nia quiniu paniniuria juucua. ¹⁵Canaacuajaari pohuatanuquiaani Pueyasoori Jesucristo samiitianiyaariuhua. Macunucua jaara samiitianiyaquishaanutaniya taa nia jiyaniquiaacuajani, canaa jiyoteeri sapojonuujaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniuujia, iniaari jiyajeneya cutara! iPueyasocuaajaari seetanujuanaa Jesu samiitianiyaariuhua! ¹⁶Macunucua jaara samiitianiyaquishaanutaniya taa nia sequequiaacuajani, Cristo maara samiitiaquiquiaariuhua. ¹⁷Cristo jaara samiitiaquiquiaari, niaa jiyoteeri Cristoocua tiuya najuhuaana, Pueyaso na jiyanooniuria juucua nijaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuaaj. ¿Naatejaaratej? ¹⁸Cristo jaara macu quiriqiaja, tariucua shaajecono nocua tiuuniaa pueya maara taraatia quiriqiaja. Nojori maara taraatia shaajecanu puetunurajanaa, maja quenaaja nojori samiitiaconuhua. ¹⁹Pajaniyajuhuaaj, canapute saminio quiyajaa, paa maara jiyanoohua taraatia quiyani, pueyaracaanu najuhuaana naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriqiaja, paa maara najuhuaana poonijioriquia pa shuquiritiniuria nojuaja juucuanu.

²⁰iNamitia naa quiyaquiyari! iCristoori seetanujuanaa samiitianishaquiaariuhua! iCanaari na niqitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu

samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuuniaajanaari samiitianishaanutaniuhuaacuahuaj. ²¹⁻²²Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniijii supuenaajanaari shaajecoquiaajuhuaaj. Adán nuhuaji, parta pueyano Jesucristoori saniniuujia Pueyaso tojjia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhua pa Jiyaniijia. ²³Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacariini. ²⁴⁻²⁶Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianihua, na tucatanuhua puetunu na Que panishanojuanaa. Na Queeri na jiyaronutaniya puetunu na paraajanaa na pueconura. Jesucristoori Jiyaniijiajanaa quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaanio. Sesaacaari jataaanutaniyajuhuaaj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuaana shaajanutaniyajariuhuaaj. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiiitasano quiriohua, Jesucristoori na Que na niqutionutaniuhua, na Que jiiitianuhua puetunujuanaa.

²⁷Na Que Pueyasoori Jesu jiyatequiaari Jiyaniijia na quiniuria jiyanoohua na cumaacata. Naacuajitij, nojuajaari na naata puetunu casaajanaa na tojtianiniu. Nojuajaari Jiyaniijiajanaa. Saa na Que Pueyasojuajaari socua Jiyaniijiajanaa, maja tamonu. Pueyasojuanaa Neyanu jiyaroquiaari puetunu na shipinishanojuanaa na jenucuanura na cumaacata. ²⁸Na tucatasacari, pa Jiyaniijia Jesucristoori na Que sequenutaniya: “Cua Quena, tari tucataree quia panishanonijia. Puetunu quia paraajanaa quejooree tarinijia. Majaari socua sesa na miniu quiniutianiya. Saa quiajaniyajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiiitianura maninia.

²⁹Socua nia niishirojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquiniijosaaquiaa Jesucristoocua pa tiuushacariini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhua. Naajuhuaaj, paari mariyata samiitianishaanutaniuhua. Naaari sequeya macunucuaari maja na samiitianishaanu quiniutianihua. ¿Naatejaaratej? Macunucua jaara samiitianijiaquishaanutaniuhua taa nia jiyaniyacujani, ¿casaara pueya tiuquiniijosaaquiaa shusha shaajeno macu niticuaarini?

³⁰Paa jaara samiitianiyaquishaanutaniyani taa nia sequequiaacuajani, canaaquiri najuhuaana tama canaa cuaqueyajaaja panitiaquiaani, pueyaracaanu canaa poonijosacari pa Jiyaniijia. ³¹Seetanujuanaa nia sequeyanijia, janiyari jiyanoohua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujuanaajariuhuaaj, pueyari cua monu paniquiaa pueyaracaanuni, maja socua cua pohuatanura Jesujiniijia. Naajaa, janiyari tama cua cuaqueyajaaja panitiaquiaa puetunu juucujanaani, cua niishishacari janiyari samiitianisha-

nutaniuahuani. ³²Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajini. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuanu, nojuaja jaara samiitianiyaquishaaquiariuhua. Paa jaara samiitianiyaquishaanutaniyani, pa miiriqui taa Pueyaso tojiyashijia sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhuaj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapuate jiyaniyani macunucuaari maja na samiitianshaanu quiniutianiya.

³³Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujanaatej: “Maninia miiijaari sesa miiijara jatanishaaree na cojinuucua sesa miiijaa”. Naaratej, majaari nia cojinu sesoriquia pueya, niaa mariqui sesereariuhuj. ³⁴Niishiriojuara nia quiri. Sesa nia miinu nia cartere. Noojiaqueya nijaniyajiniinooori Pueyaso niishiyashijia quiyaja. Naa nia sequereenijia pueyanaa, quenaaja nia caririqiniuria.

Taamueca pa quiniutianihuani pa samiitiasacariuhua

³⁵Tamonu nijaniyajiniinoo naasucuaari niishiriojiya: “¿Taa macunucua samiitianiijosaanutaniuhajaarani? ¿Taamuecate na cuaqueya quiniutianiya?” ³⁶Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritianu. ³⁷Naajuhuj, niaa jaara saaco natate, tamaatia jajajuhuj, nia natasano jajauri maja juhua neyonarano niquishano. Nia natasanoori saaja shiitianiyoja jajau quiya. Na moritiasacari, jiyanohua tamaatia niquishiyari. ³⁸Pueyasoori na maashitiya puetunu na jaamasucuatjanaa, taa na panuacuajani. Pueyasoori puetunu jajajuhua moritianiijia tamaatia niquishano na quiniuria. Naa quiniutianiyaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacuajani. iPa cuaqueyari jiyanohua maninia quiniutianihuani!

³⁹Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajini. Shuhua cuaqueyari tamaatia quiyajuhuj. Sapitiaaja cuaqueyari tamaatia quiyajuhuj, moojinia na quiniuria. ⁴⁰Jiyocuaaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajini. ⁴¹Naajuhuj, pananuuri jiyanohua shacantuuca quiija. Raca shacantuucaari tamaatia niquishano pananu shacantuucajini. Riya shacantuucaari socua tamaatia niquishano. Naajuhuj, puetunu riyajanaari tamaatia niquishano narta riyajini. Puetunu Pueyaso shipinishanojuanaari naa tamaatia quiya.

⁴²Naajuhuj, Pueyaso muerasuuri samiitianshaanutaniya tamaatia cuaqueyata. Moquejacaari jamojosaanutaniya. Moqueyashijiaari saniniuujia samiitianshaanutaniuhua, pueyaracaanu na quiniuria. ⁴³Jamosano pa quete sequeeri samiitianshaanutaniuhua, jiyanohua shanohua niquishano na quiniuria. Cumaacaju jamosanoori samiitianshaanutaniuhua jiyanohua cumaacaraca na quiniuria. ⁴⁴Pa cuaqueya jamosanoori saaja jiyacua rucanejaca quiquiaari. Paari samiitianshaanutaniuhuanu tamaatia cuaqueyata, jiyocuaaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucanejonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririniji.

⁴⁵Pueyasoori coteenu pa supuetana shipiniquiaari marajini. Na nuhuaji, na samiitianiiaariiri. Moisés Naajionejiniiaari naa naajiotasaaquiariitij:

“Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiari juhua pa supuetanara na quiniuria pa supuetana Adán niti. iJesucristoori jiyanohua socua cutara Adánjini! Adánri samiitianshaaquiari saminio na quiniuria. Jesucristo cutaraari pa samiitianiijajanaa na Sohanuta. ⁴⁶Coteenujanaa pa supuetanani, majaari na shipinishaanu quiquiaari jiyocuaaanu quijarano. Cunora, coteenu pa cuaqueyari saaja mijiria quijiara. Na nuhuaji, pa cuaqueyari jiyocuaaanu quijiara jatanishaanutaniya mariyata juhua Jesucristo cuaqueyara. ⁴⁷Adánri saaja mijiria quiriquiano quiquiaari. Marajini shipinishaaquiariiri. Jesucristoori saniniuujia jiyocuaaanujinio. ⁴⁸Puetunu Adánacuajinio supuenojuanaari saaja mijiria quijiaca. Naaratej, puetunu pajaniyajanaari saaja cusonuujucani, juhua pa supuetana Adánjuhuj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuaaanu quijiaca pa quiniuria. ⁴⁹Mijiria pa quishacari, pa cuaqueyari juhua pa supuetana Adán cuaqueya quiya, marajini shipinishano. Majaari pa cuaqueya quiarijia socua maninia Adán cuaqueyajini. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuaaanu Quijia cuaqueya. Nojuacuajaari pa samiitianiina Jesucristo.

⁵⁰Cuarta Pueyaso muerasuna, maja pa naata Pueyaso rupenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupenu. ⁵¹Naajaa, cua tojitiare. Nia pohuatereera pueya niishishoo. Majaari puetunu pajaniyajanaa cusonuuriquianoni. Puetunu pa cuaqueyanaa cutaraari jatanishaanutaniyani, maninia cuaqueya pa jitianura, juhua Jesucristo cuaqueyajuhuj. ⁵²Jiyocuaaanu trompeta jonesacari, pa cuaqueyari ritia jatanishaanutaniya, naatej, taa pa nimishiniquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianshaanutaniuhua. Pajaniyajuhuj, canapuate saminio quiyajaani, pa cuaqueyari ritia jatanishaanutaniyajuhuj, quiarinio cuaqueya pa jitianurajuhuj, shaajeyashijia pa quiniuria. ⁵³Cusonuujuua cuaqueya cuara jatanishaaria, rishijia cuaqueya pa jitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jitianura, pueyaracaanu pa quiniuria Pueyasota.

⁵⁴Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuaaanu sequesanoori tari tohuateere. Naa naajiotasaaquiari tariucuaaanu Pueyaso Rupaajinatej:

“iJejee! iPa Jiyaniijiaari na muerasu mashiquirii macunucua quiquojini! ⁵⁵Cusojuananaa, iquiaqui tari shocotasaaree! iQuiaari shocotasaaree! Sesaacanaa, quia cusojuatajari juhua mohuacara quiqii cumaacaju. iShaajeconoori samiitiacoree!”

⁵⁶Pueyanaa, puetunu pajaniyajanaari cusonuquiaa sesa miiijaca pa quiniucua mijiriani. Paari sesa quiquiaani pa tojiyaquishacari tariucuaaanu Moisés Rootasano Pueyasojiniji. Naaratej, puetunu pueyajanaari cusonu niishiya. ⁵⁷Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniucujia. Naaratej, paari Pueyaso sequequiaani: “iPaacarasho canaa Pueyasonaa! Quiaacuajaari canaa shocotaniniutianiya cusonu, quia Niyanu cusonuucua canaacuara, pueyaracaanu canaa quiniuria quia shuriucua. iJiyanohua paacarasho!” Paari naa maniniuhuaqueetaa pa Que Pueyasoni.

⁵⁸Naaratej cua panishano pueyanaa, nia numaama nia racatare cua niishitiojosano nijaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanohua, na panishano nia miiniuria saaja. Pa Jiyaniijia nia poonijosanoori maja najuhuana na quiniu.

Casamijuniucua Pueyaso pueyara cumaneeca reratesacari

16¹Quiarrijiani, nia riuwareera taa nia miiniutianiyani, cumaneeca nia reratenura casamijuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Niaa cuara maninia miiria, mariyata taa cua rootacanucua Pueyaso pueya maapue Galacia jiyajiniani.²Naa nia miiritij. Puetunu domingo* juucajanaa, puetunu pueyjanaa cuara racataara tama na niqutiosocoriquiano cumaneeca, teyano nia niqutitionutaniya niarta Pueyaso muerasuracuajani. Naa nia racatare juhuataja nia niqutiosocoriquiano cumaneeca puetunu semaanajanaa*, maja na reratesaanura shusha cua tiuquishacari niaacua.³Niocua maninia pueya saquiriojore, nia niqutijosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesucua tiuuniaa pueyacuara Jerusalén tiacajinia, nojori cuara shuquiriaatia maseera cumaneecata nia jiyarotasano pueya.⁴Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhua.

Pablo naquerejosacari

⁵Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani.⁶⁻⁷Janiyari maja ritia cua tajiniu paniniu najaniya. Niaata camueenujunu paniya pueyaracaanunijia, pa Jiyaniijia jaara naa panijajuhua. Janiyari shuniya shocotenu paniya niaatani. Na nuhuaji, nia naata cua naacunu cua jiitianura cua panishano, cua pasocoriquiano tee Pueyaso jiyaronu paniya janiyacujani.⁸⁻⁹Janiyari niya Éfeso tiacajinia camueenujiya-jaarani, Pentecostés* juuca cua sashishacari. Queraatia pueyari Jesucristo rupaa tojtianu paniya niya. Naajuhua, queraatia pueyari Jesucristo rupaa ruuretaa saniniuujia. Naaratej, janiyari jiyanohua socua Jesucristo rupaa pohuatanu panijajaa Éfeso pueya niquliarani. Naajaa, janiyari niaacua quianutaniyani Pentecostés juucara queranacunuunu nuhuaji.

¹⁰Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuaaari pa Jiyaniijia poonijioquiaa mariyata taa cua poonijioquiaacuani.¹¹Naaratej, maja Timoteo nia rerequetenu. Niocua na naacure saniniuujia, cucua na tiuquiniuhua shuquiriaatia, maninia nia miiniucua nera. Janiyari niya na sashiya parta Pueyaso muerasutani.¹²Janiyari Apolota pocoojoriquiaani. Janiyacuajaari na nenecojoriquiaa

juucuanu, niaacua na quianura parta Pueyaso muerasuta quiarrijiani. Nojuajaari saaja cua sequeree majana na quianu paniniu quiarrijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³Cuarta Jesucua tiuuniaanaa, niishiriojuuca nia quiri. Jesucristo rupaa nia niishiri maninia, seetanujuanaa na tojtianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria.¹⁴Puetunu nia miishanojuanaa cuara quiiria seetanujuanaa nia paniniutia.

¹⁵Pueyanaa, niaari niishiya Estéfnasri necohuata coteenu Jesucristo tojtianaara quiquiaari cuniqui Acaya jiyajiniani. Nojori Pueyaso muerasu naacuquiaa pueyaracaanu nojori paniniutia.¹⁶Naarate nia sequenu paniyanijia, najaniya cuara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyjanaa, noo nojori canapueete naa maninia miiquiaa Pueyaso muerasucujani.

¹⁷Jiyanohua shuquiririucuaanijia Estéfnas tiuquishacari najaniyanijia Fortunatota, Acaicotajuhua. Nojori cua shuquiritiriucuaa nia niti, cua jiaatiasacari cua niquniuria najaniya juucua.¹⁸Nojori coojia cajitiriucuaa puera cua niishiriojiyaquiniucuaaji niaacua. Nojori naasucuaari nioojia cajitiquianujuhua, nojori pohuatasacari najaniya janiyanijia. Najaniya cuara shuquiritiaara nojori, naa nojori miishacari maninatej.

¹⁹Pueyaso muerasu maapue niya Asia jiyajiniaari cua sequerucuaa, cua saruhuatanura najaniya. Aquila, Priscilano, nojori jiyanohua nia saruhuataajuhua, narta Jiyaniijia muerasu nia quiniucuaajuhua. Pueyaso pueya maanuuri nia saruhuataajuhua, nooj, teyanote Aquila tiajinia rerejoquiaacuajani.²⁰Puetunu parta Pueyaso muerasujanaari niya nia saruhuataajuhua. Nia sarhuatatoosacari, nia sarhuatatoore seetanujuanaa Pueyaso paniniutia.

²¹Quiarrijiani, tama cua juaashiquiatataja saaja nioniojua naajioreeraj, cua saruhuatanura najaniya. Naacuajitij, niocua niishiri nio naajioneeri seetanujuanaa janiyanijia.

²²Cante maja pa Jiyaniijia panijia quiyani, Pueyaso cuara jataara cuno, saniitiosocoriquiano.

iJiyaniijianaa, quia nimiohua!

²³Pa Jiyaniijia Jesu cuara cumaquiria najaniya na Sohuanuta.²⁴Janiyari puetunu najaniyanijanaa paniyani Jesucristo paniniutia. Tariucuaaja, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhatasacari Pueyaso pueya maanu Corinto tiacajinia

1 ¹Janiyari Pabloni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaa naajiyani, puetunu Acaya jiyajinia Pueyaso tojtiajaca pueyacuaraajanaano. ²Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhuajaniya quijiaca nia quiniuria.

Pablo miishacari naquiya

³Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. ⁴Nojuajaari pueyaracaanu pa cumanijiaquiaa naquiya pa miishacari. Naacuajiti pa naata cumanijianu tamasaajuhuj, naquiya nojori miishacari, taa Pueyaso cumanijiaquiaa pajaniyacuaani. ⁵Seetanujuanaa, Cristo rupuejaca pa quishacari, paari naquiya miishaaquiaajuhuj, taa naquiya na miishaaquiaaricuaani. Naajaa, nojuajaari pa cumanijiaquiaa shuquiriaatia pa quiniuria. ⁶Naacuajitij, canaa jaara naquiya miishaaquiaa Cristojiniji canaa pohuatanuucuanu, Pueyasoori canaa cumaquiquiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanijiasaanurajuhuj. Naajuhuj, Pueyaso jaara canaa cumanijiarecuaa, naacuajitij, canaa naata nia cumanijianujuhuj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. ⁷Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucaajuhuj, taa canaa miiquiaa naquiyacuaani. Naacuajitij, Pueyasoori nia cumanijanutaniyajuhuj, taa na cumanijiaquiaa canaacuaani.

⁸Canaa panishano Pueyaso pueyanaa, canaari paniani nia niishiniuria taa canaa tacaacuanuni, jiyanoehua naquiya canaa miishacari Asia jiyajinia. Canaari puera jiyanoehua taraatia miiquianuni. Jiyacari, majaari tari canaa jiiitanu quiriquiaa cumaaca canaa rejeretanura socua. Canaari jiyaniiriquiaani maja naasucua tari canaa rishiniu quiniutaniya. ⁹Seetanujuanaa, canaari jiyaniijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuaajaaja, saaja nocua canaa tiuuniuria cutara. Nojuacuajaari macunucua samiitanijiojua. ¹⁰Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secojorejuhuaj. ¹¹Naacuajitij, Pueyaso miishacari maninia canaa, queraatia pueya secjonuucua canaacuaraajuhuj, queraatia pueyari Pueyaso sequenutaniya, “paacarasho”.

**Pablo pohuatasano casaara na quiaaquiquiaari
Corinto pueyacuani**

¹²Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso

niishiyashijiaca niquiaranio. Majaari canaa sapojonu quijia niajaniya. Canaari seetanujuanaa niaacua taraajecani Pueyaso jiyatenuucua canaa nia panijiaaca canaa quiniuria. Canaari nia maninia quiquiaari niaatani, saaja Pueyaso cumaquishacari canaa, maja tama canaa niishitajatajaaja. ¹³Cunora, janiyari nia nequesotaani, ¿casaara nia cushitiqianu canaa naajionea nia serojosacarini? Puetunu canaa naajioneecajiniyajanaa majaari canaa naajionu quiquiaa jiyajeneta casa, nia cushitiiniuria. Puetunujuanaacuaajaari maatia niishishaatia quiquiaa nia serojosocoriquiano. ¹⁴Niaacuajaari tari secaja niishiya taa canaa paniya jiyanoehua niajaniyani. Pa Jiyaniijia Jesucristo tiuquishacarihua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaaca quiquiaarini. Naajuhuj, niajaniyari canaa timitiasano quiniutaniyajuhuj.

¹⁵⁻¹⁶Cua jiyaniishacari niaa naasucuaari seetanujuanaa cana panijiaaca, taa cana paniquiaa niajaniyacuaani, janiyari cunora naquerejocanu niaacua juucuanu. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuj, cua tacatesacarihua cunocojuhua. Janiyari niishiriojoriquiaani nia naata naasucua cua naacunu cua panishanotajuhuj, Judea jiyajinia cua quianuhua. ¹⁷¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niquijiotenu quiquianu naa cua sequesacari niajaniyatej. ¹⁸¿Janiyateeri coojia niquijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. ¹⁹Naajuhuj, Neyanu Jesucristoori jataashijia. Silvano, Timoteo, janiyajuhuj, canaari nojuajiniji nia niquiara pohuataanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. ²⁰Jesucristocuaajaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritasacari Pueyaso, paari na sequequiaani: “Seetanujuanaari canaa quia sequesano, Pueyasonaa”.

²¹Jesucristo rupuejaca pa quishacari, Pueyasocuaajaari pa cumaquiquiaa, socua maninia na tojijiaaca canaa quiniuria, niajaniyajuhuj. Pueyasoori pa niqitioquiaari na Sohuanu, seetanujuanaa na muerasu pa quiniuria. ²²Pueyaso Sohuanu pa jiiitasacari poojajinia, naacuajitij, paari tari Pueyaso sesa jiiitaa juhua naajiotasano poojajiniani, saa neraja pa quiniuria. Na Sohuanu pa jiiitasacari poojajinia, paari niishiyani, paari puetunu na sequesanojuanaa maseriquianoni.

²³Niaari cua jiyaniquianu janiyari najuhua coojia niquijiotejani, niaacua cua quiaaquiniucua taa cua sequecanu coteenu niajaniyacuaajani. Pueyasocuaajaari niishiya, majaari cua

quianu quiquianu niaacua Corinto tiacajinia, maja cua tacaatiniuria nijaniya, janiya jaara nia nacasusee jiyanoahuani. ²⁴Canaari maja nia jiyaniijiani canaa shiniujiuniuria puera nijaniya, Jesuucua nia tiuuniuria. Niaacuajaari tari maninia Jesuucua tiuujia. Canaari saaja niarta Pueyaso pueyani, canaa cumaquiniuria nijaniya, socua pa Jiyaniijia tojijia nia quiniuria, seetanujanaa shuquiriaatia quijiaca nia quiniuria. **2** ¹Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura nijaniya. ²Janiya jaara nia taraajetere cua nacasusacari nijaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. ³Naaratej, janiyari niaacuara naajiocanuni, cua nacasunura juhuacarijia nijaniya, cua taraajeyaquiniuria niaacua cua tiuquishacari. Janiya jaara sashiri cua nacasunura nijaniya cua tiuquishacari niaacuani, janiya maara jiyanoahu nia taraajetereni, jecatoojua nia quishacari. Saniniuujia, niaa jaara juhuacarijia jecare puetunu sesa nia miishanojuanaa, naacuajitij, cua tiuquishacari niaacua, niari cua cojiniutianiya maninia, shuquiriaatia pa quiniuria jatiqui. ⁴Janiya jaara niaacuara naajiocanu coteenu cua naajioneeni, janiyari jiyacari jiyanoahu tacaariquia niaacuani. Coojiaari jiyanoahu taraajeriquiaa. Janiyari jiyacari nujuqueriquiaajaanihuaj. Majaari cua naajionu quiquianu cuno naajionee cua taraajonura nijaniya. Cunoori seetanujanaa quiquianu cutara cua niishitiniuria nijaniya, taa cua paniya jiyanoahu nijaniyani.

Cuno sesa miijia cuaara jiyanooshaaria jaara tari pishirri sesa na miiniujiniji

⁵Cuno sesa miijiaari maja na taraajetenu quiquianu saa janiyaja. Quera puetunu nijaniyajanaa naasucuaari taraajecanu cuno pueyano miiniucua sesa. Seetanujanaa, majaari puetunu nijaniyajanaa taraajenu quiquianu. Janiya jaara sequereri: “Puetunu nijaniyajanaa taraajecanu”, janiya maara puera na maateyani. ⁶Puetunu nijaniyajanaa jiyatenucua nojuaja saniitiosano na quiniuria, nojuajaari tari noojia tacatorohua sesa na miiniujiniji. Tariucua. Majaari socua na saniitionu. ⁷Quiarijiani nojuaja nia jiyanooriohua. Nia cumanijarohua, nojuaja mariqui puera tacaariiri jiyanoahu na taraajesacari. ⁸Nocuai janiyari jiyanoahu nia rootaani, maninia nia miriohua cuno pueyano, na niishiniuria niaaqui na paniyajaa. ⁹Janiyacuaajari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujanaa pa Jiyaniijajiniji cua rootasano tojitiajaca. ¹⁰Cua tojitiare, cana nia jiyanooriicuaani, janiyari na jiyanooyajuhua. Naacuajitij, pueyano jaara sesa miiriquia, janiyari Cristo niquiara na jiyanooquiaajuhua, jatiqui nia quiniuhua. ¹¹Naaratej, niarta Pueyaso pueya nia jiyanooriquia, Sesaaca mariqui pocua riuticoreeri, juaajia na jiyatenura pajaniya, pa jiyanoootioyaquiniucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyanooyashijia quiqiqiani.

Pablo tacaashacari Troas tiacajinia na quishacari

¹²Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanoahu tojitianu paniriquiaa Jesujiniji cua pohuatanura juucua. Jiyacaritij, seetanujanaa nojori niquiara pohuatasatia quiqiqiaari. Pa Jiyaniijia Jesuuri juhua tiotiu riatacanu cucuai juucua, cua pohuatanura nojuajiniji tii. ¹³Janiyari saaja nojori tiujiacanuhua puera cua tacaashacari, cua riuriataaquiniucua pa tarajanu Tito. Janiyari juucua paniriquiaani cua pohuatasaanura nijaniyajiniji. Janiyari cunora tacaariquiaa jiyanoahuani. Naaratej, janiyari Macedonia jiyajinia quiaarohuani, Tito cua pajenuhuara tii.

Pa Jiyaniijia Cristoori pa paraa pa shocotaniijia

¹⁴Janiyari jiyanoahu shuqiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaraca-

nu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojiniji juhua shanohua jaanutaja jaanujuquiaa pueya tajinia puetunu tiquiyocujanaa. ¹⁵Pueyasora, canaari juhua shanohua jaanutajani, Cristo quishacari canaa jiuujiajinia. Nojuajiniji canaa pohuatanuusacari, canaari puetunu pueyarajanaa jaanuuquiaani: Pueyaso muerasurano, saniitiosaariquiano pueyarano. ¹⁶Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueeteeri seetanujanaa Pueyaso jiyaramiquishanoni, na rupaa nojori pohuatanura, pueya na tiutiniuria Jesucristoocuan? ¹⁷¿Noo pojoritii, najuhua Pueyaso rupaa pohuatanuuquiaa, pueyajiniji na masejonura cumaneeca na sapojonunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujanaa Pueyaso jiyaramiquishano pueyani, na rupaa canaa pohuatanura. Canaari seetanujanaa pa Jiyaniijia rupaa pohuataquiaa Pueyaso niquiari, Cristo rupesano canaa quishacari.

Quiarinio rupaa Jesucristojiniji

3 ¹Naa canaa naajiosacari niaacuaretej, niaa naasucuaari jiyaniya canaari tama canaa cuaqueyajinijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu nijaniya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa niishijia cutara. Puetunu tiquiyocujanaa quijiaca pueyari canaajiniji niishiyacua, canaari seetanujanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua. ²¿Naajioneetucua casaara panishaareni? Puetunu pueyajanaari na naata niishiniucua canaari seetanujanaa Pueyaso jiyaramiquishano pueyani, nojori niishishacari taa canaa paniya jiyanoahu nijaniyani. ³Cristocuaajari nioojiajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojiajinia minianata. Seetanujanaa na Sohanuta na naajiotaquiaariiri. Majaari na naajiotanu quiquiaari saajianeecua. Seetanujanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niari seetanujanaa Pueyaso pueya, nojuajiniji canaa pohuatanuucua nijaniya.

⁴Naacuajitij, canaari seetanujanaa niishiyani canaari Pueyaso jiyaramiquishanoni. Cristocuaajari naa canaa niishitiquiaa maninia. ⁵Majaari canaa niishiriojonu canaa mijiosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. ⁶Na cumaacata, nojuajaari canaa jataniquiaari quiarinio na rupaa pohuatanua canaa quiniuria. Quiarinio na rupaari seetanujanaa Pueyaso Sohanu cumaacaraca cutara, pueya na jataniniuria seetanujanaa Pueyaso niquiohua nojori quiniuria. Tariucuaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojinuucua saaja. ⁷Naajaa, cuno rootasano saajianeecaacia quejasanoni, cunoori jiyanoahu maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhananuucua, Pueyaso shacantucaari nocua pacuriquiaa. Naacuajitij, na rosesacarihua Israel pueyacu, na jiquicoori

puera shacantuuca quiquiaarijia. Naaratej, narta Israel pueyari maja na naata na jiquioco niquniu quiquiaari. Na nuhuaj, cuno shacantuucaari jacaria maquesaquiariuhua. ⁸Quiarijiani, Pueyaso Sohuanuuri poonijioquiaa pueya jiuujiajania saniniuuja, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. ⁹Moisés pohuatasano Pueyaso rootasano nojuajani, cunoori seetanujuanaa jiyano hua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaa quiquiaari. Saniniuuja, quiarijiaari socua jiyano hua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquua seetanujuanaa sesa miyashijacara nojori jiyatesaanura Pueyasora. ¹⁰Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuuja, Pueyasoori canaa niishitiquiaari socua jiyano hua maninia rupaa canaa pohuatanura Moisés pohuatasanojiniji. ¹¹Moisés shacantuuca maquesaquiariuhua, cunoori maja na jataniniu quiquiaari Israel pueya. Quiarijia saniniuuja, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaca pa quiniuria.

¹²Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³Majaari canaa miiniu taa Moisés miiquiaaricuaani. Nojuajaari quenaaruque toqueta na jiquioco mishiquioquiaari narta Israel pueya niqiuiaquiniuria na shacantuuca maquesaano. ¹⁴Israel pueya jiuujiaaari juhua toqueta mishiquiosano quiquiaarijuhuaj. Cumajiuujiaa nojori quiniuucua, majaari Israel pueya niishiniu quiija Moisés caminiujuashano nojoriria. Cuarta Israel pueyari naa qiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhanojuaja tii qiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵Quiarijiaari naajuhua. Moisés naajioneeca jaara serojosaariquia Israel pueya niqiuara, nojori niishitiajaari juhua toqueta mishiquiosano qiyajaa, maja nojori niishiniuria nojori tojishano. ¹⁶Quiarijiani, pueyano jaara pa Jiyaniijaacua tiuuri, cuno toqueeri juhua na niishitiajiniji jaariutiasaaciaa, maninia na niishiniuria Pueyaso Rupaa. ¹⁷Pa Jiyaniijaari Pueyaso Sohuanujuhanajaj. Pa Jiyaniija Sohuanu jaara poojiajania quia, paari Sesacajiniji jaariutiasanoni, maja pa camarnu na quiniuria socua. Naajuhua, majaari tari poojia quiniu juhua toqueta mishiquiosano. ¹⁸Naacuajitij, puetunu pajaniyajanaari juhua niqiuia nenequaquiaani, pa Jiyaniija shacantuuca pacusacari pocua. Cunoori pa sohuanu rupetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaca pa quiniuria juhua nojuaja, na Sohuanu poonijosacari poojiajania.

4 ¹Naa pa Jiyaniija poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanooniucua canaa, nojuajaari canaa jiyatequiaari na rupaa pohuataanaa canaa quiniuria. ²Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhua, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquia, juhua toqueta mishiquiosano nojori jiuujia quishacari. ⁴Pueyaso rupaacua tiyashijiaa nojori quishacari, nojori jiyaniija Sesacaari nojori jiuujia jiyatequiaa juhua

cariyojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuuca quiija cutara, juhua na Que Pueyasojuhua. ⁵Canaa pohuatasacari Pueyaso rupaa nijaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijaajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniija Jesu. ⁶Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari:

“Cuhuashiqui cuaara coretaara ninishiquiji”.

Quiarijiaari naajuhua, nojuajaari poojia cuhuataquiaajuhua, pa niishiniuria nojuajaari tojetaarucujanaa maninia quiija. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quiija cutara, Pueyaso Niyanu na quiniuucua.

**Paari maninia quijiaca quiniutianiyani saaja
Pueyaso rupaacua pa tiushacari**

⁷Cuno cumaaca canaa na jiitiaani, cunoori Pueyaso cumaaca cutara. Saniniuuja, canaa cuaqueyari cumaacaju, saaja juhua maraujini panishano pataco. Naacuajiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. ⁸Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiitiasacari. Jiyano hua canaa tacaashacari, naajaa, majaari canaa tarinitianu quiquiaa Pueyasora poonijionu. ⁹Canaari naquiya miishaaquiaajaaniuhua. Naajaa, majaari Pueyaso cartenu quiquiaa canaa. Naajuhua, canaari juhua quiaquesano jiyocuara jaqueroosaaquiaajaaniuhua. Naajaa, majaari canaa cusojuasaanu quiquiaani. ¹⁰Puetunu tiqiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniija Jesu panitiaquiaari tama na cuaqueyajaaja pocuaracuaani. Naacuajitij, canaa na niqutiosano cumaaca poonijosacari canaa rishiyashijiaa cuaqueyajinia, pueyari niishiquiaa, Jesuuri seetanujuanaa saminio. ¹¹Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacuajitij, saminio na jiitiasacari canaa, Jesu cumaacari niqushaaquiaa rishiyashijia canaa cuaqueyajinia. ¹²Canaari juhua piriuquiniuuquiaani, canaa pohuatanuucua Pueyaso rupaa nia niqiuara. Niaari pueyaracaanu rishijacara quiriquiano saniniuuja, canaa pohuatasanoocua nia tiuuniuucua.

¹³Tariucuacaanu Pueyaso Rupaajinia, supuetana David naajiotasanoori naa sequeya:

“Pueyasooocua cua tiuuniuucua, janiyari pocuareeni”.

Canaari naajuhua. Pueyasooocua canaa tiuuniuucua, canaari na rupaa pohuataquiaani. ¹⁴Canaa jaara puecoosaariquia na rupaa canaa pohuatanuucua, naajaa. Canaacuaajaari niishiyani, pa Jiyaniija Jesu Samiitaniniacuaajaari canaa samiitanijionutaniuhua juhuaj, Neyanu Jesu rupesano canaa quiniuucua. Pueyasoori canaa rijionutaniya puetunu nijaniyatajanaa, pueyaracaanu na shuriucua pa quiniuria. ¹⁵Naacuajitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucua, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua nijaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyano hua shuquiritiasaanutaniya, queraatia pueya na jiyanooniucua.

¹⁶Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuuja puetunu juucajanaa socua mashajashiya-cujua. ¹⁷Janiyara, puetunu naquiya canaa miishacarijanaa

mijiria, cunoori secaja, rupaquijiajuhuaj. Cuno naquiya miiniu canaa rejeretanuucua, iPueyasoori cunora jiyanoohua maninia miiniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiaa canaa quiniuria. ¹⁸Naaratej, majaari canaa jiaatianu quiquiaa canaa jitianura mijiria canaa niquishano casaa. Canaa cutaraari Pueyaso jiiitasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jiiitasano pa niquishoo casaa saniniunijia, cuno cutaraari shaajeyashijia.

5 ¹Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua rucoonaa pa quishacari mijiria. Mijiria pa jiiitasano pa shoque jaara cusoquee, paacuajaari niishiyani, paari tari jiiitaa tamonu cuaqueya jiyocuaaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiqiora. Cunoori maja pueyano shipinishano. ²Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuaaanu. Tii quiyacuajaari canaa sohuanuucuaqui tiasano quiqio. ³Canaari cuno quiarinio cuaqueya cushiyonutaniya juhua toqueni, maja juhuaasu canaa sohuanu quiniuria. ⁴Nio cuaqueyajiniija canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuaunucua. Canaa cutaraari canaa quiarinio cuaqueya cushiniu paniani, Pueyaso shipinishano canaarani. Naacuajitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵Pueyasojuaanaacuajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujanaa naa pa miiniutianiya.

⁶Naa canaa niishishacaritij, majaari canaa tacaaniu quiquiaa. Canaacuajaari niishiyani nio cuaqueyajinia canaa quishacarijia, majaari juhuanujuaja pa quiniu pa Jiyaniijia shuriucua. Naacuajitij, paari tucuaaanu quiyajaani pueyaracaanu pa quijiarano quiqiojiniji. ⁷Cunora, mijiria canaa quishacarijia, majaari canaa quiniu tama canaa niishitijatajaaja. Canaa cutaraari canaa Jiyaniijiaacua canaa tiuuniutia quiquiaani. ⁸Naacuajitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarintianuucua jiaatiaani, canaa pacunura pa Jiyaniijia shuriucua, tii canaa quiniuria nata. ⁹Naacuajitij, canaa jaara nio cuaqueyajinia quiyaja miiriani, naajuhuj canaa jaara na cartequeni, canaari saaja pa Jiyaniijia shuquiritiniucua jiaatiaani. ¹⁰Puetunu pajaniyajanaacuajaari Jesucristo tacoji na nequesoreesacui nujuatejosaariquianoni. Cuniqiu, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaa. Saniniuuja, sesa miijiaaari taraatia miishaanutaniyacujua.

Pueyasoori pueya jiyanooni panijia cutara

¹¹Naaratej, canaa niishishacari jiyanoohua puereeta quiniutianiyaari pa Jiyaniijia saniitiosacari na tojtiaashijiaa, canaari cunora saniniujuquiaa pueya tojtiniuria Pueyaso Rupaani. Pueyasocuaajaari niishiya canaari seetanujanaa nera poonijionaani. iSeetanujanaa naa nia niishitiriqiaajaniuhuj! ¹²Majaari nia jiyaniiniu canaari tama canaajiniijiaa nia pohuatanu coteerohuanihuua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujanaa Pueyasora poonijionaa canaa quiniucua. Naacuajiti nia naata cuno pueya tacunu canacuaji, cuno pojori canapuete sapuenu juhua maninia quijiaa niquishano pueya najuhanacuajani.

Majaari nojori niishiniu tacaaniu taamueca jiuujiaracateja nojorini. ¹³Noojiaqueya niajanijianijinio naasucuaari jiyaniya canaari juhua paateca pocuaquiaani. Naajaa, canaa jaara seetanujanaa paateca quirini, canaari paateca quiya Pueyasora. Saniniuuja, canaa jaara maninia niishiriojuuca quiriquiani, canaari naa quiya niaarani, maninia canaa niishitiojonura niajanija. ¹⁴Cristo paniniucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canaacuajaari niishiyani, nojuajaari puetunu pueyacuaraajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusunuuquiaari Cristota. Naacuajitij, Pueyasoori na naata jiyanooni puetunu Neyanuucua tiuuniaajanaa. ¹⁵Cristocuaajaari puetunu pueyacuaraajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaariuhujahuaj. Naaratej, paa cuara miiria saa na panishanojua. Majaari socua pa miiniu tama pa panishanojuaja. ¹⁶Tarijia, canaari saaja canaa panishano pueyacuara taaajejani. Quiarijia saniniuuja, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyaniijiani nojuaja naasucuaari nareja pueyano, juhua pajaniyajuhuj. Quiarijia cutara, majaari naa canaa niishiriojonu nojuajiniji. ¹⁷Naajuhuj, cante Cristo rupesanoni, nojuajaari quiariniora jatanishano pueyano. Tariucuaaanu sesa na quiniuuri tari jatanocuaaja. Saniniuuja, puetunujanaari quiarinio quiya.

¹⁸Puetunu cunoujanaari Pueyaso miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiuciaari puetunu pueyajanaa canaa pohuatanura, nojori jiyanooshanurajuhuj. ¹⁹Naacuajitij, Pueyasoori mijiria quiniiaa jiyanooquiaa saaja Neyanu Cristoocua nojori tiuushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihuua socua. Nojuajaari canaa jiyatequiaari na rupaa pohuataanaa canaa quiniuria, pueya canaa tiutiniuria Neyanu Jesucristoocua, jiyanooshano nojori quiniurajuhuj. ²⁰Naacuajitij, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasojuaanaari nia masuya na muerasu nia quiniuria, Neyanuucua nia tiuushacari. Naacuajitij, canaari Cristo niti nia secojiyani, itama nia cuaqueyajaaja nia jiyanootiri Pueyaso!

6 ¹Na Pueyasora poonijionaa canaa quiniucuatej, canaari jiyanoohua nia secojiyani cuarta Pueyaso muerasunaa, saa Pueyasora nia quiri, nia jiyanoojia na quiniucua. Maninia na muerasu nia quiri. ²Tariucuaaanu na sequesanojuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacaruca, janiyari quia naacucanujuhuj”.

Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

³Cunora, canaari tama canaa cuaqueyajaaja cojuaciaani, maja canaa miiniuria sesa tamasa niquiara. Canaari naa maninia miiquiaani, nojori mariqui Jesucristoocua tiyauquiriri, nojori mariqui Pueyasora canaa poonijosano sesacareariuhuj.

⁴Canaa cutaraari saaja maninia miiquiaa pueya niquiarani, puetunu pueya niishiniurajanaa canaari seetanujanaa Pueyasora poonijionaani. Naaratej, canaari juhujaniya rejeretaquiaa naquiya canaa miiniuni, canaa panishano canaa

jiitiaaquishacarijuhuaj. Naajuhuj, canaari rejeretaquiaani puera canaa tacaashacari, canaa niishyaquishacari taa canaa miiniutianiya socuani. ⁵Naajuhuj, canaari juhuajaniya rejeretaquiaa canaa jaara majacujusaquiaani, canaa jaara nujuatejojuajinia nujuatejosaquiaaaniuhuj. Nasojosano pueya jaara miitianu paniquiaa canaani, canaari na rejeretaquiaajuhuj, pueya tiuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jiyanhua poonijioquiaa nerani. Canaari sequeyarucua sutequiaani. Canaari miaajequiaajuhuj. ⁶Naajuhuj, pueyari na naata niishiniu canaari seetanujuanaa Pueyaso seyani, sesa miyashijia canaa quiniucua, maninia canaa niishiniucua Pueyaso rupaajuhuj. Niishishaatiacuaajaari, canaari Pueyaso seyani, jacaria pocuajaca canaa quishacari juaajaca pueyata, naajuhuj, maninia canaa miishacari puetunu pueyajanaano. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuj. ⁷Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniucua. Pueyaso rupaata, canaa cutaraari saaja Sesaaca jiyatequiaa canacuajini. ⁸Naa Pueyasora canaa poonijiosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniujia. Naajuhuj, noojiaqueya pueyari maninia pohuatanuquiaa tamasaqa niqiuara canaajiniji. Tamasacaari canaa sesacaquiaa saniniujia. Noojiaqueya pueyari canaa sequequiaa sapojonuujacatani. Tamasacaari saniniujia maninia tojitiaquiaa canaa, seetanu rupaajanaa canaa pohuatasacari. ⁹Noojiaqueya pueyari canaa niqiquiaa juhua najuhua quijia pueyani. Tamasacara saniniujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jiyanhua miitiasaaquiaani. Naajaa, majaari canaa puecoosaanu quiquiaani. ¹⁰Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniucua. Canaari seetanujuanaa casamijiuuucua juhuaj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamijiuuucua niqishanoni. Naajaa, canaari puetunu canaa panishanojuanaa jiitiaacuajani.

¹¹Corinto tiacajinia quiniaa cuarta Pueyaso pueyanaa, canaa nia tojitiare. Caa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. ¹²Majaari canaa tarinitianu canaa paniniu jiyanhua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. ¹³Janiyari nia nenecojiyani, naatej, taa pueyano nenecojoquiaa necohuacuaani, imajaari canacuajani nia taacanuunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴Saniniujia, maja Pueyaso tojiyashijia pueya nia paniniu, nojori nia cojiniuria. Naajuhuj, maja cutaraari nia caminiu Pueyaso tojiyashijia, niaa mariqui rimiajata quijia quiriiri. ¿Maninia miijiatucua shuquiriaatia quijia quiriquia, sesa miijiaata na quishacari? Maja. Cua riuquareto pueyanaa. ¿Cuhashiqui quijiateeri na naata juhuajaniya jatiqui quiniu ninishiqui quijiaata? Maja na naata. ¹⁵Seetanujuanaa pueyanaa, Cristoori maja Sesaaca rupeua. Naajuhuj, Pueyasocua tiujia pueyanoori maja na naata maninia rupueoocua Pueyasocua tiuyashijia pueyanota. ¹⁶Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tiini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanoacuajaari naa naajiotasano quiya:

“Janiyari nojorijinia quiriqianoni. Janiyari nojori tajinia rucuanenotuniani. Janiyari nojori Jiyaniijajanaa quiniutianiya. Nojoriiri cua pueya quiniutianiyacujua”.

¹⁷Cunora, pa Jiyaniijaari na pueya sequeya:

“¡Cua tojitiaashijia pueya tajiniji nia pacure! Nia shiriquiri tamocora nojoriicujani. Majaari sesa casaa nia saniniu paniniu. Naa jaara cua tojijia quiri, janiyari nia jiyatenutaniya quirianoni. ¹⁸Janiyari nia Que quiniutianiya. Naacuajitij, niari cua niqiuohua quiniutianiya. Naa sequeyanijia, puetunu cumaacaracajanaa cua quiniucua”.

7 ¹Naacuajiti canaa panishano pueyanaa, paacuajaari naa seetanujuanaa pa Jiyaniija sequesano pajaniyarano jiitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijia pa quiniuria, saa neraja pa quiniurijuhuj.

Corinto pueya tacatosacari nojori jiuujia, maninia nojori quiniuhua

²Pueyanaa, ¿taa nia miiquianuni? ¡Canaa panijia nia quiriuhua! Majaari canaa miinu quiquianu sesa nijaniya. Majaari quenaaja niquriyatu nijaniyajinijinio canaa sesonu quiquianu canaa niishitiojosanota. Majaari canaa sapojonu quijia nijaniya. ³Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jiyanhua nia paniani. Naacuajitij, canaari shuquiriaatia quiniutianiya canaa jaara puecoosaare canaa cumaquiniucua nijaniyani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quijia quiniutianiya Pueyasotani. ⁴Janiyari seetanujuanaa naa nia sequeyani cua panishacari nijaniya. Quiarijiani, janiyari jiyanhua nia timitiaani, maninia cua tojiniucua nijaniyajiniji. Canaari seetanujuanaa naquiya miiquiaani. Naajaa, maninia canaa tojiniushacari nijaniyajiniji, cunoori cua cumanijiacanu. Cunora, janiyari jiyanhua nia shuquiritiaani.

⁵Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanujuanaani. Pueyasocua tiuyashijiaacari canaa juaariquiaa. Canaa jiuujiaari niaacua tacaariquiaa saniniujia. ⁶Jiyacaritij, Pueyasoori canaa cumanijiacanu Tito tiuquishacariuhua canaacua. ¡Pa Pueyasocujiaari tacaajia cumanijiana! ⁷Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jiyanhua na timiniutia. Nojuajaari canaa pohuatacanu, niaanaari canaa niquiniucua jiaatiaa. Naaanaari cucua taraajeya, jiyanhua nia taraajetenuucua janiya. Naaanaari cucua tacaya jiyanhua, cua rootasano tojijia nia quiniuria quiarijia cutara. Naa cua tojishacari niaacuajitij, janiyari jiyanhua shuquiriquianuni.

⁸Niaacuara cua naajioneeri nia taraajetecanu. Janiyari taraajecanu juhuaj, naa cua taraajetenuucua nijaniyatej. Quiarijia cutaraari maja cua taraajenu. Cua naajioneecuajaari saaja rupaquijia nia taraajocanu. ⁹Quiarijiani, ishquiriaatia quiyani! Majaari nia jiyaniu janiyari shuquiriaatia quiyani naa cua taraajonuucua nijaniyatej. Shuquiriaatia quiya cutaranijia, nia niishishacari, naa cua taraajonuucua nijaniyatej, niari nioojia tacatorhuacua Pueyasocua, Pueyaso tojitiajaca nia quiniuhua. Naacuajitij, janiyari quiarijia niishiyani, majaquiri cua sesonu quiquianu nijaniya, naa cua taraajonuucua nijaniyatej. Pueyasocujiaquiri maninia poonijioriquiaa nioojiacajinia, naa nia taraajesacaritij. ¹⁰Pueyasojanaa jaara pa taraajetere, cunoori maninia, poojia

pa tacatonuhua nocua, na jiyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja.

¹¹Nia taraajesacari cua nacasusacari nijaniya cua naajioneejiniani, cunoori seetanujuanaa Pueyaso taraajetesano quiquianu nijaniya. Naa nia taraajenuucuatej, nia niqishuriiraj, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miijia. Niaari na naaqui puerecanujuhuj, niaa mariqui nata cojiritiasaare saniitonuuri. Niaari cua jaqueroojocanu. Niaari ritia miiquianu cua naajiojinia cua sequesano nijaniya. Naacuajitij, niaari ritia cuno sesa miijia taanuucanu nia tajiniji, maja socua nia rupuesano na quiniuria. Naa nia miiniucua puetunu maninijanaatej, janiyari quiarijia niishiyani, majaanuuri nia maniniucuanu quiquianu naa sacuaraatia cuno pueyano miishanotej. ¹²Pueyanaa, niaari maninia canaa tojjiaca. Seetanujuanaa, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niqiuara: niaacuajaari seetanujuanaa canaa panijiaa quiyajaa, nia tojishacari canaa. ¹³Naaratej, canaari canaa jiuujia cajitiquianuni, canaa tojishacari Tito pahuatasano nijaniyajiniji.

Majaari saaja Tito pahuatasano cumanijianu quiquianu canaa. Canaari Tito timitiacanujuhuj, canaa niqishacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhua na tacaaniucua niaacuajuhuj. ¹⁴Tito quiaaquishacari niaacua, janiyacuajaari juhuacarijia na pahuatatanu nijaniyajinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijaniyajiniji. Puetunu cua pahuatasanojuanaa Tito nijaniyajinijiiri seetanujuanaa quiquianu Titora. Naajuhuj, puetunu cua pahuatasano nijaniyajanaari pueyaracaanu seetanu rupaajanaa quijia. ¹⁵Quiarijia Tito niishiriojosacari nijaniya, nojuajaari socua jiyanhua nia panijia quiya, nia tojinuucua maninia nojuaja. Niaacuajaari tetecatucanu nia puerecua na tiuquishacari niaacua. Majaari nia rerequetenu quiquianu nojuaja. ¹⁶Janiyajuhuj, jiyanhua shuquiriaatia quianijia, cua niishishacari quiarijia cutara cua naata niaacua tiuuni seetanujuanaa.

Capora pa quiriqiaaj

8 ¹Quiarijiani pueyanaa, canaari nia pahuatanu paniani, taa Pueyaso cumaquiya jiyanhua na muerasu maapue niya Macedonia jiyajiniani. ²Nojoriiri jiyanhua taraatia miiquioquia. Naajaa, nojoriiri saaja jiyanhua shuquiriaatia quiya. Naajuhuj, casamijiuniucua nojori quishacari, naajaa, nojoriiri caporatujuri. Nojoriiri na cumaneeajiniji nareja niqitiojoquiaa queraatia, Judea jiyajinia casamijiuniucua Pueyaso pueyara. Nojori niqitiojosanoori juhua casamiriaca pueya niqitiojosano. ³Seetanujuanaa narta Pueyaso pueyacu nojori taraajenuta, nojoriiri naa na cumaneeajiniji niqitiojocanu queraatia. Nojoriiri puetunu na jiiitasano cumaneeajanaa niqitiojonuucanu. Naacuajitij, janiyari jiyaniquianuni, maja naasucuaari nojori naata niqitiojonu quiniutianiya socua. Naajaa, na nuhuaji, inojoriiri socua niqitiojocanu! Seetanujuanaari cua sequesano nijaniya. Janiyacuajaari nojori miishano niquiniani. ⁴Niya Macedonia jiyajinia quiniaa parta Pueyaso pueyani, nojoriiri nijaniyajiniji tojiquianu. Niaanaari cumaneeca reratenu paniriquiaacuaa, nia jiyarosocoriquiano Judea jiyajinia quiniaa casamijiuniucua parta Pueyaso pueyara. Naaratej, nojoriiri jiyanhua canaa nenecojocanu canaa masenura nojori niqitiojonu panishano

cumaneeajuhuj, parta Pueyaso muerasura. ⁵Seetanujuanaa Pueyaso tojjiaca nojori quiniucua, nojoriiri maja saaja na cumaneeca na niqitiojonu quiquianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijia, taa Pueyaso pania pa miiniuracuajani. Naajuhuj, nojoriiri tama na cuaqueyajaaja jiyatecanu canaa tojjiaca nojori quiniurajuhuj. Cunora, canaari nojoriicuaaji jiuujiatecanuni. ⁶Naa capora niqitiojonaa nojori quiniucuatej, canaari Tito sequerucuaani, niaacua na quianuhua quiarijia. Nojuacuajaari tarijia naacucanu nijaniya, nia reratenura nia niqitiojonu panishano cumaneeca. Niaacuajaari maninia niqitiojocanu juhua capora pueya. Naaratej, nojuaja cuara nia naacuura, nia tucuatunura reratenu puetunu nia niqitiojonu panishano cumaneeajanaa. ⁷Nijaniya, Corinto tiacajinia quiniaanaa, niaacuajaari jiyanhua maninia Pueyaso muerasu. Niaari Pueyasocua tiuujiaa jiyanhua. Naajuhuj, niaari jiyanhua maninia Pueyaso rupaa niishitiojonuucua. Niaari Pueyaso niishitijia jiiitajuhuj. Niaari mariyata shitimia poonijionuucua, tamasa nia naacunura. Naajuhuj, niaari canaa panijiaa jiyanhua. Naatej, taa maninia miijiacatucuaa nijaniyani, capora nia quiriijuhuj, nia cumaneeca nia niqitiojonura nareja parta Pueyaso pueyara.

⁸Majaari juhua nia jiyaniijia cua sequenu nijaniya, nia cumaneeca cua niqitiojotenura nijaniya. Janiyari nareja nia pahuatariquiaa capora Macedonia pueyajinijini, tama nia niishiniurajaaja, niaate seetanujuanaa canaa panijiacajuhuj, taa Macedonia jiyajinijinio pueya pania canaacuaani. ⁹Niaacuajaari pa Jiyaniijia Jesucristojiniji niishiya; na Que Pueyaso shuriucua na quishacarijia, nojuajaari puetunu maninia casaajanaa jiiitaja quiquiaari. Naajaa, nojuajaari juhua casamijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuujia jiyanhua shuquiriaatia quijia na jiyatenura pajaniya, juhua jiyanhua queraatia casamiriaca pueya pa quiniuria. Naa jaara seetanujuanaa panijiaa quiriqiaa, naa nia miirijuhuj, taa pa Jiyaniijia miiquiaaricuaani.

¹⁰Janiyari niishiriojoriqiaani, taate socua maninia nia naata miiniu parta casamijiuniucua Pueyaso pueyarani, shuquiriaatia nia quiniurajuhuj. Cua tojiri. Niaacuajaari niishiya, noo marijia pa shococanutej, niaacuajaari juhuacatecara cumaneeca reratejonu coteecanu. Niaari naa maninia miiquianu tama nia tacaashacarijiaa niarta Pueyaso pueyacu. ¹¹Niaari shitimia juhuacatecara nia cumaneeca niqitiojonu coteecanucua. Naaratej, quiarijia nia sequyanijia, niaa cuara naa shitimia niqitiojonu tucuaara puetunu nia niqitiojonu panishano cumaneeajanaa. Nia jiiitasano cumaneeajiniji nia niqitiojore, taa cumaneeca nia niqitiojonu paniyacuajani. ¹²Nia tojiri. Paa jaara seetanujuanaa nareja niqitiojonu paniriquiaa pa cumaneeajinijini, Pueyasoori pa niqitiosano shuquiritajia, paa jaara juhua capora niqitiojore pa jiiitasanojinijini. Maja cutaraari Pueyaso paniniu pa niqitiojore, pa jaara na jiiitaaquiyani.

¹³Majaari Pueyaso paniniu cutara puera nia niqitiojonura nia cumaneeca, tamasa quiniuria casamiriaca, saniniuujia nia jiiitaaquiniuria nia panishano. ¹⁴Maninia cutaraari puetunu Pueyaso muerasujanaa jiiitanura na panishano. Naaratej, quiarijiani, niaa cuara niqitiojore nia jiiitasanojiniji, nojori jiiitanura na panishanojuhuaj. Tamacari saniniuujia, nojoriiri saniniuujia nia jiiitaaquishoo casaa nia niqitiojonu paniyacuajaa, niaa jaara na jiiitaaquiri. Naacuajitij, puetunu Pueyaso muerasujanaari na panishano jiiitanutianiya mariyata, maja rimajata. ¹⁵Naajuhuj, tariucuaanu Pueyaso Rupaajiniani, jiyocuaanu Pueyaso tinishano Israel pueya miaquesocoriquiano panjinijiri naa naajiotasano quiya:

“Cante queraatia reratequiarini, majaari quenaaja na curenu quiquiaari. Naajuhuj, cante secaja reratequiarini, majaari nojoriiri na puetanu quiquiaari”.

Naaratej, Pueyasocua tiuujiaca nia quiri. Nia jiiitasanojiniji nia niqutiojore nareja, nia jamueyaquiniutia.

Pablo pohuatasano Titojiniji, Tito cojiniaajinijinio

¹⁶Titoori jiyanoherua niaacua jiaatiaja, taa cua jiaatiaa niaacuacuani. Pueyasocuaaari na jiyatequiaari nia panijia na quiniuria. Janiyari cunora Pueyaso sequequiaani: “iPaacarasho Pueyasonaa!” ¹⁷Naacuajitij, janiya jaara Tito sequerucuaani nia niqiniuucua na quianura, nojuajaari cua timitiriucuaa. Tama nojuajaari nia niaquiniuucua jiaatiaa. Naacuajitij, nojuajaari quiarijia quianutaniya niaacua.

¹⁸Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapejanaa shuquiritasano pueyano, maninia na pohuatanuucua pa Jiyaniijia Jesucristojiniji. ¹⁹Macedonia jiyajinia quiniaa Pueyaso muerasu maapeeri tari na saquirojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuaaj, parta Pueyaso pueya Judiocuacaari niishiniutaniya, narta Pueyaso pueya taucuacaquiri nojoriicua taraajecajuhuaaj. ²⁰Maniniacuajaari parta Pueyaso pueya maape saquirojosano pueyano quianura canaata. Naacuajitij, majaari pueya jiyaniinu quiniutaniya canaari nio queraatia canaa reratesocoriquiano cumaneecajiniji nohuasenuani.

²¹Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara. ²²Quiarijiani, niaacua canaa jiyarosocoriquiano pueyata, canaari niqiijinio tamonu parta Pueyaso pueyano jiyaronutaniyani. Pueyaracaanu na poonijiosacari pa Jiyaniijia, janiyajanaari na niqiiquianuni. Nojuajaari seetanujanaa pueya panijia, Pueyaso panijia na quiniuucua. Quiarijia cutara, seetanujanaa niaacua na tiushacari, janiyari niishiyani, nojuajaari jiyanoherua maninia Pueyaso pueyano. ²³Tamonu jaara nia nequesotare cante Titoni, niocua na riucua: “Nojuacuajaari Pablota poonijiona, na cumaquiniuria pajaniya”. Naajuhuaaj, Tito cojiniaari niqiiji Pueyaso muerasu maape jiyarosano niaacuajuhuaaj. Pa Jiyaniijia Jesucristoori socua maninuhuaqueetasano, maninia na tojtiaajaca nojori quiniuucua. ²⁴Naaratej, nio pojori jaara niaacua tiuquiijiosee, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapejanaari niishiniutaniya niaaqui seetanujanaa panijia. Naajuhuaaj, puetunu Pueyaso pueyanaari niishiniutaniya, majaari cua sapojonu quiquianu, maninia cua pohuatasacari nojori niajanijajiniji.

Pablo shiniujiushacari pueya, cumaneeca nojori ratenura narta Pueyaso pueyara

9 ¹Janiyaruhua najuhuaana niaacuara naajiyani, cua sequenura niajanijia, nia cumaneecata nia naacunura Judea jiyajinia quiniaa parta Pueyaso pueya. ²Janiyacuaajaari niishiyani, niaari tarija na naacunu paniquianuaja. Cua shuqiritiasacari cunora niajanijia, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa niajanijajiniji. Janiyacuajaari nojori pohuataquiaani, niajanijia Acaya jiyajinia quiniaa pueyari, niaari nia cumaneeca niqutiojonu paniquianu noo marijia pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqutiojonu panijajuhuaaj, naa nojori cua pohuatanuucua niajanijajinijitij. ³Janiyari niaacua tiuya seetanujanaani, niaacuajaari canaacuaji tariucua reratesano jiiitanutaniya nia cumaneeca, taa cua pohuataquiaa niya niajanijajinijicuaajani. Naajaa, janiyari nio parta Pueyaso pueya jiyaronutaniya niaacuani, seetanujanaa juhuacarijia nia ratenura nia niqutiojosocoriquiano cumaneeca. Majaari cua

paniniu cutara cua pohuatasano niajanijajiniji cuaracashitishaa-nura. ⁴Macedonia jiyajinijinio parta Pueyaso pueya naasucuaari cuata tiuquiniutaniya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririqiniutaniyani. Niaari caririqiniutaniyajuhaaj. ⁵Naaratej, janiyari Tito sequeereni, parta Pueyaso muerasuta na quianura coteenu niaacua cucuaji, nia niqutiojonu panishano cumaneeca cuara tari reratesano quiri canaacuaji. Naacuajitij, nia niqutiojosano cumaneecaari seetanujanaa nareja nia niqutiojonu panishano quiniutaniya, maja canaa niqutiojotesano niajanijia.

⁶Pueyanaa, nio sequesano nia niishiriqia. Naa sequeyari: “Cante secaja natajani, secaja senoonutaniyajaarihuaj. Saniniuujia, cante queraatia natajani, queraatia senoonutaniyajaarihuaj”. Naajuhuaaj, paa jaara capora quiriqiani, Pueyasoari saniniuujia socua queraatia pa niqutiojonu nia niqutiojonu. ⁷Naaratej, puetunu niajanijajanaa cuara niqutiojora taa nioojiajinia nia niishiriojore nia niqutiojonuracuajani. Majaari nia cumaneeca nia niqutiojonu nia jamuenuta, nocua nia taraajenutano. Naajuhuaaj, majaari nia niqutiojonu nia cumaneeca saaja tamasa shiniujiushacari niajanijia. Pueyaso cutaraari shuqiriata nia niqutiojucua timitiaja. ⁸Pueyasocuaajaari cumaacaraca na niqutiojonu niajanijia puetunu nia panishanojuanaa nia jiiitasocoriquiano pueyaracaanu. Naacuajitij, niaari pueyaracaanu socua queraatia jiiitajaca quiniutaniya, tamasa nia niqutiojonurajuhuaaj, nojori jaara jiiitaaquiriquia nojori panishano. ⁹Naa jaara naa capora quiriqiatej, niaari nio tariucuaaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niqutiojocua na casamijiniji casamijuniucua pueya. Na miishanoori pueyaracaanu maninia quiniutaniya Pueyasora. Majaari Pueyaso niyjetanu quiniutaniya”.

¹⁰Pueyano natasacari casaa jajau na cuhuariquijajinia, Pueyasoari na canijiaquiaa. Naacuajitij, na camaruuri socua jiiitanutaniya tamacari na natasocoriquianohua, na miaquesocoriquianonio. Naajuhuaaj, juhua capora nia niqutiojosacari nia jiiitasanojiniji, niaari juhua nia cuhuariquijajinia nataa. Naacuajitij, Pueyasoari nia jiyatenutaniya socua queraatia jiiitajaca nia quiniuria, pueyaracaanu maninia nia miiniuria tamasarajuhuaaj. ¹¹Naa capora nia quiniuucua nia casaatatej, Pueyasoari juhua capora nia niqutiojonutaniya puetunu na jiiitasanojinijianaa, queraatia nia jiiitanura, tamasa nia niqutiojonu pueyaracaanu. Naacuajitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari pueyaro timitianutaniya. Capora nia quiniuucua, nojori nia Pueyaso sequenutaniya, “paacarasho”. ¹²Naacuajitij, nojori jaara masere nojoririano nia jiyarosano cumaneeca, majaari saaja nojori jiiitanu quiniutaniya nojori panishano. Cunoari saniya nojori shiniujiuniutaniya nojori shuqiritiniuria Pueyaso, queraatia nojori sequesacari: “Paacarasho Pueyasonaa”. ¹³Nojori jiiitasacari puetunu nojori panishanojuanaa, nojori nia Pueyaso maninuhuaqueetanutaniya jiyanoherua. Nojori nia naa maninuhuaqueetanutaniya Pueyaso, nojori niishishacari niaaqui seetanujanaa Jesucristo Rupaa tojtiaajacajuhuaaj, naajaa, taucua nia quishacari nojoriria. Nojori nia Pueyaso maninuhuaqueetanutaniyajuhaaj jiyanoherua capora nia quiniuucua nojoriria, tamasarano. ¹⁴Nojori nia Pueyaso secojonutaniya niaacuajuhuaaj, jiyanoherua nojori paniniutia niajanijia, Pueyaso jiyatenuucua niajanijia nojori panijia nia quiniuria. ¹⁵Naajuhuaaj, janiyari jiyanoherua Pueyaso sequeyari, “paacarasho”, jiyanoherua maninia na miiniuucua niajanijia, Neyanu Jesucristo jataniniuucua nioojia.

Pablo cuara tojishaaria, Jesucristo jiyatenuucua nojuaja na rupaa pohuatanara

10 ¹Janiyacuaajaari Pablani. Quenaaja cua tojtiare. Cua Jiyaniijia Cristoori jiyanoojia quiquiaaricua, jacaria pocuajuhuaaj. Janiyari naa quiniu panijajuhuaaj. Naaratej,

janiyari quiarjia nia nenecojiyani, cua tojitiare quenaaja. Tamasacanaari cua pocuacuaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuujia, tucuaaanu cua quishacari, janiyanaari jiyanoehua nia nacasuquiaa cua naajioneejiniani, juhua nia pueresano jiyaniijia. ²¿Seetanutejanaa, janiyate naani? Janiya jaara naa quiya niaarani, naajaa. Quiarjia tucuaaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasanutaniya jiyanoehua, sacuaaratia cucuara rimiaaquenuquiaani. Janiyari naa miiniutianiya nojorini, nojori jaara tarinitiaquiyajaa naa sacuaaratia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara. ³Seetanujuanaacuquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetojoquiacuaani. ⁴Mijiria quiniaa pueyari miaquetojoquiaa cutara tama nojori shipinishano casaatajaaja. Canaa miaquetojotaja saniniuujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu. ⁵Pueyaso cumaacata, canaari mijiria niishijia niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhua pueya niishiriojosano jataniquiaani, Cristo tojijia nojori quiniurijuhua. ⁶Canaacuajajari Pueyaso jeenucasano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitiojosanojuanaa tojitiajacara quiriouhua, na nuhaji cutara canaa naata puetunu cureeno tojiyashijiacajanaa saniitionu.

⁷Niaari tama cushitiquiaajaacujua nia tiuushacari cuno sapojonuujuaa pohuatasanoocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, nijaniya cante sapojosaacanucujajani. Niaa jaara niishiri niaari seetanujuanaa Cristo saquiriojosano pueya, naacuajitij, nijaniya cuara niishiiria canaari Cristo saquiriojosano pueyajanijuhua. ⁸Niaa jaara jiyaniya janiyari juhua pueya shocotaja nia sequeyani: “Canaari nia jiitianaani”, naajaa, majaari cua caririqini nia cua sequesacari nijaniyatej. Pa Jiyaniijia Cristojuanaacuajajari canaa jiyatequiaari nia jiitiana canaa quiniuria. Canaari naa jiyatesaaquiaarini, canaa cumaquiniuria nijaniya na rupaata, seetanujuanaa Cristo pueya nia quiniuria. Majaari canaa jiitiano najuhua na cumaaca, canaa sesonura nijaniya. ⁹Naa cua naajiosacari niaacuaratej, majaari nia jyaniniu janiyari nia piriyojijiani nia puerenura janiya. ¹⁰Tamasaca nijaniyajiniinio pueyanaari cua sequequiaajuhua: “Pablori puera jiyanoehua pa nacasuquiaa na naajionejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhua, na pohuatasacari pa niquiara, na pohuatasanoori maja shanohua tojishano”. ¹¹¿Seetanutejanaa? Cante naa pocuacuaani, nojuaja cuara niishiiria quiarjia, taa canaa naajiocanu niaacuaracuaa tucuaaanu canaa quishacarijiani, canaari naa miiniutianiya niaacua canaa tiuquishacari.

¹²Cuniqui naata quiyajaariuhua tamasa pueya, canapue nia sequequiaacuajani, nojoriniiaari socua maninia Pueyaso rupaa pohuataanaa tamacajini, canaajiniijijuhua. ¿Nojoriiri seetanujuanaa socua maninia Pueyaso rupaa pohuataanaa canaajini? Juhua. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuataanaa. Nojoriiri naa quijacatej, nojori jyanishacari nojori cutaraari socua tojishano pueya tamacajini. Naa nojori miishacari, nojori cutaraari seetanujuanaa mosanucua. ¹³Canaa cutara, majaari tamasa poonijosano canaa jiyatenu quiquiaa juhua canaa poonijosano Pueyasora. Canaa cutaraari

saaja canaa miishano shuquiritiaquiaani, tee Pueyaso jiyaroquiaari canaacuajani. Nojuacuajajari canaa jiyaramiqui-quiaari niaacua Corinto tiacajinia, nia niquiara canaa pohuatanura na rupaa. Naacuajitij, niaari na muerasura quiquiaari. ¹⁴Majaari najuhua canaa timitianu nijaniya, Pueyaso muerasura nia quiniucua. Niacuajajari Pueyaso muerasura quiquiaari canaa pohuatanuucua nia niquiara seetanujuanaa Pueyaso rupaa pohuatanu coteetanaa nia niquiara. ¹⁵Majaari canaa shuquiritianu najuhua nijaniya. Canaa cutaraari nia tiutiquiaari Jesucristoocuanu, niaacua Pueyaso jiyaronuucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiuujia nia quiniuria. Naacuajitij, niaa jaara seetanujuanaa Pueyaso rupaa tojijia qui, niaari saniniuujia na naata canaa cumaquini. ¹⁶Niocua canaa cumaqui canaa quianura tamaqui, tee Jesucristojini pohuatasoojua quiyacuajani, tii canaa pohuatanura nojuajaniijuhua. Majaari canaa quini paniniu pootia tamasa poonijosaquu, taa cuno rimiaacoori quiquioya shuquiriaatia canaa poonijosaquicuaani. ¿Nojori shuquiritiasanoteeri tama nojori poonijosanojuanaa? Maja. Niacuajajari Pueyaso muerasura quiquiaari canaa nia tojitanuucua.

¹⁷Pueyanaa, nio tariucuaaanu naajiotasanoori niaara, nia niishihocoriquiano. Naa sequeyani: “Cante shuquiriaatia quiia quini paniani, nojuaja cuara pa Jiyaniijia shuquiritiaara cutara”. ¹⁸¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujajani: “Quiaa cutaraari maninia cua pueyanoniyojua”.

Pablo pohuatasano na paraajini

11 ¹Pueyanaa, cua tojitiuri nareja. Juhua paateca tama cua cuaqueyajiijiaaja nia pohuatanu panianijia. Naajaa, quenaaja nia rejeretare janiya. ²Janiyari jiyanoehua nia tacaatiaquiaani, saaja Jesucristora nia quiniuria. Niacuajajari niishiya, naatej, taa pueyano cojuaacuaa neyatunijojua canuucujajini, saaja na camiriquiano pueyanora na quiniuria, naajuhua, janiyari nia cojuanu paniani sesosoo nia quiniuria nia Jiyaniijia. Cristocuajajari juhua nia niyacaranu. Nia jiitiana nia quishacari, janiyari juhua nia queni. ³Tarijia, niaacuajajari saaja Cristo tojitiajaca quiquiaari, na panijia nia quishacari. Quiarjia saniniuujia, janiyari Sesaaca nia pueretaani, nojuaja mariqui nia sapojoreeri Cristoocuaari nia rupatenura, taa cuno Susanacu sapojojuaari Eva tariucuaaanucuaani. ⁴Cuno sapojonuujuaa tiuquijiosacari niaacua, tamaatia nojori pohuatanura Jesujini nijaniya, niaari jaarajaaja ritia na tojiquiaa. Nojori niishitiojosanoori tojetaarucujajanaa tamaatia canaa niishitiojosanojiniji nijaniya. Nojori nia tojishacari, niaari juhujaniya samaruhua niishishano tojtiaquiaajuhua. Niacuajajari tari tiuquiaari Jesucristoocua, Pueyaso jiyanooniuria nijaniya. Saniniuujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhua. ⁵¿Cuno sapojonuujacateeri socua tojishocoriquiano janiyajini, niaa na jiyatecanu juhua seetanujuanaa Pueyaso jiyaramiquishano pueyaran? iJaniyara maja! ⁶Seetanujuanaa, majaari cua niishini maninihuaqueenu nia pohuatasacari Pueyaso rupaa, taa cuno pojoricuaani. Naajaa, Pueyasojiniji nia niishishano cutaraari seetanu rupaajanaa, tojishocoriquiano cutara. Maja najuhuanaj. Niacuajajari cuno niishiya, pueyaracaanu saaja maninia cua miishacari nia niquiara, cua pohuatasanojinijinio. ⁷¿Casaara nia tojitiaa cuno pojori quiarjiani, majaari saniniuujia nia tojitanu janiya? ¿Janiyateeri sesa miiquianu

nijaniyani, cua masejayaquiniuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria nijaniya. Naa cua miiniuucuatej, ¿cunoteeri sesa niaara? ⁸Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niqiuara cua pohuatanura Pueyaso Rupaa. ⁹Saniniuujia, nia tajinia cua quishacari, cua jiitiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiitiaaquishacari cua panishanotej, Macedonia jiyajininio parta Pueyaso pueyari namitia tiuquijioquiaari. Nojori cutaraari cumaneeca cua niqutioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura nijaniya cua panishano cua jiitiaaquishacari. Janiyari naa miiniutianiya pueyaracaanuni. ¹⁰Cua Jiyaniijia Cristocuajaari niishiya, majaari quenaaja cumaneeca cua masejonu quiquiaari Acaya jiyajinia quinia parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajininio naata sequenu janiya: “Pablocuajaari cumaneeca mashiniquijiojua canaajiniji”. ¹¹Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quinia Pueyaso pueyajiniji? Naa cua sequesacaritij, ¿janiyateeri nia paniaquiyani? ¡Maja! Pueyasocuajaari niishiya, janiyari jiyanohua nia panijiani.

¹²Nia sequeereera casaara cua mashiniquijiyaquiquiaa nia cumaneecani, cua pohuatasacari Pueyaso rupaa nia niqiuara. Cuno pojori, nia jyanishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanjuanaa Cristo jiyaramiquishanojuhuaj, taa canaacuaani. Saniniuujia, nojori mashiniquijiosacari nia cumaneeca, nojori nia niqutiojonura nareja, naacuajiti maatia niishishiyari, inojoriiri jyanohua tamaatia canaajiniji! Naaratej, majaari quenaaja canaa mashiniquini quiniutianiya nia cumaneeca, canaa pohuatanuucua Pueyaso rupaa nijaniya. ¹³Seetanjua-naari, inojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhanaj. ¹⁴Cunoori maja jiyajeneta naa nojori miiniuriatej. Satanásacuajaari tama na cuaqueyajaaja jatanijia shacantuucara, juhua Pueyaso seru na niqushaanura, pueya na sapojonura. ¹⁵Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanjuanaa maninia miijia pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, inojoriiri saniitiosaanutianiya sesa nojori miiniuucua!

**Pablo pohuatasacari naquiya na miiniujiniji,
Cristo jiyaramiquishano na quiniuucua**

¹⁶Socua nia sequenu pacuteyanijia, majaari nia jyaniniu janiyari paatecani cua pohuatasacari tama janiyajininijiaaja. Niaa jaara jyaniya janiyari seetanjuanaa paatecani, naajaa, rupaquijia cua tojitiare quenaaja. Janiyari juhua paateca tama janiyajininijiaaja niaara pohuatanu panijajaanihuaj, taa nia tojishano pueya miiquiaacuaani. ¹⁷Naa cua pohuatasacari tama janiyajininijiaajatej, cunoori maja cua Jiyaniijia Cristo pohuatasano janiya. Cunoori tama cua pohuatasanojuaaja, juhua paateca cua quishacari. ¹⁸Naatej, taa queraatia Pueyaso rupaa pohuataanaa tama nojorinijiaaja pohuatanuquiacuaani, janiyari quiarijia naa tama janiyajininijiaaja pohuatanu panijajuahuaj. ¹⁹Jyanohua niishijia nia quishacari, niaari cuno paatecoori tojtiaquiaa juhujaniya. Naatej, taa nia tojtiaquiaa cuno pojoricuaani, quiarijia cua tojitiarejuhuaj. ²⁰Naajuhuj, niaanaari juhujaniya rejeretaquiaa cuno pojori,

nojori jaara nia poonijioquiaa juhua nojori seya. Niaanaari nojori rejeretaquiaa nojori jaara nia jiitiasano casami riutiocojoquiaa niaacuaji. Juhua nia jyanijia nojori quishacari, niaanaari nojoriicua shiiniuquiuquiaa saaja, naajaa, nojori soosacari nijaniya. Niaanaari juhujaniya nojori rejeretaquiaa-juhuaj, nojori jaara nia jiquioco maseteriquia. ²¹Nojoriquiri jyanijianucujanaa cutara! Saniniuujia, janiyari nojori naaqui caririquiyani juhua nojori cua quiyaquiniuucua, maja naa canaa miiniuucua nijaniya, taa nojori miiquiaa sesa nijaniyacuaani.

Naajaa, quiarijia cutara, janiyari tama janiyajininijiaaja pohuatanutianiya, taa nojori pohuataquiaa juhua paateca tama nojorinijiaajacuaani. ²²¿Taa nojori sequequiaani? ¿Nojoriniani Hebreo* pueya, Hebreo rupaa pocuajacajuahuaj? Janiyajuahuaj. Janiyari Hebreo pueyanojuhuaj, Hebreo rupaa pocuajanio. ¿Nojoriniani Pueyaso saquiriojosano Israel* pueyajininio? Janiyacuajaari Israel pueyacuajinio supuenojuhuaj. ¿Abrahamtenaari nojori supuetana? Abrahamcuajaari cua supuetanajuhuj. ²³¿Nojoriniani Cristo jiyaramiquishano pueya? Janiya cutaraari seetanjuanaa Cristo seruni. Janiyari jyanohua soyani, juhua paateca naa cua pohuatasacari tama janiyajininijiaajatej. Naajaa, janiyari seetanjuanaa nia sequeyani. Janiya cutaraari socua jyanohua nojoriniji poonijioquiaari Cristorani. Janiya cutaraari pueyaracaanu caminiujushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhuj, janiyari pueyaracaanu caminiujushaaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. ²⁴Cuarta Judiocuacaari cua caminiujuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojojua. Nojori majasano jaara treinta y nueve quiri, nojoriiri jiyacari carteira na majacusano pueyano. ²⁵Naajuhuj, janiyari jiuujianaraca caminiujushaaquiaari macata piquiniuni. Tamacari, janiyari saitia jacusaaquiaarini. Shoniacu caminiajinia cua jaaretasacari buquejinia, jiuujianaraca buqueeri tiuquitiaquiaari. Naa tamacari buque tiuquitasacari-juhuaj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniacu caminia jiuujiajinia. ²⁶Janiyari pueyaracaanu tiqiyocua rucuanajojuia quiquiaarini. Naacuajitij, moocua cua niuuniujushacari, janiyari cocuaatia miiquiaarini. Naa cua rucuanajosacaritij, janiyari pueyaracaanu puereeta nohuasenujuaca quishaqui shocoquiaarini. Naajuhuj, tama cuarta Judiocuacajaari pueyaracaanu cua miiutianu panijia, taucucanio. Puereetaari quiquiaarijuhua cua rucuanajosacari tiacajinia, tiqiyocua pueya quiyaquishaqui, shoniacu caminiajiniano. Naajuhuj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. ²⁷Jyanohua cua poonijiosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijuhuaj. Janiyari noojiaqueya miaqueyaquiquiaarijuhuaj, jeya cua quiyaquishacari. Janiyari naquiya miiquiaari cua rucuanajosacari shiniquajinijahuaj, toqueeju cua quishacarijuhuaj.

²⁸Janiyari naa naquiya miishaaquiaarini, mariyata tamaatia naquiya miiniujuhuaj. Naajuhuj, janiyari puetunu juucujanaa niishiriojoquiaani, taariquitijia Pueyaso muerasu maapue quiya puetunu jiyacajinijanaatej. Janiyari jyanohua nojoriicua tacaquiaani. ²⁹Naacuajitij, tamonu cuarta Pueyaso pueyano jaara rejeretaquiriquia Sesaa saniniujushacari nojuaja, janiyari jyanohua taraajeja nocuani. Tamonu jaara sesa miitishaare, janiyari na naaqui caririquiyajuahuaj. ³⁰Niaa jaara panija socua cua pohuatanura nijaniya tama janiyajininijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumeeecani. ³¹Pa Jiyaniijia

Que Pueyasocuaajaari niishiya janiyari seetanujuanaa sequeyani. Nojuajanaa cuaara pueyaracaanu maninihuaqueetasaaria cutara, maja nojuajinjii pohuatanaa. ³²Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriqiaa. Nojuajaari cuno jiya jiyaniijia Aretas jiyatesano quiqiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuatayaji, nojori quianura juucua janiya. Nojoriiri cua quiatunu paniriquiaa Jesucristojinjii cua pohuatenucua. ³³Naajaa, cuarta Pueyaso pueyari namitia cua roshinitiaquiaari shuquiriaatia, puereetuca canaasatujinia, cuno tiaca sohuaca tacuhua shuucuaaji. Janiyari naa mashiquishaaquiaari cua paraacuajini.

Pablo pohuatasano Pueyaso niqutishanojiniji nojuaja

12 ¹Paa jaara tama pajaniyajinjii pohuatariquia juhua paatecani, cunoori najuhuanaj. Naajaa, socua nia pohuatereeraj. Nia pohuatereera taa cua niqutishaaquiaari pa Jiyaniijia casaa jiyocuaaanuni. ²Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiqiojinarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaj. Saaja Pueyasocuaajaari na niishiya. ³Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocuaajaari na niishiya. ⁴Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupajinia. Pueyasoori cua tenujuquiaari maja cua caminiujuniuria jiyocuaaanu cua tojishano mijiria quiniaa pueyara. ⁵Naa Pueyaso niqutiniucua janiyatej, janiya maara tama janiyajinjijiaaja poojotariquia cua timiniutiani, juhua tamasa shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶Naajuhuj, janiya jaara tama janiyajinjijiaaja pohuatanu paniriquiani, cuno maara seetanujuanaa pohuatasano quiriqia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiriiri janiya jiyanoohua maninia pueyanoni. Pueya cuaara niishiiria cutara taamueca pueyanote janiyani, saaja nojori namijiata nojori niqushacari cua miishano, tama nojori numaatajaaja nojori tojishacari cua niishitiojosanojuhuaj. ⁷Pueyaso niqutishano janiyani, na niishitishano janiyajuhuj, cunoori puera jiyanoohua maninia quiqiaari. ¡Cunoori jiyanoohua cua timitiqiaari! Naaratej, janiyari cua cuaqueyajinia nootusaaquiaari juhua jiohuacatani, janiya mariqui pueya shocotajara quiriri. Cuno taajeta noonuuri Satanás miishano quiqiaari, na tacaatiniuria janiya. ⁸Janiyari jiyanoohua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pacutejoquiaari secojonuni. ⁹Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniucua. Saaja cunocuaajaari quiara. Cua naatacuaajaari socua jiyanoohua poonijiotenu cua cumaaca sasaca cua pueyajinia, tamasa niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniucua pueyaracaanu. Naacuajitij, Cristo cumaacaari socua janiyajinia niqushaaquiaa poonijiyano. ¹⁰Naacuajitij, janiyari shuquiriquiaani cumaacaaju pueyano cua quiniucua, Pueyaso cumaquiniuria janiya. Naacuajitij, tamasa jaara sacuaraatia casaa sequeriquia

janiya na juaashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panishano jiitiaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuj, janiya jaara naquiya miitiasaaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucujanaa cumaacaaju quiqiaani, janiyari jiyacari socua jiyanoohua cumaacaraca quiqiaani, Pueyaso cumaquiniucua janiya.

**Pablo tacaashacari Corinto tiacajinia quiniaa
Pueyaso muerasu maanuucua**

¹¹Janiyari seetanujuanaa juhua paateca tama janiyajinjijiaaja pohuatereeni, juhua pueya shocotaja. Niaacuajaari naa cua pohuateree, niaacuaja naara cucuaji tacuyaquiuanu cua sesacaja pueyatej. Janiyanaari najuhuaa quijia pueyanoni. Naajaa, niaacuajaari niishiya, janiyari maja socua najuhuaa quijia cuno pojorijinjini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara.

¹²Juhujaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijoquiaari Pueyaso cumaacata nia niqiarani. Niaari nocuaji jiuujiatecoquiaari. Naacuajitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. ¹³¿Janiyateeri sesa nia jiitiaquiaarini, Pueyaso rupaa cua niishitiojosacari nijaniya? ¡Maja! Janiyari nia miiquiaari maniniani, naajuhuj, taa cua miiquiaari tamasa jiyacajinia quiniaa Pueyaso pueya maapuecuani. Majaari rimiajata cua miiniu quiqiaari nijaniya, niaata cua quishacari. Maja cutaraari cua mashiniquijionu quiqiaari cumaneeca nijaniyajinjiji. ¡Cua jiyanoori cunora, jaara sesa quiqiaari nijaniyara!

¹⁴Quiarijiani, janiyacuaajaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutianiyani. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatia cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacuajitij, cua mashiniquijiyiquishacari cumaneeca nijaniyajinjiji, janiyari seetanujuanaa juhua nia queni. ¹⁵Janiyari shuquiriaatia tama cua cumaneecajaaja puecanutianiyani cua quishacari niaata, socua cua niishitiojonura nijaniya. Naacuajitij, janiyari tama cua cumaacajaaja puecanutianiyajuhuj, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasa nijaniyajinjijionnaari soquecoya, janiya naasucuaari jiyasohuja nia cumaneeca nohuasejoquiaani, cua sapojonuta nijaniya. ¹⁷¿Seetanutejanaa pueyanaa? ¿Janiyateeri nia sapojouquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? ¡Maja! ¹⁸Janiyacuaajaari Tito jiyaroquiaari niaacua na quianurani, na cumaquiniuria nijaniya. Janiyari nata jiyaroquiaari tamonu Pueyaso pueyanohujuhuj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocuaajaari cumaneecaacua jiaatiaashijia, juhua janiyajuhuj. Janiya Titota, canaacuaajaari jiyanoohua nia paniquiaani.

¹⁹Sacuaraatia canaacuara nia rimiaaquenuucua pueyanaa, naajaa, majaari nia jyaniniu canaa tama canaacuajijiaaja tacuyani, juhua canaa nequesoreena nia quishacari. Saniniujia, canaari niya Pueyaso niqiaari nio naajiya

niaacuarani, Cristo pueya canaa quiniucua. Naajuhuj, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjiaca nia quiniuria. ²⁰Janiyari puereyani, niaacua cua tiuquishacari, janiyari niaacua taraajenutaniyani cua riuriatasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiitiasanoocua jiaatiajaca quiyajaa. Niaa naasucuaari juaaniu porocua quiyajaa. Niaa naasucuaari tama nia panishanojuajaa mijiaca quiyajaa. Niaa naasucuaari niarta pueyacuara coriaacojojuaca quiyajuhuj. Naajuhuj, niaa naasucuaari niarta pueyacuara rimiaaquenujuaca quiyajaa. Naajuhuj, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhuj, pueyaracaanu nia juayonuujutanuucua. ²¹Naacuajitij, janiyari puereyani janiya naasucuaari Pueyaso niqiuara caririqiniutianiya nia naaquini, niaa jaara naa sesa mijiaca quiyajaa. Janiyari puereyajaaniuhuj, janiya naasucuaari nujuquenutaniya cua taraajenuta noo sesa mijiaca pueyacuani, cuno pojori jaara sesa na miishano tarinitiaaqui-quianujua. Noojiaqueya nijaniyajinijinooori sacuaraatia mijiaca quiqianujua: cararaatia mijiaca sacuaraatia, na camishoo maaji numuetucunu porocujuhuj, naajuhuj, majaari tama nojori cuaqueya panishanojuajaa nojori rejetenu quiqiaa.

Socua Pablo nacasusacari Pueyaso pueya

13 ¹Nioori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatate nojori niqishanojiniji, pa naata seetanujuanaa na pohuatasanoocua tiuuniu cutara. Naajuhuj, niaacua cua tiuquishacari, janiyari naa miiniutianiyanian nia nequesoreesacari cuno sesa mijiaca. ²Pueyanaa, janiya jaara pacutequiaariuhua niaacua quianutej, janiyacuajaari puetunu nijaniyajinijinio cuno sesa mijiacajanaa piriyojoquiaarini. Quiarijiani, tucuaaanu cua quishacarijia, janiyari puetunu cuno sesa mijiacajanaa socua piriyojiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa mijiacanio. ³Cua nequesoreesacari cuno sesa mijiaca, niaari jiyacari niishiniutianiya janiyari seetanujuanaa Cristo sequesano caminiujuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jiitianu nijaniya juhua cumaacaaju pueyano. Niaacuajaari na cumaaca niqiuqiaa tama nijaniyajiniajaaja na saniitiosacari nijaniya. ⁴Seetanujuanaa, Cristoori juhua cumaacaaju quiqiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhuj, canaa, na rupaa pohuatanaani, canaari naquiya miishaaquiaajaaniuhua saaja

mijiria quiniaa canaa quiniucua, taa nojuaja quiqiaaricuaani. Saniniuujia, Cristo rupesano canaa quishacari quiarijiani, canaa cutaraari Pueyaso cumaacaracani, maninia canaa jiitianura nijaniya.

⁵Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia mijiaca taa Pueyaso muerasu miiqiaacuuaani? ¿Majateeri nia niishiniu, niaa jaara seetanujuanaa Jesucristoocua tiuujia quiri, nojuajaari nioojiajinia quiya? ⁶Naajuhuj, jacaria nia niishiriojore canaajiniji. Nia niishitiriqiani, canaari seetanujuanaa Jesucristo jiyaramiquishano pueyani, maja sapojonuujuaca. ⁷Canaari Pueyaso secojoquiaa niaacuarani, tojetaarucujanaa sesa miyashijia nia quiniuria, maninia Pueyaso muerasu nia quiniuria. Majaari naa canaa secojonu quiqiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia mijiaca nia quiniuria Pueyasora. Niaa jaara naa maninia mijiacara quiriuhua, majaari canaa saniitionu quiniutianiya nijaniya Pueyaso cumaacata. Naacuajitij, majaari pueya niqiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhua quiqiaa pueyani, naajaa. ⁸Canaa jiitiasano cumaacaari maja canaa saniitiotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria nijaniya, socua maninia Pueyaso Rupaa tojitiajaca nia quiniuria. ⁹Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura nijaniya niaa jaara Pueyaso tojitiaashijia quiriqiaa. Naacuajitij, canaari juhua cumaacaaju pueya niqishano quiniutianiyanian, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia mijiaca Pueyaso muerasu nia quiniuria seetanujuanaa. ¹⁰Janiyari nio cua naajioneejinia jiyanojua nia nacasuyani tucuaaanu cua quishacarijia, maja jiyanojua nia nacasunura nijaniya, niaacua cua tiuquishacari. Pa Jiyaniijiacuajaari nia jiyatequiaari juhua nia jiyaniijia nia quiniuria, na cumaacata nia canashitijionura nijaniya, seetanujuanaa cumueeca na muerasu nia quiniuria. Pueyaso niqitiosano na cumaaca janiyari maja nia sesonura nijaniya. ¹¹Cua tucuatunura nio cua naajioni nia panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jiaatiajaca nia quiri. Nioojia nia cumaquiri, maninia nia rootasanota. Naajuhuj, nia jiyanojoooriquia maninia rupueetesano nia quiniuria. Naa nia quishacarijia, Pueyasoori nia rupueja quiniutianiya. Nojuajaari pa panijia, pa jiyanojiajuhuj. ¹²Pueyanaa, Pueyaso tojjiaca nia quiniucua, nia saruhujotooriquia nujuunuta, seetanujuanaa nia paniniutia niarta Pueyaso pueya. ¹³Puetunu niqijinoo parta Pueyaso muerasujanaari nia sequeya nia saruhuatunura nijaniya. ¹⁴Pa Jiyaniijia Jesucristo cuara cumaquiiria nijaniya pueyaracaanu. Nijaniya cuara quiiria pa Que Pueyaso panishano pueyaracaanujuhuj. Naajuhuj, niaa cuara quiiria Pueyaso Sohuanu rupesano pueyaracaanu. Puetunu nijaniyajanaa cuara nia quiiria.

PABLO NAAJIONEE GÁLATA JIJAJINIA QUINIAA PUEYASO PUEYACUARA

Gálata pueyacuara naajionee

1 ¹¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ²Niya cuata quiniaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuerajanaa. ³Pa Que Pueyaso, mariyata pa Jiyaniijia Jesucristoni, nojori cuaara cumaquiiria niajaniya, nioojia cajitishano nia quiniurijuhua. ⁴Jesucristoori tama na cuaqueyajaaja panitiaquiaari pocuara na mosaanura. Naacujitij, nojuajaari pa jeequequiaari puetunu sesa pa miishanojinijianaa. Nojuajaari naa miiquiaari sesa miiniucua jiaatanu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujajani, na muerasu pa quiniuria. ⁵Naaratej, pa Que Pueyaso cuaara maniniuhua-queetasano quiiria. Cuaara naa quiiria pueyaracaanutej.

Maja tamonu maninia rupaa quiniu socua Jesucristo rupajiniji

⁶¿Taa nia miiquianuni pueyanaa? Quiarijiani, janiyari jiyanojia tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojtiajaca nia quiniuria? Pueyasocujaari Neyanutaja nia cojiritiaquiaari paniniu, Jesucristo miiniucua maninia niaara, na panishano pueya nia quiniuria. ⁷Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhua tamaatia nia niishitiojonuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhuanaj, mariyateyacato nojori quiniucua. ⁸Cua tojiri pueyanaa, tamonu pueyano jaara pocuaji Tacuna rupaa niishitiojoriquia niajaniya tamaatia canaa niishitiojosanojiniji niajaniya, Pueyasoori na saniitionutaniya. Naajuhua, janiya jaara tamaatia pohuatare Jesucristojiniji niajaniyani, jiyocuaanuji roseno Pueyaso serujuhua, Pueyasojuaanaari canaa saniitionutaniya. ⁹Janiyacuajaari naa sequeja niajaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Naa jaara tamaatia pohuataaariquia Jesucristojiniji, maja naate taa tari cua pohuataquiaari niajaniyacuajani, Pueyaso cuaara saniitiooranaj.

¹⁰¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanishaaquiaari Jesucristo jiyaramiquishano na quiniuriani

¹¹Cuarta Pueyaso pueyanaa, nia pohuatareera cante cua niishitiojoquiaari Jesucristo rupaani, cua pohuatasano niajaniyani. Pueyanaa, nio rupaa janiya na pohuataa niajaniyani, nioori maja mijiria quiniaa pueya niishitiojosano janiya. ¹²Taa cua sequeya niajaniyacuajani, majaari nio rupaa cua niishiniu quiquiaari tamasa pueyajiniji. Jesucristojuanaacuajaari na rupaa cua niishitioquiaari.

¹³Naa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya puecoonu panijia puetunujuanaani. Janiyari jiyanojia paracaajia nojorini. ¹⁴Janiyari seetanujuanaa canaa supuetanaa niishitiojosano tojijia quijia cutarani, socua cuarta Judiocuaca mashiquiorijiniji. ¹⁵Naajaa, jiyanojia panijia Pueyaso quiniucua, cua supueyaquishacarijia, inojuajaquiri tari cua saquiriojoquiaari na pueyano cua quiniuria! ¹⁶Naacujitij, tama na panishacarijiaaja, nojuajanaari Neyanu cua niishitioquiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari quenaaja tamasa nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocujaari maninia cua niishitioquiaari puetunujuanaa Neyanujiniji. ¹⁷Naajuhua, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacarijij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaarihua Damasco tiacajiniuhuanu.

¹⁸Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹Jiyacarijij, majaari socua Jesu saquiriojosano pueya cua niquiniu quiquiaari. Janiyari saaja Santiago niquiquiaari cutarani. Nojuacuajaari pa Jiyaniijia Jesu tarajanu. ²⁰Pueyanaa, Pueyasocujaari niishiya, janiyari nio cua naajiojinia seetanujuanaa nia pohuataani.

²¹Na nuhuaji, janiyari quiaquiaari Siria jiyajiniani, Cilicia jiyajiniano. ²²Saniniuuja, Judea jiyajinia Jesu tojtiajaca maapueeri juhuanojuaja maja na niishitiniuu quijia janiya. ²³Nojoriiri saaja naa poojotasaaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacari-tij, nojuajanaari quiarijia pa Jiyaniijiajiniji pohuataa pueya niquiarajuhua”. ²⁴Naa nojori tojinuuushacari janiyajinijitij, nojoriiri Pueyaso maniniuhuaqueetaquiaari nojori paraca na jataniniucua Jesu rupaa pohuataa na quiniuria.

Jesu jiyaramiquishano pueya niishishacari,

Pablo seetanujuanaa Jesu jiyaramiquishano pueyanujuhuaj

2 ¹Catorce marijia jaara shocojoquiaari, janiyari Bernabeeta Jerusalén tiacajinia pacutequiaarihua quianuni. Janiyari jiyacari Tito rupoquiaari cucujuhua. ²Pueyasocujaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojtiajaca jiitianaa pueyata rerejoquiaarini. Maja seetanu puetunu nojoritijanaa, saaja nio pojoritia: Santiago, Pedro, Juannio. Janiyari saaja cuno pojori niquira pohuataquiaarini taa cua pohuataquiaa Jesujiniji puetunu taucuacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuaa sesa niishitiojiya taucacani?” Cua sequetureeri: “Maja. Quiaacuaja seetanu rupaajanaa niishitiojiya taucuaca, naa Jesucristojiniji quia pohuatasacari nojori”. ³Naajuhua, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa,

majaari na sequesaanu quiquiaari na cararaatiuquua co mialesaanura, seetanjuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiiitianaata, nojoriiri Tito niqiquiaari nareja, nojori na rupuenurajuhuj. Nojoriiri niishiquiaari nojuajaari seetanjuanaa Pueyaso pueyanohuj, saaja Jesucristoocua na tiuuniuucua. ⁴Saniniuujia, noojiaqueya canaa Judiocuacajiniioori tama nojori cuaqueyajaaja jiyatequiaari juhua Jesu tojjiaa pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanjuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucuacaanu Moisés Rootasano tojjiaa canaa quiniuhua. ⁵Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanjuanaa Pueyaso muerasuni nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariucuacaanu niishitiojosano.

⁶Cuno pojori Pueyaso pueya maapue jiiitianaa Jerusalén tiacajiniani, nojoriiri jiyanojua tojjishano pueya quijia. Janiyara naajaa. Pueyasocuaajaari najuhua quijiaa jiyanoquuaajuhuj, taa na jiyanoquuaa tojjishano pueyacuani. Naajaa, cuno tojjishano pueya jaara tojjiaari taa cua pohuataquiaa Jesucristo rupaani, majaari quenaaja niquiriyatu rupaa nojori sequenu quiquiaari, nojori niishitiojonura janiya socua. ⁷Nojori cutaraari niishiquiaari Pueyasocuaajaari seetanjuanaa cua jiyatequiaari na rupaa pohuatana cua quiniuria taucucara, taa Pedro na jiyatequiaari Judiocuaca niqiuara pohuatana na quiniuriacuani. ⁸Pedro Jiyatena Judiocuaca niqiuara Jesucristojiniji pohuatariquiano, cuno Pueyasocuaajaari cua jiyatequiaarijuhua taucuaa niqiuara pohuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹Santiago, Pedro, Juannio, nojoriiri socua tojjishano quijia puetunu Jesuucua tiuunaa cuarta Judiocuacajiniiojuanaa. Nojoriiri seetanjuanaa puetunu Pueyaso muerasuni jiyaniujanucujanaa quijia. Naajaa, nojoriiri seetanjuanaa niishiquiaari Pueyasoori maninia cua jiyanoquuaari, na jiyatenura janiya Neyanujiniji pohuatana cua quiniuria taucuaa niqiuara. Naaratej, nojoriiri na juaashiqua niqiuojuquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanjuanaa nojori cojiniaani. Naa canaa sequeturiquiaarijuhuj: “Maniniacuaja. Nia quiojiyare taucuaacuua tii nia pohuatana Jesujiniji nojoriijuhuj. Canaari saniniuujia parta Judiocuaca tajinia poonijonutanianijia, nojori niqiuara canaa pohuatana Jesujinijijuhuj”. ¹⁰Nojoriiri canaa sequequiaarijuhuj: “Canaa panishano pueyanaa, majaari nia niyajetanu casamijuniuucua pueya naacunu”. Naaratej cuarta Pueyaso pueyanaa, puetunu tiqiyocujanaa cua rucuanesacari, janiyari naa miiquiaa seetanjuanaani.

Antioquiya tiacajinia Pedro nacasusaanujiniji pohuatano

¹¹Tamacari, canaa quishacari Antioquiya tiacajinia, Pedroori canaacuua niqiuarijuhuj, canaata na quiniuria tii. Tii na quishacari canaata, Pedroori sesa miiquiaari cua niqiuara. Cunora, janiyari jiyanojua na nacasuquiaarini. Cuno na miishanoni, cunoori seetanjuanaa sesa quiquiaari Pueyasora. Naa na miishacaritij, tamajaaja miiriquiaa cocuaataari. ¹²Pedroori naa miiquiaaritij. Coteenu canaa cojiquiaari maniniaari tariucua Jesuucua tiuujiaa taucucata, canaata na miaquejonura jatiqui. Jiyacaritij, canaacuua tiuquijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii

canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaa taucucata. Narta Judiocuaca puerequiaariiri maja na sequesaanura: “Cunoqui sacuaraatia miaquejojua taucucata”. ¹³Tii quiniaa Jesuucua tiuujiaa Judiocuaca jaara niqiquiaari naa Pedro miishanocuaatej, nojoriiri jaarajaaja canaacuaji rupatequiaarijuhuj, Pedro na cojitiniuria. Naajuhuj, iBernabeeri jaarajaaja canaacuaji rupatequiaarijuhuj cuno mosanucua na cojiniuria! ¹⁴Naaratej, janiya jaara naa nojori niqiquiaari tariucua Jesuucua tiuunio taucuaa tamacatiuyani, janiyari niishiquiini, cuno pojoriiri maja maninia na miitiniuri quiriqiaa. Cunoori maja na quiniuri quiriqiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niqiuarajanaa naa sequequiaari Pedroni: “Quiaari Judio pueyano. Naajaa, majaari seetanjuanaa juhua Judio pueyano quia quiniuri quiqiaa. Quiaritia saniniuujia, quiaari Jesuucua tiuunio taucuaa shiniujia nojori quiniuria seetanjuanaa juhua Judiocuaca, nojori rupenura pajaniya. ¿Casaara naa quia shiniujia nojoriiri? ¹⁵Paacuajaari Moisés Rootasano tojjiaa cutarani, Judiocuaca pa quiniuucua. Paari maja tahuani, Pueyaso tojjishajia. ¹⁶Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjiaa pa quiniuucua. Maja. Pueyaso cutaraari pa jiyanojia, Neyanu Jesucristoocua pa tiuushacari. Paari cunora Jesucristoocua tiuquuaani, nojuaja jiyanooniura pajaniya puetunu sesa pa miishanojinijianaa. Sesa pa miishanoori maja na jiyanooshaanu quiqiaa Moisés Rootasano pa tojjishacari. Maja. Naajuhuj, majaari quenaaja niquiriyatu pueyano jiyanooshaanu quiniutianiya Moisés Rootasano tojjia na quiniuucua. Maja.

¹⁷Paacuajaari Jesucristoocua tiuquuaarini, jiyanooshaanu pa quiniuria, maja socua Moisés Rootasano tojjiaa pa quiniuria. Na nuhuaji, paa jaara jiyaniyani paa sesa miijiaa quiriuhani Moisés Rootasano pa tojjiaquishacari tarini, saaja Jesucristoocua pa tiuushacari, paari jiyanojua jiyajenyani. Naa pa jyanishacaritij, paari juhua sequeyani Cristoori pa jyaterojua sesa miijiaa pa quiniuhua nocua pa tiuuniuucua. ¿Quiaateeri naa sequenu paniya Pedrona? ¡Maja! ¹⁸Paacuajaari maninia miiquiaarini pa tarinitiasacari tojiniu Moisés Rootasano, jiyanooshaanu pa quiniuria saaja Jesucristo rupaacuua pa tiuushacari. ¿Paateeri socua maninia miijiaa quiniutianiya Pueyaso niqiuarini, paa jaara Moisés Rootasano tojjiaa quiriuhani? ¡Maja! Paa jaara naa niishirojiani, paari jiyanojua jiyajenyani. Paacuajaari seetanjuanaa pohuatanuquuaa puetunu pueya niqiuarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohuatanusano jaara sapojosano quiriqiaa, paa maara jiyanojua sesa miijiaa quiriqiani. Saniniuujia, Pueyaso cutaraari seetanjuanaa pa jiyanoquuaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niqiuarajanaa. ¹⁹Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucuaji. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojjiaa cua quiniuria socua. Naacuajitij, janiyari quiaritia saaja Pueyasora quia cutarani. Janiyara, janiyari tari cojiritiasaaquiaari monu Cristota niyacutesanojiniani. ²⁰Naacuajitij, quiaritia, majaari nio janiya quiani. Jesucristocuaajaari nio, cojiajania quiyani. Majaari tamajaaja saminio cua quiniuri. Jesucristo cua rupesacari, naacuajitij janiyari saminio quiyani. Naa saminio cua quishacari puetunu cua cuaqueyatajaatej, janiyari rishiyani Pueyaso Niyanuucua tiuujiaa cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. ²¹Majaari cua ruuretanu Pueyaso jiyanooni

panishacari janiya. Jaara pa naata quiriquia tama pa cuaqueyajaaja jiyanootiniu Pueyaso, Moisés Rootasano tojjijaca pa quiniuucua, Jesucristo maara najuhua cusoquiaari pocuara.

¿Teyano tojjijia pa quishacari pa jiyanooshaaquiiani, Moisés Rootasano, Jesucristoocua tiuuniu soj?

3 ¹Mosanucua Gálata pueyanaa, ¿cante nia shimiojocanuni, naa pa Jiyaniijia Jesucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaarihuaj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacarijij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa. ²Quiarijiani pueyanaa, janiya saaja nio nia nequesotanu paniyani. Cua riucature. ³Niaateeri Pueyaso Sohanu tiuquiniquiaari nioojiajinia Moisés Rootasano nia tojjiniucua, Jesucristo rupaacua nia tiuuniuucua soj? ¿Taa nia sequeyani? Niaacuajaari niishiya, niaari Pueyaso Sohanu tiuquiniquiaari nioojiajinia Jesucristoocua nia tiuushacari, niaa jaara na rupaa tojjiquiaari. ⁴Niaaquiiri tojetaarucujanaa mosanucujuhuanajaj! Nia niquishuriiraj, niaacuajaari Pueyaso muerasura quiquiaari Pueyaso Sohanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuuja, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojjishacarihuaj juucua, tama nia cumaacatajaaja? ¡Maja! ⁵Pueyasocujaari jiyanoohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhua quiquiaarijuhuaj? ⁶Pueyanaa, Pueyaso jaara na Sohanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara niaa na miiquiaarini? ¿Pueyateeri naa maninia miiquiaa nijaniyatej, Moisés Rootasano tojjijaca nia quiniuucua? Maja. Nojuajaari naa maninia miiquiaa nijaniyatej, saaja na rupaacua tiuujica nia quiniuucua, canaa pohuatasano nijaniyani.

⁷¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaari saaja nocua na tiuuniuucua. ⁸Naacuajitij pueyanaa, quiarijia nia niishiri cutara, cante Pueyasocua tiuujiani taa supuetana Abraham tiuquiaricuaani, nojoriiri seetanujuanaa canaa supuetana Abraham niquihuajanaa cutara. ⁹Pueyaso jaara na sequenu panishano naajiotaniquiaari tariucuaaanu, nojuajaari tari niishiquiaari taa taucua na jiyanooniutianiyajanihuaj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujinio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijinijuanaa nocua tiuuriquiano pueyatej”. ¹⁰Naaratej, cante Jesucristoocua tiuujiani, Pueyasoori na jiyanooniutianiyajuhaj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristoocua tiuujica, taa na miiquiaari Abrahamcuani.

¹¹Saniniuuja, cante jiyaniyani Pueyasoori na jiyanooniutianiya Moisés Rootasano tojjijia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuaaanu Pueyaso Rupaajinia:

“Moisés Rootasano tojjijia cuaara tojiiria puetunu Pueyaso naajiotanishanojuanaa. Cante niquiriyatu na sequesano tojijiaquijiani, nojuajaari pueyaracaanu saniitiosocoriquiano”.

¹²Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojjiniuucua. Saniniuuja, naa naajiotasano quiyacuajaari Pueyaso Rupaajinia:

“Pueyaso jiyanooshaanu pueyanoori pueyaracaanu rishiriquiano cutara, Pueyasocua na tiuuniuucua”.

¹³Saniniuuja, Moisés Rootasano, cunoori maja na niishitiojonu Pueyasocua pa tiuuniuria, jiyanooshaanu pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjijiani, nojuajaari cuno na tojjiniuucua rishiniutianiya”.

¹⁴Maja maninia pa tojijiaquiniuucua Moisés Rootasano, paari Pueyaso puecosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaarihuaj tariucuaaanu Pueyaso Rupaajinia:

“Pueyaso sesacasanoori cuno, niyacutesanojinia teetesanooni”.

¹⁵Naa Jesucristo cusonuucua pocuaratej, saaja nocua nia tiuushacari, Pueyasoori na naata shuquiritiniu nijaniya taucacajuhaj, puetunu na sequesanojajanaa canaa supuetana Abraham. Naajuhaj, saaja pa tiuuniuucua Jesucua, puetunu pajaniyajanaari Pueyaso Sohanu masequiaani, taa seetanujuanaa Pueyaso sequequiaari tariucuaaanucujani.

Moisés Rootasanoori maja na naata Pueyaso sequesano Abraham jataniniu

¹⁶Cuarta Pueyaso pueyanaa, maatia nia pohuatareera maninia nia niishiniuria cua pohuatasano. Cua tojiri. Pueyano jaara maninia miini paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁷Tariucuaaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujinio supueriquiano pueyanonio”.

Nia niishiri pueyanaa, tariucuaaanu Pueyaso Rupaajinia naajiotasanoori maja na sequenu: “Abraham jinianuucujinio supueno pueyara”. Maatia sequeyacuajaari: “Abraham jinianuucujinio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocua. ¹⁸Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jataniniujuhuaj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijiaaraari cuatrocientos treinta marijia. Cuatrocientos treinta marijia shocojonu nuhuaji, Pueyasoori jiyacari shusha Moisés niqutioquiaari na rootasano, saajianeecaacua na quejasano. Moisésri saniniuuja pueya na niishitioquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhua na quiniuria pajaniyara. ¹⁹Pueyaso niqutionu panishano pajaniya jaara pa niqutiosaaquia saaja pa tojjiniuucua Moisés Rootasano, na niqutiosocoriquiano pajaniya maara nareja niqutiosoo quiri. Saniniuuja, Pueyasocujaari seetanujuanaa naa Abraham sequequiaari:

“Janiyari nareja quia niqutionutaniya cua sequesanooni”.

²⁰Niaa naasucuaari sequeya: “Jaara naa quirritij, ¿casaarano socuateeri Moisés Rootasano?” Nia sequeereera pueyanaa. Jiyanoohua Abraham nuhuaji, Pueyasoori Moisés caminiujitiquiaari na rootasano, pueya niishiniuria nojoriiri seetanujuanaa Pueyaso tojijashijia. Cunora quiquiaari Moisés Rootasano. Cuno Rootasanoori quiquiaari Abraham jinianuucujinio

supueno pueyano cuara tiuquiquiaarijiaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocuaja. Naacuajitij, Jesucristocuajaari Pueyaso jiyaniquishano quiquiaari, na sequesacari Abraham, “quia jinianuucujainio superiquiano pueyano”. Cristocuajaari puetunu Pueyaso sequesano Abrahamjanaa masequiaari pajaniyarajuhua, taa Pueyasojuanaa sequequiaari Abrahamcuajani. Saniniuuja, Moisésri saaja pueya niishitiojoquiaari Pueyaso seya caminiujiushano nojuaja.²⁰ Abrahamra saniniuuja, majaari quenaaja tamonu pueyano quiniu quiquiaari nera na caminiujiuriquiano. Pueyasojuanaa-cuajaari nocua muetaquiaari, na sequenura seetanujuanaa taa Neyanuucua tiuujiaca na miiniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanojiniji.

Casaarante Moisés Rootasani

²¹Naa cua sequesacari, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jyanootini pajaniya, paa maara Moisés Rootasano tojtijaca quiriqiani, Pueyaso jyanooniuria pajaniya.²² Saniniuuja, tariucuaaanu Pueyaso Rupaajiniji, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacuajitij, paari maatia niishiyani, puetunu pueyajanaa cuara tiuria Jesucristoocua, Pueyaso sequesano Abraham nojori masenura.²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jiiatiano pueya quijiani. Paari naa quijia taraatia pueyacuani, paa jaara tojiquiaari Jesucristojinijiaatijia, nocua pa tiuuniuria.²⁴ Naacuajitij, Moisés Rootasanoorihuhua pa jiiatiana quiquiaari. Juhua naatujooriniyojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuuari. Naacuajitij, paa jaara Jesuucua tiuquiquiaari, paari puetunu sesa pa miishanojinijianaa jyanoooshaaquiaarini.²⁵ Naa Jesuucua tiuujiaca pueya pa quishacari quiarijiatej, majaari socua pa tojiniu tariucuaaanu pa canashitijona. Moisés Rootasanoorihuhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia.²⁶ Quiarijia cutara, puetunu nijaniyajaari Pueyaso pueya, Jesuucua nia tiuuniucua.²⁷ Naacuajiti pueyanaa, niaa jaara moojinia tiuquinishaacanu, seetanujuanaa nioojiata nia tiushacari Jesuucua, niaari na coquetesaquiaa. Naa nia quishacari natatej, na Que niqiara, niaari juhua nojuaja niquishano, na panishano muerasuniyojua nia quiniuucujuhua.²⁸ Naa Pueyaso muerasu pa quiniuucuatej, majaari Pueyaso niqiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quiriujuhua, naajaa. Poonijotesano pueyano maaraja, camarnuju pueyanonio, cunoori maja rimiajata Pueyasora. Naajuhua, caya, maaji, cunoori maja rimiajata Pueyasora. Jesucristoocua tiuujiaca pa quishacari, Pueyasora, puetunu pajaniyajaari juhua niquiriyatu pueyanoni.²⁹ Naajuhua, niaa jaara seetanujuanaa Jesucristo pueya quiri, niaari seetanujuanaa canaa supetana Abraham jihuacuajainio supueno pueya cutara. Naacuajitij, niaari Pueyaso sequesano Abrahamrano maseriquianojuhuaj.

4 ¹Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano nianu jaara naatujua quiri, neyanuuri juhuanujoja maja na naata na que casami jiiatiano. Nojuajaari saaja juhua pataaco seru, naatujua na quishacarijia.² Naacuajitij, tamsacaari cuno mueya canashitijia, cuara mashajara quiriijiaatijia, jiyaniijia jiyatesocoriquiano, taa na shipininio sequequiaaricujani. Juhucarijia niishitiojoshijiaariuhua, maninia na jiiatiana

nerano na que riuriotaca.³ Paari naajuhua. Pueyaso pueya pa quiaquishacarijia, paari juhua naatujoori quiquiaarini. Paari mijiria niishishano tojtishaaquiaarini, pa supetanaa niishishanonio. Paari naa taraatia jiiatiasaquiaarini.⁴ Na nuhuaji, Pueyaso jaara tari na sequesano tohuatenu paniquiaari, nojuajaari Neyanu jiyaroquiaari pocua, mijiria na rasaanura maninia maajiniijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti.⁵ Naacuajitij, nojuajaari na naata Moisés Rootasano tojijia jyanooniu, maja socua pa tojtishaanura Moisés Rootasano. Naaratej, Pueyasori na naata pa jiyatenu na muerasu pa quiniuria cutara.⁶ Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacarijia, nojuajaari Pueyaso pa sequetequiaa, “cua Quena”.⁷ Naacuajitij pueyanaa, majaari tari nia quiniu Moisés Rootasano tojijia, juhua pataaco seru. Niaacuajaari seetanujuanaa Pueyaso niqiohua cutara. Naa na muerasu nia quishacarijia, niaari tariucuaaanu Pueyaso sequesano Abrahamrano maseriquianojuhuaj, taa na muerasurano niqitionu na sequequiaaricujani.

Pablo tacaashacari Galacia jiyajinia quiniaa Pueyaso pueyacu

⁸Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijia quiquiaari taraatia. Cuno casaari maja seetanujuanaa Pueyaso.⁹ Quiarijia saniniuuja, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacarijia, ¿casaara najuhua supetanaa pueya niishishano miiniuria nia paniuhua socuani? Cuno, canaa supetanaa Judiocuaca rootasani, cunoori maja na naata cumaquiniu nijaniya. Niaari najuhua na tojijia quiniutianiya.¹⁰ Niaanaari puetunu juucujanaa niishijia quia, juhua canaa supetanaa Judiocuaca. Niaanaari sequetuquiaa: “Cuno juuca, majaari pa miquenu quiniutianiya. Cunoori puerasano juuca, Pueyaso jyanooniuria pajaniya”. Niaanaari naa miiquiaa puetunu shuniarajanaa, puetunu marijarajanaa. ¿Casaara naa miijiacara nia quiriocuacuani cuarta Pueyaso pueyanaa? ¹¹Naa nia miiniuucuatej, janiyari jyanohua tacaya quiarijia niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiri najuhua quiquiaari”.

¹²Cuarta Pueyaso pueyanaa, janiyari seetanujuanaa nia sequenu paniani. Nia miiriohuarohua taa cua miiquiaaricuaani, shusha cua tiuquishacari niaacu. Moisés Rootasano niishiyashijia nia quishacari, janiyari na tarinitiaquiaari tojiniuni, juhua nijaniya cua quiniurajuhua. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiiatiquiaari naata cua quishacari.¹³ Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiaari nia niqiarani.¹⁴ Naa cusosu cua quishacari niaatatej, naajaa, majaari nia ruoretanu quiquiaari janiya, na sacuaratia cusosu cua quishacarijia. Majaari quenaaja nia soonu quiquiaari janiya. Saniniuuja, niaari cua tojtiaquiaari juhua Pueyaso serujuanaa, nia niqiara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua nijaniya.¹⁵ Quiarijiaariuhua pueyanaa, ¿casaa nia tojetacanuni? ¿Casaara nia tarinitiohuacuua shuquiriaatia nia quiniuurini, taa nia quiquiaari coteenucujani? Janiyacuajaari niishiquiaarini, jyanohua nia paniniucua janiya, jaara nia naata quiquiaari, niaa maara nia namijia samiriootaquiaari nia niqitiosocoriquiano janiya, cucua nia taraajesacari.¹⁶ Quiarijia naa cua sequesacari seetanujuanaa nijaniyatej, ¿niaateeri cunora cua niqiniutianiya juhua nia paraca? ¹⁷Cuno pueya, najuhua tamaatia nia niishitiojoquiaa Pueyaso rupaani,

quiarjia nojoriiri maninia miiquiaa nijaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojjijaca nia quiniuria. Naacuajitij, majaari tari cua rootasano tojtijajaca nia quiniu quiniutianiya. Niaari cua cartenutaniyajuhua.
¹⁸Quiarjiani, cuno pojoriiri nia shuquirityacuaja. Majaari nia jyaniniu janiya nia sequeyani, maja maninia parta pueya pa shuquiritiniuria. Taaquiriirinij, maniniacuajaari parta pueya pa shuquiritiniuria, seetanujanaa pa naacunura nojori. Niaacuajaari niishiya pueyanaa, janiyari jyanohua nia tojishano pueyano quiquiaarini, Jesucristojiniji cua pohuatanuucua nia niquiara. iNaa seetanujanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹Quiquiohuaniyojuanaa, jyanohua cua tacaashacari niaacua, coojaari jyanohua noonu pacuterohuacuhua, naatej, taa maaji nooquiaacuaa na manajani, quera na ranu panishacari. Naajuhua, janiyari naa pueyaracaanu miijionutaniya naquiya niaacua, niaa cuara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujanaa Jesucristo quishacari nioojiacajinia, juhua nojuaja nia quiniuria. ²⁰iSeetanujanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari cua niishiniu taa nia quiya seetanujanaani. Niaanaari Moisés Rootasano tojjijacara quirihoacuua. ¿Niaateeri seetanujanaa Jesucristo rupaa cartecanu, maja soj?

Miriqui pohuatasano Agarjiniji, Saarajinijini

²¹Moisés Rootasano tojtijacacanaa, cua tojiri. ¿Majateeri tariucuacaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? ²²Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuacuajinijuhua. Abrahamri neco seru muetuequiaari. Na sesojoquiaari Ismael*. Na nuhuaji, saniya necojuanaari nera muetuequiaarijihua. Na sesojoquiaari Ismael*. ²³Pueyanaa, Agar* jaara Abrahamra muetuequiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuujia, saniya necocuajanaa jaara nera muetuequiaari na nuhuaji, cunoori Pueyaso panishano quiquiaari cutara, na camishano maajijiana muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaari: “Abrahamnaa, quiaari niyanuraca quiniutianiya”. Naa Pueyaso sequenucuatej, necocua Saaraari* muetuequiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴Nio caapiqui maajipohuani, Agar, Saaranio, nojoriiri juhua caapiqui seetanujanaa Pueyaso sequesano na pueyara. Naacuajitij, Agarr miriqui juhua Moisés Rootasano, Siná* tuhananujinia Pueyaso niishitiojosano Moisés. Naaratej, Moisés Rootasano tojtijajacaari juhua seya quiquiaa, taa Agar quiquiaari serucuaani. ²⁵Seetanujanaari, Agarr miriqui juhua Siná tuhananu Arabia jiyajinia. Saniniuujia, nio pa quishacari, Jerusalén tiacaari juhua Siná tuhananu, cuno tiacajinia quiniaa pueya quiniucua Moisés Rootasano tojjijaca. Cunora, Moisés Rootasanoori juhua nojori jiiitiana quiya, juhua poonijotesano seya nojori quiniuria. ²⁶Saniniuujia, quiarinio Jerusalén tiacani, jiyocuacaanu Pueyaso racatasano pa quiquioranoni, cunoori seetanujanaa Pueyaso muerasano cutara. Cunoori maja Moisés Rootasano tojjijacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. ²⁷Tariucuacaanu Pueyaso sequesanoacuajaari naa naajiotasano quiyajuhua:

“Niyajaru maajiniaa, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara.

Quiaacuajaari cartesaaquiaari niyajaru quia quiniucua. Naajaa, quiaacuajaari socua queraatia niquiohuaraca quiriquiano cuno niyacaraca maajijiniji”.

²⁸Cuarta Pueyaso pueyanaa, paacuajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniyani, naacuajiti nojuajaari neyanu Isaac raquiaari. Quiarjiani, paari naajuhua. Jesucristo rupaacua pa tiuushacari, Pueyasoori na cumaacata pa jataniquiaari seetanujanaa na muerasu pa quiniuria. ²⁹Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocuajanaa jaara nera muetuequiaari, cunoori Pueyaso Sohuanu cumaacata rasaaquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarjiaari naajuhua, Pueyaso ruuretajaca pueyari Pueyaso Sohuanu jatanishano pueya miitiaquiaa. ³⁰Quiarjia nia niishiri cutara, naa naajiotasaaquiaaricuajaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujanaa. Cuno, janiya seetanujanaa quia sequequiaari niquitionuni, cunoori maja Agar niyanurano. Cunoori seetanujanaa quia niquiocua muetusanorano, cua Sohuanu cumaacata rasano mueyaranotuhua”.

³¹Paari naajuhua, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

Saaja Jesucristoocua tiujujaca pa quiri

5 ¹Jesucristo cusonuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojjijaca pa quiniuria. Naarate pueyanaa, jyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjijacara nia quiniuhua. ¿Moisés Rootasano tojjijacateeri jiyanooshanutaniya? iMaja! Maja pa naata tama pa cuaqueyajaaja jyanootiniu Pueyaso, Moisés Rootasano pa tojjiniucua. ²Cua tojtiare pueyanaa. Janiyari Pablóni. Janiyajanaari seetanujanaa nia sequeyani, niaacuajaari Jesucristoocua tiujujaca, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujanaa Pueyaso pueyara quiniutianiya cutara, nia cararaatiuuquia co miatejosaanuucua? iMaja! Naa jaara nia niishirojijia, niaari Jesucristo cusonu jiyatenutaniya najuhua nia quiniuria nijaniyara. iPueyanaa, majaari nia tojiniu cuno Judiocuaca, canapuate nia shiniujuquiaa nia cararaatiuuquia co miatejosaanuracuajani, seetanujanaa Pueyaso pueya nia quiniuria! ³Janiyari socua sequenu paniya noo pojoririani, cararaatiuuquia co miatejonuuacatej, nojori jyaniniuucua naa nojori miishacartij, nojori cutaraari seetanujanaa Pueyaso muerasu. Cante naa miijiani, nojuaja cuara tojiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojiniu, Pueyaso jyanooniuria nijaniya? iMaja! ⁴Naa tama nia cuaqueyajaaja nia jyanootiniu panishacari Pueyasotej, Moisés Rootasano nia tojjiniucua, niaari Jesucristojiniji carejerucua. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. ⁵Pajaniya saniniuujia, paari Pueyaso Sohuanuraca cutarani, Jesucristoocua pa tiuuniucua. Naacuajitij, paari niishiyani paari tojetaarucujanaa sesa miyashijiacara jiyatesanutaniyani. ⁶Quiarjiani, Jesucristo rupesano pa quishacari nocua pa tiuuniucua, paa jaara pa cararaatiuuquia co mialesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiacara pa quiniuria, parta pueya pa paniniurajuhua.

⁷Cuarta Pueyaso pueyanaa, niaacuajaruhua Jesuucua tiujujaca quijia seetanujanaa. ¿Quiarjiaariuhua, cante nia tarinitiriohuacuua seetanu rupaacuajanaa nia tiuyaquiniuriani?

⁸Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹Cunora, seetanujuanaari nio sequesano: “Shiitianiyojua jereeca mashaca jaara shoqueeca mashacajinia shuushaare, cuno shiitianiyojuaari puetunu cuno mashacajanaa jereteja”. Naajaariuhuaaj, shiitianiyojua sesa niishitiojosanoori puetunujuanaa pa sesojuajuhuaaj. ¹⁰Naajaa, janiyacuaajaari pa Jiyanijiaacua tiuya seetanujuanaani, majaari nia tojiniu quiniutianiya tamaatia cuno pojori niishitiojosano. Saniniuujia, Pueyasoori noo pojori saniitioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosaariquiano.

¹¹Cuarta Pueyaso pueyanaa, majaari cua niishitiojonu quiquiaa taucuaacajinijinio Jesucristoocua tiuujiaa, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuujia, Jesucristo cusuucua niyacutesanojinia pocuara, paari saaja naacua jiyanooshaa-quiaani. Naa cua niishitiojonuucuatej, Judiocuacaari jiyanohua cua juaaquiiaani. ¹²Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

¹³Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniucua. Naacujitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojishacari pueyaracaanu. Naa Moisés Rootasano tojjiaa nia quiyaquishacari taritij, naajaa, majaari nia jiyaniini nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuanaa nia panitioonuta. ¹⁴Niaa jaara naa miijiaa quiriqiatej, niari puetunu Moisés Rootasanojuanaa tojiyacuaaja, taa na rootasanojinia naajiotasano quiyacuajani. Naa sequeyari:

“Panijia quia quiriqia, taa quia paniyacuaa tama quia cuaqueyajaajani”.

¹⁵Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu, naatej, taa sareya sayonuujutaquiaacuaani. Niaa jaara naa quiriqiatej, niari socua puecotoonutaniyaquij.

Taa quijiate tama na panishanojuaja miijia pueyanoni, Pueyaso Sohuanu tojjia pueyanonio

¹⁶Janiya nia sequeya cutarani pueyanaa. Cua tojiri. Pueyaso Sohuanu tojjiaa nia quiri pueyaracaanu. Naacujitij, majaari sacuaraatia tama nia panishanojuaja nia miiniu quiniutianiya. ¹⁷Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuaaj, Pueyaso Sohuanuuri poojiajinia sesa casaa pa panishano paracajuhuaaj. Naacujitij, cuno pojori miaquetoojosacari poojiajinia, cunora, majaari pa naata miiniu taa pa miiniu paniyacuajani. ¹⁸Saniniuujia, Pueyaso Sohuanu jaara nia cumaquitiojua saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutianiya tari. Naacujitij, niaacuajaari maninia miiniutianiya saa Pueyaso Sohuanutaja.

¹⁹Maatia niqishanocuaajaari taa pueya miiquiaani, noo pojori, canapuate tama na panishanojuaja miijiacani. Nojoriiri juhuajaniya na camishoo maajipohua numuetucunujuaca, sacuaraatia miitiojua narta canuutaajaariuhuaaj. Maajipohuari naa sacuaraatia miitiojua narta maajipohuatajuhuaaj. Pueyari saaja naa miiniucua jiaatijaca sacuaraatiatej. ²⁰Naajuhuaaj, nojoriiri tama nojori pueyasorajaaja nojori shipinishano casaa

seconuujuaa. Nojoriiri shimiicurijuhuaaj, narta pueyano shimiojonuujuaa. Narta pueyano niquiniu paniyashijiacajaa-riuhuaaj. Nojoriiri juaatoojuacajuhuaaj. Nojoriiri narta pueyano jiitiasanoocua jiaatijacajuhuaaj. Cunora, nojori niquiniu paniyaquijiaari. Nojoriiri maja na niishiniu rejetenu na juaaquiaca. Ritia juaajiaaari. Pueya nasojojua narta pueyanoocuarajaariuhuaaj. Naacujitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijiaa, canapuate maninia miiquiaa nojoricuajani. ²¹Cuno pojori, naa sacuaraatia miijiaa pueyaracaanu Pueyaso niquiarani, nojoriiri maja na niquiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenuujacajuhuaaj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuaaj. Nijaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiitiasano na quiniu quiniutianiya, pueyaracaanu rishijia na quiniuria shuquiriaatia.

²²Saniniuujia, paa jaara Pueyaso Sohuanu shanacure poojiajinia na poonijonurani, nojuajaari parta pueya panijiaa pa jiyateja. Poojia jiyateya shuquiriaatia quijiaari. Poojia cajitijiaariuhuaaj. Jacaria pocuajara pa jiyateyajaariuhuaaj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijiaa pa jiyatejajaariuhuaaj, pueya tiuuniuria pocua. ²³Pueyaso Sohuanuuri pa jiyateja pueya shocoteyashijiarajuhuaaj. Pa niishitioquiaajaariuhuaa tama sesa casaa pa cuaqueya panishanojuaja pa rejetenura. Paa jaara naa miijiaa quiriqiaa Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya.

²⁴Seetanujuanaari, paa jaara Jesucristo pueyanora quiquiaarini, pa rupesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaano. ²⁵Pueyaso Sohuanu jaara nia samiitanijioquiaari Pueyaso muerasu nia quiniuria, quiriqiaa seetanujuanaa pueyaracaanu na tojjiaa nia quiri cutara. ²⁶Majaari tama pa cuaqueyajaaja pa jiyaniiniu, paa socua maninia pueyano parta pueyajinijini. Paa jaara pueya shocotejaca quiriqiani, paari parta Pueyaso pueya juaatiniutianiya. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuaaj, tamonu jaara socua maninia miishaare pajaniyajiniji. Majaari naa miijiaa nia quiniu Pueyaso pueyanaa. Saaja maninia quijiaa pa quiri cutara.

Niarta Pueyaso pueyata nia cumaquitiojoriqia

6 ¹Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno nijaniyajinijinio canapuate Pueyaso Sohuanu niishitijaraca cutarani, nojori cuaara jacaria na nacasuuranonj, sesa miiniu na tarinitianuhuaa. Cante cuno sesa miijia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuaaj, jiyanohua nia cojuare tama nia cuaqueyajaaja Sesaaca mariqui nia saniniuujurijiaariuhuaaj, sesa nia miiniuriajuhuaaj. ²Maninia cutaraari nia cumaquitiojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyanijia Cristo rootasano pajaniyarano tohuateenutianiya.

³Najuhuaana quijia jaara jiyaniya nojuaja cutara niishijia pueyano, pueya tojishano pueyanotuhuaaj, naa niishiriojuaari tama na cuaqueya sapojijajaacujua. ⁴Puetunu nijaniyajanaa cumaati tama niishiriojuaaiaacujua, taamueca pueyanote nijaniyani, maninia miijia, sesa miijia soj. Niaa jaara seetanujuanaa maninia miijiaa quiriqia, tama maninia nia miishanojuaja nia timitiare. Niarta Pueyaso pueyano jaara socua maninia miijia quiri nijaniyajiniji, socua

sesa miiijia soj, niaara, naajaa. Maja cunora taraajenu, maja cunora shuquiriaatia quiniujiuhua. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵Puetunu pajaniyajaanaari tamaatia poonijiosano jiitiaani. Tama niajanijajaaja cumaati na miiquiaa maninia, Pueyaso shuquiritianura niajanija, seetanujuanaa shuquiriaatia nia quiniuria.

⁶Canapuate Pueyaso rupaa niishitiojosaquiaani, cuno pojori cuaara na niishitiojonaa niqutiojoora nojori casamijiniji saniniuujia, nojori niishitiojonaa jiitianura nojori panishanojuhuaj.

⁷Pueyanaa, maja tama nia cuaqueyajaaja nia sapojonu nia jiyanihacari niaari saniitioyaquishaanutaniya sesa nia miiniucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutaniyajaaniuhua”. Nio miriqui sequesanoori nio niishitiojia: cante maninia miiijiani, nojuajaari maninia miishaanutaniyajaacuhua. Naajuhua, cante sesa miiijiani, nojuajaari sesa miishaanutaniyajaacuhua sesa na miiniucua. Cunoori maja rimajata. ⁸Naacuajitij, canapuate tama na cuaqueyajaaja shuquiritijia sacuraatia casaa na miishacari mijiriani, Pueyasoori cuno pojori quejooanutaniya cutara, pueyaracaanu na saniitiosocoriquiano. Saniniuujia, cante Pueyaso Sohuanu tojjiani, Pueyaso panishano na miiniuria puetunujuanaa, nojuajaari pueyaracaanu rishijara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹Cunora pueyanaa, niaa jaara maninia miiijia quiri, majaari maninia miiniuria nia taajenu. Pueyaracaanu maninia miiijia nia quiri. Niaacuajaari niishiya, pueyano jaara na cuhuariquia natate, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaquirini, paa cuaara sashiirajuhua. Na nuhuaji cutara paari jiyanohua shuquiriaatia quijiacara jiyatesaanutaniyani, maninia pa miiniucua. ¹⁰Naacuajitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatasaacari na naajio

¹¹Nia niquiri cua naajio pueyanaa. Naa quera namijiaaca cua naajiosacari niaacuaratej, nia niishiri janiyajaanaari nio naajia

tama cua juaashiquiatajaajani. ¹²Socua cua tojiri pueyanaa. Cuno pojori, nia shiniujiuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jiyanohua paniya nia cararaatiuuquia co miatesano pueya nia quiniurajuhua, taa puetunu Judiocuacajanaacuaani. ¹³Cuno pojori, canapuate na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniurajuhua. Niaa jaara miatejosaare, nojoriiri tama timiquionutaniyajaaja, nojori tojtiajaca nia quiniucua. ¹⁴Janiya saniniuujia, Pueyaso cuaara cojuara janiya maja cua shuquiritianura tama cua miishanojuaja. Janiyari saaja pa Jiyaniijia Jesucristo shuquiritianu paniquiaani, pocuara na cusonuucua niyacutesanojinia. Naacuajitij, janiyari mijiria niishishanoocua jiaatiaashijara jatanishaaquiaarini. Mijiria casaari maja na naata shiniujiuni janiya, nocua cua jiaatianura socua. ¹⁵Pueyanaa, pa cararaatiuuquia co jaara miatesano quiri, naajaa. Naajuhua, pa cararaatiuuquia co jaara miatesoo quiri, naajaa. Majaari rimajata pa quiniu Pueyaso niqiara cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata. ¹⁶Puetunu nio sequesanoocua tiujuacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷Tariucuaajaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosa-nota niajanija. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitajanio. Cuaara naa quiiriatej.

PABLO NAAJIONEÉ ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojtiajaca

1 ¹¿Niaate quiyajaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa cua pohuatanura, taa na Que Pueyaso paniquiaaricuajani. Niaacuara naajiyaniija, canapue Pueyaso saquiriojoquiaari tama neracuajani, canapuee Jesucristo tojtianaacuajani. ²Pa Que Pueyaso, mariyata pa Jiyaniija Jesucristo cuara taraajeera niaacua, maninia na miiniuria nijaniya. Nojori cuara cajitiiria nioojia pueyaracaanujuhuj.

Taa Pueyaso miiquiaa pajaniyani Cristo rupuesano pa quishacari

³Pa Jiyaniija Jesucristo Queeri Pueyaso. Nojuaja pa shuquiritiare. Neyanu Jesucristo pa rupeuuucua, Pueyasoori capora pajaniyara. Nojuajaari jiyanhua maninia miiquiaa pajaniya, puetunu jiyocuacaanu na jitiiasano cumaacatajanaa. ⁴Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaarijiaariuhua na tojjiaca pa quiniuria, tojetaarucuajanaa sesa miyashijia pa quiniuriajuhuaj. ⁵Panijia na quiniucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojoquiaari na miiniuria pajaniyacujani. ⁶Jiyanhua maninia na panishano Niyanuniyojua miiniucua pocuara, nojuajaari pueyaracaanu jiyanooquiaa pajaniya. Nojuajaari jiyanhua capora. Naa maninia na miiniucua pajaniyatej, paari cunora pueyaracaanu na maniniuhuaqueetaquiaani. ⁷Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanooquiaariiri. ⁸Pueyasoori na paniniu niishitiquiaari pajaniya, na niqitiosacari na niishitija pajaniya, puetunu casaa niishijajanaa pa quiniuria. ⁹Nojuajaari jiyanhua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuuja, nojuajaari jiyasohua na miiniu panishano niishitiquiaari pajaniya. ¹⁰Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojjiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

¹¹Pueyasoori tariucuacaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuanaari tariucuacaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniucua. ¹²Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujanaa Jesucristoocua tiuuquiaarini. Naa jiyanhua maninia Pueyaso miiniucua canaa, nojuaja cuara maniniuhuaqueetasaria jiyanhua. ¹³Quiari naataja nia tojishacari Jesucristo rupaa, niaari cunora setanu rupaacuajanaa tiuuquiaarijuhuaj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupeetequiaari. Na Sohuanu niqitioquiaari nijaniyajaari-

huaj taa na sequequiaaricuajani. Naacuaji niishishaaquiaari, niaari seetanujuanaa Pueyaso muerasu. ¹⁴Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranojuanaa masenutaniya Neyanutajuhuj. Pueyaso Sohuanu pa jitiiasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucuajanaa jatanishaanutaniya juhua Neyanu pa niqishaanurajuhuj. Cunora, Pueyasoori jiyanhua maniniuhuaqueetasano quiniutianiya, jiyanhua maninia na miiniucua pajaniya.

Taa Pablo secojoquiaari Pueyaso pueyacuarani

¹⁵Janiyari nijaniyajiniji tojiriucuaani, taa pa Jiyaniija Jesuucua tiuujiaca nia quiyani, taa parta Pueyaso pueya panijia nia quiyajaniuhuj. ¹⁶Cunora, pueyaracaanu cua secojosacari niaacuara, majaari cua tarintianu quiquiaa Pueyaso cua sequenura “paacarasho”, maninia na muerasu nia quiniucua. ¹⁷Pa Jiyaniija Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura nijaniya jiyocuacaanuji niishitija. Naacuaji nia naata niishiniu na niishitiniu panishano nijaniya, maninia nia niishiniuria nojuajuhuj. ¹⁸Janiyari niaacuara secojoquiaajaniuhuj, Pueyaso cuara cuhuataara nioojia, maninia nia niishiniuria casaara Pueyaso saquiriojoquiaari nijaniyani, casaa na miiniutianiya niaarajaniuhuj. Janiyari niaacuara secojoquiaajuhuj, maninia nia niishiniuria taa Pueyaso muerasu jiyatesaanutaniya shacantuca quijia nojori quiniuriani. ¹⁹Janiyari secojoquiaajuhuj, Pueyaso cuara niishitiria na cumaaca nijaniya, cunora, nioojiajinia poonijiyani. Na cumaacaari jiyanhua, puequeyashijia. ²⁰Pueyasocuaajaari cunora na cumaaca poonitijioquiaari Cristo quetejinia, nojuaja jaara na samiitianiqaariuhua macujiniji. Jaara na samiitianiqaari, cunora na cumaacata na cajitiquiaariiri Jiyaniijajanaa cajitujinia na miaquetajara jiyocuacaanu. ²¹Tii na cajitiquiaariiri puetunu tamasaca cumaacaraca quijia Jiyaniijajanaa na quiniuria. Majaari tamonu socua cumaacaraca quijia quini pa Jiyaniijajiniji. Nojuajaari puetunu tamasaca jiyanijianucujanaa Jiyaniija. Puetunu mijiria quijia jitiiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijajanaa quiniutianiyajuhuj, taa quiarijia na quiyacuajani. ²²Naacuajitij, Pueyasoori puetunu na shipinishanojuanaa jiyatequiaari Jesucristo jitiiasocoriquiano. Naajuhuj, Pueyasoori Jesucristo jiyatequiaari na saquiriojosano pueya jitiariquiano, canapuee nocua tiuujiacuajani. ²³Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuuja, pa jitiiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupeetesaae, Cristo cuaqueyari tucateenutaniya seetanujuanaa maninia jeeccanamitishano na quiniuria. Na cuaqueya pa quishacari, nojuajaari puetunu poojiajinijajanaa quiya. Naajuhuj, nojuajaari puetunu tiuquiyacuajanaa quijiajuhanajaj.

Panijia Pueyaso quiniucua, nojuajaari pa jiyanooquiaari

2 ¹Sesa miijiaca nia quiniucua tariija, Pueyaso tojiyashijiacajuhuj, niaari macunucua quijia Pueyasora. ²Niaa jaara naa sesa miijiaca quiquiaaritij, niaari juhua

puetunu mijiria quiniaa Pueyaso tojiyashijiacaanaa quiquiaari. Niaari samaruhua jiyaniijia tojiijaca quiquiaari, cuno, paratu piyarojosaqui quijiani. Nojuajaari Pueyaso tojiyashijiaca shiniujujia, nojori miiniuria sesa, taa Sesaaca seque panyacuajani. ³Tarijia, puetunu pajaniyajanaari Pueyaso tojiyashijiaca quiquiaarini. Paari tama pa miiniu panishanojuaaja miijiacaca quiquiaarini. Naacuajitij, paari puetunu pa cuaqueya miiniu panishanojuanaa miijiacaca quiquiaarini, puetunu sacuarateat pa niishiriojosanojuhuaj. Naa sesa miijiacaca pa quiniuucaatej, paari tojetaarucujanaa jiyanojuaa Pueyaso saniitiosocoriquiano quiquiaari juucuanu, juhua tamasaajuhua. ⁴Saniniuuja, Pueyasoori pocua taraajeja cutara. Jiyanojuaa pa paniquiaariiri. ⁵Cunora, macunucua pa quishacarijia nera, sesa miijiacaca pa quiniuuca, nojuajaari Jesucristota pa cojiritiaquiaari samitianiijionu. Jiyanoootio Pueyaso quiniuuca, nojuajaari nia jiyanooquiaari. ⁶Naa na samitianiijionuucua pajaniya Cristooocua pa tiuuniuucaatej, Pueyasoori tari pa tacanijioquiaari Cristota jiyocuaaanu, tii Cristo cajitianura pajaniya. ⁷Naa Cristota na cojiritianuucua maninia miiniu pajaniyatej, cunoori jiyanojuaa maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanojuaa pa panijia. Maatia niishishaanutaniyari Pueyasoori tojetaarucujanaa jiyanoootio cutara, na jiyanooniucua pajaniya, Neyanuucua pa tiuuniuuca. ⁸Naa Pueyaso quiniuuca jiyanoootitej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jiyanoootini quiquiaari tama niajaniyajaaja. Pueyasojuaanaacuajaari nia jiyanooquiaari niaacua na taraajenuucua. Naajuhua, nojuacuajaari nia tiuutiquiaari Neyanuucua. ⁹Majaari Pueyaso jiyanooni quiquiaari pajaniya, maninia miijiacaca pa quiniuuca. Paa jaara maninia pa miiniuuca Pueyaso jiyanoootiaquiaari tama pa cuaqueyajaajani, paa maara tama pa cuaqueyajaaja timitiareni juhua najuhua pocuaja. ¹⁰Shushajanaa Jesucristooocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijiacaca pa quiniuria. Nojuacuajaari tari naa niishiriojioquiaari, maninia miijiacaca na jataniniuria pajaniya.

Jesucristoori pa jiyateja jiyanoootiojuacara

¹¹Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanu, Pueyaso muerasu nia quiyacuachacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyacuiniuuca. Canaa cutaraari canaa cararaatiuuquia co miatesanoni. ¹²Nia niishirijuhua, naa nia quishacarijij, niaari Cristooju quiquiaari. Majaari nia naata rupeenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanoootiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajerene? Niaari seetanujuanaa tojetaarucujanaa Pueyasooju quiquiaari mijiria. ¹³Tarijia, niaari seetanujuanaa tucuaaanu quijiaca quiquiaari Pueyasojini. Quiarijia saniniuuja, Jesucristo shootenuucua na nanaca niyacutesanojinia, niaari nata rupuetootesaaquiaari, nocua nia tiuushacari. Naacuajitij, niaari canaa rupuejacajuhua. ¹⁴Cristocuaajaari pa jiyanoootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupenura canaajuhua, taucuaca nia quiniuuca. Jesucristocuaajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supeno pueya, Judiocuaca, niajaniya

taucuacano. ¹⁵Naa pa niti Jesucristo cusonuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatioojua quijiani. Quiarijia saniniuuja, Jesucristo cusonuucua, nojuajaari pa jiyanoootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanoootiaquiaari pajaniya, na panishano muerasu pa quiniuria puetunjuanaa, niajaniya taucuaca, canaajuhua. Naacuajitij, Jesucristooocua pa tiuushacari, paari juhua niquiriyatu tiaca nerani.

¹⁷Niajaniya taucuacanaa, niaari juhua tucuaaanu quijiaca quiquiaari Pueyasojini. Canaa cutaraari juhua cateca quijia nojuajini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni pania pajaniya. ¹⁸Cristo jiyanoootiniuuca na Que Pueyaso pajaniya, naacuajitij, pa naata pa Que Pueyaso rupeenu pa secojosacari nojuaja, mariyata na Sohuanuraca pa quishacari, niajaniya, canaajuhua. ¹⁹Jesuucua tiuujiaca nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucoona. Quiarijiani, niaari seetanujuanaa Pueyaso pueya cutara. Pueyasoori maninia nia jiitiaajuhua, taa na jiitiaquiaa puetunu na saquiriojosano pueyacuani. ²⁰Pueyaso pueya nia quiniuuca, niaari rupeesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujuinia pueyani, nojoriiri juhua cuno tia pacaariana. Saniniuuja, Jesucristoori juhua cuno tia morijijianaa cutara, cuno tia nujuatana. ²¹Pueyasoori naa saquiriojioquiaa Neyanuucua tiuuriquiano pueya, na quiquiorano na tucuatana. Cuno tia tucuateesacari, tojetaarucujanaa maninia jeenucuasano quiniutianiya pa Jiyaniijiaari. ²²Niaari naajuhua, Cristo nia rupesacari, niarta Pueyaso pueya nia rupesacarijuhuaj, Pueyasora, niaari juhua riana, tucurunio. Nojuajaari nia morojotaquiaa na tia na tucuatana, na Sohuanu quiquiorano.

Pabloori Pueyaso jiyaramiquishano taucuaca

3 ¹Jesucristojini cua pohuatanuucua niarta taucuaca, janiyari cunora nujuatesano quia nujuatejojuajini. ²Niaa naasucuaari niishiyacuaja Pueyasoori cua jiyaramiquiaari Jesucristojini cua pohuatanura taucuaca, jiyanooshano nojori quiniuriajuhuaj. ³Tariucuaanu, majaari pueya niishiniu quijia, Pueyasoori taucuaca jiyanooniutianiyajuhua, taa na jiyanooquiaacua Judiocuacani. Pueyasojuaanaacuajaari naa jiyasohua nia miiniu panishano cua niishitiquiaaritij, taa shusha nio cua naajio coteejajinia cua pohuataa niajaniyacuajani. ⁴Niaa jaara cua naajione serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanojuaa maninia nia miishaanutaniyani nocua nia tiuushacari. ⁵Tariucuaanu, majaari quenaaja tamonu pueyano niishiniu quijia nio jiyasohua Pueyaso miiniu panishano. Quiari naataja saniniuuja, Pueyasoori na jiyaramiquishano pueya niishitiquiaari cuno, jiyasohua nia miiniu panishano taucuacani. Na sequenu panishano caminiujuinia pueya na niishitiquiaarijuhuaj. Pueyaso Sohuanucuaajaari cuno canaa niishitiquiaari. ⁶Niajaniya taucuacanaa, niocuajaari Pueyaso miiniu panishano jiyasohua niajaniya: Jesucristooocua nia tiuuniuuca, Pueyasoori puetunu Judiocuacaranu na sequesanojuanaa jiyatenutaniya niaarajuhua. Canaari Judiocuacani. Naajaa, Jesucristooocua nia tiuuniuuca, Pueyasoori canaa rupetequiaa niajaniya, juhua niquiriyatu pueyano pa quiniuria nera. Naajuhua, cunora, Pueyasoori nia niqitioquiaa na Sohuanujuhuaj, taa na sequequiaari Neyanu Jesucristooocua tiuujacacuajani.

⁷Janiyari Jesucristo ruuretaja quiquiaarini. Naajaa, jiyanhua cumaacaraca Pueyaso quiniucua, nojuajaari cua jataniquiaari Neyanu Jesucristojiniji pohuatana cua quiniuria. ⁸Jesucristo paraca cua quiniucua tarijia, janiyara, janiya cuara socua rerequetesano pueyano quiiria puetunu cuarta Pueyaso pueyajinijiana. Saniniuujia, jiyanhua jiyanoootio Pueyaso quiniucua, nojuajaari cua jiyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucacara. Janiyari cunora Pueyaso shuquiritiaa jiyanhuanani. Cristo jiiitasano pajaniyanononi, puetunu cuno casaajanaari pa niishishoojua. ⁹Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitini quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰Pueyasoori tariucuacaanu pajaniyara na niishiriojosano racataquiaari pueyaracaanu tama na niishitiaajajinijaa. Saniniuujia, nio pa quishacari, nojuajaari na niishitiquiaari. Quiarijiani, jiyanhua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanhua niishijia cutara. Naacuajitij, Pueyaso seya, Satanás, samarhuanio, nojoriiri tacuriitia shootiaquiaa pajaniya, Pueyaso miiniucua maninia pajaniya, niishijia na quiniucua. ¹¹Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹²Naacuajitij, Jesucristoocua pa tiuuniucua, pa naata juhuajaniya rupuenu na Que Pueyaso pa puereyaquiniutia. ¹³Naa Pueyaso miiniucua pajaniyaratej, majaari nioojia nia niqijiotenu Pueyasooquaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacari, cunora cuara shiniujuuria nijaniya, socua pa Jiyaniijia tojjijia nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴Naa Pueyaso muerasu nia quiniucuaajuhua, janiyari mojuquetaquiaani pa Que Pueyaso cua secojonura niaacuara. ¹⁵Nojuacuajaari Que cutara. Puetunu queyajanaari na sesaataacuaja. Nojuajaari puetunu parta Pueyaso muerasujanaa Que, mijiria quiniaa, tariuca jiyocuacaanu quiniaa Pueyaso muerasunio. ¹⁶Naa nia Que na quiniucuaajuhua, janiyari niaacuara secojoquiaani, nojuaja cuara cumaquiiria jiyanhua nijaniya na Sohanuta nioojiajinia. Na Sohanuuri puetunu pa panishanojuanaa jiiitana. ¹⁷Naajuhua, niaacuara secojoquiaanijia, seetanujuanaa nia niishiniuria Jesucristojua-naacuajaari nioojiajinia quijia. Nojuajaari nioojiajinia quiya quiarinio pueyara na jataniniuria nijaniya, nocua tiuujia nia quishacari. Naacuajitij, niocua niishiri taa Jesucristo paniya jiyanhua nijaniyani. Naacuajitij, majaari nioojia nia niqijiotenu quiniutianiya socua. ¹⁸Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhua, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetjore najuhuanani. Seetanujuanaa, majaari pa naata shanacujununoj. Paa jaara na jamatu, na tucanee, na queroni, na jyaconaja shanacujunu paniriquiani, majaari na puequeeja pa riuritanu quiniutianiya. ¹⁹Seetanujuanaa, majaari pa naata niishini taa jiyanhua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojia nia niishiniuria cunora, na paniniuni. Naa jaara na paniniu niishiri, Pueyasoojuanaa nioojiajinia quiniutianiya. Naacuajitij, niaari tojtaarucajanaa panijia quiniutianiya taa Pueyasoojuanaa.

²⁰Naa Pueyaso miiniucua maniatej, nojuaja cuara shuquiritiasaaria. Naa jiyanhua na cumaacata na poonijiosacari poojajinatej, nojuajaari na naata miiniu socua jiyanhua queraatia pa masesanojiniji nojuaja, pa niishiriojosanojinijinio. ²¹Puetunu quijiacajanaa cuara niishiiria Pueyasoori jiyanhua maninia. Nojori cuara naa niishiiria nojori niqishacari Pueyaso jatanishano na saquiriojosano pueya, Jesucristo miishanonio. ¡Cuara naa shuquiritiasaaria pueyaracaanutej!

Pueyaso Sohanu pa jiiitasacari, paari rupuetootesano quijiani

4 ¹Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojjijia nia quiri, seetanujuanaa maninia na muerasu nia quiniuria. Pueyasoojuajaari nia saquiriojoquiaari naa maninia na muerasu nia quiniuria. ²Majaari niarta Pueyaso pueya rerequetejaca nia quini. Maninia miitioojua nia quiri quiri. Puetunu casaajanaa rejeretajaca nia quiri juhuaj. Naa jiuujiaatioojua nia quiri nia panitioosacari. ³Naa Pueyaso jiyanoootootesacari nijaniyatej, pueyaracaanu nia jiyanoootoore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohanu cumaquishacari nijaniya. ⁴Naa quijiaca nia quiri pueyanaa, niqiriyatu cuaqueyaraca pa quishacari pa Jiyaniijia, mariyata niqiriyatu Sohanuraca pa quishacarijuhuaj. Naa Jesucristoocua tiuujia pa quishacari, Pueyasoori puetunu pajaniyanaa rijionutianiya, pueyaracaanu na shuriucua pa quiniuria. ⁵Puetunu pajaniyajanaari niqiriyatu Jiyaniijiaracani. Nojuajaari Jesucristo. Naajuhua, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhua, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijia. ⁶Naajuhua, saa niqiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojjijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷Saniniuujia pueyanaa, puetunu pajaniyacuaajari tari jiiitaa tamaatia poonijiosano pa miiniuriani, teyano Cristo niqutionu paniquiaari pajaniyacuaajani. Naacuajitij, puetunu pajaniyajanaari maja pa niishini miiniu saa niqiriyatu casaaja. ⁸Tariucuacaanu Pueyaso Rupaa naajotasanoinijii, paari niishiyani Pueyasoori na Sohanu niqutionu paniquiaari na pueya. Cunora naa sequeya Jesucristojinijii:

“Na quioosano pueya tacataquiaarihua jiyocuacaanuuri. Nareja na niqutionu panishano casaa serotaquiaari na pueyari”.

⁹Jaara sequeya “tacaquiaarihua”, cunojiniji paari niishiyani nojuaja jiyocuacaanu rosequiaari coteenu, taraatia mijiria na mosaanura pocuara. ¹⁰Nojuajani, jiyocuacaanu rosequiaarini, nojuajaari tojtaarucajanaa jiyocuacaanu tacaquiaarihua, Jiyaniijiajanaa na quiniuria na Que shuriucua. Tacaquiaariiri puetunu jia cajiniocujanaa na mishiniuria na cumaacata, puetunu jiyajanaano. Naacuajitij, nojuajaari puetunu tiqiyocujanaa quijia. ¹¹Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasa jiyatequiaariiri Pueyaso sequenu panishano caminiujunaa nojori quiniuria. Saniniuujia, tamasa jiyatequiaariiri Jesucristo niishiyashijia niquiara poojotanaa nojori quiniuria, Pueyaso jiyanooniuria nojori juhuaj, Jesucristo nojori tiushacari. Tamasa jiyatequiaariiri na tojjitajaca pueya jiiitana nojori quiniuria. Tamasa jiyatequiaariiri na rupaa niishitiojonaa nojori quiniuria narta Pueyaso pueyara. ¹²Naacuajitij, Jesucristo na Sohanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohanutaari na saquiriojosano pueya tiuuniuria nocua, nojori cumaquishaanurajuhua. Naa

Jesucristoocua tiuujia pueya canesacari socuatej, Jesucristo cuaqueyari canequiaa. ¹³Jesucristora poonijionaa pueyari naa poonijioquiaatej, paa cuara tojetaarucujanaa pa Jiyaniijia tojjijia quirijiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuanaa Pueyaso Niyanu niishijiaa quirijiaatijia. Naacuajitij, paari tojetaarucujanaa jeenucuasano quiniutianiya, seetanujuanaa juhua Jesucristo pa quiniuria. ¹⁴Naacuajitij, majaari tari pa quiniu quiniutianiya juhua naatujuua. Niaacuajaari niishiya naatujooriiri na niishiriojosano jataniijia ritia. Noojia niqijotejajaariuhua. Naa juhua tariucua cumueeca mashaja pa quishacarij, majaari quenaaja tamasa naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanojua sapojonu niishijiaa, nojori tojtiajaca na tashuquiootenura Pueyasojiniji. ¹⁵Nocuaj pueyanaa, Pueyaso Rupaata pa cumaquitiojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶Pueyanaa, niaacuajaari niishiya, puetunu pa cuaqueyajiniacuma casaa pa jiiitiasanojua-naari maninia rupuetootesano. Puetunu cunojuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jiiitiasano casaa. Naacuajitij, puetunu Pueyaso muerasujanaa jaara tama na poonijiosano-juaaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutianiya, jatiqui rupuetesano pa quishacari, seetanujuanaa panitioojuaca pa quiniuria.

Cristoocua tiuujiaaari quiarinio pueya

¹⁷Jesucristo jiyaramiquishano pueyano cua quiniucua, cua tojiri pueyanaa. Pueyaso saquirojosano pueya nia quishacari, maja socua nia quiniu taa Pueyaso niishiyashijiaa pueya quiyacuaani. Nojoriiri najuhuaa quijiaa, najuhuaa nojori niishiriojonuucua. Naajuhua, nojoriiri tama na panishanojuaaja miijiaa, najuhuaa casaacua nojori jiaatianuucua. ¹⁸Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaa, nojori tojijiaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaa nojori quiniuria. ¹⁹Naa pueyaracaanu sesa nojori miijionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaaja miijiaa. Nojoriiri puetunu sacuaaraatia casaajanaa miiniuucua jiyartuucuno. ²⁰Niajanija saniniuujia, majaari naa nia niishitiojosaanu quiquiaari Cristojiniji, naa sacuaaraatia miijiaa nia quiniuria. ²¹Niaa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaquiaari maninia miijiaa nia quiniuria, sesa nia miiniu nia tarinitianurajuhua. ²²Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaaraatia miiniu nia niishishano. Sesaa nia miiniu panishanoori tama nia sapojoquiaarijiaaja naa sesa miijiaa nia quiniuriatej. ²³Quiarijia saniniuujia, sesa nia niishitiaja nia jatara, maninia niishitijaraca nia quiniuria, maninia jiuujiaracano. ²⁴Seetanujuanaa juhua quiarinio pueyano nia quiri, quiarinio jiuujiaraca, Pueyaso niqitiosano nijaniya. Naa quiarinio jiuujiaraca nia quishacarij, seetanujuanaa juhua Pueyaso pueya nia quiriqia, maninia miijiaa, tojetaarucujanaa sesa miyashijiaa. Naa maninia nia quiniuni, cunoori seetanujuanaa Pueyaso Rupaa nia tojinuucua.

²⁵Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiria seetanujuanaa.

²⁶Niaa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhua, nia jaara juaari, majaari nia juaaquiaca nia ninitianu. ²⁷Ritia nia jeecatoore, Sesaaca mariqui sesa nia miitiriiri nia jiyanojuaquishacari.

²⁸Nio nia tojirijuhua. Cante nohuasejua quiyajaani, cuara tarinitiaara nohuasejonu. Saniniuujia cuara poonijioora tama na numatucuaatajaaja cutara. Naacuajitij, nojuaja na naata na jiiitiasanojiniji nareja niqutionu tamasa, cante na panishano jiiitaaquiyani.

²⁹Naajuhua pueyanaa, majaari sacuaaraatia casaa nia pocuanu quenaaja. Majaari cararaatia nia puenujutoonujuhua. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Naa naata nojori cumaquiniu. Naa naata nojori nacasanujuhua. Naacuajitij, nia naata nojori shiniujiuni saaja Pueyaso tojjijiaa nojori quiniuria. ³⁰Majaari sesa miijiaa nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocua-jari juhua na sesa naajioqiaaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquirojosano pueyani.

³¹Pueyanaa, majaari jiyanojashijia nia quiniu. Seetanujuanaa jiyanojiaa nia quiri cutara. Majaari tamasa shanacunu niaacua, na nasojonura nijaniya. Majaari nia juayonuujuatanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaano. ³²Saniniuujia, maninia miitioojuaca nia quiri. Taraajetoojuaca nia quiriuhua. Naajuhua, jiyanojioojuaca nia quiriuhua, taa Pueyaso jiyanojiaaari pajaniyacuaani, Neyanuucua pa tiushacari.

Seetanujuanaa juhua Pueyaso pueya nia quiri

5 ¹Pueyanaa, niaacuajaari Pueyaso panishano muerasuniy-
jua. Cunora, pueyaracaanu juhua nojuaja nia quiniuria nia saniniujuri. ²Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanojua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa nia miiniuucuatej, nojuajaari Pueyaso shuqiritiquiaari jiyanojua. Na miishanoori juhua shanohua jaanutaja quiquiaari Pueyasora.

³Pueyaso pueya maanujinijinio nia quiniuucua, majaari nia camishoo maaji nia numuetucunu, maajishuriu, casaano. Cunoori jiyanojua sacuaaraatia Pueyasora. Majaari quenaaja jiyano sacuaaraatia casaajiniji nia pocoojonu. Naajuhua, majaari tamasa jiiitiasanoocua jiaatiajaca nia quiniu. ⁴Majaari najuhuaa sacuaaraatia pocuajaca nia quiniujuhua. Majaari najuhuaa nia niti nia taquiriocuatenu juhua maninia pocuaja. Naajuhua, majaari sacuaaraatia puenujunujuaca nia quiniu. Puetunu cuno sesa pocuanujuanaaari sesa Pueyaso pueyara. Saniya nia pocoojore cutara Pueyaso miishanojiniji, socua pueya manihuaqueetanura Pueyaso. ⁵Niaacuajaari tari niishiya, cante juhuajaniya na camishoo maajipohua numuetucujujuaani, maajishuriuhuanio, nojoriiri jiyanojua taraatia quiniutianiya. Pueyaso jiiitiasano na tojjijiaa pueyaranoni, majaari na quiniu quiniutianiya naa miijiaa pueyara. Naa taraatia miishaanutaniyajaariuhua puetunu tamasa jiiitiasanoocua jiaatiajajanaa. Pueyasora, jiyano pueyari jiyanojua sesa, juhua juaashiquiaata shipinijosano pueyasohua secojonuujuaca. ⁶Naacuajitij pueyanaa, majaari nia shanacunu tamasa sapojonura nijaniya na sequesacari nia sacuaaraatia miishanoori maja sesa, sacuaaraatia pocuanunio. Naa pueya miiniuucua sesatej, Pueyasocuaari juaatishaare. Tari saniitioya na tojiyashijiaa pueyari. ⁷Cunora pueyanaa, majaari quenaaja naa sacuaaraatia miijiaa nia cojinu.

⁸Pueyaso niishiyashijiaa nia quishacarijia tarijia pueyanaa, niaari ninishiqui quijiaa quiquiaari. Quiarijia saniniuujia, pa

Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijiaca. ⁹Paa jaara seetanujuanaa cuhuashiqui quijiaca quirini, paari maninia miijiaca quiniutianiyani. Naajuhuj, paari tojetaarucujanaa sesa miyashijiaca quiniutianiyani. Paari seetanujuanaa Pueyaso Rupaa tojijiaca quiniutianiyajuhuj. ¹⁰Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? ¹¹Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹²Jiyasohua nojori miiijosano sacuaraatiaari tojetaarucujanaa jiyanoohua cararaatia. Puhuataaquishoo. ¹³Saniniuuja, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴Pueyaso Rupaacuajaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinia:

“iMaqueyanonaa, quia niucuar! iMacunucua tajiniji quia sanere, Pueyaso Jiyarosano cuhuatanura quiajaneya!”

¹⁵Naacuajitij cua panishano pueyanaa, tama nia cuaqueyajaaja nia cojuare jiyanoohua, seetanujuanaa maninia miijiaca nia quiniuria. Majaari juhua niishiyashijiaca nia quiniuria juhuajaniya. Seetanujuanaa niishijiaca nia quiri, maninia miijiaca nia quiniuria. ¹⁶Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqu quiniutianiyani. Naaratej, jaara pa naata quiri quia maninia pa miiniuria, maninia pa miiri puetunu juucajanaa. ¹⁷Majaari moseeca nia quiniuria. Maninia nia niishiri casaa pa Jiyaniijia paniya nia miiniuriani. ¹⁸Naajuhuj, majaari nia mashaasequejonuunu. Naa jaara mashaaseca quiri quia, majaari nia rejetenu quiniutianiya sesa nia miiniuria panishacari. Saniya Pueyaso Sohuanu nia shanacure niaacua cutara, nioojia na mishiniuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniuriajuhuaj. ¹⁹Naa Pueyaso Sohuanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutioore. Naajuhuj, quiari naataja Pueyaso Sohuanu niishitiojosano nia jaaquequejotoore. Naa jaaquequejosacari, pa Jiyaniijia nia shuquiritari puetunu nioojiatajanaa. ²⁰Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiaca nia quiniucua.

Taa quijia pa quiyani Pueyaso tojijia pa quishacari

²¹Pueyanaa, maninia tojitiojuaca nia quiri, taa pa Jiyaniijia Cristo paniyacujani. Nojuajaari pa Jiyaniijia cutara. ²²Maajipohuanaa, nia niyaca tojijia nia quiri, taa pa tojiquiaa pa Jiyaniijiacuaani. ²³Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniucua nera. ²⁴Naacuajitij, taa Jesucristo saquiriojosano pueya na tojitiajaca quiyacuani, maajipohua cuaara nia pueyaracaanu neyaca tojitiajaca quiirijuhuj. ²⁵Canuunaa, nia niquicoohua nia paniri taa Jesucristo na saquiriojosano pueyarano paniquiaaricuaa jiyanoohuani. Nojuajaari cunora tama na cuaqueyajaaja tarintiaquiaari na mosaanura. ²⁶Nojuajaari nia miiquiariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷Paa jaara tojetaarucujanaa tari jeequejosano quirini, pa Jiyaniijiajanaari pa tiuquinitianutianiya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijiaca quiniutianiyani. Paari seetanujuanaa shanohua niquishano quiniutianiyani, juhua camishocoriquiano maniniushitishano

niyacoo, tojetaarucujanaa jiyanoohua cohuajaque toqueraca. ²⁸Pueyanaa, taa nia paniyacuaa tama nia cuaqueyajaajani, naa nia paniri nia niquicoajuhuj. Cante necocua panijiani, nojuajaari juhua tama na cuaqueyajaaja paniya. ²⁹Majaari quenaaja tamonu pueyano quiniuria tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuani. ³⁰Puetunu na saquiriojosano pueyajaanaari juhua na cuaqueya nera. Paacuajaari na cuaqueyajiniinioni. Naaratej, nojuajaari maninia pa cojuaquiaa. ³¹Cunora nia naajiotasano quiyari tariucuacaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiri na que, na nucua shuriucuaaji, necocuaata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³²Pueyasojuanaacuajaari pa niishitiojuajaari, pueyanoori juhua niquiriyatu cuaqueyaraca quijia jaara camiri necocua. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. ³³Pueyanaa, cunojuanaari cua pohuatasano pa Jiyaniijia cuaqueyajini. Saniniuuja, puetunu cuarta Pueyaso pueyanaa, nia niquicoa panijia nia quiri juhua tama nia cuaqueyajaaja. Naajuhuj, puetunu maajipohujanaa cuaara neyaca tojijia quiiria.

6 ¹Muerasunaa, pa Jiyaniijia tojijiaca nia quishacari, nia queya tojijia nia quiri juhuaj. Naa jaara nia miiritij, cunoro jiyanoohua maninia Pueyasora. ²Tariucuacaanu Pueyaso Rootasanojiniji Moisésni, nia sequeyajaariuhua tamonu rootasano:

“Nia que tojijia nia quiri, nia nucuanio. ³Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujuanaa rootasano tee Pueyaso sequeyacuajani taa na tojitiajaca na miiniutianiya maniniani.

⁴Niajaniya saniniuuja pueyanaa, majaari nia niquiohuania nia juaatijionu najuhuanaj. Nojori nia canashitijiore maninia. Naa niishitiojore maninijuhuj. Nojori nia nacasurejuhuaj. Jaara nia tojitiaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacujani.

⁵Niajaniya poonitijosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui saniitiosaareeri nojori sequesano nia miyaquiniucua maninia. Nojori sequesano nia miiri quia maninia, juhua pa Jiyaniijia Jesucristora. ⁶Majaari maninia nia poonijionu saaja nojori niquishacari niajaniya, nojori shuquiritianura niajaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Naa jaara nia maninia poonijionuujuaca quiri quiatej, niaari Pueyaso panishano miyajuhuj. ⁷Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸Niaacuajaari tari niishiya, pa Jiyaniijia Jesucristoori puetunu pajaniyajanaa niquitionutianiya maninia pa miiniucua mijiria, poonijioesano pueya, camarnuuju pueyano.

⁹Niajaniyajuhuj seya jiiitajacanaa, nio sequesano nia tojiri. Maninia nia jiiitiare nia poonitijosano pueya. Majaari na miananajonu. Naa niishirijuhuj, niaari mariyata niquiriyatu Jiyaniijiaraca, niajaniya, nojori juhuaj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojini.

Taate pa naata Sesaaca nujuatanuni

¹⁰Quiarijia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyanoohua

cumueca nioojia quiniuria jiyanoohua na cumaacata. ¹¹Puetunu Pueyaso niqutiosano casaajanaa nia cushiyore juhua toqueya, Sesaaca sapojiaquiniucuaaji niajaniya. ¹²Pueyaso pueya pa quishacari mijiria, majaari pa quiaquetooujonu quiquiaa pueyanota. Pa coopueeri maja pueya. Nojoriiri cumaacaraca quijiaca jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijiaca pueya nojori jiiitianura. Nojoriiri Pueyaso paraajuhua. ¹³Naaratej Pueyaso pueyanaa, puetunu Pueyaso niqutiosanojuanaa nia paracata nia miaquetooujotaqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari niajaniya. Niaa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴Pueyanaa, niaacuajaari niishiya taa miaquetooujoate pueyani. Na miaquetoou panishacari, nojoriiri shoquejiniji casaa na cajiniocua morotaja. Na turtuconee cushiyonuujuaari, puetunu na jiriquiajanaa na mishiquiojonura cashiicuaaji. Naajuhua, na sapatuhua cushiyonuujuaariuhua. Na nareenee pootuuaari, nocuaji na nujutajara cashi. Naajuhua, na naca na cojuatajara, cumoco casaa cushiyonuujuaari. Na nijiniaquetucuaaja mueruu pootuuaajariuhua.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiaca nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. ¹⁵Pueyaracaanu jeenucuasano nia quiri quia juhua tariucua sapatu cushinio. Naa tariucua pueca nia quiri quia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoari nojori jiyanooni panijuhua. ¹⁶Naajuhua, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷Nia niishishacari niaacuajaari Pueyaso

jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niqijiotenura Pueyasoocuaaji. Naajuhua, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucuaaja mueruu, pueya jiuujiajinia na poonijionura. ¹⁸Naajuhua Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuri quia pueyaracaanu, naajuhua, na Sohuanu niishitishacari niajaniya casaacua nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuri quia puetunu niarta Pueyaso pueyaracajanaa. ¹⁹Naajuhua, cucuara nia secojonuure, Pueyaso niqutionura janiya na niishitija, maninia cua pohuatanura Jesujiniji cua puereyaquiniutia. Cucuara nia secojorejuhua, maatia cua niishitiniuria pueya, Pueyasoari puetunu pueyanaa jiyanooni panija saaja Jesucristoocua nojori tiuushacari. ²⁰Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niqiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹Pa panishano Tíquicoacuajaari niaacua quianutaniya, puetunujuanaa na pohuatanura janiyajiniji, naajuhua, casaa cua miyani. Nojuacuajaari shamaatia poonijiojua pa Jiyaniijia. ²²Janiyacuaajaari cunora niaacua na jiyaroyani, nioojia nia cumanijanura canaajiniji nia tojishacari, taa canaa quiya niyani.

²³Pa Que Pueyaso, mariyata pa Jiyaniijia Jesucristota, nojori cuara cuniqui quiniaa parta Pueyaso pueya jiuujia cajitiira, juhuajaniya nia quiniuria. Nojori cuara nia jiyateera panitiojuacarajuhua, seetanujuanaa Jesucristoocua tiuujia nia quiniuriajuhua. ²⁴Naajuhua, Pueyaso cuara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno nojori, canapue seetanujuanaa Jesucristo panijiacacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatascari Pueyaso pueya

1 ¹Janiyari Pabloni. Janiyari Timoteota nia saruhuaatani, Filipino tiacajinia quiniaa Pueyaso pueyanaa. Canaari Jesucristo poonitijosano pueyajuhuaaj. Canaari nio naajiyani puetunu Pueyaso jatanishano pueyacuaraajanaa, nojori tiuuniucua Neyanu Jesucristo. Canaari cuniqui nia jiitianaa pueyacuara naajiyajuhuaaj, nia cumaquiniaa pueyacuaraano. ¿Niaate maninia quiyajaa pueyanaa? ²Pa Que Pueyaso, pa Jiyaniijia Jesucristonio, nojori cuaara cumaquiiria nijaniya na Sohuanuta. Nojori cuaara cajitiiria nioojiajuhuaj.

Pablo secojosano, Filipino tiacajinia quiniaa Pueyaso pueyacuara

³Pueyaracaanu cua niishiriojosacari nijaniya, janiyari pa Pueyaso sequequiaani “paacarasho”, maninia na muerasu nia quiniucua. ⁴Cua secojosacari, janiyari pueyaracaanu puetunu niaacuaraajanaa cua shuquiriniutia masequiaa Pueyasoni. ⁵Niaa jaara shushajanaa Jesucristoocua tiuquuaari, niaari jiyacari coteequiaari cua naacunura, Jesucristojiniji cua poojotanura tamaquicua. Quiarijiani, niaari naa cua naacuyajaaquij. Janiyari cunora nia timitiaani. ⁶Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuani, nojuajaari naa nia jeenucuanu tucuatantuniya, Jesucristota pa naacuneetosacarihuua. ⁷Majaari cua jiyajenenu naa cua taacanuyaquishacari niaacuaji. Janiyacuajaari tari naa niishiyani, jiyanoohua cua paniniucua nijaniya. Naajuhuaaj, niaari cua cojiritiasaaquiaa cumaaca niqutiosaanujuhuaaj. Naacuajiti cua naata Jesucristojiniji pohuatunu niya nio nujuatejojuajinia, naajuhuaaj, janiya jaara jiyaniijianucua taccoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijia. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiuushacari, Pueyasoori na naata nojori jiyanooniujuhuaaj. Naa nioojia rupesacari coojiatej, cunoori jiyanoohua cua shiniujuquiaa Jesucristojiniji cua pohuatunura. ⁸Pueyasocuaajaari niishiyaa taa cua paniya jiyanoohua nijaniyani, Jesucristo paniniua cua jiitiasacari coojiajinia. ⁹Janiyari niaacuara secojoquiaa Pueyasoni, socua niishijia nia quiniuria, socua Pueyaso niishitaja nia jiitianurajuhuaaj, seetanujanaa maninia panitiojuaca nia quiniuria. ¹⁰Naacuajitij, niaari niishiniutianiya teyano casaate seetanujanaa maninia niaarani, saniniujia, teyano casaate sesani. Naacuajitij, pa Jiyaniijia Cristo jaara tiuquiriohuan, niaari seetanujanaa maninia miijiaa quiniutianiya, tojetaarucuaajanaa sesa miyashijia. ¹¹Naacuajitij, puetunu maninia nia miishanojuanaa Jesucristo cumaquishacari nijaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniucua, pueyari Pueyaso timitianutaniya.

Pabloori saaja Jesucristora quiniu panijia

¹²Cuarta Pueyaso pueyanaa, majaari cucua nia taraajenu nujuatejojuajinia taraatia cua miishacari. Nio nia niishiri cutara: nujuatejojuajinia nujuatesocoriquiano cua quiasaanucua, naquiya cua miishacarijuhuaj, cunoori seetanujanaa pueya naacuya Jesucristojiniji tojishaanura

socua. ¹³Naacuajitij, puetunu jiyaniijia César tiajinia quiniaa soldadohuajanaari niishiyaa, janiyari cumayocua casaata morotasano quiyaa niyani, Jesucristojiniji cua pohuatunuucua. Majaari saaja soldadohuan niishiniu cunoo, mariyata puetunu pueyajanaari na niishiyajuhuaaj. ¹⁴Parta Pueyaso pueyari namitia niishiyajuhuaaj, janiyari cumayocua casaata morotasaaucuaani. Naacuajitij, cunoori quera puetunu nojorijianaa shiniujiuriucuaa Jesucristojiniji nojori pohuatunura na puereyaquiniutia, pa Jiyaniijiaacuua nojori tiuushacari socua.

¹⁵Seetanujanaa, noojiaqueya nojorijinijioori Cristojiniji pohuatunuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniujia, nojori cutaraari seetanujanaa Cristojiniji pohuatunuquiaa nojori shuquiritiniuria Pueyaso. ¹⁶Nojoriiri naa pohuatunuquiaa quij, Jesucristo panijiaa nojori quiniucua. Nojoricuaajaari niishiyaa, Pueyasojanaacuajaari niya cua niacanu, cua tacunura Jesucristo rupaacuaji. ¹⁷Tamasacaari saniniujia Jesucristojiniji pohuatunuquiaacuua nojori shocotan paniniutia janiya. Naa nojori miishacarij, nojoriiri socua cua tacaatiniu paniya juucua. Majaari nojori pohuatunu quiquiaa seetanujanaa nojori paniniutia pa Jiyaniijia Jesucristo. ¹⁸Naa nojori pohuatunusacari seetanujanaa nojori paniyaquiniutia pa Jiyaniijiatej, naajaa. Nojoricuaajaari Jesucristojiniji pohuatunuquiaa. Janiyari cunora shuquiriaatia quiyani.

¹⁹Socua shuquiriniutianiyanijia cua niishishacari Pueyasoori puetunu cunoo nojori miishanojuanaa jataniniutianiya quiria saa maninaraja. Naa miiniutianiyanii nia secojonuunuucua cucuara, naajuhuaaj, Jesucristo Sohuanu cumaquiniucua janiya.

²⁰Naacuajitij, janiyacuaajaari Pueyasocua tiuyani, nojuajaari cua cojanutaniya maja cua cararoyaquishaanura janiya jaara nequesoreesaareni. Janiyari Pueyasocua tiuyajaanihuua na cumaquiniuria janiya, cua puereyaquiniutia cua pohuatunura Jesucristojiniji puetunu pueya niqiarajanaa, taa cua miijiaacuajani. Janiya jaara rishiriqiani, janiya jaara mosaariquijuhuaaj, naajaa, janiyari jiyanoohua paniyani cua Jiyaniijia Jesucristo timitiasaanura. ²¹Mijiria cua quishacarijia, janiyari saaja Jesucristora quiyani. Saniniujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²²Naajaa, janiya jaara mijiria rishiriqian, cua naata socua poonijionu cua Jiyaniijia. Naacuajitij, quiarijia, majaari cua naata saquiriojonu; rishiniu, shaajenu soj. ²³Naaratej, janiyari coojia niqijioteyajaani. Majaari cua niishiniu teyano cua saquiriojonutianiyanii. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. ²⁴Saniniujia, socua maninaruhua mijiria cua rishiniuraja, pa Jiyaniijiaacuua cua shiniujiunuria socua nijaniya. ²⁵Naa cua niishiriojosacarij, janiyacuaajaari tari seetanujanaa niishiyani, janiyari juhuanuaja mijiria niaata rishiniutianiyanii. Naacuajitij, cua naata socua nia naacunu, socua pa Jiyaniijiaacuua nia tiuniuria. Cua naata nia naacunujuhuaj, socua shuquiriaatia quijia nia quiniuria nocua nia tiuushacari. ²⁶Naa cua rishishacari mijiriatej, janiyari niaacua quianutaniyani cua niquiniuria nijaniya. Naa cua quishacarihuua niaatej, niaari Jesucristo timitianutaniya maninia na miiniucua janiya.

²⁷Pueyaso pueyanaa, nio nia sequenu paniyanijia, seetanujuanaa maninia miijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja nijaniyajini pohuataaari-quiani, taa jiyanoehua Jesucristo tojjijaca nia quiyajaani, jiyanoehua panitioojuacajuhua. Naajuhua, jatiqiu Jesucristora nia poonijioteriquiani, na rupaa nia pohuatanuucua. ²⁸Naajuhua, Jesucristo Rupaa paraa puereyashijiacara nia jiyateriquiani. Nojori piriyojosacari nijaniya, majaari nojori puerehu quenaaja. Naa jaara naa nojori puereyashijiacara quirritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuucua nojori niqiaracuajani. Saniniuujia, Pueyaso cajitishacari nioojia, nojori miananajosacari pucoonu nijaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocuaajari naa cumaquijia na pueyatej, puereyashijianucua nojori quiniuria. ²⁹Pueyasocuaajari nia tiutuquiaari Neyanuucua, na muerasu nia quiniuria. Naajuhua, Neyanu rupuejaca nia quishacari quiarijia, Pueyasoori nia jiyatequiaari Neyanuucua naquiya nia miitishaanurajuhua, taa Neyanu miiquiaari naquiya pocuaracuani. ³⁰Nia niishiri, janiya, nijaniyajuhua, paari mariyata naquiya miiniu rejeretaquiaani, pa Jiyaniijara pa poonijosacari. Naaacuaajari tari niqiuquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajini tojiniutianiyajuhua, taa cua tarinitiaquiya Jesucristojiniji pohuatanuni, naajaa naquiya cua miishacari.

Juhua Cristo pa quirij, taa na quiquiaaricuaani

2 ¹Naaacujitij pueyanaa, naquiya nia miishacari, nia niishiri taa Cristo shiniujuquiaa pueyaracaanu nijaniyani, maja nia tacaaniuria. Naa niishirijuhua taa na paniniu cumanijiaquiaa nijaniyani, naajuhua, taa Pueyaso Sohanu jiuujiaatiootequiaa nijaniyani. Naa niishirijuhua taa Cristo taraajequiaa jiyanoehua niaacuani. Naa panitioojuaca nia quirijuhua. ²Jiuujiaatioojuaca nia quirijuhua, seetanujuanaa panitioojuaca nia quishacari. Naajuhua, nareja nia shanacure Pueyaso Sohanu niaacua, nojuaja cuara puetunu nijaniyajanaa rupeeteera, jatiqiu nia poonijionura pa Jiyaniijara. Naa jaara naa puetunu nio cua sequesanojuanaa miijia quirritij, niaari tojetaarucujanaa shuquiriaatia quijara cua jiyatenutianiya. ³Maninia nia miishacari, majaari na miiniu juhua tamasaca nia shocotanura, nia jyanishacari niaa naasucuaari socua maninia miijiaca tamasacajiniji. Puetunu maninia nia miishanojuanaa nia miiri tamasaca nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijiaca nijaniyajiniji. ⁴Naa jaara maninia miijiaca quiriquiacua, majaari tama maninia miijiacaja nia quiniu. Niarta Pueyaso pueyacu nia taraajerejuhua, maninia quijia nojori quiniurajuhua.

⁵Tama nia cuaqueyaja nia tarinitiare niarta pueyacu nia taraajesacari, taa Jesucristo tarinitiaquiaari tama na cuaqueyaja pocuaracuani. ⁶Nojuajaari naa miiquiaarritij: tariucuaaanu, nojuacuaajari Pueyaso quijajuhuanaj, juhua na Que. Naajaa, nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. ⁷Nojuajaari jyanohua cumaacaraca Jiyaniijia na quiniu tarinitiaquiaari, juhua nareja poonijotesano pueyano na quiniuria. Naaratej, mijiria rasaaniaari seetanujuanaa pueyano na quiniuria. ⁸Naa pueyano na quishacari mijiriatej, nojuajaari juhua nareja pueyanora tama na cuaqueyaja jiyatequiaari. Pueyaracaanu na Que tojjia na quishacari, nojuajaari tama na cuaqueyaja tarinitiaquiaari na mosaanura. Seetanujuanaa cararaatia cusoquiaari niyacutesanojinia teetesano, juhua sesa miijia pueyano. ⁹Naaratej, Pueyasoori seetanujuanaa Jiyaniijarajanaa na

jiyatequiaari puetunu jiyaniijanucujinijianaa. Na sesojoquiaarijuhuaj "Jesu". Nioori sequeya "pocuai Tacuna". Majaari socua tamonu pocuai tacuna quiniu mijiria, jiyocuaaanunio. ¹⁰Puetunu pueyajanaari niishiniutianiya Jesuuri Jiyaniijajanaa. Maja tamonu. Cunora, nocuara mojoquetaconutaniyari puetunu jiyocuaaanu quijiacajanaa, puetunu mijiria quijiacajanaajuhua, puetunu jiyari cariquimia quijiacajanaano. ¹¹Puetunu tamaatia rupaaca pocujacajanaari niishiniutianiya Jesucristoori Jiyaniijajanaa cutara. Naa Pueyaso miiniuucua Neyanutej, puetunu nojoriijanaari niishiniutianiya, Pueyasoori tojetaarucujanaa maninia miijia.

Pueyaso pueyari juhua ninishiqui cuhuataja mijiria

¹²Quiarijiani cua panishano cuarta Pueyaso pueyanaa, cua rootasano tojtiajaca nia quiri. Naatej, taa pueyaracaanu cua tojtiajaca nia quiquiaaricujani niaata cua quishacari, quiarijia socua cua tojtiajaca nia quiri, tucuaaanu cua quishacari nijaniyajiniji. Naaacujitij, seetanujuanaa pa Jiyaniijia tojtiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretano. Jyanohua puereeta quiniutianiyari na tojijashijianucua. ¹³Pueyasocua-naacuaajari nioojiajinia poonijioquiaa maninia nia miiniu paniniuria. Na cumaaca nia niqutioquiaarijuhuaj maninia nia miiniuria nera nia panishano, taa na paniyacujani.

¹⁴Cunora, puetunu nera nia miishanojuanaa nia miiri shitimia, maja nia ririjotanuta. Majaari nocua juayonuujutanuhua. ¹⁵Naa jaara naa maninia miijiaca quirritij, majaari Pueyaso niishiyashijia pueya naata quiniutianiya sesa na saquiriojotanura niaacuara. Naaratej, tojetaarucujanaa sesa miyashijia Pueyaso niqiohua nia quiri, mijiria sesa miijiaca pueya niqiuara. Nojoriiri seetanujuanaa sacuaratia, Pueyaso tojijashijia. Cuno juhua ninishiqui quijia pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. ¹⁶Pa samiitianijia rupaa Jesucristojiniji nia jiiitianoni, niaari cunota cuhuataquiaa mijiria quiniaa. Naa maninia Pueyaso pueya nia quiniucuatej, Cristo jaara tiuquiriohua na rijionuhua pajaniya, janiyari jyanohua nia timitianutianiya. Janiyari naa nia timitianutianiya cua niishishacari puetunu cua poonijosanojuanaari maja najuhua na quiniu quiquiaari. Naajuhua, majaari najuhua naquiya cua miiniu quiquiaarijuhuaj. ¹⁷Naaacuaajari maninia miijiaca Pueyasocua tiuujia nia quiniucua, Jesucristojiniji cua pohuatanuucua nijaniya. Cuno maninia nia miishano, cunoori juhua shanohua jaanuta Pueyasora. Janiya jaara nacatasaare Jesucristojiniji cua pohuatanuucua nijaniyani, cua nanacaari shoonutianiya juhua Pueyasora niqutiosocoriquiano. Janiya jaara naa miishaareni, janiyari cua nanacata tucuanutianiya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutianiya. Janiyari puetunu nijaniyatjanaa jyanohua timiniutianiya. ¹⁸Shuquiriaatia nia quirijuhua, janiya jaara mosaareni, cua Jiyaniijia tojjia cua quiniucua. Cua cojitiuri shuquirinijuhua.

Pablo pohuatasano Timoteojiniji, Epafroditojinijini

¹⁹Janiyari niaacuaji tojiniu paniyani taa nia quiyani, shuquiriaatia cua quiniurajuhua janiya jaara niaacuaji tojirini. Janiyari cunora Timoteo jiyaronutianiya niaacuani. Naaacujitij, cuniquiji na tacatesacarihua, nojuajacua cua pohuatasuhua nijaniyajiniji saniniuujia. Janiyari cua Jiyaniijia Jesuucua tiyani na rishitiniuria janiya, nijaniyajiniji cua tojiniuria. ²⁰Janiyari Timoteo jiyaronutianiya niaacuani. Saa nojuaja cutaraari seetanujuanaa niaacua tacaaja juhua janiyajuhua, na naacunura nijaniya, maninia nia quiniuria. ²¹Tamasacaari saniniuujia saaja tama nojori panishano casaacuaaja tacaajia, maja Jesucristo casaacua. ²²Naaacuaajari tari na niishiya, taamuecate Timoteoni. Nojuajaari pueyaracaanu cuata

poonijioquiaa juhua quiyanu, Jesucristojiniji mariyata canaa pohuatanura. ²³Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴Naajaa, janiyacuaajaari cua Jiyaniijiaacua tiuyani cua cartesaanura niiquiji, niaacua cua quianura ritiajuhuaj.

²⁵Cua sashishacari Timoteo cua jiyaronura niaacua, maniniacuajaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuahuaj. Nojuajaari maninia cua naacquiaa. Cuata miiquiaa naquiya jaarajaarijia Jesucristojiniji cua pohuatanura. ²⁶Nojuajaari puetunu niajanijayanaa niquniuucua jiaatiaa. Na niishishacari niaari jiyanoehua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquniuria tacaya. ²⁷Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanuajaarihuaj, maja cua taraajenu jiyacatenura socua. ²⁸Janiyari cunora ritia niaacua na jiyaroyani, nia shuquiriniuria nia niqushacari nojuaja niaacua tiuquihuano. Naa shuquiriaatia nia quishacarihuatej, janiyari coojia cajitiniutianijayacuahuaj. ²⁹Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacarihuua. Puetunu jiyano pueyajanaa panijia nia quiri, noo pojori pa Jiyaniijia nia poonijionuujuacatej taa Epafroditocuaani. ³⁰Nojuacuajaari quera shaajeyarucuaa Cristora na poonijosacari. Cocuaatia miijiocanuajaarihuaj. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua janiyajiniji, majaari nia naata naacunu janiya.

Nio rootasano tojjijia pa quiri cutara

3 ¹Quiarijia saniniuujia, cuarta Pueyaso pueyanaa, pa Jiyaniijia nia shuquiritari, pocuaji Tacuna na quiniuucua. Janiyara, maja taajeta cua pacutenuhuara socua cua sequenura niajaninya tari cua sequesano niajaninya. Cunoari seetanujuanaa maninia niaara. ²Tama nia cuaqueyajaaja nia cojuare cuno sacuaatia niishitiojonuujuaca pueyacuaji, cuno pojoriacuaji, sesa miijiacani. Nojoriiri pueya cararaatiuuquia co miatejonuujuaca najuhanaj, nojori jyanishacari nojori mialesano pueyari seetanujuanaa Pueyaso pueya. ³Paa cutaraari seetanujuanaa Pueyaso pueyani, Pueyaso Sohanu jiyatenuucua pajaniya Pueyaso tojjijia pa quiniuria. Paari timiquiaajaanihuaj Jesucristo rupesano pa quishacari. Taa pa cararaatiuuquia casa quiyani, naajaa. Jesucristocua pa tiushacari, paari seetanujuanaa Pueyaso pueyani. ⁴Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiarinijihuaj. ⁵Naatej, janiya jaara rasaquiaarini, ocho juuca jaara cua shocquiaarini, cua cararaatiuuquia coori mialesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicuaani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín* jianuucuaajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicuaajinio cua supuenucua. Naajuhuj, janiyari Hebreo* rupaa pocuajani taa cua supuetanaacuaani. Cua que, cua nucuaari mariyata Hebreo rupaa pocuajaca quiquiaarijuhuaj. Mashaja cua quishacari, janiyari Fariseo* pueyanora quiquiaarini. Cuarta Fariseocuaacari socua jiyanoehua supuetana Moisés Rootasano tojjijia puetunu cuarta Judiocuaajinijiojuanaa. ⁶Jiyacaritij, janiyari cua niishitiojanaa tojjijia quiquiaari jyanohuani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojjitajaca miijia naquiyanu, cua jyanishacari nojori naasucuaari Pueyaso paraa. Naajuhuj,

maninia cua tojjiniuucua Moisés Rootasano, janiyari sesacasoo quiquiaarini Moisés Rootasano niishitiojanaara. ⁷Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiarijia saniniuujia, Jesucristocua cua tiushacari, tarijia cua jyanishano maninia casaani, puetunu cuno casaajanaari quiarijia najuhua janiyara. ⁸Quiarijiani, janiyari socua cua Jiyaniijia Jesucristo niishiniuria jiaatiaa jyanohuani. Naaratej, puetunu tariucuacaanu cua timitasano casaajanaari najuhua janiyara quiarijia. Cristo pueyano cua quiniuucua, janiyari juhua taanusaquiaari puetunu cuarta Judiocuaajinijianaani. Naa Cristo tojjijia cua quiniuucuatej, cua shipinijiojiniji cua casaarano maseyaquiaarini. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. ⁹Majaari cua jyaniniu janiya sesa miyashijiani, Moisés Rootasano cua tojjiniuucua. Saniniuujia, Jesucristocua cua tiushacari, Pueyasoori puetunu sesa cua miishanojuanaa tujuquiaa. Cua niishishacari Jesucristoori mosaaquiaari cua niti, Pueyasoori cua jyanooquiaari, maja na sesacanura janiya, Neyanuucua cua tiuuniuucua. ¹⁰Janiyari Jesucristo niishiniu paniya jyanohua socuani, seetanujuanaa nata rupuetootesano cua quiniuria. Janiyari na samiitianitajia cumaaca panijayaaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jyanohua taraatia miishaaquiaari mijiria na quishacari, na Que tojjijia na quiniuucua. Janiya cuara naa miishariajuhuaj cua tojjiniuucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniu paniyani, cua miiniuria puetunu cua Jiyaniijia sequesanojuanaa janiya. ¹¹Janiyari tojetaarucuaajanaa maninia miijia quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

Maninia pueya pa quiri, Pueyaso mueraso pa quishacari

¹²Juhuanujuaja majaari cua quiniu tojetaarucuaajanaa maninia miijia. Sesa miiniu niishiyajaanijia. Jecasojuajaanijia. Naajaa, majaari cua tacaani. Jesucristocuaajaari cua jiyatequiaari na pueyano cua quiniuria. Naaratej, janiyari jyanohua saniniuujiaquiaani maninia na pueyano cua quiniuria. ¹³Cua panishano cuarta Pueyaso muerasanaa, janiyari niishiyacuajani, juhuanujuaja maja maninia cua quiniu taa cua Jiyaniijia quiyacuani. Naajaa, majaari cua tariniu. Janiyari juhua ritia netena miiquiaani na shocotanura narta netecuataunaa pueya. Maninia netenaari na nijiniara niquiyashijia. Naajuhuj, majaari cua niishitiojonu maninia cua miishano tariucuacua. Janiyari saaja cua tajoji niquiquiaani, socua maninia miijia cua quiniuria tari cua quiniujiniji. ¹⁴Pueya tacuarishijosacari, netena jaara narta netecuataunaa shocotare, nojuajaari shanohua casa niqutiosaaquiaa. Majaari najuhua na netenu jyanohua. Janiyaraari naajuhuj. Majaari najuhua jyanohua cua saniniuujiniu quiquiaa, maninia cua quiniuria juhua Cristojuhuj. Mijiria cua quiniu cua tucuatascari, Pueyasoori cua jataniniutianiya juhua Cristo cua quiniuria, Cristocua tiuujia cua quiniuucua.

¹⁵Pueyanaa, niajaninya, cante seetanujuanaa Pueyaso tojjijia quiyani, mariyata naa nia niishiriojore taa cua niishiriojiyacuani. Naatej, jyanohua nia saniniuujiri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucuaajanaa sesa miyashijiani, Pueyaso cuara na niishitiria maninia. ¹⁶Paa jaara maninia miiniu niishijia quiri, majaari pa jiyacateni saaja sesa miiniuucua. Saniya maninia miijiacara pa quiri socua.

¹⁷Cuarta Pueyaso pueyanaa, maninia miijia nia quiri taa canaa nia niquiquiaari maninia miyanocuaani. Naajuhuj,

maninia miijia nia niquiri, cante maninia miiquiaani taa canaa niishitiqiaari niajanuacuajani, maninia canaa miishacari. Nojoriini nia niishiriqia, maninia nia miiniurijuhua. ¹⁸Jesucristocuaaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhuajaniya miiquiaa sesa. Janiyacuajaari nojoriini pohuatanu pacutejoquiaari niajanuacajani, maja juhua nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajini. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjiaca nojori quiniucua. ¹⁹Nojoriiri puetunu quejoosanuanuajani mani quiquiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijia nojori quishacari, majaari nojori niishiniu caririquini. Saaja sesa na miitushano timitiatuayari. Nojoriiri saaja mijiria casaacua jiaatijaca. ²⁰Pajaniya saniniuujia, paa cutaraari tari jiyatesaquiiaari jiyocuaaanu quijiacaranoni. Paari cuniquiji pocuaji Tacuna niuriia sashiyani. Nojuacuajaari pa Jiyaniijia Jesucristo. ²¹Jiyano nia cumacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajuhua. Nojuajaari cumaacaraca puetunu casaajanaa na tojitiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijia pa quiniuria.

Pueyaracaanu pa Jiyaniijia pa shuquiritiare

4 ¹Cunora, cua panishano cuarta Pueyaso pueyanaa, pueyaracaanu pa Jiyaniijia tojjiaca nia quiri. Janiyari jiyano nia niquiniucua jiaatiaani. Nia niqiuara cua pohuatanuucua Pueyaso rupaa, niaquiiri seetanujanaa na tojjiaca quiquiaari. Naa jiyano maninia Pueyaso muerasu nia quiniucuatej, cunoori jiyano nia timitiquiaa.

²Janiyari Evodia sequeya cutarani, narta maaji Sintiquenio, nojori cuara jyanootioora juhua seetanujanaa Pueyasocua tiuujiaca maajipohua. ³Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniani, cuno maajipohua quia jyanootiootero-hua, nojori rupeotonuhua. Cuno maajipohuacuajaari jaarajaaja cuata poonijionuquiaari, Clementejuhua, pa Jiyaniijiajinia cua pohuatasacari. Naa cuata poonijionuquiaarijiaariuhua tamasa, canapete cuata quiquiaaricuaajani. Nojori sesacuaajaari tari naajiotasano quia Pueyaso nequesoretuneejinia, tee cuniqui pueyaracaanu rishijiacarano sesaca naajiotasano quiyacuajani.

⁴Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri.

⁵Puetunu pueyajanaa cuara niishiiria niaari seetanujanaa maninia pueya, maja juajia. Pa Jiyaniijiacuaajaari quera tiuquihua.

⁶Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujanaa, nia secojosacari nojuaja. Nia secojosacari, nojuaja nia masere nia panishano. Jiyacari, nojuaja nia sequerejuhua "paacarasho". ⁷Naa nia miishacari, Pueyasoori nioojia cajitiniutianiya. Naa Pueyaso cajitiniucua nioojiatej, majaari socua nioojia tacaaniu quiniutianiya, nia niishitajano. Naacuajitij, niocua juhuajaniya panaatia quiri Jesucristo cojishano nia quiniucua. Naa Pueyaso miishano pajaniyani, cunoori jiyano nia jiyajeneta. Nocua jiujiatesano.

Saaja maninia casaacua niishiriojua nia quiriqia

⁸Naajuhua cuarta Pueyaso pueyanaa, nio tojjiaca nia quiriuhua. Pueyaracaanu saaja seetanujanaa rupaacua niishiriojua nia quiriqia. Naajuhua, saaja rerequeteyaqi-shoo casaacua nia niishiriojore. Saaja maninia casaacua niishirionuujua nia quiri, maja cararaatia casaacua. Naajuhua, saaja Pueyaso shuquiritasano casaacua nia

niishiriojore, maja Pueyaso sesacasano casaacua. Naacuajitij, puetunu maninia casaacujanaa nia niishiriojore, casaajiniiti pueya naata Pueyaso shuquiritianuni.

⁹Maninia nia miiriqia pueyaracaanu, taa cua niishitiojua niajanuacuajani. Niaacuajaari cua rootasano tojjiacaari. Naajuhua, niaacuajaari cua niqijia taa miijia cua quiquiaarini. Naa jaara nia miijia quiriuhua, poojia cajitini Pueyasoori niaata quiniutianiyajuhua.

Pablo pohuatasano, Filipo tiacajinia quinia Pueyaso pueya jiyaronuucua cumaneeca nera

¹⁰Janiyari jiyano nia Jiyaniijia timitiaani juhua shusha nia niishinuuquihua janiya, cucua nia jiyaronuucua nia reratesano cumaneeca. Naa cua sequesacari niajanuacatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuresacari niaatucua canta cucua na jiyaroriquiani.

¹¹Majaari nia cua sequenu niajanuacatej cua panishano cua jitiiaquiniucua. Maja. Janiyacuajaari tari jiyartuononi, juhuajaniya cua quiniuria cua jitiiasanionuujua. ¹²Naajuhua, janiyari niishiyani juhuajaniya cua quiniuria cua panishano cua jitiiaquishacari. Naajuhua, janiyari niishiyani taa quishanote puetunu cua panishanojanaa cua jitiiasacari. Janiyari tariucua saniniujushanoni puetunu casaajanaa cua rejeretanura. Juhua nia quini niishianijia miaajaaraca cua quishacari, miaajeju cua quishacarijuhua. Cua naata juhuajaniya quini casamijiu cua quishacarijuhua, maja saaja casamiriaca cua quishacari. ¹³Cua naata rejeretanu puetunujanaa, Cristo cumaquishacari janiya. ¹⁴Naajaa, niaari maninia miiriucua nia cumaneeca nia jiyarosacari cucua, naquiya cua miishacari niya. Naaari niarta pueyanocua taraajeja cutara.

¹⁵Naajuhua, Macedonia jiyajini nia quiasacari nia shurucua Filipo tiacajini, tamonu jiyacajinia cua pohuatanu Pueyaso rupaa, saaja niajanuacatej cuata quia jyanooquiaari. Cunoori quiquiaari shushajanaa Jesucristocua tiuujiaca nia quishacari. Jiyacari, niaari nia reratesano cumaneeca jiyaroquiaari cucua, shuquiriatia nia quishacari cua pohuatanuucua nia niqiuara Jesucristojini. ¹⁶Juhuanuaja nia Macedonia jiyajinia cua quishacari, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. ¹⁷Majaari saaja cua paniniu pueyaracaanu nia niqitiojonura nia cumaneecajini janiya. Jania cutaraari nia panitiaani capora pueya nia quiniuria. Naacuajitij, Pueyasoori saniniuujia socua queraatia nia niqitiojutaniyacujua. ¹⁸Eprofroditocuaajaari puetunu nia jiyarosano cumaneecajanaa cucua tiuquitiasecua. Janiyari cunota puetunu cua panishanojanaa maserucua tarini. Cureyajaari nia jiyarosano cumaneecajini. Cuno cumaneeca cucua nia jiyarosano, cunoori juhua Pueyasora niqitiosano casa. Nera, cunoori juhua shanohua jaanutaja catijiasano nocua. Na shuquiritiri. ¹⁹Naaratej, cua Jiyaniijia Pueyasoori puetunu nia jitiiaquishoo casaajanaa nia niqitiojutaniya. ¿Pueyasoteeri casamijiu? ¡Maja! Naa rupesacari Neyanu Jesucristo, puetunu na jitiiasanojanaari niaaranujuhuaj. ²⁰¡Pa Que Pueyasoori jiyano maninia! Saaja nojuaja pa shuquiritiare pueyaracaanu. Cuara nia quiriitej.

Nata quiniaata Pablo saruhuatascari narta Pueyaso pueya

²¹Quiria nia saruhuatate puetunu Jesucristo jiyanooshano pueyajanaa. Naa cuata quinia Pueyaso pueyari nia saruhuatajuhua. ²²Naajuhua, Jesucristocua tiuujiaca jiyaniijia Césarra poonijionaa pueyari nia saruhuatajuhua, puetunu nia Jesucristocua tiuujiacajanaa.

²³Pa Jiyaniijia Jesucristo cuara cumaquiri puetunu nioojijanaa. Tariucua pueyanaa.

PABLO NAAJIONE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaa naajioquiaari

1 ¹¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa pohuatariquiano taa na Que Pueyaso paniquiaaricua-jani. Pa tarajanu Timoteota naajiya nionijia. ²Niaacuara naajiyaniija, canapue Pueyaso saquiriojoquiaaricuaajani tama nerajaaja nia quiniuria. Niajanijacuaajani maninia tiuuquiaa Pueyasooqua, Cristo rupuesano nia quishacari. Pa Que Pueyaso cuara cumaquiiria niajanijia, shuquiriaatia nia quiniuria, juhuajaniya nioojia quiniuriajuhuaj.

Pablo secojosano Jesuucua tiuuniaa pueyacuara

³⁻⁴Canaari pohuatasaaanuni taa nia tiuuquiaa Jesucristoo-cuani, naajuhuaaj, taa nia paniya puetunu niarta Pueyaso muerasujuaanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quena”. ⁵Niaari naa maninia quiyatej, nia niishishacari Pueyasoori jiyanojua maninia pa miiniutianiya na niqutiosacari pajaniya jiyocuacaanu na jiitiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. ⁶Cuno maninia rupaari puetunu jiyacajinijanaa paaqueyaree, mariyata taa na paaquecanucuaa na pohuatasacari nia tiacajiniacuani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiacajiniacuani. Naa caneyari nia niishishacari Pueyasoori seetanujuaanaa pa paniya, taa nia pohuatasaaquiaaricuaajani. ⁷Pa panishano Epafrasri naa pohuataquiaari niajanijatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸Nojuajaari canaa pohuatarucuaa niajanijajiniiji, naajuhuaaj taa Pueyaso Sohuanu panitiooteya niajanijani.

⁹Naaratej, canaa jaara tojiqianu niajanijajiniiji, majaari canaa tarinitianu quiriquiaa Pueyaso secojonu niaacuara. Canaari Pueyaso secojoquiaani, nojuaja cuara nia jatanijia niishijia nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj. ¹⁰Niaa jaara Pueyaso panishano niishijia quiri, naacuajitij, niaari maninia quiniutianiya taa pa Jiyaniija paniya na pueya quiniuricuaajani, nojuaja shuquiritianura niajanijia, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuaaj, niaari socua maninia niishiniutianiya Pueyaso. ¹¹Canaari Pueyaso secojoquiaa niaacuara juhuaj, Pueyaso cumaquiniuria niajanijia puetunu na cumaacatajanaa. Jiyanojua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹²Canaari Pueyaso secojoquiaajuhuaaj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jatanijiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara, cuhuashiqui quiquiojinia pa quishacari. ¹³Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyateereer cuhuashiqui quijia pa quiniuria, Neyanuniojua jiitiasano pa quiniuria maninia cutara. ¹⁴Tama Neyanu cusonutajaaja pa jiyanoori nia sesa pa miishanojiniji. Naacuajitij, paari na pueyara jatanishaareeni.

Paari maninia quiya Pueyasotani, Cristo cusonuucua pa niti

¹⁵Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujanaa quiquiaari Pueyaso shipiniyaquishacari puetunu casaajanaa. ¹⁶Na Que Pueyasoori na shipinitiquiaari puetunu casaajanaa jiya cajiniocua, mijiriano; niquishano casaa, niqiyaquishoo casaano. Naacuajitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaari nojori jiitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujuaanaa shipiniquiaari. Tama nerajaaja na shipiniquiaari. ¹⁷Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuaanaa cojuaa, maninia na quiniuria. ¹⁸Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuaanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniiji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuanaaj. ¹⁹Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja na quiniuria na Quejiniji. ²⁰Naajuhuaaj, Pueyasoori paniquiaari Cristo rupetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanojua puetunu casaajanaa tama na cusonutajaaja niyacutesanojinia. Na Que rupetequiaariuhua puetunu casaajanaa, jiyocuacaanu casaa, mijiria casaano.

²¹Tarijia, niaari Pueyaso paraa quiquiaari, juhua taanusano pueya Pueyasojiniiji, sesa miijia nia quiniucua. ²²Saniniujia quiriijiani, Pueyasoori nia rupetequiaariuhua nocua, Cristo cusonuucua pocuara, cuaqueyara na quishacari mijiria. Naacuajitij, Pueyasoori na naata nia tiuquinini nocua, tojetaarucuaajanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniuria quiniutianiya na niqiaari. ²³Niaari naa quiniutianiya maninia, niaa jaara cumaatia rupaaquiaa Cristoocua, nocua nia tiuushacari, nioojia nia niqijioteyaquiniutia. Majaari nia niishiriojonu Pueyaso naasucuaari maja na miiniuria quiniutianiya puetunu na sequesanojuaanaa niaara, taa nia tojiqiaaricuaajani. Nia tojishano Pueyaso rupaacuajaari tari pohuatasaaanuni puetunu jiyacajinijanaa. Janiya, Pablóni, janiyari na pohuatanu naacutaajaniuhuaaj.

Pablo Pueyaso pueya maanu cumaquiniara jiyatesaaquiaari

²⁴Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniuria pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocuajuhuaaj. Naaratej, janiyari shuquiriaatia quiya niyani, naquiya cua miishacari

niaacuara. Naa naquiya cua miishacari Cristojiniji cua pohuatanuucua tiqiyocuatej, janiyari Cristo naquiya miiniu tucuataa tama cua cuaqueyajiniajaajani. ²⁵Pueyasocujaari cua jiyatequiaari na saquiriojosano pueya cua jiitianura, cua cumaquiniuria niajanija puetunu na rupaatajanaa. ²⁶Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. ²⁷Pueyasoori pa niishitiniu paniquiaari taa jiyanoehua shacantuuca na cumaaca quiya niajanijarani, canapuate maja na saquiriojosano Judiocuaca quiquiaaricuaajani. Niocuajaari jiyasohua Pueyaso miiniu panishano tarijia: iCristoori nioojiajinia quiya! Nia jitiyacari Cristo, niaari niishiya niaari shacantuuca quijira jatanishaanutaniyajuhaaj.

²⁸Naaratej, Cristocuajaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuaajanaa maninia canashitishano pueya, Cristo rupuesano nojori quishacari. ²⁹Naaratej, puetunu Cristo niqutiosano cumaacatajanaa jiyanoehua poonijioquiaanijia, na cumaquishacari janiya.

2 ¹Pueyanaa, janiyari panijani nia niishiniuria taa jiyanoehua cua poonijioquiaa Pueyaso cua secojonuta niaacuariani, Pueyaso muerasuucua Laodicea tiacajiniajuhaaj, puetunu juhuanajuaja cua naquiyajinijia pueyacuarajanaano.

²Jiyanoehua secojoquiaa niaacuarianijia, nioojiaa cumaquishaanura, nioojiaa rupuetoonura jatiqijiuhaaj, jiyanoehua nia panitiosacari. Naajuhuaaj, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miinitianiya pajaniyani. ³Neyanu Cristocuajaari puetunu niishijiajanaa. Majaari tamonu niishijia quiniu juhua nojuaja. Jiyanoehua maninia mijia puetunu na niishishanotajanaari. ⁴Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasano. ⁵Majaari cua quiniu quiquiaa niaata. Naajaa, cua sohanuuri niaata quiquiaa. Nia shuquiritiaanijia, maninia jatiqiu nia quishacari, mariyata seetanujanaa maninia nia tiuushacari Cristocua, maja jatasano nia quiniuria.

⁶Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata.

⁷Maninia nia rupuetooore Cristota, naatej, taa naana cumaatia nujuaacuaani, jaara tucuaamaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaricuaajani. Cunora, pueyaracaanu nia sequeriquia Pueyaso: "Paacarasho canaa Quenaa".

Niaari quiarinio pueya, Cristo quishacari nioojiajinia

⁸Tama nia cuaqueyajaaja nia cojuare, tamasa mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojtiriariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhaaj.

⁹Nocuaji saaja Cristo nia tojiri. Tama Cristo cutarajaarijia puetunu Pueyaso cumaacajanaa jitiiaja, puetunu na niishitijajanaano. ¹⁰Naajuhuaaj, niaari Pueyaso cumaaca jitiiaa, na niishitijanio, nia rupesacari Cristo. Naacuajitij, niaari puetunu nia panishanojuanaa jitiiaa tari, maninia quijia nia quiniuria. Cristojuaanari Jiyaniijiajanaa. Cristo jaara na jiyarore, puetunu tamonu cumaacaraca quijiacajanaari na tojtiaa; jiyocuaanu camarnu, mijiria camarnunio. ¹¹Cristo nia rupesacari, niaari seetanujanaa jatanishaaree maja sesa

nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishiniuria nojori cuaara quiirra saa Pueyasoraja, maja sesa mijia nojori quiniuria socua. Cuno, miatenuni, majaari pueyano na jataniniu sesa na miinijiniji. Cristo cutaraari sesa nioojia jataquiaari, seetanujanaa sesa nia quiniu jatasaanura puetunujanaa. ¹²Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacia nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. ¹³Niaari juhua macu quiquiaari tarijia, sesa mijia nia quishacarijia, sesa jiuujiaraca nia quishacarijiano. Jiyacaritij, Pueyasoori nia samiitianiquiaari Cristota, na jiyanooshacari niajanija puetunu sesa nia miishanojinijijanaa. ¹⁴Pa tojiyaquishacari tariucuacaanu Pueyaso rootasano, paari puecoosocoriquiano quiquiaari juucuanu. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujanaa. Pueyasoori puetunu sesa pa miishanojuanaa tiutiaquiaari Cristocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiutiasaanu pocua. ¹⁵Na cusosacari niyacutesanojinia, Cristoori puetunu tamasa sesa cumaacaraca quijiacajanaa shocotajiaari. Nojori cumaaca jaariutiareeri. Nojori rerequetereri, naatej, taa quioosano pueya jaatucunusaquiaacuaani, pueya niqiuara macaatisocoriquiano.

Saaja Pueyaso casaacua nia jiaatiariquia

¹⁶Naaratej, majaari nia tojinu noo pojori, canapuate nia tojitiinu saniniujia supuetana niishitiojosanojuajani. Nojoriiri najuhuaana niishitiojoquiaa casaa sumatuute puereshiyani, ratasano. Nojoriiri niishitiojoquiaajuhuaaj teyano juucate poonijiaquishiyani, naajuhuaaj, Pueyaso niqiuara pa queranacunuunura raca macura. Nojoriiri naa niishitiojonuquiaa nojori jiyanihacari paa jaara naa miyaquirini, Pueyaso mariqui pa saniitioreeri. ¹⁷Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujanaa quiniutianiyan Niriqiano jaara tiuqiri. Cuno Niriqianocuaajari Cristo. Tari tiuquiquiaariiri. Nojuajaari pocuaji Tacuna. Naaratej, majaari socua pa tojinu cuno miriqui niishitiojosano. Quiarijia saaja Cristo pa tojiri cutara. ¹⁸Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano niajanija maseyaquiriiri. Nojoriiri tama na cuaqueyajaaja shuquiritiaquiaa na jiyanihacari nojori maja Pueyaso shocotaja na quiniu nojori secojosacari Pueyaso seya, maja Pueyasojanaa. Nojoriiri tama na maquenujinia na niquishanoocuaajaaja tiuujiaa, maja Pueyaso rupaacua. Naacuajitij, nojori tiuushacari tama na niishiriojosanoocuaajaaja, nojoriiri seetanujanaa pueya shocotajaca quiya. ¹⁹Nojoriiri maja na rupueno Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhatajanaani, pa cusorohuatano. Pueyasoori naa pa maashitiniu panijajuhaaj Cristota rupuetootesano pa quishacari.

²⁰Niaari juhua tari cusoquiaari Cristota, maja socua juhua mijiria quijia nia quiniuria. ¿Macutucua taa supuetana rootasano tojirini? Maja na naata. ¿Niajanijariuhuaaj? ¿Casaara nia tojtiaajaa cuno tariucuacaanu rootasano? Niaari juhua nareja mijiria quinia quiyajaa, nia tojishacarijia cuno rootasano. ²¹Supuetanaari naa piryojoquiaaritij: "Maja pa quianu cuno. Maja pa miaquenu cunojuhuaj. Maja cuno pa

cooniu". Pa supuetanaari naa sequejatej. ²²Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuaacaanu rootasanoori saaja tama pueya niishishanojuaaja quiquiaari. ²³Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puererene, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaana Pueyasora. Cunoori maja na naacunu pajaniya sesa casaacua pa jiaatiaaquiniuria.

3 ¹Niaa jaara samiitianishaaquiaari Cristota, jiyocuaacaanu Pueyaso jiiatiasanoocua nia jiaatiare, tee Cristo cajiya na Que Pueyaso miaquetajaracuajani. ²Pueyaso casaacua nia niishiriojore saaja, maja mijiria casaacua. ³Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupesacari Pueyaso, Neyanu Cristota. Nojuacuajaari pa samiitijia. Saniniuujia, juhuanojuaja maja niishishano taamueca quijiaca pa cuaqueya quiniutianiyani. ⁴Cristo jaara muetarohua pocua mijiria, shacantuuca cumaacaraca quijia na quishacari, jiyacaritij, paari jatanishaanutaniyani shacantuuca cumaacaraca quijia pa quiniuria nata, juhua nojuajuhuj.

Maninia rootasano Pueyaso muerasura

⁵Naaratej, nia cuaqueya cuaara quiiria juhua macu tama nia niquiarajaaja, nia cuaqueya nia ruoretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatijaari juhua Pueyaso ruoretaja quiya, tama na jiiatiasano casaacuaaja na tiushacari juhua Pueyasooaja. ⁶Pueyasoori jiyanoohua saniitionutaniya na tojiyashijia, canapuste naa sesa quijiacacuajani. ⁷Pueyaso tojiyashijia nia quishacari tarijia, niaari naa sesa miijia quiquiaari. ⁸Quiarijiani, nia tarinitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyanoashijia nia quiniu. Maja sesa miijia nia quiniu. Maja pueya sesacaja nia quiniu. Maja sacuaraatia najuhua nia niti taquiriocateja nia quiniu. ⁹Maja nia cuaracashijiootonu. Niaari tari jatanishaaquiaari tarijia sesa nia quiniujiniji, sesa jiuujiaraca nia quishacarijia, sesa miiniuucua jiiitinio nia quishacarijuhuaj. ¹⁰Niaari quiarinio jiuujiaraca quijiaca tari. Quiarijiani, tama nia cuaqueyajaarijia tari jataa juhua nia Shipinina Pueyaso nia quiniuria, seetanujanaa Pueyaso niishijia nia quiniuria. ¹¹Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasa pueyano; na cararaatiuquia co mialesano pueya, mialesoo pueyano. Paa jaara tahue quiyani, juhua mococori, poonijotesano pueya, camarnuujia pueyano, naajaa. Cristo pa rupesacari, puetunu pajaniyajaari mariyata na muerasu quiyani. Nojuajaari puetunu poojiajia qiyajuhuj.

¹²Pueyasoori nia saquiriojoquiaari saa maniniaja nia quiniuria nera. Niajanitari na panishano muerasu. Naaratej, pueyacu taraajeja nia quiri. Maninia miijia nia quiri. Majaari nia jyaniniu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. ¹³Jacaria nacasutoojua nia quiri. Maninia nia jyanooori cante sesa miiri niajanitari. Taa pa Jiyaniija jyanooquiaari pajaniyacuani, naa nia jyanootioorejuhuaj. ¹⁴Seetanujanaa pueya panijia nia qiriijuhuj. Cunoori socua jyanohua panishano. Panitiojuaca nia quishacari, puetunu nia miishanojuanaari jyanohua maninia quiniutianiya, jatiqui nia quiniurajuhuj. ¹⁵Naajuhuj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari

juhuajaniya quijiaca nia quiniuria, maninia rupuetootesano. Pueyaso muerasu cuaara jatiqui poonijionujuaca quiiria, naatej, taa pa cuaqueyajiniacuma casaa puetunujuanaa jatiqui quiyacuani. Majaari nia juaatiojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijianaa niaara.

¹⁶Nioojia cuaara quiiria mishaja Cristo rupaata, jyanohua na tojiijia nia quiniuria. Pueyaso Rupaa nia niishitiojotoore nia jaaquequejosana. Naa nia cumaquitiojore puetunu Cristo niishishanotajanaa. Naa nia jaaquequejonuure Pueyaso Rupaa naajiosanojiniji, pueya naajiosanojinijijuhuj, Pueyaso Sohuanu niishitiosano niajanianio. Naa nia jaaquequejore Pueyasora, nia shuquiritianuta nojuaja. ¹⁷Jesucristocuaajaari nia Jiyaniija quiya. Naacuajitij, niaari na sesaanucua. Naaratej, nia sequesano, nia miishanojuhuaj, puetunu cunoujuanaa cuaara quiiria maninia nera. Naa nia miiriquia pa Que Pueyaso nia sequenuta "paacarasho", Neyanu cumaquiniucua niajanिया.

Maninia miijia pa quiri Pueyaso muerasu pa quishacari

¹⁸Maajipohuanaa, nia niyaca tojtijajaca nia quiri. Pa Jiyaniijaacua tiuujia cumaati naa miijiaquij. ¹⁹Pueyanaa, nia niquiocua nia paniri. Majaari na juanu. ²⁰Mueraasapueanaa, nia queya tojiijia nia quiri, nia shuquiritiniuria pa Jiyaniija. ²¹Pueyanaa, maja nia juaatinu nia niquiohuanu, nojori mariqui maninia miiniuucua pishiriiri, puera nia juashacari nojori. ²²Poonitijosano pueyanaa, puetunu nia camarnu sequesanojuanaa nia tojiri. Maja na tojiijia nia quiniu saaja na shootiasacari niajanिया, na shuquiritianura niajanिया. Majaari saaja na niquishacari nia poonijionu nia sapojonura nojuaja. Seetanujanaa maninia nia poonijiore pueyaracaanu nia puerenuta saniya nia camarnujanaa Pueyaso. ²³Puetunu nia miishanojuanaa nia miiri shitimia, juhua pa Jiyaniija Cristora. Naa nia miiritij, maja juhua nareja pueyara. ²⁴Maja nia niyjetanu, pa Jiyaniijaari nia niqutionutaniya jiyocuaacaanu niaara na jiiatiasanojiniji. Mijiria camarnu nia poonijosacari, niaa cutaraari Cristora poonijia. Nojuacuajaari nia camarnujanaa. ²⁵Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniujia. Mijiria camarucua, poonitijosano pueyano, naajaa, nojori nia rimiajata Pueyasora.

4 ¹Camarucuaana, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyjetanu, niaari jiyocuaacaanu Camarnuracajuhuj.

²Pueyanaa, Pueyaso secojoja nia quiri pueyaracaanu. Naa secojoriqia maninia nia niishiniutia. Pueyaracaanu Pueyaso nia secojosacari, nia sequerenoj, "paacarasho". ³Naajuhuj, canaacua nia secojore Pueyaso, nojuaja cuaara canaa pohuataniiria pueya niqiuara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyanijia nio nujuatejojuajinia. ⁴Pueyaso nia secojore cucua, maninia cua pohuatanura Cristojiniji, pueya niishiniuria maninia cua pohuatasano, taa Pueyaso panija cua pohuatanuracuajani.

⁵Maninia nia niishiriojore taa nia miiniutianiya noo pojorini, canapuetucuaaja maja Pueyaso muerasuni. Maninia nia miiri nojori, mijiria nia quishacarijia. ⁶Nia pocojosacari nojoritia, maja najuhua nia pocuanu. Pueya nia cumaquiri nia sequesano. Naa niishiriojore taa nia riucuanutaniya tamasa pueyani, nojori jaara nequesotariquia niajanिया Pueyasooja nia tiuniujiniji.

Nata quiniaata Pablo saruhuatasacari pueya, naajionu na puecanura

⁷Pa panishano pa tarajanu Tiquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijara canaa

poonijionura. ⁸Niaacua na jiyaroyanijia na pohuatanura nijaniya taa canaa quiyani, naajuhuj, na cumanijianura nijaniya. ⁹Pa panishano Onésimoori nata quianutaniyajuhuj. Nojuacuajaari nijaniyajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niiquijijianaa.

¹⁰Aristarco, cuata nujuatesano pueyanoni, nojuajaari cua sequeya cua saruhuatanura nijaniya nera. Marcoori nia saruhuataajuhuj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹Jesu sesaanucua pueyanoori nia saruhuataajuhuj. Na sesaari Justojuhuj. Saa nio pojorijia Judiocuacajinijinioori cuata poonijioquia Pueyasora, canaa niishitiojonura Cristojiniji pueya niqiara. Nojoriiri cua cumanijianaa quiquiaa. ¹²Epafrasri nia saruhuataajuhuj. Nojuajaari Cristo seru nijaniyajinijiojuhuj. Nojuajaari pueyaracaanu niaacuara secojoquia queraatia, jiyanhua cumaatia Pueyasocua tiuujia nia quiniuria. Secojoquiaajaariuhua ritia Pueyaso tojjijia nia quiniuria, puetunu Pueyaso panishanojuanaa nia miiniuria

maninia. ¹³Seetanujuanaa, Epafrasri jiyanhua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. ¹⁴Pa panishano naarajona Lucasri nia saruhuataa. Demas nia saruhuataajuhuj.

¹⁵Canaara nia saruhatate Laodicea tiacajinia quiniaa parta Pueyaso muerasu. Ninfas nia saruhatatejuhuj, na tiajinia rerejonaa Pueyaso pueya maanujuhuj. ¹⁶Niaa jaara nio naajionee serojorecuaa nia rerejosacari, Laodicea tiacajinia nia jiyarotarejuhuj, cuara serojosaaria Pueyaso pueya maanu niqiara tijiuhuj. Naajuhuj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷Naa Arquipo nia sequere quiria: “Tama quia cuaqueyajaaja quia cojuare quia tucuatana quia poonijosano pa Jiyaniijia. Nojuajaari quia jiyatequiaari nera poonijioriquiano”.

¹⁸Janiyari Pabloni. Quiarijiani, tama cua juaashiquiatajaaja naajiyanjia saaja cua saruhuatanura nijaniya. Nia niishiriquia, janiyari moronucua nujuatesano quiyani. Pueyaso cuara cumaquiiria nijaniya na cumaacata jiyanhua. Tariucua.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhatasacari Pueyaso pueya

1 ¹Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacanio. Canaari mariyata nia saruhatuataani, Silvano, Timoteonio. Pueyaso cuara maninia jiitiaara na cumaacata nijaniya, maninia nia quiniuria. Cuara nioojia cajitiirijuhuj, juhujaniya nia quiniuria.

Tesalónica pueyanaari Jesuucua
tiujujaca quiquiaari seetanujuanaa

²Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuquiaani. ³Pa Que Pueyaso canaa secojosacari, canaari pueyaracaanu niishiquiaa nijaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaajuhuj taa nia paniniutia nia naacuquiaa niarta pueyani. Naajuhuj, niari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianiuhua. ⁴Pueyaso panishano pueyanaa, canaacuajaari niishiyani, nojuajaari nia saquiriojoquiaari na panishano muerasu nia quiniuria. ⁵Canaa jaara nia niqiuara pohuataquiaari Pueyaso rupaa Jesucristojini-jini, cunoori maja najuhua pohuatasano quiquiaari. Canaa pohuatasanoori jiyanoohua Pueyaso cumaacaraca quiquiaari. Pueyaso Sohuanuuri jiyanoohua poonijioriquiaa nioojiacajinia. Naacuajitij, niari niishiquiaari canaa pohuatasanoori seetanu rupaaajanaa. Niaacuajaari niishiya taa quijiaa canaa quiquiaari canaa quishacari niaatani, maninia Pueyaso muerasu nia quiniuria.

⁶Niaari canaacua jiaatiaquiaari, juhua canaa nia quiniurijuhuj, juhua pa Jiyaniijia Jesu nia quiniurijuhuj. Niaari seetanujuanaa naa miijacara quiquiaari, Pueyaso tojjijaca nia quiniurijuhuj taa canaacuaani. Pueyaso rupaa nia tojjishacari, niari jiyanoohua na timitiaquiaari. Cunora, niari jiyanoohua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷Naa shuquiriaatia Pueyaso tojjijaca nia quiniucuatej, niari niarta Pueyaso pueya shiniujuquiaari, seetanujuanaa Pueyaso tojjijaca nojori quiniurijuhuj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. ⁸Pa Jiyaniijia rupaari nijaniyajiniji tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiquiyocujanaa poojotasaaquiaari. Naacuajitij, puetunu tiquiyocua quijiaa pueyajanaari tari niishiya taa Pueyasocua tiujujaca nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinjicujani? ⁹Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricuaa nijaniyani. Nojoriiri niishiyajuhuj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojjiniuria. Naajuhuj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojuaanaa

tojitiajaca nia quiniuria. ¹⁰Naajuhuj, niaanaari Neyanu sashiya, jiyocuaaanu na tiuquiniuhua, teyano Pueyaso samiitianiquiaariuhua macujinjicujani. Pueyari nijaniyajiniji niishiyajaacuhuj, Jesuuri pocuaji Tacuna, maja mani quiquiojinia pa quejoosaanura, Pueyaso saniitiosacari na tojitiaashijiaa.

Pablo niishitiosacariuhua pueya, taa na quiquiaari nojoritiani

2 ¹Cuarta Pueyaso pueyanaa, niaacuajaari niishiya, majaari najuhua canaa quiniu quiquiaari, niaata canaa quishacari. ²Niaacuajaari niishiya, Filipo tiacajinia canaa quishacari, niaacua canaa tiuquiyaquishacarijia, canaari cuno tiacajinia sesacasaaquiaarini. Canaari jiyanoohua taraatia miishaaquiaarijuhuj. Naajuhuj, nia tiacajinia canaa tiuquijiosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojiniji nia niqiarajuhuj. ³Canaacuajaari niishiquiaarini canaa pohuatasanoori seetanu rupaaajanaa. Majaari canaa pohuatanu quiquiaari canaa miiniuria sesa nijaniya, canaa sajonura nijaniyajuhuj. ⁴Pueyasojuaanaari canaacua tiuquiquiaari. Cunora, canaa jiyatequiaariri Neyanujiniji pohuataanaa canaa quiniuria. Naacuajaari taa canaa poojotaquiaa pueya tiuuniuria nocuacujani, Pueyaso jiyanooniuria nojori. Canaari seetanujuanaa Pueyaso timitini panyani, maja saaja pueya. Pueyasocujaaari canaa jiuujia niishijia. ⁵Niaacuajaari niishiyajuhuj, majaari canaa sajonu quiquiaari nijaniya shanohua canaa sequesanta, canaa nia maniniucuanura. Naajuhuj, majaari canaa cuaracashijionu quiquiaari nijaniya, canaa nia niqitiojonura nia cumaneecajiniji. Pueyasoori na niishiyacuaaja. ⁶Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniurijuhuj. Maja. ⁷Canaacuajaari seetanujuanaa nia jiyaniijianucuaani, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari nijaniya, juhua canaa seya nia quiniuria. Saniniujujia, canaari tojetaarucujanaa juhua naatujoori quiquiaarini, niaata canaa quishacari. Naatej, taa maaji jiitiaa maninia necohuacuaani, canaari naa nia jiitiaquiaarijuhuj. ⁸Jiyanoohua canaa paniniucua nijaniya, majaari saaja Pueyaso rupaa canaa pohuatanu quiquiaari nijaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuara puecoosaariaqui. Canaari naa jiitiaquiaari nijaniyani, jiyanoohua canaa paniniucua nijaniya. ⁹Cuarta Pueyaso pueyanaa, niaacuajaari niishiya taa canaa poonijioquiaari jiyanoohuani, tama canaa panishanojuaaja canaa masetajara. Canaari naa poonijionuquiaarini juuca, niucuanio, canaa pohuatanura Pueyaso rupaa nijaniya. Canaari naa miiquiaarini maja canaa taajetenura nijaniya canaa mashiniquijionuta nia cumaneeca.

¹⁰Naacuajitij cuarta Pueyaso pueyanaa, nijaniya, Pueyasojuhuj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canaacua saquiriojotanu, canaa jaara tojetaarucujanaa sesa miyaquiquiaarini. ¹¹Niaari niishiyajuhuj taa canaa

shiniujuquiaari nijaniyani Pueyaso nia tojiniuria. Niaari niishiyajuhuj taa canaa cumaniijaquiaari puetunu nijaniyajanaani taraatia nia quishacari, naatej, taa pueyano miiquiaa na panishano niquiohuacuaani. ¹²Naajuhuj, canaacuajaari jyanohua nia nacasuquiaarini maninia mijiaca nia quiniuria juhua seetanujanaa Pueyaso pueya. Pueyasocuaajaari nia saquiriojoquiaari pueyaracaanu nata nia quiniuria, jyanijianucua nia quiniuriajuhuaj, juhua nojuajuhuj. Nojuacuajaari na shacantuca cumaacajinia quijia.

¹³Canaa jaara Pueyaso rupaa pohuataquiaari nia niqiarani, majaari nia jyaniniu quiquiaari cunoori saaja pueyajini nia canaa tojiniushano. Maja. Niaari seetanujanaa na tojtiajacara quiquiaari, nia niishishacari cunoori seetanujanaa Pueyaso rupaa cutara. Canaari cunora canaa timiniutia sequequiaa Pueyasoni, “paacarasho”. Canaa pohuatasanoori seetanujanaa Pueyaso rupaa. Naacuajitij, na rupaari nioojiajina poonijioquiaa, maninia mijiaca na jataniniuria nijaniya, Jesuucua tiujujia nia quiniucua. ¹⁴Naa Jesucristocua tiujujia nia quiniucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaari nojori miiquiaari naquiya, Jesucristo tojijia nojori quiniucua. ¹⁵Nio cuarta Judiocuacani, nojori supuetanaajuhuj, nojoricuajaari pa Jiyaniija Jesucristo motuquiaari. Nojori supuetanaari naa tariucuaaanu puecooquiaarijuhua Pueyaso sequesano caminiujunaa pueyatej. Naajuhuj, Jesuucua tiuyashijia cuarta Judiocuacari canaa taanuquiaari canaa Judea jiyajini. ¿Cuno pojoritiri Pueyaso timitiasano? ¡Maja! Cuno nojoricuajaari juhua puetunu mijiria quinia paraajanaa. ¹⁶Naacuajitij, canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhuj, Judiocuacari canaa tenujuquiaa juucuan. Naacuajitij, Pueyasora, sesa Judiocuaca mijiosanoori tari tojetaarucujanaa puera. Cunora, Pueyasoori nojori saniitioquiaa jyanohua.

Pablo naquerejosacari juucua Tesalónica tiacajinia quinia Pueyaso pueyacua

¹⁷Cua panishano pueyanaa, canaacuajaari rupaquijia nia shuriucuaqui quiaquiaarihuani. Jiyacari canaa niqiyaquishacari nijaniya, naajaa, canaacuajaari juhua niaata quiquiaaani, pueyaracaanu canaa niishiriojosacari nijaniya, niaacuara canaa secojosacari. Canaari juucua jyanohua nia niqini paniriquiaani. ¹⁸Cunora, canaari niaacuara naquerejoquiaari juucuan. Janyari niaacuara naquerejonu pacutejoquiaarini. Satanásri canaa cushitioquiaari saajani. ¹⁹¿Janyatucua casaara nia niqini paniaquiririini? Niaacuajaari jyanohua cua timitiasano pueya. Pa Jiyaniija Jesucristo tiuquishacarihua, janyari niishiyani, nojuajaari canaa shuquiritianutaniya maninia na tojijia nia quishacari canaa niishitiojonuucua na rupaa nijaniya. Pa Jiyaniija pa quishacari, jiyacaritij, canaari jyanohua nia timitianutaniyani, maninia na tojtiajacara nia quiniucua mijiria. ²⁰Taaquiririini, canaacuajaari tari shuquiriaatia quiyani, maninia na tojtiajacara nia quiniucua. Niaacuajaari seetanujanaa canaa timitiasano pueya.

3 ¹Naa jyanohua canaa niishiniu panishacari juucua nijaniyajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniacuajaari canaa jateenura tamajaaja Atenas tiacajinia. ²Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojinijini canaa pohuatanura. Janyari niaacuara jiyaroquiaarini na cumaquiniuria nijaniya, mariyata socua na shiniujuniuria nijaniya Jesuucua nia tiuniuria saaja. ³Na jiyaroquiaarinijia na cumaquiniuria nijaniya maja quenaaja niqiriyatu nijaniyajinijinio pishiniuria Pueyasocua, naquiya nia miishacari. Niaacuajaari tari niishiquiaari, paari naquiya miishiyani Jesucristocua pa tiuniucua. ⁴Canaa

quishacari niaataja, canaacuajaari tari nia numootequiaarini, puetunu pajaniyajanaari naquiya miishaanutaniyani Jesucristo tojtiajacara pa quiniucua. Niaacuajaari niishiya, seetanujanaa naa tohuatecanuuri cua sequesano. ⁵Cua niishishacari nijaniyajinijini, niaanaari naquiya miishaaquiaa, janyari puereriquiaani Sesaaca naasucua nia mitirucuaa sesa. Jaara naa qiritij, puetunu canaa miishanojuanaa niaara maara najuhua quiquianu. Naa cua tacaashacaritij, majaari socua cua tarishiniu paniniu quiquianu, nijaniyajinijini cua niishiniuria. Cunora, janyari ritia jiyarocanu niaacuara Timoteoni, saniniujia nojuaja pohuatanuhua janiya, niaate Jesuucua tiuyajaa.

⁶Timoteocuaajaari tari nijaniyajinijini tiuquiriohuacuaa. Nojuajaari canaa pohuatasuhucuaa, niaanaari Jesuucua tiuyajaa. Niaanaari panitiojuaca quiyajaa. Canaa pohuatasuhucuaajaarihuaj, niaanaari canaa niishiriojoquiaa jyanohua nia paniniutia canaa. Niaanaari canaa niqiniucuaa jiaatia, naatej, taa canaa jiaatia canaa niqiniuria nijaniyacuaani. ⁷Cuarta Pueyaso pueyanaa, seetanujanaa canaari taraatia miishiya niyani. Canaari tacayajuhuj. Naajaa, canaa niishishacari niaanaari seetanujanaa Jesuucua tiuyajaa, canaari canaa jiuujia cajitirucuaani. ⁸Naa canaa tojishacari niaacuajitij, canaari juhua samiitiacorohuani, pa Jiyaniija tojtiajacara nia quiniucuaaja. ⁹Cunora, canaari jyanohua nia shuquiritiaa Pueyaso niqiarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniucuatej, canaari jyanohua shuquiriaatia quiyani. ¹⁰Naajuhuj, canaari juuca, niucua secojoquiaa Pueyasoni, nojuaja cuara canaa tiuquitihua niaacuara. Canaari maninia nia niishitiojonu tucuatani paniyani, seetanujanaa maninia jeenucuaano Pueyaso pueya nia quiniuria.

¹¹Canaari paniyani pa Que Pueyasojanaa, pa Jiyaniija Jesucristonio, nojori cuara canaa naacuara niaacuara canaa tiuquiniuria. ¹²Pa Jiyaniija cuara nia jiyateera socua jyanohua panitiojuaca nia quiniuria, tamasaca panijia nia quiniuriajahuaj, taa canaa pania nijaniyacuaani. ¹³Naa panijia nia jiyatesacari nijaniyatej, niaari nioojia niqijioteyashijia quiniutianiya cutara. Naajuhuj, niaari tojetaarucujanaa sesa miyashijia quiniutianiya, pa Jiyaniija Jesucristo tiuquishacarihua puetunu na jiyanooshano pueyatajanaa.

Taate pa naata Pueyaso shuqiritiniuni

4 ¹Quiarijiani cuarta Pueyaso pueyanaa, pa Jiyaniija Jesu jiyaramiquishano pueya canaa quiniucua, canaa sequesano nia tojiri. Quiarijiani, canaari nia shiniujiani socua maninia mijiaca nia quiniuria. Canaari nia niishitiojoquiaari maninia mijiaca nia quiniuriani, Pueyaso nia shuqiritiniuria. Niaacuajaari naa maninia miya.

²Niaacuajaari canaa rootasano pa Jiyaniija Jesujinijini niishiya tari. ³Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojinijini. Majaari nia numuetucunu nia camishoo maaji. ⁴Puetunu mashiquirijianaa cuara niishiiria maninia na cojuanura necocuarano, maja ritia na numuetucunura, nata na camiayquishacarijia. Cuaara na cuaqueya panishano rejetenu niishiiria. ⁵Majaari sacuaatia nia miiniu taa Pueyaso niishiyashijia pueya miiquiaacuani, jyanohua nojori jiaatiasacari maajicua. ⁶Naajuhuj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuaajaari saa nuyacaraja, maja tamonura socua. Pueyasocuaajaari naa mijiaca saniitionutaniya jyanohua, taa canaa numootequiaari tari nijaniyacujani. ⁷Pueyasoori maja na saquiriojonu quiquiaari pajaniya sacuaatia mijiaca pa quiniuria. Pa saquiriojoquiaari tojetaarucujanaa sesa miyashijia pa quiniuria, saa neraja. ⁸Naacuajitij, cante nio rootasano ruuretajani, nojuajaari

maja saaja na rerequetenu nio rootasanojiniji pohuatana. Nojuajaari Pueyasojuanaa rerequeteya cutara, cante na Sohuanu niqutioquiaari nijaniyacujani.

⁹Quiarrijani cuarta Pueyaso pueyanaa, janiyara, najuhuanaru-hua niaacuara cua naajionura cua niishitiniuria nijaniya, panitioojuaca nia quiniuria. Pueyasocujaari tari nioojajinia nia niishitiquiaari panitioojuaca nia quiniuria. ¹⁰Niaacuajaari seetanujuanaa puetunu Macedonia jiyajinia niarta Pueyaso pueya panijiaa quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaa nia quiri! ¹¹Tama nia cuaqueyajaaja nia cumaquiriquia juhuajaniya quijiaa nia quiniuria. Tama nia poonijosanojiniaaja nia cojeriquia, tama nia juaashiquiatajaaja nia poonijosacari, taa canaa rootaquiaari nijaniyacujani. ¹²Naacuajitij, Pueyaso niishiyashijiaa pueyari nia rerequeteyaquiniutianiya. Naajuhuaaj, niaari puetunu nia panishanojuanaa jitianutaniya.

Taa pa Jiyaniijia tiuquishacariuhua quiniutianiyan

¹³Cuarta Pueyaso pueyanaa, canaari juhuacarijia nia tonu paniyani taa Jesucua tiuujiaa shaajecono pueya miishaanuta-niyani. Canaari nia niishitiniu paniyani maja nia taraajenura juhua Jesucua tiuyashijiaa pueya. Nojoriiri maja na jitianu nojori Jiyano, nojori na samiitianiionuhua. ¹⁴Paacuajaari niishiyani Jesuuri cusoquiaari. Na nuhuaji samiitiquiaariuhua-ri. Naajuhuaaj, paari niishiyani, Pueyasoori Jesucua tiuujiaa shaajecono pueya samiitianiionutaniuhua, nojori na rijionura Jesuta, Jesu tiuquishacariuhua.

¹⁵Canaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapuate pa Jiyaniijia tiuquishacariuhua saminiucua quiniutianiyaajaani, majaari macunucua pa puetanu quiniutianiya pa Jiyaniijiaa pa naacuneetonura jiya cajiniocua. ¹⁶Naa quiniutianiyan. Pa Jiyaniijia nacanuari tojishaanutaniya, Pueyaso seya jiyaniijia nacanujuhuaaj, Pueyaso trompeta jonenenunio. Jiyacaritij, pa Jiyaniijiaajaari jiyocuacaanuji rosenutaniya cohuaja najacajiniara. Jiyacarijihuaaj, puetunujuanaa Jesucua tiuujiaa shaajecono pueyari samiitaconutaniuhua coteenu. ¹⁷Na nuhuaji pajaniya, canapuate saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetonutaniya pa Jiyaniijiaa paratujiniani. Jiyacaritij, paari tari pueyaracaanu nata quijiacarano quiniutianiyan. ¹⁸Cua panishano pueyanaa, nio cua pohuatasana nia cumanijiatoo-riquia.

5 ¹Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianiuhua. Niaacuajaari tari na niishiya, naajuhuaaj, taate mijiria quiniutianiyan na tiuquiyaquishacarijia. ²Niaacuajaari maninia niishiya, pueya jyanishacari juhuanajuaja maja pa Jiyaniijia tiuquiniu quiniutianiuhua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejoja tiuquiquiaa niucua tiajiniaacocuaani, juhuajaniya tia camaru maquesacari. ³Naajuhuaaj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaja maninia quiyani. Shaaquicuaja miaquetojonu”. Canashiyaquiji jiyacari, Pueyaso saniitiosacari na tojiyashijiaaari quiniutianiya. Naa quiniutianiyan taa maaji nooquiaa juhuacatecara canashiyaquiji na manajacuani. Majaari quenaaja niquiriyatu curosaanu quiniutianiya saniitiosoo. ⁴Nijaniya saniniuujia cuarta Pueyaso pueyanaa, niaari maja juhua ninishiqui quijiaa, pa Jiyaniijia cariyatunura nijaniya. ⁵Puetunu nijaniyajanaacuajaari cuhuashiqui quijiaa. Pueyasojuanaacuajaari nioojiaa cuhuataquiaari. Majaari tari juhua ninishiqui quijiaa pueya pa quiniu. ⁶Cunora, pa Jiyaniijia sashijiaa pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij,

maninia niishiriojuacajuhuaaj. ⁷Maquetujuacaari niucua maquetuquiaa. Naajuhuaaj, mashaasequenuujuacaari niucua mashaasequenuuquiaa. Naa miijiaaari Pueyaso tojiyashijiaa. Majaari na maniniucuanu cuhuashiqui. ⁸Pajaniya saniniuujia, paari cuhuashiqui quijiaa cutarani. Naaratej, pueyaracaanu maninia niishiriojuaca pa quirij. Romano pueya miaquetoosa-cari, nojoriiri turtuco cushiyonuujuua, nocuaji na nujutajara cashi. Cumueeca casaa cushiyonuujuajaariuhuaaj, na naca na cojuatajara. Naajuhuaaj, naa poojia pa cojuare, saaja Jesucua pa tiuuniutia, seetanujuanaa panijiaa pa quishacarijuhuaj. Seetanujuanaa pa niishiri, Pueyasoori pa saquiriojuquiaari na muerasu pa quiniuria pueyaracaanura. Naacuajitij, pocua pa niishitija cojuareni, maja poojia pa niqijiotenura najuhuanaj. Naacuajitij, Sesaacaari maja na naata shocotan quiniutianiya pajaniya. ⁹Pueyasoori maja na saquiriojonu quiquiaari pajaniya na saniitiosacoriquiano. Pa saquiriojuquiaari cutaraari na jyanooniuria pajaniya, na muerasu pa quiniuria, Neyanu Jesucristoocua tiuujiaa pa quishacari. ¹⁰Neyanucuajaari pocuara cusoquiaari, nata rishijiaa pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuaaj, pa Jiyaniijia tiuquishacariuhua, puetunu nocua tiuujiaajanaari pueyaracaanu saminio quiniutianiya nata. ¹¹Naaratej, pueyaracaanu nia cumaquitiiojoriquia Pueyaso rupaata. Naa shiniujiutiooriquiajuhuaj, seetanujuanaa pa Jiyaniijia tojiijiaa nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹²Cuarta Pueyaso pueyanaa, canaa nia tojiri. Cuniqiu nia jitianaa tojiijiaa nia quiri. Majaari nojori rerequetenu. Nojoriiri jyanohua poonijioquiaa pa Jiyaniijiaari nojori niishitiojonura nijaniya, na nacasunura nijaniyajuhuaaj. ¹³Cunora, jyanohua nojori nia paniri. Majaari na rerequetenu. Nojoriiri pa Jiyaniijiaari poonijioquiaa na cumaquiniuria nijaniya. Maninia nia quiri pueyanaa. Majaari juayonuujutanu.

¹⁴Nio nia tojirijihuaaj cuarta Pueyaso pueyanaa. Taajecori nia nacasura. Noojia niqijiotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaj, Satanás saniniuujishacari na cuaqueya miiniu panishano rejeteraashijiacatej. Majaari cuno pojori cartenu. Naa juaaniu nia rejeteriquia, maja quenaaja nia juaaniuria tamasaata.

¹⁵Naajuhuaaj, tama nia cuaqueyajaaja nia cojuariquia maja nia maniniuria niarta pueyano, nojuaja jaara sesa miiriquia nijaniya. Saniniuujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuaaj.

¹⁶Pueyaracaanu nia shuquiririquia, Pueyaso pueya nia quiniucua. ¹⁷Naajuhuaaj, pueyaracaanu nia secojoriquia Pueyaso. ¹⁸Naa jaara maninia miishaare, niaa jaara sesa miishaarejuhuaj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo Sohuanu pa jitianuucua poojiajinia. ¹⁹Majaari Pueyaso Sohuanu nia ruuretanu, nojuaja jaara nioojajinia nia shiniujiya maninia nia miiniuria. ²⁰Naajuhuaaj, majaari nia soonu Pueyaso sequesano caminiujunaa pohuatasano. ²¹Coteenu nia saniniuujuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojiijiaa nia quiri. ²²Puetunu sesa niishishano casaajanaa soojeaca nia quiri.

²³Poojia cajitinia Pueyasojuanaa cuara nia jenenucuaa-ri juhuacarijia, tojetaarucujanaa sesa miyashijiaa nia quiniuria pa Jiyaniijiaacuaji. Nojuaja cuara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuara tiuquiriohuajaatijia. ²⁴Cante nia saquiriojuquiaaricuaaja na pueya nia quiniuriani,

nojuajaari puetunu shusha cua sequesanojuanaa
niajaniya miiniutianiya niaara. Nojuajaari maja na
niishiniu na rupaa jatanu. Nojuaja cutaraari na
sequesano miijia pueyaracaanu.

Pablo sequesano na naajionee na tucuatasaari

²⁵Cuarta Pueyaso pueyanaa, Pueyaso nia secojonuuriquia
canaacuarajuhuj.

²⁶Canaara nia saruhuatate cuniqui quiniaa parta Pueyaso
pueyajuhua nojori nia nujuunuta, seetanujuanaa Pueyaso
paniniutia.

²⁷Pa Jiyaniijia jiyaramiquishano cua quiniucua, cua tojitiare
pueyanaa. Nio cua naajionee nia serojore puetunu Pueyaso
pueyarajanaa.

²⁸Pa Jiyaniijia Jesucristo cuaara cumaquiiria nioojia. Cuaara
naa quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujiaca

1 ¹Janiyari Pabloni. Silvano, Timoteonio, canaari nio naajia niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapueete pa Que Pueyaso rupuejacacuajani, pa Jiyaniijia Jesucristo rupuejacanio. ²Pa Que Pueyaso, pa Jiyaniijia Jesucristojuhuj, nojori cuaara nioojia cumaquiiria. Cuaara nia jiyateera juhuajaniya quijiacarajuhuj.

**Pueyasoori na tojtianu paniyashijiaca
saniitioriquiano Jesucristo tiuquishacariuhua**

³Cuarta Pueyaso pueyanaa, canaari jiyanoehua nia timitiaani jiyanoehua Pueyasooocua tiuujiaca nia quiniuucua socua, panitioojuaca nia quiniuucua socuajuhuj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴Naa maninia nia quiniuucuatej, canaari shuquiriaatia poojotaquiaa niajanijini Pueyaso pueya maapue niqiuara tamaquicua canaa rucuanesacarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujuhuaj, Pueyasooocua tiuujiaca nia quiniuucua. ⁵Pueyaso saquiriojonuucua niajanija pueyaracaanu shuquiriaatia quijia nia quiniuria na shuriucua, cunoori maja najuhuaa quiquiaari. Niaacuajaari seetanujuanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijiaca pueyari naa naquiya miiquiaa niajanijatej, Jesucristoocua tiuujiaca nia quiniuucua.

⁶Naajaa, Pueyasocuaajaari tojetaarucajanaa sesa miyashijia. Nojuajaari niaacua naminiutianiya noo pojori, naquiya miitiajaca niajanijatej. ⁷Niajanija saniniuuja, naquiya miijosaaquiarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacaritij, nojuajaari niqushaanutaniya mani rimianuqueyano tiuquithuano, jiyanoehua cumaacaraca na seyata jiyocuaaanuji. ⁸Tiuquiniutianihuara na saniitionura noo pojori, canapueete Pueyaso niishiniu paniyaquiquiaani, noo pojoriujuhuaj, pa Jiyaniijia Jesu rupaa ruuretatacatej. ⁹Puetunu cuno pojoriijanaari pueyaracaanu saniitiosocoriquiano jiyatesaanutaniya. Nojoriiri tucuaaanura quejoosaanutaniya pa Jiyaniijia shuriucuaaji. Naacuajitij, majaari nojori niquniu quiniutianiya na jiquioco, shacantuuca na cumaacanio, nojuaja jaara mijiria tiuquiriohua pa shuquiritianura nojuaja. ¹⁰Jiyacaritij, puetunu na jeenucasano pueyajanaari jiyanoehua na timitianutaniya. Puetunu nocua tiuujiaca pueyajanaari jiyanoehua jiuujiateconutaniya, pa Jiyaniijia na shootiatusacari. Niaari na niqiniutianiyajuhuj, nojuajini nio pohuatasanoocua nia tiuuniuucua.

¹¹Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririqiniuria na saquiriojonuucua niajanija. Canaari niaacuara secojoquiaaanihuaj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniiriahuaj puetunu nia miishanojuanaa, cunoo, Pueyasooocua nia tiuuniutia nia poonijiosanoni. ¹²Naacuajitij, pa Jiyaniijia Jesuuri socua

timitiasaanutaniya naa nia miiniuucua maniatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari niajanija.

**Maatia pohuatasano, taate mijiria quiniutianiyani,
pa Jiyaniijia tiuquishacariuhua**

2 ¹Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujini, taa pa coquetonutaniya natajanihuaj. ²Canaa sequesano niajanija nia tojiri, pueyanaa. Majaari nia niyajetanu tariucuaaanu canaa niishitiosano niajanija, nia jiyajeneyaquiniuucuaaji tamasaca sapojosacari niajanija. Majaari nia shirriqiniu tamasaca jaara sequere niajanija: “Pueyaso Sohuanuuri cua niishitiri, pa Jiyaniijia tiuquishacariiri quiarijia”. Tamasa jaara naa nia pohuatare, majaari na sequesano tojiniu. Naajuhuj, tamasa jaara naajionuure tamajaaja, niaara na jiyatesocoriquiano juhua canaa naajione, majaari nojori tojiniu. Nojoricuajaari nia sapojia. ³Pueyanaa, majaari niaacua nojori nia shanacunu nojori sapojonura niajanija. Naa niishiri, pa Jiyaniijia tiuquiyaquishacariuhua, queraatia pueyari Pueyasooocuaaji pishiniutianiya. Jiyacarijuhuaj, Pueyaso rootasano Ruuretatajanaari supenutaniya. Nojuacuajaari tariucua Pueyaso saniitiosocoriquiano na riuriotaca. ⁴Nojuacuajaari Pueyaso paraca. Nojuajaari puetunu pueyajanaa tenjunutaniya maja nojori tojiniuria Pueyaso, pueya shipinijiosano nojori pueyasohuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijiajanaa cajitijinia. Jiyacari sequenutaniyari: “Janiyacuaajaari Pueyasoni”.

⁵Pueyanaa, imajateeri nio nia niishiniucuaaja? Janiyacuajaari nojuajini nia poojotajani niaata cua quishacari. ⁶Niaa naasucuaari niishiyacuaja canteeri juhua na quiaajaani, maja juhuanojuaja mijiria na miiniuria tama na panishanojuaja, Pueyaso paniyaquishacarija. ⁷Seetanujuanaa, Sesaaca cumaacaari tari mijiria poonijia jiyasohuaja. Naajaa, Pueyaso paracaari juhuanojuaja maja na naata muetanu, pueya niishiniuria nojuaja, na tenujuna cuaara niqijiji rishaarejati-jiaj. ⁸Na tenujuna jaara rishaare niqijiji, jiyacaritij cuno sesaaca sequeeri muetanutaniya, jiyanoehua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na noonutia, na shaajanura puetunujuanaa. ⁹Cuno sesa miijia sequeeri muetanutaniya Satanás cumaquishacari nojuaja. Naacuajitij, nojuajaari jiyanoehua cumaaca jiiitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaarihuaj, pueya na sapojonura. ¹⁰Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapueete saniitiosocoriquiano pueyacuaajani. Nojoriiri sapojosaanutaniya, Pueyaso Rupaa ruuretataca nojori quiniuucua. Nojoriiri maja na tojiniu paniniu quiquiaari seetanu rupajanaa, Pueyaso jiyanooniuria nojori. ¹¹Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuuucua. ¹²Naacuajitij,

puetunu noo pojorijianaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucujaca nojori quiniuucua.

Pueyaso muerasuranoori tariucuaaanujiniji saquiriojosano

¹³Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaaja, na Sohuanu jataniniuucua niajaniya quiarinio pueya nia quiniuria, seetanu rupaacuajanaa nia tiuuniuucua. Cunora, canaari pueyaracaanu Pueyaso sequequiaa niaacuarani, “paacarasho”. ¹⁴Canaa pohuatasacari Pueyaso rupaa nia niquiara, niaari Jesucristoocua tiuquuaari. Naacuajitij, Pueyasoori nia jiyatequiaari na pueya nia quiniuria, shacantuca quijiacara nia jatanishaanura, taa pa Jiyaniijia Jesucristo quiyacuuaani.

¹⁵Naaratej cuarta Pueyaso pueyanaa, majaari nioojia nia niqijiotenu Pueyasooquaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano niajanijuhuj. ¹⁶Jiyanoojia pa Jiyaniijia Jesucristo quiniuucua, pa Que Pueyasojuhuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanojia maninia miishaanutaniya pueyaracaanuni. ¹⁷Naajuhuj, nojori cuuara nioojia shiniujiiria, maninia nojori tojtiaajaca nia quiniuria pueyaracaanu. Nojori cuuara cumaquiiria niajaniya, tojetaarucujanaa maninia nia sequesano quiniuria, nia miishanonio.

Pueyaso rupaa pohuataacuara pa secojore

3 ¹Pueyanaa, socua nia sequerohuacuaraj. Canacuara nia secojore, pa Jiyaniijia rupaa paaquetesaanura puetunu tiquiyocujanaa. Nia secojorejuhuj, cuno rupaa pueya tojishacari, nojori jatanishaanura, naatej, taa na jataniquiaari niajanijacuuaani. ²Canaacuara nia secojorejuhuj, Pueyaso cojuanura canaa na tojiyashijia pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasooocua. Cuno pojoricuajaa-ri canaa paracaajia. ³Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niqijiotenura nocuaji. Sesaacuajia nia cojuanutaniyaariuhuj. ⁴Pa Jiyaniijiacua canaa tiuushacari, majaari canaa taacanunu niaa naasucuaari canaa rootasano tojtiaaquiniutianiya. Maja. Niaa naasucuaari na tojtiaacuaja. ⁵Pa Jiyaniijia cuuara niishitiiria nioojiajinia, panijia nia quiniuria taa Pueyaso paniyacuuaani. Naajuhuj, cuuara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

Poonijiojuaca pa quiri

⁶Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupeenu: taajecoritij, noo pojorijuhuj, canaa rootasano tojiyashijiacatej. ⁷Niaacuajaari niishiya taa quijiaca canaa quiquiaari niaata canaa quishacari. Naa quijiaca nia quiirijuhuj. Majaari canaa taajeyaca canaa matanu quiijiani. ⁸Majaari najuhuaa canaa miaquenu quiija nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitianura, maja quenaaja canaa taajetenura niajaniya, maja nia tacaatianura canaajuhuj. ⁹Pueyaso jiyaramiquishano pueya canaa quiniuucua, canaa naata quiquiaaricuaajaari canaa panishano canaa mashiniquiniuria niajanijiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura niajaniya, poonijionuujuaca nia quiniuria juhua canaajuhuj. ¹⁰Canaa quishacari niaata jiyacarijuhuj, canaari nio nia niishitiojiaarini: “Cante poonijionu paniyaquiyani, cuuara miaqueteshiyaquiirajuhuj”. ¹¹Canaari pohuataaarucuaajaaniuhuj, noojiaqueya niajanijinijio- naari juhujaniya quiquiaa. Majanaari na poonijionuunu quiquiaa. Nojoriniari noo pojori cushitiojiaa, poonijionuujuaca cutaratej. ¹²Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuuara poonijionuura, nojori panishano nojori jiitianura.

¹³Cuarta Pueyaso pueyanaa, teyano niajanijinijiniote maninia miijiacacuuaani, majaari maninia miiniu nia tarinitianu. ¹⁴Saniniuujia, cante nio naajioneecajinia canaa sequesano tojiniu paniyaquiyani, nojuaja nia niishiri cantenonjoni. Majaari na rupeunenonjoni, na caririquiniuria quenaaja. ¹⁵Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatascari

¹⁶Poojia cajitijia pa Jiyaniijiani, nojuajanaa cuuara nioojia cajitiria pueyaracaanu, naajaa, niaa jaara taa miishaariquia. Pa Jiyaniijia cuuara pueyaracaanu jiitiaara puetunu niajanijajanaa.

¹⁷Janiyari Pablóni. Cua saruhuanura niajaniya, janiyari tama cua juaashiquiatatajaaja nio naajiyani. Nia niquiri cua naajiosano, taamuecatenonjoni. Janiyari naa puetunu cua naajioneecajanaa tucuatacuuaani, cua sesa cua naajionuta. ¹⁸Pa Jiyaniijia Jesucristo cuuara cumaquiiria puetunu niajanijajanaa. Cuaara naa quiiriatej.

COTEENU PABLO NAAJIONEE TIMOTEOCUARA

Pablo saruhuatascari Timoteo

1 ¹Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ²Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niqiuara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhua, nojori cuara cumaquiiria quiajaniya. Nojori cuara quioocua taraajeerajuhua. Nojori cuara pueyaracaanu quioojia cajitiirajuhua.

Pablo sequesacari sesa niishitiojonuujuaa cuara sanaajasaaria

³Janiya jaara Macedonia jiyajiniara quiaquiaarini, janiyacuaajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhua tamaatia niishitiojonuya pueyani. ⁴Janiyari quia sequequiaarijuhua, nojori quia sequenura, maja nojori niishiriojonura najuhua nojori supuetanaa pohuatanuusanoinia. Janiyari quia sequequiaarijuhua, maja nojori niishiriojonura nojori supuetanaa sesacajinia, cuno, najuhua tucuyocuara naajionuutasanoni. Pueya niishiriojonuusacari pueyaracaanu cuno najuhua casaajinia, nojoriiri cunoocua juayonuujataquiaa saaja. Saniniuujia, nojori cuara Pueyaso rupaacua niishiriojoora cutara. Nocua pa tiuushacari, paari cumaquiishaanutaniyani Pueyasora pa poonijionura maninia.

⁵Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuara shitimia panitiojuaca quiiria, juhua jeequesano nojori jiuujia quishacari. Seetanujuanaa Pueyasocua nojori tiuushacari, nojori cuara panitioora maja noojia macuhajenuta sesa nojori miishanojiniji. ⁶Noojiaqueya cuno pojoriinijinioori tari tarinitiacanu tojiniu nio maninia niishitiojosano. Nojoriiri cushitiiquianu na pocojonuucua, na nacojonuucua najuhua tama nojori niishishanojinijiaaja. ⁷Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniujiushacari pueya, pueya tojiniuria najuhua capa nojori niishitiojosano.

⁸Paacuaajaari niishiyani, Pueyaso rootasano Moisésni, cunoori maniniacuaaja, paa jaara niishirini casaara naa Pueyaso rootaquiaari pa supuetanaani. ⁹Paacuaajaari niishiyani, Moisés Rootasanoori maja na pueretenu maninia miijiacua pueya cutara. Pueyasoori maja na rootasano na niishitini quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso soojearajuhua, sesa miijiacarano. Moisés Rootasanoori Pueyaso rerequetejacara, Pueyaso casa rerequetejacarajuhua, noo pojoriirajuhua, tama na que tacartaja monutej, na nucuanio, pueya puecojuacarajuhua. ¹⁰Moisés Rootasanoori na camishoo maajipohua numuetucunuujucara, maajishuriuhua, na numuetucunuujucarano. Moisés Rootasanoori pueya nohuasenuujucara juhua casami na niqitiojosocoriquiano tamasa seyara; sapojonuujucarajuhua; na sapojonuta na

sequesano maatejaccarano, nocua na tiuushaanura; puetunu noo pojoriirajanaano, maninia niishitiojosano tojiyashijiacatej. ¹¹Cuno maninia niishitiojosanoni, cunocuaajaari cua pohuatasano Jesucristo rupaajiniiji, pueya jatanura Pueyaso pueyara. Pueyasoori jiyanoohua maninia, cuno rupaa pohuatanara na jiyatenuucua janiya.

Pablo shuquiritiasacari Pueyaso, na rupaa pohuatanara na jiyatenuucua nojuaja

¹²Pa Jiyaniijia Jesucristoori cucua tiuquiaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiiaa. Cunora, janiyari na sequequiaani, “paacarasho”. ¹³Tariucuaaanu, janiyari nocua rimiaaqueja quiquiaari sacuaratiani. Janiyari naquiya na miiquiaarijuhua, nocua tiuujia cua miitiasacari. Janiyari jiyanoohua na paracaajia quiquiaarijuhua. Naajaa, Jesucristoori saaja cucua taraajequiaarini cua niishyaquiniuucua casaa cua miiriquiaani, nocua tiuyashijia cua quishacarijia. ¹⁴Naa cucua na taraajenuucuatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniuriajuhuaj.

¹⁵Timoteonaa, noori seetanujuanaa. Puetunu pueyajanaa cuara niishiiria nio. Cua tojiri. Jesucristoori mijiria niqiaari na Que Pueyaso na jiyanoootiniuria sesa miijiacua. Janiyacuajaari tojetaarucuajanaa cuno sesa miijiacua pueyajiniijinio na jiyanooshanoni. ¹⁶Janiyari naa jiyanooshaaquiiaarini puetunu pueyajanaa niishiniuria taa jiyanoohua jiyanoootiote Jesucristoni, pueyaracaanu na rejeretanuucua cua juaani. Naa Jesucristo jiyanooniucua cucua janiya, sesa miijia cua quishacarijiatej, Jesucristoocua tiuujiacarano cuara niishiiria, nojoriiri na naata jiyanooshaanujuhua Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj. ¹⁷Naa jiyanoootio pa Jiyaniijia quiniucuatej, nojuaja pa timitijare pueyaracaanu. Nojuajaari Jiyaniijiajuhuanajaj. Nojuajaari Pueyasocuaaja, shaajeyashijia, namijiata niquiyaquishoo. ¡Jiyanoohua maniniaari pa Jiyaniijia! ¡Naa seetanujuanaari!

¹⁸Timoteonaa, quiaacuajaari niishiya taa Pueyaso cumaquiiaari quiajanuucuaajani, nera quia poonijionura. Cunoori quiquiaari Pueyaso pueya jitianaa jaara caminiujuquiaari Pueyaso sequenu panishano quiara, nera poonijiona quia quiniuria. Naacuajitij quiyanunaa, cua tojiri. Pueyaso cumaaca quia jiiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojijia quia quishacarijuhuaj. Naa quijia quia quiritij, quioojia mariqui quia macuhajareeri quiaa jaara sesa miiriquia. Noojiaqueya pueyari tari Pueyasocua tiuuniu tarinitiacanu nojori ruoretanuucua Pueyaso Sohanu numootesacari nojori jiuujiajinia, sesa nojori miishacari. ²⁰Naa miituuquianuuri Himeneo, Alejandronio. Janiyari cunora Pueyaso secojorucuaani, Pueyaso cuara nojori tarinitiaara Satanásra, Satanás miiniuria naquiya nojori. Naacuajitij, nojori cuara niishiiria maja socua sacuaratia nojori rimiaaquenura Pueyasocua.

Secojonuunura niishitiojosano

2 ¹Cua tojiri Timoteonaa, niaa jaara Pueyaso secojonuuri- quia, nia secojonuure puetunu pueyacuarajanaa. Nia panishano casaacuara nia secojori quiajuhuaj. Naajuhuj, Pueyaso nia sequeriquia “paacarasho”, pueyaracaanu maninia na miiniucua. ²Jiya jiyaniijianucuaacuara nia secojonuuri- quiajuhuaj, puetunu pueya camarucuaacuarajuhuj. Nojoriicuara nia secojonuuri quia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta pueyatajuhuaj. ³Pa Jiyanoojia Pueyasoori naa paniquiaa pa secojonuratej. Naa pa secojosano maniniucua- quiaari. ⁴Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijiaca nojori quiniurajuhuj. ⁵Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quia Pueyaso Jiyanootijia pueya. Nojuajaari Jesucristocua. ⁶Puetunu pueyajanaa quishacari saniitosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuajitij, na Que Pueyasoori na naata jiyanooni pajiya saniniujia. Quiarijiacuajaari Pueyaso panishacari Neyanujiniji pohuataaanura pueya niquiara, nojori jiyanooshaanura. ⁷Nio rupaa cua pohuatanurajuhuj, Pueyasojuanaari cua jiyatequiaari Jesucristojiniji pohuataa na quiniuria. Cua jiyaramiquiaari taucuaa cua niishitiniuria Jesucristo nojori tiuuniuria, seetanu rupaajanaa nojori niishiniurajuhuj. Nio cua sequesanoori seetanujanaa. Majaari cua sapojonu.

⁸Cunora, cua tojiri. Janiyari paniyani puetunu tiquiyocua- janaa pueya secojonuunura Pueyaso. Jiyocuaanu nojori shiitiosacari nojori juaashiquia nojori secojonura, nojori jiuujia cuaara quiiria jeequesano sesa nojori miishanojiniji. Naajuhuj, cuaara quiaquiiria najiquitishano, maja sesa niishiriojonutaju- huaj. ⁹Naajuhuj, janiyari paniyani maajipohua cuaara cushiyaquiiria puera maniniquiya toqueya, narta maajipohua na shocotanura. Cuaara cushiyaquiiria cararaatia niquishano toqueyajujuaj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiiria nojori seetanujanaa shanohua niquishano, nojori muecaca jeeacasano quishacari puera, nojori cushishacari orojiniji shipinishano casaanio. ¿Maajitij seetanujanaa shanohua niquishano maaji, na cushitianucua queraatia cumaneecata masesano noturu shipinijosano sai tiujiau, queraatia cumaneecata masesano maniniquiya toqueyano? Maja. ¹⁰Nojori cuaara maniniucua- saariquia cutara, maninia miijiaca maajipohua nojori quiniucua. Nojori cuaara quiiria juhua noo maajipohua, canapuetucua tama nojori cuaqueyajaaja jiyatecanu Pueyasora na quiniuria seetanujanaa. ¹¹Pueyaso rupaa niishitiojosacari, maajipohua cuaara tojitiariquia sanaa, maja Pueyaso rupaa pohuataanaa na rejetenuta. ¹²Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuj, majaari cua shanacunu maajipohua jiyatesaanura narta Pueyaso pueya jitianana na quiniuria. Nojori cuaara sanaa tojitiariquia cutara, narta Pueyaso pueya rerejosacari. ¹³Quia niishiri Timoteonaa, casaara naa cua sequeyani. Pueyasocuaari coteenu Adán shipiniquiaari. Na nuhuaji Adán niqiorano Eva shipiniquiaari. ¹⁴Quia niishirijuhuj, Soconurano* jaara sapojuquiaari Evatej, majaari na sapojonu quiquiaari neyaca Adán. Eva cutaraari sapojosaquiaari. Naacuajitij, na sapojosaanuucua, Evaari Pueyaso tojiyashijara quiquiaari. ¹⁵Naaratej, maajipohua cuaara maninia canashitijioora necohua. Cuaara panijia quiirajuhuj. Cuaara maninia miijiaca quiirajuhuj, maninia niishiriojuuca nojori quishacari. Naa maajipohua miishacari, Pueyasoori nojori jitianutaniya maninia, Jesucristocua tiuujia nojori quishacari.

Pueyaso pueya jitianatucua taamueca pueyano quiriqiani

3 ¹Nio sequesanoori seetanujanaa: cante Pueyaso pueya jitianana quiniu paniyani, nojuajaari maninia poonijosano miiniucua jiaatia. ²Naaratej, cante Pueyaso pueya jitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niqijioteyashijia, maninia niishiriojuujuhuj, pueya rerequeteyashoonio. Cuaara quiiria maninia pueyano, rucojuuca pueya tiuquinitiaja na tijinia. Cuaara quiiria Pueyaso rupaa niishitiojuuca maninia. ³Naajuhuj, nojuaja cuaara quiaquiiria mashaasequejoru. Cuaara quiaquiiria ritia juaajia, pueya na piniuria. Cuaara quiiria pueya riuhaneyashijia, pueya juaashacari nojuaja. Cuaara quiiria shiniquajuhuj. Cuaara cumaneecaacua jiaatiaashijia quiirajuhuj. ⁴Naajuhuj, nojuaja cuaara na tijinia quiniaa jitiaja quiiria maninia. Cuaara necohua niishitiojuuca quiiria maninijuhuj, tojitiacua nojori quiniuria, pueya rerequeteyashijiacano. ⁵Naacuajitij, pueyano jaara maninia casaa necohua niishitiojijashijia quiri quia, ¿maatucua taa maninia jitiariquia Pueyaso pueya maanuni? ⁶Naajuhuj, Pueyaso pueya maanu jitiariquiano cuaara quiiria seetanujanaa Pueyaso tojijia pueyano cutara. Cuaara quiaquiiria shusha Pueyasocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás* miiquiaaricuaani. Pueyaso panishano seru Satanás quishacari, nojuacuajaari taanuusaquiaari Pueyaso shuriucua, na jiyanihacari nojuaja na naata na Jiyaniijia Pueyaso shocotanu. ⁷Naajuhuj, Pueyaso pueya maanu jitiariquiano cuaara quiiria maninia miijia pueyano, Jesucristo tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiritij, nojuajaari juhua Sesaaca norrijosano quiniutianiya. Naacuajitij, pueya tojiyaquishano quiniutianiya.

Narta Pueyaso pueya naacunaatucua taamueca pueya quiriqiani

⁸Naajuhuj, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano miijiaca. Cuaara quiaquiiria puera mashaca jereeca ratunuucua jitiinio. Cuaara quiiria cumaneecaacua jiaatiaashijia, jiyasohua na nohuasejonura, na sapojonuta na masenuranio. ⁹Naajuhuj, nojori cuaara seetanujanaa Pueyaso rupaa tojiijia quiiria, teyanocua tiuujia pa quiyacuajani. Naacuajitij, nojori jaara naa miijiaca quiritij, ¿nojoritucua casaacua cararosaariquiani? ¹⁰Cunora, pueya cuaara senota jiyateyashijia Pueyaso pueya naacuna nojori quiniuria. Cuaara coteenu maninia niishishiiria nojori seetanujanaa Pueyaso tojitiacua. Nojori jaara maninia miijiaca pueya quiri, na nuhuaji cutara, nojori cuaara jiyatesaaria narta Pueyaso pueya naacuna nojori quiniuria. ¹¹Naajuhuj, Pueyaso pueya naacuna niquicohua cuaara quiiria tojishano maajipohua, maja rimiaacatuji. Cuaara quiiria niishiriojuuca, na sequesano miijiaca pueyaracaanunio. ¹²Cante Pueyaso pueya naacuna, nojori cuaara jitiaara saa niquiriyatu niquicua. Cuaara quiiria necohua niishitiojuuca maninia casaa, na tojitiacua necohua quiniuria. Naajuhuj, cuaara quiiria maninia jitiaja na tijinia quiniaa pueya. ¹³Naacuajitij, Pueyaso pueya naacuna jaara maninia poonijioquia na naacusacari narta Pueyaso pueya, nojori seetanujanaa pueya tojishano pueya quiniutianiya. Naajuhuj, nojori socua jiyanoohua Jesucristocua tiuujiacara jatanutaniya, na puereyaquiniutia nojori poonijionura pa Jiyaniijara.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵Timoteonaa, janiyari quiocua naquerejiyani. Naajaa, janiyari quiara naajiyani nioni. Naacuajitij, janiya jaara tarishirini, janiyari paniyani juhuacarajia quia niishiniuria taa quijia quia quiniutianiya, Pueyaso pueya maanujinia quia

quishacari. Pueyaso pueya maanucuaajaari pueyaracaanu rishijia Pueyaso quiquio. Na saquiriojosano pueya nojori quiniuucua, nojoriiri na rupaa jiitianaacuaja, nocuaji tacunaajaariuhuj. ¹⁶Seetanujanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiujujacani:

Pueyaso Niyanuuri pueyanora jataquiaari, na rupuenura pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhuj, Pueyaso seyacuajaari Jesu niiquiaari na samitiasacarihua. Nojuajiniiri pohuatasaaquiaari Judiocuaca niquiara, taucuaca niquiarajuhuj. Pueyapueeri nocua tiuquiaari. Na Queeri na tacaniquiaarihua Jiyaniijajanaa na quiniuria.

Pueyaso Rupaa carteriquiano pueyajiniji pohuatasano

4 ¹Pueyaso Sohuanuuri maatia pa niishitiquiaa, nio pa quishacari nuhuj noojiaqueya pueyari Pueyaso rupaa tarinitianutaniya tojiniu, tamaatia niishitiojosano nojori tojiniuucua. Nojoriiri seetanujanaa sapojosaanutaniya naa nojori tojiniuucua samaruhua niishishano. ²Nojoriiri sapojonuujaca pueya tojtiajacara quiniutianiya, noo pojori, sapuenu juhua maninia niquishano pueyatej. Cuno sapojonuujacaari tariucua sesa miiniuucua jiitiquiono. Majaari tari na niishitiuniu caririquiniu. ³Cuno pojoriiri pueya niishitiojua maja na caminiuria. Niishitiojonuuquiaajaariuhuj maja pueya miaquenura noojiaqueya miaquesanojuhuaj, teyanu Pueyaso shipiniquiaari Jesuucua tiujujacaracujani, cante seetanu rupaajanaa niishijiacacujani. Cuno miaquesano-cuajaari pa timitiasocoriquiano, Pueyaso pa sequenura, “paacarasho”. ⁴Puetunu Pueyaso shipinishano casaajanaari maninia. Puetunu miaquesano casaajanaa cuara puereyaquishaaria miaquenu, paa jaara coteenu nocuara Pueyaso sequereni, “paacarasho”. ⁵Pueyaso rupaacua tiujujaca pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijona pueyanotucua taamueca pueyano quiriqiani

⁶Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojaaja rootasanotanio, taa quia tojiquiaacuajanoj. Quiaa jaara naa mijia quiritij, quiaari maninia poonijona quiniutianiya Jesucristora.

⁷Majaari najuhuana tariucuaaanu supuetanaa pohuatanuusa-no tojjia quia quiniu, najuhuana tama pueya niishishanojuaajano. Majaari cuno tojiniuucua quia cojenu najuhanaj. Jiyanhua quia jiaatiare cutara, saaja Pueyaso tojjia quia quiniuria. Naa miiniu quia saniniujuri jiyanhua, seetanujanaa Pueyaso panijia quia quiniuria. ⁸Pueyari queraatia casa miiniu niishiya, cumueeca pueya nojori quiniuria. Supuetanaari pueyaracaanu nanojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniujia, socua jiyanhua maninia cutaraari Pueyaso panijia pa quiniuria seetanujanaa. Cunoori jiyanhua maninia, mijiria pa quishacariria, Pueyaso shuriucua pa quishacaririjuhuj. ⁹Nio cua sequesanoori seetanujanaa. Puetunu pueyajanaa cuara na tojiiria. ¹⁰Cunora, pueya jaara pa miitariquia, naajaa, paari jiyanhua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocua tiuyani. Nojuacuajaari puetunu pueyacuaji Tacunajanaa, canapue cutarate nocua tiujujacacujani.

¹¹Nio cua sequesano quiajaniya quia niishitiojore pueya. Nojori quia nacasuriquia jiyanhua, na tojtianura quiajaniya.

¹²Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhuj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuj, seetanujanaa panijia quia quiri, Pueyaso rupaacua tiujujajuhuj. Majaari rucuajeejojua quia quiniu. Naa maninia mijia quia quiri, pueya jiaatianura quiocua. ¹³Naacuajitij, cua tiuquiyaquishacarijia quiocua, pueya niquiara maatia quia serojoriquia Pueyaso Rupaa. Parta Pueyaso pueya quia nacasuriquia jiyanhua, Pueyaso tojtiajacara nojori quiniuhua seetanujanaa. Seetanujanaa nojori quia niishitiojoriquia maninia. ¹⁴Pueyasocuaajaari na cumaaca niquitioquiaari quiajaniya. Pueyaso Sohuanucuaajaari naa pohuatequiaari Pueyaso pueya maanu jiitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijona quia quiniuria. Cuno cumaaca quiaa na jiitiaani, quia poonijotere pueyaracaanu. Majaari najuhuana na jiitianu.

¹⁵Puetunu niya cua rootasanojuanaa quiajaniyani, cuno tojjia quia quiriquia. Naa quia quiritij, puetunu pueyajanaa niquiniuria taa seetanujanaa socua maninia Pueyaso tojjijara quia quiyareeni. ¹⁶Naacuajitij, tama quioojiaaja quia cojuare. Naajuhuj, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia mijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajacara pueyari Pueyaso pueyara quiniutianijuhuj.

Paatucua taa jiitariquia parta Pueyaso pueyani

5 ¹Majaari quia saaquiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquori quia nacasure jacarijuhuj, juhua quia tapueyocua. ²Naajuhuj, motajoori quia nacasure juhua quia nucua. Niyacoojori quia nacasure juhua quia rimiatuhujuhuj, maja nojoriicua quia jiaatianuta.

³Mashiquiopue jaara tojetaarucujanaa niquiohuaju quiri, jinianuhujunio, Pueyaso pueya cuara nojori naacuara. ⁴Saniniujia, mashiquio jaara niquiohuaraca quiriquia, jinianuhuaraca soj, cuno pojori cuara coteenu tama na nucuaajaaja cojuatunu niishiiria, na jijuhuj. Naacuajitij, necohua cuara na queya cojuara, taa na queya cojuaquiaari nojoricuaani, naatujoori nojori quishacari. Pueyasoori naa na queyaca taraajejaca timitaja. ⁵Noo mashiquio, cante seetanujanaa jiyopueejuni, nojuajaari saaja Pueyasocua tiuquiaa. Majaari na tarinitianu secojonu juuca, niucuanio. ⁶Noo mashiquio saniniujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarijia. ⁷Parta Pueyaso pueya quia niishitiojore nio cua rootasanojuhuaj, sesacasoo nojori quiniuria. ⁸Canapue na queecua, na nucuaacua taraajeyaquijiani, tama na tiajinia quijia pueyacuajuhuj, naa mijiacatej, nojoriiri Pueyaso Rupaa tojiyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucujanaa sesa, Pueyasocua tiuyaquijia pueyajiniji.

⁹Mashiquio jaara Pueyaso pueya jiitianaa naacunara jiyatenu panishaare, cuno mashiquiopue cuara quiri tariucua sesenta marijia shocotejono. Cuaara quiri nio mashiquio, cante saaja na camishano pueyanota quiquiaari maninia pueyaracaanuni. ¹⁰Cuno mashiquio cuara niishishano maaji quiri, maninia mijia na quiniuucua. Cuaara quirijuhuj, cante maninia canashitioquiaari necohuani. Cuaara rucuojuacaacua taraajeja quirijuhuj, na tiajinia na maquiojojua. Cuaara maninia mijia quirijuhuj, narta Pueyaso pueya niohuaca jeequejojua. Cuaara taraatia miishano pueyaca taraajeja quirijuhuj, nojori cumanijianajuhuj. Cuaara puetunu maninia na miiniujianaa tarinitiaquijia quirijuhuj.

¹¹Saniniuujia, noo mashiquio, teyanote juhuanajuaja maja na shocotejonu sesenta marijiani, nojori cuaara jiyateyaquishaaria Pueyaso pueya jiitianaa naacunaara. Nojori na naata Cristo samiritianu, niyacaaniucua nojori jiaatiasacari. ¹²Naacuajitij, nojori camishacariuhua, nojoriiri tari sesa miirri, nojori jatanuucua nojori sequesano saaja Jesucristora na poonijionura. ¹³Naajuhujaj, niyacoo naata mashiquio nojori quishacarijia, nojoriiri saaja rucuanenon maniniucuaaja, na tiuquijionura puetunu tiacojuanaa. Naa tama na poonijosanojuaja na jiitiaaquishacarijij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujuuniu tamasararaj. Naajuhujaj, sacuaratia neteyocojiyari juhua paateca, na taajetenura pueya, na caminiujuishacari jiyasohuaja niishishano casaa. ¹⁴Naaratej, janiyari cunora paniyani niyacojori naata mashiquiopue cuaara camiyora neyacaara. Cuaara mueturajuhujaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. ¹⁵Noojiaqueya niyacojori naata mashiquiopueeri Pueyaso tojinu tarinitiacanu tari, Satanás tojjijia nojori quiniuria saniniuujia.

¹⁶Pa Jiyaniijaacua tiuujia maajipohuajinijinio jaara tama na pueyajinijiniojuaja jiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucujanaa jiyopueejuni.

¹⁷Pueyaso pueya jiitianaa, noo pojori canapuate maninia jiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhujaj, nojori cuaara nareja niqitiosaaria, na panishano nojori jiitianaa. Pueyaso pueya maanu jiitianaajinijinio, canapuate Pueyaso rupaa pohuatanaa-cuajani, Pueyaso rupaa niishitiojonaanio, nojori cutara cuaara socua queraatia niqitiosaaria, maninia poonijosano nojori miiniucua. ¹⁸Tariucuaaanu Pueyaso Rupaajinia naajiotasanoori naa niishitiojiyajuhujaj, naa na sequesacari miriqui:

“Majaari quia juunu rupaa mishiquionu na miaqueyaqui-niuria quia casaa, quia rapijotesacari quia natau, na jocuanura na sucujiniiji”.

Naa sequeyajaariuhujaj:

“Poonijotesano pueyano cuaara niqitiosaaria na poonijionu sami”.

¹⁹Pueyano jaara saquiritiojotariquia Pueyaso pueya maanu jiitianaacuara, majaari na tojinu, jaara nocuara cojitiiaquiritiojotanu. Querajaa pueya jaara nocuara cojitiare saquiritiojotanu, cuno pojori sequesano cutaraari seetanujuanaa. ²⁰Naacuajitij, Pueyaso pueya maanu jiitianaajinijinio jaara sesa miiriquia, Pueyaso pueya maanu niquiara quia nacasurenoj, puetunu narta Pueyaso pueyajananaa puerenura, maja sesa nojori miiniurajuhujaj. ²¹Timoteonaa, janiyari nio quia sequeya Pueyaso niquiarani, Jesucristo niquiarajuhujaj, na saquiritiojosa-no seya niquiaranio. Nio cuaa rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhujaj, majaari pa naata jiuujiaani pa panishano pueyano, nojuaja jaara sesa miiri. Naacuajitij, majaari rimiajata mijionu sacuaratia. ²²Naajuhujaj, majaari senota quia juaashiquia quia nianu quia niishishoo pueyanoocua, nojuaja quia jiyatenura Pueyaso pueya jiitianaa. Maninia cutaraari coteenu quia niishiniuria taamueca pueyanotenonjoni, maja sesa miijia pueyano quia jiyatenura Pueyaso pueya jiitianaa. Quiaa jaara naa Pueyaso pueya jiitianaa jiyatere quia niishiyaquishoo pueyanotej, Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³Timoteonaa, naa quia seeco nojonuucuatej, majaari saaja mohuaca ratunu. Sequeyarucua cusosu quia quiniucua, secaja vino* quia raturiquiajuhuaj quia jiniacuma na jeecanura.

²⁴Noojiaqueya pueya, sesa nojori miishanoori maatia niishishanocuaaja, Pueyaso saniitonu juuca quiyaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhuanajuaja, Pueyaso cuaara nojori nujuatejore na tacobijiaatijia, na nequesoreesocoriquiano. ²⁵Naajaariuhujaj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

6 ¹Parta Pueyaso pueyajinijinio, canapuate poonijotesano pueyani, nojori cuaara na camarucua tojitiyajaca quiiria. Nojori cuaara rerequeteyaquiriia na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniucua. ²Poonijotesano pueyano camarnu jaara Pueyaso pueyano quiriquia, juhua na serujuhujaj, na seru cuaara na tojjia quiiria. Cuaara na rerequeteya quiyaquiriia, narta Pueyaso pueyano na camarnu quiniucua. Nojuaja cuaara seetanujuanaa maninia poonijioora nera, na niishishacari na camarnucuaajaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojitanurajuhujaj. ³Tamonu jaara tamaatia niishitiojori quia cua niishitiojosanojiniji, nojuajaari tojetaarucuaanaa moseeca. Pa Jiyaniijia Jesucristo rupaari jiyanohua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. ⁴Cante cuno niishitiojosano ruuretaja tama na niishishanojuaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatitioonu porocujuhujaj, Pueyaso rootasanojiniji na taacanusacari. Naa quijia pueya quishacarijij, nojoriiri juaajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetoquiaa na juayonuutanura. Sesacatoquiaajaariuhujaj. Naajuhujaj, nojoriiri najuhuaana soquequiaa, narta Pueyaso pueya naasucua sesa miiquiaa. ⁵Nojoriiri juayonuujutatu tarinitiaquijia. Nojoriiri maja na naata maninia niishitiojonu socua. Nojoriiri maja na niishiniu seetanu rupaajanaa Pueyasojiniiji. Nojoriiri Pueyaso pueya jiitijacara quiniu paniya, nojori jiyaniishacari nojoriiri naacuaji jiyanohua casamiriacara quiniutianiya. ⁶Taaquiririnij, Pueyasocua tiuujia pa quishacari, paacuaaquinatejaj seetanujuanaa juhua queraatia casamiriaca quijiacani. Paacuajaari shuquiriaatia quijia Pueyaso rupaacua tiuujia pa quishacari, juhuajaniya quijia pa quishacarijuhuaj pa jiitiasano casaaniyojuata. ⁷Paacuajaari juhuasunucua roosaaquiaari mijiriani. Naajuhujaj, paari juhuasunucua tacateriquianohuani. ⁸Naaratej, paa jaara pa miaquesocoriquiano jiitiariquiani, paa jaara pa cushishocoriquiano jiitiariquiajuhuaj, saa cunotaja shuquiriaatia pa quiriij. ⁹Saniniuujia, noo pojori, jiyanohua casamiriaca quiniucua jiaatijacatej, nojoriiri maja na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijiosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaa pueya sesoquiaa, nojori saniitiosaanura taraatia. ¹⁰Cumaneeacaacia jiaatianu jiyanohuani, cuniquiji supuejaari puetunu sesa casaa pa miiniurajanaa. Naacuajitij, noojiaqueya parta Pueyaso pueyajinijioori Pueyaso rupaa tojinu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacia jiaatijaca nojori quishacarijij. Naaratej Timoteonaa, majaari cumaneecaacia jiaatijaa quia quiniu.

Pablo shiniujiushacari Timoteo, Pueyaso tojjia na quiniuria pueyaracaanu

¹¹Quiajaniya Timoteonaa, quiaacuajaari Pueyaso saquiritiojosano pueyano. Naaratej, puetunu sesa casaajanaa

miyashijia quia quiri. Tojetaarucujanaa saaja maninia miijia quia quiri, juhua pa Jiyaniijia. Pueyasocua tiuujia quia quiri socua. Socua panijia quia quirijihuhaj. Puetunu casaajanaa rejeretaja quia quirijihuhaj. Jacaria pocuaja quia quirijihuhaj, maja pueya rerequeteja. ¹²Pa paraca nujuataja quia quiri quia, jiyanhua quia tiuuniutia Pueyaso rupaacua. Pueyasocujaaari quia saquiriojoquiaari na pueyano quia quiniuria. Cunora, quiaari queraatia pueya niqiara pohuataquiaari Jesucristocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niqutiojonu panishano quiajaniya jaaretenu. ¹³Quiaacujaaari niishiya taa Jesucristo seetanujanaa pohuataquiaari Poncio Pilato niquiaracuajani, nojuajaari seetanujanaa Pueyaso Niyanu. Naajaa, nojuajaari niishi quiaari nojuajaari cunora mosaanutaniya. Na Que Pueyasocujaaari na samiitiani quiaariuhua. Pueyasocujaaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhaj. Cua tojiri. ¹⁴Puetunu cua rootasano quiajaniyajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaniyacujani, na tojijia quia quiri pueyaracaanu, pa Jiyaniijia Jesucristo cuara tiuquiriohuajaatijia, Jiyaniijijanaa na quiniuria. ¹⁵Na Que Pueyasoori na tiuquitiniutianiya na panishacari, taa na sequequiaaricujani. Pueyasocujaaari jiyanhua pa timitiasano, saaja maninia na quiniucua. Nojuajanaari Jiyaniijia. Nojuajaari puetunu tamasa jiyaniijianucujanaa Jiyaniijia. Nojuajaari camarucujiniji Camarnujanaa cutara. ¹⁶Saaja nojuajaari pueyaracaanu quijiajuhanajaj. Majaari na supenu quiquiaari. Majaari na shaajenu quiniutianiyajuhaj. Nojuajaari jiyanhua na shacantuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niqiniu.

iNojuaja cuara pueyaracaanu timitiasaria! iNojuajaari namitia na cumaaca jitianajuhuanajaj! Cuaara naa quiri pueyaracaanutej.

¹⁷Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuara niishiiria maja pueya shocotejaca nojori quiniuria, casamiriaca nojori quiniucua. Nojori cuara niishiiriajuhuaj, maja na casamiicua nojori tiuuniuria, nojori jyanishacari nojori pueyaracaanu shuquiriaatia quijia quiniutianiya casamiriaca nojori quiniucua. Pa jiiitiasano casamiiri shaajeriquiano. Nojori cuara Pueyasocua tiuuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. ¹⁸Cunora, nojori quia niishitiojore, pueyaracaanu maninia miijia nojori quiniuria. Naatej, taa queraatia casamiriacatucua nojorini, maninia nojori miishano cuara naa queraatia quiri juhuaj. Nojori cuara ritia niqutiojojuaca quiri nojori jiiitiasanojiniji, narta Pueyaso pueyano jiiitaaquishacari na panishano. ¹⁹Naa capora nojori quishacaritij, nojori juhua tari jiyocuacaanu racataa nojori casaa. Naacujitij, nojori seetanujanaa shuquiriaatia quijia quiniutianiya pueyaracaanu, mijiria, jiyocuacaanunio.

Pablo rootasano Timoteo, naajionu na tucuatascari

²⁰Timoteonaa, Pueyasocujaaari quia jiyatequiaari na rupaajiniji pohuatana quia quiniuria. Maninia quia cojuare seetanu Pueyaso rupaajanaa. Majaari najuhuaana tama pueya niishitiojosanojuaja tojijia quia quiniu. Noo niishishanojuhuaj, pueya sequesano: “Seetanu niishijajanaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuaanaari. ²¹Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuaana niishishanoocua nojori tiuuniucua. Niojuanaa Timoteonaa.

Pa Jiyaniijia cuara quia cumaquiriia.

TANEE PABLO NAAJIONEE TIMOTEOCUARA

Pablo saruhuatasacari Timoteo

1 ¹Janiyari Pablóni, Jesucristo jiyaramiquishano, taa Pueyaso paniquiaaricujani. Naacuajitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ²Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuj, nojori cuaara cumaquiiira quiajaniya. Naajuhuj, nojori cuaara taraajeera quioocua, nojori cuaara pueyaracaanu quioojia cajitiirijuhuj shuquiriaatia quia quiniuria.

Jesucristojiniji quia pohuatariquia tamasaca

³Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojjia quia quiniucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojtiaquiaari Pueyasocuaani. ⁴Majaari cua niyajetanu quiquiaa quia nujuquenu cucua, janiya jaara quia shuriucujia quiaquiaarini. Janiyari cunora jiyanojia jiaatiaa cua niquiniuria quiajaniyani, shuquiriaatia cua quiniuria quia shuriucua. ⁵Janiyacuajaari niishiyani quiaari seetanujuanaa pa Jiyaniijiaacua tiuujiaacua. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuujiaa quiaquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuj, taa nojori quiquiaaricuaani.

⁶Pueyasocuaajaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quioocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quioocua, na cumaaca na poonijiotenura socua quioojiajinia. ⁷Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniurijuhuj, maninia niishiriojojuacarano. ⁸Naacuajitij, majaari quia caririquiniu pa Jiyaniijia Jesucristojiniji quia poojotanura. Naajuhuj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuj, Jesucristojiniji quia pohuatasacari. ⁹Pueyasocuaajaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pajaniyani, majaari na quiniu quiquiaari maninia miijiaa pa quiniucua juucua. Maja. Nojuacuajaari naa pa jiyanoquiaari saaja naa na miiniu paniniucua, jiyanojia na quiniucujuhuj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. ¹⁰Quiari naataja pocuaji Tacuna Jesucristo niniucua, Pueyasoori pa niishitiquiaari taate na naata jiyanooni pajaniyani. Cunora, Jesucristoori pa niti cusoquiaari. Na samiitasacariuhua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijiaara jiyatesaanutaniyani.

¹¹Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹²Naacuajitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canaacua cua tiuquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuaara tiuquiriohuajaatijia. Naajuhuj, nojuacuajaari cumaacaraca na jataniniuria pajaniya, tojetaarucuaajanaa quiarinio pueya pa quiniuria na tiuquishacariuhua pocua.

¹³Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacujani. Naa quia miiriquia Pueyaso rupaacua tiuujia quia quishacari, pueya panijia quia quiniucujuhuj, Jesucristo rupesano pa quiniucua.

¹⁴Pueyasocuaajaari quia niishitiquiaari seetanu rupaajanaa. Pueyaso Sohuanu quiniucua poojiajinia na cumaquiniuria pajaniya, cunora niishitiojosano quia jiitiare maninia, maja tamaatiara na jatanishaanura.

¹⁵Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijinijioori quiquianuhua Figelo, Hermógenesio. ¹⁶⁻¹⁷Saniniuujia, Onesíforo cutaraari cucua tiuquitasucanu. Cunora, pa Jiyaniijia cuaara nocua taraajeera, puetunu na tiajinia quijiaacuajuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuaara cua riariatarejaatijia. Jaara cua riariatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. ¹⁸Quiaacuajaari niishiyajuhuj taa nojuaja naacuquiaari pajaniyacujani, Éfeso tiacajinia pa quishacari. Naa maninia na miiniucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesíforo saniniuujia.

Jesucristora poonijiojua quia quiri quia puereyaquiniutia

2 ¹Quiajaniya saniniuujia quiyanunaa, quioojia quia cumaquiriquia Jesucristo niqutiosano cumaacata. ²Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaajanaa, taa quia tojiquiaari queraatia pueya niqiara cua pohuatasacariucujani.

³Juhujaniya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia. ⁴Pueyano jaara soldadora saquiriojosaare, cunora pueyanoori maja na naata tama na panishanojuaaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiriqiajuhuj Timoteonaa. ⁵Naajuhuj, pueya tacuarishijosacari, nojori cuaara quiiria tacuarishijionu camarnu tojjia. Tamonu jaara shocotat na tojiaquiniutia camarnu, cunora na shocotanuari najuhuanaj. Naacuajitij, majaari na niqutiosaanu casa, sesa na miiniutia na shocotasacari. ⁶Nio quia niishirijuhuj: cante cuhuariquia cuhuatajani, nojuaja cuaara coteenu na senoosanoinijia racataara na panishano. Na nuhuaji cutara, nojuaja na naata

tamasaca niqutijonu na senoosanojiniji. ⁷Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

⁸Majaari nio niyajetanu: Jesucristoori macujiniji samiitianishaaquiariuhua, Pueyaso Niyanu na quiniuucua. Pueyano quiquiaarijiaariuhua. Nojuacuajaari pa supuetanaa jiyaniijia David niqiuhuacuajinio supueno pueyano quiquiaari. Naacuajitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocuaajaari pa pohuatasano Pueyaso Rupaa. ⁹Naa cua poojotanuuucuatej, janiyari naquiya miyani. Janiyari cumayocuata moronucua quiyajaaniuhua, juhua sesa miijia. Naajaa, Pueyaso rupaa cutaraari maja na naata sanaajasaanu. ¹⁰Cunora, janiyari puetunu naquiya miiniujanaa rejeretaquiaani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhua, taa na jatanishano pueya pa quiyacuani. Naacuajitij, paari mariyata shacantuca quijiacara jatanishaanutaniyani, Jesucristota pa quiniuria pueyaracaanu.

¹¹Nio sequesanoori seetanujuanaa:

Jesucristoocua pa tiuushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacuajitij, Jesucristo mosaanu jaara pocuara quiquiaari, na samiitianuhuari pajaniyara quiyajuhua, pueyaracaanu rishiriquiano pa quiniuria. ¹²Naajuhua, paa jaara naquiya miitiasariquia nocua pa tiuuniuucuanu, nojuajaari camarucua pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijiaca pueya niqiarani, nojuajaari pa tamacanutaniyajuhua. ¹³Paa jaara na sequesano tojiyashijiaca quiriqiani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

Taamueca quiijate Pueyaso shuquiritiasano nera poonijionani

¹⁴Parta Pueyaso pueya quia niishitiojorohuarohua maja najuhua nojori juayonuujutanura tamaatia niishitiojosanoocua. Jiyanhua quia nacasure nojori Pueyaso niqiuara, maja naa nojori nacojonura najuhua supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵Tama quia cuaqueyajaaja quia cojuare, saa maniniaja quia niishitiojonura Pueyasojiniji cuno seetanu rupaajanaa. Naacuajitij, Pueyasoori quia timitianutaniya nera poonijiona maniniu quia quiniuucua. Majaari capa quia niishitiojonu, quiaa mariqui tamajaaja caririqiriiri. ¹⁶Naaratej, majaari najuhua tama mijiria pueya niishishanojuaja quia tojiniu. Pueya tojishacari cuno, nojoriiri socua jiyacatenutaniya Pueyaso tojiyashijiaca nojori quiniuria. ¹⁷Cuno najuhua niishitiojosanoori jiyanhua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuani, na camaru na cusojuanura. Himeneo, Filetonio, nojoriiri naa miiquioya quiarjia. ¹⁸Nojoriiri seetanu rupaajanaa jataniquianu tamaatiara. Nojoriiri pueya niishitiojia, paanaari tari tojetaarucujanaa samiitianishanocujani. Naacuajitij, majanaari pa cuaqueya jatanishaanu quiniutianiya, shacantuca cuaqueyaraca pa quiniuria taa pa Jiyaniijiacuani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojia, nojori tiyuquiniuria pa Jiyaniijia sequesanoocua. ¹⁹Naajaa, Pueyasojuanaacuajaari pa niishitiquiaari na rupaari seetanujuanaa. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquiriojosano pueya niishiyacuaja”. Naa naajiotasanoori quiyajuhua:

“Canapute pa Jiyaniijia Jesucristoocua tiuujacani, nojori cuaara sesa na miijionu tarinitiaara”.

²⁰Sanajanaa, cua tojiri. Jiyanhua queraatia casamiriaca pueyano tajinia, cuno tajiniaari maja saaja orojiniji shipinijosano coshiquia quiniu, miacojuanao, platajiniji casaano. Puetunu tamaatia casaajiniji shipinijosano casamijianaari quijia. Quijiaariuhua mati, suruhuaatunumajiniji quejasano. Quijiaariuhua maraujiniji panishano patacocua, conaano. Puetunu cuno casamijinijinojuanaani, noojiaqueyari racatasano saaja masu miaquetejarano quiya, na raatojotajarano. Quiyajaariuhua rucucuaacua casa, rucucua cajitija. ²¹Paari naajuhua. Paa jaara tama pa cuaqueyajaaja cojuariquia tojetaarucujanaa sesa pa miiniuucujini, saaja pa Jiyaniijia pa quiniurajuhua, naacuajitij, pa naata juhua pa Jiyaniijia timitiasano tohuatashiniyojua quiniu. Naacuajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²²Sanajanaa, quiaacuajaari niishiya, casa miiniuucua jiaatiajacate mashiquiorini. Puetunu cuno sesa niishiriojosanojuanaa quia tarinitiaquia. Saniniuujia, saaja maninia miijia quia quiriquia. Saaja Pueyaso rupaacua tiuujia quia quiriquia, pueya panijiajuhua. Jiyanojia quia quiriqiajuhua. Naa quia quiriquia, taa puetunu Pueyaso jiyatesano sesa miyashijiaca pueyajanaa miqiaacuani, pa Jiyaniijiaacu nojori tiuuniuucua. ²³Pueya jaara nacojoriquia nojori niishiyashishoo casaajiniji najuhuanaj, nojori quia ruuretare saaja, nojori jaara quia nequesoreetare cuno casaajiniji. Quiaacuajaari niishiya, pueyari jiyano casaacua paracaatiojua. ²⁴Pueyasora poonijiojua pueyano cuaara quiyaquiiria pueya paracaajia. Saniya cuaara quiiria cutara puetunu pueya panijiajanaa. Cuaara quiirajuhua maninia niishitiojua. Cuaara juhuananiya rejeretaja quiiria, tamasa jaara na taajetere. ²⁵Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijia nojori quiniuria. ²⁶Naacuajitij, nojoriiri maninia niishiriojojuaca quiniutianiya, nojori jaareteenura Sesaacaacua, maja Sesaaca miitiniuria nojori taa na paniyacuajani.

Taa quiijaca mijiria quinia quiniutianiya quera jiya puequesacari

3 ¹Quia niishirijuhua Timoteona, jiya puequenu panishacari, pueyari socua jiyacatenutaniya sesa miijiacara. ²Pueyari saa tama nerajaaja niishiriojojuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatiajaca quiniutianiyajuhua. Naajuhua, pueyari najuhua narta pueya niqiuara pocuajaca quiniutianiya, na jyanishacari nojori cutara socua niishijia narta pueyajiniji, socua shanhua niqishano tamasaajinijio. Pueyari Pueyaso sesacajaca quiniutianiya, narta pueya sesacajacajuhua. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miijia. Pueyari maninia miyashijiaca quiniutianiya, Pueyasojiniji maninia casa rerequetejaca nojori quiniuucua. ³Naajuhua, majaari quenaaja na queya panijia pueya quiniu quiniutianiya, tapueyocua, tama necohuaajanao. Pueyari tojetaarucujanaa jyanoyashijiaca quiniutianiya. Sacuaraatia rimiaacatujuri quiniutianiyajariuhua. Naajuhua, majaari quenaaja tama nojori cuaqueya panishanojuaja rejejaca pueya quiniu quiniutianiya. Pueyari naquiya narta pueya miijia quiniutianiya, nojoriicua na taraajeyaquiniutia. Pueyari puetunu maninia miijiacajanaa sojeaca quiniutianiyajuhua. ⁴Pueyari tama na cojiniaajaaja tacartajaca quiniutianiya. Pueyari cocuaatia casa miijia quiniutianiya, mosanucua nojori quiniuucua. Pueyari juhuananiya quijia quiniutianiya, tama nojori cuaqueyajaaja shuquiritajaca nojori quishacari. Shuquiriaatia pueya miishacari tama na

panishanojuaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵Pueyari sapuenu juhua Pueyaso pueya niqushaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶Tamasaca cuno pueyajinijinioni, nojoriiri tiaco tiuquitiataca, noo maajipohua na sapojonura, najuhuana pueya pahuatanoo-cua ritia tiuujiatej. Cuno maajipohuari tama na cuaqueya miiniu panishanojuaja rejeteyashijiaca. Naa sesa miijiaca nojori quiniuucaatej, nojoriiri najuhuana tacaquiquiaa. Cunora, nojoriiri cuno sapojonuujuaca tojtiaquiaa. ⁷Cuno maajipohuari najuhuana pueyaracaanu tojtiaquiaa cuno sapojonuujuaca niishitiojosano. Saniniuujia, majaari Jesucristojiniji seetanu rupaajanaa niishijiacara nojori quiniu quiquiaa, Pueyaso jiyanooniuria nojori. ⁸Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes*, Jambres ruuretaquiaari supuetana Moisésuaani. Naacuajitij, nojori niishitijaari juhua ninishiqui, sesa nojori miishano timitijaca nojori quiniuuca. Seetanu rupaajanaa nojori tojiyaquiniuuca, pueya cuaara tojiyaquiriaria nojori saniniuujia. Nojoricuajaari Jesucristoocua tiuyashijiaca. ⁹Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacuaaari, nojoriiri seetanujuanaa niishiyashijiaca, taa pa supuetanaa niishiquiaari-cuaani cuno shimiacuriiri sapojonuujuaca.

Pablo tucuatascari naajionu, socua rootaa Timoteori

¹⁰Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhua taa seetanujuanaa pa Jiyaniijiaacua tiuujia cua quiquiaarini, jacaria pocuajajuhua, pueya panijiano. Quiaari niishiyajuhua, majaari coojia cua najiquitini quijiani, pueya miishacari naquiya janiya. ¹¹Quiaari niishiyajuhua taa cua miitiasaaquiaari Antioquia tiacajiniani, Iconio tiacajinijuhua, Listra tiacajiniani. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. ¹²Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijia nojori quiniuriatej. ¹³Saniniuujia, sesa miijia pueya, sapojonuujuacano, nojoriiri socua sesa miiniuria jiyacatenutaniya. Nojori sapojonuujacari tamasa, nojoriiri naa tama na cuaqueyajaaja sapojonutaniyajaacujua.

¹⁴Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaa-quiaaricuaajani. Quiaacuajaari niishiya, cuno niishitiojosanoori seetanu rupaajanaa. Quiaari niishiyajaacuhua canapuate quia niishitiojoquiaarini. ¹⁵Quiaacuajaari quia naatujuajiniji tariucuacaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. ¹⁶Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhua pa miishanoori sesa, na nacasanura pajaniya maninia miijiaca pa quiniuhua. Pa rootaajaariuhua tojtaarucuaajanaa maninia miijia pa quiniuria. ¹⁷Naacuajitij, Pueyaso Rupaari Pueyasora poonijionaa pueya jeenucuaa tojtaarucuaajanaa, puetunu maninia casaa miijiacajanaa nojori quiniuria.

4 ¹Quiaacuajaari niishiya, Jesucristo tiuquishacarihua mijiria, Jiyaniijajanaa na quiniuria, nojuajaari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa

Que Pueyaso niquiara quia sequeya seetanujuanaani. Cua tojiri. ²Majaari pueya niquiara Pueyaso rupaa pahuatanu quia tarinitianu. Pueyaracaanu quia pahuatariquia, naajaa, quia jiyanihacari jiyacari naasucuaari maja maninia quia pahuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijiaca quia nacasuriquia. Pueya quia shiniujiriquia Pueyaso rupaacu nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaaniutia. ³Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniji niishitiojosano tojiniu paniyaquiniutianiya. Saaja na ruuretanutaniyajaariuhua. Naa Pueyaso rupaa nojori tojiniu paniyaquishacarijia, nojoriiri queraatia tamaatia niishitiojonuujuaca rerejotenutaniya, cuno pojori shuquiritiniuria nojori najuhuana pahuatanota. ⁴Nojoriiri seetanu Pueyaso rupaajanaa tarinitianutaniya, najuhuana sapojonuuasano tojtiajaca nojori quiniuria saniniuujia. ⁵Quiajaniya saniniuujia, maninia niishiriojua quia quiriquia, maja quia sapojosaanura-juhua. Naquiya miiniu rejeretaja quia quiriquia. Pueyaso rupaa Jesucristojiniji pahuatanuucua cojeja quia quiriquia, pueya tiuuniuria Jesucristoocua. Puetunu quia poonijiosanojuanaa Pueyasora quia tucuatate maninia, taa pa Jiyaniijia sequequiaari quiajanuyacuajani.

⁶Janiya saniniuujia, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquitiosano quiniutianiya. ⁷Majaari cua taajenu quijia, pueyaracaanu cua poonijosacari cua Jiyaniijiaari. Janiyari tari tucuatatanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. ⁸Naacuajitij, shanohua tuhuajaari quiriano jiyocuacaanu racatasano quia tari, maninia miijia cua quiniuuca. Cua Jiyaniijiaari cuno tuhuaja cua niqutionutaniya na samiitianishacariuhua janiya. Pa Jiyaniijiaari jiyanoohua maninia. Na jiyanooshano pueya pa quiniuuca, majaari socua na saneenu quiniutianiya sesa pa miishano. Majaari saaja janiya na niqutionu quiniutianiya cuno tuhuaja. Puetunu noo pojorijianaa niqutionutaniyajaariuhua, canapuate nojuaja na paniniutia sashiyajaani, cuaara tiuquihuara shacantuca na cumaacatajatiija.

Pablo sequesano Timoteo miishocoriquiano

⁹Majaari puera tarishiniu. Quia secoore, cucua quia tiuquiniuria ritia. ¹⁰Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijiaari jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhua. ¹¹Saaja Lucasri niya cuata quia. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaari cua poonijosacari. ¹²Janiyari saniniuujia Tiquico jiyarorucuaa Éfeso tiacajiniani. ¹³Taa cua sequeya quiajanuyacuajani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneecajuhua. Janiyari socua noo paniya quia patootanurani, shoqueecua naajionuutasano Pueyaso Rupaatej.

¹⁴Noo Alejandro, cumueeca casaajiniji shipinijiojua casamitij, nojuajaari jiyanoohua cua paracaajiaari quiquianu. Naajaa, pa Jiyaniijiaacuaari saniniuujia cucua na naminiutaniyacujua, naa na miiniucua janiyatej. ¹⁵Tama quia cuaqueyajaaja quia cojuare maja na miiniuria sesa quiajanuyajuhua. Nojuajaari pa pahuatanu cuaracashitiya saaja, Pueyaso rupaa ruuretaja na quiniuuca.

¹⁶Janiya jaara shushajanaa nujuatesaacanu jiyaniijianucua tajoitij, nojori nequesoreenura janiya, majaari quenaaja

tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuaara jiyanooria nojori. ¹⁷Naajaa, pa Jiyaniijiaari cua cojiqianuni. Cua cumaquiquianujaariuhuj, nojuajiniji cua pohuatanura puetunu cuniqui quiniaa Pueyaso niishiyashijiaa pueyajanaa. Pa Jiyaniijiaari cocuaatia cua miiniujiniji juhua nojori juaashiquiajiniji cua jaaquianu, maja nojori monura janiya. ¹⁸Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniyaariuhuj, pueyaracaanu rishijia cua quiniuria na shuriucua jiyocuacaanu, Jiyaniijiajanaa na quishacari. ¡Jiyanohua maniniaari pa Jiyaniijia! ¡Nojuaja cuaara shuquiritiasaaria pueyaracaanu! Cuaara naa quiiriatej.

Pablo sequesano na naajionee na tucuatasaari

¹⁹Quiria quia saruhuatate Prisca, neyaca Aquilano, puetunu Onesíforo pueyajanaajuhuj, na tiajinia quiniaani. ²⁰Erastoori Corinto tiacajinia jateecanu. Janiyari saniniuuja Trófimo tiujiacanu Mileto tiacajiniani, cusosu na quiniucua. ²¹Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaanio.

²²Pa Jiyaniijia cuaara quioojiajinia quijia quiiria pueyaracaanu. Pueyaso cuaara cumaquiiria puetunu niajanijajanaa.

PABLO NAAJIONEE TITOOCUARA

Pablo naajiosacari Titooçuara

1 ¹Janiyari Pablóni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaariuhua Jesuucua tiunnaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. ²Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniuria, pueyaracaanu quijiaca nojori quiniuria Pueyasota. Cuno cuajaari tariucuacaanu Pueyaso sequesano, jiyanhua tarijiatej, jiya shipinishaacarijijojua. Nojuajaari maja na naata sapojonu. ³Quiari naataja, Pueyasoori na rupaa niishitiniuria paniquiaari pueya, taa na paniquiaari jiyasohuaja tariucuacaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutiniuria nocua. ⁴Quiarrijiani, quiocuara naajiyaniija Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiushacari Cristojiniji cua pohuatasanoocua, taa cua tiuquiaaricuaani. Naacuajitij, paari mariyata nocua tiuujacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiitiaara quioojia maninia, shuquiriaatia quia quiniuria pueyaracaanu.

Titora Pablo sequesano, Creta jiya tucuaatiajajinia na miishocoriquiano

⁵Janiyari quia tiujiaquiaari Creta jiya tucuaatiajajiniani, quia tucuatunura cua poonijosano cureeno. Naaratej, quia sequecanunijia quia jiyatenura jiyaniijianucua, Pueyaso muerasu maapue jiitianaa quiniuria puetunu cuno jiya tiacajinijanaa, taa cua sequequiaari quiajanuacujani. ⁶Pueyaso pueya jiitariquiano cuara quiiria maninia pueyano, sesa miyashijia, maja pueya pocuanura sesa nojuajiniji. Cuaara jiitiaara niquiriyatuhua niquiocua. Necohua cuara quiiria Pueyaso muerasujuhua, maja sesa miijia, maja tojiyashijiaacajuhua. ⁷Cante Pueyaso muerasu jiitianani, nojuajaari Pueyasora poonijojua. Naaratej, nojuaja cuara quiiria maninia quiija, sesacasoo, maja tojiyashijia. Cuaara quiyaquiiria ritia juaajia, mashaasequejojua, piyojotaja. Cuaara quiyaquiiria cumaneeca panijia sesa na miishanota na masenura. ⁸Naajuhua, Pueyaso pueya jiitiana cuara quiiria rucoonaacua taraajeja. Cuaara quiiria maninia miijia, maninia niishiriojojua. Cuaara quiiriahua seetanujuanaa Pueyaso rootasano tojijia, maja rimiajata maninia miijia. Cuaara quiiriahua Pueyaso panijia cutara, tama na cuaqueyajaaja jiitiaja maninia, maja sacuaatia casa porocua. ⁹Cuaara quiiria Pueyaso rupaa tojijia cutara, taa na niishitiosaaquiaricujani. Naacuajitij, nojuaja na naata pueya cumaquini, maninia na niishitiosanota Pueyaso Rupaajiniji. Naacuajijuhua, nojuaja na naata pueya tacatonuhua Pueyasocua sesa nojori niishishanoiniji, noo nojori canapete Pueyaso Rupaa ruaretajaca quiyacuajani.

¹⁰Naa quia sequeeenijia, queraatia tojiyashijia pueya quiniucua, canapete juhua niishiyashijia niishitiojoquiaa najuhua niishitiosanocujani. Nojoriiri Pueyaso muerasu sapojia. Queraatia cuno nojoriiri cuarta Judiocuara. Nojoriiri

pueya niishitiojia pueya cararaatiuuquia co miatesaanura, taa Moisés niishitiojoquiaari tarijiaacujani, seetanujuanaa Pueyaso muerasu nojori quiniuria juucua. ¹¹Nojoriiri queraatia niquihuaraca pueya jiyajeneteya sesa na niishitiosanota, puetunu tapueyocacatajanaa nojori juayonuujutunura. Cuno niishitiosanota cuara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiosanoinijini.

¹²Creta jiya tucuaatiaja pueyajinijinio tamonu shimiacuuri tama na pueyajinijiaaja naa sequequiaaritij: “Creta pueyari pueyaracaanu saaja sapojonuujuaca. Nojoriiri jiyanhua juaajia juhua sayoru. Nojoriiri puera miaquenujuaca. Nojoriiri taajecorijuhua”. ¹³Seetanujuanaa cuno shimiacu sequesano. Nocuaji, jiyanhua quia nacasure nojori, nojori cuara Pueyaso tojijia quiiria, maninia quijiaca nojori quiniuria. ¹⁴Quia rootare nojori maja na tojitanura Judiocuara nareja najuhua pohuatasano, naajuhua, maja nojori tojiniuria pueya rootasano, canapete Pueyaso seetanu rupaajanaa tojiyashijia quiyacuajani.

¹⁵Pueyano jaara maninia jiuujaraca quiri, puetunu casaajanaa maninia quiya nera. Saniniujia, pueyano jaara sesa jiuujaraca quiri Pueyaso rupaacua tiyashijia na quiniucua, majaari quenaaja niquiriyatu casa maninia quini nera. Na niishitijaari juhua curutuucua, noojiano. ¹⁶Nojoriiri tama na cuaqueyajaaja sequeya: “Pueyaso niishiyaniija”. Naa nojori sequesacaritij, najuhua sequeyari. Nojori miishanoiniji, paari niishiyani nojori maja seetanujuanaa Pueyaso muerasu. Nojoriiri jiyanhua soosano pueya, puera sesa na quiniucua. Nojoriiri jiyanhua sesa, tojiyashijiaacajuhua. Majaari na naata quenaaja maninia miiniu.

Maninia niishitiosano cutara

2 ¹Nocuaji, pueya quia niishitiojore maninia nojori quiniuria taa pa niishitiosaaquiaricujani. ²Naaratej, socua saaquiapue quia niishitiojore nojori cuara quiyaquiiria miaquejoru, mashaasequejorunio. Nojori cuara quiiria tojishano pueya cutara, maja rerequetasano. Nojori cuara quiiria maninia niishiriojojua. Cuaara quiiria maninia quiijacajuhua, na tojishacari puetunu Pueyaso niishitiosanोजना, na panishacari pueyano. Nojori cuara quiiriahua maninia rejeretajaca taraatia na miishacari, juhujaniya nojori sashishacari pa Jiyaniija. ³Naajuhua, socua motaja maajipohua quia niishitiojore nojori quiniuria maninia Pueyaso niquiara pueyaracaanu, maja rimiaacatujuri, maja mashaasequenujuaca. Nojori cuara pueyaracaanu miiria maninia tamasa niquiara, tamasa miiniuria juhua nojori miishanojuhua. ⁴Nojori cuara niishitiojora niyacaraca maajipohua, maninia na paniniuria neyaca, necohuanio. ⁵Cuno jiyaniyacuaca cuara niishitiojora narta maajipohua, maninia niishiriojojua nojori quiniuria, saaja neyaca panijia nojori quiniuria, maja tamonu caya panijacara. Nojori cuara niishitiosaaquiaruhua, maninia poonijojua na tijania nojori quiniuria, caporatujuri nojori quiniuria, neyaca tojitiajanio. Nojori cuara naa miiria, Pueyaso Rupaa mariqui rerequetasaareeri.

⁶Naajuhua, mashiquiori quia niishitiojore maninia niishiriojojua nojori quiniuria. ⁷Puetunu quia miishanojuana cuara quiiria maninia nojori niquiara, nojori jiaatianura

quiocua, juhua quiajaniya nojori quiniuriajuhuaj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojjia quia quiniuria. Majaari puenujujua quia quiniu quia niishitiojosacari. ⁸Maninia quia niishitiojore Pueyaso Rupaa, taa quia niishitiojosaquiarucua-jani. Naacuajitij, tamasaacari maja na naata ruuretano quiniutianiya quia niishitiojosano pueya niqiuara. Naa maninia quia niishitiojosacaritij, quia niishitiojosano rerequetejacaari caririqiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹Poonitijosano pueya quia rootare, puetunu na camarucua sequesanojuanaa nojori tojjiniuria, na camarucua shuquiritianura nojori. Cuaara quiiria na camarucua panijiaa, maja rihuanejaca. ¹⁰Cuaara nohuaseyaquiiria na camarucua casami. Cuaara quiiria seetanujuanaa maninia miijiaa, pueya niishiniuria pa Jiyanoojia Pueyaso rootasanoori jiyanoohua maninia cutara. Poonitijosano pueya jaara maninia quiriqia, Pueyaso Rupaari juhua maniniushitishano quia tamasaca niqiuara.

¹¹Paacuajaari niishiyani Pueyasoori jiyanoohua jiyanoojia seetanujuanaa, Jesu cusonuucua puetunu pueyacuaraanaa, sesa pa miishanojiniji pa jiyanooshaanura. ¹²Pueyaso jiyanoosacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatijuhua. Naajuhua, Pueyaso jiyanooniucua pajaniya, cunoori pa shiniujiya maninia niishiriojuaca pa quiniuria mijiria pa quishacarijia, maninia miijiacajuhua, Pueyaso tojjianio pa paniniutia nojuaja. ¹³Naa Pueyaso jiyanoosacari pajaniya na muerasu pa quiniuriatej, cunora paari na sequesanoocua tiuquijuhua. Nojuacuajaari pa sequequiaari pa Pueyaso Cristoori pocua muetanutanihua, shacantuuca na cumaacajinia. Naacuajitij, paari shuquiriaatia sashiya pa Jiyanoi. ¹⁴Nojuajaari tama na cuaqueyajaaja panitiaquiaari pocuara, sesa pa jiihishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijianaa. Naa miiquiaariiri saaja tama na pueyaraaja pa quiniuria, jiyanoohua maninia miiniucua jiaatiajaca pa quiniuriajuhuaj.

¹⁵Naa quia niishitiojore pueya Titonaa. Pueyaso pueya quia niishitiojore, quia shiniujuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojjishano pueyano quia quiniuria. Saaja maninia quia miiriqia pueyaracaanu, tamonu mariqui quia rerequetereri.

Maninia rootasano Pueyaso pueyara

3 ¹Quia pueya quia niishitiojorohua jiya jiyaniijia tojjiaa nojori quiniuria, jiyaniijianucua na jiyatesano pueya nojori tojjiniuriajuhuaj. Nojori cuaara cunoo pojori naacutaara jaara sequesaa maninia casaa nojori miiniuria. ²Pueya quia niishitiojore nojori cuaara pueya sesacaashijiaa quiirajuhua. Nojori cuaara quiiria juhujaniya quijiaa, maja juaajiaa. Cuaara quiiria jiyanoojiaa. Cuaara maninia niqiuaria puetunu pueyanaa, juhua socua maninia pueya nojorijiniji, maja rimiajata na miiniuria tamasa.

³Tarijia, paari mariyata mosanucua quiquiaarini, Pueyaso tojjiyashijiacanio. Paari juhua tashucuanu quiquiaarini, sapojosano pa quishacari. Paari sesa miiniucua jiiquiaarini. Majaari pa naata sesa pa miini tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishishanota. Paari sesa miijiaa quiquiaarini. Paari

tamasaca jiihishanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaa quiquiaarini. Paari niqitiojuaca quiaquiquiaarini. ⁴Naajaa, pa Jiyanoojia Pueyaso cutaraari maninia miiquiaari pajaniya. Naacuajitij, paari niishitishaaquiaarini taa Pueyaso paniya puetunu pueyanaani, na jiyaronuucua Neyanuniyojua pocuara na cusonura. ⁵Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohanuta pa jataniquiaariiri, na Sohanu jeequesacari poojia, maninia jiuujiaraca pa quiniuria. Pueyaso Sohanuuri pa jataniquiaa juhua quiarinio pueya pa quiniuria. ⁶Pocuaji Tacuna Jesucristo miiniucua maninia, Pueyasoori jiyanoohua queraatia na Sohanu niqitioquiaari pajaniya. Juhua pocua totasaareeri na Sohanu. Maja shiitianiyojua quenaaja. ⁷Naacuajitij, pa jiyatereeri maninia quijiaa pa quiniuria na jiyanoosacari pajaniya. Naa pa jiyatequiaariiri na muerasu pa quiniuria, pa masenura puetunu na jiihishanojuanaa puera, jiyocuacaanu na racatasano. Naaratej, paari juhujaniya sashiquiaani, pa niishishacari paari pueyaracaanu quijiaa quiniutianiya natani.

⁸Nio cua sequesanoori seetanu rupaajanaa. Nio rupaata quia nacasure Pueyaso tojjiajaca puetunu quioojiatanaa, nojori cuaara niishiriojora, maninia nojori miiniuria pueyaracaanu. Nio rootasanoori jiyanoohua maninia. Maninia cutaraari puetunu pueya cumaquitiajarajanaa. ⁹Maja cutaraari quia rupeenu cunoo pueya, noo pojori canapete najuhuaana nacojoquiaani, naajuhua, noo pojori canapete pueyaracaanu na supuetanaa sesaca serojoquiaa najuhanani, juhua pueya shocotajaca nojori quiniuria. Naajuhua, maja quia rupeenu noo pojori canapete juaatooquiaani, canapete tariucuaanu Moisés Rootasanoocua juayonuutaquiaacuajani. Puetunu cunoo nojori niishishanojuanaari najuhanaj. Majaari na naacunu nojori.

¹⁰Quia piriyojore cunoo, cante Pueyaso muerasu maanu raquirijitiaani, capa na niishitiojosanota najuhanaj. Nojuaja jaara quia tojjiaquiri coteenu quia sequesacari nojuaja, quiocua socua na camiriohua piriyojonu. Jaara tojjiaquiri quiajaniya jiyacaritij, nojuaja cuaara quiiriaqui juhua taanusano. ¹¹Naa na tojjiaquishacari quiajaniyatej, quiocua niishiri cunoo pueyano tari seseree. Tama sesa na miishanojuaririjia juhua nocuara saquiriojotaa.

Pablo sequesano Titora

¹²Janiya jaara Artemas jiyarore quiocuanu, jiyanoohua quia saniniujuri cucua quia niiniuria Nicópolis tiacajinia. Janiyari quiniqiu shuniya tajitiniu paniyani. Janiya jaara Artemas jiyaroyaquiri quiocuanu, janiyari Tíquico jiyaronutaniya quiocuanu. ¹³Zenas, Apoloori quiocua tiuquiniutianiya. Nojori quia naacutare quia jiihishanota, nojori jiihishanura puetunu na panishanojuanaa nojori quianu panishacari quia quijiajiniji. Zenasri pueyacuaji tacuna pueya nequesorenaa.

¹⁴Parta Pueyaso muerasu cuaara niishiiria maninia miijiaa nojori quiniuriajuhuaj, maja najuhua quijiaa na quiniuria. Maninia cutaraari nojori naacutanura na panishano jiihishashijiaa.

Naajione puequesacari saruhuatano

¹⁵Puetunu cuata quinaajanaari cua sequeya cua saruhuatana quiajaniya. Canaara quia saruhuatana parta Pueyaso muerasujuhua, canapete cana panijiacacuajani. Pueyaso cuaara cumaquiri puetunu nijaniyajanaa. Cuaara naa quiiriatej. Tariucua Titonaa.

PABLO NAAJIONEE FILEMÓN CUARA

Pablo saruhatasacari Filemón

¹¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. ²Canaara quia saruhatatare pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhatatarehua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³Pa Que Pueyaso, pa Jiyaniijia Jesucristonio, nojori cuara cumaquiiria niajanija, jiyanoojiaca nojori quiniuucua. Nojori cuara cajitiiria nioojiajuhaaj, juhuajanija nia quiniuria.

Filemón paniniujiniji pohuatasano, Pueyasocua na tiuuniujinjinio

⁴Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. ⁵Janiyari naa sequequiaa Pueyasoni, quiajanijajiniji cua tojiniuucua taa quia paniquiaa pa Jiyaniijia Jesuni, puetunu na pueyajanaanio. Quiaanaari seetanujuanaa pa Jiyaniijiaacua tiuujia. Janiyari cunora quia timitiaani. ⁶Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojiajinia quia jiiitiasanojuanaa Jesucristojiniji, Jesucristoocua tiuujia quia quiniuucua. ⁷Parta Pueyaso pueya panijia quia quiniuucua, quiaanaari nojori cumanijiacanua, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhaaj. Cunora, shuquiriaatia quiyaniija.

Pablo sequesacari Filemón, nojuaja jiyanooniuhuaa tama na seru Onésimojuaja

⁸Jesucristo jiyaramiquishano pueyano cua quiniuucua, cua naata sequenu quiajanija quia miiniuria cua sequesano. ⁹Naajaa, majaari cua sequenu paniniu quiajanija juhua quia jiyaniijia. Saniniuujia, panijia quia quiniuucua, janiyari quia sequenu paniyani quia miiniuria nio cua sequesano quiaritia. Jesucristojiniji cua pohuatanuucua, janiyari quiaritia moronucua quiyani tariucua saaquiano. Naajaa, quia rupeua Pablo cua quiniuucua, cua tojiri Filemónnaa. ¹⁰Cucua quia taraajere quenaaja. Quia nenecojiyanijia cua niyanuniyojua Onésimoocua. Nojuajaari seetanujuanaa juhua quiyanura quiuucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹Tariija, Onésimoori sesa seru quiquiaari quiara. Quiaritia saniniuujia, nojuajaari na naata maninia quiniu quiara, taa quiria na quiyacuaani. ¹²Janiyari quiaritia quiocua jiyaroya quiyani. Quiocua na maserohua quia timiniutia, taa quia masequiaa janiyacuani. ¹³Moronucua cua quishacari Jesucristo rupaa cua pohuatanuucua, janiyari niyaja na

jiyotetenu paniriquiaa juucuaani, na naacunura janiya quia niti. ¹⁴Naajaa, majaari naa cua miiniu paniniu quiuquiaa jiyasohuaaja, coteenu cua nequesotaaquishacari quiajanija. Janiya jaara quia sequereni janiya niya na jiiitianutianiya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniyani. Cunora, janiyari na jiyaroya quiocuaani. ¹⁵Onésimo jiyoteeri quiocuaji rupatecanu rupaquiriaja, quiaritia quiara na quiniuhuaa pueyaracaanu cutara. ¹⁶Quiaritia, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiaritia, Jesucristoocua tiuujia na quishacarijuhuaj. Nojuajaari jiyanojuaa cua panishano parta Pueyaso pueyano. Naajaa, quiaa cuara jiyanojuaa na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷Naacuajitij, janiya jaara seetanujuanaa quiarta Pueyaso pueyano quiaritia, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. ¹⁸Onésimo jaara sesa miiquiaari quiajanija, jaara quia casaa nohuasequiaarijuhuaj, nojuaja quia jiyanoori. Saniniuujia cucua quia tiuutiare puetunu sesa na miishanojuanaa quiajanija. ¹⁹Janiyacua saniniuujia cua cumaneecajiniji quia niqutioreni puetunu sesa na miishanojinijianaa quiajanija. Janiyari Pablóni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitini panijajuhaaj, Jesucristojiniji cua pohuatasanoocua quia tiuushacari, quiaacuajaari pueyaracaanu quiijara jatanishaaquiaari. Naacuajitij, cua naata sequenu quiajanija, cua serura quia quiniuriajuhuaj. Naajaa, janiyari saaja quia sequenyani Onésimoocua quia taraajenura. ²⁰Naa quiria quia miiri quenaaja, mariyata Jesucristoocua tiuujia pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutianiya.

²¹Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaanihuaj, quiaari socua maninia na miiniutianiya cua sequesanojiniji. ²²Naajuhuaaj, janiyari juhuacaritia quia sequenyani, cua maquejara quia jeenucuare cucuaji quia tiajinia. Naa pueyaracaanu cucua nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatatasacari

²³Epafraasi cua sequerecua saruhatanura niajanija. Nojuajaari cuarta moronucua juhuaj, Jesucristojiniji canaa pohuatanuucua. ²⁴Jaarajaaja cuata Jesucristojiniji pohuataanaa pueyari nia saruhatatajuhuaj. Nojoriiri Marco, Aristarco, Demas, Lucasnio.

²⁵Pa Jiyaniijia Jesucristo cuara cumaquiiria niajanija.

HEBREO PUEYACUARA NAAJIONEE

Pueyasoori pajaniyara na rupaa pahuataniquiaari Neyanujiniji

1 ¹Tariucuacaanu, Pueyasoori pueyaracaanu na sequenu panishano caminiujuunaa pueya poojotaniquiaari pa supuetanaara. Nojuajaari nojuajiniji caminiujuunaa miijotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. ²Quiari naataja saniniuujia, Pueyasoori tama Neyanujuaaja pahuataniquiaari na sequenu panishano pajaniyara. Nio Neyanu shipiniquiaari puetunu casaajanaacuaajaari; nio jiya, jiya cajiniocujuhujaj, puetunu pa niqiyuquishoo casaajanaano. Naajuhujaj, Pueyasoori Neyanu jiyatequiaari puetunu tama na shipinishanojuanaa jiitiana quiriqiano. ³Neyanuuri tojetaarucujanaa maninia, juhua na Quejuhuaj, juhua na Que niqishanojuhuaj. Naacuajitij, nojuajaari jiyanojuaa shacantuuca cumaacaracajuhujaj. Naacuajitij, nojuajaari puetunu na shipinijosano casaajanaa rucanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuacaanu tacaquiaarihuuari, na Que Pueyaso miaquetajara na cajiniuria Jiyaniijajanaa quiquiojinia.

Pueyaso Niyanuuri Jiyaniijajanaa cutara Pueyaso seyajiniji

⁴Naacuajitij, Pueyaso Niyanuuri Jiyaniijarajanaa quiquiaari Pueyaso seyajiniji. Nojuajaari na Que sesaanucua.

⁵¿Pueyasoteeri quenaaja tamonu na seyajinijinio sequequiaari: “Nioori cua Niyanu?” iMaja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquirojosano pueya Jiyaniijia quia quiniuria”.

Neyanujiniji sequequiaarijiaarihuujaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari. ⁶Tariucuacaanu Pueyaso Rupaajinia, naa naajiotasaaquiaari casaa Pueyaso sequenutaniyani, Neyanu na tiuquitishacarihuua mijiria, Jiyaniijajanaa na quiniuria:

“Puetunu cua seyajanaa cuara Quiyanu tojitiaara, Jiyaniijajanaa na quiniucua”.

⁷Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

⁸Neyanu sequeya saniniuuriija:

“Quiyanunaa, quiaacuaajaari Pueyasojuhuanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhujaj, maninia quia jiitianura puetunu pueyajanaa. ⁹Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijijanaa”.

¹⁰Pueyasoori naa sequequiaari Neyanujuhujaj:

“Jiyaniijanaa, quiaacuaajaari coteenujanaa casaa shipinijia. Quiaari jiya shipiniquiaari, puetunu jiya cajiniocua niqishano casaajanaano. ¹¹Puetunu quia

shipinishanojuanaari shaajeriquianohua. Quiajaniya saniniuujia, quiaari pueyaracaanu quiriqiano cutara. Puetunu quia shipinishano casaajanaari tariucushiri-quiano juhua toqueja. ¹²Naa na tariucushishacaritij, quiaari juhua toque mocua na jiunioriquiano, quia jatasocoriquiano. Quiaari naa miiniutianiyaquij taa pueyano jocaquiaacuaa na toque mocucuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuari maja puequeriquiano”.

¹³Pueyasoori Neyanu sequequiaarijuhujaj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajinijinio. ¹⁴Puetunu nojorijianaacuaajaari Pueyasora poonijionaa. Pueyasoori nojori jiyaramiquiquiaa Jesuucua tiuuriqiano pueya nojori cojuanura.

Maja cumaati Jesucristo tojiyashijiacara pa quiniu

2 ¹Naaratej, Jesucristojiniji pa tojishano tojijiaa pa quiriqia socua, paa mariqui Pueyasooquaj rupatereeri.

²Tariucuacaanu, Pueyaso seya caminiujuushano Pueyaso rootasano pueyarani, cuno rootasanoori seetanujanaa pueya tojishocoriquiano cutara. Cuno rootasano ruuretajaca, na miyashijiacajuhujaj, nojoriiri saniitiosaaquiaari. ³Pueyaso seya caminiujuushano tojiyashijiaa jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiaa pa quishacari? iMaja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pahuatasano. Pa Jiyaniijia nuhuaji, cuno pojori, canapute pa Jiyaniijajanaa tojiqiaari pueyaracaanuni, nojoriiri saniniuujia cuno rupaa caminiujuquiaari pajaniyara. Canaa sequetuquiaariiri nojori tojishanoori seetanu rupajanaa. ⁴Naajuhujaj, nojori pahuatasacari Jesucristojiniji, Pueyasoori nojori miitiquiaari jiyajeneta casaa jiyanojuaa na cumaacata, maatia pueya niishiniuria nojori pahuatasanoori seetanujanaa. Pueyari cunora jiyanojuaa shiriqitiquiaari queraatia Pueyaso cumaacata miishano nojori niqishacari. Naajuhujaj, Pueyasoori Jesuucua tiuujiaa niqitioquiaa na Sohuanu, tamaatia pa miiniuria na cumaacata, taa na paniyacuajani. Cunora, paa cumaati seetanujanaa Pueyaso rupaa Jesucristojiniji tojitiajaca quiyani.

Jesucristo mijiria rasaaquiaari pa puerana na quiniuria

⁵Cuno quiarinio jiyaranonijini teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijanucuarano nojori quiniuria. ⁶Naajaa, tariucuacaanu Pueyaso Rupaajinia naa naajiotasaaquiaari pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishirojonurani? ¿Casaara quia taraajeya pueyacuani?

⁷Quiaacuaajaari na shipiniquiaari rupaquijara socua cumaacaaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhujaj. ⁸Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casa cureenu quiniutianiya na jitiiasoo. Saniniuuja, paacuajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. ⁹¿Jesuurijataj? Pueyano na quiniuria, na Que Pueyasoori rupaquijiaara na miiquiaari socua cumaacaaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijiajanaa na quiniuria, jiyanoohua cumaacaraca na quiniurijahuaj.

¹⁰Jamueyashijia Pueyaso quiniucua, nojuajaari puetunu na muerasuranajuanaa panitiaquiaari na cojiniaa nojori quiniuria. Paniquiaariiri jatiqiu nata shuquiriaatia pa quiniuria, puetunu tama nerajaaja na shipinishano casaatajanaajuhua. Jeenucuasano pa quiniuria pa cojiniaa Pueyaso, nojuajaari jiyanoohua maninia miiquiaari pocuara. Neyanuuri na miitishacari naquiyu pa niti. Naacuajitij, Neyanuuri tojetaarucuaajanaa maninia quiquiaari Pueyaso muerasuranoo cuaji Tacuna na quiniuria. ¹¹Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuuaani. Cunora, Jesucristoori maja na caririquiniu na Que na sequenura pajaniyajiniji, “cua tapueyocuacata”. ¹²Tariucuaaanu Pueyaso Rupaajinia naa naajiotasano quiyacuajaari na sequesano na Que:

“Cua Quena, janiyari cua tapueyocuaca pohuatanutianiya ni taamuecate quiajaniyani. Janiyari quia saquiriojosano pueya niqiuara quia jaaquequejotanutianiya cua shuquiritasacari quiajaniya”.

¹³Tamaqui, Jesu sequesanoori naa naajiotasano quiyajuhua: “Janiyari cua Queecua tiuuja quiniutianiya”.

Naacuajitij, mijiria na quishacari, Jesuuri na Que Pueyasoo cuu tiuuquiaaricuaa taa pa tiuuquiaa nocuanijia. Socua naa naajiotasano quiyari tamaqui taa Jesu sequenutianiya, jiyocuacaanu na tiuquitiasacari pajaniya na shuquiriniutia: “Nio pojoriiri cua Que jiyatesano cua tapueyocuacata, nojori tojitianuucua janiya”.

¹⁴Cuaqueyaraca pa quiniucua, Sesaacaari cumaacaraca quiquiaari na shaajanura pajaniya, Pueyaso tojtiaashijia pa quiniucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. ¹⁵Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniucua. Paari niishiyacuajani, pa cusosacari, paari pa Jiyaniijata quiniuria quianutianiya. Cunora, majaari tari pa puerenu pa cusonura. Nocua tiuyashijia pueyari seetanujuanaa cusonu puerejaca cutara. ¹⁶Seetanujuanaa, majaari Jesucristo ninu quiquiaari Pueyaso seya na naacunura. Niqiaari cutaraari pueyacuaji na tacunura, noo pojoriicua, nocua tiuujiacate taa supuetana Abraham quiquiaari Pueyasoo cuu tiuujiacuaani. ¹⁷Maninia pa naacuna na quiniuria, Jesucristoori puetunu naquiyu miiniujianaa rejeretaquiaari mariyata taa narta pueya miishaquiaacuuaani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniucua, pa naata nocua tiuuniu pueyaracaanu na Que Pueyaso na jyanootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jyanooniu puetunu sesa pa miishanojinijianaa. ¹⁸Mijiria na quishacari, nojuajaari pueyaracaanu taraatia miishaquiaari. Nojuajaari jyanohua saniniujushaquiaari sesa na miiniuria juucuajuhua. Naacuajitij, nojuacuajaari jyanohua niishijia na cumaquiniuria pajaniya, paa jaara sesa miiniuria saniniujushaariquiani, paa jaara taraatia miishaariquajuhua.

Jesucristo cutaraari Jiyaniijiajanaa Moisésjiniji

3 ¹Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jyanootijia pajaniya, nocua pa tiuushacari. Cunora, jacaria pa niishiriojore socua Jesucristojiniji. ²Mijiria na quishacari, Jesuuri na Jiyarona tojijia quiquiaari pueyaracaanu, taa Moisés* quiquiaari Pueyaso tojijiacuaani, Israel pueya jitiiana na quishacari. ³Naajaa, Jesucristo cutaraari Jiyaniijiajanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuuja, Jesucristoori puetunu Pueyaso pueyanaa shipinina cutara. Naaratej, Jesucristo cuuara tojishaaria socua cutara. ⁴Puetunu pueyapuejanaari supuetanaaraca. Naajaa, Pueyasojuanaari nojori shipinina seetanujuanaa. ⁵Naacuajitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniucua. ⁶Saniniuuja, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijiajanaa. Nojuajaari nojori jitiia saa maniniaja, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuuquiaani, naajuhua, paa jaara shuquiriaatia na sashiquiaa na rionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiyu tariucuaaanu Pueyaso Rupaajinia pajaniyarajuhua:

“Pueyanaa, niaa jaara quiarijia tojiri quia Pueyaso sequesano niajaniya, majaari na sequesano ruuretajaca nia quiniu. ⁸Majaari naa nia quiniu taa nia supuetanaa quiquiaaricuaani, cariquia jiyajinia nojori camarucunee-jotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojijashijia nojori quishacari. ⁹Nojoricuajaari pueyaracaanu cua cumaacata cua miijosano niqituuquiaari. Cuarenta marijiaari shocojuquiaari, pueyaracaanu jiyajeneta casa cua miijosacari cua cumaacata, maninia cua jitiiasacari nojori. Naajaa, nia supuetanaari cua juaatijioquiaari, pueyaracaanu nojori taacanuasacari cucuaji. ¹⁰Janiyari cunora seetanujuanaa juaaquiaari puetunu cunoro pojoritijianaani. Naaratej, janiyari sequequiaarini: ‘Nojoriiri juhua cucuaji tashuquioono rucoojia tamajaaja. Nojoriiri cua niishitiojosano ruuretaquiaa saaja’. ¹¹Janiyari cunora jyanohua cua juaaniutia naa sequequiaarini: ‘Majaari nojori rupuenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijia nojori quiniuria cuata’”.

¹²Naarate cuarta Pueyaso pueyanaa, tama nia cuaqueyajaaja nia cojuare jyanohua, niaa mariqui Pueyaso Rupaacua tiuyashijiacara quiriouhari, Pueyasoo cuaji nia rupatenura puetunujuanaa. Pa Pueyasoo cuaji quijiajuhanaj. Nojuajaari na tojijashijia saniitiojua. ¹³Cunora, seetanujuanaa Pueyaso Rupaa tojtiajaca nia quiniuria, puetunu juucajanaa nia shiniujutiooriquia pueyaracaanu. Naa nia miiriquia nio pa quishacari Pueyaso jyanooniu pueyaequishacarijia taa na Rupaa sequeyacuajani. Naa nia shiniujutiooriquiatej nia jitiyaquiniucuaaji sesa miiniuria. Saniniuuja, niaa jaara sesa miijia quiri quia, tama sesa nia miiniujiaarijia nia sapojonutianiya Pueyaso tojijashijiacara nia jatanuhua. ¹⁴Jesucristoocua pa tiuuniucua, paari na cojiniaara jiyatesanoni. Naacuajitij, puetunu na jitiiasanojua-

naari puera quiriqiuanojuhuaj, paa jaara nocua tiuquuaa pueyaracaanuni, taa shushajanaa seetanujuanaa nocua tiuuijaca pa quiriqiuacuajani.

¹⁵Cunora, naa naajiotasano quiyari tariucuaaanu Pueyaso Rupaajinia:

“Pueyanaa, niaa jaara quiarjiaa tojiriqia Pueyaso sequesano nijaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojtiaashijiaa nojori quishacari”.

¹⁶¿Canapueeteri cuno pojorini, Pueyaso tojtiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojtiquiaari pocuaano. Naajaa, nojoriiri saaja na ruuretajaca quiquiaari. ¹⁷Nia niishiritioj, ¿canapueete cuno pojorini, Pueyaso juaatijiojuacarini, pueyaracaanu nojori camarucuneejotasacari cariquia jiyajiniani? Noo pojoricuajani sesa miijacatej. Nojoriiri cunora cusonuquuaari nojori quiojosacari nuacuaco cariquia jiyaco. Na cusonuusaquijia jamojosaaquiaariiri. ¹⁸Nia niishirijihuaj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqutionu panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojtiaashijiacajanaacuajaari naa sequesaaquiaariti. ¹⁹Naacuajitij, paacuajaari quiarjiaa maatia niishiyani, Pueyasocuaa tiuyashijiaa nojori quiniucua, majaari nojori tiuquitianu quiquiaari Pueyaso niqutionu panishano jiyajinia.

4 ¹Pueyasocuaajaari pa masuyajaa panaatia pa quiniuria nata. Cunora, jiyanoehua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoayaquishaareeri. Na sequesanoocua tiuyashijiaaari maja na rpuenu quiniutianiya Pueyaso, shuquiriaatia na quiniuria Pueyasota. ²Pueyaso rupaacuajaari tari pa niqiuara pohuatasaaquiarjihuaj, nocua pa tiuuniuria, taa pa supuetanaa niqiuara na pohuatasaaquiaaricuaani. Nojoriiri Pueyaso rupaa tojtiquiaari najuhuanaj. Majaari nocua na tiuutiuniu quiquiaari. ³Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniucua, janiyari cunora seetanujuanaa naa sequequiaari cua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’”.

Pajaniya saniniuujia, Jesuucua tiuuijaca pa quiniucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuaj: jiya shipininiu na tucuatenu nuhuaji, nojuajaari panaatia quiya. ⁴Cunora, tamaqui tariucuaaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatasaari puetunu na poonijiosanojuanaa, na nuhuaji nojuajaari séptimo juucajinia samaatequiaari”.

⁵Pueyaso sequesanoori tariucuaaanu na Rupaajinia naa pacutejosaaquiaari naajiotanu:

“Majaari cua tojtiaashijiaa rpuenu quiniutianiya janiya, panaatia nojori quiniuria cuata”.

⁶Naa sequesanojinijitij, maatia niishishiyari Pueyasoori pueya masuyajaa, nojori rpuenura nojuaja, panaatia nojori quiniuria nata. Noo pojori, coteenujuanaa Pueyaso Rupa pohuatasaaquiaariti, nojoriiri maja panaatia quijiacara na jatanishaanu quiquiaari, Pueyaso tojtiaashijiaa nojori quiniucua. ⁷Naa Pueyaso panitianuucua pueya, shuquiriaatia nojori quiniuria natajuhuaj, nojuajaari quiarjiaa masuyajaa pueya. Cunora, jiyanoehua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarjiaa tojiri Pueyaso rupaa, Pueyaso sequesano niaarano, majaari na ruuretanu”.

⁸Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasocua tiuyashijiaa nojori quiniucuaajuahuaj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriqia, ¿Pueyasotucua casaara quiarjiaa pa masuuriqiaa Jesuucua pa tiuuniuriani, seetanujuanaa panaatia quijiacara pa quiniuria natani? ⁹Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰Naacuajitij, cante Jesucristoocua tiuuijani, nojuajaari panaatia quijiaara jatanishaanutaniya. Majaari socua na tacaaniu quiniutianiya taa tama na cuaqueyajaaja na jiyanoonitianiya Pueyasoni. Naacuajitij, nojuajaari juhuajaniya quijia quiniutianiya, tarijia najuhuaana na poonijiosanojiniji, naatej, taa Pueyasojuaanaa samaatequiaari na poonijionu nuhuajicuaani. ¹¹Naaratej, panaatia pa quiniuria Pueyasota, seetanujuanaa na Rupaa tojtijiacara pa quiriqiaa quiarjiaa. Naa na rupaa tojtijiacara pa quiri paa mariqui saniitiosaareeri taa pa supuetanaa Israel pueya saniitiosaquiaaricuaani, Pueyaso sequesano tojijashijiaa nojori quiniucua.

¹²Pueyaso Rupaari samiitianijia, cumaacaracajaariuhua pueya jiuujajinia na poonijionura. Pueyaso Rupaari jiyanoehua socua shamaticuaja nijiniaquetucua mueruujiniji. Nijiniaquetucua mueruuri saaja na naata pa cuaqueya jiyatanu. Pueyaso Rupaa cutaraari pa sohuanu tohuariquijia, pa niishitijia tohuariquijiano. Na naata cuhatanu poojajinia jiyasohuaja pa niishiriojosano casa, poojajinia pa niishishoo casaano. Naacuajitij, Pueyaso Rupaari poojajinia sesa casa pa niishiriojosano nequesoreeja, jiyasohuaja pa miiniu panishano poojajinia pa niishiriojosanonio. ¹³Puetunu Pueyaso shipinishano casaajanaani, majaari na curenu quiniutianiya na nequesoreyaquishoo. Majaari quenaaja niquriyatua jamaaniu quiniutianiya nocuaji, nequesoreesoo na curenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaano.

Jesujuaanaari Pueyaso jiyanoonitijia pueya

¹⁴Pueyaso Niyanu Jesuni, nojuajaari na Que jiyanoonitijia pajaniya. Nojuajaari jiya cajiniocua tohuariquiquiaari na Queecua na tiuquiniuria. Nojuajaari quiarjiaa tii pocuara secojiya na Que. Naacuajitij, Jesucristoocua tiuuijaca pa quiniucua, maja cumaati pa pishiniu nocuaji. Paacuajaari na muerasuniyojuani. ¹⁵Jesu, Pueyaso pa jiyanoonitijiani, nojuacuajaari pocua taraajenu niishijia paa jaara saniniuujishaaquiarjihuaj sesa pa miiniuriani. Nojuacuajaari naa saniniuujishaaquiarjihuaj sesa na miiniuria juucua, naate taa pa saniniuujishaaquiaacuaani. Maja cutaraari sesa na miiniu quiquiaari quenaaja. ¹⁶Cunora, pa jiyanoonitijia Pueyaso pa rpueriquia pa puereyaquiniutia. Nojuacuajaari pa tojtiquiaa pa secojosacari nojuaja, na jiyanoonitijia pajaniya sesa pa miishanojiniji. Ritia pa cumaquiquiaaariuhua, pa rejeretanura paa jaara sesa miiniuria saniniuujishaaquiarjiani.

5 ¹Puetunu pueyacuara* secojonaa jiyaniijajanaari pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moisés cuajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutionu Pueyasorano masejojua. Naajuhuaj, pueya jaara sesa miiri, pueyacuara secojonaari pueya seya nanaca shootequiaa,

Pueyaso jiyanooniuria nojori, sesa nojori miishanojiniji.

²Pueyacuara secोजना quiniuucua pueyanohuhuj, nojuajaari sesa miijiajuhuaj. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyacquishacari maninia miiniujiuhuj. ³Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuaraani, sesa nojori miishacari. ⁴Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secोजना na quiniuria. Pueyasojuanaacuajaari tamajaaja saquiriojojua na panishano pueyano, cuno pueyano quiniuria pueyacuara secोजना. Pueyasocuaajaari naa saquiriojoquiaaricuaa Moisés tarajanu Aarón*, pueyacuara secोजना jiyaniijia na quiniuria. ⁵Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secोजना na quiniuria, Pueyaso na jiyanooniuria pajaniya. Tama Pueyasojuaraari na jiyatequiaari pueyacuara secोजना na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia mueratere jiyacuani cua saquiriojosano pueya Jiyaniijia quia quiniuria”.

⁶Pueyaso sequesanoori tamaqui tariucuaaanu na Rupaajinia naa naajiotasano quiyajuhuj:

“Pueyaracaanu rishijia quia quiniuucua, quiaari pueyaracaanu pueyacuara secoriquiano cutara, taa Melquisedecuaani”.

⁷Naa pueyano na quishacari mijiriatej, Jesucristoori jiyanohua saniniujiushaaquiaari. Naquiya na miyaquishaanuucua jiuucua, nojuajaari na Que Pueyaso secोजना quiaari jiyanohua na nujuquenuta. Jiyanohua martequiaari na Que na secोजosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniuucua, na Que sequequiaari: “Naajaa, quia miiri quia panishano cua Quena, taa quia panitiaquiaari miini janiyacuaani”. Na Queeri na tojiquiaari. ⁸Jesucristoori seetanujanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. ⁹Naacuajitij, tojetaarucuaajanaa maninia miijia na quiniuucua, nojuajaari pueyacuaji Tacunara quiquiaari, puetunu na tojtiajacajanaa na jiyatenura pueyaracaanu rishijiacara. ¹⁰Cunora, na Que Pueyasoori na jiyatequiaari pueyacuara secोजना na quiniuria pueyaracaanu, juhua Melquisedec*.

Jiyanohua puereetaari Jesu tojiniu tarinitianu

¹¹Janiyar queraatia socua nia niishitiojonu paniya Jesucristojinijini, nia niishiniuria nojuajaari seetanujanaa juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara nia quiniuuquihua. Niaacuajaari tari niyajetarucuaa tariucuaaanu nia tojishano. ¹²Tariucuaaanujiniji Pueyaso rupaa tojijia nia quiniuucua, čtaateni? Naa mariqui na niishitiojonuujuaca quiriquia tari. Saniniujia, niaari quiaritia paniya socua nia niishitiojosaaanuhua maatia niishishaatia casaa Pueyasojiniji. Niaari juhua naatujooriria quiriuhucuaa, juhua shipiyataaqui-shoojua. Naacuajitij, majaari nia naata jiyajeneta niishitiojosano casaa niishiniu. ¹³Naa maatia niishitiojosano niishijia nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojtiajacaa nia quiniu, maninia miijia nia quiniuria. ¹⁴Juhua tariucua mashiquioria nia jiyateriquiani. Mashiquiori cutaraari puetunu casaajanaa miaquenujuaca. Naajuhuj, puetunu Jesucristo niishitiojosanojuanaa niishijia nia quiriquia. Naa jaara na niishitiojosano tojijia quiriquia, saaja maninia miijia nia quiniuria, niaari maninia niishititianiya teyano casaate maniniani, teyano casaate sesa saniniujia.

6 ¹Naacuajitij, majaari juhua naatujoori nia quiniu pueyaracaanu. Seetanujanaa socua Pueyaso rupaa tojtiajacaa nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujanaa Jesucristojiniji niishitiojosano niishijia. čNiaatucua casaara socua niishitiojosaaarohua niojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanooniuria Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria nijaniya. ²Naajuhuj, niaacuajaari tari niishitiojosaaquiaari mojinia nia tiuquinishaanura Pueyaso pueya nia quiniuucua. Naaari niishitiojosaaquiaarijuhua Pueyaso pueyacu nia nianura nia juaashiquia nojoriucua nia secोजosacari, Pueyaso cumaquiniuria nojori. Naaari niishiyajuhuj, macunucuaari samiitiaconutanuhua. Nojorijinijinio saniniujia, Pueyaso tojijashijiacari pueyaracaanu saniitosocoriquiano jiyatesaanutaniya. ³Quiaritia, majaari socua nia niishitiojonu quiniutianiya nijaniya nio shusha cua sequesanojiniji nijaniyani. Pueyaso cumaquishacari janiya, janiyar socua jiyajeneta casaa Jesucristojiniji niishitiojonutaniya nijaniyani.

⁴⁻⁵Pueyano jaara Pueyaso Rupaa tojijashijia quiriuhua, najuhuaari na niishitiojonu pacutenuhua, nojuaja jaara tari Pueyaso Sohanu cuhuatasano jiuujiaraca quiquiaari. Najuhuaari nojuaja jaara tari jiyanooshano quiquiaari, nojuaja jaara tari Pueyaso Sohanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritia quiriuhua, nojuaja jaara tari Pueyaso cumaacaraca quijia quiquiaarijuhuaj. ⁶Jiyano pueyanotej, majaari tari na naata sesa miijia na quiniuucua taraajetesaanuhua, Jesucristoocua na tiuuniuhua seetanujanaa. Nojuajaari juhua Pueyaso Niyanu teetenu pacuteya niyacutesanojinia, naa na ruuretata nia quiniuucua. Naa Jesucristo tacartaja na quiniuucua, tamasaari Jesu rerequetequiaajuhuj. ⁷⁻⁸Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucuaajani, riyocuaanio. Pueyasoori najuhua maru niyotequiaa. Majaari cuno cuhuariquiaajinia nataacuaca muetunu. Jiyano cuhuariquiaatej, na camar cuuara catijataaranoj. Pueyasoori naa sanitiionutaniya nocua ruparequeno pueyajuhuj. Saniniujia, Jesucristo rupaa tojijiacani, nojori juhua maninia cuhuariquia. Pueyasoori maru niyotequiaa nocua, maninia na muetutenura tii natoosano casaa. Naacuajitij, na camaru queraatia mijajauraca quiniutianiya. Naajuhuj, Pueyasoori na tojtianu tarinitiaashijia shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojiniu tarinitiaquiaani

⁹Miriqui cua pohuatasano sesa cuhuariquiaajinijini, cunoori maja nijaniya cua panishano pueyanaa. Majaari cua taacanunu nijaniyajiniji. Niaacuajaari pa Jiyaniijia tojtiajacaa quiquiaa. ¹⁰Pueyasocuaajaari jiyanohua maninia. Nojuajaari maja na niyajetanu quiniutianiya maninia nia miishano niarta Pueyaso pueya, Pueyaso panijia nia quiniuucua, taa quiaritia nia miyajaacuajani. ¹¹Naatej, taa shitimia niarta Pueyaso pueya naacuajacuaaja nijaniyani, naajuhuj, janiyar nia panitiaani pa Jiyaniijia nia sashiniuria nia timiniutiajuhuaj, nojuaja jaara pa rijionuucua tiuquiriohuajaatijia. Naa niishititiquiaajaniuhuj, Pueyasoori jiyanohua maninia miiniutianiya pajaniya. ¹²Majaari nia macuhajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojori shamaatia Pueyasoocua tiuujia quiquiaari pueyaracaanu. Naquiya miiniu rejeretajacari quiquiaarijuhuaj. Naaratej, Pueyasocuaajaari tari maninia miiquiaa nojori, taa

seetanujuanaa na sequequiaari na pueyarano na miiniuriacuajani.

¹³Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranoj, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaa-cuajaari Jiyaniijijanaa. ¹⁴Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniyani. Janiyari quia jihuahuetutenutaniya jiyanoahua queraatiarani”.

¹⁵Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijiaatijia. ¹⁶Pueyanaa, niaacuajaari niishiyataa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaari: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacaritij, parta pueyanoori juhuajaniya pocua tiuuja. Majaari tari na taacanuunu pocuaji. ¹⁷Naajuhua, Pueyaso sequesacari taa seetanujuanaa na miiniutianiya na pueyarano, nojuajaari jiyanoahua panitiaquiaari pajaniya, na sequesanoocua pa tiuuniuria seetanujuanaa. Majaari na paniniu quiquiaari pa taacanuunura quenaaja na sequesanojinijia. Cunora, nojuajaari naa sequequiaari: “Jiyacuajaari Pueyasoni. Majaari cua niishiniu sapojonu. Cua sequesanoori seetanujuanaa”. ¹⁸Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujiaca pueyani, paari poojia cajitiquiaani maatia pa niishishacari, pocuaji Tacuanaa puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. ¹⁹Naa Pueyaso sequesanoocua tiuujiaca pa quishacaritij, paari juhuajaniya naquiya miiniu rejeretajaca quiquiaani. Sesaacari maja na naata Pueyaso jaariutianu pajaniya. Naacuajitij, paari juhua buqeni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhua, nocua pa tiuushanoni, nojuajaari jiyocuacaanu quia, niquishoojaariuhua na Que Pueyaso shuriucua na quiniuucua. ²⁰Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

Jesuuri pueyacuara secojona, taa Melquisedec quiquiaaricuaani

7 ¹Cuno Melquisedecni, nojuajaari Salem tiaca jiyaniijia quijia. Nojuajaari Pueyasojuaanaa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasaca tiacajinijinio jiyaniijianucuaani, Melquisedecri nocua tohuataquiaari Salem tiacajinijia. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyanoahua maninia”. ²Jiyacaritij, Abrahamri na paraa casami nitiariquiohua na quiquiojiniohuara. Naacuajitij, nojuajaari puetunu cuno casamijinijiojuanaa Pueyasora na riuriosano niqutioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjinijia nia niishiri. Pueyano rupaajinia, na sesaari sequeya, “Saaja maninia mijia jiyaniijia”. Naajuhua, na tiaca sesa Salemni, cunoori pueyano rupaajinia sequeya, “Juhuaajaniya quijia pueya tiaca”. Na sesaari naa quiquiaari na pueya jiuujia cajitijia na quiniuucua. ³Majaari tojetaarucujanaa na niishishaanu,

¿queraca quiquiaaritia, nuclaracajuhua, supuetanaaracanio? Majaari quenaaja na pohuatasaanujuhua na rasaanujinijia, na shaajenujinijio. Naacuajitij, pajaniyara, Melquisedecri juhua pueyaracaanu quijiajuhanajaj. Majaari na niishishaanujuhua, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjinijia. Naaratej, pa supuetana Abrahamri nareja na niqutioquiaari na paraa na shocotasano casamijinijio. Secaja niqutioquiaariiri taa Pueyaso rootaquiaari pa supuetanaacuajani, nojori niqutiojonura nera. Tariucuaacaanu, Pueyasoori pa supuetanaa niishitiojoquiaari nojori niqutiojonura secaja, puetunu nojori jiiitasano casaajinijijanaa. Naacuajitij, pueyano jaara diez casaa jiiitiare, cuaara Pueyasora niqutioora niquriyatujua. ⁵Pueyasocuaajaari supuetana Leví* niqiohuacuajinio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasorano pueya niqutiojosano masejojua nojori quiniuriajuhuaj. Naa Pueyaso sequesanoocuaajaari Moisés Rootasanojinia naajiotasaaquiaari. Abrahamcuajaari puetunu Israel niqiohuajanaa supuetana quiquiaari, maja saaja Leví supuetana. Naajaa, Leví niqiohuacuajinio supueno pueyari Pueyasora narta Israel pueya niqutiojosano masejojua. ⁶Melquisedecri pueyacuara secojona quiquiaarijuhuaj. Maja cutaraari Leví niqiohuacuajinio na supueno quiquiaari. Naajaa, seetanujuanaa pueyacuara secojona na quiniuucua, Abrahamri Pueyasorano na riuriotaca na niqutioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuaanaacuajaari tari Abraham sequequiaari, nojuajaari maninia na miiniutianiya. Naajuhua, Melquisedecri pa supuetana Abraham sequequiaari Pueyasoori jiyanoahua maninia miiniutianiya nojuaja. ⁷Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujunia pueyanoori socua tojishano pueyano maninia na miishocoriquiano pueyanojinijia. Naacuajitij, paari niishiyani Melquisedecri socua tojishano pueyano quiquiaari Abrahamjinijia. ⁸Quiarijiani, Pueyasorano pueya niqutiojosano masejojuacani, puetunu nojorijianaari shaajejaca pueya. Saniniuujia, tariucuaacaanu Pueyaso Rupaajinia pa serojosacari Melquisedecjinijia, juhua saminiojinijia pohuatashiyari. ⁹⁻¹⁰Nia niishirijuhua, Leví niqiohuacuajinio pueyacuajaari Pueyasorano pueya niqutiojosano masejojua, pueyacuara secojona nojori quiniuucua. Cua tojiri pueyanaa, Melquisedec naacuneetoosacari Abrahamta, Abrahamri jiyacari tari na cuaqueyajinia jiiitariquiaa puetunu nocuajinio supueriquiano pueyajanaa. Naacuajitij, Abraham niqutiosacari Pueyasorano na riuriotaca Melquisedec, pa naata sequenu Leví quiriqianojuanaari jiyacari Melquisedec niqutioquiaari, Abraham quiniuucua na jiyasorano tari.

¹¹Leviacuajinio supueno pueyari pueyacuara secojona quiquiaari, nojori miiniuria taa Moisés Rootasanojinia sequequiaaricujani. Naacuajitij, narta Israel pueya jaara sesa miiquiaari, nojoriiri sesa mijijaca seya puecooquiaari pueyaracaanu tama na camaruhucuarajaaja, nojori na jiyanooniuria Pueyaso. Naa nojori miishano jaara pueya jiyateriquia tojetaarucujanaa sesa miyashijiacara, paa maara tamonu pocuara secojoriquiano paniaquiriquiani. iTamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón* saniniuujia, nocuajinio supueno pueyano. Nojoriiri shaajejaca cutara. ¹²Aaróncuajaari narta pueyacuara secojona jiyaniijia jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhua, Moisés Rootasano niti na

quiniuria. ¹³Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucuaajiniocuaja, saniniuujia tamonu neyanuucuaajiniojaarohuaj, teyanooacuajinio quenaaja niquiriyatu pueyacuara secोजना supueyaquiquiaaricujani. ¹⁴Maatia niishishiyacuajaari, pa Jiyaniijiaari Judá* niquiohuacuajinio supueno quiquiaari. Judaari Leví tarajanucuaaja. Moisés pohuatasacari pueyacuara secोजनाajini-jini, majaari quenaaja Judá na jiyaniquiniu quiquiaari.

¹⁵Quiarinjiani, quiarinio pocuara Secोजना quishacari juhua Melquisedec, paari maatia niishiyani Leví niquiohuacuajinio supueno pueyacuara secोजनाari sanitishaaquiaari. ¹⁶Nojoriiri pueyacuara secोजनाa quiquiaari saaja Leví niquiohuacuajinio supueno pueya nojori quiniuucua. Jesucristo cutaraari pocuara secोजनाa jiyatesaaquiaari pueyaracaanu rishijia na quiniuucua. ¹⁷Cunora, Pueyasoori naa sequequiaari nojuajiniji: “Quiaari pueyacuara secोजना quiniutianiya pueyaracaanura, juhua Melquisedec”.

¹⁸Naacuajitij, puetunu Moisés rootasanojuanaa pueyacuara secोजनाa pueya miishocoriquianoori tari jatasaquiaari, najuhuaana na quiniuucua. Cuno miishanoori cumacaaju quiquiaari pueya na jataniniuria. ¹⁹Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojtijajaca. Quiarijia saniniuujia, paari Pueyaso rupaa Jesucristojiniji jiiitiaani. Nocua pa tiushacari, Jesucristoori pueyaracaanu pa jiyanootiquiaa na Que, juhujaniya pa rupenura nojuaja.

²⁰Na Que sequesacari Neyanu quiniuria pocuara secोजना pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secोजनाa na Que. Saniniuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secोजनाa nojori quiniuria. ²¹Saniniuujia, Neyanujiniji na sequesano, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jatanini quiniutianiya. Neyanu sequereecuajaari: ‘Quiaari pueyacuara secojoriquiano pueyaracaanu’”.

²²Naacuajitij, pueyaracaanu na Que shuriucua Jesu quiniuucua pocuara na secोजनाa, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujinijiiri socua jiyanoohua maninia Moisés Rootasanojiniji. Cunoori pueyaracaanu rishijia Jesu quiniuucua. ²³Saniniuujia, Leví niquiohuacuajinio supueno, queraatia pueyacuara secोजनाa quiquiaari pueyaracaanu rishiyashijia-ca nojori quiniuucua. ²⁴Jesu cutaraari shaajeyashijia. Naa pocuara secोजना na quishacaritij, majaari quenaaja tamonu sanitini quiniutianiya nojuaja. ²⁵Naacuajitij, nocua pa tiushacari, nojuajaari pueyaracaanu pocuara secojoquiaa, tojetaarucujanaa maninia miijiacara pa jatanishaanura, Pueyaso pa rupenura. Majaari pocuara na Que na secोजनाa na tarinitianu quiniutianiya, shaajeyashijia na quiniuucua.

²⁶Jesuuri namitia pocuara secोजना na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhuanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuacaanu quijiaara na jiyatequiaari, Jiyaniijijanaa na quiniuria na shuriucua, tii na secोजनाa na Que pocuara.

²⁷Leví niquiohuacuajinio supueno pueyacuara secोजनाa jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuaru saniniuujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuaru, cunojuanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaa-nu puetunu sesa na miishanojinijijanaa. ²⁸Moisés Rootasanojinia, Pueyasoori tii sequeyacuaja canapuate pueyacuara secोजनाa jiyaniijiaara jiyateshiyani. Puetunu cuno pueyacuara secोजनाa jiyaniijianucujanaari sesa miijiaa quiquiaari, juhua puetunu pueyajuhuj. Jiyanoohua Moisés nuhuaji, Pueyasoori saniniuujia tama Neyanujuaaja jiyatequiaari pocuara secोजनाana na quiniuria pueyaracaanu. Na Que tojjia na quiniuucua pueyaracaanu, naquiya miiniu rejeretaja na quiniuucujuhuj, naacuajitij, nojuajaari tojetaarucujanaa maninia, pocuara secोजनाa na jiyatesaanura.

Quiarinio Pueyaso Rupaacua pa tiushacari, Jesuuri pa jiyanootiquiaa na Que

8 ¹Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secोजना, nojuajaari na Que miaquetajara cajiquiaari jiyocuacaanu. ²Nojuajaari tii na Que secojoquiaa pocuara Pueyaso Quishaquijijanaa. Cunoori Pueyasojuanaa shipinishano quiquio, maja pueyano tiasano. ³Puetunu pueyacuara secोजनाa jiyatesaaquiaari nojori masejonura narta pueya poosano casaa, Pueyasora nojori niquitiojosano. Naajuhuj, nojoriiri seya puecoojuaca, Pueyaso nojori jiyanootiuria. Naacuajitij, Jesucristo quiniuucua pueyacuara secोजनाjuhuj, nojuaja cuara casaa jiiitiaara, Pueyaso na niquitiosocoriquianojuhuj. Cuno casaacuajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴Leví niquiohuacuajinio supueno pueyacuara secोजनाacuajaari pueya nitiasano nojoriicua masejoquiaajaa, Pueyasora nojori niquitiojosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiriqiaaja, nojuaja maara pueyacuara secोजना quiyaquiriqiaaj. Pueyacuara secोजनाacuajaari queraatia quiya. ⁵Pueyacuara secोजनाa jeecejosano casaa Pueyaso Secojoua tajinia nojori jiiitiasano, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojoua suhuorotu, puetunu na casamitijajanaano, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacia puetunujuanaa, naatej, taa cua niquitiquianucuaaja quiajaniyani, Sinaí tuhananuucua quia quishacari”.

⁶Pocuara Secोजनाana miishanoori jiyanoohua maninia socua pueyacuara secोजनाa Leví niquiohuacuajinio supueno miijiosanojiniji. Pocuara Secोजनाa cutaraari tama na cusonutajaja pa jiyanootiquiaari Pueyaso. Naacuajitij, Pueyaso rupaa Jesucristojinijiiri jiyanoohua socua maninia Moisés Rootasanojiniji.

⁷Pueya jiuujia jaara na naata quiriqiaa seetanujuanaa sesa miyashijiacara jatanishano Moisés Rootasano tojjijaca nojori quiniuucua, Pueyaso maara quiarinio rupaa niishitiyaquiquiaari pajaniya. ⁸Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojinuu. Cunora, tariucuacaanu pueyara Pueyaso sequesano caminiujiunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijino

pueyani, Judá jiyajiniinio pueyanio. Teyano pojoriti nocua tiuyani, nojoriiri seetanujuanaa cua pueya quiniutianiya. ⁹Quiarinio cua rupaari tamaatia quiniutianiya Moisés cua niishitiojosano rupaajiniji puetunu Israel pueyarajanaa. Jiyacaritij, janiyari nojori mashiQUIQUIAARI Egipto jiyajinijini. Juhua nojori que, janiyari nojori jaatucunuuriQUIAAR juucuaani nojori cua niqutiosocoriquiano jiyajiniara. Saniniuujia, nojoriiri Moisés cua rootasano nojoriiri tojinuu paniyaQUIQUIAARI saaja. Janiyari cunora nojori cartequiaarini'. Jiyaniijia Pueyasoori naa sequeree. ¹⁰Socua sequeyari: 'Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutianiya nojori jiuujiajiniani. Naacuajitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojitiajaca nojori quiniuria. Naacuajitij, janiyari nojori Jiyaniijiajanaa quiniutianiyan. Nojoriiri saniniuujia cua pueya quiniutianiyacujua. ¹¹Jiyacaritij, pueyano jaara janiyajiniji pohuatunu paniri narta pueyano, na cojiniajuhuaj, tapueyocucanio, cunoori najuhua quiniutianiya. Puetunu pueyapueja-naacuajaari tariucua cua niishijaca quiniutianiya; jiyaniijianucua, poonijiotasano pueyanio. ¹²Janiyari nojoriicua taraajeja quiniutianiyan. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiyan'".

¹³Naa Pueyaso sequesacaritij, taa nojuaja quiarinio na rupaa niishitiniutianiya pajaniyani, nojuajaari tariucuaaanu Moisés na rootasano jiyateQUIAARI tariucuaaneera. Naacuajitij, Moisés Rootasanoori quera shaajasaanutianiya puetunujuanaa.

Tariucuaaanu Moisés suhuorotesano Pueyaso quiQUIORANONI, cunoori juhua jiyocuaaanu Pueyaso quiQUIOJUHUAJ

9 ¹Tariucuaaanu, Pueyasoori Moisés sequeQUIAARI mijiria na quiQUIORANO na suhuorotenura. Na niishitiojoQUIAARIJAARIUHUA taa pueyacuara secojonaa poonijionutianiya cunoo na quiQUIOJINIANI. ²Pueyaso Secojojua suhuorotuuri caapiQUII sohucacacua quiQUIAARI. Samari nujuatacojuaari coteenu sohucacajinia quiQUIAARI, miaquejania, tee Pueyaso tacoji pan niojosaQUIAARI pueyaracaanucuaajani. Cuno sohucua sesa quiQUIAARI "Pueyaso Shuriucua QuiQUIO". ³Cuno coteenu sohucua puequeetujiniani, tii tunasano quiQUIAARIIRI shiquiaruque toque. Cuno toque tamajiria quiQUIAARIIRI Pueyaso quiQUIOJUANA CUTARA. Naaratej, na sesa quiQUIAARI "Pueyaso QuishaQUIJIANAA". ⁴Pueyaso QuishaQUII tacoji nujuatajaari juhuacutu, orojiniji shipinishano. CuniQUII catejaari shanohua jaanutaja Pueyasora. Pueyaso QuishaQUIJIANAA cutarani, tii nujuatajaari puereetuca casaa, juhua caaja niQUISHANO. Naananeecajiniji shipinishaQUIAARIIRI. Puetunu na cuaqueyajanaari orota mishiQUIOSANO quiQUIAARI. Na jiniacuma, casamiiri mii racatasano quiQUIAARI. Pataconiyojua orojiniji shipinishanoori tii cajitiaQUIAARI "maná*". Manaari quiQUIAARI Pueyaso tinishano casaa, Israel pueya miaquesocoriquiano cariiQUIA jiyajinia nojori camarucuneejotasacari. Mii matariQUIAARIUHUA Aarón natata catuutianohua, puetunu na jajautajanaa. Mii maturiQUIAARIUHUA sai neeca quejasano, nocua Pueyaso naajiotasano na rootasano, Moisés na niqutiojosano. ⁵Cuno caaja tiotiu caco nujuatejosano quiQUIAARIIRI caapiQUII shipinishano casaa, nesuhuaraca, juhua Pueyaso seya niQUISHANO. Nojori nesuhuari coqueetesano quiQUIAARI. Teecojuaari, teje Pueyaso shacantuuca mueranacujuQUIAARI MoisésCUAJANI. Cuno caaja tiotiuuri seya nanaca majiriutiasaQUIIJUHUAJ, Pueyaso jiyanooniuria puetunu Israel pueyajanaa. Tariucuaaja puetunu cunoo casaajiniijianaa cua pohuatasano niAJANIYA.

⁶Pueyaso Secojojua tia jaara tari naa maninia tiasano quiQUIAARI puetunu na casamitiajanaa, na nuhuaji, pueyacuara secojonaari pueyaracaanu tiuQUIIJOQUIAARI Pueyaso Shuriucua quiQUIOJINIA. Nojoriiri tii tiuQUIIJOQUIAARI nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiQUIAARI Pueyaso QuishaQUIJIANAA sohucacamaa. ⁷Saaja nojori jiyaniijia cutaraari tii tiuquiQUIAARI saaja rupaQUIJIA puetunu marijarajanaa. Na tiuquishacari Pueyaso QuishaQUII, seya nanaca pataQUIAARIIRI Pueyaso jiyanooniuria nojuaja, narta Israel pueyanio, sesa nojori miishanojiniji. ⁸Naa Pueyaso QuishaQUII quiniucua mishiQUIONUCUA pueyacuajitij, Pueyaso Sohuanuuri pa niishitiya, pueyari juhuanojuaja maja na naata ruPUENU quiQUIAARI Pueyaso. ⁹Naacuajitij, puetunu cunojuaanaari quiQUIAARI juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijiasano casaajanaari miriqui miishano quiQUIAARI saaja. Naajuhuaaj, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiQUIAARI. Naacuajitij, cunoori maja na naata cunoo pueya jiuujia jeeCANU seetanujuanaa, juhuajaniya nojori ruPUENURA Pueyaso. ¹⁰Naaratej, cunoo tariucuaaanu rootasanoori saaja panishaQUIAARI Pueyaso cuara na sanitiquiaarijiaatijia quiarinio rupaata. Cuno tariucuaaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuaaj, nojoriiri niishitishaQUIAARI taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niQUIARA. Puetunu naa pueya miishanojuanaari maja na naata pueya jiuujia jeeCANU sesa nojori miishanojiniji.

¹¹Quiari naataja saniniuujia, Jesucristoori pocuara Secojonajanaara jiyatesaQUIAARI, Pueyasojiniji na masenura Pueyaso jiiitasano pajaniyarano. Cuno quiQUIO, tee na secojoQUIA na Que pocuaracuajani, cunoori seetanujuanaa Pueyaso quiQUIO jiyocuaaanu, maja pueyano tiasano. ¹²Naa Cristo tiuquishacari na Que quiQUIOJINIA Pueyaso na jiyanooniuria pajaniyatej, nojuajaari maja na tiuquitianu quiQUIAARI cabra nanaca, juunu niQUIOHUA nanacanio. Nojuaja cutaraari tama na nanacatajaaja Pueyaso jiyanooniQUIAARI pajaniya. Nojuajaari maja pueyaracaanu na tiuQUIIJONU na Queecua, taa mijiria pueyacuara secojonaa jiyaniijianucua miiQUIAARICUAANI. Maja. Nojuajaari na Queecua tiuquiQUIAARI puetunujuanaa. Naa pocuara na cusunucuatej, na Queeri Neyanuucua tiuQUIJACA jiyanooniQUIAARI puetunujuanaa. Naacuajitij, majaari Pueyaso shuriucuaaji pa taanuusaanu quiniutianiya. ¹³Pueyasoori Moisés niishitiquiaari, pueyano jaara macu masaQUII tiuQUIMIA, jaara na quiarejuhuaj, jiyacaritij, nojuajaari juhua curuutuUCA Pueyasora. Naacuajitij, cunoo pueyanoori maja na naata narta pueya ruPUENU. Majaari na naata Pueyaso Secojojua tiajinia tiuquiniujuhuaj. Naajaa, nojuajaari na naata jeequesano quiniuhua, seru nanaca jaara nocua majiriutiasaQUIAARI. Cabra nanaca, juunu nanaca, niyacoo juunu catijiasano juacani, puetunu cunojuaanaari maninia quiQUIAARI pueyara, juhua jeequesano nojori quiniuhua Pueyasora. ¹⁴Naa pueya cuaqueya quiniucua juhua jeequesano saaja seya nanacatacuaatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajiniijianaa. Naatej, taa pueyacuara secojonaa jiyaniijianucua tiuquitiaQUIAARI seru nanaca Pueyaso QuishaQUIICUAANI, pueya jiyanooshaanura, Jesucristoori naa miiQUIAARIJUHUAJ. Pueyaracaanu QUIJIA na quiniucua, Jesucristojuanaari tama na nanacajaaja tiuquitiaQUIAARI Pueyasocua, pa jiyanooshaanura puetunu sesa pa miishanojinijianaa. Nojuajaari tojetaarucujanaa sesa miyashijia quiQUIAARI. Naacuajitij, na nanacaari poojia cajitiquiaa, nocua pa tiushacari. Majaari socua pa jiyaniinu pa naata tama pa cuaqueyajaaja jiyanooniniu Pueyaso tama pa

miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

¹⁵Jesucristo cusonuucua pocuara, nocua pa tiuushacari, nojuajaari pa jiyanoootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasoocua tiuujiaa mijiria Jesu niyacarijiani, sesa nojori miishanoori jiyanooshaaquaari Jesu cusonuta quiari naatajajuhuj. Naacuajitij, puetunu Pueyaso saqiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqui pa quiniuria nata.

¹⁶Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaanura maninia, teyano pueya pa panitiaa nojori jitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricuajani, saminio pa quishacarijia. ¹⁷Naacuajitij, saminio pa quishacarijia, najuhuaanaari pa naajiotasano. Pa shaajesacari, jiyacari cutara pa casamiiri niqutiojosano.

¹⁸Tariucuacaanu naajuhuj, seya nanacaari shootesaaquaari, Israel pueya niishiniuria Moisés Rootasanoori seetanujuanaa, nojori tojishocoriquiano. ¹⁹Naa quiquiaariiri: Moisésri puetunu Pueyaso rootasanojuanaa nojuaja caminiujuquaari puetunu Israel pueya niqiarajanaa. Na nuhuaji, Moisésri juunu niqiohua nanaca, cabra nanaca cajitiquiaari mohuacata. Cunojinia shitiaquaari borreso cajaca naatusu hisopo* cashacucuaataari. Cunota, mohuacanacu majiriutuiaquaari Pueyaso Rupaa na naajiotasanoocuaari, puetunu Israel pueyacuajanaano. ²⁰Jiyacarijij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaa quirini”. ²¹Moisésri Pueyaso Secojoua tiaacua majiriutuiaquaari nanacajuhuj, puetunu Pueyasora poonijiotajara shipinijosano casamiicuajanaano. ²²Moisés Rootasanojinijii niishishiyacuajani, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquaiaa Cristo cusonuucua pocuara

²³Mijiria Pueyaso Secojoua tia, puetunu na casaatajanaa quiniuucua juhua jiyocuacaanu casaa naaqui, seya nanacaari maninia quiquiaaricuajia cuno mijiria casami quiniuria jeequesano. Saniniujujia, jiyocuacaanu casaa quiniuria jeequesano, socua maninia nanacaari panishaaquaari seya nanacajinijii. ²⁴Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. ²⁵Mijiria pueyacuara secojonaa jiyaniijianuuaari puetunu marijijarajanaa pueyaracaanu tiuquijioquaari Pueyaso Quishaqui saaja seya nanacata, pueya na jiyanoootiniuria Pueyaso. Jesucristo cutaraari maja naa na miiniu quiquiaari. ²⁶Jesu jaara Pueyaso pa jiyanoootiriquia puetunu marijijarajanaa taa pueyacuara secojonaa jiyaniijianuua miiquiaricuani, nojuaja maara jiya shipinishaanujinijii mosaariquia puetunu marijijarajanaa. Quiari naataja saniniujujia, Jesucristoori mijiria rasaquaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianuhua monu. Naa na mosaanuucuatej, cunoori tariucuaja puetunu nocua tiuujiaa pueyajanaa jiyanooshaanura. ²⁷Naatej, taatucuaa pueyani, nojoriiri shaajecoriquiano. Majaari nojori samitiaconuhua mijiria nojori quiniuhua, socua na cusonuhua juhua coteenu na cusonu. Nojori

shaajenu nuhuaji, nojoriiri saaja sashiya Pueyaso nequesoreenura nojori. ²⁸Naajuhuj, naa Jesucristo mosaanuucua jiyacarijij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojinijii. Naacuajitij, pocua na muetasacariuhua, majaari jiyacari socua na mosaanu quiniutianuhua pueya jiyanooshaanura sesa nojori miishanojinijii. Jiyacarijij, nojuajaari saaja nocua tiuujiaa rijionuucua tiuquiniutianuhua, noo pojoriria canapueete na sashiyacuajani.

10 ¹Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojitiajaca pueya cutaraari puetunu marijijarajanaa na seya puecootequaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaa pueyara na jatanishaanu seya nanacata. ²Naajuhuj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³Naa seya puecoosacari puetunu marijijarajanaa Pueyaso jiyanooniuria pueyatej, cunoori saaja nojori niishitiqiaariuhua tarijia nojori miishano sesa. ⁴Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

⁵Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuaajani niishiyani, majaari quioojia quia cajitiniu quiquiaa seya puecoosacari quioacara, puetunu nataacuacajinijii pueya niqutiojosacari quiarajuhuj. Saniniujujia, quiaari cuaqueyaraca cua quiniuria cua jiyateree, quioacara cua mosaanura. ⁶Majaari quia timiniu quiquiaa seya catijiasacari quioacara, naajuhuj pueya shootesacari na seya nanaca, quia jiyanooniuria nojori sesa nojori miishanojinijii. ⁷Naaratej, janiyari quia sequeyani: ‘Niya quiyacuajani quia cua miiniuria quia panishano cua Que Pueyasonaa, taa janiyajinijii tariucuacaanu naajiotasaaquaaricuajani’”.

⁸Moisés Rootasanojinijii pueyari maatia niishitiojosaaquaari nojori puecootenura tama na seyajaaja Pueyasooacara, na nataacuacajinijinio nojori niqutiojonura nerajuhuj. Nojoriiri niishitiojosaaquaarijuhuaj nojori catijianura na seya Pueyasooacara, tama nojori seya nanacajaaja shootesaanurajuhuj, sesa nojori miiniuucua. Naajaa, Jesucristo sequesanojinijii, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. ⁹Nocuaaji, Jesucristoori naa sequequiaari na Que: “Niya quiyacuajani quia, cua miiniuria quia panishano”. Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhua seya puecoosaanura socua. ¹⁰Pueyaso tojijia na quiniuucua, Jesucristoori tama na cuaqueyajaaja tarinitiaquaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijiacara pa jiyatequaari, seetanujuanaa na pueya pa quiniuria tama nerajaaja.

¹¹Israel pueyacuara secojonaa pueya poonijosacari Pueyaso Secojoua tiajinia, nojoriiri pueyaracaanu seya puecooquiaa narta pueya miishanoocua sesa. Naajaa, naa nojori miishanoori maja seetanujuanaa na tuujunu pueya miishano sesa. ¹²Saniniujujia, Jesucristoori tama na cuaqueyajaaja tarinitiaquaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na

pacutesaanu quiniutianihua monu. Na cusonuucua pa niti, puetunu nocua tiuujiaa pueya sesa miishanojuanaari tojetaarucujanaa jiyanooshaaquiaa. Naa na tucuatenu nuhuaji Pueyaso miiniu panishano pueratej, nojuajaari na Que miaquetajara cajiquiaari. ¹³Quiaritia tii sashiyari, Pueyaso cuara na paraa shocotare puetunujuanaajaatijaj. ¹⁴Naa niquiriyatu pueyano mosaanuucuatej, puetunu nocua tiuujiaa pueyajanaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵Pueyaso Sohuanucujaari naa pa niishitijahuaj naa Pueyaso sequesacari tariucuaaanu na rupaajinia:

¹⁶“Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiushacari. Janiyari quiarinio cua rupaa nianutianiya nojori jiuujiajiniani, na tojjijaca nojori quiniuria. Naajuhuaj, janiyari juhua na naajiotanutianiya nojori niishitijajiniani. ¹⁷Janiyari puetunu sesa nojori miishanojuanaa niyjetanutianiya seetanujanaani’”.

¹⁸Naacuajitij, sesa pa miishano jaara tari seetanujanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa rupuerer jeequesano poojiata

¹⁹Naacuajiti cuara pa panishano cuarta Pueyaso pueyanaa, quiaritia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. ²⁰Nojuajaari quiarinio nuucua pa jaatiaquiaa na Queecua. Nojuajaari juhua pocuaji nuunuquiaari Pueyasooocua. Mijiria Pueyaso Secojoja tijiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaquiniuria Pueyasooocua. Cuno shiquiaruque toque cutaraari sutequiaari Jesu cusosacari. Cunocujaari pa niishitiya, pocuajiri juhua nuunusano quiya Pueyasooocua. Neyanu Jesucristocujaari cuno quiarinio nuu. Nocua pa tiushacari, paari pueyaracaanu rishijiacara jatanishaaquiaani juhua nojuajuhuaj. ²¹Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²²Cunora, Pueyasooocua pa catecanoriquia seetanujanaa pa paniniutia nojuaja. Nojuaja pa secojoriquia, seetanujanaa nocua pa tiuuniutia, maja quenaaja nocuaji pa taacanunuta. Naa pa rupuereriquia nojuaja, jatanishano jiuujata, juhua poojiaacua Jesu nanaca majiriutiasano quishacari. Naajuhuaj, puetunu sesa pa miishanojuanaa cuara jiyanooshano quiiri, naatej, taa pa cuaqueyacuani, pa nanasacari maniniuniacu mohuacata. ²³Niaa jaara moojinia tiuquinijosaaquiaari, niaari maninia pohuataquiaari pueya niqiuara Jesuucua nia tiuuniujiniji. Nocua nia tiushacari, niaacuajaari niishiya puetunu Pueyaso sequesanojuanaari pajaniyara tohuateenutianiya, pueyaracaanu shuquiriaatia pa quiniuria nata. Majaari nia taacanunu nocuaji. ²⁴Parta Pueyaso pueyacuatacaajaca pa quiriquia. Panijiacua pa quiniuria pa shiniujiutiooriquia, maninia miijiacua pa quiniuriajuhuaj. ²⁵Noojiaqueya parta Pueyaso pueyari tari jiitiquiocanu maja na rerejonura narta Pueyaso pueyata. Majaari naa nia miiniujihuaj. Maninia cutaraari pueyaracaanu pa rerejonura parta Pueyaso pueyata, pa shiniujiutioonura. Naa pa miiriquia pueyaracaanu cutara, pa niishishacari pa Jiyaniijia tiuquiniuri tari catecanoya.

²⁶Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa miijioquiaa tama pa panishacarijaajani, ¿cantucua socua pocuara cusonu pacuterohua saajanihuaj? Shaaqui. ²⁷Naa sacuraatia miijiacani, nojori cuara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanooshano saniitiosaanutianiya. Narta Pueyaso paraata

cojiritiasaanutianiya quejoonu mani quiquiojiniaari pueyaracaanura. ²⁸Pueyano jaara Moisés Rootasano tojiaquiquiaari, querajaa pueya jaara nocuara saquiriojotaquiaari, nojori sequesanoori seetanujanaa quiquiaari. Naacuajitij, majaari nocua na taraajenu quishaaquiaari na mosaanura. ²⁹Moisés Rootasano tojiyashijiacua jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutianiya, na nanaca shootesaanu jiyatejaca juhua najuhuanaratej? ¿Noo pojoritiiri jiyanooshaanutaniyahuhuaj, Pueyaso Sohuanucua rimiaaquejaca sacuraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacuajaari Pueyaso jiyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanooshano saniitiosaanutianiya Moisés Rootasano tojiyashijiacua pueyajiniji. ³⁰Paacuajaari tari tojiquiaari naa Pueyaso sequesanooni: “Janiyacujaari naminiani. Janiyari sesa miijiacua saniitioanutianiya”. Naa naajiotasaaquiaarihuaj: “Pa Jiyaniijia Pueyasoori na pueya nequesoreenutianiya”. ³¹¡Jiyanooshano puereeta quiniutianiya cutaraari Pueyaso jiyanooni ruuretajaca pueyara, Pueyaso nequesoresacari nojori!

³²Pueyanaa, tariucuaaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiaari saaja. ³³Noojiaqueya nijaniyajinijioori cararaatia macaatisaaquiaari. Niaari pueya niqiuara naquiya miishaaquiaarihuaj. Narta Pueyaso pueya niqishacari nia nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴Naajuhuaj, narta Pueyaso pueyajinijioori jaara nujuatejosano quiquiaari nujuatejojuajinia, Jesu tojitiacua nojori quiniucua, niaari nojoriicua tiuquijioquiaari, nojori nia cumanjianura nocua nia taraajenuucua. Naajuhuaj, nia paraa jaara nia jiitiasano casami riuticojoquiaari tama nojoriiajaaja, nojori soosano Jesu pueya nia quiniucua, niaari juhuajaniya nojoriiri tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiitiaa socua maninia casaa cuno casamijiniji, pueya jaariutiasano nijaniyajinijioori. Cuno, Pueyaso jiitiasano niaaranoni, cunoori shaajeyashijia casami cutara. ³⁵Naatej, taa juhuajaniya naquiya miiniu rejeretajaca nia quiquiaaricuaajani, Pueyaso sequesanoocua tiuujiaa nia quiniucua, naa Pueyaso sequesanoocua tiuujiaa nia quiriquia pueyaracaanu. Pueyasocujaari jiyanooshano maninia miiniutianiya nocua tiuuniu tarinitiaashijiacua. ³⁶Naquiya nia miishacari pueyaracaanu, juhuajaniya nia rejeretariquia saaja, maninia nia tucuatenu puetunu Pueyaso panishano nia miiniuriajanaa. Naacuajitij, niaari puetunu Pueyaso sequesanojuanaa masenutianiya, pueyaracaanu shuquiriaatia nia quiniuria. ³⁷Tariucuaaanu Pueyaso sequesanoocujaari naa naajiotasano quiya:

“¡Niaaj! ¡Quera tiuquiya pueyacu Niriquiano! Maja na tarishiniu. ³⁸Cua jiyanooshano pueyari pueyaracaanu rishijiacara jatanishaanutianiya saaja Quiyanuucua nojori tiushacari. Saniniujia, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

³⁹Cuno pojoriiri saniitiosocoriquiano seetanujanaa. Pajaniya saniniujia, paa cutaraari maja jiyano pueyajinijioori. Paacuajaari pa Jiyaniijiaacua tiuujiacani, pueyaracaanu nata pa quiniuria shuquiriaatia.

Pueyasooocua tiuuniujiniji pohuatasano

11 ¹Pueyaso sequesanoocua pa tiushacari, paari niishiyani paari puetunu Pueyaso sequesanojuanaa masenutianiya. Nocua pa tiushacari, paari maatia niishiyani puetunu na sequesanojuanaa pajaniyaranu pa niqishoo casaani, cunoori seetanujanaa quiya. ²Noojiaqueya pa

supuetanaajinijiniori seetanujuanaa Pueyaso sequesanoocua tiuujiaca quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³Pajaniyara naajuhuj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipinishaquiaari niquishoo casaajiniji.

⁴Supuetana Abel tiuuniuucua Pueyasoocua, Pueyasoocua na catijiasanoori socua maninia quiquiaari Pueyasora tarajanu Caín catijiasanojiniji. Naa Abel tiuuniuucua Pueyasoocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Cafnri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasoocua pa tiuuniuria taa nojuaja tiuquiaricuaani.

⁵Supuetana Enoc quiniuucua Pueyasoocua tiuujiaca, Pueyasoori puetunujuanaa na riquiaari jiyocuacaanu, mijiria na shaajeyaquiniuucua. Narta pueya pajesacari nojuaja, majaari tari na quini quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajiniji pohuatashiya-cuaja, Enocnaari Pueyaso timitijia pueyano quiquiaari mijiria na quishacaritij. ⁶Seetanujuanaari, paa jaara Pueyasoocua tiuyashijia quirini, majaari pa naata timitini Pueyaso. Naacuajitij, cante Pueyaso niishiniuucua jiaatiaani, nojuaja cuara tiuuria Pueyasoori seetanujuanaa quiija. Nojuaja cuara tiuuriajuhaaj, Pueyasoori na secojonuujuaca tojiquiaa. Nojori panishano miiquiaa nojoririjaarijuhaaj.

⁷Pueyasoori supuetana Noé numootequiaari nojuajaari nio jiya pajaashitaniniutianiya, puetunu mijiria sesa miijiacajanaa na shaajanura. Pueyasoori na sequequiaarijuhuaj puereetua buque na shipininiuria tii na tacatajara pajaacuaji. Jiyacaritij, Noeri maja na niishini quiija pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquicohuatajuhuaj. Puetunu narta mijiria quiijaca pueyajanaari cusonuuquiaari pajaajinia, nojori tiuyaquiniuucua Noé pohuatasanoocua Pueyasojiniji. Noé cutaraari juhua sesa miyashijia jiyatesaquiaari pueyaracaanu Pueyasota rishijia na quiniuria, Pueyasoocua tiuujiaca na quiniuucua.

⁸Abrahamri Pueyasoocua tiuquiarijiuhuj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijiaaja na quiasacari, majaari na niishini quiquiaari tee cuniquiria na quiaani. Nojuajaari saaja niishiquiaari Pueyasoori na quiijara na niqutionutianiya tama na jiyaranojuaja. ⁹Pueyaso niqutionutianiya jiyajinia na tiuquishacari, Abrahamri cuno jiyajinia quiquiaari juhua rucanejojua pueyano. Abrahamri juhuanujuaja maja cuno jiya camaru na quini quiquiaari. Naajaa, Pueyaso sequesanoocua tiuujiaca quiquiaari pueyaracaanuuri. Nojuajaari saaja seya cajacajiniji shitiasano suhorotujinia quiija quiquiaari pueyaracaanu. Abraham niyanu Isaacri naa quiija quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujuanaa na sequesano Abraham. Naacuajitij, nojoriiri Pueyaso sequesanoocua tiuujiaca quiquiaari pueyaracaanujuhuaj. ¹⁰Pueyaso jaara Abraham sequequiaari, nojuajaari pueyaracaanu na quijarano quiquio na niqutionutianiya, Abrahamri niishiquiaari Pueyasoori miriqui sequeriquiaa tama na shipinishano tiacajinijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

¹¹Naajuhuj, seetanujuanaa Pueyaso sequesacari Abraham, nojuaja na muetutenutianiya, Abrahamri jiyacari tariucua saaquiano quiquiaari. Neco Saaraari puera motaja

quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quiija na sequesano na tohuateenura. Naa Pueyasoocua na tiuuniuucuatej, Pueyasoori na cumaquiaari neco na manajonura. ¹²Naacuajitij, mueya shipiniyashijia saaquianoori mueya mueratequiaari. Cuno neyanuucujinino supueno pueyari queraatiara canequiaari, queraatiara juhua riya, serojiaquishoo, juhua shoniniacu caminia shuriuquico paajia jaaquia.

¹³Puetunu cuno pa supuetanaajanaari Pueyasoocua tiuujiaca shaajecoquiaari. Nojoriiri juhuanujuaja maja na jitianu quiquiaari seetanujuanaa Pueyaso sequesano nojori na niqutionutianiya. Naajaa, seetanujuanaa nojori tiuushacari Pueyasoocua, nojoriria, Pueyaso sequesanoori juhua tariucua tuuacaanu nojori niquishano quiquiaari. Nojoriiri na timitiaquiaari juhua tariucua nojori jitianu. Naacuajitij, nojoriiri juhuanujuaja quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. ¹⁴Naacuajitij, paari niishiyani nojoriiri tamonu jiya jitianuucua jiaatiariquiaa, pueyaracaanu nojori quiquiorano cutara. ¹⁵Nojori jaara saaja mijiria jiya camaruhua quiniuria panijia quiquiaari, nojori maara na supuetujua jiyajiniara riujuuquiaariuhua.

¹⁶Saniniuujia, nojori cutaraari socua maninia jiya jitianuucua jiaatiariquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuasano nojoriria. Naaratej, majaari Pueyaso caririquiniu quiquiaari nojori sequesacari: “Pueyasoori canaa Jiyaniijia”. Nojuajaari tari jeenucuasano tiaca jitiaa nojoririano jiyocuacaanu.

¹⁷⁻¹⁸Pueyaso sequesano Abraham na mueratesano mueya jaara tari mashajaniyujua quiquiaari, Pueyasoori Abraham saniquiaari, na niishiniuria nojuajate seetanujuanaa na tojijia. Naacuajitij, na sequequiaari cuara na panishano niyanu moora, nocua na catijiasocoriquiano. Cuno neyanu Isaacuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruoretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹Seetanujuanaa Abraham tiuuniuucua Pueyasoocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojijia. Naacuajitij, Abrahamri neyanuniyujua jaatucuquiaariuhua shuquiriaatia na quiquojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacaani.

²⁰Isaac tiuuniuucua Pueyasoocujuhuj, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúno: “Pueyasoori jiyanohua maninia miiniutianiya niaara, niaacuajinino supueno pueyano, taa na sequequiaari janiyacujani”.

²¹Jacoboari Pueyaso sequesanoocua tiuujiaca quiquiaarijuhuaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanohua maninia miiniutianiya niaara, niaacuajinino supueno pueyano”. Naa na sequenu nuhuaji na jihuuatej, nojuajaari na natacaacia tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²²Jacobo niyanu Joseeri Pueyaso sequesanoocua tiuujiaca quiquiaarijuhuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujanura na nucuhua Egipto jiyajinia, nojori jaara quiojorohua Pueyaso niqutionutianiya no jiyajiniara.

²³Moisés queya quiniuucua Pueyasooocua tiuujiaca, nojoriiri Moisés jamoquiaari jaara shusha rasaanquiaari, mueya maniniuniyojua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiocohua shusha roosano canuujuanaa cuaara moojinia quejoosaaria. Naajaa, nojoriiri cuno sequesano tojiyaquiaari nojori puereyaquiniutia saaja, Pueyasooocua tiuujiaca nojori quiniuucua.

²⁴Naajuhujaj, Moisés quishacari tariucua cumantumaca, Pueyasooocua tiuuja na quiniuucua, nojuajaari na canashitinia Faraón* niyatu tamacaquiaari. Nojuajaari tama sequequiaarijiaaja: “Majaari Faraón jinianu cua quini paniniu. Janiyacuajaari Israel pueyanoni”. ²⁵Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacua taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuaara cojiritiasaaria naquiya miishaanu narta Israel pueyatajuhujaj. ²⁶Pueyasoo sequesanoocua tiuuja na quiniuucua, nojuajaari niishiquiaari Pueyasoori na tojtiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jitiata na quiniuria mijiria, Faraón jinianu na quiniuucua.

²⁷Pueyasoo sequesanoocua tiuuja Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanoohua. Seetanujuanaa Moisés tiuushacari na niquiyaquishoo Pueyasooocua, nojuajaari Pueyasoo niquiquiaari noojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiaari maja na tarinitianura miiniu Pueyasoo sequesano nojuaja. ²⁸Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaa jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiutiutianura na tia tohuateyaji, maja nia jiyapueranuhua cusojuaaanurajuhujaj”. Moisésri Pueyasoo sequesanoocua tiuuquiaari. Naacuajitij, puetunu Israel pueya jiyapueranuhujinijiojuanaani, majaari quenaaja niquiriyatu nihanu mosaanu quiquiaari cutara.

²⁹Israel pueya mashishacari Egipto pueyacujaj juucua, Naatunacu jiyaniishano caminiaari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niutiaara caminia taquijiria. Israel pueya tiuuniuucua Pueyasoo sequesanoocua, nojoriiri joojuashiquio niutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niutianu paniquiaarijuhuaj, nojoriiri saaja shushiniuquiaari.

³⁰Israel pueya tiuquishacari Pueyasoo niquitiosocoriquiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyasoo rootaquiaari nojori miiniuriacuajani. Naa nojori tiuuniuucua Pueyasoo sequesanoocuatej, Jericó tiaca shocua sohuacaari puetunu pojotaquiaarijianaa. ³¹Puetunu Pueyasoo tojtiaashijiacajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namenujunaa na jamojonuucua tarijia narta pueyacujaj. Rahabri naa maninia miiquiaari Pueyasooocua tiuuja na quiniuucua. Naaratej, Israel pueyari cuno paanatu jiyanoocua.

³²¿Teyano pa supuetanaajiniji cua pohuatanutaniya niajaniana socuani? Socua queraatia pa supuetanaari Pueyasooocua tiuujiaca quiquiaari. Tariucujaj cua pohuatasano, maninia nia

niishiniuria Pueyasooocua tiuujiaca pueyari Pueyasoo jiyanooshaano. Naajuhujaj, majaari jeya cua quiniua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyasoo sequesano caminiujinunaa pueyajinijinio. ³³Pueyasooocua tiuujiaca nojori quiniuucua, nojoriiri tamasaca jiyaniijianucua miaquejoquiaari na jiyajiniji. Pueyasooocua tiuujiaca nojori quiniuucua, nojoriiri maninia jiyaniijianucua quiquiaari, maninia na jitianura narta Israel pueya. Pueyasoo sequesanoocua tiuujiaca nojori quiniuucua, nojoriiri Pueyasoo sequesano nojori na niquitiosocoriquiano masequiaari. Pueyasooocua tiuujiaca nojori quiniuucua, juurunu sareya rupaari juhua seecujutasaquiaari saaja, maja na soonura nojori. ³⁴Pueyasooocua nojori tiuuniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujiaca nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucujaj mueruuta. Pueyasooocua tiuujiaca nojori quiniuucua, sasaca pueyari jiyanoohua cumaacaraca quijiacara quiquiaari. Pueyasooocua tiuujiaca nojori quiniuucua, nojoriiri jiyanoohua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijijuhujaj. ³⁵Naajuhujaj, Pueyasooocua tiuujiaca maajipohua quiniuucua, nojori macuuri samiiticoquiaariuhua nojoriria.

Tamasacaari jiyanoohua taraatia miishaaquiaari Pueyasooocua tiuujiaca nojori quiniuucua. Cunora, nojori paraa jaara nojori quioocua, nojoriiri puecoonura miananajosaquiaari nojori jaara Pueyasoo tojinuu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujiaca nojori quiniuucua, nojoriiri saaja paniquiaari nojori cuaara puecoosariaqui, naajaa, jiyanoohua naquiya na miiniutia. Nojoricujaj niishiquiaari, Pueyasoori nojori samiitianijionutianuhua, jiyanoohua shuquiriaatia nojori quiniuria pueyaracaanu cutara. ³⁶Tamasaca quiniuucua Pueyasooocua tiuujiacajuhujaj, nojoriiri cararaatia macaatisaaciaquiaari, jiyanoohua majacusaaquiaarijiaariuhujaj. Naajuhujaj, tamasacaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. ³⁷Tamasacaari saitia jacusaaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanoohua naquiya na miishaanura. Naajuhujaj, tamasacaari nijiniaquetucujaj mueruuta puetujusaquiaarijianaa piyonu. Naajuhujaj, tamasaca quiniuucua Pueyasooocua tiuujiacajuhujaj, nojoriiri juhua taanuusano rucoojoquiaari puetunu tiquiyocujanaa. Casamijiuucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuaj. ³⁸Juhua taanuusano nojori quiniuucua, nojoriiri juhua tashuquioono rucoojoquiaari cariiquia jiyajinia, tuhananuhujiniano. Tiaajunucua nojori quiniuucua, nojoriiri saaja raaco maquiyonuucua quiquiaari. Mijiria quijia pueyari nojori jiyatequiaari juhua najuhua quijia pueyara. Naajaa, nojori cutaraari seetanujuanaa Pueyasoo timitiasano pueya quiquiaari, nocua tiuujiaca nojori quiniuucua.

³⁹Pueyasooocujaj nojori jiyanoocua, seetanujuanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujuanaa Pueyasoo sequesano nojori na niquitiosocoriquiano. ⁴⁰Pueyasoori nio pa quishacari nojori sashitijajaa, jiyanoohua maninia na miishacari pajaniya na Sohanuta, Neyanu Jesucristooocua pa tiuuniuucua. Na nuhuaji, Pueyasoori puetunu nojoritianajanaa pa cojiritianutaniya jataniniu tojetaarucujanaa maninia miijiaca pa quiniuria, na shuriucua na rijiosacari puetunu pajaniyajanaa.

Jesu miishano pa niishiriojoriquia,
naquiya rejeretajaca pa quiniurajuhujaj

12 ¹Naa pa niishishacari taa queraatia pueya maninia miiquiaari Pueyasooocua tiuujiaca nojori quiniuucua-cuaani, cunora, tama pa cojetasano najuhua casa pa

tarinitiariquia. Tarinitiashiyari puetunu najuhuaana casaajanaa, teyanoocua pa cojequiaa Pueyaso panishano pa miyaquiniuriam-cuajani. Naajuhuj, puetunu sesa miiniujanaa pa tarinitiare, puetunu pa cumaacajanaa pa jitianura, juhuajaniya rejeretajaca pa quiniuria. Naacuajiti pa naata maninia tucuatunu puetunu Pueyaso panishanojuanaa pa miiniuria.
²Jesu miishano pa niishiriojoriquia pueyaracaanu. Nojuajaari tojetaarucujanaa na Que Pueyasoocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanhua shuquiriaatia quijara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijiajanaa na quishacari.

³Majaari nia niyajetanu taa Jesu rejeretaquiaari juhuajaniya-cuaani, pueyaracaanu sesa miijiacaracaashacari nojuaja. Nocua nia niishiriojoriquia, niaa mariqui Pueyaso tojinu tarinitianu paniriiri nia taraajenuta naquiya nia miishacari.
⁴Niaacuajaari naquiya miishaaquiaa, Jesucristoocua tiuujiacaraca nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucujaji. Nia rejeretariquia saaja. Majaari juhuanojuaja nia puecoosaanu quiquianu na tojitiacajaca nia quiniuucua. ⁵¿Niaateeri Pueyaso rootasano niyajetarucuaa tari, na rootasano pajaniya juhua necohuaja? Naa sequeyari: “Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniani. Janiya jaara quia nacasure socua maninia miijia quia quiniuriani, majaari cucuaji pishiniu. ⁶Quia Jiyaniijia cua quiniuucua, janiyacujajacari cua panishano pueyano jiuujiayashijiani sesa na miishacari. Naajuhuj, janiyari cua niyanura cua jiyatesano pueyano saniitiojuani jaara sesa miiriquia”.

⁷Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria niajaniani, seetanujuanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! ⁸Naajuhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriopia niajaniani sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajini nia quishacari. ⁹Naajuhuj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetajaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohuanu Que, pueyaracaanu rishijiacaraca pa quiniuria. ¹⁰Pa queyari pa canashitioquiaari taa nojori paniquiaaricujani. Nojori rootasacari pajaniya, nojori saniitosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniujia, nojuajaari pa saniitioquiaa seetanujuanaa maninia miijiacaraca pa quiniuria, juhua nojuaja pa quiniuriahujuhuj. ¹¹Seetanujuanaa, puetunu saniitiojuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijia jatanishaaquiaani, socua Pueyaso tojiijara pa quiniuria juhuajaniyahujuhuj.

Jiyanhua cocuaatiaari Pueyaso pa tojiyaquishacari

¹²Naacuajitij, majaari nia pishiniu pueyanaa, Pueyaso saniitosacari niajaniani. Nocua nia tiuuri saaja. Nioojia nia cumaquiriopia. ¹³Saaja Jesucristo rupaa tojiijaca nia quiri, jatarinitiaja Pueyasoocua tiuujiacaraca mariqui noojia niqijiotereeri. Nojori cuara saniya cumaquishano quiriia cutara.

¹⁴Tama nia cuaqueyajaaja nia cumaquiriopia, juhuajaniya quijiacaraca nia quiniuria puetunu pueyatjanaa. Majaari

juayonuujutanu. Nia saniriopia seetanujuanaa sesa miyashijiacaraca nia quiniuria. Saaja noo pojori cutaraari pa Jiyaniijia niqiniutianiya, seetanujuanaa maninia miijiacaraca jatanishano pueyatej. ¹⁵Pueyasocujajacari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari niajaniani. Nojuajaari cumaacaracacujajaca pa cumaquiniuria niajaniani nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacua paaquenutaniya na sesonura queraatia pueya. ¹⁶Naajuhuj, tama nia cojuatooriqiaaja. Naa nia miitiooriopia tamonu niajanijajini nioo mariqui Pueyaso sequesano na niqitiosocoriopiano pajaniya sojeara quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucujajacari naa miijiaaritij. Tamacari na miaajesacari, nojuajaari Jacobo sequequiaari: “Cua tarajanunaa, pa que niqitiosocoriopiano janiya, na jiyapueranu cua quiniuucuanu, cuno cuara quiriia quiaara, quiaa jaara quia sumatuujini nioo rupore quiriia. Jiyanhua miaajeyanijia”. ¹⁷Niaacuajaari niishiya, na nuhuaji, Esauuri paniquiaari na que secojonura nocuara, jiyanhua maninia Pueyaso miiniuria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanhua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso quiaari.

¹⁸Nio pa quishacari, pajaniyara, Pueyasoori maja juhua tariucuaaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinai tuhuananuucua, Moisés na niishitiojonura na rootasano na pueyara, tuhuananuuri jiyanhua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanhua ninishiquiri quiriqiaajuhuj. Paratuuri jiyanhua piyarojoriqiaa puereetajuhuj. ¹⁹Trompeta jonenenuunuuri jiyanhua tojishaariquiaa. Pueyaso pocuanuuri jiyanhua tojishaariquiaajuhuj. Israel pueya tojishacari Pueyaso pocuaano, nojoriiri jiyanhua puereetiquiaari. Naaratej, nojoriiri Moisés sequetiquiaari maja socua Pueyasojanaa pocuanura nojoriicuara. ²⁰Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuara mosaaria saitia jacusano, cashanata soj. Naa miijia seru cuara naa puecoosaariajuhuaj”.

²¹Puetunu Israel pueya niquishanojuanaari jiyanhua puereeta quiquiaari seetanujuanaa. Moisésjanaari na puerequiaarijuhuaj. Nojuajaari na puereeta sequequiaari: “Cua puereeta tetecanijia”.

²²Nio pa quishacari saniniujia, majaari pa catecanonu quiquiaa cuno tariucuaaanu pueya pueresano tuhuananuucua. Jesucristo cusonuucua pocuara, paari Pueyaso quiquiojinijanaa tiuquitiaquiaani. Cuno na quiquio sesaari miriqui sequeshiya “Sión* tuhuananu”. Na pueya pa quiniuucua, nojuajaari jiyocuaaanu pueyaracaanu pa quijiarano tiaca jitiia. Cunoori seetanujuanaa jiyocuaaanujini Jerusaleén tiaca. Naacuajitij, paari jiyanhua queraatia Pueyaso seya rupuequiaani, Pueyaso pa maninuhuaquetanura nojoritajuhuj. ²³Paari tii rerejonutaniya puetunu parta Pueyaso pueyatjanaani. Pueyaso saquiriojosano pueya pa quiniuucua, pa sesacaari jiyocuaaanu Pueyaso nequesoreetuneejinia naajiotasano quia. Paari Pueyasoocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasoocua tiuujiacaraca sohuanuhuari tii quiyajuhuj, canapue Pueyaso jiyatequiaari tojetaarucujanaa sesa miyashijiacaracujani. ²⁴Jesucristoori tii quiyajuhuj.

Nojuajaari tama na cusonutajaaja Pueyaso jiyanooti quiaari nocua tiujujaca. Tama na nanacajaaja na shootenuucua pocuarajuhuaaj, paari cunota jeequejosaaquiaari tojetaarucuaajanaani. Naacuajitij, Jesu nanacaari jiyanoohua socua maninia Abel nanacajiniji. Cafn monuucua tarajanu Abel, Abel nanacaari Pueyaso shiniujuja na mona cuaara mosaariajuhuaj. Jesucristo nanaca saniniujuja, cunoori Pueyaso pa jiyanooti quiaacuua.

²⁵Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuaaanu, pueyari jiyanoyaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaf tuhananujiniji. Nojoriiri jiyanoyaquishaaquiaari nojori tojiyaquiniucua mijiria Pueyaso quishacari na sequesano. Nojori jaara naa jiyanoyaquishaaquiaaricuaa, nio pa quishacari saniniujuja, çpaatucua taa jiyanooshaariquia pa ruuretasacari Pueyaso quiarijiani, jiyocuaaanu na piriyojosacari pajaniyani? ²⁶Pueyaso pocuasacari Sinaf tuhananujiniji, jiyari na pocuasacari tetequaiaari. Quiarijia saniniujuja, Pueyasoori seetanujuanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. ²⁷Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari curenutaniya, maja na naata pootiosano casaatej. ²⁸Quiarinio quiquio, Pueyaso shipinishano na niqutiosocori-quiano pajaniyani, cunoori maja na naata shaajasaanu quiniutianiya cutara. Paari jiyaniujanucua quiniutianiya tii pueyaracaanuni. Pa Pueyasoori jiyanoohua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacuajitij, nojuaja pa timitiare jiyanoohua pa paniniutia nojuaja, pa puerenutano. ²⁹Nojuajaari puereeta mani, Neyanu ruuretajaca shaajaja, sesa pa miishano catijiajuhuaj.

Taa pa miyani Pueyaso pa timitiniuria

13 ¹Majaari panitioonu nia tarinitianu. Naa Pueyaso pueya nia quiniucuatej, pueyaracaanu panitiojuaca nia quiri quia. ²Naajuhuaaj, majaari rucoojuaca ruuretanu, niaacua nojori tiuquishacari. Nojori panijia nia quiri quia. Noojiaqueya pa supuetanaajinijiocuaajari Pueyaso seya masuuquiaari na tiacora, nojori jiyanihacari nareja pueyano naasucua.

³Njuatejosano pueyacuara taraajajaca nia quiri quia. Tama nia cuaqueyajaaja nia jiyatere juhua nojoritia njuatejosanojuhuaj, nojoriicua nia taraajenura seetanujuanaa. Naquiya miitiasano pueyacuara taraajaja nia quiri quiajuhuaj. Nia niishiriquia, niaari na naata naa miitiasaanujuhuaj.

⁴Pueyasojuaanaacuajaari pa niishitioquiaari pa camitioonura. Cunora, camitioonu pueya cuaara saaja neyacata, necocuata quijia quiiria. Cante camiyojuani, nojuaja cuaara tama na cuaqueyajaaja cojuara maja narta pueyano niqutocua na numuetucunura, na camishoo maajinio. Nia niishiri, Pueyasocuaajari naa sacuaaratia miijiaa saniitionutaniya.

⁵Majaari cumaneeca porocua nia quiniu tama niaarajaaja nia jitianura. Juhuaajaniya quijia nia quiri quia nia jitianota. Nia niishiri, Pueyasocuaajari sequequiaari: “Majaari cua cartenu quiniutianiya niajaniya juhua japueyojuua nia quiniuria. Majaari quenaaja cua tujianu quiniutianiya niajaniya”. Cunora pueyanaa, maja nia taacuanu. ⁶Naa seetanujuanaa na sequesanoocua pa tiushacaritij, pa naata sequenu taa supuetana David naajiotaquiaari na sequesanoocuanu. Naa sequequiaariiri:

“Jiyaniijia Pueyasocuaajari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

⁷Coteenujanaa nia jitianaa pueya nia niishiriojori quia, noo pojori canapueete shushajanaa nia tojitioquiaari Pueyaso rupaacuajani. Nojoriiri seetanujuanaa Pueyaso tojiijia quia quiaari, Jesucristoocua tiujujaca nojori quiniucua. Juhua nojori quiniucua jiaatijaca nia quiri quiajuhuaj, taa nojori quia quiaaricuaani.

⁸Taa quijia Jesucristo quia quiaari tariucuaaanuni, nojuajaari naa quiyajaa. Naa quiniutianiya pueyaracaanuni. Majaari na jatanu. ⁹Naaratej, majaari tamaatia niishitiojosano nia tojinu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquini quia quiaari na tojitiajaca. Naajuhuaaj, majaari pueyacuara secojonaa jiuujia cumaquishaanu quia quiaari nojori miaquesacari Pueyasorano puecoosano seya shujiniji. Pueyaso Sohuanu cutaraari poojia cumaquiquiaa, panijia pa quiniuria. ¹⁰⁻¹¹Saniniujuja, pueyacuara secojonaa jiyaniijiaari maja noo shu na miaquenu quia quiaari cutara, Israel pueya jiyanooshaanura puecoosaaquiaritij. Pueyacuara secojonaa jiyaniijiaari cunoo seya nanaa tiuquiti quiaari Pueyaso Quishaquijianaa puetunu marijiarajanaa, cunoo nanaca na majiriutianura tii. Na nanaca shootesano seruuri saniniujuja tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijiaari tojetaarucuaajanaa tenujusaaquiaari maja na miaquenura cunoo shu. Nio pa quishacari saniniujuja, paari jiyanoohua cumaquishaaquiaani Jesucristo cusunucua pocuara. Cunojiniji, paari seetanujuanaa Pueyaso rupesano quiyacuajani.

¹²Naajuhuaaj, Jesucristo mosaanura pocuara, nojuajaari Jerusalén tiacajiniji jiyatasaaquiaarijuhuaj, naatej, taa na nanaca shootesano seya jiyatasaaquiaari tamaquiriacuaani. Nojuajaari naa tama na cuaqueyajaaja tarinitia quiaari na mosaanura, tojetaarucuaajanaa jeequesano pa quiniuria puetunu sesa pa miishanojinijianaa. ¹³Nojuajaari jiyanoohua cararaatia teetesaaquiaari niyacutesanojinia pa niti. Naa Jesu miiniucua pocuaracuataj, Pueyaso niishiyashijia jaara cararaatia miiriquia pajaniya Jesuucua pa tiunniucuanu, juhuaajaniya na rejeretajaca pa quiri quiajuhuaj. ¹⁴Pajaniyara, Jesuucua tiujujicani, nio jiyari maja pa quiquio. Mijiria, shaaquiiri pueyaracaanu rishijia quiquio pajaniyarano. Cunora, paari jiyocuaaanu pajaniyarano Pueyaso shipinishano tiacaacua jiaatiaani. ¹⁵Naa Pueyaso jitianuucua pueyaracaanu rishijia quiquio pajaniyarantej, nojuaja pa timitiariquia pueyaracaanu. Neyanu Jesucristo quiniucua pocuara Secojona, nojuajaari pa tiuquiti quiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunoquajaari na panishano. ¹⁶Naajuhuaaj, majaari nia niyjetanu maninia nia miniuria niarta Pueyaso pueya. Nojori jitianuquishacari nojori panishano, nia jitianu casaajiniji nia niqutiojori quia nareja nojori. Paa jaara naa miijia quirini, paari juhua Pueyasora pa casa niqutioyanti. Cuno cutaraari na timitia quiaa.

¹⁷Cuarta Pueyaso pueyanaa, nia jitianaa tojitiajaca nia quiri quia. Majaari nojori niishitiojosano nia ruuretanu. Nojoricuaajari niojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jitianu nojori quiniucua. Naaratej, shamaatia nojori tojitiajaca nia quiri quia maninia, Pueyaso nojori pohuatanura shitimia niajaniyajiniji. Naa jaara nojori tojitiaashijia quiri, nojoriiri Pueyaso pohuatanutaniya na taraajenuta niajaniyajiniji. Jaara naa quiritij, niaa cutaraari taraatia quiniutianiyajuhuaj.

¹⁸Canaacuara nia secojonuuri quia. Canacuajaari saaja maninia miiniuria saniniujuquiaa pueyaracaanuni. Naacuajitij, canaa jiuujiaari panaatia quia Pueyaso niqiuara. ¹⁹Janiyari jiyanoohua paniani cucuara nia secojonura, Pueyaso tiuquiti nuhuara ritia janiya niaacua.

**Nio naajiona panishacari maninia Pueyaso miiniuria pueya,
na sarhuatasacari pueyajuhuj**

²⁰Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujuanaa pajaniyarano quiniutianiya pueyaracaanu. Naa Jesucristo miishanoocua pa tiushacaritij, na Que Pueyasoori pa jiyanoocua, juhuajaniya pa rupenura nojuaja. Pueyasajuanaacuaaari pa Jiyaniija Jesucristo samiitiani quiaarihua macujiniji. Nojuacuajaari pa cojuana, na panishano pueya pa quiniuucua. ¡Jiyanoohua maninia pa Pueyaso!
²¹Neyanu Jesucristoocua nia tiuuniuucua, nojuaja cuara jataniiria nijaniya tojetaarucujanaa jeenucuasano nia quiniuria, taa na paniyacuajani. Nojuaja cuara naa miiria nijaniyatej, maninia nia tucuatnura puetunu na

panishanojuanaa. ¡Pa Jiyaniija Pueyaso cuara pueyaracaanu shuquiritiasaaria jiyanoohua maninia na quiniuucua! Cuaara naa quiiriatej.

²²Cuarta Pueyaso pueyanaa, jiyanoohua nia secojiyanijia maja nia ruuretanura secaja rupaata cua shiniujiushacari nijaniya nio cua naajiojinia. ²³Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na rponutaniyani nia niquiniuucua cua quiasacari.

²⁴Naajuhuj, quiria nia sarhuatare puetunu nia jitianaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia sarhuataajuhuj.

²⁵Pueyaso cuara na Sohuanuta cumaquiiria puetunu nijaniyajanaa.

SANTIAGO NAAJIONEE

Santiago naajosano niyaquejeno pueyacuara

1 ¹Janiyari Santiagoni, Pueyaso seru, Neyanu Jesucristo serujuhuaj. Nia saruhuataanjia puetunu tiqiyocua jiyacajiniyajanaa niyaquejeno Israel doce niqiuohuacuajinio caneno pueyanaa.

Niishitiaja Pueyasojiniji masesano

²Cuarta Pueyaso pueyanaa, shuquiriaatia nia quiriqia niaa jaara taraatia miishaare, niaa jaara naquiya miishaarejuhuaj. ³Niaacuajaari niishiya, niaa jaara Pueyasoocua nia tiuniuucua saniniujuishaare, niaari socua juhuajaniya sashijiacara quiniutianiya. Niaaraari naa miishaanutaniyaqui nia sashishacari Pueyaso cuara puetunu maninijanaa miiria niaaraajaatijia. ⁴Nia rejeretare seetanujanaa maninia sashijia nia quiniuria, majaari quenaaja nia taacanuunu. Niaa jaara naa miijia quiritij, niaari maninia jeenucuasano quiniutianiya, pueyaracaanu maninia miijia nia quiniuria.

⁵Tamonu nijaniyajinijinio jaara niishiyaquiri taa na miiniutianiya, nojuaja cuara Pueyaso maseera, Pueyaso na secojosacari. Pueyasoori na niishitiaja niqutionutaniya. Nojuajaari puetunu pueyajanaa niqutioquiaa, capora na quiniuucua. Majaari na juaani niaa jaara na masere. ⁶Nia masesacari, seetanujanaa nia tiuri Pueyasoocua, majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacarobjiya mohuaca na piyarojosacaricuani. ⁷Jiyano pueyanotej, Pueyasoori maja na masesano na niqutionu quiniutianiya, noojia niqijijoteja na quiniuucua. ⁸Noojia niqijijoteja pueyanoori quiarijia maseya na panishano. Tariqui na secojosacari saniniuuja, tamonu casa maseyari, na paniyaquishacari coteenu na masesanocuaa. Jiyano pueyanoori noojia niqijijoteja pueyaracaanu. Majaari quenaaja na miiniu panishano na tucatanu quiniutianiya.

⁹Cua panishano Pueyaso muerasanaa, niaa jaara casamijiu quiri, naajaa, shuquiriaatia nia quiriqia. Pueyasocuaajaari nia jiyatequiaari na muerasura, na jittiasanojiniji nia jittianurajuhua. ¹⁰Saniniuuja, niaa jaara casamiriaca pueyano quiri, shuquiriaatia nia quiriqia Pueyaso jiyanooshano nia quishacari. Niaacuajaari niishiya niaari tojetaarucujanaa saniitosocoriquiano quiquiaari juucua sesa miijia nia quiniuucua tarijia. Casamiriaca pueyanoori seetanujanaa juhua naana shuu, majaari na rishiniu. Saaja rupaquijia niqishiya shanohuari. ¹¹Panau jaara nasaatia jama, neyonaari soreque. Na shuuri tiqii. Shanohua niqishanoori shaajequejuhuaj. Casamiriaca pueyanoori naajuhua. Na casami na niqutiojosacarijia na canijianura juucua, canashiyaquiji shaajenutaniyaajaarihuaj.

Naquiya pa miishacari

¹²Shuquiriaatia quijia cutaraari Pueyasoocua tiuuja, cante taraatia na miishacari rejeretaja saajani. Naa taraatia na saniniujuishaanuucatej, nojuajaari juhua cutara jiyaniijia tuhuaja niqutioaanutaniya, pueyaracaanu rishijia na quiniuria. Cunoori Pueyaso niqutionu panishano na panijia, taa na sequequiaaricujani. ¹³Niaa jaara sesa miiniuucua jiaatia, majaari sequenu: “Pueyasooqui sesa cua miiniuu

paniya”. Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? ¹⁴Saniniuuja, tama poojia sequejaarijia pa shiniujuquiaa sesa pa miiniuria. Naajuhua, tama pa niishitiajaarijia pa sapojoquiaa sesa pa panishano pa miiniuria. ¹⁵Naa sesa miiniuucua pa jiaatiasacarijia, cunora paari sesa miiquiaani. Naa sesa miijia pa quishacarijia, paari cunora shaajasaanutaniyani.

¹⁶Cuarta Pueyaso pueyanaa, maja tama nia cuaqueyajaaja nia sapojonu. ¹⁷Puetunu maninia casaajanaa pa masesanoni, cunoori Pueyaso niqutioosano jiyocuacaanuji. Nojuajaari puetunu jiyocuacaanu pa niqishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸Pueyasocuaajaari pa sohuano samiitianiijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuani, Pueyasoori naa juhua pa tutaquiaari na shuquiriniutiajuhuaj, coteenujanaa na jiyapueranuhua pa quiniuucua. Nojuajaari tariucuacaanujini nia pa riurioquiaari-tij.

Seetanujanaa Pueyaso tojitiajaca

¹⁹Naacuajiti cua panishano cuarta Pueyaso pueyanaa, cua tojitiare. Puetunu nijaniyajanaa cuara quiri ritia tojijia, jacaria pocuaja. Cuaara quiri shiniquajuhua, maja ritia juaajia. ²⁰Pueyanoori maja na naata Pueyaso panishano miiniu na juaaniutia. ²¹Naaratej, nia cartere puetunu sacuaatia nia miiniujianaa, puetunu sesa nia niishiriojosanojuanaano. Nio pa quishacari, puera sesa miiniuuri quiquiaa. Naajuhua pueyanaa, juhua maninia naatujua nia tojiri Pueyaso rupaa, taa nia niishitiojosaaquiaricujani. Majaari na ruoretanu. Pueyaso rupaacuajaari cumaacaraca tojetaarucujanaa sesa miyashijiacara na jiyatenura pajaniya.

²²Pueyaso rupaa tojijia nia quiri seetanujanaa. Majaari nia numaa shama nia tojitianunoj. Naa jaara Pueyaso rupaa tojijaquiri, niaari tama nia cuaqueyajaaja sapojiya. ²³Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqitiujinia narejaari. ²⁴Jaara tacateyarohua, na jiquioco niyasetaseequiohuari taamuecate na jiquioco quiriqiaani. ²⁵Pueyaso rootasanoori jyanohua maninia, maja quenaaja sesa. Sesa miiniuucua jitinio pueyano jaara na tojijia quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhua.

²⁶Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojiyajaacujua. Saaja sacuaatia pocuaja quia pueyaracaanuuri. Nojuajaari najuhua Pueyaso rupaa tojijia. ²⁷Cante seetanujanaa pa Que Pueyaso rupaa tojijiani, nojuaja cuara japueyojuaca niqiniuucua rucaneera, nojori na naacunura. Cuaara naa miiria mashiquopuerajuhua, nojori taraajenucusacari nojori na cumanijianura. Naajuhua, cuaara tama na cuaqueyajaaja cojuara, narta pueya na miyaquiniuucujia sesa. Naa miijia pueyanotej, nojuajaari Pueyaso pueyano cutara.

Maja cumaati rimijata pa paniniu pueya

2 ¹Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucua-janaa maninia quijia. Nocua tiuujiaca nia quishacari, majaari rimijata nia niqiniu tamasa. ²Pa Jiyaniijiateeri pa sooquiaricuaa, ninishiqui quijia pa quishacarijiani? Maja. ³Cunora cua sequesanojinia nia niishiriojore: casamiriaca pueyano jaara nia secojonuuja tiainia tiuquimia, maniniuqui toqueraca, jaaniishoracajuhuj, ⁴taa nia miiniutianiyani? ⁵Niaari naa sequeja: “Nia quia cajishii pueyanonaa, cajitii maniniujiniani”. Saniniujia, toqueeju pueyano jaara jiyacari tiuquimajuhuj, jiyareta curuutuquenaniyojua, niaari na sequeerecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuani”. ⁶Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamijiu pueyanojiniji. Naaratej, niaari casamiriaca pueyano shuquirintinu panijia.

⁷Cua tojitiare cuarta Pueyaso pueyanaa, ⁸¿majateeri nia niishiniu, Pueyasocuaajaari casamijiuucua pueya saquiriojoquiaari nocua tiuujiaca nojori quiniuria? Nocua tiuujiaca nojori quishacari, nojoriiri juhua jiyanojua casamiriaca Pueyasora. Naajuhuj, Pueyasoori nojori jiyatenutaniya jiyaniujanucua nojori quiniuria, puetunu Pueyaso jiiitasanojuanaa nojori jiiitanura. Naa miiniutianiya na panijiaacaari taa na sequequiaari seetanujuanaacujani.

⁹Niajaniyarijataj, niaari nojori cararojoquiaacujua. ¹⁰¿Majateeri nia niishinijuhuj, cuno casamiriaca pueyacuajaari nia nohuasejoquiaa na sapojonuta? Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri nia miitiuquiaaqui nia jiiitasano casaaniyojua na jaariutianura puetunujuanaa. ¹¹¿Majateeri nia niishiniu, nojoricuajaari pa shuquiritiasano Jiyaniijia sesacaquiaajuhuj? Pa Jiyaniijia sesa jiyaniitiquiaa na soonutaari.

¹²Puetunu Pueyaso rootasanojinijianaani, nioori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuani”.

Pueyanaa, niaa jaara cuno rootasano miijia quiriqiaa, niaacuajaari maninia miijia. ¹³Saniniujia, niaa jaara rimijata paniri pueya, niaari sesa miya. Niaari saniitiosocoriquiano, Pueyaso niishitiojosano tojiyashijia nia quiniuucua.

¹⁴Pueyano jaara puetunu Pueyaso rootasanojuanaa tojiqiaa maninia, saniniujia, jaara niquiriyatu cuno rootasanojiniji tojiyashijia quiri, cuno pueyanocujaaari Pueyaso tojiyashijia.

¹⁵Pueyasojuanaacuaajaari sequequiaari: “Maja nia camishoo maaji nia numuetucunu”. Sequequiaarijiaariuhuj: “Maja monu”. Naacuajitij, pueyano jaara na camishoo maaji numuetuqueyacuajia quiri, saniniujia narta pueyano moyari, cuno pueyanoori Pueyaso rootasano tojiyashijiajuhuaj. ¹⁶Niaa cumaati niishiya, Pueyasoori na muerasu nequesoreenutaniya taa nojori tojitiacuaari na rootasanoacujani. Nocujia tama pa cuaqueyajaaja pa cojuare taa pa miiquiaani, taa pa pocuaquiaaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiariacujani, nojoriiri jiyanooshaanutaniya taa nojori jiyanoocuaaricuaa tamasaani. ¹⁷Saniniujia, canapuate narta pueyano jiyanooyashijia quiquiaarini, Pueyaso nequesoreenu juuca puetunu pueyajanaa, nojoriiri jiyanooyaquishaanutaniyajuhuj. Canapuate jiyanoojia cutarani, nojoriiri jiyanooshaanutaniya cutara, taa tamasa nojori jiyanoocuaacuaani. Nojoriiri shuquiriaatia quiriqiano cuno juuca, Pueyaso nequesoreesacari nojori.

Pueyasocua tiuujiacaari maninia miijia

¹⁸Cuarta Pueyaso pueyanaa, ¹⁹¿maniate pueyano jaara seque: “Janiyacuaajaari Pueyasocua tiujiani”, nojuaja jaara

maninia miyashijia quiyajaa? Nojuaja jaara maninia miijia jatanishoo quiyajaa, najuhuaana sequeyari: “Pueyasocua tiujiani”. ²⁰Naacuajitij, tamonu parta Pueyaso pueyano jaara pa seque: “Maja cua jiiitanu toque. Maja quenaaja cua miaquesocoriquiano cua jiiitanujuhuj”, ²¹taa pa miyani? ²²¿Maniateeri paa jaara na sequereni: “Juhujaniya quia quiaarohua. Quia miaquesuhua. Toque quia cushishuhujuhuj”? Maja. Paa jaara quenaaja na niqitioyacuiri na panishanoni, pa sequesanoori najuhuanaj. ²³Naajuhuj, pueyano jaara seque: “Jesucristoocua tiujiani”, jaara seetanujuanaa Pueyaso rootasano tojiyacuiri, na sequesanoori najuhuanajuhuj. Jiyano pueyanoori maja seetanujuanaa Jesucua tiuujiaca. Paa jaara seetanujuanaa Jesucua tiuujiaca quirini, pocua maninia miijia quiriuhuj. Maninia miyashijiaari maja seetanujuanaa Pueyasocua tiuujiaca.

²⁴Pueyano jaara tamonu sequeriquia: “Quiaari sequeya quiaa Jesucua tiuujiaca cutara. Janiyari saniniujia maninia miijiani. ²⁵¿Taa cua niishinutianiyani quiaari seetanujuanaa Jesucua tiuujiaca, quiaa jaara maninia miyacuiri? Maja cua naata na niishiniu. Janiya cutaraari quia niishinutianiyani janiyari seetanujuanaa Jesucua tiuujiaca cutarani, maninia cua miishacari”. ²⁶Pueyaso Rupaacua quia tiuuniuucua, quiaari niishiyacuaja Pueyasoori Jiyaniijiajanaa. Cuno quia tiuuniuuri maniniacuaaja. Naajaa, nia niishiri, samaruuari cuno niishiyajuhuj. Na puerenuta nocuaji tetecatiyuari.

²⁷Mosanucuaanaa, ²⁸¿majateeri nia niishiniu? Jesucua tiuujiaca nia quishacari, niaa jaara maninia miyashijia quiyajaa, Jesucua nia tiuuniuuri najuhuanaj, nia tojiyacuishacari Pueyaso. ²⁹Niaacuajaari niishiya taa Pueyaso saniquiaari pa supuetana Abrahamni, na niishinutianiya seetanujuanaa nocua tiuujiatee. Pueyasoori naa na saniquiaari: na sequequiaariiri: “Abrahamnaa, quia niyanuniyojua quia more cucuara quia catijiasocoriquiano”. Majaari Abraham* ruuretano quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanojua maninia Abraham, cua tojiia cutara”.

³⁰Naacuajiti cuarta Pueyaso pueyanaa, naa Abraham tojiniuucua Pueyasotej, paari maatia niishiyani nojuajaari seetanujuanaa Pueyasocua tiuujiaca quiquiaari. Naajuhuj, Pueyaso sequesano na miishacari, nojuajaari Pueyasocua tiuujiaca quiquiaari tojetaarucujanaa. ³¹Naa Abraham miiniuucuatej, nojuajaari tariucuaaanu Pueyaso rupaajinia nojuajini nia naajiotasano tohuatteequiaari. Naa sequeyari:

“Abrahamri Pueyasocua tiuuquiaari. Naa na tiuuniuucua Pueyasocuatej, Pueyasoori na jiyatequiaari juhua tojetaarucujanaa sesa miyashijia na quiniuria”.

Naa Abraham quiniuucua Pueyaso tojiijatej, nojuajaari sequesaaquiaari Pueyaso rupenata.

³²Naacuajiti pueyanaa, Pueyasocuaajaari na sequesano miijia jiyanoocua. Maja cutaraari na jiyanooni noo nojori, nocua tiuuniu sequeja najuhuanatej. ³³¿Niaate niishiyajuhuj taa Pueyaso jiyanoocuaari Jericó tiacajinijinio paanatuacuaani, noj, Rahab jiyanihanotej? Pueyasoori na jiyanoocuaari neyatu na quiniurajuhuj. Na jiyanoocuaariiri maninia na miiniuucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiaariuhua tamocoori, narta Jericó tiacajinijinio pueya puecyaquiniuucuaqui cuno nojori. Rahabri naa maninia miiquiaaritij Pueyasojiniji na tojishanoocua na tiushacari. Niishiquiaariiri Pueyasoori Israel pueya cumaquinia quiquiaari. ³⁴Nio pohuatasanoori pa niishitiojiya, naatej, taa pa cuaqueya macu quiya sohanuujuacuaani, naajuhuj, paa jaara Pueyaso sequesano miyashijia quirini, paari najuhuaana sequeyani: “Jesucua tiujiani”.

Pa niti juhua mani

3 ¹Cuarta Pueyaso pueyanaa, maja cumaati puera niajanijinijinio jiaatianu Pueyaso rupaa niishitiojonaa nia quiniuria. Niaacuajaari niishiya, Pueyaso rupaa

niishitiojonaari socua jiyanoehua saniitosaanutaniya tamasacajiniji, nojori tojtiaaquiniucua tama nojori niishitiojosanojuaaja. ²Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacarina? Shaaqui. Pueyano sequesano jaara puetunu maninijanaa quiri pueyaracaanu, cuno pueyano maara seetanujanaa maninia pueyano quiri cutara. Cuno pueyano maara na naata puetunu tama na cuaqueyajaaja jiitiani niishiriquiajuhua sesa na miyaquiniucuaaji. ³Niaacuajaari nishiya, caballo rupaama jaara niasaare na niqitijiotaja, na camaru na tojiniuria, na netesacari, na camaruuri puetunu na caballo cuaqueyajanaa niqitijiotaa na panishaco. ⁴Puereetuca buqueeri naajuhua. Shiitianiyojua na niqitijiotaja jiitiaajaariuhua. Jiyanoehua paratu piyarojosacari, naajaa, na camaruuri saa cunotaja na niqitijiotaa na panishaco. ⁵Pa nitiiri naajuhua, shiitianiyojua casaaniyojuaari pa cuaqueyajinia shipinishano. Naajaa, jiyanoehua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajina, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhua. ⁶Pa nitiiri seetanujanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijajanaa. Paa jaara sesa pocuare pueya niqiarani, puetunu pueyajanaari pa sequesano caminiujuquiaa tamasaca niqiuara. Pa nitiiri Sesaaca poonijiotasano. Naacuajitij, sesa pa pocuasacari, paari puetunu mijiria pa quiniujanaa sesoquiaani. ⁷Pueyanoori na naata jiyartuutenu puetunu casaajanaa: jaacuatujua, roshiyocuatujacajuhua, moojinijinio casaanio. Seetanujanaari, pueyari tari naa na jiyartuutejoquiaa. ⁸Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹Paari jiyano pa nititijaja pa Que Pueyaso maniniuhuaqueetaquiaani. Naajuhua, paari Pueyaso shipinishano parta pueya sesacaquiaa natajuhua. ¹⁰Naacuajitij, pa rupaamaji tohuataari maninia sequesano, sacuraatia sequesanojuhua. Cuarta Pueyaso pueyanaa, imaja cumaati naa pa quiniutij! Maja maninia naatej. ¹¹Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacuta saniniujia pacaretaquiaacujua? Maja. Samo nacaari pueyaracaanu maniniuniacu quijia. ¹²Cuarta Pueyaso pueyanaa, ¿mariyajate na naata muetunu shucuenajara? ¿Natecate sacamanajara muetujujuhua? Maja. Naajuhua, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhua, paa cuaara pueyaracaanu maninia pocuara saaja. Maja cumaati pa pocuasano pa cojitini sesa pocuasano.

Niishijia pueyano

¹³Tamonu nijaniyajinijinio jaara niishijia quiri, nojuaja cuaara juhujaniya maninia mijia quiri nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujanaa niishijia. ¹⁴Saniniujia, noojia jaara najiquitishano quiri, niishijia na quiyaquiniucua juhua niarta Pueyaso pueyano, niaari seetanujanaa mosanucua. Naajuhua, nia miishano jaara quiri nia shocotanura niarta Pueyaso pueya saaja shuquiriaatia na quiniuria tamajaaja, majaari nia jyaniniu niaari niishijia. Naa mijia nia quishacaritij, niaa jaara tama nia niishitijajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya. ¹⁵Cuno nia niishitijaari maja jiyocuaanuji Pueyaso niishitija. Cuno niishitijaari tama nia niishishanojuaaja, mijiria niishishanojuhua, Sesaacajanaa niishishanonio. ¹⁶Pueyanaa, tee Pueyaso pueya juaatishano quiya tamasaca jaara na shocotare,

naajuhua, pueya miishacari saaja tama na panishanojuaaja, tii quiyari juayonuujutanu, puetunu sesa miiniujianaanio. ¹⁷Saniniujia, cante Pueyaso niishitija jiitiaa cutarani, nojuajaari maninia mijia pueyano cutara. Jiyano pueyanoori maninia quijia puetunu pueya niqiarajanaa, jyanootio, jacaria pocuaja. Majaari na niishiniu ritia juaaniu. Pueyacuara taraajejaari. Majaari na niishiniu cuaracashijionu pueyacua. Pueyaracaanu seetanujanaa sequeyari. ¹⁸Naajuhua, cante juaatoyano jyanootiootejani, nojuajaari jyanohua shuquiriaatia quiniutianiya Pueyaso shuquiritishacari nojuaja maninia na miiniucua.

Mijiria casaacua jiaatijacajiniji pohuatasano

4 ¹¿Niaate niishiya casaara nia juayonuujutaquiaa tamajaaja pueyaracaanu? Niaari naa quiyaquij sesa miiniucua nia jiaatiasacari. Nioojaari najiquitishano quiquiaa nia panishanoocua nia jiaatiasacari sacuraatia. ²Naaratej, nia panishano nia maseyaquishacari, niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jyanohua, niaari cunora miriyojotaquiaa. ¡Niaari socua piyotariquiaaqui! Niaari naa quiyaquij Pueyaso nia secojiyaquiniucua nojuaja niqutionura nijaniya nia panishano. ³Naajuhua, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaa-noj? Naa sequeereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. ⁴¡Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa mijia nia miishano timitijacani, nojuajaari Pueyaso paracara quiri. Niaa jaara naa mijia quini panijuhua, niaari tari Pueyaso paracara quiri. ⁵Tariucuaanu Pueyaso Rupaajinia naa naajiotasanoori quiyaquij:

“Pueyasoori na Sohanu niaquiaari poojiajina, nera na cojuanura pajaniya. Jiyanoehua na paniniutia pajaniya, Pueyaso Sohanuuri pa jamuequiaa juucua saaja Pueyasora pa quiniuria”.

⁶Naajuhua, Pueyasojuanaari jyanohua maninia naacuquiaa pajaniya, jyanootio na quiniucua. Na Rupaajiniaari naa naajiotasano quiyajuhua:

“Pueyasoori noo pueya paracaajia, narta pueyajiniji juhua socua cutara pueyano quini panijiatej. Saniniujia noo nojori maniniucuaarjia, naa sequejatej: ‘Maja cua naata miini maninia tamajaaja. Pueyaso cuaara cua naacuura’”.

⁷Naarate pueyanaa, seetanujanaa Pueyaso tojtijacara nia quiri quia. Cumaatia nia nujuatare Sesaaca, maja na shocotanura nijaniya. Niaa jaara naa miiritij, niaacuaji mashiniutianiyari. ⁸Niaa jaara Pueyaso rupeere, Pueyasoori nia rupenutaniyajujuhua. Sesa mijiacanaa, cua tojtiare. Taa curuutojuanucua shuquirioyacuani, naa tama nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiaari mijiria sesa miishano paniquiaajuhua. Cuno pueya cuaara noojia jeequejora maja socua noojia na niqijiotenura najuhuanaj. Cuaara saaja Pueyaso panijiacara quiri cutara. ⁹Sesa nia miiniucua nia nujuquette, nia taraajerejuhua. Nia sapionuure. Sesa miishano nia saroojotanu nia jataniri namijiaacatenucua. Sesa miiniujiniji nia shuquiriniu nia jataniri taraajenucujuhua. ¹⁰Niaa jaara noojiajina sequequiaa Pueyaso niqiaara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jyanijianucua nia quiniuria.

Parta Pueyaso pueyacua rimiaaqueyashijia pa quiri quiaj

¹¹Pueyanaa, maja sacuraatia nia rimiaaquenu niarta Pueyaso pueyacua. Maja maninia naatej. Cante narta

Pueyaso pueya sesacaani, Pueyaso Rupaajinia naajiotasano tojiyashijiiaari jiyanotej. Naa jaara naa miiritij, naari Pueyaso Rupaajinia naajiotasano sesacaa. Naajuhuaaj, naari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, naari Pueyaso rupaa tojiyashijiacara quiquii. ¹²Pueyasojuanaari tamajaaja Jiyaniijiajanaa. Nojuacuajaari na rootasano niishitijia pajaniya. Nojuajaari niquiriyatujua na nequesoreena, pa saniniujiuriquianojuhuaj. Nojuajaari cumaacaraca pocuaji na tacunura, na shaajanura pajaniyajuhuaj. ¿Canteeri quiajanianijia, quia saniniujiuniuria tamasaca, juhua nojori jiyaniijiani?

Majaari pa niishiniu tariquiria

¹³Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niqutiojosacari tii canaa casami. Naaari queraatia cumaneeca masenutaniya canaa casami samini”. Cua tojitiare naa sequejacanaa. ¹⁴Majaari nia niishiniu taa nia juhuaquenutaniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa quiniuri juhua shushiquiani. Naatej, taa shushiquiacuaani rupaquijia niqishiyari, na nuhuaji tajimiohuari, paari naajuhuaaj. ¹⁵Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuanu”. Naa cutarate maninia sequenu. ¹⁶Niaari saniniujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, naari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, naari najuhuaana nia rupaa riutioconeetequiaa puera, juhua niishijia pueyano. Naa jaara tama nia cuaqueyajaaja nia jiyateya juhua tariqui miishocoriquiano niishijiatej, cunoori jiyanohua sesa. ¹⁷Naajuhua pueyanaa, niaa jaara maninia miyaquiri, maninia miiniu niishijia nia quishacari, naari tari sesa miijiaa.

Casamiriaca pueya nacasusaanu

5 ¹Nia tojitiare, casamiriaca pueyanaa. ¡Juhucarijia nia sapuere! ¡Nia sariyocature! ¡Niaari naquiya miiniutianiya taraatia! ²Niaari jiyanohua casamiriaca. Cuno nia jiiitiasano casamini, najuhuaana moqueyari. Surequeyari nia maniniquiyia toqueya miaqueyajuhuaj. Naacuajitij, puetunu nia jiiitiasanojuanaari moquenutaniya. ³Nia paatijiosano oroni, nia cumaneecanio, najuhuaana tiyarashiyari. Naacuajitij, pa Nequesoreenaari maatia niishiniutianiya naari sacuraatia jamuejaca quiquiaari. Naa miijia nia quiniucuatej, naari saniitiosaanutaniya. Niaari socua shaajasaanutaniyaquij. Niaari najuhuaana queraatia casami paatijia shuquiriaatia nia quiniuria tamajaaja mijiria. Saniniujia, nio pa quishacariiri quera pa Jiyaniijia tiuquishacariuhua na saniniujiuniuria pajaniya. ⁴¡Jiyaniijiajanaari nia poonijiotasano pueya tojiquiaa! Nojoriiri sariyocuatuiya nia cumaneecajiniji nia niqutioyaquiniucua nojori poonijionuunujiniji, niaara na senoonuucua nataacuaca nia cuhuariquiajiniji. ⁵Mijiria nia quishacarijia, naari shuquiriaatia quiquiaa puetunu nia panishanojuanaa nia jiiitiasacari. Naa shuquiriaatia nia quishacaritij, naari juhujaniya shiyoshiya juhua puecoosocoriquiano cushiya. Niaari naa miishaanutaniyajuhuaj. ⁶Niaari maninia miijia puecooquiaa. Majaari nojori nujuatanu quiquiaa nijaniya, nocuara nia tonujusacari nia cuaracashiniutia najuhuanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhujaniya pa sashiri pa Jiyaniijia

⁷Naacuajiti cuarta pueyaso pueyanaa, juhujaniya nia sashiri pa Jiyaniijia cuaara tiuquihuara. Cuhuariquia camaruuri na natanu nuhuaji naa sashiquiaa marujuhuaaj, maninia na natau moritianura. Maru sashiyajaariuhua cuaara niiria, na natau jajau na querajaacaatiniuria. ⁸Naa nia sashirijuhuaaj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. ⁹Cuarta pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaaereeri. Nia niishiri, pa saniniujiunia Pueyasoori pocua catecanoya. Tari juhua pa tohuatayaji nujuaari. Nojuajaari seetanujuanaa pa saniniujiunia cutara. Nocuaji maninia pa quiri. ¹⁰Pueyanaa, juhujaniya pa rejeretarejuhuaj, paa jaara naquiya miishaareni. Naatej, taa tariucuaaanu Pueyaso sequesano caminiujiunia rejeretacoquiaari taraatia nojori miishacaricuaani, naa nia rejeretarejuhuaj. ¹¹Paari niishiyacuajani, Pueyasoori naquiya miiniu rejeretajaca pueya shuquiritia. Maninia na miiniutianiyari. Niaacuajaari tari pohuatasaaquiarijuhuaaj taa supuetana Job rejeretaquiaari naquiya nia miishacaricuaani. Na nuhuaji cutara, Pueyasoori jiyanohua maninia na miiquiaariuhua, jiyanohua pueyacuara taraaja nia quiniucua, jiyanojiaariuhuaaj.

¹²Cuarta pueyaso pueyanaa, nia tojitiare. Nia pocoojosacari, tamonu jaara quia sequesanoocua tiyuaquiri, naajaa, majaari najuhuaana sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuraatiatej. Nia sequesano jaara seetanujuanaa quiri, nareja nia sequere: “Taaquiriirinij”. Naajuhuaaj, nia sequesano jaara quiri “maja”, cuaara nia quiri seetanujuanaa. Majaari nia sequesano nia maatenu socua, Pueyaso mariqui nia saniitioereeri.

¹³Tamonu nijaniyajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniujia, Pueyasora nia jaaquequejore. ¹⁴Cusosu nia quishacari, Pueyaso pueya jiiitanaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. ¹⁵Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. ¹⁶Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuaraajaaja. Pueyasocua nia naatanijiorohua. Maninia pueyano secojosacari jiyanohua, cunoori jiyanohua cumaacaraca. Pueyasoori na secojosano tojijia. ¹⁷Tariucuaaanu pueyara Pueyaso sequesano caminiujiunia Elíasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. ¹⁸Elías jaara pacutequiaariuhua secojonu maru na panishacari, maruuri shusha niqiaariuhua. Pueya nataacuacaari jiyacari shusha moritiaquiaariuhua.

¹⁹Cuarta pueyaso pueyanaa, tamonu nijaniyajinijinio jaara Pueyaso rootasano tojiyashijia quiriuhua, tamasaca jaara na niquiri, cuaara na rootaaranaj, maninia miijia na quiniuhua. ²⁰Nia niishiri, cante sesa miijia tacatorohua Pueyasocua sesa na miiniujinijini, nojuajaari cuno sesa miijiaacuaji tacuya maja senota na shaajasaanura. Pueyaso na jiyanootiyaariuhua puetunu sesa na miishanojinijianaa. Tariucuaaja cua panishano pueyanaa.

COTEENU PEDRO NAAJIONEE

Pedro saruhuatasacari narta Pueyaso pueya

1 ¹¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuaa canapueete tiqiyocua niyaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ²Tariucuaaanu, pa Que Pueyasocuaajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanooquiaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujanaa Jesucristo tojjijaca nia quiniuriajuhuaj. Naa Pueyaso panishano pueya nia quiniucua, nojuaja cuuara cumaquiiria jiyanoohua nijaniya. Cuaara nioojia cajitiiria pueyaracaanujuhuj.

Pa niishiri, paari jiyanoohua maninia miishaariquianoni

³Pa Jiyaniijia Jesucristo Que Pueyaso pa maniniuhuaqueeta-re, jiyanoohua maninia na miiniucua pajaniya. Jiyanoohua na taraajenuucua pocua, na pueya pa quiniucua juhuaj, nojuajaari pa niishitiquiaari paari juhua quiariniora samitianiijosaanutaniuhuni. Paari naa samitianiijosaanutaniuhuni, naatej, taa Jesucristo samititiquiaariuhucuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacujani.

⁴Naacuajitij, niaari niishiya niaari seetanujanaa masenutaniya puetunujanaa niaarano Pueyaso jiiatasano jiyocuaaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuaashiniujuhuaj. ⁵Pueyasocua nia tiuuniucua, nojuajaari na cumaacata nia cojuaquiaa. Pueyaracaanu nia cojuanutaniyari nojuaja cuuara nia rijiorejaatijia mijiria taraatia nia quiniujiniji, tojetaarucujanaa jatanishano quijiaca nia quiniuria. Jiyanoohua maninia Pueyaso miiniu panishano na pueyaranoi, shusha jiyacari niquishaanutaniyari.

⁶Cunora niaari shuquiriaatia quiya. Saniniuuja, niaa naasucuaari taraajeya rupaquiija nia miijiosacari naquiya mijiria. Naajaa, niaa jaara naquiya miishaare, cunoori maja najuhuanaj. ⁷Naquiya pa miiniuni, cunoori pa saniniujiushaanura paate seetanujanaa Pueyasocua tiuujiacani. Niaacuajaari niishiya, pueyari jiyanoohua oro* panijiacani. Saniniuuja, Pueyasocua pa tiuuniuni, cunoori jiyanoohua socua panishano orojiniji. Niaacuajaari niishiya, pueyari oro catijijaja, na sanishaanura maninia oro seetanutejanaa. Naajaa, seetanujanaa maninia oroori shaajejajuhuj. Saniniuuja, paa jaara mijiria naquiya pa miiniu rejeretajaca quirini, Pueyasocua tiuujiacani pa quiniucua, cunoori socua jiyanoohua maninia cuno shaajeja orojiniji. Pueyasocua nia tiuuniu jaara saniniujiushaare juhua orojuhuj, jaara seetanujanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanoohua maninia miiniutianiya nijaniya. Jiyaniijanucua nia jiyatenutaniyari.

⁸Majaari juhuanujuaja Jesucristo nia niquiniu. Naajaa, niaacuajaari na panijiacani. Nia niquishoo na quishacariija,

naajaa, niaari nocua tiuquiaa. Niaari na timitiaquiaa jiyanoohua. Tojetaarucujanaa jiyanoohua nia timiniu quiniucua nioojiajinia, majaari nia naata na pohuatana nia rupaata. ⁹Niaari naa timiquiaa, tariucua jatanishano nioojia quiniucua, Jesucristoocua nia tiuushacari.

¹⁰Tariucuaaanu, pueyara Pueyaso sequesano caminiujunaa pueyari poojotaquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatia serojuuaca quiquiaari, Pueyaso Sohuanu niishitishano nojori naajiotasanoi. Nojoriiri jiyanoohua niishiniu paniquiaari taa Pueyaso jiyanooniutianiya pueyani. ¹¹Jesucristo Sohuanucuaajaari juhuacariija nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaariija-riuhuj, naquiya na miiniu nuhuaji saniniuuja, nojuajaari Jiyaniijiarajanaa jiyatesaanutaniya, shacantuuca quiija nia quiniuria. Naaratej, nojoriiri maninia na niishiniuria saniniujuquiaari juucua, cantejaara cuno quiniutianiya, Pueyaso Jiyarosocoriquianoni, naajuhuj, taacari na muetanutaniyani. ¹²Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoriirajaja nia quiniu quiquiaari. Cuarta Pueyaso pueyanaa, icunoori niaarano quiquiaari seetanujanaa! iTariucuaaanu poojotasano Pueyaso Jiyarosocoriquianojiniji tari tohuateequiaari! Jiyocuaaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaa-cuaani. Naacuajitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaa. Pueyaso seyajanaacuajaari pueyarano Pueyaso miishocoriquianoocua maatia niishiniucua jiaatiajuhuaj.

Pueyasoori paniya saaja maninia miijiaca pa quiniuria

¹³Cunora, cuarta Pueyaso pueyanaa, jeenucuasano nia quiriquia. Jesucristo muetasacari pocua, Pueyasoori jiyanoohua maninia miiniutianiya pajaniya. Cunora, saaja naa nia miiniu panishaanucua jiaatiajaca nia quiri. Majaari nioojia niqijijotejaca nia quiniu. Maninia niishiriojuuaca nia quiriquia. ¹⁴Tariija, niaari tama nia cuaqueya panishanojuaja miijiaca quiquiaari, Pueyaso niishiyashijiacani nia quishacariija. Quiarijia saniniuuja, niaari na tojjijaca cutara. Naaratej, na muerasu nia quiniucua, majaari naa quijiaca nia quiniu socua. ¹⁵Saniniuuja, saa maninia miijiacaja nia quiriquia. Pueyasocuaajaari nia saquiriojoquiaari nia tojetaarucujanaa maninia miijiaca nia quiniuria, juhua nojuajuhuj. ¹⁶Tariucuaaanu Pueyaso sequesanoori nia naajiotasano quiyajuhuj:

“Tojetaarucujanaa sesa miyashijiacani nia quiri, taa janiyacuaani”.

¹⁷Nia secojosacari, niaari Pueyaso sequequiaa, “cua Quenaa”. Cunoori maniacuaja. Naajaa, majaari nia niyjetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimiajata na saniitonu quiniutianiya. Cunora, mijiria nia quishacariija, nia puerenuta tama nia cuaqueyajaaja nia cojuare, niaa mariqui na tojjiyashijiacara quiriuhuari. ¹⁸Pa supuetanaa quiniucua sesa miijiaca, paari naa miijiacara quiquiaarijuhuaj. Pueyaso

cutaraari naa sesa pa quiniujini pa jataniquaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio*, shaajeja casaata. ¹⁹Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niqiuara mosaaquiiaari na camaru niti, cuno borregoori tojetaarucuaajanaa borrego maniniu quiquiaari. Naajuhujaj, Jesucristoori tojetaarucuaajanaa maninia miijia quiquiaari. Naacuajitij, nojuajaari tojetaarucuaajanaa maninia pueyano quiquiaari pa niti na mosaanura. ²⁰Jiya shipiniyaquishacarijia, Jesucristoori tariucua pueya niti mosocoriqiano sequesaaquiiaari, sesa miijiaa jiyanooshaanura. Saniniujia quiari naataja, nojuajaari shusha mijiria muetaquiiaari pocuara na mosaanura, taa Pueyaso miiniu paniquaari pajaniyaracuaajani. ²¹Naa Jesucristo miiniuucua pocuaratej, niaari Pueyasocua tiuquiaa. Pueyasocuaajari Neyanu samiitianiqaariuhua. Na jiyatequiiaariiri Jiyaniijiajanaa na quiniuria, shacantuuca cumaacaraca quijia na quiniuria. Naacuajitij, niaari quiarijia Pueyasocua tiuya, na samiitianiniuria nijaniyajuuhujaj. Naaratej, niaari juhuajaniya sashiya, shacantuuca quijiacara nia jatanishaanurajuuhujaj.

²²Seetanu rupaajanaa tojitiajaca nia quiniuucua, nioojaari tari jeequejosaquiiaari, niarta Pueyaso pueya panijiaa nia quiniuria seetanujanaa. Naaratej, seetanujanaa panitiojuaca nia quiriqia puetunu nioojiatajanaa, maja sesa nia niishiriojonuta quenaaja. ²³Naa panijiaa nia quiri, jatanishano pueya nia quiniuucua. Pueyaso rupaacua nia tiushacari, niaari juhua roosaaquiariuhua, pueyaracaanu quijiaa nia quiniuria seetanujanaa. Pueyaso Rupaacuaajari pueyano samiitianijia, saminio na quiniuucua. Naacuajitij, niaari shaajeyashijia-cara jatanishaaquiiaari pueyaracaanu Quijia rupaacua nia tiuuniuucua. ²⁴Tariucuacaanu Pueyaso Rupaajinia naajiotasocuaajari naa sequeya:

“Puetunu pueyajanaari rishiyashijiaa juhua jiyasocua. Na cumaaca, puetunu na jiiitiasanojuanaajuhujaj, cunoori soreja, juhua naana shuu. Jiyasocuaari soreja. Naana shuuri tijia. ²⁵Saniniujia, Pueyaso Rupaa cutaraari pueyaracaanu quijia”.

Cuno rupaacuaajari nia niqiuara pohuatasaaquiiaari pueyaracaanu quijiacara na jataniniuria nijaniya.

2 ¹Naaratej, nia tarinitiare puetunu sesa nia miiniuujanaa. Seetanujanaa nia tarinitiare cuaracashijionu. Naajuhujaj, majaari sapuenu juhua maninia pueyano niqishano nia quiniu najuhuanaj. Majaari tamasa jiiitiasanoocua jiaatiajaca nia quiniujuhujaj. Majaari coriaacojuuca nia quiniu socua. ²⁻³Niaa jaara tari niishiyacuaja pa Jiyaniijiaari seetanujanaa maninia, na rupaacua jiaatiajaca nia quiriuarajaj. Naatej, taa shusha rasano conaaja jiaatiaa supenuucuaaani, naa Pueyaso Rupaacua jiaatiajaca nia quiriqiajuuhujaj, cumueca Pueyaso muerasu nia quiniuria seetanujanaa. Naacuajitij, niocua tojetaarucuaajanaa jatanishano pueya quiri.

Cristoori juhua saminio saajia, Pueyaso quiqiorano tiataja

⁴Sajiniiji shipinishano tiaari pueyaracaanu rishijia. Naaratej, pa Jiyaniijiaari miriqui sequeshiya juhua saminio saajiaa Pueyaso quiqiora. Mijiria Pueyasora tiajonaari jiyaniqiaari cuno saajiaari sesarujajau. Naaratej, nojori jiyajenetasacari cuno saajia, nojoriiri na jataquiiaari na ruoretasacari. Nojuaja cutaraari Pueyaso saajia maniniu, tama na saqiriojosanojuaja. Naaratej, nocua pa tiuuri. ⁵Naajuhujaj, puetunu Jesuucua tiuujiaa pueyaranojuanaari pueyaracaanu rishijia quiqiorano Pueyasora. Naacuajitij, Jesuucua pa tiushacari, paari juhua maniniujiaa sai Pueyasorani, na quiqiora na tiataja. Naajuhujaj, Pueyaso quiqio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa

quiniuria na tajoji. Majaari seya pa niqitiojonu quiquiaa Pueyasori, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaano. Puetunu naa pa miishanojuanaa Jesucristoocua pa tiuuniuucua, cunoori Pueyaso timitiquiaa. ⁶Cunora, tariucuacaanu Pueyaso Rupaajinia, miriqui Pueyaso sequesano Jesucristojiniijiiri naa naajiotasano quiya:

“Janiyari Sion* tuhananuucua jiyanohua cua panishano saajia nianutaniyani. Cuno saajiaari tama cua saqiriojosanojuaja. Maniniujajau saajia seetanujanaari. Cante nocua tiuyani, nojuajaari maja na cararosaanu quiniutianiya”.

⁷Cua panishano pueyanaa, cuno saajiaacua tiuujiaa nia quiniuucua, cuno saajiaari jiyanohua nia timitiasano. Nocua tiuyashijiaa cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tiajonaa jatasano saajia, nojori jiyanihacari cuno saajia naasucua sesarujajau, cuno saajiacuaajari socua jiyanohua panishano saajiaa jiyatesaaquiariuhua”.

⁸Tamaqui, nojuajiniijiiri naa miriqui naajiotasano quiyajuuhujaj:

“Pueyari cuno saajiaacua tiuriiniutianiya. Nocua jiriatanutaniyaajariuhua na tiuriiniuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniiji. Pueyasocuaajari tariucuacaanu sequesaaquiiaari Neyanuucua tiuyashijiaacari tiuriiniutianiya puetunurajanaa.

⁹Nijaniya saniniujia, niaari tama Pueyaso saqiriojosano pueyajaaja. Nojuajaari puetunu nijaniyajanaa jiyatequiiaari nojuaja secojonaa nia quiniuria pueyacuara, pueyaracaanu na panishano miijiaa nia quiniurijuhujaj. Puetunu nijaniyajanaari tamasa pueyapuejinijinio saqiriojosaaquiiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasa niqiuara. Tarijia, niaacuajaari juhua ninishiqui quijiaa quiquiaari. Pueyaso cutaraari nioojia cuhuataquiiaari, seetanujanaa shacantuuca cumaacajinia quijiaa nia quiniuria nata. ¹⁰Tariucuacaanu, Jesucristoocua tiuyashijiaa nia quishacarijia, niaari juhua soosano taucuaa quiquiaari Pueyasora. Quiarijia saniniujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanooquiiaari.

Pueyaso panishano miijiaa pa quiriqiaaj

¹¹Cua panishano cuarta Pueyaso pueyanaa, nia tojiri cua sequesano. Niaari juhua ruconaa mijiria. Nio jiyari maja pueyaracaanu pa quijiaa. Naaratej, majaari tama nia cuaqueya miiniu panishanojuaja miijiaa nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹²Saaja maninia miijiaa nia quiriqiaa Pueyaso niishiyashijiaa niqiuara. Naacuajitij, nojori jaara niaacuara rimiaaqueriquia juhua sesa miijiacara nojori jiyatesacari nijaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucuaajanaa maninia miijia na saniitiosacari nojori, maninia na miishacari nijaniya saniniujia.

¹³Pa Jiyaniijia tojijiaa nia quiniuucua, puetunu mijiria pa jiiitanaa jiyaniijianucua tojitiajaca nia quiriqiajuuhujaj. Naacuajitij, nia jiya jiyaniijiajanaa tojijiaa nia quiri. Nojuacuajaari jiyaniijiajanaa cutara. ¹⁴Cunora, na jiyatesano jiyaniijianucua tojijiaa nia quiriqiajuuhujaj. Nojoricuaajari na jiyaramiquishano, sesa miijiaa saniitiosaanura, maninia miijiaa maniniuhuaqueetasaanura saniniujia. ¹⁵Naacuajitij, saaja maninia miijiaa nia quishacari, niaari niishiyashijiaa

sesa miijiaca sanaajanutaniya, najuhuana nojori sesacasacari niajaniya. Cunora, Pueyasoori paniya maninia miijiaca nia quiniuria.

¹⁶Tariucuacaanu, Moisés Rootasanoori juhua nia jiyaniijia quijia puetunu niaarajanaa nia tojishocoriquiano. Quiarjia saniniujia, Jesu cusunucua nia niti, nojuajaari Moisés Rootasano tohuateequiaari. Naacuajitij, nojuajaari Moisés Rootasano sanaajaquiaari niaara. Naacuajitij, Moisés Rootasano tonujiaquishacari niaacuara tari, naajaa, majaari nia jiyaniuni naacuajiti nia naata tama nia panishanojuaja miiniu. Pueyasojuaacuajaari nia Jiyaniijajanaa cutara. Naaratej, seetanujanaa na tojitiacaja seya nia quiriqia cutara. ¹⁷Majaari quenaaja niquiriyatu pueyano rerequeteja nia quiniu. Niarta Pueyaso pueya panijia nia quiriqia cutara. Seetanujanaa Pueyaso tojijia nia quiriqia. Majaari jiya jiyaniijajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸Poonijotesano pueyanaa, seetanujanaa maninia nia camarnu tojijia nia quiriqia. Nia camarnu jaara juaajaca quiriqia, naajaa, saaja na tojijia nia quiriqia. Majaari saaja maninia nia jiitiacaja tojijia nia quiniu, nia jyanoojicario. ¹⁹Niaa jaara juhuajaniya rejeretariquia najuhuana nia camarnu saniitosacari niajaniya, cunoori jyanohua maninia Pueyasora. ²⁰Pueyaso cutaraari maja na timiniu niaa jaara juhuajaniya rejeretare nia camarnu saniitosacari niajaniya seetanujanaa sesa nia miiniucua. Saniniujia, nia camarnu jaara saniitiore niajaniya maninia nia miiniucua, niaa jaara na rejeretare juhuajaniya, Pueyasoori cuno timitiaja cutara. ²¹Pueyasocua-jaari nia saquirojoquiaari naquiya rejeretajaca nia quiniuria maninia nia miiniucua. Cristojuanaacuajaari naquiya miishaquiaari maninia na miiniuria pajaniya. Nojuajaari naa miiquiaaritij, pa niishiniuria juhua nojuaja pa miiniurajuhua. ²²Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhua. ²³Jaara sesacasaquiaari, nojuajaari maja quenaaja nojori na riucuanu quijia na juaaniutia. Jaara miitiasaquiaari, majaari quenaaja nojori na miananajonu quiquiaari. Nojuajaari saaja na Que Pueyasocua tiuquuaari, na niishishacari nojuajaari seetanujanaa maninia nequesoreena cutara. ²⁴Cristo jaara niyacutesanojinia cusojusaquiaari, nojuajaari tari puetunu sesa pa miiniujanaa cusotaquiaari. Naa pa niti Cristo cusunucuatej, cunoori quiquiaari maninia miijiaca pa quiniuria saniniujia, maja socua sesa miijiaca pa quiniuria. Naajuhua, nojuajaari pa niti nootusaaquiaari, pa naatanijiosaanura saniniujia. ²⁵Tarijia, niaari juhua tashuquioono borregohua* rucoojuaca quiquiaari. Quiarjia saniniujia, niaari nia cojuana Cristoocua tiuquijioquiaari. Nojuacuajaari nioojia jiitiana maniniu.

Camiyono pueyara rootasano

3 ¹Camishano maajipohuanaa, nia niyaca tojitiacaja nia quiriqia maninia. Naacuajitij, nia niyaca jaara Pueyaso rupaacua tiyashijia quiriqia, naajaa, nojori tojitiacaja nia quiniucua nojoriiri niishiniutianiya Pueyaso Rupaari seetanujanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacarijia Pueyaso Rupa. ²Nojori niquishacari tojetaarucujanaa maninia miijia nia quishacari, nojori tojijiacajuhua, saa cunotaja nojoriiri maatia niishiniutianiya Pueyaso Rupaari seetanujanaa. ³Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucuasano, saaja na muecaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucuasano jaara juaaniu maniniu quiriqiajuhuaj? Maja. ⁴Naaratej, maninia cutaraari nia tacaaniuria nioojia nia

maniniushitiniuria. Cunora, saaja maninia maaji quiniucua jiaatiacaja nia quiriqia cutara, jacaria pocuajuhua, maja juaajia. Jiyano maajitij, cunoori seetanujanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujanaa shaajeyaquiriqiano. ⁵Naajuhua, Pueyasocua tiuujia tariucuacaanu maajipohuari neyaca tojijia quiquiaari. Naa nojori miiniucuatej, nojori jiuujiaari seetanujanaa shanohua maniniushitishano quiquiaari Pueyasora cutara. ⁶Supuetana Abraham niquiocua Saaraari naa neyaca tojijia quiquiaari. Seetanujanaa neyaca tojijia na quishacari, nojuajaari na jyaniquijia na jyanijia. Naacuajitij, niaa jaara maninia miijiaca quiriqia, niaa jaara nia puereyaquiniutia nia niyaca tojijia quiriqiajuhuaj, Pueyasora, niaari Saara niquiojori.

⁷Niajanijarijata canuunaa, nia niquiocua nia jiitariquia maninia, nia niishishacari maajiiri maja cumueca juhua cayaja. Majaari na rerequetenu. Maajipohuacuajaari Pueyaso jyanooshanohua, taa na jyanooquiaari niajanijacuaani. Pueyasoori niaata nojori cojiritianutaniya samiitianijionu, pueyaracaanu rishijia nojori quiniurajuhua. Naacuajitij, maninia nia jiitariquia nia niquiocua, Pueyaso mariqui nojuaja nia secojosano tojiyaquiriiri.

Paatucua taa miiriquia parta pueyani

⁸Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutano. Niarta Pueyaso pueya nia cojiriqia taraatia nojori quishacari, shuquiriaatia nojori quishacarijuhuaj. Seetanujanaa panitiojuaca nia quiri juhua nia tapueyocucata. Taraajetoojuaca nia quiriujuhua. Naajuhua, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. ⁹Niaa jaara sesa miishaariquia, majaari na naminiu. Naajuhua, niaa jaara sesacasaariquia, majaari nojori nia riucuanu nojori nia sesacanurajuhua. Saaja maninia nia riuhanere nojori. Tariucuacaanu, Pueyaso paraca nia quishacarijia, nojuacuajaari nia saquirojoquiaari maninia na miiniuria niajaniya. Naaratej, saaja maninia nia miiriquia nia paracajuhua. ¹⁰Tariucuacaanu Pueyaso Rupaajiniacuajaari naa naajiotasano quiyajuhua: “Cante pueyaracaanu mijiria rishiniucua jiaatiaani, shuquiriaatia na quiniurajuhua, nojuaja cuara na niti cojuara maja sesa na pocuanura. Cuara na rupaa cojuarajuhua maja na cuaracashijionura. ¹¹Naajuhua, cuara sesa na mijionu tarinitiaara saaja maninia na miiniuria. Nojuaja cuara pueya jyanootiooteja quiri. Cuara naa maninia na miiniu tarinitiaaquiiri. ¹²Cante naa maninia mijiani, Pueyasoori na cojuaja, na secojosano tojijiaariuhua. Saniniujia, Pueyasoori sesa miijia samiritiaja saaja”.

¹³¿Cantucua sesa nia miiriquiani niaa jaara saaja maninia miijia quiriqia? ¹⁴Naajaa, niaa jaara saaja maninia nia miiniucua miitiasaare, nia timiquiore. Pueyasocuaari jyanohua maninia miiniutianiya niajaniya saniniujia. Mijiria quinia miananajosacari niajaniya, majaari puerenu, majaari nioojia nia niquijiotenu. ¹⁵Saniniujia, nioojiajinia Cristo nia jiyatere nia Jiyaniijajanaa, seetanujanaa na tojijia nia quiniuria. Juhucarijia nia niishiriojoriqia, jeenucasano nia quiniuria, maninia nia pohuatanura Jesucristojiniji. Naacuajitij, niaari jeenucasano quiniutianiya, maninia nia riucuanura tamasa jaara nequesotare niajaniya, casaara juhuajaniya naquiya miiniu rejeretajacate niajanijani. ¹⁶Jacaria nia pohuatare nia paniniutia nojori, maja nia rerequetenu nojori. Pueyaracaanu maninia miijia nia quiriqia, sesa nia miiniu mariqui nioojia macuhajareeri. Naacuajitij, pueyaracaanu shitimia maninia miijia nia quishacari Jesucristoocua tiuujia nia quiniucua, niaacuara rimiaaquejacaari tama sesa na pocuanucuaaja caririqiniutianiya.

¹⁷Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸Cristojuanaacuajaari mosaaquiaari sesa miijiaca pa quiniuucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiaacuara cusoquiaari, Pueyasocua na jiyatanura nijaniya. Pueyano cuaqueyaraca na quishacari, mosaaquiaari. Pueyaracaanu rishijia sohanuraca na quiniuucua, nojuajaari samiitiaquiaariuhua. ¹⁹Naa sohanu na quiniuucuatej, nojuajaari macunucua quiquiojinia rosequiaari tii tama nojuajiniijiaaja na pohanuraca macunucua sohanu. Cuno pojoriiri nujuatejojuajinia mishihiqionucua quiya. ²⁰Cuno pojoriiri, noo pojoricuaja tariucuaacuana supuetana Noé tojiyashijia quiquiaaritij, pueyaracaanu Noé poojotasacari Pueyaso rupaa nojori niqiuara juucua. Pueyaracaanu Noé tarishishacari na puereetuca buque na shipinishacari, pajaacuaji na tacajara, Pueyasoori jiyacari cuno sesa miijia sashiquiaari juucua. Pueyaracaanu sashiquiaariiri nojori tacatonuhua noojiaca nocua juucua. Puetunu mijiria quijia pueyajiniijiojuanaani, saaja ocho pueyari cureequiaari, buquejiniaacuma nojori tiuquitianuucua. Puetunu pueya shushiniuushacari pajaajinia, cuno pajaari saniniuujia Pueyasocua tiuujiaacuaataniquiaari na buquejinia. ²¹Quiarjia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuana, Pueyasocua tiuujia na quiniuucua, pueraari naajuhua. Naacuajitij, paa jaara moojinia tiuquinishaareni, paari pa timiniutia moojiniji tohuataquihuani, poojia cajitishano seetanujanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. ²²Jesuucristo samiitiasacariuhua, nojuajaari jiyocuaacuana tacaquiaariuhua. Quiarjia cajiya Pueyaso miaquetajaraari. Jiyaniijajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhanio.

Maninia miijia pa quiriqia, Pueyaso cumaaca pa jitianuucua

4 ¹Naacuajiti pueyanaa, naatej, taa Cristo rejeretaquiaari naquiya miiniu mijiria na quishacariacuana, naa rejeretajaca nia quiriqiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ²Naacuajitij, paa jaara naa naquiya miishaariquia, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaaja pa miiniuria socua. ³Tarijia, Pueyaso tojiyashijia nia quishacarijia pueyanaa, niaari jiyanoohua sesa miijia quiquiaari, taa Pueyaso niishiyashijia miiquiaacuana. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatijaca quiquiaari. Niaari saaja mashaasequenujuaca quiquiaari. Nia queranacunuusaqui, niaari tojetaarucujanaa sacuaraatia miijia quiquiaari. Niaari rerejojuajuhua puera nia ratunura, jiyanoohua nia mashaasequenuunurajuhua. Naajuhua, niaari juaashiquiata shipinishano nia pueyasora nia jiyatesano shuquiritijaca quiquiaari. Niaari na tajoji sacuaraatia pueresano casaa miiquiaarijuhuaj. ⁴Quiarjia saniniuujia, Pueyaso niishiyashijia nia cojiyaquishacari naa sacuaraatia nia miijionuratej, nojoriiri jiuujiatequiaa nojori shaacasacari nijaniya. Nojoriiri cunora nia sesacaquiaa. ⁵Cuno pojori cuaara niishiiria nio, Pueyasoori nojori nequesoreenutaniya na nequesoresacari puetunu pueyajanaa, saminiuucua, macunucuanio. Jiyacaritij, nojori cuaara tama nojoriicuai ruucuarajaaja. ⁶Cunora, pa Jiyaniijia

Jesuucristoori macunucua niqiuara pohanuataquiaari Pueyaso rupaa tama nojuajiniijiaaja, nocua tiuujiaacara na jiyatesocori-quiano. Nocua tiuujiaacari pueyaracaanu rishijiaacara quiriqiano, taa Pueyasocuaani. Sesa miijia mijiria nojori quiniuucua, nojoriiri pajaajinia cusonuquiaari taa puetunu pueyajanaa shaajecoquiaacuana. Naajaa, Jesuucua tiuujiaacua cutaraari samiitianijiosaanutaniuhua.

⁷Nio pa quishacariini, paari socua quenaacoya jiya puequesacariacuana. Naaratej, niishiriojuuca nia quiriqia. Maninia nia jitiariquia tama nia cuaqueyajaaja, saaja Pueyaso secojojuuca nia quiniuria pueyaracaanu. ⁸Jiyanoohua panitiojuuca nia quiriqiajuhuaj. Cunoori socua panishano cutara. Paa jaara panijia quiriqiani, paari queraatia sesa miishano jiyanoojia quiniutianiya. Naaratej, seetanujanaa panijia nia quiriqia. ⁹Niarta Pueyaso pueya jitiiaquishacari na maquejara, na miaquesocoriqianojuhuaj, nojoriicua taraajaja nia quiriqia. Nojori nia tiuqiniariquia nia tijajinia nia timiniutia. Majaari nojori nia ririjiotanu nia taajenuta. ¹⁰Pueyasocuaajaari na Sohanu niqitioquiaa puetunu na pueyajanaa, tamaatia maninia casaa miiniu niishijia pa quiniuria. Naaratej, puetunu nijaniyajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa nijaniya maninia nia miiniuracuajani. Maninia nia poonijioteriquia Pueyaso cumaaca, nojuaja niqitiojosano nijaniyani. ¹¹Naacuajitij, nia pocuasacari, Pueyasocua nia tiuuri nojuaja cumaquiniuria nijaniya na panishano nia sequenura. Naajuhua, niaa jaara casaa miiriqia niarta Pueyaso pueya nia naacunura, nojori nia miiriqia maninia Pueyaso niqitiosano cumaacata. Naa nia miiriqiatej, Pueyaso timitiasaanura socua, Jesucristoocua tiuujia nia quiniuucua. Nojuaja cuaara maniniuhuaqueetasaaria pueyaracaanu, tojetaarucujanaa maninia miijia na quiniuucua, puetunu cumaacaracajanaa na quiniuucujuhua. Cuaara naa quiiriatej.

Juhujaniya pa rejeretare naquiya miiniu, Pueyaso pueya pa quiniuucua

¹²Cua panishano cuarta Pueyaso pueyanaa, majaari nia shiriqiniu niaa jaara jiyanoohua naquiya miishaariquia. Majaari nia jiyaniujuhuaj saa nijaniyaja naa miishiya. ¹³Niaa jaara naa naquiya miishaariquatej, nia timiri. Jesucristoocua tiuujia nia quiniuucua, niaacuajaari naa miishiya taa Jesucristo miishaaquiaari naquiyacuana. Naa naquiya miiniu nia rejeretasacariitij, niaari jiyanoohua timitanutaniya Jesucristo, shacantuuca na cumaacata na tiuquishacariuhua, na jataniniuria nijaniya juhua nojuaja nia quiniurajuhua. ¹⁴Naajuhua, niaa jaara sesacasaariquia Jesucristo tojiijia nia quiniuucua, shuquiriaatia nia quiriqia. Pueyari naa nia sesacaquiaa, shitimia maninia miijia nia quishacari, Pueyaso Sohanuraca nia quiniuucua. ¹⁵Niaa jaara naquiya miishaariquia pueyanaa, cuno cuaara quiiria maninia miijia nia quiniuucua, maja sesa miijia nia quiniuucua. Niaa cuaara caririqiiiria cutara niaa jaara mojuia quiri, nohuasejojua, sesa miijia, timia niishini panijia tamasa casaa. ¹⁶Saniniuujia, maja cutaraari nia caririqiniu niaa jaara naquiya miishaariquia Jesuucua tiuujia nia quiniuucua. Saaja Pueyaso nia shuquiritariquia cunora.

¹⁷Quiarjiani, Pueyasoori tama na pueyajaaja saniitioquiaa na tojitiaquishacari na rupaa. Paa jaara naa saniitosaaquiaacuana, itaariquitijia noo pojori miishaanutaniya socuatejaj, Jesucristojiniji pohanutasano ruuretajacatej? ¹⁸Naacuajitij, Pueyaso jiyanooshano pueya jaara queraatia naquiya miiquiaacuana, itaariquitijia Pueyaso tojiyashijia miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacano. Nojoriiri jiyanoohua socua naquiya miishaanutaniya, Pueyaso saniitosacari nojori. ¹⁹Naacuajitij, Pueyaso jaara naa naquiya nia miishaanura paniya, juhuajaniya nia rejeretariquia naquiya nia miiniu. Majaari nia tarinitianu

maninia nia miiniu, naquiya nia miishacari. Saaja Pueyasooocua nia tiuuriquia nioojia na cojuanura maninia. Nojuacuajaari na Shipininia. Nojuacuajaari saa maninijaja. Naquiya pa miitiquiaacuajaari socua na jeenucuanura pajaniya.

Socua rootasano Pueyaso pueyara

5¹Quiarijia saniniujia cuarta Pueyaso pueyanaa, janiyari nia jiitianaa nacasuyani. Niajaniya, Pueyaso pueya maapue jiitianaanaa, cua tojitiare. Janiyacuajaari Pueyaso pueya maanu jiitianajuhuaaj, juhua nijaniyajuhuaaj. Janiyacuajaari pa Jiyaniijijajanaa niqiniiani, nojuaja jaara naquiya miijioquiaari mijiria na quishacarijia canaata. Naajuhuaaj, nojuajiniji cua pohuatanuucua, janiyari naquiya miishaaquiaajaaniuhuaaj. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ²Cunora Pueyaso pueya jiitianaanaa, shamaatia nia cojuare Pueyaso pueyanijoyua, teyano jiitianaara Pueyaso jiyatequiaari nijaniyacujani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jiitiano nia taajenuta saaja nojori jiitianaa nia quiniuucua. Naajuhuaaj, majaari nojori jiitianaa nia quini saaja cumaneecaacua nia jiaatianuta. Saniniujia, seetanujuanaa nojori nia paniniutia nia jiitiarquia niarta Pueyaso pueya. ³Majaari niarta Pueyaso pueya nia jiitiano juhua tama nia seyajaaja. Niajaniya saniya cuaara maninia miijiaa quiiria nojori niqiara, nojori niishiniuria naa quijiacate Pueyaso pueya, naa nojori miiniurijuhuaaj.

⁴Naacuajitij, pa Jiitianajanaa tiuquishacariuhua jiyocuacaanuji, niaari shacantuuca quijiacara jatanishaanutaniya, pueyaracaanu rishijia nia quiniurijuhuaaj.

⁵Niajaniya mashiquirinia, Pueyaso pueya jiitianaa tojijia nia quiriqiajuhuaaj. Puetunu nijaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquinia nia quiniuria jaarajaaja. Tariucuacaanu Pueyaso Rupaajiniacuajaari naa naajiotasano quiya:

“Pueyasoori na juaaniutia niqijia narta pueya shocoteja. Saniniujia, narta pueyano shocoteyashijia naacujua cutaraari”.

⁶Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijia nia quishacarijij, pa Jiyaniijia

Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniurijuhuaaj. ⁷Pueyanaa, puetunu nia tacaaniujianaa nia niqitioore Pueyaso. Nojuacuajaari niaacua taraajequiaa.

⁸Pueyanaa, nia Paraca sequeeri nia shanacujuquiaa, juhua sare, taa sare shanacujia na sanura casaacuaani. Cunora, soquejaca nia quiriqia pueyaracaanu. Juhua sutejaca nia quiriqia, pueyaracaanu nia secojonura, Sesaaca mariqui juhua sare nia sareeri. ⁹Cumaatia nia nujuatariquia nojuaja, seetanujuanaa Pueyasooocua tiuujia nia quishacari. Majaari Pueyaso Rupaacuaji nia taacanuuu. Naa nia miiriquiatej, nia niishishacari niarta Pueyaso pueyari puetunu tiqiyocuajanaa naa naquiya miiquioyajuhuaaj. ¹⁰Nia jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jiyanoojia na quiniuucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesuucua nia tiuuniuucua. Naaratej, nojuacuajaari nia jiyatenutaniya seetanujuanaa nioojia niqijitoyashijia nia quiniuria, socua jiyanohua na cumaaca jiitijaca nia quiniuria, maja quenaaja Sesaaca pootionura nijaniya. ¹¹iJiyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. iCuaara naa quiiriatej!

Pedro sequesano quera na naajio na tucuatascari

¹²Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura nijaniya, cua shiniujiuniuria nijaniyajuhuaaj maja nia pishiniuria Pueyasooacuaji. Seetanujuanaa jiyanoojia na quiniuucua, naarate nojuajaari nia jiitaa maninia, naquiya na miitishacari nijaniyajuhuaaj. Cunora, nocua nia tiuuriquia, pueyaracaanu na cumaquiniuria nijaniya.

¹³Babilonia tiacajinia quinia parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaaj, taa na saquiriojosanotucuaa nijaniyani. Marcoori nia saruhuataajuhuaaj. Nojuajaari juhua quiyanu. ¹⁴Nia sarhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuaara nioojia cajitiiria, canapete Jesucristooocua tiuujiacacuajani.

TANEE PEDRO NAAJIONEE

Pedro saruhuatasacari narta Pueyaso pueya

1 ¹Janiyari Simón Pedroni, Jesucristo seru, na jiyaramiqui-shanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuquiaricuaani. Nocua nia tiuuniuni, cunoori jiyanhua panishano. Naacuajitij, Pueyasoori nia jiyanooquiaa juhua sesa miyashijiaca nia quiniuria na niquiara, taa canaa quiyacuaani. ²Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanhua cumaquishaanutaniya. Nioojaari cajitishaanutaniya-juhuaj, juhuajaniya quijiaca nia quiniuria.

Pueyaso pueya cuaara nio niishitiojosano miijiaca quiiria

³Jesucristojuanaacuajaari pa sequequiaari na pueya pa quiniuria. Paari na masuunu tojiquiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniurajuhua. ⁴Naa jiyanhua maninia miijia Jesucristo quiniucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniurajuhua. Naacuajitij, paari quiariniora jatanishaacuaari na cumaacatani maja pa sesenura. Paa jaara Pueyaso tojiyashijiaca quiriqiani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniucua. ⁵Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniucuatej, jiyanhua nia saniniujiuri maninia miijiaca nia quiniuria pueyaracaanu. Naa maninia miijiaca nia quishacaritij, jiyanhua nia saniniujiuri socua niishijiaca nia quiniuria, sesa miiniu nia ruuretatura. ⁶Naa niishijiaca nia quishacaritij, jiyanhua nia saniniujiuriquia tama nia cuaqueya miiniu panishanojuaja rejetejaca nia quiniuria, maja nia miiniuria sacuraatia casaa nia panishano. Naa tama nia cuaqueyajaaja rejetejaca nia quishacaritij, jiyanhua nia saniniujiuriquia juhuajaniya sashijiaca nia quiniurajuhua. Naa juhuajaniya sashijiaca nia quishacaritij, jiyanhua nia saniniujiuriquia seetanujuanaa Pueyaso panijiaca nia quiniuria. ⁷Naa Pueyaso panijiaca nia quishacaritij, jiyanhua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanhua nia saniniujiuriquia tojetaarucujanaa panijiaca nia quiniuria.

⁸Naa jaara puetunu nio niishitiojosanojuanaa tojijiaca quiriqia seetanujuanaa, majaari najuhua na Jiyaniijia Jesucristo niishijiaca nia quiniu quiniutianiya. Naajuhua, majaari najuhua quijiaca nia quiniu quiniutianiya. ⁹Nio rootasano tojiyashijiaca saniniucua, nojori nio juhua cariyojuaru, niishiyashijiaca. Naa nojori quiniucuatej, nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. ¹⁰Cuarta Pueyaso pueyanaa, Pueyasocua-jaari nia sequequiaari na pueya nia quiniuria. Nojuajaari nia

sacuiriojoquiaari. Cunora, puetunu nio cua rootasanojuanaa tojijiaca nia quiriqia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. ¹¹Naa maninia quijiaca nia quiniucuatej, niaari shuquiriaatia tiuquinitiasaanutaniya jiyocuaaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijajanaa na quiniucua.

¹²Niaacuajaari maatia niishitiojosaaquiaari Pueyaso rupaa Jesucristojiniji. Naaari cunoo seetanujuanaa rupaacua tiuujia. Naaaja, janiyari pueyaracaanu nia niishitiniutianiyan, maninia nia racatanura nia numaama. ¹³Mijiria cua rishishacarijia, Jesucristo jiyaramiquishano cua quiniucua, maniniacuajaari pueyaracaanu cua shiniujiuniuria niajaniya, maja tariucua nia niishishano Jesucristo rupaaajiniji nia niyajetanura. ¹⁴Pa Jiyaniijia Jesucristoori tari cua niishitiriucaa janiyari quera mosaanutaniyani. ¹⁵Cunora, janiyari nio naajiya niaarani. Naacuajitij, janiya jaara mosaareni, niaari nio cua naajionee jiitianutaniya cua nuhuaji nia serojosocoriquiano. Maniniacuajaari nia jiitianura cua naajionee maja nia niyajetanura puetunujuanaa cua niishitiojosano niajaniya.

Shacantuuca Jesucristo cumaaca niqiniaajiniji pohuatasano

¹⁶Canaa niishitiojosano niajaniya pa Jiyaniijajinijini, cunoori maja canaa tojishano tamonujiniji. Naajuhua, cunoori maja tama niishijiacajaaja pohuatasano na sapojonura pueya. Jesucristo cumaacajiniji canaa pohuatasano, naajuhua, taa na tiuquiniutianihuani, puetunu cunajuanaa maja tama canaa niishishanojuaja. Canaajanaacuajaari canaa namijiatajanaa na niqiuquiaarini nojuaja jaara shacantuucara jataquiaari canaa niqiuara. ¹⁷Jiyacaritij, na Que Pueyasoori jiyanhua na timitariquiaa canaa niqiuara. Canaari na tojiquiaarini naa na sequesacari Neyanujinijitij: “Nojuajaari Quiyanuniyoja. Jiyanhua cua timitiasano”. ¹⁸Canaa quishacari pa Jiyaniijata shacantuucara na jatasacari tuhananuucua, canaajanaari naa Pueyaso tojiquiaari jiyocuaaanu pocuaanoni.

¹⁹Canaa tojiniucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuaaanu nojuajiniji pueyara Pueyaso sequesano caminiujiuniaa sequesanoori seetanujuanaajuhua. Naaratej, maniniacuajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasano, cunoori poojajinia cuhuataquiaa, naatej, taa samaritiu cuhuataa ninishiquicuaani, cuaara juhuaquemajaatijia. Pananuuri saniniucua muetanutaniyacuaja, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰Maninia nia niishiri nio, pueyanaa. Puetunu tariucuaaanu Pueyaso sequesano caminiujiuniaa naajiotasanojuanaa maja na naata niishishaanu maatia tama pa niishitijatajaaja. ²¹Tariucuaaanu Pueyaso sequesano caminiujiuniaa naajionuutasano, cunoori maja tama nojori niishishanojuaja. Pueyaso Sohanujuanaacuajaari nojori niishitiquiaari nojori pohuatanura Pueyaso sequenu panishano pueyara.

Sacuraatia miijiaca niishitiojonaajiniji pohuatasano

2 ¹Tariucuaaanu, noojiaqueya Israel pueyajinijiniori tama na cuaqueyajaaja jiyatequiaari juhua Pueyaso sequenu panishano caminiujiuniaa nojori quiniuria. Naacuajitij, nojoriiri

narta Israel pueya sapojonuuquiaari. Naajuhua cua panishano pueyanaa, sapojonuujuacaari nia tajinia supuenutaniyajuhuaaj. Nojori niishitiojosacari sacuaraatia tama nojori niishishanojuuaaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacujatij, nojoriiri tama nojori Camarnujuaaja tamacanutaniya, cante nojoriicudara mosaaquiaaricujani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitosocoriquiano. ²Queraatia pueyari sacuaraatia miijiaca quiniutianiyajuhuaaj, sacuaraatia cuno pojori niishitiojosano tojjijaca nojori quiniuucua. Naa nojori miiniuucuatej, Pueyaso niishiyashijiacaaari seetanu rupaajanaa sesacanutaniya. ³Cuno sacuaraatia niishitiojonuujuacaari jiyanhua casamiriaca quiniuucua jiaatiajaca quiniutianiya. Naaratej, nojoriiri najuhuaana shanohua nojori niishitiojosano nia sapojonutaniya, nareja nia niqutiojonura nojori nia cumaneeca, nia casamini. Naajaa, naa sacuaraatia miijiaca nojori quiniuucuatej, nojoriiri tariucuaacaanujiniji Pueyaso riuriosanocuja na saniitosocoriquiano. Majaari Pueyaso jiyanooni quiniutianiya nojori.

⁴Naajuhuaaj, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. ⁵Naajuhuaaj, Pueyasoori Noé quishacari sesa miijiaca pueya jiyanoyaquiquiaarijuhuaj. Cuno sesa miijiaca pajaashitianiiaariiri nojori cusonunura puetunujanaa. Saaja Noé curoquiaariiri Pueyaso tojjijia na quiniuucua, socua siete pueyano. Noeri pueyaracaanu cuno sesa miijiaca pueya numootequiaari juucua, nojori tacatonura noojia Pueyasoocua, sesa nojori miiniujiniji. ⁶Naajuhuaaj, Sodoma* tiacajinia quiniaa pueya quiniuucua jiyanhua sesa miijiaca, Pueyasoori cuno tiaca catijiatiaquiaari tojetaarucujanaa juacara. Naa catijiatiaquiaari Gomorra tiacajaariuhuaaj. Cuno caapiqui tiaca naa catijiatiasaaquiaarini, cunoori quiquiaari cuno nuhuaji quiriqiuano pueya na numootenura maja naa sesa miijiaca nojori quiniurijuhuaaj, nojori mariqui saniitiosaarejaariuhuaaj. ⁷Sodoma tiaca Pueyaso catijiatiasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyanhua taajequiaari tari, cuno pueya miijionuucua sacuaraatia casaa, tariucua nojori jiiitishano casaacua.

⁸Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojijano. Sacuaraatia nojori pocoojonu tojiqiaarijuhuaj. Maninia pueyano Lot quiniuucua, nojuajaari jiyanhua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹Naacujati pueyanaa, paari niishiyani, Pueyasoori na tojtiajaca pueya cojuaja, maja nojori miitishaanura sesa. Saniniujia, Pueyasoori sesa miijiaca racatajaara nujuatejosano, nojori saniitiojosaaanu juucara. ¹⁰Pueyasoori socua jiyanhua nio pojori saniitioriquiano: na camishoo maajipohua numuetucunuucua jiaatiajacani, maajishuri numuetucunujuacajuhuaaj, noo pojoriujuhuaj, pa Jiyaniijia rootasano ruuretajaca saajatej. Naa sacuaraatia miijiacani, nojoriiri tojetaarucujanaa tojiyashijia. Majaari na pueretunu quiquiaa sacuaraatia tama nojori panishanojuuaaja nojori miiniuria. Naajuhuaaj, nojoriiri maja na pueretunu quiquiaa jiyocuaaanu cumaacaraca quijia na sesacanura. ¹¹Saniniujia, Pueyaso seya cutaraari jiyanhua socua cumaacaraca cuno sesa miijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuaaanu cumaacaraca quijia nojori sesacanura.

¹²Cuno pojori, saaja sacuaraatia miiniuria niishitiojanaani, nojoriiri niishiyashijia. Nojoriiri juhua nacujiniaaco quijia casami, teyanote saaja puecoosocoriquiano roosaaquiaacujani. Tojetaarucujanaa niishiyashijia nojori quiniuucua, nojoriiri maninia quijia na quiniuria pa Jiyaniijia rootasano

sesacuaquiaa. Cunora, nojoriiri juhua puecoosocoriquiano nacujiniaacoji casaa. ¹³Naacujatij, nojoriiri naquiya miishocoriquianojuhuaj, naquiya nojori miitianuucua narta pueya. Nojoriiri jiyanhua timiquiaa nojori jaara naata quiriqiaa sesa miiniu juucajuhuaaj taa nojori miiquiaa niucuaacuaani. Cuno pojoriiri sacuaraatia miijiaca. Majaari na niishiniu caririqiuinu. Nojori sapojonuuca niajanija, nojoriiri jaaraaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanhua timiquiaa tariucua nojori jiiitishano sesa casaacua nojori niishiriojosacari. ¹⁴Naacujatij, nojoriiri maja nareja na niqiniu quiquiaa maajipohua. Puetunu maajipohujanaa niqitiquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapue te jatarinitiaja pa Jiyaniijia tojjijani, cuno pojoriiri nojori shiniujuquiaa na sapojonuta, sesa nojori miiniurijuhuaaj. Naajuhuaaj, cuno pojoriiri tariucua jiiitino puetunu nojori panishanojuanaa nojori jiiitianura, jaara na naata quiriqiaa. Nojoriiri tariucua Pueyaso jiyatesano na saniitosocoriquiano. ¹⁵Pueyaso rootasano tojiyashijia nojori quiniuucua, nojoriiri juhua tashuquioono Pueyasoocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam*. Jiyacaritij, Moab jiya jiyaniijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanhua queraatia casami na niqutiojonutaniya, nojuaja jaara nocua quiaare, Israel pueya na shimiojonura nera. ¹⁶Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuacono quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacujatij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

¹⁷Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhuaaj, nojoriiri juhua niqutioocua paratu piyarojosano, tamoco quiamaa saajaari. Nojori niishitiojosanoori naajuhuaaj. Majaari na tojtiajaca na naacunu. Pueyasoori jiyanhua ninishiqui quiquio tari jiiitaa nojoriicuaaji, pueyaracaanu nojori quiquiorano. ¹⁸Nojori pohuatasanoori najuhuaana shanohua tojishano. Saaja sapojonuu. Naacujatij, nojoriiri shusha Jesucua tiuujiaca shiniujuquiaa nojori miiniuhuaa tama nojori cuaqueya panishanojuuaaja. Cuno Jesucua tiuujiacacuaajaari shusha naataja sesa miijiaca pueyajinijino jatanishaariquiaa juucua, Pueyaso tojjijaca nojori quiniuria juucua. ¹⁹Sapojonuujuaca cuno niishitiojonuujuaca quiniuucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari seetanujanaa juhujaniya quijia quiniutianiya shuquiriaatia, nojori jaara nojori niishitiojosano tojjijaca quiriqiaa. ¿Nojori niishitiojosano pueyatucua taa juhujaniya quijia quiriqiani, tama nojorijiaaja jaara sesa miiniuucua jiiitino quiyajaa? Seetanujanaari, pueyano jaara maja na naata quiriqiaa sesa casaa na miijionu tarinitianu, cuno pueyanoori seetanujanaa juhua tama sesa na miijiosano serujuaaja. Majaari na naata na tarinitianu. ²⁰Pueyanaa, niaacuaajaari niishiya, pueyano jaara pocuaji Tacunaacua tiuujiara quiri, pa Jiyaniijia Jesucristoori na cumaquijia na tarinitianura sesa miiniuria na jiiitishano. Saniniujia, cuno pueyano jaara sesa miijia quiriuhua, nojuaja jaara sesa miijionura jiiitiriohua socua, neraari socua puereeta quiniutianiya Pueyaso niishiyashijia pueyajiniji. ²¹Naacujati pueyanaa, pueyano jaara seetanu rupaajanaa niishijia quiriqiaa, nojuajaari cocuaatia miya jaara na samiritioruhua sesa miijia na quiniuhuaa. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiaara pohuatasaaquiaaricujani, jatanishano pueyano na quiniuria. ²²Naa pa Jiyaniijia samiritiajaca pueya quiniuucuatej, sesa miijiaca nojori quiniuhuaa, nojoriiri nio tariucuaaanu Pueyaso Rupaajinia naajiotasano tohuateequiaa.

Naa miriqui sequeyari: “Sareeri coteenu macayoree. Na miaquerohuari”. Naajuhuj: “Cushiiri nanatosaree juucua. Saaja na cooquiojina neeneecuasuhariuhuj”.

Pa Jiyaniijia tiuquiniuhua cuaracashitishacari

3 ¹Cua panishano cuarta Pueyaso pueyanaa, nioori tanee cua naajione niaacuara. Coteenu cua naajiojina, janiyari nia nacasuquiaarini socua cua shiniujiuniuria nijaniya maja nioojia niquijotejaca nia quiniuria Pueyaso rootasanojiniji. Janiyari naa miya quiarijia nio cua naajiojiniajuhuaj. ²Maninia nia numaama nia racatariquia tariucuaaanu pueyara Pueyaso sequesano caminiujiunaa pohuatasano, pa Jiyaniijia jiyaramiquishano pueya pohuatasanonio. Cunocuaajari pocuaji Tacuna rootasano pajaniyara.

³Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supenutaniya. Nojoriiri tama na cuaqueya miiniu panishano miijiacajaaja. Na macaatinuria nijaniya, nojoriiri nia nequesotanutaniya: ⁴“¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhanijia’. Majaari na tiuquiniu. Tariucuaaanu na niquninaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”. ⁵Majaari naate pueyanaa. Cuno pojoriiri tariucuaaanu Pueyaso miishanojiniji niishiniu paniyashijiaca. Jiyanoehua tariucuaaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujiajinia na quiniuria. ⁶Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura. ⁷Quiarijia saniniuuja, jiya cajiniocua, nio jiyano, Pueyasoori na cumaacata nojori jiiiaajaara. Na nuhuaji cutara, puetunjuanaari catenutaniya, Pueyaso saniitiosacari puetunu na ruuretajaca pueyajanaa.

⁸Naajuhuj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niquiriyatu juucaari juhua mil* marijia. Naajuhuj, mil marijiaari juhua niquiriyatu juuca nera. ⁹Majaari nia jiyaniinu maja pa Jiyaniijia tacatenu quiniutianihua. Majaari na tarishiniu najuhanaj, taa tamasaca jiyaniyacuajani. Maja. Maja cutaraari na paniniu pueya quejoosaanura mani quiquiojina. Naacuajitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰Naajaa, nojuacuajaari tiuquiniutianihua. Pueya jiyaniishacari Jesucristo maja na tiuquiniu quiniutianihua, jiyacaritij, canashiyajiqi tiuquiniutianihuari. Juhua nohuasejojua tiuquiniutianihuari, sesa miijia na saniitionura. Na nuhuaji, jiya cajiniocuaari shaajenutaniya.

Jiyanoehua cojuatunenutaniyari na shaajesacari. Casaajiniji jiya shipinishaquiaarini, cunoori puetunu catenutaniyajanaa. Naacuajitij, jiyari puetunu mijiria na jiiitasano casaatajanaa shaajasaanutaniya jiyanoehua naseeca manijinia.

¹¹Quiarijia pa niishishacari taa pa jiya shaajasaanutaniyani, cunora, seetanujanaa Pueyaso panijaca nia quiriquia saa maninia miijiacaja nia quiniuria. ¹²Naa maninia miijia nia quiriquia, Pueyaso cuaara pa Jiyaniijia mueraterohua pocuajaatijia. Pa Jiyaniijia sequesano tojijia nia quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. ¹³Naajaa, Pueyaso cutaraari seetanujanaa sequequiaari pajaniya, nojuajaari quiarinio jiya cajiniocua shipinutianiya pajaniyara, quiarinio jiyano. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

¹⁴Naa nia niishishacari casaa pa sashiyari nio pa quishacari, cunora, jiyanoehua nia saniniujiuriquia saaja maninia miijia nia quiniuria. Tojetaarucujanaa jiyanooshano nia quiriqiajuhuaj, juhujaniya nia quiniuria pa Jiyaniijia tajoji, na nequesoresacari pajaniya. ¹⁵Naacuajiti pueyanaa, nio nia niishiriquia: pa Jiyaniijiaari tarishiyajaara pueyacu na taraajenuucua, nocua nojori tiuuniuria, Pueyaso jiyanooniuria nojori. Tarishiyajaariuhuj tojetaarucujanaa jeenucasano pa quiniuria nera. Pa panishano parta Pueyaso pueyano Pabloori naa naajioquiaari niaacuajuhuj, Pueyaso niishitaja na jiiitianuucua. ¹⁶Nojuacuajaari puetunu na naajioneecajinijanaa mariyata nio cua pohuatasano pohuataa. Noojiaqueya na pohuatasanoori seetanujanaa jiyajeneta pueyara. Naacuajitij, mosanucua, noojia niquijotejacanio, nojoriiri Pablo niishitijosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷Cunora cua panishano Pueyaso pueyanaa, niaacuajaari tari niishiyacuano Pueyaso rootasano tojijashijiacajiniji. Nocuaji jiyanoehua nia cojuariquia tama nia cuaqueyajaaja maja nia sapojosaanura sesa miijia nia quiniuhua. Saaja Pueyaso rupaacua tiuujia nia quiriquia cutara, taa nocua tiuujia nia quiyacuajani, cuno pojori mariqui nioojia niquijotereeri.

¹⁸Naajuhuj, socua pocuaji Tacuna niishiniuucua jiaatiajaca nia quiriquia. Naa maninia nia niishiri pa Jiyaniijia Jesucristo, socua na panijaca nia quiniuria, socua na cumaacaa nia jiiitianurajuhuj. ¡Pa Jiyaniijiaari jiyanoehua maninia! ¡Nojuaja cuaara shuquiritiasaaria quiarijia, pueyaracaanujuhuj! Cuaara naa quiriাতে.

COTEENUJUANAAN JUAN NAAJIONEE

Pueya samiitianijia rupaa

1 ¹Jiya shipinishaacarijiyojua, Jesucristoori quijiajuhuuanajaj. Canaari niaara naajiyani, canaa niishitiniuria niajaninya nojuajiniji canaa tojishano, canaa niquishanojuhuaj. Pueyanana, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiarjiuhuj canaa rupesacari nojuaja. Nojuajaari pueyaracaanu quijia cutara, pa Samiitianijiajaariuhuj, pueyaracaanu quijia pa quiniuriajuhuaj, na sequesanoocua pa tiuushacari. ²Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naarate, canaari pueya pohuataquiaarini, nojuajaari seetanujuanaa pa Samiitianijia. Canaari quiarjia cuno pueyaracaanu Rishijiajiniji nia pohuatajaaniuhuj. Coteenu na Queta quijia jiyocuacaanuuri. Na nuhuaji, canaacua muetaquiaariiri. ³Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiuushacari, pocua rupuetooteni, taa canaa quiya pa Que Pueyaso rupesanoocuaani, Neyanu Jesucristo rupesanoonio. ⁴Niaa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriquiani, canaari shuquiriniutianiyajaacuhuj.

Pueyaso pa cuhuatana

⁵Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. ⁶Naacuajitij, paa jaara sequereni: “Pueyaso rupueja cutaranijia”, na rupaa pa tojiyaquishacari, paari saaja najuhuaa sapojiyani. Paari juhua ninishiqui quijia quiyajaani. ⁷Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

⁸Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. ⁹Paa jaara sesa pa miishano pohuatare saniniunijia, Pueyasoori jiyanoootio cutara, na jiyanooniuria pajaniya, taa na sequequiaaricuaajani. Poojiajiniji jeequenutaniya puetunu sesa casaajanaari. ¹⁰Paa jaara saniniuuja sequereni: “Maja sesa cua miiniu”, paari Pueyaso jiyateya juhua sapojuarani. Paa jaara naa quirini, majaari seetanujuanaa na rupaa quiniu poojiajinia.

Jesucristo pocuaji tacuna

2 ¹Quiquihuaniojuanaa cua tojitiare. Nio naajiya niaaranijia, maja juhuajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jitiiaa pocuaji Tacunani, na Que Pueyaso na jiyanoootiniuria pajaniya. Nojuajaari Jesucristo, pueyaracaanu maninia mijia cutarani. ²Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaa-ri jiyanooshaaquiaajuhuj.

³Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴Jesu rootasano tojiyashijia

jaara sequeriquia: “Pueyaso niishiyaniijia”, jiyano pueyanoori sapojojua. Majaari na jiiitanu Pueyaso rupaa noojiajinia. ⁵Cante saniniuuja pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶Cante sequejani: “Janiyari Pueyaso rupuejani”, nojuaja cuara quiriia juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuaa- nu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. ⁸Naajaa, nio rootasano quiarjia cua naajiosanoni, nioori seetanujuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosaca-ri quiarjia.

⁹Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niquiniu paniniu niarta Pueyaso pueyano, niaari ninishiqui quiyajaa. ¹⁰Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhuj, tama nojuajaarijia maja sesa na miiniu quiniutianiya, pueya panijia na quishacari. ¹¹Cante narta Pueyaso pueya niquiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhuj. Majaari na niishiniu tee na quiaani. Naa na quiniucua juhua ninishiquitij, nojuajaari juhua cariojuaru quiya. Majaari na niishiniu Pueyaso casaa.

¹²Quiquihuaniojuanaa, niaara naajiya nionijia, Pueyaso jiyanooshano muerasu nia quiniucua, Neyanu Jesucristo mosaanuucua pocuara. ¹³Queyanaa, niaara naajiyani nia niishiniucua pueyaracaanu Quijia, cante tari pocuaji quiquiaari jiya coteyaquishacarijiaacuaajani. Mashiquioriniaa, janiya niaara naajiyajaaniuhua cua timishacari nia shocotanuucua Sesaaca.

Janiyari niaara naajiocanuni quiquihuanana, nia niishiniucua pa Que Pueyaso, Neyanu Jesucristoocua nia tiuushacari. ¹⁴Janiyari niaara naajiocanujuhua queyanaa, nia tiuuniucua tariucua pocuaji Quijiaacua, nio jiya coteyaquisha- carijia. Janiyari niaara naajiocanujuhuj mashiquioriniaa, seetanujuanaa maninia nia tojiniucua Pueyaso rupaa, niaa jaara na masequiaari nioojiajinia, Sesaaca nia shocotanuucua-juhuaj.

¹⁵Majaari mijiria sesa miiniucua nia jiaatianu, mijiria casamiucuanio. Cante mijiria casaacua jiaatijani, cunoori maja pa Que Pueyaso panijia. ¹⁶Mijiria niishijiaa coretanijiosano tama nojori niishishanojinijiaajani, puetunu cunojuanaari maja pa Que Pueyaso niishitishano. Cunoori sacuraatia tama mijiria pueya niishishanojuaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuriajaaja. Paari na niquishano pa maniniucuasano casaa paniquiaa

pueyaracaanuni. Naajuhuj, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷Nio jiyari tari tariucuaashiyaree. Socua shaajasaanutaniya puetunujuanaari. Puetunu sesa pa jiaatianjuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸Quiquihuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari supueere. Naacuajitij, paari niishiyani nio pa quishacariiri jiya puequesacari quera. ¹⁹Cuno Cristo paraani, nojoriiri pajaniyajiniinino pueya quiqianucuaaja. Pocuaji rupatetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiqianu, mariqui pata quiyacuaateni. Naa nojori miiniucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

²⁰Saniniuuja niajaniya Pueyaso muerasuna, Jesucristoori nia niqutioquiaari na Sohanu. Naaratej puetunu niajanijajanaari Pueyaso niishitajaraca. ²¹Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuj, sapojouja sequesanoori maja Pueyasojiniji.

²²Pueyano jaara sequere: “Jesuuri maja Pueyaso Jiyarosano”, cunoori sapojouja. Cante sequejani: “Pueyasoori maja Jesu Que”, cunocuaajaari Cristo paraca. Jaara sequerejuhuj: “Jesuuri maja Pueyaso Niyanu”, cunoori Cristo paracajuhuj. ²³Cante Pueyaso Niyanu Cristo tamacajani, majaari Pueyaso na jitianu na Querajuhuj. Cante Pueyaso Niyanu Cristo jitianu cutarani, pa Que Pueyaso jitianu na Querajuaruhuj.

²⁴Naaratej, Pueyaso rupaa nia racatare nia numaama taa nia tojiquiaari tariucuaaanucuaajani jaara shushajanaa pohuatasaaquiaari nia niqiuara. Niaa jaara naa racatariquia na rupaa nioojajiniate, seetanujuanaa nocua nia tiuushacari, niaari jatiqui quiya pa Que Pueyasota, Neyanu Jesucristotano. ²⁵Jesucristocuaajaari na Sohanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhuaana na cuaracashiniuniutiani. ²⁷¿Casaara nojori nia tojiquiaani? Niaacuajaruhua tari Pueyaso Sohanu jitianu, Jesucristo niqutiosano niajaniani. Naacuajitij, majaari tari panishaanu tamasaca niishitiojonura socua niajaniya. Pueyaso Sohanucuaajaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqui nia quiquira Jesucristota, taa Pueyaso Sohanu niishitiojoquiaa nia quiniuracuajani.

²⁸Quiarijiani quiquihuaniyojuanaa, jatiqui nia quiri Cristota, seetanujuanaa juhajaniya nia quiniuria pa Jiyaniijia jaara tiuquirohua pocua. Naa nia quiritij maja nia caririquiniuria nojuaja jaara pa jitianuhua. Na rupaa tojiyashijiaaari caririquiniutianiya cutara. ²⁹Niaacuajaari seetanujuanaa niishiya, Jesucristoori tojetaarucuaajanaa sesa miyashijia cutara. Niaa cumaati niishiyajuhuj, puetunu maninia miijiacajanaari Pueyaso muerasu.

Pueyaso muerasu

3 ¹Pueyanaa, pa Que Pueyasoori jiyanohua pa panijia. Pa sequeyari, “cua niquihua”. Seetanujuanaa, paari necohuani. Naaratej, majaari mijiria quiniaa pueya niishini pajaniya. Pa niishituyaqiyari nojori niishiyaquiniucua pa Que Pueyaso. ²Cua panishano Pueyaso muerasuna, paari tari

Pueyaso muerasucuaajani. Maja cutaraari pa niishini taamuecaquitijia pa quiniutianiya na nuhujitijia. Paari saaja niishiya cutarani, Jesucristo jaara nimiohua, paari juhua nojuaja quiniutianiya. Na tiuquishacarihua, paari na niquiniutianiya taa na quiyacuaajani. ³Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucuaajanaa.

⁴Cante sesa miijiani, cunoori Pueyaso rootasano na rupajinia tojiyajuqijia. Puetunu sesa miiniujanaari Pueyaso rootasano tojiyajuqini. ⁵Niaari niishiyajuhuj, Jesuuri mijiria pocua niqiaari poojia seque na jataniniuria. Nojuajaari tojetaarucuaajanaa sesa miyashijia cutara. ⁶Naacuajitij, cante jatiqui quiya pa Jiyaniijiatani, nojuajaari maja sesa na miini quiquiaa cutara. Cante saniniuuja sesa miijiani, majaari na niishini Jesu. Majaari nojuaja na niqini quiquiaarijuhuj. ⁷Quiquihuaniyojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸Saniniuuja, cante sesa miijiani, nojuajaari Sesaaca pueyano. Shusha jiya coteenujiniji, Sesaacuajaari tari sesa miijia quiquiaari. Pueyaso Niyanuuri cunora niqiaari puetunu sesa na miijosanojuanaa na shaajanura.

⁹Puetunu Pueyaso pueyajanaari maja sesa miiniucua na shiiniquini, quiarino pueyara Pueyaso rootasano nojori quiniucua. Nojoriiri quiarino pueyara jatanishano quiya Pueyaso Sohanu nojori jitianu. Naacuajitij, seetanujuanaa Pueyaso muerasu nojori quishacari, majaari na naata sesa miijia nojori quini pueyaracaanu. ¹⁰Naacuajitij, maatia niishishanocuaajaari cante Pueyaso muerasuni. Saniniuuja, cante maninia miyashijiani, nojuajaari maja Pueyaso pueyano. Naajuhuj, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuj.

Panitiojuaca pa quiri

¹¹Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaritij: “Panitiojuaca nia quiri”. ¹²Maja cutaraari pa quini juhua Cañ! Nojuajaari tama tarajanujuaaja moquiaari, Sesaaca tojiia na quiniucua. Nia niishiritio casaara Cañ moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniucua maninia. Saniniuuja, tama na miishanojuarijia sesa quiquiaari. Cunora tarajanu moquiaariiri.

¹³Cuarta Pueyaso muerasuna, majaari nia jiyajenenu Pueyaso ruuretajaca jaara niqini paniyaquiriquia niajaniya. ¹⁴Paacuajaari juhua macu samiitianijosaaquiaruhua, seetanujuanaa saminiucua pa quiniuria. Paari seetanujuanaa na niishiyani panitiojuaca pa quishacari parta Pueyaso pueyata. Cante tapueyocua paniyaquijiani, nojuajaari juhua macu quiyajaa. ¹⁵Naajuhuj, narta pueyano niqini paniyashijiacani, nojuajaari juhua pueya moju Pueyasora. Niaacuajaari niishiya, pueyano mojuari Pueyaso samiitianiyaquishoojua pueyaracaanu na rishiniuria. ¹⁶Paacuajaari niishiyani, Cristoori jiyanohua pa panijia na cusonuucua pocuara. Naacuajiti paari niishiyani taamuecate seetanujuanaa paniniuni. Paa cuara naa panijia quiirajuhuj, tama pa cuaqueyajaaja pa taritianura parta Pueyaso pueyacuara, jiyanohua pa paniniutia nojori.

¹⁷Niaa jaara nareja niqiyi narta Pueyaso pueya casamijiunucua, puetunu nia panishanojuanaa nia jitianu. ¹⁸Quiquihuaniyojuanaa, majaari najuhuaana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaraca-

nu maninia pa miiri, seetanujuanaa pa paniniutia pueya. Majaari najuhuaana pa sequenu: “Nojori paniyanijia”.

Pueyaso tojjiaari juhuajaniya quijia Pueyaso niqiuara

¹⁹Naacuajitij, paa jaara pueya panijia quirini, paari niishiyani paa seetanujuanaa Pueyaso tojjiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. ²⁰Pueyaso muerasu pa quishacari, poojia jaara pa taacanuuere saaja nocuaji, naajaa, Pueyaso cutaraari jiyanohua maninia niishijia socua poojia niishishanojinii. Nojuacuajaari pa niishiya cutara. ²¹Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niquiarani. ²²Nojuajaari puetunu pa masesano niqutionutaniya pajaniya, na rupaa pa tojishacari, puetunu na panishanojuanaa pa miishacarijuhuaj. ²³Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuaaj taa na sequequiaaricujani. ²⁴Canapuate Pueyaso rootasano tojjiaacani, nojoriiri Pueyasota rupuetootesano quijiaa. Naajuhuaaj, Pueyasoori nojorijinia quiyacuajua. Nojuacuajaari na Sohuanu niqutioquiaari pajaniya. Naa na Sohuanu pa jiiatasacariitij, paari maatia niishiyani Pueyasoori poojiajinia quiya.

Pueyaso Sohuanujiniji pahuatasano, Cristo Paraca sohuanujinijio

4 ¹Cuarta Pueyaso pueyanaa, quiarijiani, queraatia Pueyaso sequenu panishano caminiujuniana pueyari supueya. Majaari ritia nia tiuuniu puetunu nojoricuajanaa. Coteenu nojori nia saniniujiuri, nia niishiniuria nojori caminiujushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaacari caneya. Nojoriiri najuhuaana cuaracashiniuya na sequesacari: “Janiyacuaajaari Pueyaso sequenu panishano caminiujuniani: Pueyaso Sohuanu niishitishano janiya”. ²Niaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. ³Cante saniniuuja jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojiajinia cutaraari. Nojuacuajaari Jesucristo Paraca. Niaacuajaari tari pahuatasaaquaaari, Cristo Paraca sohuanuuri niniutianiya. Nojuacuajaari tari mijiria quiya.

⁴Quiquiohuaniojuanaa, niaacuajaari Pueyaso muerasu. Naacuajitij, niaari cuno sapojonuujuaa shocotacanu Pueyaso cumaacata. Nioojiajinia Quijiaari socua cumaacaraca nojori jiiitasano Sesaaca cumaacajiniji. ⁵Cuno sapojonuujuaacari saaja Pueyaso niishiyashijiaa, maja Pueyaso muerasu. Naacuajitij, nojoriiri saaja mijiria casaajiniji pahuatanuuquiaa. Naarate narta Pueyaso ruuretajaacari nojori tojitiaquiaa. ⁶Paa cutaraari Pueyaso pueyani. Naacuajitij, cante Pueyaso tojitiajacani, nojoriiri pa tojitiaquiaa. Canapuate saniniuuja maja Pueyaso pueyani, nojoriiri maja na tojitianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiiitaa cutarani, cante saniniuuja sapojoua sohuanu jiiitajinijia.

Pueyaso pa panijia cutara

⁷Cua panishano Pueyaso pueyanaa, jiyanohua panitiojuaca pa quirij. Pueyasocuaajaari pa panijia. Nojuajaari pa panitijia na Sohuanuta, jiyanohua panijia pa quiniurajuhuaaj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuaaj. ⁸Canapuate pueya paniyashijiacani, nojoriiri maja na niishiniu Pueyaso. Pueyasocuaajaari panijia cutara. ⁹Nojuajaari pa niishitiquiaari taa na paniquiaa jiyanohua pajaniyani, Neyanuniyojua na jiyarosacari mijiria pa samiitianijioriquiano,

pocuara na cusosacari. ¹⁰Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

¹¹Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitiojuacaa pa quirijuhuaaj. ¹²Majaari quenaaja pa niqiniu quiquiaari Pueyaso, taamuecatejanononi. Naajaa, paa jaara tamacacata panitiojuaca quirini, Pueyasoori poojiajinia quiyacuaja. Naacuajitij, paari tojetaarucujanaa panijiacara quiniutianiya, na paniniu quishacari poojiajinia. ¹³Nojuajaari na Sohuanu pa niqutioquiaari poojiajinia na quiniuria. Naacuajitij, paari niishiyani paacuajaari nata rupuetoojua quiyani. ¹⁴Canaajanaari seetanujuanaa canaa niquishano pahuataani: Pueyasoori Neyanu jiyaroquiaari mijiria, mijiria quinia niti mosocoriquiano, nocua tiuujaaca jiyatesaanura Pueyaso pueyara. ¹⁵Cante pueya niqiuara sequejani: “Jesuuri seetanujuanaa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojua quiyajuhuaaj.

¹⁶Naacuajitij, paari niishiyani Pueyasoori jiyanohua pa panijia. Paari na niishiyajaniuhuaa na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuaaj, Pueyasoori poojiajinia quiya. ¹⁷Naa Pueyaso quishacari poojiajiniatej, paari pueya panijiaa jiyacatequiaa socuani. Naa seetanujuanaa panijia pa quishacariitij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuajani. ¹⁸Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniujinijia, majaari juhuanojuaja na paniniu Pueyaso puetunu noojitajanaa. Puerejaari niishirojia: “Saniitiosaanutaniyanijia”.

¹⁹Niaacuajaari niishiya, Pueyasoori coteenujuanaa pa paniquiaari, naarate paari saniniuuja na paniani. ²⁰Saniniuuja, cante sequejani: “Janiyari Pueyaso panijiani”, narta pueya niqiniu paniyaquiya saajaaraariuhuaaj, jiyano pueyanoori sapojoua. Naa na paniyaquishacari tarajanu na niquishano na namijiatu cutaratej, ¿maatucua taa Pueyaso panirini, na niquishoo socuani? ²¹Pueyasocuaajaari naa pa rootaquiaari: “Cante cua panijiani, cuara paniiria narta pueyajuhuaaj”.

Taa pa shocotanutaniya mijiria niishishanoni

5 ¹Niaa jaara Jesucuaa tiuuri nojuaja seetanujuanaa Pueyaso jiyarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaariuhuaaj. ²Naacuajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu paniyajaacuahuaj. ³Paa jaara Pueyaso panijia quirini seetanujuanaani, paari na sequesano tojjijiaa quiyajaniuhuaaj. Na rootasano pajaniyani, majaari jiyajeneta na quiniu pajaniyara. ⁴Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiuushacari. ⁵Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

Pueyaso Niyanujiniji pahuatasano

⁶Pueyasoori canaa niishitiquiaari Jesuuri seetanujuanaa Neyanujuhuanajaj, Jesu jaara moojinia tiuquinishaquiaari. Canaa niishitiquiaarijiaariuhuaaj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuaaj,

janiyajanaari na niquiquiaari na nanaca shooteyano na shuucuaajini. Naajuhujaj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. ⁷Jiuujianaraca jiyocuacaanu quijiacari pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojuanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhanajaj. ⁸Paari mijiria jiidiaa Jesujiniji pa niishitijiacajuhujaj. Cunoori jiuujianaraca quiyajuhujaj. Cuno pojoriiri nio: poojiajinia quijia Pueyaso Sohuanu, jiyocuacaanuji tojishano rupaa Jesu tiuquinishacari moojinia, naajuhujaj, na nanaca, pueya niquishano na shuucuaaji shoyano. Puetunu cunujuanaari mariyata pa niishitiya Jesuuri seetanujuanaa Pueyaso Niyanu. ⁹Paa jaara tojiriquia pueya pohuatanusanoni, ¿casaara saniya Pueyaso sequesano pa tojiyaquiyarini? Pueyaso sequesano Neyanujinijiiri socua seetanu rupajanaa cutara pueya pohuatanusanojiniji. ¹⁰Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiyuaquishacari tama Pueyaso sequesanoocuaajaaja Neyanujiniji. ¹¹Pueyasocuaajaari sequequiaari, Neyanuucua tiuujiacari pueyaracaanu rishijiaa quiniutianiya. ¹²Cante Pueyaso Niyanu jiidiaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiidiaashijiaari saniniuujia maja na rishiniu quiniutianiya.

Nio naajio puequenu panishacari rootasano

¹³Nio naajia niaaranijia nia niishiniuria, Pueyaso Niyanuucua nia tiuushacari niaari tari samiitianijiosaarohua pueyaracaanu nia rishiniuria.

¹⁴Paari Pueyasocua tiuquiaani, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na paniyacuaajani. ¹⁵Naatej, taa pa niishiyacuaani Pueyasoori pa secojosano tojiquiaa, paari naa niishiyajuhujaj paari nojuaja pa masesano maseree tarini.

¹⁶Cante narta Pueyaso pueyano niquiya sesa miyanoni, cuaara Pueyaso secojooora nocuara, sesa na miishano jaara na cusojuashijia quiri. Naacuajitij, Pueyasoori cuno sesa miijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari nijaniyatej, majaari cua sequenu nijaniya nia secojonura jiyano sesa miishanoocuaratej. ¹⁷Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸Paacuajaari niishiyani pueyanaa, cante Pueyaso jiidiaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacari maja na naata sesa na miitiniu. Majaari na naata sesa na miiniuujuhujaj.

¹⁹Paari niishiyani paa cutaraari Pueyaso muerasuni. Sesaacari saniniuujia puetunu mijiria quiniaa Pueyaso niishiyashijiacajanaa jiidiaacujua. Nojuajaari nio jiya camarnu.

²⁰Paari niishiyajuhujaj Pueyaso Niyanuuri mijiria pocua niquiaari. Nojuajaari na niishitijia niquitioquiaari pajaniya, maninia pa niishiniuria na Que, na Que quiniuria pa Quejuhuaj. Nojuajaari Pueyasojuanaa cutara. Paari nata quiya jatiqini, Neyanu Jesucristota pa rupetoosacari. Nojuajaari Pueyasojuhanajaj, pa Samiitianijiaariuhujaj, pueyaracaanu rishijiaa pa quiniuria. ²¹Quiquiohuaniyojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucuaaja.

TANEE JUAN NAAJIONEE

Pueyaso Rupaa seetanujuanaa panijiara pa jiyateja

¹¿Quiaate quiyajaa cua panishano cua rimiatucuaanaa? Quiaacuajaari Pueyaso saquiriojosano, neyatu quia quiniuria. Quiocuara naajijianijia, quia panishano muerasuucuaranio.

Janiyari saaquiano Juanni, Pueyaso muerasu jiiitiana. Seetanujuanaa nia panianijia, taa puetunu Pueyaso rupaa tojiniaa pueya paniya nijaniyacuaani. ²Pueyasojinijia seetanu rupaajanaari poojiajinia quiya. Naaratej, canaari nia paniani. Cuno rupaari poojiajinia quiniutianiya pueyaracaanu. ³Nia tojishacari seetanu Pueyaso rupaajanaa, nia panitioosacarijiuhuaaj, naacuajitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaariuhuaaj. Nioojia jiyatenutaniya juhuajaniya quijiacarajaariuhuaaj.

⁴Noojiaqueya quia niquiohuajinijinio niquiquianunijia. Nojori timitiacanunijia nojori tojitianuucua maninia seetanu rupaajanaa, taa pa rootasaaquiaari pa Que Pueyasojinijicuaajani. ⁵Quiocuara naajia quiarjianijia cua panishano cua rimiatucuaanaa, cua sequenura quiajaniya: “Jiyanohua pa panitioore”. Majaari quiarinio rootasano nio, cua naajiosano quiocuarani. Nio rootasanocuaajari pa jiiitasano pueyaracaanu Jesucristojinijia. ⁶¿Taate pa naata paniniuni? Paari pueya panijiaa quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuaara quiiria Pueyaso pa paniniutia poojiajinia.

Cristo paraari sapojonuujuaca

⁷Quiarjiania, queraatia sapuenu juhua Pueyaso sequenu panishano caminiujiunaaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari

jiyocuaaanuji, cuaqueyaraca na quiniuria, seetanujuanaa pueyano na quiniuria”. Canapuate naa sequejacani, nojoriiri sapojonuujuaca. Nojoricuajaari Cristo paraa. ⁸Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niquitionu panishano pajaniya maseyaquiriri, pa Jiyaniijia nia poonijionujinijia na niquitionu panishano. Suraatiaja nia tojiriohuarohua seetanu rupaajanaa, nia masenura puetunu Pueyaso jiiitasanojuanaa niaara. ⁹Cante tama na cuaqueyajaaja jiyateja Pueyaso casaa niishijia socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiqui, na shocotanuucua Cristo rupaa. Cante saniniuujia seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuaajari na Que, Neyanuuri nocuaji Tacunajuhuaaj. ¹⁰Seetanu rupaajanaa jiiitaashijia jaara niaacua tiuquiniu paniya tamaatia na niishitiojonura nijaniya, majaari niaacua na shanacununoj. Majaari quenaaja na saruhuatenujuhuaaj nia cumaquiniuria nojuaja. ¹¹Cante na sequeyani: “Pueyaso cuaara cumaquiiria quiajaniya”, naa sequejaari cuno sapojoua cojiritiasaaree tari sesa na miishanotaja.

Juan puecasacari naajionu

¹²Socua queraatia sequenu paniya nijaniyanijia. Naajaa, majaari cua naajionu paniniu. Janiyacuajaari niaacua naquerejijiani, maninia pa pocoojonura, shuquiriaatia pa quiniuria seetanujuanaa. ¹³Quia tarajanu niquiohuari cua sequeree nojoriria cua saruhuatenu quiajaniya. Nojuacuajaari Pueyaso saquiriojosano maajijijuhuaaj. Tariucuaja.

SOCUA TANEE JUAN NAAJIONEE

Juan maninia pahuatasaaquaaari Gayojiniji

¹¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiiitiana. Seetanujuanaa quia panianijia, Pueyaso rupaa quiniuucua coojiajinia.

²Quiocuara secojoquiaanijia, puetunu quia miishanojuanaa cuuara quiiira maninia. Janiyari quiocuara secojoquiaaaniuhaj, maninia quia cuaqueya quiniuria, maja cusosu, taa quioojia quia maniacuaani, Pueyaso tojjia quia quishacari maninia.

³Parta Pueyaso muerasujinijio pueyari cucua tiuquiquianu quia quijia tiacajiniji. Janiyari jiyanohua shuquiriatia quiquianuni nojori pahuatasacari quiajanijiniji. Quiaanaari seetanujuanaa maninia miiijia quiquiaa taa pa rootasaaquaaari Jesucristo rupaacuajani. Quiaacuajaari maninia tojjia quia seetanu rupaajanaa, sanajanaa. ⁴Jiyanohua timiquiaanijia cua tojjishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojjishacari, cunoori jiyanohua cua timitiquiaa socua tamonu casaajiniji.

⁵Sanajanaa, quiaacuajaari maninia miiijia, maninia quia miishacari parta Pueyaso muerasu. Quiaa cutaraari maninia miiiquiaa, quia tiuquitishacari quia tiajinia quia niishishoo tamaquicuajinijio Pueyaso muerasu. ⁶Pueyaso muerasu rerejosacari niya, Pueyaso rupaa pahuatanura rucojuacaari canaa niqiara pahuatanu maninia quia miishanojiniji nojoriria, quia paniniutia nojori. Quiarijiani, nojori quia niqitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuqiritiniuria. ⁷Nojori Jesucristojiniji pahuatanura rucojiya. Majaari nojori panishano na masetunu paniniu quiquianu Pueyaso niishiyashijiacajiniji. ⁸Naaratej, pajaniya cuuara naacuura jiyano pueya, noo pojori canapueete pa Jiyaniijia rupaa pahuatanura rucojiyacuajani. Naa pa miiriti Pueyaso rupaa pahuatanu naacuna pa quiniurajuhaj.

Sesa Diótfes miishanojiniji pahuatasano

⁹Janiyari quia quijia tiacajinia Pueyaso pueya maanuucua naa naajioquaaarijuhaj. Janiyari nojori sequequaaari nojori cuuara Pueyaso Rupaa pahuatanura rucojuaca naacuura,

cuno pojori jiiitiana na panishano. Diótfesri saaja tama na cuaqueyajaaja shuqiritiaja, Pueyaso pueya maanu jiiitiana na quishacari. Nocua quia sequesano ruuretacanuuri. Cua rerequetequiaaariuhaj. ¹⁰Naajaa, janiya jaara niaacua quiaareni, janiyari naa sacuaatia na miiniuucua na nacasunutaniani. Nojuajaari tamasa niqiara canaa sesacaquiaa na sapojonuta. Naa socua sesa miiiquiaaariuhaj: majaari na tiuquinitianu quiquiaa Pueyaso Rupaa pahuatanaa na tiajinia. Canapueete saniniuuja nojori tiuquinitianu paniquiaa nojori tiajiniani, Diótfesri nojori tenujuquiaa saaja. Canapueete Pueyaso rupaa pahuatanura rucojuaca tiuquinitianu paniquiaa na tiajiniani, Diótfesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹Sanajanaa, majaari quia jiaatiana cuno sesa miiijiaacua, quiaa mariqui juhua nojuaja quiriiaariuhaj. Saaja quia jiaatiare cutara maninia miiijiaacua, juhua nojuaja quia quiniuria. Cante maninia miiiquiaani, cunocuajaari Pueyaso pueyano. Sesa miiijia saniniuuja, nojuajaari Pueyaso niishiyashijia.

Maninia Demetrio miishanojiniji pahuatasano

¹²Puetunu pueyajaari saniniuuja maninia pahuatanu quiaa Demetrijiniji. Tama Demetrio miiijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasa sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetrijiniji.

Naajio puequesacari

¹³Janiyari queraatia sequenu panijajaa quiajaniani. Naajaa, majaari cua sequenu paniniu saaja cua naajiojinia. ¹⁴Janiyacuaja quiocua naquerejiyani. Jiyacarij, pocua maninia pocoojore cutarani.

¹⁵Pueyaso cuuara quioojia jiiitaa maninia, juhuajaniya quia quiniuria. Niya pa rupenaari cua sequetree cua saruhuanura quiajaniani. Puetunu cuniqui pa rupenaajanaa quia saruhuatere canaarajuhaj. Tariucuaja.

JUDAS NAAJIONEE

Judas naajiosano Pueyaso saquiriojosano pueyacuara

¹Janiyari Judasni, Jesucristo seru, Jacobo tarajanu. Niaacuara naajiyaniija canapuate pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. ²Pueyaso cuaara nia jiuujiaaria. Cuaara nioojia cajitiirijuhuj. Cuaara paniiria niajanijuhuj. Pueyaso cuaara naa miiria jiyanojuaa niajanijatej.

Sapojonuujacuajini pohanatano

³Cua panishano pueyanaa, janiyari niaacuara naajionu paniriquiaa jiyanojuaa, cua pohanatano niajanijatej taa maninia pa miishaanutanijani, Pueyaso saquiriojosano pueya pa quiniuria: niajanijatej, canajuhuj. Saniniujia, quarijiani, socua maninia cutaraari cua naajionura niaacuara, cua nacasanura niajanijatej seetanujuaa Pueyaso tojijia nia quiniuria. Jiyanojuaa nia tiuuri pueyaracaanu Pueyaso rupaacua, cumueca Pueyaso pueya nia quiniuria. Pueyasocua-jaari na rupaa pohanataniquiaari maninia pa niquiara. Maja cumaati na jatanishaanu. Cuaara pueyaracaanu maninia pohanatanaa, taa pa pohanatanaa quiaaricuaani. ⁴Naa nia sequeyanijia Pueyaso rerequetejaca supuesacari jiyasohua nia tajinia. Tariucuaanu Pueyaso Rupaajiniacuajatej cuno sesoriquia pueyajini naajiotasaaquiaricuaaja. Nojoriniaari quejoosanutanijatej pueyaracaanu saniitosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaaja, pa jiyanojuaa Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitanajanaa jiyatequiaa juhua saniitoyashijia, pa Jiyaniijajanaa Jesucristoni.

⁵Niaari niishiyacuaja, Pueyasoori Israel pueya supuetanaa mashiquiquiaari Egipto jiyajini, Egipto pueya sesa nojori quishacari. Socua nia niishitorohuaraj. Na nuhuaji, Pueyasoori na pueyajini nio nocua tiyashijia puecooquiaari. ⁶Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapuate na shuriucua quijia quiquiaari jiyocuaanucujani. Nojoriiri Pueyasora na poonijiosano tiujiaquiaari. Nojori poonijiosaquei tiujiatuquiaarijiaarijuhuaj. Cunora, cumayocuata morojosaaquiariri, pueyaracaanu ninishiqui nojori quiniuria, cuaara quiriijaatijia Pueyaso saniitionu juuca cutara. Cuno juuca, Pueyasoori puetunu na tojiyashijiacajanaa saniitionutanijatej. ⁷Nia niishirijuhua Sodoma* tiacajinia quijia pueya, Gomorra tiacajinia quijia pueyano, nojori tiaca shocua quinaa pueyajujuaj. Puetunu nojorijianaari maninia miiniu ruuretaquiaari tama nojori cuaqueya panishanojuaaja nojori miiniuria, jiyanojuaa sacuaatia. Nojoriiri maajishuriu numuetucujuuca quiquiaari. Cayashuriuuri narta maaji numuetucujuuca quiquiaarijuhuaj. Pueyasoori maja na shipiniu quiquiaari naa pueya quiniuriatej. Naa Pueyaso tojiyashijia nojori quishacari, mariyata taa tama Pueyaso seyajaaja na tojiyashijia quiquiaaricuaani, Pueyasoori nojori quejooquiaari mani quiquiojini, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijia pa quiniuria taa nojori quiquiaaricuaani.

⁸Cuno pojori, sacuaatia niishitiojona nia tajinia quiyani, nojoricuajatej Pueyaso saniitionujini niishiyaa. Naajaa, nojoriiri juhuajaniya miiquiaa puetunu sesajanaa taa nojorijinia nojori niishiyacuajani. Nojoriiri tama nojori jiuujiacajaja curuushojoquiaa nojori miishacari tama nojori niquishanojuaaja na maquenujini. Pa Jiyaniija sootiyajatej-juhuaj. Nojoriiri jiyanojuaa cumaacaraca quijia sesacaquiaajuhuj, jiyocuaanu quijiacani. ⁹Supuetana Moisés shaajesacari, Pueyasoori na sesa jiyaniija Miguel jiyaroquiaari Moisés quete na jamonura. Sesaacari Moisés quete paniquiaari juucua. Nocua Miguela juayonuutaquiaari. Miguel cutaraari seetanujuaa cumaacaraca quijia. Naajaa, majaari na saarionu quiquiaari Sesaaca. Na sequere saajaari: “Pueyasojanaa cuaara juajatej cutara quijaniya”.

¹⁰Saniniujia cuno sesa niishitiojona nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniacoji casaa miiquiaa sesa juhuajaniyuacuaani, maja na niishiniutia. Naaratej, nojoriiri saniitosocoriquiano puetunurajanaa.

¹¹Nojoriiri jiyanojuaa cocuaatia miiquiquiaa. Nojoriiri narta pueya niquini paniquiquiaa, taa supuetana Caín niquini paniquiquiaari tarajanucuaani. Nojoriiri sesa pueya timitiquiaa casamiriaca nojori quiniurijuhuj, naatej, taa supuetana Balaam* miiniu paniquiaari juucuaanu. Nojoriiri mariyata puetunu quejoosanutanijatej nojori ruuretanucua Pueyaso, taa supuetana Coré* cusoquiaricuaani na ruuretasacari Moisés. ¹²Nia queranacusacari Pueyaso niquiara nia panitionuta, cuno sacuaatia niishitiojonuujua-caari jiyanojuaa caraatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritini niishijia. Puera miaquenujuuca nojori quishacari, cunoori caraatia. Jiyano pueyari maja na cumaquini niajanijatej. Nojoriiri najuhua quijia, juhua niquitioocuaari tajimiaquiaa paratu piyarojosacari. Majaari maru niinu. Nojoriiri najuhua quiya, juhua muetuhua naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. ¹³Nojori nuhuaji, pueyari saaja taraatia quiquiaa, caraatia nojori miishanojinijatej. Sesa nojori miishanoori juhua jiyanojuaa shoniniacu caminia queyocuasacari cushau, curuutuuca. Nojoriiri shanohua niquishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. ¹⁴Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniija quiquiaari Adán nuhuaji. Enocri Pueyaso niquitishano nojuaja pohanataniquiaari taa nio sesa miijiaca pueya miishaanutanijatej. Nojuajatej naa sequequiaritijatej: “Janiyari Jiyaniija niquiri cunocoji niyano jiyanojuaa queraatia na pueyatani. ¹⁵Nijoriquiaari sesa miijiaca na saniitionura. Rerequetejacaacua tiutianutanijatej puetunu sesa nojori miishanojuaaari. Puetunu na sojeacajanaa saniitiosaanutanijatej puetunu nojori sesaanuucujanaa pa Jiyaniija”. ¹⁶Cuno sesa niishitiojonuujuaari naa miiquiquiaa nia tajinia. Nojoriiri saaja juayonuutaquiaaja. Majaari shuquiriaatia nojori quini quiquiaa na jiitiasanota. Nojoriiri tama na cuaqueya panishanojuaaja miiquiaa. Puera

pocujaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano niajaniya.

¹⁸Nojoricuajaari nia pohuataquiaari taate quera jiya puequesacari quiniutianiyani. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuhuj. Nojoriiri sesa miiniutianiya tama nojori cuaqueyajaaja nojori shuquiritiniuria”. ¹⁹Naa cuno pueya miiniucuatej, nojoriiri Pueyaso muerasu jiuujia niyaquejotequiaa maja rupetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuj nojori quishacari.

²⁰Cua panishano Pueyaso muerasunaa, Jesucristo rupaacua nia tiuuri jiyanohua socua, seetanujuanaa na pueya nia quiniuria maninia. Pueyaso nia secojore Pueyaso Sohuanu cumaacata. ²¹Naacuajitij, niocua Pueyaso panishano pueya quiri pueyaracaanu. Juhujaniya nia sashiri pa Jiyaniijia Jesucristo, nojuaja cuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyari maninia jiyanoojia na quiniucua.

²²Canapuate pa Jiyaniijiaacuaji taacanuyajaani, nojori nia niishitiojore jacaria, seetanujuanaa nojori tiuuniuria maninia pa Jiyaniijiaacua. ²³Tamasaca nia piriyojorejuhuj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanohua sesa miijiaca. Naajaa, nojori nia naacure, Jesucristo nojori niishiniurijuhuj. Saniniuujia, tama nia cuaqueyajaaja jiyanohua nia cojuare niaa mariqui sesa miitishaarejaariuhuj nia cojishacari nojori. Jiyano pueyacia nia taraajere. Saniniuujia, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanohua na timitianutaniyani.

²⁵iJiyanohua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusonuucua pocuara. iJiyanohua shanohua na cumaaca! iNojuajaari Jiyaniijajanaa! iJiyanohua maninia pa Jiitiana! iNojuajaari puetunu cumaacaracajanaa cutara! iNojuacuajaari pa Que Pueyaso! Jiya shipinishaacarijiyojua, nojuajaari quiijajuhuanajaj. Naa quiyajaari. Naa quiniutianiya pueyaracaanuuri. Taaquiririnij, naacuaaquinatejaj.

JESUCRISTO NIQUITISHANO JUAN

Jesucristo niquitishano pajaniyara

1 ¹Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ²Janiyari puetunu na niquitishano-juanaa caminiujia niajanu seetanujuanaani. Niocuajaari seetanujuanaa Pueyaso rupaa, Jesucristojini cuu caminiujiushano niaara.

³Shuquiriaatia quijiaca cutaraari noo pojori, canapue nio cuu caminiujiushano Pueyasojinijini serojonutaniya Pueyaso pueya maapue niquiarani. Na tojtiajacaari shuquiriaatia quijiaca quiniutianiyajuhua, nojori tiuniuucua nio naajiojinia cuu pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapuecuara

⁴Janiyari Juanni. Asia jiyajinia quinia siete Pueyaso pueya maapuecuara naajianijia. Pueyaso cuuara cumaquiiria niajanu, cuuara nioojia cajitiriujuhua. Pocua niriqiano pa Que Pueyaso jiyanojia maninia. Nojuajaari pueyaracaanu quijiacuaja. Quiaritia quiyajaariuhua. Na Sohuanuuri juhua siete saminio casa niquishano, puetunu tiqiyocuajanaa quijia na quiniuucua. Nojori Pueyaso cajishaqui taci quitiya. ⁵Pueyaso Niyanu Jesucristoori seetanujuanaa puera caminiujia puetunu na Que Pueyaso Rupajanaa. Nojuajaari quiarino na cuaqueyata pa coteetaquiaari samiitianuhua macujinijia. Nojuacuajaari puetunu mijiria jiyaniujanucujanaa Jiyaniijia. Nojuacuajaari pa panijia. Tama na nanacajaaja shootequiaari sesa pa miiniujinijia na jayonura pajaniya, tojtaarucujanaa sesa miyashijacara na jataniniuria pajaniya. ⁶Nojuajaari pa jiyatequiaari jiyaniujanucua pa quiniuria, na Que Pueyaso secojona pa quiniuria pueyacuara, nojuaja pa shuquiritanurajuhua. iPa Jiyaniijiaari jiyanojia maninia! iPa Jiyaniijia cuuara shuquiritiasaaria pueyaracaanu! iNojuacuajaari puetunu cumaacaracajanaa pueyaracaanura! Cuuara naa quiiriatej.

⁷iNia maure! iPa Jiyaniijia Cristoori cohuajajinia tari cunocojuhua! Puetunu pueyajaari na niqiniutianiya, noo pojoriujuhua, na motenaatej. Puetunu mijiria quijiaca pueyapuejaari nocuaji nujuquenutaniya nojori martenu. Taaquiritinij. Naa quiniutianiyacuaaquinateja na tiuquishacarihua.

⁸Pa Jiyaniijia Pueyasoori tama nojuajinijiaaja sequeya: “Janiyacuajaari puetunu casaajanaa coteetanani, na shaajariquianojuhua. Puetunu cumaacaracajanaanijia. Janiyacuajaari pueyaracaanu quijiani. Majaari cuu supenu quiqiaari. Janiyari niaacu tiuquiriquianohuani”.

Juan niquishacari Cristo puereeta na shacantuuca cumaacajinia quiyano

⁹Janiyari niarta Pueyaso pueyano Juanni. Pa Jiyaniijia Jesuucua tiuujia cuu quiniuucujuhua, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniujanucua jiyatesocoriquianoni. Cunora, paari

juhuajaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojini cuu poojotanuucua, janiyari shoniacu caminia jiuujajinia jatasano quiyani jiya tucuaatiajaacu. Nio jiya tucuaatiaja sesaari Patmos. ¹⁰Tamonu juuca, pa Jiyaniijia samiitianuhua pa niishiniu juucani, Pueyaso Sohuanuuri cucua niqianu jiyanojia na cumaacata. Janiyari jiyacari rupaa tojirii nacaano cuu nijianarani, juhua trompeta jonenenu. ¹¹Cuu sequeriquiaari:

—Casa cuu niqiniutianiya quiajanu, cunu quia naajiotare nequesoreetuneeano. Quiocu na nuhuaji na jiyarore Asia jiyajinia nio siete cuu saquiriojosano pueya maapuecuara. Nojoriiri Éfeso tiacajinia quinia, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹²Janiyari cuu nijianara tacatequeeni cuu niqiniuria cante cucua pocuariquiaani. Cuu tacatesacari, janiyari siete samari nujuatacojua niqiriini, orojinijia shipinijosano. ¹³Cuu samari nujuatacojua tajiniani, janiyari pueyano niqiriini, juhua Pueyaso Niyanu niquishano. Tucuaque toque cushiriquiaari. Na nioluacaacuma puecariquiaari. Na jiriqiajinia camarucuteriquiaa orojinijia shipinishano casaari. ¹⁴Pueyaracaanu quijia na quiniuucua, na muecacaari tojtaarucujanaa jiyanojia cohuaja quiriqiaa juhua sohanatu. Maatia pueya jiuujia niqijia na quiniuucua, na namijaari juhua mani rimianacuriquiaa. ¹⁵Na nioluacaari nenecuriquiaa juhua jiyanojia naseeca casaajinia mohuaquishano bronze. Naa shacantuuca niquishano quiriqiaari puetunu sesa casaajanaa paracajia na quiniuucua. Cumaacaraca Jiyaniijia na quiniuucua, na pocuasacari, jiyanojia tojishaariquiaari juhua sararajua, jiyocuacaanuji mohuaca tijia. ¹⁶Na miaquetajata siete riya muetujuriquiaari. Naajuhua, nijiniaquetucujia mueruuri na rupaamaji mueranacuriquiaa, na rupaa ruuretajaca na pueconura. Na jiquicoori jiyanojia shacantuuca quiriqiaa juhua jiyanojia pananu jasacari panacari.

¹⁷Cuu niquishacari nojuaja, janiyari cuu puerenuta na pajama pojijaree juhua macuni. Nojuajaari saaja na miaquetaja niaree cucua. Cuu sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhua. ¹⁸Janiyari pueyaracaanu quijiani. Macu quiqiaarinijia. Naajaa, janiyari samiitiaquiaariuhua pueyaracaanu saminio cuu quiniuria. Janiyari macunucua quiquio riatataja camaruni. Naacuajitj, janiyari cumaacaracani cuu tojijashijia cuu quejoonura macunucua quiquiojinia. ¹⁹Pueya niishishocoriquiano, quia niquishano quia naajiotare Juanna, taa na quiyacuajani, naajuhua taa mijiria quijiaca miishaanutaniya na nuhuajini. ²⁰Quiaritia quia pohuatareera maatia quia niishiniuria cuu niquitishano quiajanu. Cunu siete riya quia niquishano cuu miaquetajata cuu muetujusanoni, cunoori siete cuu seya. Nojoriiri siete cuu saquiriojosano pueya maapue jitianaa. Cunu siete samari nujuatacojua orojinijia shipinijosano quia niquishanojanuhua, cunoori siete cuu saquiriojosano pueya maapue.

Éfeso tiacajinia quinia Pueyaso pueya maanuucua naajione

2 ¹Juhuacatecara naa cuu sequereeri: —Éfeso tiacajinia quijia cuu seruucua quia naajiore, Pueyaso pueya maanu jitianani. Naa quia sequere nojuaja:

“Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucuanajojuacuajani, nojuajaari naa quia sequeya: ²Janiyari puetunu quia miishanojuanaa niishiyani. Quiaari jiyanojuaa poonijioquiaa quiria. Naajuhua, quiaari puetunu casaajanaa rejeretaquiaa juhuajaniya. Janiyari niishiyajuhua, majaari quia shanacunu quiquiaa sesa miijiaca nia tajinia. Naajuhua, quiaari cuno sapojonuujua nequesoreecanu, noo pojori canapuetu tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishiquianu nojoriiri sapojonuujuaa seetanujanaa. ³Quiaari puetunujanaa taraatia quia miiniu rejeretaquiaa, cucua tiuujia quia quiniucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. ⁴Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵Cunora, quia niishiri taa jiyanojuaa cua panijia quia quiquiaarini. Quioojia quia tacatorohua cucua, maninia miijia quia quiniuhua, taa quia quiquiaari coteenucujani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. ⁶Quiaari maninijuhua, sacuraatia casa Nicolás* niishitiojosano tojjijia miishano soojea quia quiniucua. Janiyari cuno pojori miishano soyajuhua. Nio cua sequesano quiajaniyani, cunoori puetunu cua pueyarajanaa. ⁷Cante numaacani, nojori cuara tojiiria Pueyaso Sohanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji miojuarani, pueyaracaanu rishijia nojori quiniuria’”.

Esmirna tiacajinia quinia Pueyaso pueya maanuucua naajione

⁸Jiyaniijia Jesucristoori naa cua sequerejuhuaj:
—Esmirna tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Naa sequerari cante puetunu casaajanaa coteenucujani, na tucuatania. Nojuacuajaari cusoquiaari, na nuhuaji samiitiaquiaariuhua. Janiyacuajaari nojuajani. ⁹Janiyacuaajaari niishiyani, quiaari naquiya miishaquiaa. Quiaari casamijiujuhuaj. Naajaa, quiaari jiyanojuaa casamiriacuaja nia cua shuriucuanu. Janiyari niishiyajuhua, cuno Judiocuacaari quia sesacaquiaa. Nojoriiri tama sequequiaajaacujua nojoriniari Pueyaso pueya cutara, Judiocua nojori quiniucua. Maja naatej. Nojori cutaraari Satanás* pueya maanu. Satanás cuajaari samaruhua jiyaniijia. ¹⁰Quiaari naquiya miishaanutaniya. Naajaa, majaari puerenu. Satanástri noojiaqueya nijaniyajinijinio nujuatejotenutaniya nujuatejojuajinia nia sanishaanura, niaate cucua tiuujia seetanujanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojjijia quia quiriquia pueyaracaanu, quiaa cuara shaajeyarejaatijia. Quiaa jaara naa miiritij, janiyari quia jiyatenutaniya jiyanojuaa shuquiriaatia quijia quia quiniuria pueyaracaanuni. Nio cua sequesano quiajaniyani, cunoori puetunu cua pueyarajanaa. ¹¹Cante numaacani, nojori cuara tojiiria Pueyaso Sohanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminiajinia’”.

Pérgamo tiacajinia quinia Pueyaso pueya maanuucua naajione

¹²Jiyaniijia Jesucristoori socua cua sequere:
—Pérgamo tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia

sequere nojuaja: “Nijiniaquetucua mueruu jitianari naa sequeya: ¹³Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojjijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaquinuucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanojuaa maninia. ¹⁴Saniniuujia, maja cutaraari nio cua maniniucuanu: tamasaca nijaniyajinijioori maja na tarinitianu paniniu sesa na miijionu. Nojoriiri supuetana Balaam* niishitiojosano tojjijia quiyajaa. Balaamcuajaari Israel pueya paraca Balac* niishitiojuaari na pueya cuara shiniujuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juashiquiaa shipinijosano casaacua puecoosano quiquiaaricujani juhua Pueyasocua. Naa sacuraatia nojori queranacujusacari nojori paraatej, Israel pueyari cuniquijia cuno taatujuri numuetucujuquiaarijuhuaj. ¹⁵Naajuhua, majaari nio cua maniniucuanu: noojiaqueya nijaniyajinijioori maja na tarinitianu paniniu jiyanojuaa sacuraatia casa Nicolás* niishitiojosano. ¹⁶Quiaari nareja niquiquiaa sacuraatia nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuraatia miijia cua miaquejonura na rupaamaji mueranacujua mueruuta. ¹⁷Cante numaacani, nojori cuara tojiiria Pueyaso Sohanu sequesano Pueyaso pueya maapuera. Cante tama na cuaqueya miiniu panishanojuaja rejetajani, janiyari na mianuutenutaniya jiyocuaanu cua racatasano cua pueyarano cua riuriotacajinijini. Janiyari na niqutionutaniya cohujajau saajiajuhuaj, teyanocua quiarinio sesa naajiotasano quiniutianiyacuajani. Majaari tamonu niishini quiniutianiya cuno sesa. Saaja na camaruari na niishiniutianiya, cana cua niqutionutaniya cuno saajiacujani’”.

Tiyatira tiacajinia quinia Pueyaso pueya maanuucua naajione

¹⁸Jiyaniijia Jesucristoori socua cua pacuterohua sequenuhuaj:
—Tiyatira tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Pueyaso Nyanu, juhua mani rimianacuyano namijiaracani, juhua bronce mohuaquishano shacantuca niohuacaracajuhua, nojuajaari naa quia sequeya: ¹⁹Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasocua tiuujia. Quiaari maninia poonijiojua Pueyasora, pueya quia naacunura. Naajuhua, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhua, puetunujanaa quia miishano quiria quiarijiani, cunoori socua queraatia coteenu quia miishanojiniji. ²⁰Saniniuujia, nio cutaraari cua maniniucuaquishano: cuno Jesabel* niaata quiyani, tama na cuaqueyajaaja sequequiaani, nojuajanaari Pueyaso sequesano caminiujuunia pueyara. Quiaari juhuajaniya na shanacuaquiaa saaja, sacuraatia na niishitiojosanota na sapojonura cua pueya. Naa sacuraatia na niishitiojosanotatej, cuno maajiiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaajaariuhua nojori miacquenuunura noo shu, teyanote juashiquiacata shipinijosano taucua pueyasohua-cua puecoosano quiquiaacuajani. ²¹Janiyacuaajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. ²²Cunora, cua tojiri. Cua saniitionura nojuaja, janiyari na cusotenutaniya ni na maquetujinia na matanura. Naajuhua, na numuetucunujuaca jaara noojia tacatoyaquiri sesa nojori miiniujiniji, janiyari jiyanojuaa naquiya miiniutianiya nojorini. ²³Noo maajipohujuhua, paanaturirria quinioni, cuno paanatujuanaa niishitiojonuucua nojori juhua necojorini,

janiyari puetunu nojorijanaa pueconutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijiaa niajanijajinijinio maninia miiniutianiyanani. Nijaniyajinijinio sesa miijiaa saniniuuja, nojoriiri saniitosaanutaniyacujua. ²⁴Tiyatira tiacajinia quiniaa noojiaqueya niajanijajinijinio saniniuuja, niaari sacuaraatia cuno maaji niishitiojosano ruuretaquiaa saaja. Naajuhua, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaa jiyaniquishanoni “jiyajeneta casaa, Satanásjiniji niishishano”. Naa nia ruuretenuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia niajaniya. ²⁵Saaja tama nia cuaqueyajaaja nia cojuare jiyanoehua, maja nia tarinitianura maninia nia miiniu taa nia miiquiaacuajani. Naa nia miiriura pueyaracaanu, janiya jaara niaacua tiuquiorhuaajaatijia. ²⁶Cante cua panishano miiquiaa pueyaracaanuni cuaara shaajeyarejaatijia, janiyari cuno pueyano jiyatenutaniya tamasa pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuracuajani. ²⁷Jiyaniijianucua cua jiyatesano pueyani, nojoriiri cumaacaraca quiniutianiya na jitiiasano pueya na tojitiniuria nojuaja. Na tojitiaashijiaa na saniitosacari saniniuuja, nojori piyonutaniya jacaanuraari, juhua cumamacata pishano conatu. ²⁸Naajuhua, janiyari joojea na niqutionutaniyani, juhuaquetaja rijiani, shacantuua quijia na quiniuria juhua janiyajuhua. ²⁹Cante numaacarani, nojuaja cuaara tojiiria Pueyaso Sohuanu sequesano puetunu Pueyaso pueya maapuerajanaa”.

Sardis tiacajinia quiniaa Pueyaso pueya maanuucua naajione

3 ¹Jiyaniijia Jesucristoori socua cua sequere: —Sardis tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Naa sequereyari cante Pueyaso Sohuanu jiyaramiquiquiaa cuno siete Pueyaso pueya maapuecuacuajani, nojori jiuujajinia na poonijionura. Nojuacuajaari cuno siete Pueyaso pueya maapue jitianaa Jitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ²iQuia maquenu quia jatari! iSuteja quia quiri! Quia cumaquiri noo pojori canapuate jatarinitiaja rishiyajani. Quera cusunuyari. Janiyari Pueyasora quia miishano niquiquiaani. Majaari maninia na quiniu cua Pueyasora. ³Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricujani, cuno quia niishiriohua. Quioojia quia tacatorohua Pueyasooocua, seetanjuanaa na rupaa tojjia quia quiniuria. Quiaa jaara suteja quiniu paniyaquiri, janiyari canashiyaquiji quiocua niniutianiya juhua nohuasejojuani, quia jyanishacari maja naasucua juhuanajuaja cua tiuquiniu quiniutianihua. ⁴Quia jitiiasano pueyajinijinio cuniqui Sardis tiacajiniani, secaja nojorijinijioori sesa miiniu ruuretajaca saaja. Naa sesa miiniuria nojori na cojiyaquiniucuatej, nojoriiri juhua curuushojiaquishano janiyara. Naaratej, janiyari nojori cushiyotenutaniya cohuajaqueya toqueni, cuata nojori rucuanenura, cua rupuea nojori quiniucua. Cunoori seetanjuanaa sesa miiniu ruuretajaca nojori quiniucua, cucua tiuuja nojori quishacari. ⁵Canapuate naa sesa miiniu ruuretajacani cua tojitiaaja nojori quiniucua, nojoriiri naa cohuajaqueya toqueya cushiyotesocoriquianojuhuaj. Cunoori quiniutianiya tojitaarucajanaa sesa miyashijiacara cua jiyatesacari nojori. Naajuhua, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhua, janiyari nojori

jaatianutaniya cua Queecuanani, na seya tacojiriano, cua sequenura nojoriiri cua timitiasano pueyaniyojua. ⁶Cunora, cante numaacarani, nojuaja cuaara tojiiria Pueyaso Sohuanu sequesano Pueyaso pueya maapuera”.

Filadelfia tiacajinia quiniaa Pueyaso pueya maanuucua naajione

⁷Jiyaniijia Jesucristoori socua cua sequere:

—Filadelfia tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Janiyacuajaari tojitaarucajanaa maninia miijiani, cua Que tojjia cua quiniucua. Puetunu cua sequesanojuanaari seetanjuanaa. Jiyaniijajanaa cua quiniucua cua supuetana David niti, janiyari cua Que tiotiu riataata jitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸Janiyari puetunu quia miishanojuanaa niishiyani. Naajuhua, janiyacuajaari juhua tiotiu riatarucuaa quiocuajini, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojjiaacuaja. Naajuhua, majaari cua soojeaca pueya niqiara quia tamacanu quiquianu janiya. ⁹Naa maninia quia miiniucua janiyaracuatej, janiyari naa maninia miiniutianiya quiarajuhua. Janiyari noojiaqueya Satanás pueya maanujinijinio mojoquetanijionutaniya quiocuarani. Cuno pojoriiri tama na cuaqueyajaaja sequere, nojoriniaari seetanjuanaa Pueyaso pueya, Judiocuaca nojori quiniucua. Naa nojori sequesacari, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuuja quia quiniucua. ¹⁰Janiyari quia sequequiarini maja quia tarinitianura quia poonijionu, quiaa jaara naquiya miishaariquia. Quiaari seetanjuanaa naa miiquianu. Naaratej, Pueyaso saniniujushacari puetunu mijiria quiniaajanaa puereeta naquiya na miiniutia nojori, janiyacuajaari jiyacari nia cojuanutaniyani. ¹¹Quia niishiri: janiyari quera tiuquihuani. Majaari quia tarinitianu cua rupaa tojjini, quiaa mariqui sapojosaareeri cucuaji quia rupanura. Naacuajitij, quiaa jaara cucuaji catere, majaari Pueyaso niqutionu quiniutianiya quiarano na racatasano. ¹²Cante sesa miiniu samiritiaja saajani, cua rupaa tojjia na quiniucua, janiyari jiyocuacaanu Pueyaso Secojua tiajinia na nujuatenutaniya juhua morjijuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhua, janiyari cuno pueyanoocua naajiotanutaniya cua Que Pueyaso sesani, quiarinio cua sesajuhua, cua Que Pueyaso tiaca sesanio. Cuno tiacacuajaari quiarinio Jerusalén* tiaca, jiyocuacaanuji roshinitiasaariquiano. ¹³Cante numaacarani, nojuaja cuaara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucua naajione

¹⁴Jiyaniijia Jesucristoori socua naa cua sequere:

—Laodicea tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequereyari noo pueyano cana sequesante seetanu rupaaajanaacuajani. Puetunu na caminiujushanojuanaa Pueyasojiniji quiarani, cunoori seetanjuanaa. Pueyasoori na shipinitiquiaari puetunu na shipinishano casaajanaa. Cunocujaari janiya. Cunora, cua tojiri. ¹⁵Janiyari puetunu quia miishanojuanaa niishiyani. Quiaari najuhua quijia, quia miyaquiniucua cua sequesano. Seetanjuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya.

¹⁶Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojjijia quiriquia, janiya maara quia timitiaren. Saniniuujia, najuhuaa cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani.

¹⁷Quiaari tama sequequiaajaacujua: 'Janiyari casamiriacani. Janiyari puetunu cua panishanojuanaa jiiitiaani maninia miijia cua quiniuucua'. Maja cutaraari quia niishiniu quiuojiaari cusosu. Janiyara, quiaari tojetaarucujanaa casamiijiu, cariyujuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸Cunora, janiyari quia numooteyani moseeca pueyanonaa, cua rupaa tojjijia quia quiri, seetanujuanaa casamiriaca quia quiniuria. Naajuhuj, maninia miijia quia quiriquia cua cushitiniuria quiajaniya cohuaaque toque, maja cararaatia quia quiniuria juhuasu. Naajuhuj, cua niishitaja quia masere cutara, quiuojia namijia riatenura, seetanujuanaa maninia niqijia quia quiniuria. ¹⁹Janiyari puetunu cua panishano pueyajanaa nacasajuani, nojori saniitiojuajuhuj. Cunora, quiuojia quia tacatore cucua. Tama quiuojiaaja quia shiniujuriujuhuaj shamaatia cua tojjijia quia quiniuria. ²⁰Cua tojiri. Janiyari quiuojia tiotuijiniji jiiquoonuujiani. Cante cua tojiyani, nojuaja cuara na tiotui riataara cucuaji. Janiyacu nocua tiuquiumiani, nata cua miaquenura, shuquiriaatia cua pocoojonura nata. ²¹Janiyari cua Paraca shocotaquiaarini cua Que tojjijia cua quiniuucua. Naaratej, cua Queeri cua cajitijiaaari na shuriucua, Jiyaniijajanaa cajituijinia. Naajuhuj, janiyari Sesaaca shocotajaca cajitijionutaniya cua shuriucuaani, jiyaniijanucua nojori quiniurajuhuj. ²²Cante numaacani, nojuaja cuara tojiiria Pueyaso Sohanu sequesano Pueyaso pueya maapuera”.

**Juan niquishacari Jiyocuaaanu Quijiaari
maniniuuaqueetasaariquiaa**

4 ¹Na nuhuaji, janiyari mauquiaarini. Janiyari saaja jiya cajiniocua tiotui niqiquiaari riatasanoni. Shushajanaa cua tojjishano rupaa juhua trompeta jonenenuni, cuno rupaaajaari cua pacutequiaariuhua sequenu. Naa cua sequereeri: —Miji quia tacama. Janiyari quia niqitiniutianiyani taa nio pa quishacari nuhuaji mijiria quinia miishaanutaniyani.

²Jiyacaritij, Pueyaso Sohanuuri cucua niqiaari. Cua sohanu tacaniquiaari jiyocuaaanuuri. Janiyari jiyacari Jiyaniijajanaa cajitui niqiriini. Pueyanoori tii cajiriquiaa.

³Nojuajaari shanohua niquishano quiriquiaa, jiyanoohua shacantuuca juhua jaspe saajia, jiyanoohua naatuucujuhuj, juhua cornalina saajia. Naashiiri na cajitui caco nujuariquiaa. Jiyanoohua shacantuuca quiriquiaari neeruua, pocojuanaque juhua esmeralda saajia. ⁴Janiyari socua veinticuatro cajituiucua niqiriini Jiyaniijajanaa cajitui shocuaani. Tii cajituriquiaari veinticuatro niishijia jiyaniijanucua. Cohuaaque toqueya cushiyonuuriquiaari, orojiniji shipinijiosano nacaqueyano.

⁵Jiyaniijajanaa cajituijiniji, miacanaari nunujuriquiaa. Jiyanoohua majacuriquiaajaariuhuj. Jiyaniijajanaa cajitui tacoji, tii noshiquioriquiaari siete samari. Cunocuaajaari siete Pueyaso Sohanu, puetunu tiquiyocujanaa quijia na quiniuucua. ⁶Jiyaniijajanaa cajitui tacoji, juhua jiyanoohua puereetucua caminiaari quiriquiaajuhuj, juhua cohuaa motiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhuj, puetunu na shocujanaa. Nojoriiri jiyanoohua queraatia namijiaraca quiriquiaa, na jiriquiaacumaji, na nijiniaacumajinio. ⁷Cuno cuatro saminuucua casaari tamaatia niquishano quiriquiaa tamonujiniji. Niquriyatuuu juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonuuri juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸Puetunu

cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niqititaja, na nijiniara na niqititajano. Nojoriiri pueyaracaanu Pueyaso maniniuuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijajanaanaa, quiaari saa maninija, jiyanoohua maninia, tojetaarucujanaa maninia miijia! Quiaacuaajaari Pueyaso, puetunu cumaacaracajanaa. Quiaari quijiajuhanajaj. Majaari quia supueni quiquiaari. Quiaari quia pueyacu tacateriquianohua.

⁹Cuno cuatro saminio casaari naa pueyaracaanu maniniuuaqueetariquiaa Jiyaniijajanaa, na cajituijinia cajiyano, pueyaracaanu Jiyaniijajanaa quiriquiano na quiniuucua. ¹⁰Naa pueyaracaanu cuno cuatro saminio casaa timitiasacari Jiyaniijajanaacuaatej, cuno veinticuatro niishijia jiyaniijanucuaari jaarajaaja mojoquetacoqueequiaa Jiyaniijajanaa cajitui pajama, naa na sequenuta:

¹¹—Nioori quiaara, Jiyaniijanaa. Quiaa cutaraari Jiyaniijajanaa, maja canaa. Quiaacuaajaari canaa Pueyaso. Quiaa cuara timitiasaaria pueyaracaanu, jiyanoohua maninia shacantuuca quijia quia quiniuucua, puetunu cumaacaracajanaa quia quiniuucujuhuj. Quiaacuaajaari puetunu casaajanaa shipiniquiaari. Tama quia paniniuucuaajaaja, quiaari na shipiniquiaari.

**Rupanacujusano naajioneejiniji pohuatasano,
Borrego Niqiuojajinijinio**

5 ¹Na nuhuaji, janiyari Jiyaniijajanaa cajituijinia cajinia juaashiquiajinia niqiriini naajioneeni. Na miaquetajara na cacariquiaari. Cuno tucuaanee naajioneeri jiuniososano quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ²Jiyacaritij, janiyari jiyanoohua cumaacaraca Pueyaso seru niqiriini. Naa nequesoreeriquiaari jiyanoohua na nacanuta:

—¿Cante seetanujuanaa maninia miijia cutarani? Cuno cuara rupartaara rupanacutasano, na riatanura cuno naajione.

³Jiyacaritij, majaari quenaaja maninia miijia quiniu quiquiaari jiyocuaaanu, jiyajinia, jiya cariquimiano na riatanura cuno jiuniososano naajione. Tojetaarucujanaa shaquii quiquiaariiri cuno naajione serojoriquiano. ⁴Naaratej, janiyari jiyanoohua nujueriquiaani, tojetaarucujanaa shaquii maninia miijia quiaquiniuucua cuno naajio na riatanura, na serojonurano. ⁵Cua nujuquesacari, tamonu cuno veinticuatro niishijia jiyaniijanucujinijioori cua sequere:

—Maja nujuquenu. Quia cumantare. Quia niqiri. Pa Jiyaniijajanaacuaajaari jiyanoohua cumaacaraca. Tariucuaaanu Pueyaso Rupaajinia, nojuacuaajaari miriqui sequeshiya Juurunu saret, Judá niqiuoacuajinio superiquiano, Jiyaniijajanaa na quiniuria na supuetana David niti. Nojuacuaajaari pa paraca Satanás shocotana, tojetaarucujanaa Jiyaniijia Pueyaso tojjijia na quiniuucua. Naaratej, nojuaja na naata cuno siete naajio coteeja rupanacujutasano ruparetanu na serojosocoriquiano.

⁶Jiyacaritij, janiyari Borrego Niqiuojua niqiriini Jiyaniijajanaa cajitui tacoji nujuano, cuno cuatro saminio casaa tajiniano. Cuno veinticuatro niishijia jiyaniijanucuaari na shocua quiriquiaajuhuj. Borrego Niqiuojuaari seetanujuanaa juhua mosano samiitanohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniuucua. Naajuhuj, siete namijiaraca quiriquiaari. Cuno na siete namijiaani, cunocuaajaari Pueyaso Sohanu, Pueyaso jiyaramiquishano puetunu mijirajanaa. ⁷Cua niquishacari, Borrego Niqiuojuaari Jiyaniijajanaa cajituijinia

cajiyano juaashiquiajiniji jiuniososano naajionee masetaree.

⁸Nojuaja jaara cuno naajionee cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijiaa jiyaniijianucuanio. Puetunu nojorijianaari taquiniojosano casaa jiitariquiaa. Naajuhuj, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu seconjuusanio Pueyaso. ⁹Nojoriiri Borrego Niquiojua jaaquequetariquiaa nio quiarinio jaaquequejosano:

—Saaja quiajanijari seetanujuaanaa maninia mijija. Naaratej, quia naata cuno naajionee patanu quia rupareetanura na rupanacujusano. Quiaari jiyanoehua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiucua pueyapuejinijinojuanaa, puetunu tamaatia rupaa pocuajacajinijinojuanaa, puetunu tiacajinijinojuanaajuhuj, puetunu jiyacajinijinojuanaano. ¹⁰Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojona, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhuaj.

¹¹Na nuhuaji janiyari tojetaarucujanaa jiyanoehua jiyanoehua queraatia Pueyaso seya niquiriini. Jiyaniijajanaa cajitiu shocua mariquiaari, cuno cuatro saminio casaa shocujuhuj, niishijiaa jiyaniijianucua shocuanio. Nojoriiri jiyanoehua queraatia quiquiaari, juhua jaaquia, serojiaquishoo. Janiyari nojori tojirii pa Jiyaniijia Jesu maniniuhuaqueetaanoni.

¹²Nojoriiri naa na sequeturiquiaa na nacanuta:

—iPa Jiyaniijiaari jiyanoehua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijajanaa pueyaracaanura. Saaja nojuaja cuaara jiitiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quiijiaa casaajanaa cuaara tojitiaara pa Jiyaniijia. Saaja nojuaja cuaara quiiria jiyanoehua timitiasano. Puetunu quiijacajanaa cuaara na maniniuhuaqueetaara.

¹³Naajuhuj, janiyari puetunu Pueyaso shipinishano saminio casaajanaa tojirii, jiyocuacaanu quiijiaa, jiyajinia quiijiaa, jiya cariquimia quiijacajuhuj, shoniniacu caminiajinia quiijacano. Puetunu nojorijianaari jiyanoehua na timiniutia sequeturiquiaa:

—iCuno, na shacantuca cumaacajinia cajiyani, Borrego Niquiojuanio, nojori cuaara maniniuhuaqueetasaaria pueyaracaanu! iPuetunu casaajanaa cuaara tojitiaara nojori pueyaracaanu! iNojori cuaara timitiasaariajuhuaj! iSaa nojorijia cuaara na cumaaca jiitiaara pueyaracaanura!

¹⁴Jiyacaritij, cuno cuatro saminio casaari nojori rihuuaneriquiaa saniniuuja:

—iTaaquiriirini! iCuaara naa quiiriatej!

Cuno veinticuatro niishijiaa jiyaniijianucuaari saniniuuja mojuquetacoqueecujua cuno pueyaracaanu Quiijiaacuara, nojori na shuquiritianura.

Jiuniososano naajioneeua seis rupanacujutasano rupareetasacari

6 ¹Na nuhuaji, cua shootiasacari, Borrego Niquiojuaari coteenujanaa cuno naajioneejinia rupanacutasano rupartaree. Naa miiriiri cua niqutishaanura taa mijiria quiniaa miishaanutaniya jiyanoehua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “iMiji!” Na pocuanuuri juhua miacana majanu tojishano quiriquiaa. ²Naa na sequesacariitij, janiyari cohuajohuana caballo niquirii nocua canujijanoni. Na

nijinia cajiniaari balista cacariquiaa. Jiyacaritij, jiyaniijiaa shipinishano nacaque cushitishaareeri. Na nuhuaji, na caballo na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³Na nuhuaji, Borrego Niquiojuaari segundo* rupanacutasano rupartaree. Janiyari jiyacari segundo saminio casaajinijinio tojirii sequeyanoni: “iMiji!” ⁴Naa na sequesacariitij, naatuhuaa caballo nocua canujumaa. Na nijinia cajiniaari cumaaca niqutiosaare. Naacuajitij, nojuajaari mijiria quiijiaa tojetenutaniya tama nojori miaquetoojonurajaaja. Cunora, nojuajaari puereetunee nijiniaquetucua mueruu niqutiosaaree.

⁵Na nuhuaji, Borrego Niquiojuaari tercero* rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “iMiji!” Jiyacaritij, janiyari mueruhuaa caballo niquirii nocua canujijanoni. Na nijinia cajiniaari niqutia shanacujutaja jaasutetariquiaa, mijiria quiniaara mijajau shanacujusaanura nojori serotasaanura. ⁶Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niqutiosaaria saaja niquiriyatu kilo trigo jajau. Jaara trigo jajau paniyaquiri, cuaara niqutiosaaria tres kilo cebada jajau. Saniniuuja, majaari shiyocua shanacujunu cutara, vinonio*. Cunocujaari queraatia quiniutianiya cutara.

⁷Na nuhuaji, Borrego Niquiojuaari cuarto* rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “iMiji!” ⁸Janiyari jiyacari tiirihuana caballo niquirii nocua canujijanoni. Na nijinia cajinia sesaari quiriquiaa “Cusojuana”. Macunucua Quiquoori na neteyotariquiaa, Cusojuana puecoosano na rijnionura na miiitasocoriquiano. Nojoriiri cumaaca niqutiosaaree jiyanoehua queraatia pueya na cusojuana. Naacuajitij, jiyanoehua queraatia pueyari puecoosanutaniya miaquetoojosacari. Tamasacaari cusonuunutaniya jiyanoehua miaajesacari. Tamasacaari paaqueja cusonu cusonuunutaniya. Naajuhuj, tamasaari sareya sootesaanutaniya. Sacocua satejosaanutaniyajaariuhuj. Naacuajitij, jiyanoehua jiyanoehua queraatia pueyari cusojuasaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quiijiaa pueya cajiniocujinijinojuanaa.

⁹Na nuhuaji, Borrego Niquiojuaari quinto* rupanacutasano rupartaree. Jiyacaritij, janiyari Pueyasoocuara catijiasaqui juhuacutu cariquiaco niquirii Pueyaso pueya sohuuanuhuni, noo pojori canapuate puecoosaaquiaaricujani Pueyaso Rupaa tojijiaa nojori quiniucua, Jesucristojiniji nojori pohuatanuucujuhuj. ¹⁰Jiyacaritij, nojoriiri naa jiyanoehua nacaree:

—iJiyaniijianaa! iQuiaari saa maninija! Quiaari quia sequesano mijija seetanujuaana. iTaa quia tarishiniutianiyajaa canaa puecoona quia nequesoreenurani, nojori quia naminiuria canaacua saniniuuja?

¹¹Jiyacaritij, puetunu nojorijianaari cohuajaque toqueya niqutiojosaaree. Nojoriiri naa sequesaaaree:

—Socua rupaquijia nia samaaterejaara, Pueyaso saquiriojosa-no niarta Pueyaso pueyajinijinio cuaara puecoosaa nia shiriajaatijia, taa nia puecoosaaquiaaricuaani.

¹²Na nuhuaji, Borrego Niquiojuaari sexto* rupanacutasano rupartaree. Jiyacaritij, rijiaari jiya jiuuquiutiaree jiyanoehua. Janiyari na niquiriquiaani. Pananuuri mueruhuaa quiquii juhua mueruque toque. Racaari naatuucara quiquii juhua nanaca. ¹³Riyari jiya cajiniocua toteree jiyocua, taa satuna totequiaa jiyanoehua paratucaricuaani. ¹⁴Jiya cajiniocuaari shaajequejuhuaj, juhua tucuanee naajioneeeri jiuniososaaree. Shoniniacu caminiajinia, puetunu jiya tucuaatijajanaa, puetunu tuhananuhujuhuj, puetunu cunojuanaari

jiyajeetaquee na nujuatusaqui. ¹⁵Nojori puerenuta, mijiria jiyaniijianucuaari raacajinia jamaatiushii, sai tajinia tuhuanaanuhajiniajuhuaj. Naa jamaatiushiiiaariuhua noo pojori: pueyacia paaretajaca na cumaacatej, soldadohua jiyaniijianucua, jiyanoehua casamiriaca pueya, pueya tojishano pueya, poonitijosano pueyajuhua, puetunu narta pueyajanaano. Puetunu pueyajanaari naa mashiriquiaa juuca.

¹⁶Nojoriiru tuhuanaanuhua sequeriquiaa, sainio:

—iCanaaca nia tiyare canaa nia jamonura cunoocua, na cajitijinia cajiya na shacantuca cumaacajiniani! iCanaa nia jamojore maja na niqiara canaa quiniuria, naajuhua, maja Borrego Niquiojua saniitonura canaa, jiyanoehua na juaashacari! ¹⁷Quiarijiacuajaari Pueyaso saniitonu juuca. Jiyanoehua puereeta. ¿Cante na naata na nujuatanuni? Shaaqui.

Pueyaso saquiriojosano pueyajiniji pahuatasano, Israel niquiohuacuajinio supueno pueyajinijinio

7 ¹Naa cua niqiniuhua nuhuajitij, janiyari socua cuatro Pueyaso seya niqiri nio jiya shocua nujuatuyano tuhuacuini, pananu muetasamaji, na tiuquishocora, na muetasamaji na muenecara, na miaquetajariano. Nojoriiru na nujuatusaqui paratu tenujiriquiaa maja na piyarojonura jiya, shoniniacu caminia, nacuhuanio. ²Jiyacarijuhuaj, janiyari socua tamonu Pueyaso seru niqiri jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyaca nacaree jiyanoehua, noo pojoriuca canapueete cumaacaraca quiriqiaacuajani nojori sesonura jiya, shoniniacu caminianio. Naa nojori sequereeri:

³—iCuaara! iMaja juhuanojuaja jiya nia sesonu, shoniniacu caminia, nacuhuanio, canaa niojiyaquishacarija Pueyaso sesa, na pueya jiniji, na niishishaanura nojoriiru Pueyaso pueya!

⁴Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijinioo ciento cuarenta y cuatro mil pueya jirioosaaree. ⁵Naacuajitij, supuetana Judá niquiohuacuajinio supueno pueyajinijinio, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶Supuetana Aser niquiohuacuajinio supueno pueyajinijinio, doce miljuhuaj. Supuetana Neftali niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹Naa cua niqitishaanu nuhuajitij, janiyari jiyanoehua queraatia pueya niqiri maanoni juhua tereya. Nojoriiru puetunu nio tiqiyocua jiyacajinijiniojuanaa pueya quiriqiaa, puetunu tamaatiucua pueyapuejinijiniojuanaano. Quiriqiaaariuhua puetunu tamaatia rupaaca pocuajacajinijiniojuanaa, puetunu tiqiyocua tiacajinijiniojuanaano. Naa tojetaarucujanaa jiyanoehua queraatia nojori quiniucuatej, majaan na naata serojosano quiriqiaa. Nojoriiru Pueyaso shacantuca cajitiu taccoji nujuatiriquiaa, Borrego Niquiojua taccojinio. Puetunu nojorijianaari tucuaqueya cohuajaque toqueyaraca quiriqiaa. Shuquiriaatia nojori quiniucua, nojoriiru juhua teruhuanajaquera niquishano mueetacoriqiaa. ¹⁰Puetunu nojorijianaari naa mariyata sequeriquiaa na nacanuta:

—iJiyanoehua maniniaari pa Que Pueyaso, na shacantuca cajitijinia cajiyani, Borrego Niquiojuajuahuaj. Nojoricuajaari pa jiyanoehua, tojetaarucujanaa quiariniora jatanishano pa quiniuria!

¹¹Naajuhua, puetunu Pueyaso seyajanaa, canapueete shacantuca cajitiu shocua nujuatiriquiaacuajani, niishijiaa jiyaniijianucua shocujuhua, cuno cuatro saminio casaa shocuanio, nojoriiru Pueyasoocua jacamaturee nojori timitianura nojuaja. ¹²Pueyaso na timitiatuacari, naa sequeteeri:

—iTaaquiriinij, seetanujanaacuaj! iCanaari pueyaracaanu quia maniniuhuaqueetanutaniyani! iQuiaacuajaari canaa timitiasano! iSaaja quiajaniyari seetanujanaa niishijia cutara! iPaacarasho, canaa Pueyasona! iQuiaa cuaara tojishaaria pueyaracaanu! iQuiaari canaa Jiyaniijajanaa pueyaracaanura! iQuiaari puetunu cumaacaracajanaa maninia quia jitianura quia shipinishano! iCuaara naa quiri pueyaracaanu, pueyaracaanutej!

¹³Jiyacariitij, tamonu cuno veinticuatro niishijiaa jiyaniijianucujinijinioo cua nequesotaree:

—¿Canapueete cuno pojorini, cohuajaque toqueyaracani? ¿Tejenote nojorini?

¹⁴Janiyari na riucaaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarija, nojoriiru cuno jiyanoehua naquiya miishacari rejeretajaca quiriqiaari. Nojori tiuuniucua Borrego Niquiojuacuaja, nojoriiru puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiru cohuajaqueya toqueya cushiyonuya. ¹⁵Naa Pueyaso jiyanoeshano pueya nojori quiniucuatej, nojoriiru Pueyaso cajishaqui taccoji quijiaa. Nojoriiru pueyaracaanu tii Pueyaso Secojoua tijajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuca cumaacajinia cajijiani, nojuajaari na cumaaca teetenutaniya nojori caco, jatiqui na quiniuria nojoritia pueyaracaanu. ¹⁶Naacuajitij, majaan socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhua, majaan socua naasaatia pananu jartanu nojori niishiniu quiniutianiya. ¹⁷Borrego Niquiojuacuajani, Jiyaniijajanaa cajitiu jiuujajinia cajijiani, nojuajanaari nojori jitianutaniya juhua tama na borregohuajaaja. Nojuajaari nojori rucuanjetanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia quijiaa nojori quiniuria. Pueyasojuanaacuajaari nojori namijiaaca tujuunutaniya nojori namijajiniji.

Séptimo rupanacutasanojiniji pahuatasano, shanohua jaanutaja patajajinijinio

8 ¹Borrego Niquiojua jaara séptimo* rupanacutasano rupartaree, cuno naajione saacatanura puetunujanaa, tojetaarucujanaa sanaacara quiriqiaari jiyocuaanu pueyaracaanura. Maja cua niishiniu, media horaruhua*. ²Na nuhuaji, Pueyaso taccoji, janiyari siete Pueyaso seya niqiri nujuatuyano. Nojoriiru jiyacari siete trompeta niqitiojosaree. ³Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniji shipinishano Pueyasoocua catijiaja casaa taccoji nujuaseeri, Jiyaniijajanaa cajitiu taccoji. Queraatia shanohua jaanutaja niqitiosareeri Pueyasoocua na catijianura. Jaanutajaari catijiasariquiano puetunu Pueyaso pueya secojonuusanotajanaa, Pueyasoocua na jaanujunura cuno catijiaja casaajiniji. ⁴Naacuajitij, Pueyaso seruuri Pueyaso pueya secojosano tancariiriu Pueyasoocua, shanohua jaanujua najacata. ⁵Na

nuhuaji, cuno Pueyaso seruuri catijiaja casaajiniji na shanhua jaanutaja pataja mishinirii nishiyata. Jiyanhua na majiriataree nio jiyacuaari. Miacaanaari ritia nunujuquee. Jiyanhua majacureeri. Jiyanhua cojuatunereeri. Rijiaari jiuquiujiutia-reejuhuaj.

Trompetaa jonenejosacari

⁶Cuno siete Pueyaso seya, trompetaa cacariquiaani, nojoriiri jeeceanecoree na trompetaa na jonenenura. ⁷Jiyacaritij, niquiriyatu cuno Pueyaso serujinijinoori na trompetaa jonenu coteeree. Jiyacaritij, miacanajaa shiniitijuaacaari, mariyata mani cojtitishano nanacata jiyocua jartasaaree. Jiyari quera na cajiniocua cateree, puetunu na nacuhatajanaa, na jiyasocuatano.

⁸Segundo Pueyaso seruuri na trompetaa joneneere. Jiyacaritij, casaa juhua puereetuua tuhuananu noshiyanoori shoniniacu caminiajina jataaaree. Quera shoniniacu caminia cajiniocuaari nanacara quiqii. ⁹Puetunu shoniniacu caminiajina quijiaca casaajanaari, quera na cajiniocua cusonuuree. Naajuhuj, shoniniacu caminiajina ruhanetasano puereetuua buqueyajinijinoori, quera puetunu na cajiniocujanaa sesosaaree.

¹⁰Tercero Pueyaso seruuri na trompetaa joneneere. Jiyacaritij, puereetuua rijiaari jiyocuaaanuji tiqii, jiyanhua nishitiucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajinijuhuj. ¹¹Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquiara quiqii. Pueya ratusacari cuno mohuaca, queraatia pueyari saaja cusonuuree.

¹²Cuarto Pueyaso seruuri na trompetaa joneneere. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiqii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riyaa, racanio, majaari na cuhuatanu quiriquiaa quera niucua cajiniocujuhuj.

¹³Na nuhuaji, janiyari juhua puereetuua surohua miooru niquirii jiya cajiniocuanii. Na jaasacari naa nacariquiaa jiyanhuari:

—iPueereeta, puereeta, puereeta! Seetanujanaa jiyanhua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara joneneere, canapuate joneneyaquiyajaa juhuanujuacujajani.

Quinto trompetaa jonenesacari

9 ¹Na nuhuaji, quinto Pueyaso seruuri na trompetaa joneneere. Jiyacaritij, janiyari jiyocuaaanuji jiyocua tinio rijia niquiriini. Cuno rijiaari tiotiu riatataja niqutiosaaaree, puequeetuuju raa na riatanura. ²Na riatasacari, najacaari nojomaa juhua puereetuua cuhuariquia sesacari. Pananu namijia tiomaari. Jiya cajiniocuaari mueruucara quiqiijuhuaj. ³Sequeruuri cuno najacajiniji mueratuuma. Puetunu nio jiyacujanaa paaquemaari. Sequeruuri cumaaca niqutiosaaaree nojuaraca na quiniuria juhua turucuanii. ⁴Sequeruuri rootasaaree maja nojori miaquenura jiyasocua, nacuhua jaamasujuhuj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapuate na jiniji jirioyquishoo quiriquiaa Pueyaso sesatacujani. ⁵Sequeruuri rootasaareejuhuaj, maja nojori cusojuanura pueya. Cinco raca cuaara nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuanii saashi noonutaniya.

⁶Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanhua na shaajenu panishacari juucua, nojoriiri saaja rishiniutianiya, jiyanhua naquiya nojori miishacari.

⁷Sequeruuri puereeta niquishano quiriquiaa juhua miaquetoojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucuaa orojiniji shipinijosano nacaqueya. Nojori jiquiooori juhua pueyano jiquioo niquishano quiriquiaa. ⁸Nojoriiri juhua maaji muecacaraca quiriquiaa, tucuauejarujuri. Juhua juurunu sare quiacaraca quiriquiaaariuhuj. ⁹Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanhua cojuatuneriquiaa juhua caballohua jayotasacari queraatia rucuauejotaruhua, miaquetoojonuucua na netecuatusacari. ¹⁰Cuno sequeruuri juhua turucuanii nojuacaraca quiriquiaa. Jiyanhua noonacuracajuhuj. Jaara nojori saare, cunoori quiquiaari nojori na noonura cinco raca. ¹¹Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuju raa camarujaariuhuj. Hebreo rupaaajinia, na sesaari “Abadón”. Griego rupaaajinia saniniuuja “Apolión”. Pueyano rupaaajinia saniniuuja, noori sequeya “Pueya Puecoona”.

¹²Janiyari naa niqutishaareeni taa coteenujanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiiri cureyajaa na nuhuajiria.

Sexto trompetaa jonenesacari

¹³Sexto Pueyaso seruuri na trompetaa joneneere. Janiyari jiyacari rupaa tojirii pocuaanoni, shanhua jaanutaja catijiaja juhuacutu cuatro tuhujaa tajiniji, Pueyaso taccoji nujuatajani, orojiniji shipinishanoni. ¹⁴Cua tojishano rupaani, noo sexto Pueyaso seru sequereeri, na trompetaa cacariquiaani:

—Cuno cuatro Sesaaca seya quia saacarajore, puereetuua Eufates moo shuriucua morojosano quiyani.

¹⁵Jiyacaritij, cuno cuatro Sesaaca seyari samaacarajosaaree jiyanhua queraatia pueya nojori puecoonura, quera na cajiniocua puetunu mijiria quijiaca pueyajinijiojanaa. Cuno Sesaaca seyari tariucuaaanu naa morojosano quiqiiari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijia. ¹⁶Janiyari tojiriini cuno cuatro Sesaaca seya soldadohuari, doscientos millones* pueya quiriquiaa saa caballohuaracaja.

¹⁷Janiyari cuno caballohua niqutishaaree juhua cua maquenujiniani, na nijinia cajitunianio. Jiyanhua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niquishano quiriquiaa; naatuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. ¹⁸Cuno jiuujianaraca puereeta casaata quera na cajiniocua puetunu pueyajinijiojanaari cusojusaaree. ¹⁹Naacuajitij, caballohuari cumaaca jiitariquiaa na rupaama, na pitijinijuhuj, nojori puecoonura pueya. Na pitiucaari juhua sacocua niquishano quiriquiaa. Juhua sacocua nacacaraca quiriquiaaariuhuj pueya na sajitijara.

²⁰Cureeno pueya, canapuate maja na puecoosaanu quiri cunoo jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhuj, nojoriiri orojiniji shipinijosano casaa shuquiritariquiaa Pueyaso niti, platajiniji shipinishano, broncejiniji, saajajinijijuhuj, macajinijinio. Puetunu cunojanaa, nojori jiyatesano tama na pueyasohuarajaajani, cunoori maja na niqiniu. Majaari na tojinu. Majaari na rucuanenujuhuaj. ²¹Naajuhuj, majaari pueya tarinitianu quiriquiaa narta pueya monu, shimiojonujuhuj. Naajuhuj, majaari nojori tarinitianu quiriquiaa na camishoo maajipohua

numuetucujunu, maajishuriu numuetucujunujuhua.
Nohuasejonu tarinitiatiuquairiquiaajaariuhua.

**Pueyaso seru mueetasano tucanee
naajioneeniyojuajiniji pohuatasano**

10 ¹Na nuhuaji, janiyari socua tamonu jiyanoehua cumaacaraca Pueyaso seru niqiriijiyocuaaanuji roseyanoni. Cohuaja najacajinia cuhuajaatiariquiaari. Na niaacua camarucuteriquiaa naashiiri. Na jiquicoori jiyanoehua shacantuca quiriqiaa juhua pananu. Na cashacucuaari juhua mani niquishano quiriqiaa, naatej, taa mani nujuua na noshishacaritij. ²Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na nioluaca niaree shoniacu caminiaacuaari. Tacujua niaree nio jiyacua saniniuurijia. ³Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojiriji jiyocuaaanuji naa cua sequeyano saajani:

—iMaja pueya niishitiniu cuno siete miacana sequesano!
iMaja na naajiotanu! Tama quioojajiniijaaja quia racatare.

⁵Jiyacaritij, Pueyaso seru cua niquishano shoniacu caminiaacua nujuaanoni, nio jiyacujuhua, nojuajaari na miaquetajara na juaashiquiaa shiitioree jiyocuaaanu, seetanujuanaa na sequenura. ⁶Naa sequereeri:

—Cuno, pueyaracaanu Quijiani, nojuajaari jiya cajiniocua shipinia, jiya shipinia, shoniacu caminia shipinijuhua, puetunu tii quijiaa casaajanaa shipiniano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyaari taa na pohuataquiaari na sequenu panishano caminiujiuniaa pueyacuajani”.

⁸Cua tojishano rupaa jiyocuaaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniacu caminiaacua nujuaanu, jiyacuanio. Nojuaja quia masetasee cuno riatasano naajioneeniyojua, na mueetaani.

⁹Janiyari Pueyaso seruucua quiaareeni. Janiyari na sequeseni na naajioneeniyojua na niqutionura janiya. Cua riucareeri:

—Jajaa, quia patare. Quia miaquereenj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitotaja rupaa na quiniucua.

¹⁰Janiyari jiyacari cuno naajioneeniyojua pataree Pueyaso seru juaashiquiaajinijini. Janiyari na miaquereeni. Seetanujuanaa shoqueeca quiriqiaari juhua samiyatu. Cua miasacari, cua seecojinia jatasee piiquiaraari. ¹¹Jiyacaritij, janiyari naa sequesareeni:

—Quiocua Pueyaso sequesano caminiujiuriohua pohuatanu queraatia pueyapue niqiara, queraatia tamaatia jiyacajinia quiniaa niqiara, queraatia tamaatia rupaaca pocujaca niqiarajuhua, queraatia jiyaniijianucua niqiaranio.

**Caapiqui Pueyaso sequesano caminiujiuniaa
miishanojiniji pohuatasano**

11 ¹Na nuhuaji, janiyari tia shanacujutaja naajua niqitiosareeni, juhua natata niquishano. Janiyari naa sequesareeni:

—Quiarjia cutara quia quiaare Jerusalén tiacajinia. Tii nujuataja Pueyaso Secojoua tia quia shanacujusee quia shanacujutajata, orojiniji shipinishano shanohua jaanutaja catijajanio. Quia serojorejuhuaj puetunu Pueyaso

secojonuujuacajanaa tii. ²Maja cutaraari quia shanacujunu Secojoua tia carijiniacuma. Cunocujaaari taucuaa niqitiosaarucuaa tari. Pueyaso soojeaca taucuaaari Pueyaso saquiriojosano na tiacarano jiitianutaniya pueyaracaanu, cuarenta y dos raca cuara na shocojorejaatijia. ³Janiyari caapiqui cua saquiriojosano pueya jiyaronutaniya, janiyajiniji nojori pohuatanura pueya niqiara. Nojoriiri janiyajiniji pohuatanutaniya cuara shocojorejaatijia mil doscientos sesenta juca. Nojoriiri cocuaque toqueya cushiniutianiya taa pueya cushioquiaacuajani nojori taraajesacari.

⁴Cuno caapiqui janiyajiniji pohuataanaani, nojoriiri cuno caapiqui olivo naana, tariucuaaanu Pueyaso Rupaajinia pohuatahiyacuaajani. Naajuhua, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijajuhua. ⁵Tamoni jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na pueconura. Nojoriiri saaja naa cusojuanutaniya noo pojori, canapueete nojori miiniu paniya sesa juucuaajani. ⁶Nojori, janiyajiniji pohuataanaani, nojoriiri cumaaca jiitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhua, nojoriiri cumaaca jiitianutaniya mohuaca na jataniniuria nanacara. Nojoriiri cumaaca jiitianutaniyajuhua nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijionutaniya nojori panishacari. ⁷Nojori jaara janiyajiniji pohuatanu tucuatere, jiyacaritij, puequeetuuju raamaji tohuatariquiano pueresano sacuraatia Casaani, cunoori nojori paracaaniutianiya. Nojori shocotanutaniyaari. Naacujitij, nojori pueconutaniya socuaari. ⁸Nojori queteeri cuno puereetuuca niishishano tiaca nuucujinia pojoconutaniya, tee nojori Jiyaniijia mosaaquiaari niyacutesanojinia teetesanoajani. Cuno tiacaari miriqui jiyaniquishiya Sodomata, Egiptotanio. ⁹Naacujitij, jiuujianaraca juuca, socua niqiriyaatuu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyaari queraatia tiqiuyocua tiacajinijinio pueya, tamaatiuucua rupaaca pocujaca pueyajuhua, queraatia tamonu jiyacajinijinio pueyanio. Nojori paraari maja na shanacunu quiniutianiya nojori jamojosaanura. ¹⁰Puetunu mijiria quiniaajanaari shuquiritiutianiya, macunucua cuno caapiqui Pueyaso sequesano caminiujiuniaa quishacari. Pueyari jiyanoehua timiquionutaniya, naquiya nojori miitijaca puecoosaanuucua. Naaratej, mijiria quijiaacari tama na casaminiijijiaaja nareja niqitiojootoonutaniya nojori shuquiriniutia.

¹¹Naajaa, jiuujianaraca juuca, socua tamonu juuca cajiniocua nuhuaji, Pueyasoari nojori samiitianijiorohua. iNojoriiri na matusaquiij saneequaturuhua! Puetunu nojori niqiniiaajanaari jiyanoehua shiriqituri. ¹²Jiyacaritij, cuno caapiqui Jesucristojiniji pohuataanaari puereetuuca rupaa tojitiuri jiyocuaaanuji pocuaano. Naa nojori sequeriquiaari:

—iMiji nia tacatama!

iJiyacaritij, nojoriiri na paraa niqiara tacataquee cohujajinia jiyocuaaanura! ¹³Na paraa shootiasacari nojori, jiyacaritij, rijaari jiyanoehua jiuuquiujutiaree. Naa rija jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusonuuree. Cureeno pueyari jiyanoehua jiuujiateree Pueyasoocujaji. Nojoriiri jiyacari niishirii Jiyocuaaanu Quijaari seetanujuanaa Pueyaso cutara.

¹⁴Janiyari naa segundo naquiya miiniu niqitishaareejaanuhua, taa na nuhuaji na miishaanutaniyacuaajani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonesacari

¹⁵Séptimo Pueyaso seruuri na trompeta joneneere. Jiyacaritij, puereetuuca rupaacaari jiyocuaaanu tojishaaree. Naa sequeturiquiaari:

—iQuiarrijiani, pa Jiyaniijia Pueyasoori tari jitianutaniya puetunu jiyacua jiyaniijianucua jitiiasanojuanaa! iNojuajaari pa Jiyaniijia Cristota Jiyaniijianucua janaa quiniutianiya! iNojoricuajaari pueyaracaanu Jiyaniijiajanaa quiriquiano!

¹⁶Jiyacaritij, cuno veinticuatro niishijiaca jiyaniijianucua, shanohua cajitijinia cajituriquiaa Pueyaso tacojini, nojoriiri Pueyasoocua jacamatuee jiyanoohua na shuquiritianuta nojuaja. ¹⁷Naa sequeturee Pueyasoori:

—iPaacarasho canaa Jiyaniijiana! iQuiaari puetunu cumaacaracajanaa! iQuiaari quijijuhuanajaj! iQuiaari pueyaracaanu quijia! iQuiaari tari juhuacatecara quia cumaaca poonijioteree, Jiyaniijijanaa quia quiniuria pueyaracaanu! ¹⁸Cunora, puetunu jiyacua jiyaniijianucua janaaari juaaquiyoa. Naajaa, quiarrijaari quia juaashacari cutara. Quiarrijaari macunucua quia nequesoreenu juucajuhuj. Saniniuuja, quiaari pueyara quia sequesano caminiujianua pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaano, jiyaniijianucua, narejaca pueyano. Naajuhuj, quiaari jiya sesojuaca pueya shaajanutaniya.

¹⁹Jiyacarijuhuj, jiyocuaanu Pueyaso Secojoua tiari riataaaree. Janiyari Pueyaso Quishaquijianaa niquiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jyanootiaja, na tojiyashijiaca na saniitotajajuhuj. Jiyacaritij, miacanaari nunujuree. iJiyanoohua majacureeri! iPueereatej, jiyanoohua cojuata! iRijiaari jiyacari jiuuquiutiaree! iJiyanoohua queraatia miacanaajaa shiniitijuaacaari juhua maru toterejuhuaj! iJiyanoohua puereetaari quiriquiaa!

Miriqui pohuatasano maajijini, puereetuca Naaquerujinijijuhuj, juhua cohuaniquia niquishano

12 ¹Na nuhuaji, pueya jiuujiatenura, casaari jiya cajiniocua niquishaaree. Maajiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nujuariquiaari. Doce riyari na nacaque quiriquiaa. ²Cuno maajiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. ³Jiyacaritij, janiyari socua tamonu casaa niquitishaaree jiya cajiniocua. iPueereetuca Naaqueruuri quiriquiaa, naatuhua! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracano. Jiyaniijianucua shipinijosano nacaqueya niquitacoriquiaari na siete nacacaacua. ⁴Cuno naatuhua Naaqueruuri quera na cajiniocua riyajinijinio nocua rerecoree jiyocuaanu jia na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. iNa sashiriquiaari cuara raara, mueya na mianura jaara rasaare! ⁵Maajiri cayaniyojua raree. Nojuajaari puetunu mijiria quijia pueyapuejanaa Jiyaniijijanaa quiriquiano. Nojuajaari pueyaracaanu na maca meturiquiano, na tojiyashijiaca na piyotajara. Mueyari na nucua jaariutiasaaree Naaqueruucua. Pueyasoori na shuriucua na ririi, tii na cajitiniuria, Jiyaniijia quiriquianoni. ⁶Maajiri saniniuuja cariquia jiyajinia mashirii, tee Pueyaso jeenucuaquiaari tari nocuaji na quijiaracuajani, tii na mianuutesaanurajuhuj, cuara shocojorejaatijia mil dosciento sesenta juuca.

⁷Na nuhuaji, janiyari Pueyaso seya jiyaniijia Miguel niquiri narta Pueyaso seyatani, cuno naatuhua Naaquerujuhuj puetunu na seyatajanaa. Puetunu nojorijianaari puereeta quiaquetooriquiaa jiyocuaanu. Cuno Naaqueruuri na seyata jiyanoohua quiaqueriquiaa Pueyaso seya juucua. ⁸Naajaa, majaari nojori naata quiriquiaa Pueyaso seya shocotanu. Pueyaso seya paracaaniucua jiyanoohua nojori, majaari quiqui quiniu quiriquiaa socua nojoriria jiyocuaanu. ⁹Naacuajitij,

cuno Naaqueruuri jiyocuaanu jia taanusaaree. Nojuacuajaari cuno tariucuaanu Soconu*, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰Jiyacaritij, janiyari jiyocuaanu quijia queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—iPueyasoori parta Pueyaso pueyacuara Saquiriojotana jateree tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarrija tohuateenutaniya puetunu na sequesanojuanaa na jiyanooshano pueyara. iNojuajaari maninia jitianutaniya pajaniya, jiyanoohua na cumaacata! iPaa Jiyaniijia Cristoori tari jiyatesaaree Jiyaniijijanaa na quiniuria! Naa na miishaanuni, cunoori na Que saquiriojosano na quiniucua. ¹¹iPueyaso Borrego na quiniucua, nojuajaari na nanaca shootequiaari, tojetaarucua janaa jiyanooshano pa quiniuria sesa pa miishanojiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniucua Jesucristoocua. Nojoriiri na shocotaquiaarijanaa, nojori pohuatanucua Jesucristoocua nojori tiuuniujini. Nojoriiri maja na puerenu quijia na mosaanura. Nojoriiri seetanujuanaa juhujaniya tama na cuaqueyajaaja panitiaquiaari nojori mosaanura. ¹²iNaaratej, jiyocuaanu nuaa, shuquiriaatia quia quiri! iNaa Sesaaca jatasaanuucuatej, nia timiquiore jiyocuaanu quijiacanaa! iNajaniya saniniuuja, jiyacua quijiacanaa, shoniniacu caminiajia quijiacano, jiyanoohua nia taraajere! iSesaaca niishishacari maja puera Pueyaso tarishiniu quiniutianiya na saniitounura nojuaja, nojuajaari niaacua roseyarucua jiyanoohua na juaaniutia!

¹³Cuno puereeta niquishano Naaqueru niishishacari nojuaja tari jatasaaree jiyocua, nojuajaari cuno mueya nucua neteyojotanu coteeree na mianura juucua. ¹⁴Cuno maajiri querajaa puereetuca nesu niquitiosaaree saaja, juhua jiyanoohua puereetuca surohua miooru nesu. Cuno nesuta, maajiri na quiquojiniara jaaree cariquia jiyajinia, tucuaanu cuno Naaqueruucua. Tii mianuutesaanutaniya pueyaracaanu cuara na shocojorejaatijia jiuujianaraca marijia, socua seis racano. ¹⁵Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. ¹⁷Naaqueruuri jiyamitia maajicua macaari jiyanoohua. Quiaareeri maajicua jianio supueno pueyata miaquetoojonura. Cuno pojoricuajaari Pueyaso rootasano tojitiajaca, canapete Jesucristoocua nojori tiuuniu seetaashijiacuajani.

¹⁸Naaqueruuri shoniniacu caminia casaqueyaji nujuasee.

Caapiqui puereeta niquishano Casaajiniji pohuatasano

13 ¹Na nuhuaji, janiyari puereeta niquishano Casaa niquiri shoniniacu caminiajiniji tacaanoni. Siete nacacaraca quiriquiaari, diez nacajaaracano. Puetunu na diez nacajaacua jitiariquiaa jiyaniijianucua shipinijosano nacaqueyari. Puetunu na nacacaacua janaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniucua. ²Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na nihuacaari juhua oso* nihuaca niquishano quiriquiaa, tucucocua juashococuaraca. Na rupaari juhua juuru sare rupaa quiriquiaajuhuj. Cuno tari

cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitijunijaaaja na cajitiriiri jiyaniijajanaa na quiniuria jiyacua. ³Cuno puereeta niquishano Casaa siete nacacaracani, niquiriyatu na nacacajinijiniori pishano quiriquiaa na mosaanura juucua. ¡Cuno puereetuca piyashi na nacaacua quiriquiaani, saaja cushiriiquiri! Puetunu mijiria quiniaa pueyajanaari jiuujiatere na cushiriishacariuhua. Cunora, puetunu nojorijianaari cuno puereeta Casaa tojiijacara quiriri. ⁴Jiyacaritij, mijiria quiniaa pueyari cuno naatuhuana Naaqueruucuaa jacamaturee juhua Pueyasooacara, cuno puereeta niquishano Casaa na jiyatenuucua nojori jiyaniijajanaa na quiniuria. Pueyari cuno siete nacacaraca puereeta niquishano Casaacuaa jacamatureejuhua. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoojonura? Shaaqui.

⁵Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasooacara, Pueyaso na rerequetenurajuhua. Naa miiriiri na jiyaniishacari nojuajaari socua maninia quijia Pueyasojiniji. Naajaa, nojuajaari jiyaniijia jiyatesaaree saaja cuarenta y dos racara. ⁶Naacuajitij, cuno puereeta niquishano Casaari Pueyaso rerequetenu coteere. Pueyasooacara rimiaaquereeri. Jesuucua tiuujia pueya sesacareejaariuhua, jiyocuacaanu Pueyaso quiquionio. ⁷Mijiria quijia Pueyaso saquiriojosano pueya paracaatishaareejaariuhua. Cumaquishaareejaariuhua Pueyaso pueya na shocotanura. Cumaaca niquitiosaareejaariuhua jiyaniijajanaa na quiniuria, puetunu tamaatiuucua pueyapuejanaa na jitianura, puetunu tiqiyocua tiacajinijinio pueyajanaa, puetunu tamaatia rupaaca pocuajaca pueyajuhua, puetunu tamonu jiyacajinijajanaa quijiacanio. ⁸Naacuajitij, puetunu mijiria quijia pueyajanaari cuno puereeta niquishano Casaacuaa jacamaturee na shuquiritianura nojuaja, nojori pueyaso na quiniuucua. Cuno nojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaa quiquiaari Borrego Niquiojua jitianasano naajionejinia, cante pocuara mosaquiaricuaajani. Pueyaso muerasu sesaca cutaraari cuno naajionejinia naajiotasaaquiaari jiya shipinishaacarijiyojua, pueyaracaanu rishijia pa quiniuria.

⁹Cante numaaracani, nojuaja cuaara tojiiri nio: ¹⁰“Cante Pueyaso jiyatesano quiasocoriquianoni, nojuajaari seetanujanaa quiasano pueyano quiniutianiya. Naajuhua, cante nijiniaquetucuaa mueruuta mosocoriquianoni, seetanujanaa naa mosaanutaniyari”. Naaratej, Pueyaso pueya cuaara puetunu casaajanaa rejeretajaca quiri, seetanujanaa nojori tiushacari Pueyasooacara.

¹¹Na nuhuaji, janiyari tamonu puereeta niquishano Casaa niquiriji jiyajiniji muetaanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. ¹²Jiyano hua cumaacaraca quiriquiaari, juhua narta puereeta niquishano Casaa, teyano naca pishanotucuaa cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasooacara, nojori timitianura na naca pishano cushiriinohua puereeta niquishano Casaa. ¹³Naajuhua, nojuajaari na cumaacata miiri jiyajeneta casaa pueya jiuujiatenura nocuaji. Jiyano hua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. ¹⁴Naa na cumaacata na miiniuucua cuno na naca cushiriinohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno

siete nacacaraca puereeta niquishano Casaari quiriquiaa, teyante na nacajinia mueruuta pishano na quishacari samiitiarohua saajacuajani. ¹⁵Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocuajara na quiniuria, nocuara jacamatiuyashijiaa na puecootenurajuhua. ¹⁶Naajuhua, cuno caapiqui nacajaraca puereeta niquishano Casaari na pueya sequere nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojiyaquishoo pueyacu, tojishano pueyacu, casamiriaca pueyacu, casamijiunucua pueyacu, tama nojoriria poonijionuuuacajaaja pueyacuajuhua, poonijioesano pueyacuano. ¹⁷Jiyacaritij, canapuee cuno puereeta niquishano Casaa sesa naajiotasano jitianaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhua, majaari nojori naata na casami niquitiojonu quiriquiaa na cumaneecata. Pueya jaara cuno puereeta niquishano Casaa sesa jitianaquiri naajiotasano na cuaqueyacu, na naata na sesa número* jitianu nocua naajiotasano.

¹⁸Nio niishishaanura maninia, jiyano hua niishitijaari panishiya cutara. Niishijia pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasana niaacuajuhua!

Borrego Niquiojua cojiniaajiniji pohuatasano

14 ¹Na nuhuaji, janiyari Borrego Niquiojua niquiriini, Sión tuhananuucua nujaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijanaa, na Que Pueyaso sesajuhua. ²Na nuhuaji, janiyari casaa tojirii juhua sararjua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuyanojuhuaj. ³Cua tojishanoori quiarinio jaaquequejosano quiriquiaa. Jaaquequenuaari Pueyaso cajitii tacoji jaaquequenuuriquiaa, cuno cuatro saminio casaa tacojijuhua, cuno veinticuatro niishijia jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishini nojori jaaquequejonurajuhua. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno nojoricuajajari mijiria quiniaajinijinio saquiriojosaaquiaari Pueyaso pueya nojori quiniuria. ⁴Nojoriiri tojetaarucujanaa maaji numuetuqueyashijiaa quiquiaari, saaja pocuaji Tacunaacua jiaatijaca nojori quiniuucua. Naaratej, tiqiyocua Borrego Niquiojua rucanejosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojua nojori quiniuriajuhuaj. Nojoriiri socua Pueyaso timitiasano pueya puetunu Pueyaso saquiriojosano pueyajinijiojuanaa, ta pa shuquiritia shushajanaa pa carojosano pa nataujinijicuaani. ⁵Nojoriiri tojetaarucujanaa sapojonu niishiyashijiaa quiquiaari, tojetaarucujanaa sesa miyashijiaa nojori quiniuucua.

Jiuujianaraca Pueyaso seya pohuatasano

⁶Na nuhuaji, janiyari tamonu Pueyaso seru niquiriji jiya cajiniocua jaanoni. Jaariquiaari mijiria quijia pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapueyajanaa, puetunu tamaatia rupaaca pocuajaca pueyarajanaajuhua, puetunu tiqiyocua tiacajinia quijia pueyarajanaano. Na pohuatasanoori seetanu rupajanaa pueyaracaanura. ⁷Pueyaso seruuri mijiria quiniaa pueyacu nacariquiaa naatej:

—iPueyaso puerejaca nia quiriquia! iNojuaja nia maninuhuaqueetare! iQuiarijiaari na nequesoreesacari pueya! iNocua nia mojuquetacore nia shuquiritianura nojuaja! iNojuacuajaari jiyocuacaanu shipinina, nio jiya, puereetuca shoniniacu caminiajuhuaj, puetunu samocua nacaca pacartacojuacajanaano!

⁸Jiyacaritij, tamonu Pueyaso seruuri narta Pueyaso seru nuhuajimiaajuhuj. Naa miriqui sequeriquiaa Roma tiacajiniijiiri:

—iBabilonia* tiaca tari saniitioshiya! iCuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojioja, sacuaraatia nojori miiniuria juhua nojuajuhuj. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miini panishanojuaja miijiacara quiquiaari, jiyanojua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

⁹Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuj. Mijiria quiniaa pueyacuacua nacaree naari:

—iJyanohua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojuquetacojua juhua Pueyasocuarani! iJyanohua puereeta quiniutianiyari noo pojorirajuhuj, canapuate juhua na naca cushiriinohua niquishano shipinishano Casaacuara jacamatujuacani! iNaajuhuj, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj!

¹⁰iPueyasoori puetunu cuno pueyajanaa saniitionutaniya jyanohua na juaaniutia! iMajaari quenaaja Pueyaso jiuujiaani quiniutianiyari nojori! iPueyaso seya niquiara, Borrego Niquiojua niquiarajuhuj, nojoriiri pueyaracaanu naquiya miishaanutaniya manitia, azufretanio! ¹¹iNaa Pueyaso miitiasacari nojoritij, najacaari pueyaracaanu nojonutaniya! iMajaari quenaaja nojori samaraatasaanu quiniutianiyari juuca, niucuanio! iNaquiya miiniuari naa nojori miitianutaniya pueyaracaanu! iNaa miishaanutaniyari cuno pojori, canapuate na naca pishano cushiriinohua puereeta niquishano Casaacuara jacamatujuaca juhua Pueyasocuarani, juhua nojuaja niquishano shipinishano Casaacuarajuhuj! iNaa miishaanutaniyajaariuhuj noo pojori, canapuate cuno puereeta niquishano Casaa sesa naajiotaniniutianiya tama nocuajajaani!

¹²Cunora, Pueyaso saquiriojosano pueyani, canapuate na rootasano tojtiajacani, Jesuucua tiuuniu tarinitiaashijiacuhuj, nojori cuara juhuajaniya rejeretaara naquiya nojori miishacari.

¹³Jiyacaritij, janiyari rupaa tojirii jiyocuacaanu nio naa cua sequeyanoni:

—Nio quia naajiotare: “iQuiarijiani, jyanohua shuquiriaatia quijiaa cutaraari cuno macunucua, canapuate tariucua Jiyaniijia Jesucristoocua tiuujiaa cusonuunutaniyani!” Pueyaso Sohuanuuri naa sequeyajuhuj: “iTaaquiririni! Nojoriiri samaateya, pueyaracaanu na Jiyaniijia na poonijionuunu nuhuaji. Maninia nojori miishanocuaajaari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijia shipinishano nacaque cushitariquiaari, orojiniji shipinishano. Nataacuaca na senootajara shamatucaja jacatunee mueruu mueturiquiaari. ¹⁵Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jyanohuari. Naa na sequereeri:

—iQuia mueruuta quia canuujure, nataacuaca quia senoonura! iJiyajinia nataacuacacuaajaari tari noshuriujua! iCuaara quiarijia senoosaria!

¹⁶Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

¹⁷Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatucaja jacatunee mueruu mueturiquiaajuhuj. ¹⁸Na nuhuaji, socua tamonu Pueyaso seruuri tohuatamaa Pueyasocuaracatijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamatucaja mueruu muetyanoocua. Na sequereeri:

—iQuia shamatucaja mueruuta uva quia carojotare, jiyajinia moritiaconuni! iTari noshuriujacuaja!

¹⁹Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jyanohua na juaaniutia. Cuno uvani, nojoriiri Pueyaso ruuretajaca pueyacuaja. ²⁰Cuno uvaari rapijiosaree tucuaaanu naata tiacajiniji. Uva rapijosaquiji, nanacaari tojetaarucujanaa jaateriquiaa juhua mohuaca. Jyanohua nanaca quiniucua, cabollohua rupaacuma puecariquiaari. Pueyaso tojiyashijia pueya nanacaari jyanohua tucuaaanu jaatere juhua moo. Tresciento kilómetro* jaatereeri.

Siete Pueyaso seya, siete naquiya miitiaja na mueetacosacari

15 ¹Na nuhuaji, janiyari jiya cajiniocua socua niquitishaareeni, cua niishiniuria taa mijiria quiniaa saniitosaanu tucuatasaanutaniyani. Cua niquishanoori jyanohua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujanaa.

²Janiyari casaa niquiriijiaaniuhuj juhua puereetuca caminia motiijiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casaajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpa taquinionuuriquiaa. ³Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jyanohua maninia, nocuaji jiuujiatasano. iQuiaari seetanujanaa puetunu cumaacaracajanaa! Casaa quia miishacari, quiaari maninia na miijiaa. Majaari quenaaja quia jiyajenenu. Quiaacuajaari puetunu jiyacajinia quijiaa pueya Jiyaniijiajanaa. ⁴iQuiaari pueresano, Jiyaniijianaa! iQuiaari tojetaarucujanaa maninuhuaqueetasano seetanujanaa! iSaaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuj.

⁵Naa cua tojiniu nuhuajitij, janiyari jiyocuacaanu Pueyaso Quishaquijianaa niquiri riateyanoni, tee cuniqui seetanu Pueyaso rupajanaa racatasano quiyacuajani. ⁶Cua niquishacari, cuno siete Pueyaso seyari Pueyaso Quishaquijianaa tohuareetariquiaa, canapuate cuno siete naquiya miitiaja patootariquiaacuajani. Nojoriiri tojetaarucujanaa cohuaja linojiniji* toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteri-

quiaa. ⁷Jiyacaritij, niquiriyatu cuno cuatro saminio casaajiniiniori miacojua niqutiojoree puetunu cuno siete Pueyaso seyajanaa. Cuno miacojuaari orojiniji shipinijosano quiriquiaa. Pueyaracaanu rishijia Pueyaso juaaquiaca mishinijosano quiriquiaari. ⁸Jiyacaritij, Pueyaso Quishaquijianaari maatia najacata mishiquimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitajaca pueya. Cuno najacaari Pueyaso shacantuuca cumaacajiniji quiriquiaa, naa na saniitiosacari na paraa.

Saniitionujiniji pohuatasano

16 ¹Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—iNia siete miacojuajiniji Pueyaso juaaquiaca nia taroosee jiyocua!

²Niquiriyatu Pueyaso seruuri juhuacatecara coteeree. Quiaaereri. Na miacojuajiniji jaapuesee jiyocuaari. Jiyacaritij, jiyanhua nootuuca sapueyari pueyacia supueee. Noo pueyacia supueeri, canapueete nocua naajiotasano jiitiriquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhua. Jiyanhua nootujuaaca sapueyari quiriquiaa.

³Segundo Pueyaso seruuri na miacojuajiniji Pueyaso juaaquiaca jaapuesee puereetuuca shoniacu caminiainia. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniacu caminiainia quijia casaajanaari cusonuuree.

⁴Tercero Pueyaso seruuri miacojuajiniji Pueyaso juaaquiaca jaapuesee puetunu moocuajinijanaa, puetunu samocua nacaca pacartacojuacajinijanaa. Jiyacaritij, nanacara jataquee puetunujanaaari. ⁵Cuno nuhuaji, janiyari mohuaca camaru Pueyaso seru tojirii na Pueyaso sequyanoni:

—Pueyasonaa, quiaari quijiajuhuanajaj. Majaari quia supueni quiquiaari. Quiaari tojetaarucujanaa maninia. Naa quia miitiasacari quia tojtiaashijiacatej, quiaari seetanujanaa maninia namirii nojori. ⁶Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujunaa nanacanio. Quiarjia saniniuujia, naa miijiaa nojori quiniuucatej, quiaari nojori raatejoree nanaca. iManiacuaja Jiyaniijanaa!

⁷Jiyacaritij, janiyari Pueyasocua catijaja casaa tojirii juhua pueyano pocuaanoni. Naa sequeriquiaa Pueyasoari: —Taaquiririni Jiyaniijanaa, puetunu cumaacaracajanaa Pueyasonaa. Quiaacuajaari maninia saniitioree quia tojyashijiaa, taa quia sequequiaari tariucuaanu nojoricuajani, quiaari quia tojyashijiaa saniitionutaniya. Quiaari seetanujanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jyanohua naseecara quiqui, pueya na catijianura juhua mani. ⁹Naa pananu januucua jyanohua nasaatiatej, pueyari jyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucatej. Majaari quenaaja nojori pishiniu quiri sesa nojori miiniuujiniji, nojori tacatonuhuaa noojia Pueyasocua, nojori jyanijiana nojori jiyatenura Pueyaso. Pueyaso rerequeturee saajaari.

¹⁰Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinohua puereeta niquishano Casaa cajishaqui na jaapuesee, tee cuniqui juhua jyanijianaa na cajiriquiaacuajani. iJiyacaritij, puetunu na jittiasano jyacajanaari ninishiquiria quiqui! Cunora, na pueyari na niti saaquiriquiaa jyanohua nooeta naquiya na

miquiosacari. ¹¹Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniuujiniji. Nojori nootunuucua, nojoriiri jiyocuaanu quijia Pueyaso sesacaree saaja, nootujuaaca sapueyaraca nojori quiniuucujuhua.

¹²Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuuca Eufrates moojinia. Moori joojequetaquee jiya pajamaji niriquiano jyanijianucua niuutijara.

¹³Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuareetariquiaa juhua cohuaniquia niquishano naatuhua Naaqueru rupaamaji. Tohuareetariquiaaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaa miijiria quiniaa pueya sapojoriquiaacuaja, nojori tojiniuria na naca pishano cushiriinohua puereeta niquishano Casaa. ¹⁴Cuno jiuujianaraca samaruhuari cumaacaraca quiriquiaa, na cumaacata nojori miinuria nocuaji jiuujiatasano casaa, pueya tiuuniuria nojori sequesanoocua. Nojoriiri naa miiriquiaatej, puetunu miijiria jyanijianucujanaa nojori rerejotenura. Jyanijianucuaari naa rerejotesaaree nojori miaquetojonura puetunu cumaacaracajanaa quijia Pueyasota. Pueyasocujaaari tariucuaanu niishiriojquiaari naa cuno juuca na miaquetojonura nojoritia. Naa paniquiaaricujaaari na paraa na pucoonura.

¹⁵Jiyacaritij, janiyari pa Jyanijianaa tojirii naa sequyanoni:

—Cua tojtiaare cua pueyanaa. Janiyari canashiyajui tiuquiniutianihuani nia niishiyaquishacari. Janiyari naa niaacua tiuquiniutianihuani taa nohuasejotia tiuquiquiaa casami nohuasenuucuaani, juhujaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua caraatia juhua juhuasunucua quiri cua niquraari.

¹⁶Cua Jyanijia sequesano cua tojiniu nuhuaji, janiyari cuno samaruhua niquiri miijiria jyanijianucua rerejoteyanoni. Hebreo rupaajinia, nojori rerejosaqui sesaari, “Armagedón”.

¹⁷Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuaanu Pueyaso Quishaquijianaa Jyanijia cajitujiniji, janiyari rupaa tojirii na nacaanoni:

—iTari miishaaree puetunujanaacuaja!

¹⁸Jiyacaritij, miacanaari nunujuree. iJyanohua majacureeri! Cojuataari quiriquiaa puereeta. Rijiaari tojetaarucujanaa jyanohua jiuuquijutiaree. Pueyano shipinishaanujiniji, majaari naa rijia jiuuquijutianu quijia juhua nio rijia. ¹⁹iNaa rijia jiuuquijutianuucua jyanohuatej, cuno puereetuuca tiacaari neequeresetaquee! Jiuujianaracaa raquitijiquiri. Puetunu jiyacajinia tiacajanaari niyarequetaree. Jiyacaritij, Pueyasoari cuno puereetuuca Babilonia tiaca saniitioree, taa tariucuaanu na niishiriojquiaari cuno juuca na saniitionuracuajani. iJyanohua na juaaniutia na saniitioreeri! Niya sequeshiya Babilonia tiacatani, cunoori Roma tiacacuaja.

²⁰Jiyacarijuhuaj, puetunu shoniacu caminiainia jiya tucuaatijacajanaari shaajequee, puetunu tuhananuhuaanania. ²¹Naajuhua, jiyocuaanu jyanohua puereetujuaaca miacanajaa shiniitujiaacaari totere pueyacia. iNoojiaqueyari jyanohua niiquia quiriquiaa; cuarenta kilo! Miijiria quiniaa pueyari Pueyaso sesacaree, naa nojoricua na totinijianuucua shiniitujiaaca miacanajaatej.

Miriqi pohuatasano Roma tiacajiniji, juhua paanatu

17 ¹Na nuhuaji, cucua nimiaari niquiriyatu cuno siete Pueyaso seyajinijinio, canapueete siete miacojua patootariquiaacuajani. Cua sequeseeri:

—Miji quia nimia. Janiya quia niqutiniutianiyani taa Pueyaso saniitionutaniya cuno Paanatum, puetunu jiyajinia mohuacaacuajanaa cajiyan. ²Mijiria jiyaniijianucuaari cuno Maaji numuetucujuuaca. Sacuaraatia cuno Paanatu niishitiojosanota, nojuajaari juhua mashaasequetojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhua.

³Pueyaso seru niqutiniuria janiya na niqutiniu panishano, nojuajaari cua sohanu jiyataare cariquia jiyajinia. Janiyari tii niqushii Maajini, naatuhana puereeta niquishano Casaa nijinia cajiyan. Queraatia sesacaari cuno naatuhana Casaa cuaqueyacia quiriqiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaraari quiriqiaa, diez tuhujaaracanio. ⁴Cuno Maajiri shanohua toqueya cushiriquiaa, naatuque, shaarunquejuhuaj, juhua jiyaniijianucua cushishano. Queraatia shanohua maniniushitija casa cushitariquiaari: orojiniji shipinijosano casa, shanohua saajiniji shipinijosano tiujiajuhuaj, noturu shipinijosano saajiniji tiujiaunio. Orojiniji shipinijosano miacojua mueetariquiaari. Mishaja quiriqiaari puetunu sacuaraatia na miiijosano casaatajanaa, numuetucujusaanu porocua na quiniucua. ⁵Na sesaari miriqui naajiotasano quiriqiaa na jiniji. Naa naajiotasano quiriqiaari: “Janiyari puereetuca Babilonia tiacani. Janiyari paanatum nucuani, puetunu mijiria sacuaraatia miishanojuanaa coretanijojua nucuano”. ⁶Maninia cua niquishacari, cuno Paanatuuri juhua mashaaseca quiriqiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuatanaa puecoonu porocua na quiniucua.

Naa cua niquishacari nojuajatej, janiyari jiyanojuaa jiuujiatereeni. ⁷Pueyaso seruuri jiyacari cua sequere:

—¿Casaara quia jiuujiateya nocuajini? Quiarijia quia pohuatereera quia niquishanojiniji. Cuno puereeta niquishano Casaa, siete nacacaranani, diez nacajaaracanio, Maaji cajitiya na nijiniani, puetunu cunujuanaari miriqui. ⁸Cuno puereeta Casaa quia niquishanoni, cunoori tariucuaaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuujia raamajiiri, seetanujuanaa puetunujuanaa na shaajasaanuhua cutara. Pueyaso ruuretajaca pueyari jiyanojuaa shiriquitiniutianiya nojori jaara cuno puereeta niquishano Casaa niqiri tacatehuano, teyanote tariucuaaanu quijia quiquiaaricuaajani, quiarijia saniniuujia majaari na quiniu. Jiya shipinijaquishacarijia, cuno pueya sesacuaajaari Pueyaso saquiriojosano pueya sesaca naajiotasaku naajiotasoo quiquiaari.

⁹Cante niishijiani, nojuaja cuaara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhananuhua, teyanocua cuno Paanatu cajiycuaajani. ¹⁰Cuno siete jiyaniijianucuaajininioni, cinco nojorijinjinioori tari shaajasaquiaari. Cuno caapiqui cureenoinijini, niquiriyatuuri jiyaniijia quiya quiarijia. Tamonuuri supueyojua. Nojuaja jaara cupuere, saaja rupaquijia rishiniutianiyari jiyaniijia na quishacari. ¹¹Cuno puereeta niquishano Casaa, teyanote tariucuaaanu quijia quiquiaaricuaajani, nojuajaari cuno cinco shaajasano jiyaniijianucuaajininio quiquiaaricuaaja. Majaari quiarijia na quiniu. Na nuhuaji supuenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

¹²Cuno diez nacajaa quia niquishanojaniuhua, cunoori diez jiyaniijianucuaranocuaaja. Nojoriiri cumaaca niqutiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. ¹³Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijajanaa cuno puereeta niquishano Casaa quiniuria. ¹⁴Nojoriiri Borrego Niquiojuata miaquetojonutaniya. Borrego

Niquiojuuari nojori shocotanutaniya saaja, seetanujuanaa Jiyaniijajanaa na quiniucua. iNojuajaari puetunu jiyaniijianucuaajanaa Jiyaniijia! Nata quiniaa pueyari Pueyaso saquiriojosano pueya, Neyanu tojitiyacatuhua.

¹⁵Pueyaso seruuri socua cua sequere:

—Quiaacuajaari cuno Paanatu niqiri puetunu mohuacaacuajanaa cajiyan. Cuno mohuacaacuajaari queraatia tiaca, tamaatiucua pueyapue, tamaatia rupaaca pocuajacajuahuaj, tamaatia jiyacajinia quijia pueyano. ¹⁶Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niqiniu paniaquiniutianiya tojetaarucuaajanaa. Na cartetunutaniyari. Tojetaarucuaajanaa juhuasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuua catijiatunutaniyari. ¹⁷Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatum, taa Pueyaso pania na miishaanuracuaajani. Naajuhua, Pueyasoori cuno diez jiyaniijianucua niishiriojonutaniya jatiqui. Naacuajitij, cuno jiyaniijianucuaari rojotoonutaniya nojori cuaara cumaquiiira cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesanutaniya taa na sequiquiaaricuaajani. ¹⁸Naajuhua, cuno Paanatu quia niquishanoni, nojuajaari cuno puereetuca Roma tiacacuaaja, miriqui sequesihya Babiloniatani. Nojuajaari puetunu mijiria jiyaniijianucuaajanaa tojitiqiaa nojuaja.

Babilonia tiaca catetanujiniji pohuatasano

18 ¹Naa Pueyaso seru niqutiniu nuhuaji janiyatej, janiyari socua tamonu Pueyaso seru niqiri jiyocuaaanuji roseyanoni. Jiyanojuaa cumaacaraari quiriqiaa. Na shacantuca cumaacari jiya cuhuatariqiaa. ²Jiyocuaaanuji na rupaa paaretaree jiyanojuaari. Seetanujuanaa miishocoriquiano na sequesano quiniucua, nojuajaari juhua tariucua miishano na nacatariqiaa:

—iTari saniitiosaree Babilonia tiaca! iJuhua niyarequetasareeri cuno puereetuca tiaca! Samaruhua quiquiora jatanishaaree quiarijia saniniuurijia. Naquiya quiquiora quiniutianiyajaariuhua, puetunu pueya soosano pueresano jaacuatujua casaajanaa quiquioranio. ³Puetunu jiyacajininiojuanaa pueyari sapojonuuasaquiaari Babilonia tiacajininio niishitiojosanota, juhuajaniya sacuaraatia miijiaca nojori quiniurajuhua, juhua mashaaseca. Naajuhua, jiyaca jiyaniijianucuaari Babilonia tiacajinia sacuaraatia miiijosano miiijioquaaajuahuaj, cuno paanatu shiniujuuniucua nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajininijianaa, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niqutiojonuujuaca pueyari jiyanojuaa cumaneecara pueya.

⁴Na nuhuaji, janiyari tamonu rupaa tojiri jiyocuaaanujini. Babilonia tiacajinia quiniaa Pueyaso pueya sequereeri:

—iCua muerasuna, cuno tiacajininiji nia quiojore, nia mariqui sesa miijiacara quirohuari, cuno sesa miijiaca nia cojinuucua! Nojorijiniji nia carajere, nia mariqui puetunu nojoritajanaa cojiritiasaare naquiya miiniuuri. Nojoricuaajaari quera saniitioshiya. ⁵Cuno tiacajinia sacuaraatia miishanoori puera jiyanojuaa caneyaree. Juhua tuhananuuri maashiyaree jiyocuaaanura. Pueyasocuaajaari sacuaraatia nojori miiijosano niishiya. Majaari socua tari na naata rejeretanu. ⁶Babilonia cuaara namishaaria taa naquiya na miiijioquaa tamasacuaani. iNojuaja cuaara saniitionu caminiujushaaria saniniuujia, sesa na miiniucua tamasa! Babiloniaari juhua pueyari raatejoquiaari sacuaraatia na niishishano, sesa miijiaca nojori quiniuria juhua nojuajuhua. Cunora, nojuaja cuaara puetunu Pueyaso juaaquiacajanaa raatesaaria, tama na suhuocojinijajaja mishinshanoni. ⁷Naatej, taa tama na cuaqueyajaaja na shuquiritiquiaa sacuaraatia na miishacarcuaani, saniniuujia

cuaara naa jiyanhua miitiasaariajuhuaj. iJiyanhua tama na cuaqueyajaaja timitiaja na quiniuucujahuaj, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiriaatiani, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua taraajenu quiniutianiya”.⁸ Cunora, niquiriyatu juucajiniija, cuno Paanatuuri jiyanhua taraatia miitiasaanutaniya. Jiyacaritij, cusunuuuri quiniutianiya, naquiya miiniu, miaajenujuhuaj. Jiyacari catijiatasaanutaniyaariuhuaaj. Jiyanhua cumaacaraca Jiyaniijia Pueyaso quiniuucua, nojuajaari naa saniitionutaniya cuno Paanatu.

⁹Mijiria jiyaniijianucuaari sacuaraatia miiniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriiri jiyanhua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya.¹⁰ Nojoriiri na puerenuta na shootianutaniya tucuaaanuji, nojori mariqui saniitiosaarejaariuhuaaj. Nojoriiri jiyacari naa sequenutaniya Babilonia tiaca: —iJuhuej! iQuiaa taraatia miishiya tiaca maniniuniaa! iQuiaari jiyanhua cumaacaraca quijia juucua Babilonianaa! iQuiaari canashiyaquiji saniitiosaaree!

¹¹Puetunu jiyacajiniijanaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriiri jiyanhua taraatia quiniutianiya nojori niishishacari, nojoriitucua tee na casami niqutiojore na cumaneecarani.¹² Tucuaaanuji Babilonia catijianiara nojori nitiasano casami quijiaari nio: oro, plata, jiyanhua panishano saijiuhuaaj, noturu shipinijosano sainio. Nitiasaaquiaaariuhuaa maniniuqui toqueya linojiniji*, sedajiniji* toqueya, shaaruque toqueyajuhaaj, juhua jiyaniijia cushishano, naatuque toqueyano. Nitiasaaquiaaariuhuaa puetunu tamaatia shanhua jaanujua juhuana raquiquia, elefante quiajajiniji shipinijosano casamijiuhaaj, shanhua naanajiniji shipinijosano casaminio. Nitiasaaquiaaariuhuaa broncejiniji* shipinijosano casami, cumueeca casaajiniji shipinijosano casamijiuhaaj, shanhua mármol saajiajiniji shipinijosano casaminio.¹³ Naajuhuaaj, nio shanhua jaanujua casami: canela, muesu nunacuhua, catijasocoriquiano shanhua jaanujua casaa, mirrajuhuaaj, cuaqueyacia shuquiujiutiasano shanhua jaanutajano. Nitiasaaquiaaariuhuaa jereeca uva caaca, shiyocua, maninia cashojuajuhuaaj, trigo jajaunio. Nitiasaaquiaaariuhuaa casami niyotesano seya, borregohua, caballohua, caballohua jayotasocoriquiano shipinijosano casaano, cumaneecara niqutiojosocoriquiano pueyajuhaaj seya nojori quiniuria.¹⁴ Jiyacaritij, Babilonia tiacaari naa sequesaanutaniya:

—iMajaari socua quia mioonu quiniutianiya jiyanhua quia maniniucasano naana jajau, jiyanhua quioojia jiaatiasano nocuani! iPuetunu quia timitiasano casaajanaari maja tari na quiniu quiniutianiya quiara, shanhua niquishano casami, jiyanhua cumaneecata quia masesano casaminio!

¹⁵Puetunu cuno casami niqutiojonaa pueyajanaari jiyanhua casamiriaca quia Babilonia tiacajinia quiniaa masejonuucua nojori casami. Maja nojori saniitiosaanurajuhuaaj, cuno pojoriiri tucuaaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

¹⁶—iJuhuej! iBabiloniaari tiaca maniniu quijia juucua! Jiyanhua shanhua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanhua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijosano saitiajuhuaj, shanhua niquishano saitanio.¹⁷ iJiyanhua queraatia puetunu na jiitiasano casamijianaari canashiyaquiji catijiasaaree juhua sohanatuu!

Puetunu pueyajanaa, canapueete shoniniacu caminiajinia poonijionaa na cumaneecaracujani, nojoriiri tucuaaanuji shootiariquiaa Babilonia tiaca catetasacari. Naa shootiatuquiaaariuhua casami jaqueroojuaca tamaquicua tiaca tacatajiniiaqueya, rucoona pueya, buquejinia poonijionaa pueyajuhuaaj, nojori camarucuanio. Puetunu cuno pojoriijianaari tucuaaanuji shootiariquiaa Babilonia tiaca catetasacari.¹⁸ Nojori niquishacari najaca nujuano jiya cajiniocua, nojoriiri naa sariyocuatere:

—¿Socua tamonu tiacateeri quia juhua cuno Babilonia tiacajuhuaaj? iShaaqui!

¹⁹Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuatere:

—iJuhuej! iBabiloniaari tiaca maniniu quijia juucua! iPuetunu shoniniacu caminiajinia buque jiitianaajanaari jiyanhua casamiriaca quia, jiyanhua casamiriaca Babilonia quiniuucua! iQuiarijia saniniuujia, canashiyaquiji puetunujuaanaari shaajasaaree!

²⁰Jiyacaritij, Pueyaso seruuri naa nacaree:

—iNia shuquiriri, jiyocuaaanu quijiacanaa! iBabilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhuaaj, Pueyaso sequesano caminiujiuniaano! iPueyasocuaajari niaacua namirii Babilonia!

²¹Jiyacaritij, cumueeca Pueyaso seruuri jiyanhua puereetucua saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequereeri:

—iTaa cua jatasano saajia shaajamaa shoniniacu caminia queronijiniacuaani, quiaari naa shaajasaanutaniya canashiyaquijiuhuaaj, Babilonia tiacanaa! iMajaari socua quia niquishaanu quiniutianiya!²² iQuia nuucuaari tojetaarucujanaa sanaaca quiniutianiya! iMajaari arpa taquiniojonu tojishaanu quiniutianiya socua, turequenaco jonenenuunujuhuaaj, trompeta jonenenuunuo! iPuetunu tamaatia poonijosano niishijiaa juaashiquiaraca pueyajanaari shaajasaanutaniyajuhaaj! iMajaari quenaaja niquiriyatu cureenu quiniutianiya quia quishaqui! iNaajuhuaaj, majaari socua riiquiniunu tojishaanu quiniutianiya!²³ iMajaari quenaaja niquiriyatu samaritiu niquishaanu quiniutianiya noshiano quia quishaqui! iNaajuhuaaj, majaari camishacari queranacunuunu cojuatunenu tojishaanu quiniutianiya socua! iQuiaari naa saniitiosaareeqij, jiyanhua cumaacaraca quia casami niqutiojonaa pueya quiniuucua puetunu jiyacajiniijanaa! iNaajuhuaaj, quiaari puetunu jiyacajinia quijiaa pueyajanaa shimiojona, sapojoso nojori quiniuria puetunu sacuaraatia casaa quia miijosanotajanaa!²⁴ iQuiarijia saniniuujia, quiocua tiutiashiyari pueyara Pueyaso sequesano caminiujiuniaa puecoosaanu, Pueyaso saquiriojosano pueya puecoosaanujuhuaaj, puetunu jiyacajiniijanaa pueya puecoosaanunio!

19¹Naa cua tojinu nuhuajitij, janiyari jiyocuaaanu tojirii queraatia rupaacani. Naa sequeturiquiaa jiyanhuaari:

—iJiyanhua maninia pa Pueyaso! iNojuaja pa shuquiritaria! iNojuacuaajari pa Jiyanoojia! iNojuajaari jiyanhua shacantuucua, tojetaarucujanaa maninia miijia na quiniuucua! iPuetunu cumaacaracajariuhuaaj!² iManinia na niishiniuucua puetunu cuno Paanatu miishano sacuaraatiajanaa, nojuajaari maninia na saniitioree! iCuno Paanatuuri jiyacua quijiaa pueya sesoquiaari tojetaarucujanaa, sacuaraatia na miijosano na niishitiosanota! iPueyasoori cunora na saniitioree! iNaajuhuaaj, Babilonia puecoonuucua Pueyaso tojitiajaca pueya, Pueyasoori na namirijiuhuaaj!

³Jiyocuaaanuji rupaaca cua tojishanoni, nojoriiri naa sequerohuacuhuaaj:

—iJiyanhua maninia pa Pueyaso! iNojuaja pa timitariquia pueyaracaanu! iPueyaracaanu cuno

Paanatu saniitosacari, majaari na najaca turetano quiniutianiya quenaaja!

⁴Cuno veinticuatro niishijiaca jiyaniijianucua, cuno cuatro saminio casaajuhua, nojoriiri jiyacari jiyocuara jacamatuee Pueyasocuara. Nojoriiri naa timitiaree Pueyaso, cante na shacantuca cumaacajinia cajiriquiaacuajani. Nojoriiri naa na sequeturiquiaa:

—iCuaara naa quiiriatej! iPa Jiyaniijia cuaara timitiasaaria pueyaracaanu!

⁵Jiyacaritij, tamonu rupaari tojishaaree Pueyaso cajishaquijijanaa. Naa sequeriquiaari:

—iPa Pueyaso nia timitiariquia, puetunu na tojtiajaca pueyanaa! iNojuaja nia shuquiritiare, tojishano pueyanaa, nijaniyajuhua, tojishoo pueyanaa!

Borrego Niquiojua camishocoriquiano maaji maniniushishacari

⁶Jiyacaritij, janiyari queraatia pueya tojirii jiyanhua nacaanoni, juhua puereetucua sararojua, juhua miacana majacunujuhua. Puetunu nojorijianaari naa sequeriquiaa:

—iJiyanhua maninia pa Jiyaniijia Pueyaso! iNojuaja pa timitiariquia pueyaracaanu! iNojuacuajaari Jiyaniijijanaa! iPuetunu cumaacaracajanaajuhua! iPae shuquiriri! iPae timiri! iQuiarijiacuajaari Borrego Niquiojua caminiu juuca, pueyaracaanu na saquiriojosano pueya rupenura nojuaja! iCunora, nojuaja pa timitiare jiyanhua! Necoranoori tari maniniushirii na caminiuria.

⁸Maniniuqui lino toque cushitishaareeri, cohuajaque shacantuque. Necoranoni, nojoricuajaari puetunu nocua tiuujia pueyajanaa. Naajuhua, cuno cohuajaque na toqueni, cunocuajaari puetunu maninia nojori mijiosanojuanaa.

⁹Pueyaso seruuri jiyacari cua sequeree:

—Quia naajiotare nio: “Shuquiriaatia quijia cutaraari noo pojori, canapueete Borrego Niquiojua camishacari queranacujianara masusanoni”.

Naa cua sequeree socuaari:

—Cua sequesani, cunoori seetanu Pueyaso rupaajanaa.

¹⁰Jiyacaritij, janiyari Pueyaso seruucua mojuquetareeni, juhua Pueyasocuara, nojuaja cua timitianura juuca. Cua sequequee saajaari:

—iMaja pueyanonaa! iMaja naa quia miiniu! Janiyari nareja Pueyaso seruni taa quiajanuyacaani, juhua quia tapueyocuaajuhua, noo pojori canapueete pa Jiyaniijia Jesujiniji pohuatanu tarinitiaashijiacani. iPueyasocuara quia mojuquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohanu niishitishano na pohuataanaa, janiya, nijaniyajuhua.

Cohuajohuana caballo nijinia cajiniyajiniji pohuatasano

¹¹Na nuhuaji, janiyari jiyocuaaanu Pueyaso quiquio niquirii tariucua riatasanoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriqiaa. Nioori na sesaca: “Na sequesano mijia”, “Seetanu sequejajanaa”. Naari na sesaca. Tojetaarucujanaa maninia mijia na quiniucua, puetunu niishijijanaajuhua, nojuajaari seetanujanaa maninia saniitiojua sesa mijia. Naajuhua, majaari najuhua na miaquetoojonu na paraata. ¹²Puetunu casaajanaa niqijia na quiniucua, na namijaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriquiaa na nacaacuara. Cunoori seetanujanaa Jiyaniijijanaa na quiniucua. Tamonu na sesaari naajiotasano quiriqiaajuhua. Cuno sesaari tama na niishishanojuaja cutara. ¹³Na toqueeri nanacatuque quiriqiaa. Nojuajaari tariucuaaanu nio sesaraca quijiacua, “Pueyaso Rupaa”. ¹⁴Jiyocuaaanu nata quinia na soldadohuari na nuhuaji sacuariquiaa. Puetunu nojorijianaari cohuajohuana caballo nujia cajitiriquiaa. Naajuhua, nojoriiri

linojiniji cohuajaquijiasano toqueyaraca quiriqiaa, jiyanhua cohuajaqueya tojetaarucujanaa. ¹⁵Nojori Jiyaniijijanaa rupaamaji, nijiniaquetucua mueruuri puereeta mueranacuriquiaa. Cunoori puetunu mijiria jiyacajiniyajanaa na tojtiaashijia na puetujutajara. Nojuajaari jiyacari nojori Jiyaniijijanaa quiniutianiya, nojori na jitianura jiyanhua na cumaacata. Puetunu cumaacaracajanaa Pueyaso juaaquiacata nojori saniitonutaniyari, naatej, taa uva rapijioshiya na caaca shoonarucuaani. ¹⁶Na tucuaque toqueecua, na ruhuajacucuaajuhua, naa naajiotasanoori quiriqiaa: “Jiyaniijianucua Jiyaniijijanaa”, “Camarucua Camarnujanaa”.

¹⁷Na nuhuaji, janiyari tamonu Pueyaso seru niquirii pananuucua nujaaanoni. Nojuajaari puetunu jiya cajiniocua jaacuatujua casaajanaa jiquoonuuriquiaa jiyanhua, teyano jaacuatujucate shu miojonuuuacuajani. Naa cuno jaacuatujua casa sequeriquiaari:

—iMiji, niya nia rerejosee! iPueyasoori nia queranacutenutaniya! ¹⁸iNojuajaari queraatia shu nia mianuutenutaniya! iCuno shuuri jiyaca jiyaniijianucua shu, soldadohuana camarucua shu, jiyanhua cumueca puereyaquijia shu, caballohuana shu, na nijinia cajitiniua pueya shujuhua! iCamarucuaaju pueya shuuri quiniutianiyajuhua, poonijotesano pueya shu, tojishoo pueya shujuhua, tojishano pueya shunio!

¹⁹Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriqiaa na miaquetoojonura cohuajohuana caballo nijinia cajianota, nata quinia na soldadohuatano. ²⁰Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriqiaacuaja mijiria quijia pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonucua mijiria quijia pueyatej, nojoriiri nojori cuaqueya tarinitiaquaaari na naca pishano cushiriinohua Casaa sesa naajiotasanaura nojoriicua. Naajuhua, nojoriiri juhua cuno puereeta niquishano shipinishano Casaacuara mojuquetacojua quiquiaari juhua Pueyasocuara. Jiyacaritij, cuno caapiqui puereeta niquishano Casaari azufreta noshiyano mani quiquiojia quejoosaree saminiucua. Nojoriiri tii pueyaracaanu naquiya miishaanutaniya. ²¹Puetunu nojoritia quiniaajanaari saniniucua puecoosaree nijiniaquetucua mueruuta, teyanote cohuajohuana caballo nijinia cajiano rupaamaji mueranacuriquiaacuajani. Puetunu jiya cajiniocua jaacuatujua casaajanaari nojori shu toquieree jiyanhua.

Mil marijara Satanás morosaanujiniji pohuatasano

20 ¹Na nuhuaji, janiyari tamonu Pueyaso seru niquirii jiyocuaaanu roseyanoni. Puequeetuujua raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. ²Pueyaso seruuri cuno naatuhua Naaqueru juhua cohuaniquia niquishano quisee. Na morojoreeri mil marijara. Nojuacuajaari cuno tariucuaaanu Soconu, samaruhua jiyaniijijanaatuhua. Na sesaari “Satanás”. ³Maninia na morojonu nuhuaji, Pueyaso seruuri puequeetuujua raama na jartaree. Raa tiotiu mishiquiorohuari. Tiotiu rupanacureeri, maja na riatasaanura. Sesaacari naa mishiquiosaareequij mijiria quijia pueya na sapojiaquiniucua cuaja cuaara na shocojorejaatijia mil marijia. Cuno mil marijia jaara na shocojore, rupaquijia cartesaanutanihuari na saniitiosaanuhuarajanaa cutara.

⁴Janiyari jiyacari queraatia pueya niquirii jiyaniijia cajitucujinia cajituyani. Nojoriiri nequesoreenaara Pueyaso jiyatesano pueya quiriqiaa, mijiria quijia nojori jitianura. Janiyari noo pojori sohanuhua niquiriijiaanihuua, canapueete nacareesaquiaricujani nojori poojotanuucua pa Jiyaniijia Jesujiniji, Pueyaso rupaa tojtiajaca nojori

quiniucuajuhuaj. Nojori cutaraari cuno na naca pishano cushiriinohua Casaacuara jacamatiyuquiquiaari tojetaarucua-janaa, juhua nojuaja niquishano shipinishano Casaacuarajuhua. Naajuhua, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. iCua niquishacari, nojoriiri cua niquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijiaata. ⁵Saniniuuja, narta macunucuaari maja na samiitianijosaanu quiriqiaa cuno mil marijia cuara shocojorejaatija. Nio macunucua samiitianijosacari cua niquishanoni, cunoori coteenujanaa Pueyaso samiitianijosacari pueya. ⁶Shuquiriaatia quijiaa cutaraari noo pojori, canapue Pueyaso samiitianijionutaniya coteenujanaacuajani. Nojoriiri jiyacari tojetaarucujanaa maninia quijiacara jatanishaanutaniya pueyaracaanu rishijiaa nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuuja, nojoriiri pueyaracaanu shamaatia timitianutaniya Pueyaso, Cristonio. Naajuhua, nojoriiri jiyaniijianucua quiniutianiya Cristota, mijiria quijiaa nojori jiiitiasacari cuno mil marijiaara.

Sesaaca saniitiosacarijanaa cutara

⁷Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸Nojuaja jaara tohuatesaare, quianutaniyari puetunu jiyacajinia quijiaa pueyajanaa na sapojonura, Gog* pueya, Magog pueyano. Nojori na sapojonura, nojuajaari puetunu jiyacajiyaniijianucujanaa rerejotenutaniya, puetunu nojori soldadohuatajanaa, nojori miaquetojonura pa Jiyaniijiaata, puetunu na pueyatajanaano. Nojori soldadohuari jiyanohua queraatia pueya quiniutianiya, juhua shoniniacu caminia shuriuquioco paajia jaaquia. Majaari na naata serojosaanu.

⁹Cua niquishacari, tojetaarucujanaa jiyanohua queraatia pueyari nijioriquiaa. Jiya pueturiquiaa puetunujanaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaa Pueyaso pueyano. Jiyacaritij, maniiri jiyocuaaanuji tinishaare nojoriicua. Puetunu cuno pueyajanaari catijiasaaree tojetaarucujanaa. ¹⁰Satanás, cante puetunu cuno pueyajanaa sapojoreecuajani, nojuajaari caminiajina jataaaree tee cuniqui mani noshiya azufretacuajani. Tariucuaaanu tii jaqueroosaaquiaaricuaajari na naca pishano cushiriinohua Casaa, narta puereeta niquishano Casaano. Cunocuaajari mijiria quijiaa pueya sapojoquiaaricuaaja, na naca cushiriinohua Casaacuara jacamatujuaca nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

Macunucua nequesoresacari cohuaja cajitii tacoji

¹¹Na nuhuaji, janiyari Jiyaniijajanaa cohuaja puereetuca cajitii niquiriini, tii cajiniano. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriuhua. ¹²Jiyacaritij, janiyari puetunu macunucujanaa niquiriini nujuatiuyano cuno cohuaja cajitii tacojini; jiyaniijianucua, tojishoo quijiaa pueyano. Jiyacaritij, na cohuaja cajitijinia cajiniaari na nequesoreetuneeca riataquere, socua tamonu nequesoreetuneenio. Cuno nequesoreetuneecajinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaa nojori quiniuria. Puetunu cuno tariucuaaanu macunucujanaari nequesoresaaree puetunu nojori miishanojinijijanaa, taa cuno nequesoreetuneecajinia na naajiotasaaquiaaricuaajani. ¹³Cua niquiara, macunucua quiquiojina racatasano puetunu cusonu sohanuhuaajanaari na cuaqueya rupuetesaarohua, shoniniacu caminiajina moquecono, jiyacua moquecononio. Puetunu nojorijianaari nequesoresaaree taa miijiaa nojori

quiquiaaricuaajani. ¹⁴Na nuhuaji, Cusojuana, macunucua Quiquiojuhuaj, nojoriiri mani noshiyano caminiajina jaqueroosaaree. Canapue cuno mani noshiyano caminiajina quejoosocoriquiano pueyacuajani, nojoriiri cusonu pucuteriquianocuaaja. ¹⁵Naacuajitij, canapue Pueyaso samiitianijosocoriquianohua nequesoreetuneecajinia naajiotasoo quiriqiaaani, nojoriiri mani noshiyano caminiajina quejoosaaree pueyaracaanura.

Quiarinio jiya cajiniocujiniji pohuatasano, quiarinio jiyajinijinio

21 ¹Na nuhuaji, janiyari quiarinio jiya cajiniocua niquiriini, quiarinio jiyano. Coteenujanaa jiya cajiniocuaari tari shaajasano quiriqiaa, jiyano. Naajuhua, majaari shoniniacu caminia quini quiriqiaa tari. ²Janiyari jiyacari quiarinio Jerusalén tiaca niquiri Pueyaso Quishaquiji roseyanoni. Tojetaarucujanaa shanohua maniniushitishano quiriqiaari, juhua neyacarano camishocoriquiano niyaco. ³Naajuhua, janiyari Jiyaniijajanaa cajitijiniji tojiri jiyanohua nacanuni. Naa sequeriquiaari:

—iPueyaso Quiquioori pueya tajinia quiya tari!
iNojuajanaari nojoritia quiniutianiya! iNojoriiri na pueya quiniutianiyajuhua! iNojuajaari nojori cojiniutianiya, nojori Jiyaniijajanaa na quiniuria, maninia na jiiitanura nojori! ⁴iNojuajaari puetunu nojori namijiaacajanaa tuujunutaniya! iJiyacaritij, majaari pueya niishini quiniutianiya shaajenu, sapuenu, taraajenu, nootunenu- nio! iPuetunu cuno taraatia miiniucuaajari tari shaajasano quiriqiaa!

⁵Na nuhuaji, Jiyaniijajanaa cajitijinia cajiniaari naa sequere:

—iCua tojiri! iJaniyari quiariniora miijia puetunu casaajanaani!

Cua sequerejaariuhua:

—Cua sequesano quia naajiotare. Seetanujanaari cua sequesano. Janiyacuajaari cua sequesano tohuateequiaa pueyaracaanuni.

⁶Cua sequerohuariuhua:

—Cua sequesano cua miishocoriquianoni, janiyari tari na tucutaree miiniuni. Janiyari quijiajuhanani. Janiyari pueyaracaanu quiriqianojuhua. Janiyari puetunu casaajanaa coretanijiani, na shaajajajuhua. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianijia mohuacani, cunoori cua Sohanucuaaja. Janiyari nareja na niqitioquiaani. Majaari na sami cua masenu quiquiaa na ratuna. ⁷Cante puetunu casaajanaa rejeretaja quijiani, cua tojijia na quiniucua, nojuajaari puetunu cua jiiitiasanojanaa jiiitiana quiniutianiya. Nera, janiyari na Pueyaso quiniutianiyani. Nojuajaari quiyano quiniutianiyacuaja. ⁸Sesa pueya saniniuuja, nojoriiri puetunu quejoosaariquianojanaa azufreta noshiyano mani caminiajina. Naa quejoosaanutaniyari nio pojori: Pueyaso tojitiaashijiaa pueya, puerejaca nojori quiniucua, Pueyaso Rupaacua tiyashijiaa, soosano pueya tama sesa nojori miiniucuaajaaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacuara jacamatujuaca juhua Pueyasooacara, puetunu cuaracashijio- nujuaca pueyajanaano. Puetunu cuno pojorijianaa jaara nequesoresaare, nojoriiri puetunu taanuusaanutaniyajanaa Pueyaso shuriucuaaja. Nojoriiri mani noshiyano caminiajina quejoosaanutaniya, pueyaracaanu naquiya nojori miishaanura tii. Cunocuaajari sequeshiya, “pueya pacutesacariuhua cusonu”.

Quiarinio Jerusalén tiacajiniji pohuatasano

⁹Janiyacuajaari tari nia pohuataree cuno siete Pueyaso seyajinijini, canapue siete miacojua patootanaa quiquiaaricuaajani, mishaja Pueyaso saniitotajata. Niquiriyatu nojorijinijioori cucua nimiaa. Nojuajaari cua sequese:

—Miji. Quia niquitiriiria Borrego Niquiojua niquiorano. Nojuacuajaari pa Jiyaniijia pueya, na quiqiojaariuhuj.

¹⁰Jiyacaritij, nojuajaari cua sohanu jiyataaree jiyanojua puereetuca jiyaconaja tuhuanuucua. Tiji cua niquitirii cuno puereetuca quiarinio Jerusalén tiacaari, Pueyaso shuriucuaji roseyano. Tojetaarucujanaa shanohua maniniushitishano quiriquiaari. ¹¹Nenecuariquiaari Pueyaso shacantuca cumacata. Na nenecuanuuri juhua jiyanojua panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohuaja motiiquio. ¹²Cuno tiaca shocua matacaari jiyanojua puereetuca quiriquiaa, jiyaconajajuhuj. Tiaca shocua matacaari doce tiotihuvaraca quiriquiaa. Niquiriyatu Pueyaso seruuri puetunu cuno tiotiuinjijijanaa nujuaturiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotihuacuajanaa naajiotasano quiriquiaa.

¹³Jiuujianaraca tiotihuari pananu metasamajiria quiriquiaa, cuno tiaca matacaacia. Socua jiuujianaraca tiotihuari quiriquiaa pananu metasamaji miaquetajara. Naajuhuj, socua jiuujianaraca tiotihuari pananu metasamaji muenecara quiriquiaa. Socua jiuujianaraca tiotihuari quiriquiaa pananu tiuquishocora. ¹⁴Cuno tiaca matacaari doce puereetujaaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵Cuno Pueyaso seru cuata pocojoriqiaani, nojuajaari orojiniji shipinishano shanacujutaja maca meturiquiaa. Na meturiquiaari nata na shanacujunura cuno tiaca, na tiotihuua, tiaca shocua matacanio. ¹⁶Cuno tiacaari jiyanojua tucuhuana quiriquiaa. Na cajiniocuaari mariyata juhua na tucuhuana quiriquiaajuhuj. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil* dosciento kilómetro* quiriquiaari na tucuhuana, na jiyaconaja, na cajiniocuanio. ¹⁷Na nuhuaji, tiaca mataca shanacujureejaariuhuj. Setenta y cinco metro jitiariquiaari. Pueyaso seru shanacujutaja tucuaneeeri mariyata juhua mijiria pueyano shanacujutaja quiriquiaa. ¹⁸Cuno tiaca matacaari puetunu jaspe saijiniijijanaa shipinishano quiriquiaa. Tiacaari saniniuuja saaja orojiniji shipinishano quiriquiaa, maja quenaaja tamonu casaata cojitishano. Naacuajitij, cuno oroori juhua cohuaja motiiquio quiriquiaa. Maatia niquishiyari na tamajiria. ¹⁹Cuno mataca nujuataja doce sairi queraatia tamaatiujiaaca shanohua niquishano saitia maniniushitishano quiriquiaa. Cuno mataca nujuataja doce saijiniijinioni, coteuno saajiaari jaspe saitia maniniushitishano quiriquiaa. Jaspe sairi neeruua cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentujaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruua. Cuarto saajiaari neeruua esmeralda saitia maniniushitishano quiriquiaa.

²⁰Quinto saajiaari ónice saitia maniniushitishano quiriquiaa. Ónice sairi pocojuanaque naatuca cojitishano. Sexto saajiaari naatuca cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tijaaca. Octavo saajiaari berilo saitia maniniushitishano quiriquiaa. Berilo sairi neerujaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanojua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanojua neerujaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuca. Duodécimo saajiaari jiyanojua nentuuca amatista saitia maniniushitishano quiriquiaa. Puetunu cuno saijianaari jiyanojua shanohua sai, shacantujaaca. ²¹Tiaca shocua mataca doce tiotihuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajiajiniji shipinishano quiriquiaa. Naa shipinijosano quiriquiaari puetunu cuno doce tiotihuajanaa. Tiaca

nuucuacaari tojetaarucujanaa orojiniji shipinishano quiriquiaa. Jiyanojua maninia cuno oro quiniuucua, Pueyaso shacantucaari na tohuariquiriquiaa, juhua motiiquio cohuajaco na quiniuucua.

²²Cuno tiacajinia, majaari cua niquiniu quirii Pueyaso Quishaqui, tii pa rupuenura nojuaja. Cuniqii, majaari socua Pueyaso Secojoja tia panishaanu. Puetunu cumaacaracajanaa Pueyasojuanaari tii quiyacuaja, Borrego Niquiojuajuhuj. Puetunu cuno tiacajanaari nojori quishaquicuaja, pueyaracaanu nojori rupuesano pa quiniuria. ²³Cuno tiacaari maja na paniniu pananu na cuhuatariquiano, racajuhuj. Pueyaso shacantuca cumaacacuajaari na cuhuataa. Borrego Niquiojuacuajaari na cuhuatana. ²⁴Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutianiya nojori cuhuatana tiacajiniara, Jiyaniijijanaa nojori niquitioscoriquiano. ²⁵Cuno tiaca tiotihuari pueyaracaanu riataquesano quiniutianiya, juuca na quiniuucua pueyaracaanu. Cuniqii, majaari quenaaja niucua niishishaanu quiniutianiya. ²⁶Jiyajinia quijiaca pueyari socua na panishano casami patootanutianiya cuno tiacajiniara. Cuno tiacaari jiyanojua nojori timitiasano quiniutianiya. ²⁷Saniniuuja, maja cutaraari sesa casa tiuquinishaanu quiniutianiya cuno tiacajinia. Naajuhuj, majaari sesa mijiaca tiuquinu quiniutianiya tii, sapojonuujuacano. Saaja noo pojori cutaraari tii tiuquitianutianiya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacuajani.

22 ¹Na nuhuaji, Pueyaso seruuri cua niquitirii pueya samiitianijiotaja moo, cohuajanacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajituijiniji pacartariquiaa, tee Borrego Niquiojua cajiyajaanuhuj. ²Samiitianijia naanaari tiaca nuu jiuujiaaco nujuaturiquiaa, cuno moo shuriuquicojuhuaj, niqijiria, na taquijiriano. Cuno naanaari puetunu racarajanaa metujuaca. Naacuajitij, puetunu marijarajanaa, doce caminiujia metunuuri. Na muecacaari maninia, puetunu jiyacajinia quijiaca pueyajanaa naarajotajara. ³Cuniqii, majaari socua Pueyaso sesacasano casa quiniu quiniutianiya. Naacuajitij, Pueyasojuanaa, Borrego Niquiojuajuhuj, nojoricuajaari cuno tiacajinia quijiaca quiniutianiya, Jiyaniijijanaa cajituu quiniuucua tii. Nojori tojtiajacaari nojori timitianutianiya pueyaracaanu tii. ⁴Nojoriiri Pueyaso jiquioco shootajaca quiniutianiya. Na sesaari nojori jiniji naajiotasano quiniutianiya. ⁵Cuniqii, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutianiya. Nojoriiri jiyaniijianucua quiniutianiyajuhuj, puetunu Pueyaso shipinishanojuanaa nojori jitianura pueyaracaanura.

Jesucristo quera tiuquihua

⁶Na nuhuaji, Pueyaso seruuri cua sequeree:

—Cua niquitishano quiajaniani, cua sequesanojuhuaj, puetunu cunojuanaari seetanjuanaa. Puetunujuanaari tohuateeriquiano. Pueyasoari na Sohanuta niishitiquiaa na sequesano caminiujunua pueya, nojori pohuatanura pueya niquiara na niishitini panishano. Naajuhuj, nojuacuajaari quiarjia na seru jiyaroree, na tojtiajaca na niishitiniuria taa quiari naataja nojuaja tucuatanutianiya puetunu na sequesanojuanaani. ⁷Pa Jiyaniijiacuajaari naa sequera: “Janiya quera tiuquihua niaacuani”. Shuquiraatia quijiaca cutaraari noo pojori, canapue nio naajioneejinia Pueyasojiniji niishitishano tojijiacani.

⁸Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquiniu nuhuajitij, cua tojinu nuhuajijuhuj, janiyari Pueyaso seru pajama

mojoquetareeni. Janiyari naa mojoquetaree nojuaja cua timitianura juucuan, juhua Pueyaso. ⁹Nojuajaari cua sequequee saaja:

—iMaja naa miiniu pueyanonaa! Janiyari Pueyaso serujuhuaj, juhua quiajanijahuaj, juhua puetunu quiarta Pueyaso sequesano caminiujitunaa pueyajuhaj. Naajuhaj, nio naajioneeginia naajiotasano tojjiaa pueyani, nojoriiri cuarta Pueyaso seyajuhaj. iPueyasojuanaa quia timitiare cutara!

¹⁰Cua sequeerejaariuhaj:

—Pueyaso niishitishano nio naajioneeginia quia naajiotasano, cunoori maja saa quiaraja. Puetunu pueyajanaa cuaara na niishiirianoj. Puetunu niya naajiotasano cuajaari quera tohuataya. ¹¹Naacuajitij, canapuate sesa na miiniu tarinitianu paniaquiyani, sacuraatia miijiojuacajuhaj, cuaara na tarinitiaaquiiraqui. Saniniuujia, canapuate maninia miijiojuaca cutarani, saaja Pueyasora poonijionuujacajuhaj, nojori cuaara tarinitiaaquiira maninia nojori miiniujiuhaj.

¹²Pa Jiyaniijiacuajaari naa pa sequeya:

—iTaaquiririnij! iQuera tiuquihuanijia! Janiyari cua tojitiajaca cua niqutiojosocoriquiano casaa tiuquitianutianu-huani. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri. ¹³Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujuniani. Janiyari quijiajuhanani. Majaari cua supueni quiquiaari. Janiyari puetunu casaajanaa coretanijiani, na shaajariquianojuhuaj.

¹⁴Shuquiriaatia quijiaa cutaraari noo pojori, canapuate juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji.

¹⁵Saniniuujia, nio pojoriiri Pueyaso tiaca mataca tamajiria jateenutaniya: sacuraatia casaa miijiaa, shimiacuri, na camishoo maajipohua numuetucunujuaca, narta pueya

puecojuaca, shipinijosano casaacuara jacamatujuaca juhua Pueyasooacara, cuaracashijionu porocua pueyanio.

¹⁶Janiyacujaari cua seru jiyarorucuaa quiocuan, na niishitiniuria quiajanija puetunu niya quia naajiotasanojuanaa, saniniuujia Pueyaso pueya maapue niquiara na caminiujishaanura. Janiyacuajaari Jesuni, supuetana David niqiohuacuajinio caneno pueyajinijinio supueno, Jiyaniijajanaa cua quiniuria David niti. Naajuhaj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucuacaanu Pueyaso Rupajiniacuajani.

¹⁷Pueyaso Sohuanuuri Borrego Niquiojua niqioranota naa sequetiuya: “iMiji Jiyaniijianaa!” Canapuate naa nio naajioneeginia naajiotasano tojijiani, nojori cuaara naa sequeerajuhaj: “iMiji!” Cante jiyamueyani, nojori cuaara niiria, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸Cante nio naajioneeginia juhuacarijia Pueyaso niishitishano tojiriini, taa Pueyaso miiniutianiyan, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneeginia na pohuatasano naquiya na miitiaja casaata. ¹⁹Naajuhaj, cante nio naajioneeginia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijiaa nojori quiniuria, taa nio naajioneeginia na pohuatashiyacuajani.

²⁰Cante nio sequeyacuajani, nojuajaari naa sequeya: “Taaquiririnij, quera tiuquihuanijia”.

Jaa, Jiyaniijia Jesunaa. iNaacuaaquinatejaj! iRitia quia nimiohua canaacua!

²¹Pa Jiyaniijia Jesu cuaara puetunu niajanijajanaa cumaquiiria na Sohuanuta.

MAATIA POHUATASANO JIYAJENETA RUPAACAJINIJI

Aarón: Moisés puerana. Pueyasoori na jiyatequiaari coteenujuanaa Israel pueyacuara secojonara. Naacuajitij nojuajaari narta Leviicuajinio supueno pueya jiyaniijia quiquiaarijuhuaj, Pueyasora nojori poonijionura Pueyaso Secojojua suhuorotujinia. Aarón cusosacari, neyanuuri jiyatesaaquiaari pueyacuara secojonaa jiyaniijia. Aarón nuhuaji, necohuacuajinio supueno pueyari pueyaracaanu jiyatesaaquiaari pueyacuara secojonaa jiyaniijia. Pueyaracaanu naa miishaaquiaariiri. Pueyacuara secojonaa jiyaniijia cusosacari, neyanuuri saniniuujia na niti jiyatesaaquiaari jiyaniijia. (Lc 1.5; Mii 7.40; He 5.4; 7.11; 9.4)

Abraham: Nojuajaari Pueyaso rupueña quiquiaari Pueyaso tojjia na quiniuucua, seetanujuanaa Pueyasocua tiuujia na quiniuucua. Pueyaso tojjia Abraham quiniuucua, nojuajaari Caldeo jiyajiniji pacuquiaari tucuaaanu na niishishoo Canaán jiyajinia. Necocua Saaraari neyanu Isaac raquiaari tariucua motaja na quishacari, Pueyaso cumaquishacari nojuaja, saaquiano Abrahamjuhuaj. Pueyasoori seetanujuanaa Abraham sequequiaari maninia miiniutianiya nojuajaari, puetunu nocuaji supueno pueyajuhuj, puetunu Pueyasocua tiuuriquiano pueyajuhuj. Seetanujuanaari, Pueyasoori nocua tiuujia pueya jiyatequiaa juhua Abraham niquihua nojori quiniuria, maninia nojori miishaanura taa Pueyaso sequequiaari Abrahamcuajani. (Mii 3.25-26; 7.2-8; Gá 3.6-9; Ro. 4.13-22)

Abrahamri Hebreo rupaa pocuaja quiquiaari, naacuajitij nojuajiniijinio supueno pueyari sequesaaquiaari Hebreo pueyatajuhuaj. (He 11.8-12; 17-19)

Agar: Abraham niquiocua Saara seru. Agarrri Egipto jiyajiniijinio taatu quiquiaari. Niyajaru Saara quiniuucua, nojuajaari na seru Agar niquitioquiaari neyaca, nocua neyaca Abraham mueratenura mueya. Saniniuujia, Agar jaara manajaraca quiquiaari, na camarutu Saara soojeera quiquiaariiri. Na nuhuaji, Pueyaso jaara Abraham niquiocuajanaa muetutequiaari, Agar niyanu Ismaelri Saara niyanu Isaac macaatiijia quiquiaari. Cunora Agarrri puetunu taanuuasaaquiaarijianaa neyanuta. Naacuajitij Pueyaso sequesano Abraham na niquitiosocoriqianoni, cunoori maja na quiniu quiquiaari Agar niyanura. Naajuhuj, Moisés Rootasano tojiniaari miriqui juhua Agarrriini supueno pueya, serujuhuj, maja seetanujuanaa Pueyaso muerasu. (Gá 4.21-31)

Arquelao: (Quia pajere “Herodes”).

Baal: Canaán jiyajinia quiijaca taucua jiyatesano na pueyasora. Baalcuajaari pueya shipinishano casaa quiquiaari nocuara nojori jacamatunura juhua Pueyasocua. Baal jiyopueeri jiyanojua sacaraatia casaa miijioquiaari nojori jiyaniishacari cunoori Baal panishano. (Ro 11.4)

Babilonia: Tariucuaaanu tiaca Mesopotamia jiyajinia. Israel pueya ruuretasacari Pueyaso pueyaracaanu, Pueyasoori Babilonia jiyaniijia jiyatequiaari Israel pueya paracara. Naacuajitij nojori miaquetoosacari, Israel pueyari shocotasaaquiaari. Babilonia jiyajiniara quioosaaquiaariiri. Tii nojori quishacari, setenta marijiaari nojori shocojoquiaari. (Mt 1.11, 12, 17; Mii 7.43)

Nio pa quishacari saniniuujia, Roma tiacaari miriqui sequeshiya Babiloniata, puetunu mijiria quiijiacajanaa na sesonuucua taa tariucuaaanu Babilonia tiacajinia quiniaa miijioquiaari. (Niq 14.8; 17.5; 18.1-24; 1 Pe 5.13)

Balaám: Tariucuaaanu cumaacaraca quiijia shimiacu. Quera Israel pueya tiuquishacari Canaán jiyajinia tii quiniaa taucacata nojori miaquetojonura, nojoriiri Moab jiya tajimiaquiaari. Pueyasoori Moisés sequequiaari maja Moab pueyata na miaquetojonura. Moab pueyacuajaari Lot niyatuucaajinio supueno pueya quiquiaari. Naajaa, Moab pueya jiyaniijia Balacri Israel pueya puerequiaari. Na niishishacari nojuaja maja na naata quiriquiaa nojori shocotanura na miaquetojonura, cunora shimiacu Balaám masuuquiaariiri nocua na niniuria, Israel pueya na shimiojonura nera. Jiyaniijia Balacri na sequequiaari: “Janiyacua jiyanojua queraatia casami quia niquitioereni quiaa jaara Israel pueya shimiojoojee quiria” Balaámri jiyanojua casamiriaca quiniuucua jiaatiija quiquiaari. Pueyasoori saaja na piryojoquiaari maja na shimiojonura Israel pueya. Naajaa, Balaámri Balac niishitiojoquiaari Israel pueya na shiniujiuniuria sesa nojori miiniuria, Pueyaso paracaaniuria nojori tamajaaja. (Números 22-25; 2 Pe 2.15-16; Ju 11; Niq 2.14)

Balac: (Números 22-25; Niq 2.14) (Quia niquirijuhuj “Balaám”).

Borrego: Seru. Niishiyashijia borrego quiniuucua, borregohuari pueyaracaanu cojuanaraca quiijia. Borregohuari na camaru rupaa niishijia, tama nojori sesacajaajanio. Nojoriiri na cojuana nuhuajijia. Na camaru jiyaniquishacari na sesa, cuno borregooci nocua catecanojua. Israel pueyari queraatia borregohua jiiitajaca quiquiaari. Borregohuari Pueyasocua puecoosano quiijia Pueyaso jiyanooniuria na camaru. Majaari borrego niishiniu sariyocuanu na cajaca jaara miatejoshiya. Majaari quenaaja na sariyocuanujuhua na mosacari. Naacuajitij, Jesuuri jiyaniquishaaquiaari “Pueyaso Borregota”. Nojuajaari sanaa rejeretaquiaari pueya mosacari nojuaja. (Jn 1.29, 36; 10.1-16; Mii 8.32; Niq 5.6-17; 7.9-17; 14.1-5; 19.6-10; 21.22—22.4)

Bronce: Cumueeca casaa. Cunoori shipinishano cobrejiniji tamonu cumueeca casaata cojtitishano. Na cojtitiajiaari “estaño”. Na cojtitishaanura, jiyanojua jiyanojua naseeca manijinia mohuaquishiyari. Jaara mohuaquishaare, bronce shacantuucaari shanohua nenecuaquiaa. (Niq 1.15; 2.18)

Cebada: Tamonu jiyasocua juhua arroz jiyona niquishano. Na jajauri maninia miaquesano. Cebada cashojuajiniji panri shipinishaaquiaa. Trigojiniji panri socua maniniucuasano. (Jn 6.9; Niq 6.6)

César: Italia jiyajinia Roma tiacajinia quiijia jiyaniijiaari sequesaaquiaari Césarta. Césarri queraatia jiyaca jiiitana quiquiaari, Israel jiyajuhuj Cristo quishacari mijiria. Queraatia Césarri quiquiaari: Augusto (Lc 2.1), Tiberio (Lc 3.1), Calígulo, Claudio (Mii 11.28), Nerón (Mii 25.21), socua tamasacanio. Puetunu Césarjanaari jiyaniijianucuaa tamasaca jiyateja quiquiaari puetunu jiyacajanaa nojori jiiitianura nojoriiri. Naacuajitij, Herodesri jiyatesaaquiaari Galilea jiyajinia quiniaa jiyaniijia. Naajuhuj, Poncio

- Pilatoori Judea jiyajinia quinaa jiyaniijia quiquiaari César Tiberio jiyatesano jiyaniijia na quiniuria tii.
- Cién:** Niööri sequeya cinco pueya juaashiquiaca, na niohuacaca serojosanonio. Naajioshiyajaarihuaj “ciento”.
- Cobre:** Socua sasaca casaa cumueeca casaajiniji. Naacuajitij cobre na naata pishaanu, jiyaniijia naaqui quiniuria nocua, cumaneeca na quiniuria. Cobrejiniji shipinishano cumaneeca maja puera panishano. Queraatia casaa maja na naata masesaanu cuno cumaneecata. (Mr 12.42)
- Coré:** Na jiyaso queeri quiquiaari Leví. Na quecuajaari Moisés que tarajanu quiquiaari. Coreeri socua querajaa Israel pueyata nasojoquiaari queraatia narta Israel pueya camarucua, nojori ruuretanura Moisés, Aarónnio. Pueyasojuaanaacuajaari Moisés jiyatequiaari Israel pueya jiiitiana na quiniuria. Naaratej, Pueyasoori jiyanohua Coré juaaquiaari. Jiya jiaquetequiaariiri Coré totenura jiya jiaqueyama puetunu na casamitajanaa, caapiqui na jiyopuetajuhaj. (Ex 6.16-18; Nm 16; Ju 11)
- Cristo:** Niööri Griego rupaa. Pueyano rupaajinia saniniuuja, Cristoori sequeya “Pueyaso jiyatesano Jiyaniijijajanaa na quiniuria”. Pueyano na quishacari mijiria, nojuajaari sesojosaaquiaari “Jesu”. Naacuajitij, nojuajaari sequeyarucua sequesaaquiaari “Jesucristota”. (Quia pajere “Jesu”.) (Jn 7.41-42; Gá 3.16)
- Cuarenta:** Niööri sequeya caapiqui pueya juaashiquiaca, na niohuacaca serojosanonio.
- Cuarto:** (Quia pajere “décimo”.)
- Cuenta:** Niööri tahua rupaa. Pueyano jaara cumaneeca niqutioyaquiri casami na poosanojiniji, casami niqutiojonaari naajiotaja taa cumaneeca casami poona niqutionutaniya nojuajani, cuno pueyano jaara cumaneeca jiiitiare. Cuno naajiosanoori sequesano “cuenta”. (Mt 18.25)
- Daniel:** Jerusalén tiacajinijinio mashaja. Babilonia jiyaniijia jaara Israel pueya shocotaquiaari, Danielri saquiriojosaaquiaari jiyaniijia tiaco seru na quiniuria. Saquiriojosaaquiaariiri maninia niquishano na quiniuucua, niishijia na quiniuucujuhaj. Pueyasocua tiuuja Daniel quiniuucua, nojuajaari Babilonia tiaca jiyaniijianucua tojishano pueyanora quiquiaari. Nojuajaari Pueyaso niqutishano nojuaja naajiotajuaari pueya niishiniuria taa na nuhuaji pueya miishaanutaniyani. Tariucuacaanu Pueyaso Rupaajinia quiyacuajaari Daniel naajiotasano. (Mt 24.15)
- David:** David supuetana quiquiaari Judá, Isaac jinianu. Nequesoreena Samuelri David jiyatequiaari Israel pueya jiyaniijia na quiniuria, coteenujuanaa Israel pueya jiyaniijia Saul niti. Samuelri naa miiquiaari Pueyaso ruuretasacari Saul, na tojiyashijia Saul quiniuucua, saniniuuja David quiniuucua Pueyaso panijia jiyanohua. Davidri jiyanohua maninia jiyaniijia quiquiaari narta Israel pueyara. Puetunu nojori paraajanaa shocojotaquiaariiri. Shanohua jaaquequejioja quiquiaariiaarihuaj. Na jaaquequejonecaari Tariucuacaanu Pueyaso Rupaajinia quiyacuaja. Na naajiosanoori sequesano “Salmos”. (Quia pajere “Salmo”.)
- Pueyasoori David sequequiaari, nocuajinio supueno pueyajinijinio, tamonuuri supuenutaniya Jiyaniijiarajanaa quiriqiano cutara. Cunocujaari Jiyaniijijajanaa Jesucristo. (Mii 13.20-23)
- Décimo:** Tahua serojosacari casami, nojoriiri casami sesojouja cutara. Maja saaja “coteenujuanaa, cunujuanaa, jiyacunujuanaa”. Naacuajitij, caapiqui casaa jaara quiri, coteenujuanaa sesaari “primero”. Tarajanuuri saniniuuja “segundo”. Jaara quiriqiaa jiuujianaraca casaa, cunoori “tercero”. Jaara socua quiya, tercero nuhuaji sequeshiyari “cuarto”. Cinco casaa jaara quiya, sesojoshiyari “quinto”.
- Quinto nuhuaji quiyari “sexto”. Cuno nuhuaji quiyari “séptimo”. Séptimo nuhuaji, “octavo”. Na nuhuaji, “novenos, décimo, undécimo, duodécimonio”.
- Domingo:** Niööri semaana coteeja juuca sesa. Jesucristoori domingo juuca samiitiaquiaarihuua macujiniji. Cunora, quera puetunu na tojitiacajanaari domingo juuca rerejoquiaa nojori maniniuhuaqueetanura nojoriicujaji Tacuna. (Mr 16.9; Mii 20.7)
- Esau:** Jacobo puerana. Pa supuetanaari sequeja, jiyapueranuuri socua panishano quijia tapueyocujajiniji. Pueyaso cuaara jiyateera cuno socua casamiriacara, socua tojishano pueyanohujuhaj, socua jiyaniijia na quiniuria na nuhuajishanaajiniji. Esauuri saaja puetunu cunujuanaa soojea quiquiaari, nera na que Isaac riuriotacanio. Naacuajitij, nojuajaari tarajanu Jacobo sequequiaari puetunu cunujuanaa cuaara quiri Jacobora, Jacobo jaara na mianuutere na sumatusano. (Ro 9.10-13; He 12.16-17)
- Faraón:** Egipto jiyajinia, nio rupaari sequeya jiyaniijijajanaa. (Mii 7.9-10, 19-22; Ro 9.17)
- Fariseo:** Fariseocuaari noo Judiocua, canapute puetunu Moisés Rootasanojuanaa tojijia quiquiaaricujani. Naajuhaj, nojoriiri queraatia nojori supuetanaa miishano tojijia quiquiaari. Nojoriiri puera maatejoja Pueyaso rootasano. Saniniuuja, majaari nojori niishiniu quiquiaari pueyacu taraajenu, pueya panijia nojori quiniuraju-huj. Nojoriiri narta Judiocua juaajia, nojori tojiyaquishacari nojori rootasano puera nojori maatejosano. Pablojuanaari Fariseo quiquiaari na mashajiniji, taa na que quiquiaaricuaani. (Mt. 3.7-10; 5.20; 15.12-14; 23.2-36; Jn 3.1; Mii 23.6-9)
- Gog, Magog:** Tariucuacaanu Pueyaso Rupaajinia, Gogri Magog jiya jiyaniijia quijia. Jesucristo Niqutishano Juan naajionejinia, Gog, Magognio, nojoriiri miriqui sesaca. Nojoriiri puetunu mijiria jiyacajinijiojuanaa Pueyaso pueya paraca. Sesaacaari nojori sapojonutaniya nojori cosenura Pueyaso tojitiacajia, na pueconura puetunujua-naa. Nojori cutaraari saniya puecoosanutaniya jiyocuaaanuji manitia. (Niq 20.7-9)
- Hebreo:** Supuetana Abrahamri Hebreo rupaa pocuaja quiquiaari, puetunu nocuajinio supueno pueyajuhaaj. Naacuajitij, Israel pueyari sequeshiya “Hebreo pueyata”. Hebreo pueyari mariyata sesojosaaquiaari “Judiocucata”. (Mii 21.40; Fil 3.5)
- Herodes:** Pueyaso Rupaajinia, cuatro jiyaniijianucuaari jiyaniquishaquiaari “Herodesta”:
1. Coteenujuanaa Herodesri Judea jiyajinia jiyaniijia quiquiaari Jesu raaquishacarijiojua. Nojuajaari Pueyaso Secojouja tiatequiaarihuua Judiocucara, Judiocua maniniucuanura nojuaja. Tariucua saaquiano na quishacari, nojuajaari conaja Jesu motenu paniquiaari juucua. Nojuaja jaara shaajequiaari, neyanu Arquelaori jiyaniijia quiquiaari Judea jiyajinia rupaquijia. (Mt 2.1-8, 16-19; 2.22)
 2. Arquelaos tarajanu cutaraari pueyaracaanu jiyaniijia quiquiaari Galilea jiyajinia. Na sesaari quiquiaari Herodes Antipas. Nojuajaari tarajanu Felipe niquicua Herodías jaariitiaquiaari necocuara. Tiuquinijiona Juan nacataniquiaariiaarihuaj. Nio Herodesri Jesu nequesoree- quiaari juucujuhaj. (Mr 6.14-29; Lc 23.6-12)
 3. Na nuhuaji, coteenujuanaa Herodes jinianu Herodes Agripaari jiyaniijia quiquiaari. Nojuajaari Jesuucua tiuujiaca paracaajia quiquiaari. Juan tarajanu Santiago nacataniquiaariiaarihuaj. (Mii 12.1-23)
 4. Tamonu Herodes quiquiaarijihuaj. Pablo nequesoreequiaariiri. (Mii 25.13—26.32) Nojuajaari na que Agripa sesaanucua quijia. Nojuajaari na que niyatu Bereniceta camiquiaari.

- Hisopo:** Jiyasocuaari cuno. Na shuucua corequetano cashacucuanioyjuuara cajatucucua. Pueyacuara secोजनाari nanacatunacujinia shiquiaari hisopo cashacucua, pueyacu na majiriutianura, Pueyaso Secojoua tiajinia casamiicua-nio. Cuno pojoriiri naa miitijua pueya, juhua jeequesano pueya quiniuria Pueyaso niquiara. (He 9.19)
- Hora:** Nioori tahua rupaa. Horaari sequeya juuca raqui. Niquiriyatu juucaari doce hora jiiitaa. Niucuaari doce hora jiiitaaajuhua. Shiyaquiyajini, horaari coteesano serojonura. Naacuajitij, shusha pananu muetasacari, cunoori sexta hora. Pa naca suhuojuajinia pananu quishacari, sequestiyari “doce”. Panacari nuhuaji socua serojoshiyari hora. Na nuhuaji, sexta hora quishacari, pananuuri tiuquimiaa. (Mii 5.7; Niq 8.1)
- Isaac:** Tariucua saaquiano Abraham quishacari, tariucua motaja necocua quishacarijuhuaj, nojoriiri mueya mueratequiaari. Neyanu Isaacri Pueyasocua tiuujia quiquiaari juhua na que Abrahamjuhuaj. Isaac niquiocuaari caapueya rooquiaari. Nojoriiri quiquiaari Esau, Jacobonio. (Mii 7.8)
- Ismael:** Abraham niyanu. Ismael nucua cutaraari maja Abraham niquiocua. Tarijia, Pueyasoori Abraham sequequiaari, tama neyanuucujiaaja supueno pueyari jiyanoahua canenutaniya queraatia pueya nojori quiniuria, serojosoo. Naa Pueyaso sequesacari, nojuajaari Abraham niquiocuajanaa Saara niyanurano sequeriquiaa, maja Ismael. Naajaa, Pueyasoori maninia miiquiaari Ismaeljuhuaj, Abraham niyanu na quiniucua. Naacuajitij, Ismaelri queraatia niquiohuaraca quiquiaari, doce niquiohua. Nojoriicujajinio supueno pueyapueeri doce pueyapue quiquiaari. Nojoriiri cariquia jiyajinia quijiaa quiquiaari. (Gá 4.22-23)
- Israel:** Pueyasoori Jacobo sesojoquiaariuhua “Israel”. Naacuajitij, puetunu Jacobo niquiohuacujajinio supueno pueyajanaari sesojosaaquiaari “Israel pueyata”. Nojori quijia jiyari jiyaniquishia “Israeltajuhua”, “Canaán jiyatuhua”. Jiyaniijia Salomón nuhuaji saniniuujia, neyanu tojitajaca jiyari jiyaniquishaaquiaari “Judeata”. Na ruuretajaca jiya cutaraari jiyaniquishaaquiaari “Israelta”. Jesucristo nuhuaji, puetunu Jacobocujajinio supueno pueyajanaari taanuusaquiaari nojori quijia jiyajini. Shusha nio pa quishacari, 14 de mayo de 1948, Judiocuacaari Israel jiya jiiitanaara quiquiaariuhua. (Ro 9.1-3; 11.11-12)
- Jocobo:** Nojuajaari Isaac niyanu, Abraham jiniyanu. Cuno pojoriiri puetunu Israel pueya panishano supuetanaajanaa (Mr 12.26-27). Pueyasoori Jacobo sesojoquiaari “Israel”. Naacuajitij, puetunu nocujajinio supueno pueyajanaari jiyaniquishaaquiaari “Israel pueyata”. Jacoboori doce niquiohuaraca quiquiaari: Rubén, Simeón, Leví, Judá, Dan, Neftalí, Gad, Aser, Isacar, Zabulón, José, Benjamín. Cuno pojoriicujajinio supueno pueyapueeri Hebreo pueyata jiyaniquishano quijia, Israel pueyatajuhuaj, Judiocuacatanio. (Mii 7.8-9; Ro 9.10-13)
- Janes, Jambres:** Nio pueyajini saaja nio tanee Timoteocua naajioneejinia pohuatashiyari. Tariucuaaanu Pueyaso Rupaajinia, nio pojoriijini pohuatashiyajariuhua. (Exodo 7.11-13, 22) Majaari nio pojori sesaca jiyaniquishaanu Tariucuaaanu Pueyaso Rupaajiniajuhuaj. Judiocuacaari pueyaracaanu niishijia poojotanu tariucuaaanu pueya miishanojinijia. Janes, Jambresnio, nojori naasucuaari Satanás cumaaca jiiitajaca quiquiaari jiyajeneta casaa nojori miiniuria. Naacuajitij Faraónri shiniujushaaquiaari Moisés masesano na ruuretana. (2 Ti 3.8)
- Jerusalén:** Tariucuaaanu Cananeo pueya tiaca quijia. Jiyaniijia Davidcujajiaari cuno taucuaa shocotaquiaari. Naacuajitij, Jerusalén tiacaari pueyaracaanu Judiocuaca jiyaniijia quijia quiquiaari.
- Pueyaracaanu Jesucuaa tiuujiaa quijiaranoori miriqui sequestiyari “Quiarinio Jerusalénta”. Cunoori Pueyaso jeenucuasano jiyocuaaanu. (Niq 21.10—22.5)
- Jesabel:** Jesabelri Israel pueya jiyaniijia Acab niquiocua quiquiaari. Jesabelri Sidón tiacajiniijio quijia. Na queeri Sidón tiacajinia quijiaa jiyaniijia quiquiaari. Cuno taucuaaari jiyanoahua sacuaratia miijiaa quiquiaari, Baal quiniucua nojori jiyaniishano pueyaso. Naacuajitij, Jesabelri neyaca Acab shiniujuquiaari Baal jiyatesaanura Israel pueyapue pueyasorajuhua Pueyasojanaa niti.
- Jesucristo Niquitishano Juan Naajioneejinia saniniuujia, tamonu Jesabeljiniijiri tii pohuatashiyari. Nojuajaari sapuenu juhua Pueyaso sequesano caminiuujinia quiquiaari. Nojuajaari Pueyaso pueya niishitiojoquiaari na camishoo maajipohua nojori numuetucujunura, naajuhua, nojori miaquenura shu, teyanote shipiniijosano casaacuara mosaaquiaari juhua Pueyasocuaracuajani. Naa sacuaratia niishitiojonacuajiaari miriqui jiyaniquishia “Jesabela”, taa na sesaanucua maajijini tariucuaaanu Pueyaso Rupaajinia pohuatashiyacuajani. (1 Reyes 16.29-31; 19.1-2; Niq 2.20)
- Jesu:** Pueyano rupaajinia, Jesuuri sequeya “Pueyasoori pueyacuaji Tacuna”. Naacuajitij, Pueyaso Niyanu raquishacarijia, Pueyaso seru Gabrielri na nucuarano María sequequiaari neyanurano cuara sesojosara “Jesu”. (Mt 1.21)
- Jesucristo:** (Quia pajere “Jesu”, “Cristonio”).
- Job:** Supuetana pueyano. Jiyanoahua casamiriaca quijiaari. Na nuhuaji, Pueyasoori Sesaaca shanacuquiaari Jobcua, na saniniuujiniuria Job. Jiyanoahua jiyanoahua taraatia na miiquiaariiri. Naajaa, majaari Job pishiniu quiquiaari Pueyasocua na tiuuniu. Sesaacaari Job jaariutiaquiaari puetunu na jiiitiasanojuanaa, puetunu necohujanaano. (Tiaari necohua shiniacaquiaari.) Na nuhuaji cutara, Pueyasoori Job jiyatequiaari socua queraatia casamiriaca na quiniuria, queraatia niquiohuaracano. (Stg 5.11)
- Jonás:** Nojuajaari tariucuaaanu Pueyaso sequesano caminiuujinia quiquiaari narta Israel pueyara, taucuaracano. Pueyaso jiyarosacari Jonás Nínive tiacajinia, cuno taucuaa na pohuatana Pueyaso sequenu panishano, Jonásri saaja tamacora mashiquiaari juucua. Puereetuca buquejinia tacaquiaariiri tucuaaanu na quiaanura tamaquiria. Pueyasoori jiyanoahua piyarojotequiaari paratu, shoniacua caminia queyocuanura jiyanoahua. Jiyanoahua puereeta quiquiaariiri. Jonás cuajiaari niishiquiaari Pueyasoori naa miiriquiaa na ruuretanaucua nojuaja. Naartej Jonásri buquejiniaacuma poonijionaa sequequiaari nojori cuara jataara nojuaja caminiajia. Naa nojori mishacari, paratuuri suraajequiaari. Maja cutaraari Jonás shushiniu quiquiaari. Pueyasoori tari jeenucuaciaari puereetuca sapitiaaja, Jonás na mianura. Naacuajitij, Jonásri sapitiaaja seecojinia quiquiaari saminio. Tii noojia tacatoquiaariiri Pueyaso tojjia na quiniuhua. Naartej, Pueyasoori caminia casaqueyaji cuno sapitiaaja macayotequiaariuhua Jonás. Jonásri jiuujianaraca juuca, jiuujianaraca niucua shocotejoquiaari sapitiaaja seecojinia na quishacari. Naacuajitij, nojuajaari miriqui quiquiaari juhua Pueyaso Niyanu, cante jiuujianaraca juuca shocotejoquiaari raacocujani, macu na quishacari, na nuhuaji samitiquiaariuhua. Tariucuaaanu Pueyaso Rupaajinia quiyacuajiaari Jonásjini pohuatashano. Na naajioneeri na sesaatiaajuhua. (Mt 16.4)
- Judá:** Judaari Jacobo doce niquiohuajiniijio quiquiaari. Puetunu Judaacujajinio supueno pueyajanaari sesojosaaquiaari “Judiocuaca”. Jiyaniijia Davidri Judio pueyano quiquiaari, Jesucristonio. Davidri puetunu narta

- Israel pueya jiyaniijia quiquiaari, neyanu Salomónjuhuaj. Na nuhuaji, Israel pueyari Salomón niyanu ruuretaquiaari maja nojori jiyaniijia na quiniuria. Naacuajitij, Israel pueyari tamonu pueyano jiyatequiaari jiyaniijia na quiniuria nojoriria. Salomón niyanu Roboamri saaja narta Judiocuaca jiyaniijia quiquiaari, Benjamíncuajinio supueno pueya jiyaniijiano. Puetunu nojorijianaari jiyaniquishiya “Judiocuacata”. Puetunu nojori quijia jiyari jiyaniquishaaquiaari “Judeata”. (Quia pajere “Judío”, “Judeano”.) (Mt 2.6; He 7.14; Niq 5.5; 7.5)
- Judea:** Supuetana Jacoboocuajinio supueno pueya jiyari jiyaniquishaaquiaari “Judeata”. Judeari tariucuacaanu sesaraca quiquiaari “Canaán”. Judea jiya sesa tarajanuuri quiquiaari “Israel”. Jesu quishacari mijiria, supuetanaa Israel jiyari tariucua raquiriojotasano quiquiaari jiuujianaraca jiyacara: Galilea jiya, Samaria jiya, Judea jiyano. (Quia pajere “Israel”, “Judaanio”.) (Mt 2.1, 6, 21-22)
- Judi:** Judaacuajinio supueno pueyari sesojosaaquiaari “Judiocuaca”. Na nuhuaji, puetunu Jacoboocuajinio supueno pueyajanaari jiyaniquishaaquiaari “Judiocuacatajuhuaj”. Taucuacaari naa Israel pueya jiyaniquiquiaari. Naacuajitij, Samaria jiyajinijinio taatuuri Jesu jiyaniquiquiaari “Judiota”, naajaa, Jesuuri Galilea jiyajinijinio quiquiaari. Saniniuujia, narta Judiocuacaari Jesu jiyaniquiquiaari “Galilea jiyajinijinio pueyanote”, nojori niishiyacquiniucua nojuaja cutaraari Judea jiyajinia rasaaquiaari, Belén tiacajinia. (Jn 4.9)
- Kilómetro:** Cunoori mil metro. (Niq 14.20; 21.16)
- Lepra:** Tariucuacaanu, queraatia tamaatia cusonu shoquejiniiaari jiyaniquishaaquiaari “leprata”. Seetanujuaanaa, lepraari jiyanoahua puereeta cusonu quiquiaari. Majaari na naata naarajosaanu quijia. Quiarjia cutaraari na naata naarajosaanu. Paaqueja na quiniucua, lepraraca pueyari taanuusaquiaari tucuacaanu nojori quiniuria tamajaaja, maja quenaaja nojori catecanonura narta pueya. Lepra cusonuuri jacaria maqueya na camaru juaashiquia, na niohuacajuhuj, na najacuanio, pueyano cuaara cusoyarejaatijia. (Lc 17.11-13)
- Leví:** Jacobo niyanu. Leviicuajinio supueno pueyari Pueyaso saquiriojosano pueya quiquiaari narta Israel pueyajinijinio, nera nojori poonijionura Pueyaso Secojoua rerejojuajinia. Nojoriiri jiyaniquishaaquiaa “Levitata”. Moisésri Levita pueyano quiquiaari, tarajanu Aarónnio. (Quia pajere “Aarón”.) (He 7.11)
- Levita:** Puetunu supuetana Leviicuajinio supueno pueyajanaari jiyaniquishaaquiaa “Levitata”. (Mii 4.36)
- Lino:** Tamonu jiyasocua. Na jiyona rareyari socua jiyanoahua cohujaja shiquiamuejiniji. Jiyanoahua maninia toqueeri shipinishano quijia lino rareyajiniji. Cuno toqueeri mariyata sesojosaaquiaa lino toque. (Mr 14.51; Niq 15.6; 18.16; 19.7-8)
- Lot:** Lotri Abraham nuhuajishana Harán niyanu quiquiaari. Lotri na que tarajanuta pacuquiaari Canaán jiyajinia, Ur tiacajiniji. Sodoma tiacajinia quishiiri. Sodoma tiacajinia quijiaacari jiyanoahua sacuaraatia miijiaa quiquiaari: maajishuriu numuetucunuujuaa, maajishuriuhanio. Lotri saniniuujia maninia pueyano quiquiaari. Naacuajitij, Pueyaso jaara Sodoma tiacajinia quiniaa pueconu paniquiaari, Pueyaso seyari Lot mashiquiquiaari Sodoma tiacajiniji necocuataja, necojoritiano. Necocua cutaraari shoniria jataquiaari na nijiniara na niquishacari Sodoma tiacajiniji na mashishacari juucua. Pueyaso seyari tari maatia na numootequiaari juucuacuaja maja na nijiniara na niquiniuria. (2 Pe 2.7-8)
- Magog:** (Quia pajere “Gog”.)
- Maná:** Pueyaso jaara Israel pueya mashiquiquiaari Egipto jiyajiniji, nojoriiri pueyaracaanu rucuanajoquiaari cariiquia jiyajinia, cuarenta marijia cuaara nojori shocojoquiaariijaatijia. Shaaqui nojori miajajaura quiniucua cuno puereeta jiyajinia, Pueyasoori jiyocuacaanu casa tinijioquiaari nojori miaquesocoriquiano. Shushajanaa Israel pueya niquishacari cuno casa jiyacu maano cohujata, nojoriiri nequesoretooquiaari: “¡Nia niquiri! ¿Maná?” Pueyano rupaajinia, manaari sequeya: “¿Casaatucuaanojoni?” Naacuajitij cuno jiyocuacaanu tinishano panri sesojosaaquiaari “maná”. Puetunu tariquicuajijianaa tinijiosaaquiaari. Saaja sábado juucaari maja na quiniu quiquiaari, pueya samaatenura. Viernes juuca nojori reratesanoori tariucuaja quiquiaari sábado juucarajuhuj. (He 9.4)
- Melquisedec:** Nojuajaari tariucuacaanu pueyacuara secojona quiquiaari, Abraham quishacarijuhuaj. Majaari nojuajiniji pohuataaano quiquiaari na rasaanujiniji, na shaajenujinijino. Naacuajitij, nojuajaari miriqui juhua pueyaracaanu quijia, maja juhua Leviicuajinio supueno pueyacuara secojona. Naajuhuj, Melquisedecri socua jiyaniijijanaa quiquiaari Levita pueyajiniji. Levita pueya supuetana Abrahamcuajaari Melquisedec niqutioquiaari Pueyasora na riuriotaca. Naacuajitij, Hebreo Pueyacuara Naajioneejinia, paacuajaari niishitiojoshiyani Jesucristo quiniucua juhua Melquisedec, pueyaracaanu quijia, nojuajaari socua jiyaniijijanaa Leviicuajinio supueno pueyacuara secojonaajiniji. (He 7.1-3, 6-9)
- Miguel** Jiyanoahua cumaacaraca Pueyaso seru. Nojuaja naasucuaari Pueyaso jiyatesano na saquiriojosano Israel pueya jiitianara. Pueyasoori jiyanoahua queraatia seyaraca. Paari saaja querajaa nojori sesaca niishiyani: Miguel, Gabriel, Luciferonio. Luciferocuajaari Sesaacara jataquiaari. (Ju 9, Niq 12.7-9)
- Mil:** Paa jaara queraatia casami serojoreni, paa jaara cien serojonu pacutejore pueyaracaanuni, cien casami maapue jaara quiri diez maapue, puetunu cunojuanaari mil. Mil naa naajiosano: 1000. (Mr 6.44)
- Millón:** Mil maapue jaara quiri, puetunu maanujuaanaa jaara mil casa quiri, puetunu cunojuanaari niquiriyatu millón quiya. Un millón naa naajiosano: 1'000,000. (Mt 18.24; Niq 9.16)
- Mirra:** Terebinto naana riyaca. Shanohua jaanujua. Jaara cojitishaare vinota, naarajotaja quiquiaari noonuucua. Jaara cojitishaare olivo jajau shiyocuata, macuucua shuquiujiutiasaaquiaari, caqueya jeenucuaasanaara raaco niasocoriquiano. (Mt 2.10-11; Jn 19.39-40)
- Moisés:** Abraham jiniara Jacobo jaara pacuquiaari Egipto jiyajinia, neyanu Joseeta na quiniuria, puetunu necohujanaari nata quiojoquiaarijuhuaj, nojori niquiohuanio. Puetunu Jacoboocuajinio supueno pueyajanaari jiyanoahua canequiaari pueyaracaanu nojori quishacari cuno jiyajinia. Na nuhuaji, nojoriiri Egipto jiya jiyaniijia seyara quiquiaari. Jiyanoahua taraatia mijiosaaquiaariiri. Jiyacaritij, Moisésri rasaaquiaari. Juhua Egipto pueyano canashitishaaquiaariiri jiyaniijijanaa tiajinia (Faraón tiajinia). Naajaa, narta Israel pueyacuara taraajeja quiquiaariiri. Na nuhuaji, Pueyasoori Moisés saquiriojoquiaari Israel pueya na mashiquiniuria Egipto jiyajiniji. Moisésri queraatia jiyajeneta casa miijioquiaari Faraón cuaara carteira Israel pueyajaatijia. Egipto pueya jaara Pueyaso cumaacata queraatia miitiasaaquiaari, Faraónri socua Israel pueya cartequiaari. Na nuhuaji, Moisésri narta Israel pueya jiyataquiaari Canaán jiyajiniara. Cunoori Pueyaso sequesano jiya, Abrahamcuajinio supueno pueyara quiriqiano. Cariiquia jiyajinia nojori rucuanajosacari, Pueyasoori Moisés niishitiojoquiaari queraatia rootasano, Israel pueya tojishocoriquiano. Moisésri puetunu cuno rootasanojuanaa naajiotajia.

Naajiotaquiaarijuhuhua Pueyaso niishitishano nojuaja jiya shipinishaanujiniji Pueyaso miishano, cuno nuhuaji miijiosanonio. Puetunu cunojuanaari coteenujuanaa cinco naajioneeca tariucuacaanu Pueyaso Rupaajinia quiyacuaja. Pueyaso niishitiojosano Moisésri jiyaniquishaaquiaa “Moisés Rootasanota”, “Moisés Niishitiojosanotajuhuj”, “Moisés Naajioneecatanio”. Cuno niishitiojosanoori socua maninia niishitiojosano tamasaca pueya niishitiojosanojiniji. Cuno niishitiojosanoori maatia rootaa taa pueya maninia miiniutianiya jatiqiu nojori quiniuriani, naajuhuj, nojori cuara jeecatoora jaara sesa miishaare. Tii rootaajaariuhuj taa pueya miiniutianiya Pueyaso jiyanooniuria nojorini, Pueyaso Niyanu cuara mosaariajaatiaja, seetanujuanaa Pueyaso jiyanooniuria pajaniya. (Mii 7.20-38; He 11.24-28)

Moloc: Mesopotamia jiyajinijinio taucuaa jiyaniishano pueyaso. Israel pueyari Moloc jiyatequiaari nojori pueyasora tamacarijuhuaj. Moloc tojitiajacaari jiyaniquiaari Moloc nojori shuquiritiniuria, nojori cuara tama nojori niquiohuajaaja quejoora manijinia, cuno Moloccuara na catenura. Cunoori jiyanoohua sacuaraatia miishano quiquiaari seetanu Pueyasarajanaa. (Mii 7.43)

Mostaza: Tamonu nacujua. Na jajauri jiyanoohua shiitianiyojua. Naajaa, jaara maashiri, shiyojuaari na naata jesuuniu na cashacucuaacua. (Mt 13.31-32; 17.20)

Necanuru: Supuetana rupaa. Pueyano niquiocua niyatu. Maja tama neyatujuaaja. (Mt 14.7)

Neftalí: Nojuajaari niquiriyatu Jacobo doce niquiohuajinijinio quiquiaari. Neftalíicuaajinio supueno pueyari sequesaaquiaari “Neftalí pueyata”. (Mt 4.13-16)

Nicolás: Majaari pa niishiniu cante nojuajani. Saaja niishishiya cutaraari na niishitiojosanoori sacuaraatia. Na niishitiojosano tojitiajacanaari na camishoo maajipohua numuetucunujuaca quiquiaari. Noo shu miaquejacajuhuj, teyanote shipinijosano casaacuara mosaaquiaari juhua Pueyasoocuaracuajani. Naa cuno shu nojori miaquenura nojori queranacusacaritij, nojoriiri juhuajaniya cararaatia miijioquiaari nojori tojishacari Nicolás jiyaniishano pueyano niishitiojosano. (Niq 2.6, 15)

Noveno: (Quia pajere “décimo”).

Número: Tahue rupaa. Pa serojosacari taa casaate quiyani, paari númerohua sequejani: uno, dos, tres; casa maraja: shuc, ishca, quimsa. (Niq 13.17-18)

Octavo: (Quia pajere “décimo”).

Olivo: Tamaatia naana sesa, na jajau sesajuhuj. Na jajauri jiyanoohua panishano. Na jajaujiniji shipinishanoori shiyocua sumatutajara, naarajotajara, shanohua jaanutaja cojitijotajarajuhuj, caaniuji noshitishocoriquianonio.

Oro: Socua panishano narta cumueeca casaajiniji. Tariucuacaanu cumaneecaari orojiniji shipinishaaquiaari. Maja puera cumueeca na quiniucua, na naata piquishaanu shanohua tiujiau shipinishaanura, jaanishonio. Majaari na niishiniu tiyarashiniu. Shiitianiyojua orota queraatia casami na naata masesaanu.

Oro jaara riuriatasaare curuutuucata cojitishano, cumueeca coshijinia mohuacashiyari jiyanoohua naseecajinia. Naacuajitij, curuutuucacari cuataja. (1 Pe 1.7; Niq 1.12-13; 21.21)

Oso: Nacujiniaacoji tamaatia puereeta casa sesa. Osoori puereetuca, socua puereetuca juunujiniji. Na nacaari juhua cayaca naca niquishano nareja socua puereetuca cutaraari. Na quiajaari tucuarucua juhua sare quiaja. Na juaashacoori jiyanoohua puereetajuhuj. Jaara juaatishaare, jiyanoohua puereeta quijiaari. Pueyano mojuua. Puetunu casaajanaa miaquejajanaari. (Niq 13.2)

Pan: Taucuaa neecaru. Trigo cashojuajiniji shipinishano, casa maaraja, cebada cashojuajiniji. Pueyaso Rupaajinia

pohuatasanonio, majaari saaco quiniu quiquiaari puetunu cuno jiyacajinijanaa. Panri poreetaja casaata shipininiu jiidishaaquiaari. Saaja Pascuara queranacusacariria panri poreetajaaju shipinishaaquiaari ocho juuca sasocoriquiano. (Lc 22.7, 19; Jn 6.9, 35)

Pascua: Queranacunu juuca sesa. Pascuara queranacunu juuca, Israel pueyari puetunu marijiajanaa cuno juuca niishijia. Nojoriiri cuno juuca queranacujua jiyanoohua maninia nojori quishacarija. Cuno juuca, Pueyasoori Moisés niishitiojoquiaari pueya cuara borrego nanaca shuquiujutiaara nojori tia tohuatayaji. Naacuajitij, Pueyaso jiyarosano seru Egipto pueya jiyapueranuhua puecooriquiano jaara nanaca niquiquiaari, nojuajaari cuno tia shocoquiaaricuaaja. Majaari jiyapueranu na monu quiquiaari na tia tohuatayaji nanaca shuquiutiasano quijia tijaajinia. Saniniuuja, Pueyaso sequesano ruuretajaca Egipto pueya jiyapueranuhuari puetunu puecoosaaquiaarijanaa. Nocuaji Faraónri socua Israel pueya cartequiaari nojori quiojonura Pueyaso sequesano jiyajiniara.

Pascua juucara miishanoori miriqui niishitiojoquiaari supuetanaa pueya, Pueyaso Niyanuuri juhua borrego mosocoriquiano puetunu nocua tiujuicajanaa jiyanooshaanura, naatej, taa supuetanaa pueya jiyanooshaaquiariaani borrego jaara mosaaquiaari nojori jiyapueranuhua puecoyaquishaanura.

Pueyaso seru shoconuua tia tee borrego nanaca niquishaaquiariini, cunora cuno juuca sesojosaaquiaari “Pascua juuca”. Pueyano rupaajinia, Pascuaari sequeya “shoconu”. (He 11.28)

Pentecostés: Tamonu queranacunu juuca sesa Supuetanaa Israel pueyari Pentecostés juuca queranacujua nojori shuquiritiasacari Pueyaso, nojori cotesacari carojotanu trigo. Pueyano rupaajinia, Pentecostésri sequeya “cincuenta”. Naa sesojosaaquiariiri siete semaana Pascua juuca nuhuaji na quiniucua. Naacuajitij, Jesucristo cusosacari Pascua juuca, cincuenta juuca nuhuaji, Pueyasoori na Sohanu jiyaroquiaari Neyanuucua tiujuicaja jiuujiajania na tiuquiniuria, seetanujuanaa Pueyaso muerasu nojori quiniuria. (Mii 2.1, 5)

Pilato: Nojuajaari Judea jiya jiyaniijia quiquiaari pueyaracaanu Jesu pohuatasacari Pueyaso rupaa Galilea jiyajinia, Judea jiyajiniano. César Tiberioori Pilato jiyatequiaari Judiocuaca jitianara. Pilatocuaajari Romano pueyano. Na sesaari Poncio Pilato. Judiocuaca jiyaniijianucua maniniucuanura nojuaja, nojuajaari socua sequequiaari Jesucristo cuara mosaaria niyacutesanojinia. Seis marijia shocojonu nuhuaji Jesu, na cusonu nuhuaji, Pilatojuanaari jiyarosaaquiaari Roma tiacajinia, tii na nequesoreesaanura. Tii tama cusoquiaarijiaarija, johuj, mosaaquiaari naasucuaari. (Lc 3.1; 13.1)

Plata: Cumaneecaari shipinishaaquiaa platajiniji, maaji maniniushitiaja casami, coshiquiano. Oroori jiyanoohua socua panishano platajiniji, naajaa, plataari socua cumueeca quijia. Naacuajitij, plataari socua maninia cumaneecara. (Mii 19.19, 23-24)

Primero: (Quia pajere “décimo”).

Pueyacuara Secojona: Pueyasoori Leviicuaajinio supueno pueya jiyatequiaari narta Israel pueyacuara secojonaa nojori quiniuria. Pueyacuara secojonaa nojori quishacari, nojori poonijosanoori queraatia quiquiaari. Israel pueya rucuanajosacari Egipto jiyajiniji Canaán jiyajiniara, pueyacuara secojonaari Pueyaso Secojoua suhuorotu niyaretaja poosocoriquiano. Puetunu casamijianaari juniocojosaaquiaari toqueyata. Naajuhuj, socua puereetuca casa mishiquiotuquiaari toqueyataari maja na niquishaanura. Narta Levita pueyari na patootanaa quijia.

Israel pueya jaara pootia quiquiaari, pueyacuara secोजनाari Pueyaso Secोजना suhuorotujinia poonijionuujua. Nojoriiri pueyaracaanu seya puecootujua Pueyasooacara catijasocoriquiano, tariquicuaji, tenacarijuhuaj. Naajuhuj, nojoriiri narta pueyacuara na seru moojua, na nanaca shootesaanura Pueyaso jiyanoonuria na camaru.

Pueyacuara secोजनाari Pueyaso Secोजना suhuorotujinia samari cojuajajuhuj, pueyaracaanu samari noshitishano quiniuria Pueyaso Quishaquijianaa tajoji. Naajuhuj, puetunu seamanajanaa, nojoriiri shusha majeetejosano pan niojoquiaari miaquejajinia Pueyaso niqiuara tii na quiniuria pueyaracaanu. Cuno pan jaara tari tariucuariquia quiquiaari, cunoori pueyacuara secोजनाa sasocoriquiano quiquiaari.

Pueyacuara secोजनाari narta pueya niishitiojua Pueyaso Rootasanojuhuaj.

Israel pueya tojishacari Moisés Rootasano, nojoriiri pueyaracaanu Pueyaso niqutiojua na casaajiniji, nojori nataacuacajinijinio. Pueyacuara secोजनाari puetunu cuno casaajanaa masejojua tama nojori miaquesocoriquianojuaja, Pueyasooacara catijasocoriquianonio. Nojoriiri Pueyaso Secोजनाa tiajinia shanohua jaanutaja catijiaja pueyaracaanujuhuj. (He 7.5, 11, 26-28; 8.3-5; 9.1-10)

Quiniento: Cién jaara serojonu pacutejosaare cinco, cunoori sequeshiya “quiniento”. Quiniento rupaari shipinishano no caapiqui númerojiniji: cinco, cientonio. Quinientoori mil cajiniocua. Númerota naajioshiya naari: 500. (Lc 7.41; 1 Co 15.6)

Quinto (Quia pajere “décimo”).

Refam: Rijiaari quiquiaari, taucuaca jiyatesano na pueyasora. Cuno rijiaari quiarjia jiyaniquishiya “Saturnote” tahua rupaajinia. Tariucuaaanu, queraatia Pueyaso niishiyashijia pueyapueeri jiyaniquiaari jiyocuaaanu cuhuatananaa casaa naasucuaari cumaacaraca quijiaca, niishijianoo. Naaratej cuno pueyari cuno casaa shuquiritiquiaari juucua, cuno casaa miiniuria maninia nojori. (Mii 7.43)

Roma: Puereetuca tiaca Italia jiyajinia. Cuno taucuacaari puetunu jiyacajanaa jiitiaquiaari Jesucristo quishacari mijiria. Nojori jiyaniijajanaari jiyaniquishaaquiaari “Césarta”. (Quia pajere “César”). (Lc 3.1, 12; Mii 18.2; Niq 14.8)

Romano: Roma tiacajinijinio pueyari jiyaniquishiya “Romano”. Césarri tamasaca tiaca tamonu jiyacajinia jiyatequiaari Romano quijiacarajuhuj. Naacuajitij, canapuate cuno Romano pueya tiacajinia rasaaquiaarini, nojoriiri Romano pueya quijiacajuhuj. Naacuajitij, Pablo rasaaanuucua Tarso tiacajinia, nojuajaari Romano pueyano quiquiaari. César jiiatiasacari queraatia jiyaca, pueyari jiyanoohua panijia Romano pueyano quiniuria, maja juhua tahue na quiniuria nojoriria.

Pueyano na naata Romano pueyanora jiyatesano quiquiaarijuhuaj nojuaja jaara queraatia cumaneeca niqutioquiaari naa na jiyatesaanura. (Mii 22.25-28)

Rubén: Niquriyatu Jacobo niqiuohuajinijinio.

Saara: Abraham niqiuocua. Saara queeri Abraham que quiquiaarijuhua, saniniuujia na nucuaari tamonu maaji quiquiaari. (Génesis 20.12) Saaraari niyajaru quiquiaari. Naacuajitij, Saaraari Pueyaso sequesano sorequetaquiaari Pueyaso jaara neyaca sequequiaari tariucua motaja Saara quishacari: “Quia niqiuocua Saara mueyaraca quiniutianiya”. Cunora Saara niyanuuri sesojosaaquiaari “Isaac”. Pueyano rupaajinia, Isaacri sequeya “sorequenu”. (Gá 4.24-28; He 11.11; 1 Pe 3.6)

Sábado: Semaana puequeetu juuca sesa. Pueyasoori puetunu na shipinishanojuanaa tucuaatiquiaari seis juuca

shocojosacari. Séptimo juuca samaatequiaariiri. Na nuhuaji, nojuajaari Moisés rootaquiaari Israel pueya cuaara samaateera puetunu sábado juucajanaa. Jesu quishacari mijiria, Fariseocuacaari tari jiyanoohua maatejoquiaari sábado juucara Pueyaso rootasano. Naacuajitij, nojoriiri pueyaracaanu Jesu juaaquiocuaari cusosuhua na naatanijosacari samaatenu juucajuhuj. (Jn 5.8-10; 19.31) (“Domingo” quia niquriijuhuj.)

Saduceo: Saduceocuacaari noo Judiocuaca, canapuate Moisés Rootasano tojitiajaca quiquiaaricuaajani. Maja cutaraari nojori tojiniu quiija nojori supuetanaa caminiujuushano taa Fariseocuaca tojiquiaaricuaani. Naajuhuj, Saduceocuacaari sequejaca, pa cusosacari majaari pa cuaqueya samiitianu quiniutianihua. Sequetujuajaariuhuj shaaquiniaari Pueyaso seya, pueyano sohuanujuhuj. Socua queraatia Fariseocuacaari quiija Saduceocuacajiniji, naajaa, Saduceocuacaari socua tojishano pueya quiija. Jesu quishacari mijiria, pueyacuara secोजनाa jiyaniijiaari Saduceo quiquiaari, queraatia narta Judiocuaca jiyaniijianucujuhuj. (Mt 3.7-10; Mr 12.18; Mii 5.17)

Salmo: Pueyano rupaajinia, salmoori sequeya jaaquequejonee. Supuetana jiyaniijia Davidri queraatia jaaquequejosano naajioquiaari. Tariucuaaanu Pueyaso Rupaajinia, cuno naajioneecaari sesojosaaquiaari “Salmos”. Salmoori maninia jaaquequejosocoriquiano Pueyaso pa maniniuhuaqueetanura. Queraatia salmoori Pueyaso Jiyarosocoriquianojiniji miriqui pohuataacuaja. Jesucuaajari rasaaquiaari mil marijia jaara shocojoquiaari jiyaniijia David nuhuaji. (Mii 13.32-33)

Salomón: Jiyaniijia David niyanu. Na que shaajesacari, Salomónri Israel pueya jiyaniijiaari jiyatesaaquiaari. Pueyasoori Salomón jiyatequiaari jiyanoohua socua niishijia na quiniuria puetunu tamasaca pueyajiniijianaa, socua casamiriacanio. Nojuajaari narta Israel pueya jiitiaquiaari maninia. Na saaquianoshishacari saniniuujia, nojuajaari mosecara quiquiaari Pueyaso rootasano na tojiyaquinuu-cua. Cunora, na shaajesacari, Pueyasoori Salomón niyanu jaariuutiaquiaari diez Jacobo niqiuohuacujinijio supueno pueyapue. Naacuajitij, Salomón niyanu Roboamri saaja Benjamíncuajinijio supueno pueya jiyaniijia quiquiaari, na supuetana Judaacuajinijio supueno pueya jiyaniijianio. (Mt 1.6-7; 6.29; 12.42; Mii 7.46-47)

Samaatenu juuca: (Quia pajere “Sábado”).

Samaru: Tariucuaaanu, Pueyasoori queraatia seya shipiniquiaari na panishano miijionaa nojori quiniuria. Saniniuujia, queraatia nojoriinijinioori Pueyaso ruuretaquiaari Sesaaca tojjia nojori quiniuria. Naacuajitij, nojoriiri tamajaaja samaruhuara jataquiaaricuaaja. Nojoriiri Pueyaso paracaajia. Pueyaso pueya taajetejacajaariuhuj, nojori sapojojuacajaariuhuj. Nojoriiri na naata pueya miiniu queraatia tamaatia sesa casaa, cusojuanujuhuj. Pueyaso Sohuanuraca pueya cutaraari na naata Sesaaca nujuatanu, samaruhanio. (Quia pajere “Satanás”). (Mr 1.23-28; 9.17-29; Lc 8.27-33; Mii 16.16; Ef 2.1-2)

Samuel: Moisés nuhuaji, Josué narta Israel pueya jiiatiana quiquiaari. Josué nuhuaji, Israel pueyari jiyaniijiaaju quiquiaari pueyaracaanu. Saniniuujia, Pueyasoori pueyaracaanu nequesoreenara saquiriojquiaari Israel pueyajiniji. Na nuhuaji Samuelri nequesoreena quiquiaari Israel pueya jiitariquiano. Nojuajaari pueyara Pueyaso sequesano caminiujuunia quiquiaarijuhuaj. Naacuajitij, Israel pueya jaara jiyaniijia paniquiaari taa nojori shocua jiyacajinia quijiaca taucuaca jiitiaquiaaricuaani, Pueyasoori Samuel niishitiquiaari Saúl na jiyatenura jiyaniijiaari. Saúl jaara sesequiaari, Pueyasoori Samuel niishitiquiaari David na jiyatenura jiyaniijia na quiniuria Saúl niti. Samuelri jiyanoohua Pueyaso tojjia quiquiaari pueyaracaanu. (Mii 3.24; 13.20-21)

- Sanedrín:** Sanedrín pueya maanuuri Israel pueyacuara secojonaa jiyaniijia nacasunaa quiquiaari, narta Israel pueya nequesoreenaajaariuhua. Nojoriiri niishijia quiquiaari puetunu narta Israel pueyajiniji saquiriojosano. Sanedrín pueyari quiquiaari setenta y uno pueya. Pueyacuara secojonaa jiyaniijaari Sanedrín pueyano quiquiaarijuhuaj. Queraatia Sanedrín pueyari Moisés Rootasano niishitiojonaa quiquiaari, Fariseocucanio. Sanedrín maanu naasucuaari juhua pa gobierno senadores, juhua corte supremonio. (Mr 15.43)
- Satanás:** Pueyano rupaajinia, Satanásri sequeya “paraca”. Satanáscuajaari Pueyaso paraca seetanujanaa, Pueyaso pueya paracajuhua. Nojuacuajaari Sesaaca. Tariucuaacuanu, nojuajaari socua shanohua, socua cumaacaraca quijia quiquiaari puetunu Pueyaso shipinishano quijiacajinijianaa. Nojuajaari shacantuuca quijia quiquiaari. Naacuajitij na sesaari quiquiaari Lucifer, Luceronio. Na nuhuaji, tama na cuaqueyajaaja shuquiritajara jataquiaariiri. Juhua Pueyasora quiniu paniquiaariiri. Naacuajitij nojuajaari sesequiaari. Ninishiqui quijia jataquiaariiri. Queraatia Pueyaso seya sapojoquiaariiri nojori tojitianura nojuaja Pueyaso niti. Naacuajitij Satanásri samaruhua jiyaniijia. Satanás seyacuajaari samaruhua. (“Miguel” quia niquirijihua.) (Niq 12.9-12; 20.1-3)
- Seda:** Tamaatia jiyaporojua taaqueyari jiyaniquishano “sedata”. Cuno taaqueyari nishiyocosano toqueyara. Jiyanhua panishano toqueyari cuno sedajiniji shipinishano. (Niq 18.12)
- Segundo:** (Quia pajere “décimo”).
- Semaana:** Pueyasoori seis juucajinia tucataquiaari na poonijosano, na shipinishacari jiya, jiya cajiniocuanio. Na nuhuaji, niquiriyatu juuca samaatequiaariiri. Cunora, Pueyasoori supuetanaa pueya niishitiojoquiaari juuca serojonura, nojori poonijonura saaja seis juucajuhua. Na nuhuaji, nojori cuaara samaateera niquiriyatu juuca, naatej, taa Pueyaso samaatequiaaricuaani. Cuno siete juucaari sequeshiya niquiriyatu semaana. Niquiriyatu marijaari cincuenta y dos semaanaraca. (Quia niquirijihua “sábado”). (Jn 20.1; Mii 20.7; 27.27; 1 Co 16.2)
- Séptimo:** (Quia pajere “décimo”).
- Sinaí:** Puereeta cariquia jiya Arabia jiyajinia tee Israel pueya rucanejoquiaaricuaani nojori jaara Egipto jiyajiniji mashiquiaari (Mii 7.30). Sinaí tuhananuuri Sinaí jiyajinia quia. Sinaí tuhananuucua Moisés quishacari, Pueyasoori Moisés niishitiojoquiaari puetunu Israel pueyara na Rootasocoriquianojuanaa. Pabloori niishitiojoquiaarijuhuaj, Sinaí tuhananujinia niishitiojosanoocua tiuujiacanaari juhua poonitijosano pueya quiyajaa, naatej, taa Saara seru Agar niyanu quiquiaari serucujani. Jesuucua tiuujia cutaraari juhua seetanujanaa Abraham niyanu Isaac. (Gá 4.21-31; He 8.5; 12.18-21, 25)
- Sión:** Siónri tuhananu sesa, tee tariucuaacuanu Jerusalén tiaca quiquiaaricujani. Jerusalén tiaca canesacari, Sión tuhananuuri sequeshiya, tee Salomón tiatequiaari Pueyaso Secojojuacuajani. Puetunu Jerusalén tiacajanaari socua sesojosaaquiaari Sión. Naajuhua, Siónri miriqui sequeya “Pueyaso Quishaqui jiyocuaacuanu”, “Quiarinio Jerusalénno”. Cunocujaaari juhuanujuaja jiyocuaacuanu quia. (Mt 21.5; Jn 12.15; Ro 9.33; 11.26; He 12.22; 1 Pe 2.6; Niq 14.1)
- Soconu:** Pueyasoori puetunu na shipinijosano casaajanaa shipiniquiaari maninara. Susanacuuri shanohua niquishano quiquiaari. Maninia quijiaari. Naacuajitij, Sesaaca jaara Pueyaso shipinishano pueyano sesonu paniquiaari, nojuajaari Evaacua susanacu pocuatequiaari. Eva sapojoquiaari cutaraari. Evaari nocuaji Pueyaso sequesano tojiyaquiaari. Naacuajitij, pueyano sesesacari, Pueyasoori susanacu sesacaquiaarijuhuaj. Naacuajiti soconuuri supuequiaari. (Génesis 3.1-15)
- Sesaacaari soconurano sesotequiaari pueya. Naaratej, Sesaacaari jiyaniquishaaquiaa “Soconuta”. Nojuacuajaari jiyanhua sapojonu niishijia. (Quia niquiri Satanás.) (1 Ti 2.14; Niq 12.9; 20.2)
- Sodoma:** Tariucuaacuanu tucuaa tiaca sesa, Canaán jiyajinia. Jordán moo jamatujinia quiquiaariiri. Abraham pacusacari Canaán jiyajinia, na raaquia Lotri Jordán moo jamatu saquiriojoquiaari na quijiaari, jiyanhua queraatia jiyasocua quiniucua tii, maninia puetunu na seyarajanaa. Lotri socua pacuquiaari Sodoma tiacajinijanaa na quiniuria. Sodoma tiacajinia quijiaari jiyanhua sesa miijia quiquiaari. Maajishuriu numetucununu porocua. Naajuhua, queraatia casamiriaca nojori quishacari, naajaa, majaari nojori taraajenu quiquiaari casamijiuniucuaacua. (Ezequiel 16.49-50) Naa sesa pueya nojori quiniucuatej, Pueyasoori Sodoma tiacajinia quijiaa puecooquiaari jiyocuaacuanu na tinishano manitia. Sodoma tiaca, Gomora tiaca, socua na shocua quijiaa tiacanio, puetunu tii quijiacajanaari naa puecoosaaquiaari mariyata sesa miijia nojori quiniucua. (Quia pajere “Lot”). (Mt 11.21-24; 2 Pe 2.6-8)
- Tahue:** Pueyaso Rupaajinia, saaja Judiucuaari pueyano quiquiaari cutara, Israel pueyatuhua. Puetunu tamasaca pueyapuejanaari tucuaa quiquiaari nojoriria. (Mii 10.28, 34, 45; Gá 2.11-14)
- Tercero:** (Quia pajere “décimo”).
- Trigo:** Tamonu jiyasocua juhua arroz. Trigo jajauri maninia, miaquesocoriquiano. Trigo cashojuuari socua panishano panra. Na naataari poreetesaanu. Saaco cashojuuari poreyashijia cutara. (Mt 12.1; Mii 27.38)
- Trompeta:** Jonenejosano casaa, broncejiniji shipinishano. Shanohua tojishano na rupaa. Tucuaacuanu tojishiyari. Naacuajitij, joneseshiyari pueya numootesaanura. Pueyasoori cunota maninihuaqueetasanojuhuaj. Trompetaari quera juhua corneta niquishano. (Mt 24.30-31; 1 Co 14.8; 15.52; Niq 8.6)
- Uva:** Natau. Jiyanhua panishano. Jajauraca, quera juhua tuhuaraona niquishano. Socua shoqueecaari. Neyonaari jiyocua. Israel pueyari uva cuhuariquiaa jiitajaca quiquiaari. Uva jaara sacuanijiasaare pananujinia, pueyaracaanu rishijiaari. Majaari na moquenu. Cuno uva sacuanijiasanoori sequeshiya “pasas”. Uva caacaari jiyanhua panishano ratusocoriquianojuhuaj. Naajuhua, na naata racatasaanu maninia morosano na quiquo shoque rupaa. Naa racatasanoori maja na sesenu. Nareja jerejaari. Jaara jerere, cunoori tahue rupaajinia sequeshiya “vino”. Najatunacutuhua. (Mt 9.17)
- Maninia muetujua uva jiyona quiniuria, na cashacuaari piyotasano puetunu marijarajanaa socua queraatia na muetunuhua. (Jn 15.2, 5-6)
- Vino:** Uva caaca jaara jerema, sequeshiyari “vino”. (Quia pajere “uva”). (Lc 1.14-15)
- Zabulón:** Nojuajaari Jacobo doce niquihuajinijinio quiquiaari. Zabulóncuajinio supueno pueyari sequesaaquiaari “Zabulón pueyata”. (Mt 4.13-16)